



50! 4. 1.


B
18.

Ex Bibliotheca
majori Coll. Rom.
Societ. Jesu

14
7

50! 4. 1

50
d
1.
~~50~~
~~54~~



E P I T O M E
CHRYSOStOMI IAVELLI
CANAPITII

SVPER PROPOSITIONIBVS
libri de Causis, & vnicuique propo-
sitioni apposito Commento,
ac etiam Examina ea-
rundem.



PROPOSITIO PRIMA.

O M N I S causa primaria plus est influens su-
per causatum suum, quàm causa secunda
vniuersalis.

COMMENTVM.



V M enim remouet causa se-
cūda vniuersalis virtutem suā
à re, causa vniuersalis, prima
non aufert virtutem suam ab
ea, quod est, quia causa vniuer-
salis prima agit in causatum
causæ secundæ antequam agat
in ipsum causa vniuersalis se-
cūda, quæ sequitur ipsum.
Cum ergo agit causa secūda
in causatum quod ipsam se-

quitur, non excluditur ipsius actio à causa prima, quæ est su-
pra ipsam, & quando separatur causa secūda à causato quod
sequitur ipsam, non separatur ab eo prima quæ est supra ip-

sam, quoniam est causa ei. Et nos quidem exemplificabimus illud per esse, & viuum, & hominem, quod est, quia oportet, ut sit esse in primis, deinde viuum, postea homo, viuū vero causa hominis est propinqua, & esse causa esse longinqua, esse igitur causa est vehementius homini quam viuum, quoniam est causa viuū, quæ est causa homini, & similiter quando ponis rationale causam homini, esse est causa vehementius homini quam rationalitas, quoniam est causa causæ eius. Et illius quod dicimus signum est, quod quando tu remoues virtutem rationalem ab homine non remanet homo, sed remanet viuum spirans sensibile, & quando remoues viuum ab illo non remanet viuum, remanet tamen esse, quoniam esse non remouetur ab eo sed remouetur viuum, quoniam causa non remouetur per remotionem causati sui, sed esse est causa viuū, & viuum est causatum eius. remanet ergo hominis esse. cum igitur non est indiuiduum homo est animal. & si non est animal, est esse tantum. Iam igitur manifestum est & planum, quod causa prima & longinqua est plus comprehendens, & vehementius est causa rei quam causa propinqua, & propter illud sit eius operatio vehementioris adhærentiæ cum re, quam operatio causæ propinquæ, & hoc non fit. nisi secundum hoc quod in primis res non patitur, nisi à virtute longinqua, deinde patitur à virtute quæ est sub prima, & causa prima adiuuat secundam causam super operationem suam, quoniam operationem quam secunda efficit, & prima efficit. Veruntamen efficit eam per alium modum altiore & sublimiorem, & quando remouetur causa secunda à causato suo, non remouetur causa prima ab eo, quoniam causa prima est vehementioris, & maioris adhærentiæ cum re, quæ causa propinqua, & non fingitur causatum causæ secundæ nisi per virtutem causæ primæ, quod est, quia causa secunda non efficit rem, sed influit causa prima, quæ est super ipsam, super illam rem de virtute sua, qua adhæret ei adhærentia vehementi, & seruat eam, Iam ergo manifestum est & planum, quod causa longinqua vehementius est causa rei quam causa propinqua quæ sequitur eam, & quod ipsa influit virtutem suam super eam, & seruat eam; & non separatur ab ea separatione causæ suæ propinquæ, immo remanent in eo, & adhæ-

ret ei adhærentia vehementi secundum quod ostendimus & exposuimus.

PROPOSITIO II.

OMne esse superius, aut est superius æternitate, & ante ipsam, aut est cum æternitate, aut est post æternitatem, & supra tempus.

COMMENTVM.

ESse vero quod est ante æternitatem est causa prima, qm̄ est causa ei, sed esse quod est cum æternitate est in intelligentia, quoniam est esse secundum vnā habitudinem. vnde non patitur, neque destruitur, esse vero quod est post æternitatem, & supra tempus, est anima, quæ est in horizonte æternitatis inferius, & supra tempus, & significatio quod prima causa est ante æternitatem ipsam, & quod esse in ea est acquisitum, & dico quod omnis æternitas est esse, sed non omne esse est æternitas. ergo esse est magis commune quam æternitas, & causa prima est supra æternitatem, qm̄ æternitas est causatum ipsius, & intelligentia apponitur, vel parificatur æternitati, qm̄ extenditur cum ea, & non alteratur, neque destruitur, & anima annexa est cum æternitate inferius, quoniam susceptibilior est impressionis quam intelligentia, & est supra tempus, quoniam est causa temporis.

PROPOSITIO III.

OMnis anima nobilis habet tres operationes. nam ex operationibus eius est operatio animalis, & operatio intellectualis, & operatio diuina &c.

COMMENTVM.

Operatio diuina est quoniam ipsa, præparat naturam cum virtute, quæ est in ea à prima causa. eius autem
a ij opera

L I B E R

operatio intellectualis est quoniam ipsa scit res per virtutē intelligentiæ quæ est in ipsa . eius autem operatio animalis est, quoniam ipsa mouet corpus primum, & omnia corpora lia, quoniam ipsa est causa motu corporum, & causa operationis naturæ, & non efficit anima has operationes, nisi quoniam anima est exemplum virtutis superioris, quod est, quia prima causa creauit esse animæ mediante intelligentia, & propter illud facta est anima efficiens operationem diuinā . postquam ergo creauit prima causa esse animæ, posuit eam sicut instrumentum intelligentiæ, quo efficiat operationes suas . propter illud ergo anima intelligibilis efficit operationem intelligentiæ, & quia suscipit impressionem intelligentiæ facta est inferioris operationis quam ipsa intelligentia impressione sua in id quod est sub ipsa, quia ipsa non im-
primit vires nisi per motum, & quod est sub ipsa non recipit operationem eius nisi ipsa moueat ipsum propter hanc ergo causam fit quod anima mouet corpus . De proprietate nanque animæ est, vt viuificet corpora, quando influit virtutem suam super ea, & directe perducit eam ad operationem rectam . Manifestum est igitur nunc quod anima habet tres operationes, quoniam habet virtutes tres, id est virtutem diuinam, & virtutem intelligentiæ, & virtutem suæ essentiae secundum quod narrauimus, & ostendimus .

PROPOSITIO IIII.

PRima rerum creatarum est esse, & ante ipsum non est creatum aliud .

C O M M E N T V M .

QVod est, quia est supra sensum, & supra animam, & supra intelligentiam, & nō est post causam primam latius, nec prius creatum ipso . propter illud ergo factum est superius creatis rebus omnibus, & vehementius vnitum, & non est factum ita, nisi propter propinquitatem suam esse vni puro, & vni vero, in quo non est multitudo

titudo aliquorum modorum. Et esse creatum quamuis vnū sit, tamen multiplicatur, id est ipsum recipit multiplicatē, & ipsum quidem non est factum multa, nisi quia ipsum quamuis sit simplex, & non sit in creatis simplicius ipso, tamen est compositum ex finito, & infinito, quod est, quia esse quod ex eo, id est immediate sequitur causam primam, est intelligentia, quæ completa est in vltima potentia, & in reliquis bonitatibus, & formæ intelligibiles in ipso sunt latiores, & vehementius vniuersales, & quod est ex eo, id est immediate inferius, est intelligentia, veruntamen est sub illo intelligentia in complemento, & virtute, & bonitatibus, & non sunt formæ intelligibiles in illa ita dilatæ, sicut est earum latitudo in illa completa intelligentia, & esse quidem primum creatum est in intelligentia totum, veruntamen intelligentia in ipso est diuersa secundum modum quem diximus. Et quia diuersificatur intelligentia, fit illic forma intelligibilis diuersa & sicut ex forma vna. propterea, quod diuersificatur in mundo inferiori proueniunt indiuidua infinita in multitudine, sic ex esse causato primo, propterea, quod diuersificatur apparent formæ intelligibiles infinitæ, veruntamen quamuis diuersificentur non seiunguntur ab inuicem, sicut est seiunctio indiuiduorum, quod est, quoniam ipse vniuntur sine corruptione, & separantur absque seiunctione, quoniā sunt vnum habens multitudinem, & multitudo in vnitatem. Et in intelligentiæ primæ influunt super intelligentias secundas, bonitates quas recipiunt à causa prima, & intendunt bonitates in eis vsque quo consequuntur vltimum earum.

PROPOSITIO V.

Intelligentiæ superiores primæ, quæ sequuntur causam primam, imprimunt formas secundas stātes, quæ non destruuntur ita, vt non sit necesse iterare eas alias vice. Intelligentiæ autem secundæ imprimunt formas decliues, & separabiles, sicut est anima.

L I B E R
C O M M E N T V M.

Ipsa nanque est ex impressione intelligentiæ secundæ, quæ sequitur esse creatum inferius, & non multiplicatur animæ, nisi per modum quo multiplicantur intelligentiæ, quod est, quia esse animæ habet finem, sed quod ex eo est inferius est infinitum. Animæ igitur quæ sequuntur intelligentiam perfectæ sunt & completæ, paucæ declinationis, & separationis, & animæ quæ sequuntur esse inferius sunt in complemento, & declinatione sub animabus superioribus, & animæ superiores influunt bonitates suas quas recipiunt ab intelligentia super animas inferiores, & omnis anima recipiens ab intelligentia virtutem, plus est super impressionem fortior, & quod impressum est ab ea est fixum stans, & est motus eius æqualis & continuus, & illa in qua est virtus ex ea intelligentiæ, minor est in impressione sub animabus primis, & est quod ab ea impressum est debile euanescens destructibile, veruntamen quamvis sit ita, tamen permanet per generationem. Iam ergo ostensum est, quare factæ sunt formæ intelligibiles multæ, & non est esse earum nisi simplex, & quare factæ sunt multæ, animæ, quarum quædam sunt fortiores alijs, vel quibusdam, & esse earum est vnum simplex, in quo non est diuersitas.

P R O P O S I T I O V I.

Causa prima superior est omni narratione, & non deficiunt linguæ à narratione eius, nisi propter narrationem esse ipsius: quoniam ipsa est super omnem causam, & non narratur nisi per causas secundas, quæ illuminantur à lumine causæ primæ.

C O M M E N T V M.

Quod est, quoniam causa prima non cessat illuminare creatum suum, & ipsa non illuminatur à lumine alio, qm̃ ipsa

ipsa est lumen purum, super quod non est aliud lumen. ex illo ergo sola prima causa facta est, cuius deficit narratio, & non est ita nisi quia supra ipsam non est causa per quam cognoscatur, quia omnis quidem res non cognoscitur nisi ex ipsa sui causa cum ergo res est causa tantum, & non est causatum, non scitur per causam primam, neque narratur, quoniam est superior narratione, neque consequitur eam loquela, quod est, quia narratio non fit nisi per loquelam, & loquela per intelligentiam, & intelligentia per cogitationem, & cogitatio per meditationem, & meditatio per sensum.

Causa autem prima est super omnes res, quoniam est causa eis. propter illud ergo fit quod ipsa non cadit sub sensu, & meditatione, & cogitatione, & intelligentia, & loquela. non est ergo narrabilis. Et dico iterum quod res, aut est sensibilis, & cadit sub sensu, aut est meditabilis, & cadit sub meditatione, aut est fixa stans secundum dispositionem unam, & est intelligibilis, aut est conuertibilis destructibilis cadens sub generationem, & corruptionem, & est cadens sub cogitationem. Et causa prima est super res intelligibiles sempiternas, & super res destructibiles, quapropter non cadit super eam sensus, neque meditatio, neque cogitatio, neque intelligentia. Et ipsa quidem non significatur nisi ex causa secunda, quæ est intelligentia, & nominatur per nomen causati sui primi, nisi per modum altiore, & meliore, quoniam quod est esse causati, est esse, verumtamen per modum sublimiorem, & maiorem, & meliorem, & nobiliorem, sicut ostendimus.

PROPOSITIO VII.

Intelligentia est substantia, quæ non diuiditur.

COMMENTVM.

QUod est, quia si non est cum magnitudine, neque corpus, neque mouetur, tunc proculdubio non diuiditur, & iterum, omne diuisibile non diuiditur, nisi aut in multitudinem, aut in magnitudinem, aut in motum suum. Cum ergo res est sub hac dispositione est sub tpe, quoniam

non recipit diuisionem, nisi in tempore, & intelligentia quidem non est in tempore, immo est cum æternitate, quapropter facta est altior, & sublimior omni corpore, & omni multitudine, quod si inueniatur in ea multitudo, non inuenitur nisi quasi res sit vna. Cum ergo intelligentia sit penitus secundum hunc modum, diuisionem non recipit. Et significatio quidem illius est reditio sui super essentiam suam, scilicet quia non extenditur cum re extensa, ita ut sit vna suarum extremitatum secunda ab alia, quod est, quia cum vult scientiam rei corporalis, non extenditur cum ea, sed ipsa stat fixa secundum suam dispositionem, quoniam est forma à qua non pertransit aliquid, & corpora quidem non sunt ita, & significatio quod intelligentia non est corpus, neque diuiditur eius substantia, & operatio eius est quod utraque sunt vna res, & intelligentia quidem est multa propter bonitates quæ adueniunt ei à prima causa, & ipsa quamuis multiplicetur per hunc modum, tamen quia appropinquat vni est non diuisibilis, & ita intelligentia non recipit diuisionem, quoniam est primum causatum quod causatum est à prima causa, & vnitas dignior est quam diuisio. Iam ergo verificatum est, quod intelligentia est substantia quæ non est cum magnitudine corporali, neque corpus, neque mouetur per aliquem modorum motus corporum quapropter facta est supra tempus cum æternitate, sicut ostendimus.

PROPOSITIO VIII.

Omnis intelligentia scit quod est supra se, & quod est sub se, veruntamen scit quod est sub se, quoniam est causa ei, & scit quod est supra se, quoniam acquirit ab eo bonitates.

COMMENTVM.

ET intelligentia quidem est substantia intelligibilis. ergo secundum modum suæ substantiæ scit res quas acquirit de super, & res quibus est causa. ergo ipsa discernit quod

quod est supra eā, & quod est sub ea, & scit quod illud quod est supra eā est causa ei, & quod est sub ea est causatum ab ea, & cognoscit causam suam, & causatum suum per modum qui est causa eius. scilicet per modum substantiæ suæ, & sui esse. similiter omnis sciens non scit rem meliorem, & rem maiorem, & rem inferiorem, & deteriorem, nisi secundum modum substantiæ suæ, & sui esse, & non secundum modum secundum quæ res sunt. Et si hoc ita est, proculdubio bonitates que descendunt super intelligentia à prima causa sunt in ea intelligibiles, & similiter res corporeæ sensibiles sunt in intelligentia intelligibiles, quod est, quoniam res quæ sunt in intelligentia non sunt impressiones ipse, immo sunt causæ impressionum. Et significatio illius est, quod intelligentia ipsa est causa eorum quæ sunt sub ipsa, per hoc quod est intelligentia. si ergo est intelligentia causa rerum per hoc quod est intelligentia, tunc proculdubio causæ rerum sunt intelligibiles in intelligentia. Iam ergo manifestum est quod res supra intelligentiam, & sub ea, sunt per virtutem intelligibilem, & similiter res corporeæ in intelligentia sunt intelligibiles, & res intelligibiles cum intelligentia sunt intelligibiles, quoniam ipsa est causa esse earum, & quia ipsa non apprehendit nisi per modum substantiæ suæ, & ipsa quia est intelligentia apprehendit res apprehensione intelligibili, siue intelligibiles sint, siue corporeæ.

PROPOSITIO IX.

OMnis intelligentiæ fixo, & essentia eius est per bonitatem puram, quæ est per primam causam.

COMMENTVM.

ET virtus quidem intelligentiæ est vehementiori unitatis quam res secundæ, quæ sunt post eam, quoniam non accipiunt cognitionem eius, & non est facta ita, nisi quia causa est ei quod est sub ea, & significatio eius est illud cuius rememoramur, quia intelligentia est regens omnes res quæ sunt sub ea per virtutem diuinam quæ est in ea, &

& per eam retinet res, quoniam per eam est causa rerum, & ipsa retinet omnes res quæ sunt sub ea, & comprehendit eas, quod est, quoniam omne quod est principium rebus, & causa eis est retinens illas res, & regens eas, & non euadit ab ipsis aliquid propter virtutem suam ergo intelligentia est princeps rerum quæ sub ea sunt, & retinens eas, & regēs eas, & sicut natura regit res quæ sub ea sunt per virtutum intelligentiæ, & similiter intelligentia regit naturam per virtutem diuinam, & intelligentia quidem non facta est retinens res quæ sunt post eam, & regens eas, & suspendens virtutem suam super eas, nisi quoniam ipsæ res non sunt virtus substantialis ei, immo ipsa est virtus virtutum substantialium, quoniam est causa eis. Et intelligentia quidem comprehendit generata, & naturam, & horizontem naturæ, scilicet animam. nam ipsa est supra naturam, quod est, quia natura continet generationem, & anima continet naturam, & intelligentia continet animam, ergo intelligentia continet omnes res, & non est facta intelligentia ita, nisi propter causam primam quæ supereminet omnibus rebus, quoniam est causa intelligentiæ, & animæ, & naturæ, & reliquis rebus. Et causa quidem prima non est intelligentia, neque anima, neque natura, immo est supra intelligentiam, & animam, & naturam, quoniam est creans omnes res, verumtamen est operans intelligentiam sine medio, & creans animam, & naturam, & reliquas res mediante intelligentia. Et scientia quidem diuina non est sicut scientia intelligibilis, neque sicut scientia animalis, immo est supra scientiam intelligentiæ, & scientiam animæ, quoniam est creans scientias. Et virtus quoque diuina est supra omnem virtutem intelligibilem, & animale, & naturalem, quoniam est causa omni virtuti. Et intelligentia est habens yliachim & formam, & similiter anima est habens yliachim, & natura est habens esse yliachim, & causæ quidem primæ non est yliachim, quoniam ipsa est tantum esse. Quod si dixerit aliquis, necesse est ut sit yliachim, dicemus yliachim, id est esse suum esse infinitum, & individuum suum est bonitas pura, effluēs super intelligentiam omnes bonitates, & super reliquas res mediante ea.

PROPOSITIO X.

Omnis intelligentia est plena formis, veruntamen ex intelligentijs sunt quæ continent formas minus vniuersales, & ex eis sunt quæ continent formas plus vniuersales.

COMMENTVM.

Quod est, quoniam formæ quæ sunt in intelligentijs secundis per modum particularem sunt in intelligentijs primis per modum vniuersalem, & formæ quæ sunt in intelligentijs primis per modum vniuersalem se habent in intelligentijs secundis per modum particularem, & in intelligentijs primis est virtus magna, quoniam sunt vehementioris vnitatis quam intelligentiæ secundæ inferiores, & in intelligentijs secundis sunt virtutes debiles, quoniam sunt minoris vnitatis, & pluris multiplicitaris, & est, quia intelligentiæ quæ sunt longinquiores ab vno puro, sunt pluris quantitatis, & debilioris virtutis, & quia intelligentiæ propinquæ vni puro, sunt minoris quantitatis, & maioris virtutis, inde accedit vt formæ procedant ex intelligentijs primis processione vniuersali unita. Et nos quidem abbreviamus, & dicimus quodd formæ quæ adueniunt secundis intelligentijs, ex intelligentijs primis, sunt debilioris processione, & vehementioris separationis, quod fit, quia intelligentiæ secundæ proijciunt inferius, id est debiliori modo suos visus super formam vniuersalem, quæ est in intelligentijs vniuersalibus, & diuidunt eam, & separant eam, quoniã ipse non possunt recipere ipsas formas secundum vnitatem, & certitudinem earum, nisi secundum modum secundum quem possunt recipere eas, scilicet per separationem, & diuisionem, & similiter aliqua ex rebus non recipit quod est supra eam, nisi per modum secundum quem potest recipere ipsum, & non per modum secundum quem est receptibile.

Proposi-

PROPOSITIO XI.

Omnis intelligentia intelligit res sempiternas quæ non destruuntur, neque cadunt sub tempore.

COMMENTVM.

Quod est, quoniam si intelligentia est res semper, quæ nō mouetur, tunc ipsa est causa rebus sempiternis, quæ non destruuntur, neque cadunt sub tempore, neque sub generatione, neque sub corruptione, & intelligentia quidem non est ita, nisi quia intelligit rem per esse suum, & esse suum sempiternum est quod non corrumpitur, cum ergo hoc sit ita dicemus quod res destructibiles sunt ex corporeitate, scilicet ex causa corporea temporalis, non ex causa intelligibili æterna.

PROPOSITIO XII.

Primorum omnium quædam sunt in quibusdā per modum quo licet ut sit vnum eorū in alio.

COMMENTVM.

Quod est, quia inesse sunt vita, & intelligentia, & in vita sunt esse, & intelligentia, & in intelligentia sunt esse, & vita, veruntamen esse & vita in intelligentia sunt duæ intelligentiæ, & esse & intelligentia in vita sunt duæ vitæ, & vita & intelligentia inesse sunt duo esse, & non est ita, nisi quod vnumquodque primorum aut est causa, aut causatum. Causatum ergo in causa est per modum causæ, & causa in causato est per modum causati. Et nos quidem abbreviamus, & dicimus quod res agens in rem per modum causæ, non est in ea nisi per modum qui est causa eius, sicut

sicut sensus in anima per modum animale, & anima in intelligentia per modum intelligibile, & intelligentia in se per modum essentialem, & esse primum in intelligentia per modum intellectualem, & intelligentia in anima per modum animale, & anima in sensu per modum sensibile, quare redeamus, & dicamus quod sensus in anima, & intelligentia in causa prima sunt per modos suos secundum quod ostendimus.

PROPOSITIO XIII.

OMNIS intelligentia intelligit essentiam suam.

COMMENTVM.

QUod est, quia intellectus & intellectum sunt simul. Cum ergo intelligentia est intelligens, & intellectum, tunc proculdubio videt essentiam suam, & quando videt essentiam suam scit quod intelligit per intelligentiam suam, & quando scit quod intelligit per intelligentiam suam, scit quod intelligit per intelligentiam essentialiam suam, & quando scit essentiam suam, scit reliquas res quæ sunt sub ea, quoniam sunt ex ea, veruntamen scit ea per modum intelligibilem, ergo intelligentia & res intellectæ sunt vnum, quod est, quia si res intellectæ, & intelligentia sunt vnum, & intelligentia scit esse suum, tunc proculdubio quædo ipsa scit essentiam suam, scit reliquas res, & quando scit reliquas res, scit essentiam suam, & quando scit res, non scit eas, nisi quia sunt intellectæ, ergo intelligentia scit essentiam suam, & scit res intellectas simul, sicut ostendimus.

PROPOSITIO XIII.

IN omni anima res sensibiles sunt per hoc quod est exemplum eis, & res intelligibiles in ea sunt, quia scit eas.

L I B E R
C O M M E N T V M.

ET non est facta ita, nisi quia ipsa expansa est inter res intelligibiles quæ non mouentur, & inter res sensibiles quæ mouentur, & quia anima sic est, sic quod imprimit res corporeas, quæ propter facta est causa corporum, & facta est causata ex intelligentia quæ est ante ipsam, res igitur quæ imprimuntur ex anima sunt in anima per intentionem, vel virtutem exempli, scilicet quia res sensibiles exemplificantur secundum exemplum animæ, & res quæ cadunt supra animam, sunt in anima per modum acquisitum. Hoc ergo cum sit ita, redeamus & dicamus quod omnes res sensibiles sunt in anima per modum causæ, propter quod anima est causa exemplaris, & intelligo per animam virtutem agentem res sensibiles, veruntamen virtus efficiens in anima non est materialis, & virtus corporea in anima est spiritualis, & virtus imprimens in rebus habentibus dimensiones, vel diuisiones, est sine dimensione, vel diuisione. & res intelligibiles in anima sunt per modum accidentalem, scilicet quia res intelligibiles quæ non diuiduntur sunt in anima per modum diuisibilem, ergo res intelligibiles in anima unitæ sunt in anima per modum qui multiplicatur, & res intelligibiles quæ non mouentur sunt in anima per modum motus. Iam ergo ostensum est quod res intelligibiles, & sensibiles sunt in anima, veruntamen res sensibiles corporeæ motæ sunt in anima per modum animale (spiritali unitum, & res intelligibiles unitæ quiescentes sunt in anima per modum qui multiplicat totum.

P R O P O S I T I O X V.

OMnis sciens qui scit essentiam suam est rediens ad essentiam suam reditione completa.

C O M M E N T V M.

QUOD est quia scientia non est nisi actio intelligibilis, cum

dum ergo scit sciens essentiam suam, tunc redit per operationem intelligibilem ad essentiam suam, & hoc non est ita, nisi quoniam sciens scitum sunt res una, quoniam scientia scientis essentiam suam est ex eo, & ad eum. Ex eo, quia est sciens essentiam suam. Et ad eum, quia est scitum, quod est, quia cum scientia est scientia scientis, & sciens scit essentiam suam, eius operatio est rediens ad essentiam suam, ergo substantia eius est rediens ad essentiam ipsius iterum, & non significo per redicionem substantiæ ad essentiam, nisi quia est fixa stans per se, non indigens in sui fixatione, & sui essentiare alia regente ipsa, quoniam est substantia simplex sufficiens per seipsam.

PROPOSITIO XVI.

OMnes virtutes, quibus non est finis, pendentes, sunt per infinitum primum, quod est virtus virtutum, non quia ipsa sit acquisita fixa stans in rebus entibus, immo est virtus in rebus hñtibus fixationem.

COMMENTVM.

QUod si aliquis dixerit quòd primum ens creatum, scilicet intelligentia, est virtus etiam cui non est finis. Dicemus quòd non est verum, immo est virtus quædam, & virtus quidem eius non est facta infinita nisi inferius, & non superius, quoniam ipsa non est virtus pura, quæ non est virtus, nisi quia est res quæ non finitur inferius, neque superius. Ens autem primum creatum, scilicet intelligentia habet finem, & virtuti eius est finis superius, secundum quem remanet causa eius. Ens autem primum creans est infinitum primum purum, quod est, quia si entibus fortibus non est finis propter suam acquisitionem ab infinito primo puro, propter quod sunt entia infinita, tunc proculdubio est supra infinitum. Ens autem primum creatum, scilicet intelligentia, non est finitum, immo dicitur quod est infinitum, neque

neque dicitur quod est ipsummet quod est infinitum ens, & ens primum est mensura primorum entium intelligibilium, & entium secundorum sensibilem, scilicet quia ipsum est quod entia creauit, & mensurauit ea, mensura conuenienti omni enti. Redeamus ergo & dicamus, quod ens primum creans est super infinitum, sed ens secundum creatum est infinitum & quod est inter ens primum creans, & ens secundum creatum, est non finitum, & reliquæ bonitates simplices, sicut vita, & lumen, & quæ sunt eis similia, sunt causæ rerum omnium habentium bonitates, secundum quod infinitum est à causa prima. Ens vero creans est causa omnis vitæ, influens primo bonitates suas super causatum primum, quod est intelligentia, deinde descendunt super reliqua creata intelligibilia, & corporea mediante intelligentia.

PROPOSITIO XVIII.

OMnis virtus vnita plus est infinita quam virtus multiplicata.

COMMENTVM.

Quod est, quia infinitum primum creatum, quod est intelligentia, est propinquum vni puro. propter illud ergo factum est quod in omni virtute propinqua vni puro, est infinitas plusquam in virtute longinqua ab eo, quod est, quia virtus quando incipit multiplicari, tunc destruitur eius vnitas, & quando destruitur eius vnitas, destruitur infinitas eius, & non destruitur, nisi quia diuiditur. Et illius quidem significatio est virtus diuisa, & quod ipsa quanto magis aggregatur & vnitur, tanto plus magnificatur, & vehementior fit, & efficit operationes mirabiles, & quanto magis paritur & diuiditur, minoratur & debilitatur, & efficit operationes viles. Iam igitur manifestum est & planum, quod virtus quâto magis approximat vni puro, & vero, quod fit vehementior eius vnitas, & est infinitas in ea magis apparens, & manifestior, & sunt operationes magnæ, mirabiles, & nobiles.

Pro-

PROPOSITIO XVIII.

Res omnes habent essentiam propter ens primū,
& res viuæ omnes sunt mote per essentiam suam, pro
pter vitam primam, & res intelligibiles omnes habēt
scientiam, propter intelligentiam primam.

COMMENTVM.

Quod est, quia si omnis causa dat causato suo aliquid, tūc
proculdubio ens primum dat causatis suis esse, simili-
ter, vita dat causatis suis motum, quia vita est processio pro-
cedens ex ente primo quieto sempiterno, & similiter, intel-
ligentia dat causatis suis scientiam, quod est, quia omnis sciē-
tia vera non est nisi intelligentia, & intelligentia est primum
sciens, quod est influens scientiam super reliqua omnia.

Redeamus autem & dicamus q̄ ens primum est quietum, &
est causa causarum, & si ipsum dat omnibus rebus esse, tunc
proculdubio dat eis per modum creationis. vita autem pri-
ma dat eis quæ sunt sub ea vitam, non per modum creatio-
nis, immo per modum formæ, & similiter intelligentia non
dat eis quæ sunt sub ea de scientia, & reliquis rebus, nisi per
modum formæ.

PROPOSITIO XIX.

Ex intelligentijs est, quæ est intelligentia diuina,
quoniam ipsa recipit ex bonitatibus diuinis, quæ pro-
cedunt à causa prima, per receptionem multam, & de
eis est, quæ est intelligentia tantum, quia non recipit
ex bonitatibus primis, nisi mediante intelligentia.

Ex animabus est, quæ est anima intelligibilis, quoniā
est pendens per intelligentiam, & ex eis est, quæ est
anima tantum. Et ex corporibus naturalibus est, cui

est anima regens ipsum, & faciens directiones super ipsum. Et de eis sunt, quæ sunt corpora tantum, non habentia animas.

C O M M E N T V M.

ET hoc fit, quoniam non est intelligibilis tota, neque animalis tota, neque corporea tota, neque pēdet per causam quæ est super eam, nisi quæ est ex ea completa, & integra similiter quia non omnis intelligentia pendet per bonitates causæ primæ, nisi quæ ex eis est completa in primis integra, ipsa enim potest recipere bonitates descendentes ex causa prima, & pendere per ens. ut vehemens fiat sua vnitas, & similiter non omnis anima pendet per intelligentiam, nisi quæ ex eis est completa & integra, & vehementius similis cum intelligentia, per hoc quod pendet per intelligentiam, & est intelligentia completa, similiter non omne corpus naturale habet animam, nisi quod ex eis est completum integrum, quasi sit rationale, & sunt secundum hanc formam reliqui ordines intelligibiles.

P R O P O S I T I O X X.

Causa prima regit res creatas omnes, præter quod commisceatur eis.

C O M M E N T V M.

QUod est, quia regimen non debilitat vnitatem eius exhalatam super omne esse, neque destruit eam, neque prohibet eam essentia vnitatis eius seiuncta à rebus quin regat eas, quod est, quia causa prima est fixa, sibi cum vnitatem suam puram semper, & ipsa regit res creatas omnes; & influit super eas virtutem vitæ, & bonitates secundum modum virtutis earum, vel possibilitatem earum. Prima. n. bonitas influit bonitates super res omnes vna influxione, verum tamen vnaquæque rerum recipit ex illa influxione secundum

cundum modum suæ virtutis, & sui esse. Et bonitas prima non influit bonitates super res omnes, nisi per modum vnũ, quia non est bonitas nisi per esse suum, & suam essentiam, & suam virtutem, ita quod bonitas, & virtus, & esse, & essentia sunt res vna, sicut ergo ens primum & sua bonitas sunt res vna, sic fit quod ipsa influit super res influxione vna & diuersificantur bonitates, & dona, ex concursu recipientis, quod est, quia recipientia bonitates non recipiunt æqualiter, immo quædam eorum recipiunt plus quam quædam, hoc quidem est propter magnitudinem suæ largitatis, & bonitatis. Redeamus ergo & dicamus, quod inter omne agens quod agit per esse suum tantum, & inter factum non est continuator, nec alia res media. Et non est continuator inter agens & factum, nisi sit additio super esse. scilicet. quando agens, & factum sunt per instrumentum, & non facit per esse suum, & sunt composita, quapropter recipiens recipit per continuationem inter ipsum & factorem suum, & est tunc agens seiunctum a facto suo. Agens vero inter quod & factum eius non est continuator penitus, est agens verum, & regens verum, faciens res per finem decoris, post quod non est possibile ut sic decus aliud, & regit factum suum per vltimũ regiminis, quod est, quia regit res per modum quo agit, & non agit, nisi per esse suum. ergo ens suum tantum est regimen eius quapropter fit quod regit, & agit per vltimum decoris, & regimen in quo non est diuersitas, neque tortuositas, & non diuersificantur operationes, & regimen propter causas primas, nisi secundum meritum recipientis.

PROPOSITIO XXI.

Primum est, diues per seipsum, & est diues magis.

COMMENTVM.

ET significatio eius est vnitas eius, nõ quia vnitas eius sit sparsa in eo, immo est eius vnitas pura, quoniam est simplex in fine simplicitatis. Si aut aliquis vult scire quod causa prima est diues, proijciat mentem suam super corpus
 b ij fita,

sita, & inquirat de eis inquisitione perscrutata, & inueniet compositum esse diminutum, indigens quidem aut alio, aut rebus quibus componitur. Res autem simplex vna, quæ est bonitas est vna, & vnitas eius est bonitas, & bonitas est res vna. illa ergo res est diues magis, quæ influit, & non fit influxio super eam per aliquem modorum. Reliquæ autem res intelligibiles, aut corporeæ sunt non diuites per seipsas, immo indigent vno vero influente super eas bonitates, & omnes gratias.

PROPOSITIO XXII.

Causa prima est super omne nomen quo nominatur, quoniam non pertinet diminutio, neque complementum solum, immo est super omne complementum.

COMMENTVM.

QVONIAM diminutum est non completum, & non potest efficere operationem completam, quando est diminutum, & completum apud nos, quamuis sit sufficiens per seipsum, tamen non potest creare aliquid, nec influere aliquid à seipso omnino. si ergo ita est apud nos, tunc dicimus quod primum non est diminutum, neque completum tantum, immo est supra completum, quoniam est creans res, & influens bonitates super eas influxione completa, quoniam est bonitas cui non est finis, neque dimensiones. bonitas ergo prima implet secunda omnia bonitatibus. Veruntamen omne secundum non recipit de illa bonitate, nisi secundum modum suæ potentiz. Iam ergo ostensum est, & manifestum, quod causa prima est super omne nomen quo nominatur, & superior, & altior.

PROPOSITIO XXIII.

Omnis intelligentia diuina scit res, per hoc quod
est

est intelligentia, & regula per hoc quod est diuina.

COMMENTVM.

Quod est, quia proprietas intelligentiæ est scientia, & nõ est eius complementum, & integritas, nisi ut sit sciens, regens ergo est deus benedictus, & sublimis, quoniam ipse replet bonitatibus res, & intelligentia est primum causatũ, & est plus similis Deo sublimi, & propter illud regit res quæ sunt sub ea, quia sicut Deus benedictus excelsus infundit bonitates super res quæ sunt sub eo, similiter intelligentia infundit bonitatem super res quæ sunt sub ea, veruntamen quãuis intelligentia regat res quæ sunt sub ea, tamen Deus benedictus, & sublimius præcedit intelligentiam per regimen, & regit eas sublimiori regimine ordinis quàm sit regimen intelligentiæ, quoniam est illud quod dat intelligentiæ regimen, & significatio illius est, quod res quæ recipiunt regimen intelligentiæ, recipiunt regimen creatoris, & intelligentiæ, quod est, quia non refugit regimen causæ primæ aliqua de rebus omnino, quoniam vult ut faciat recipere bonitatem suam omnes res simul, quod est, quia non omnis res quæ desiderat, intelligentiam desiderat, & tamen res omnes desiderant bonitatem ex primo, & desiderant ipsam recipere desiderio multo, & illo non est aliquis qui dubitet.

PROPOSITIO XXIIII.

Causa prima existit in omnibus rebus secundum dispositionem vnã, sed res omnes non existunt in prima secundum vnã dispositionem.

COMMENTVM.

Quod est, quia quamuis prima causa existat in rebus omnibus, tamen vnaquæque recipit eam secundum modum potentiæ suæ, quod est, quia ex rebus sunt quæ recipiunt causam primam receptione vnita, & ex eis sunt quæ recipiunt

eam receptione multiplicata, & ex eis sunt quæ recipiunt eam receptione æterna, & ex eis sunt quæ recipiunt eam receptione temporali, & ex eis sunt quæ recipiunt eam receptione spiritali, & ex eis sunt quæ recipiunt eam receptione corporali, & diuersitas quidem receptionis non fit ex causa prima, sed propter recipiens, quod est, quia recipiens diuersificatur, propter illud. ergo susceptum est diuersificatū, influens vero existens vnum indiuisum influit super omnes res bonitates æqualiter. bonitas nanque fluit super omnes res ex causa prima æqualiter. causa autem diuersitatis influxionis bonitatis super res sunt ipsæ res. proculdubio igitur non inueniuntur omnes res in causa prima secundum vnum modum. Iam autem ostensum est, quod causa prima inuenitur in omnibus rebus secundum modum vnum, & non inueniuntur in ea omnes res per modum vnum. ergo secundum modum propinquitatis causæ primæ, & secundum modum quo res recipere potest causam primam secundum quantitatem illius potest recipere ex ea, & delectari per eam, quod est, quia non recipit res ex causa prima, nec delectatur in ea, nisi per modum sui esse, & non intelligo per esse, nisi esse & cognitionem. nam secundum modum quo cognoscit res causam primam creatam, secundum quantitatem illam recipit ex ea, & delectatur in ea, sicut ostendimus.

PROPOSITIO XXV.

Substantiæ unitæ intelligibiles non sunt generate ex alia re, omnis substantia stans per essentiam suam est non generata ex alia re.

COMMENTVM.

Quod si aliquis dicat, possibile est ut sit generata ex re alia, proculdubio est substantia illa diminuta, indigens ut compleat eam illud ex quo generatur, & significatio illius est generatio ipsa, quod est, quia generatio non est nisi via ex diminutione ad complementum. nam si
inue

inuenitur res non indigens in generatione sui .i. in sua forma & sua formatione, & alia, nisi se, & ipsa causa formationis suæ est completa integra semper, & non fit causa formationis suæ, & sui complementi nisi propter relationem suā ad causam suam semper. illa ergo comparatio est formatio eius, & ipsius complementum simul. Iam ergo manifestum est quod omnis substantia stans per essentiam suam, non est generata ex re alia.

PROPOSITIO XXVI.

Omnis substantia stans per seipsam, non est cadens sub corruptione.

COMMENTVM.

SI autem aliquis dicat, possibile est ut substantia stans per seipsam cadat sub corruptione. Dicemus, quod si possibile est ut substantia stans per seipsam cadat sub corruptione, possibile est ut separetur eius essentia, & sit fixa stans super essentiam suam sine essentia sua, & hoc est inconueniens & impossibile, quoniam propter ea quod est vna simplex non composita, est ipsa causa & causatum simul. omnis autem cadentis sub corruptione, non fit corruptio nisi propter separationem à causa sua. Dum vero permanet res pendens per causam retinentem eam, & seruante ipsam, non perit, neque destruitur. Si ergo hoc ita est, substantiæ stantis per essentiam suam, non separatur causa semper, quoniam est inseparabilis ab essentia sua, propterea quod causa eius est ipsa in formatione sui, & non fit causa sui ipsius nisi propter relationem suam ad causam suam, & illa relatio est formatio eius, & propterea, quia est semper relata ad causam suam, & ipsa est causa illius relationis, ipsa est causa sui ipsius per modum quem diximus, & non perit, neque destruitur, neque corrumpitur, quoniam est causa & causatum simul, sicut nuper ostendimus. Iam verificatum est ergo, quod omnis substantia stans per seipsam, neque destruitur, neque corrumpitur.

PROPOSITIO XXVII.

Omnis substantia destructibilis non sempiterna,
aut est composita, aut est delata super rem aliam.

COMMENTVM.

Propterea, quod est substantia, aut est indigens rebus,
ex quibus est composita ex eis, aut est indigens infir-
matione sua, deferente essentiam. cū ergo separatur de-
ferens eam corrumpitur, & destruitur, quod si substantia nō
est composita, neque delata, est simplex, neque destruitur, ne-
que minuitur omnino.

PROPOSITIO XXVIII.

Omnis substantia stans per essentiam suā, est sim-
plex, & non diuiditur.

COMMENTVM.

Quod si dixerit aliquis, possibile est ut diuidatur. Dice-
mus, si possibile est ut substantia stans per seipsam diui-
datur, & est simplex, possibile est ut essentia partis eius sit
stans per essentiam suam, iterum sicut essentia totius. si ergo
possibile est illud, reddit pars super seipsam, & omnis pars
eius est rediens super ipsam. sicut est rediens totum super es-
sentiam suam, & hoc est impossibile. si ergo est impossibile
hoc, substantia stans per seipsam est indiuisibilis, & simplex.
si autem non est simplex, sed composita, pars eius est melior
parte, & pars illius vilior parte. ergo res melior est ex vilio-
re, & res vilior est ex meliore, quoniam est omnis pars eius
seiuncta ab omni parte eius, quare est vniuersitas eius non
sufficiens per seipsam cum indigeat partibus suis ex quibus
componitur, & hoc quidem non est natura rei simplicis, im-
mo de natura rerum compositarum. Iam ergo constat, quod
omnis

omnis substantia stans per essentiam suam est simplex, & nō diuiditur, & quoniam non recipit diuisionem, & est simplex, non est recipiens corruptionem, neque destructionem.

PROPOSITIO XXIX.

Omnis substantia simplex est stans per seipsam, scilicet per essentiam suam.

COMMENTVM.

NAm ipsa est creata sine tempore, & est in substantia-
litate sua superior substantijs temporalibus, & signi-
ficatio illius est, quia non est generata ex aliquo, qm̃
est stans per essentiam suam, & substantiæ generatæ ex aliquo
sunt substantiæ compositæ cadentes sub generatione. Iam
ergo manifestum est, quod omnis substantia stans per essen-
tiam suam non est nisi in non tempore, & quia est altior, &
superior tempore, & rebus temporalibus.

PROPOSITIO XXX.

Omnis substantia creata in tempore, aut semper
est in tempore, & tempus non superfluit ab ea, quo-
niam est creata, & tempus equaliter, aut superfluit su-
per tempus, & tempus superfluit ab ea, quoniam est
creata in horis temporis quibusdam.

COMMENTVM.

Quod est, quia si creata sequuntur se adinuicem, & substā-
tiam superiorem non sequitur nisi substantia ei similis,
non substantia dissimilis, sunt substantiæ similes substantiæ
superiori, & sunt substantiæ creatæ, à quibus non superfluit
tempus, quæ simulantur substantijs sempiternis, & sunt sub-
stantiæ abscissæ à tempore, causatæ à quibusdam horis tem-
poris.

poris, non est ergo possibile ut continentur substantiæ creatæ in quibusdam horis temporis cum substantijs sempiternis, quoniam non assimilantur eis omnino. substantiæ ergo sempiternæ in tempore sunt illæ quæ continentur cum substantijs sempiternis, & sunt mediæ substantiæ inter substantias fixas, & inter substantias factas in tempore, & non est possibile ut substantiæ sempiternæ quæ sunt supra tempus sequantur substantias temporales creatas in tempore, nisi mediantibus substantijs temporalibus sempiternis in tempore, & istæ quidem substantiæ non factæ sunt mediæ, nisi quoniam communicant substantijs sublimioribus in permanentia, & communicant substantijs temporalibus abscissis in tempore per generationem. Ipse enim quamvis sint sempiternæ, tamen permanentia earum est per generationem, & motum, & substantiæ sempiternæ cum tempore sunt similes substantijs sempiternis, quæ sunt supra tempus per durabilitatem, & non simulantur eis in motu, vel generatione, similiter autem substantiæ factæ in tempore non simulantur substantijs sempiternis quæ sunt supra tempus per aliquem modum. si ergo non simulantur eis, tunc non possunt recipere eas, neque tangere eas. necessariæ ergo sunt substantiæ quæ tangunt substantias sempiternas quæ sunt supra tempus, & erunt tangentes substantias sectas in tempore. ergo aggregabuntur per motum suum inter substantias sempiternas quæ sunt supra tempus, & substantias quæ sunt sub tempore, & aggregabuntur per durabilitatem suam inter substantias quæ sunt supra tempus, & inter substantias quæ sunt sub tempore, id est quæ sunt cadentes sub generatione, & corruptione, & aggregabuntur inter substantias bonas, & inter substantias viles, ut non priuentur substantiæ viles à substantijs bonis omni bonitate, & omni continuitate. & non sit eis permanentia, neque fixio. Iam ergo ostensum est nunc ex hoc quòd duæ sunt durabilitatis species, quarum una est æterna, & altera est temporalis, veruntamen una earum durabilitatum est stans quiesca, & durabilitas altera mouetur, & una earum aggregatur, & omnes eius operationes simul, neque quædam earum est ante quandam, altera est currens, & extensa, cuius quædam operationes

nes sunt ante quasdam, & vniuersalitas. i. totalitas vnius earum est per essentiam suam, & vniuersalitas alterius est per partes suas, quarum vnaquæque est seiuncta suæ compari per modum primum & postremum. Iam ergo manifestum est quod quædam sunt substantiæ sempiternæ supra tempus, & ex eis sunt sempiternæ æquales tempori, & tempus non superfluit ab eis, & ex eis sunt quæ abscissæ sunt à tempore, & tempus superfluit ab eis, ex superiori earum, & inferiori ipsarum. i. à parte ante, & à parte post, & sunt substantiæ cadentes sub generatione, & corruptione.

PROPOSITIO XXXI.

Inter rem, cuius substantia & actio sunt in momento æternitatis, & inter rem, cuius substantia & actio sunt in momento temporis existens est medium, & est illud, cuius substantia est ex momento æternitatis, & operatio ex momento temporis.

COMMENTVM.

QUod est, quia res cuius substantia cadit sub tempore, scilicet quia tempus continet eam, est in omnibus dispositionibus suis cadens sub tempore, quare & eius actio cadit sub tempore, quoniam quando substantia rei cadit sub tempore, proculdubio eius actio cadit sub tempore. Res autem non cadens sub tempore in omnibus dispositionibus eius seiuncta est à re cadente sub tempore in omnibus suis dispositionibus. continuatio autem non est nisi in rebus similibus. necesse est igitur ut sit res alia tertia media inter utranque, cuius substantia cadat sub æternitate, & actio eius sub tempore. Impossibile nanque est ut sit res alia tertia, cuius substantia cadat sub tempore, & actio sub æternitate, sic enim eius actio maior esset eius substantia, hoc autem impossibile. Manifestum igitur est, quod inter res cadentes sub tempore cum suis dispositionibus, & actionibus, & substantijs, & inter res quarum substantiæ, & actiones sunt eadentes

dentes in momento æternitatis, sunt res cadentes sub æternitate per substantias suas, & cadentes sub tempore per operationes suas, sicut ostendimus.

P R O P O S I T I O X X X I I .

Omnis substantia cadens in quibusdam dispositionibus suis sub æternitate, & cadens in quibusdam dispositionibus suis sub tempore est ens, & generatio simul.

C O M M E N T V M .

OMnis enim res cadens sub æternitate est ens vere, & omnis res cadens sub tempore est generatio vere. si ergo hoc ita est, tunc si res vere est cadens sub æternitate, & tempore est ens, & generatio, nõ per modum vnũ, immo per modum & modum. Iam igitur manifestum est, ex eo quod diximus, qd omne generatum cadens per substantiam suam sub tempore habet substantiam dependentem p esse purum, quod est causa durabilitatis, & causa sempiternarum omnium rerum, & destructibilium. Necessarium ens est vnum, faciens adipisci vnitates, & ipsum non adipiscitur, sed reliquæ omnes vnitates sunt acquisitæ. Et illius quidem significatio est quod dico, si inuenitur vnum faciens acquirere non acquisitum, & aliud faciens acquirere acquisitum, tunc quæ differentia est inter ipsum, & primum faciens acquirere, Non enim potest esse quin aut sit ei simile in omnibus dispositionibus suis, aut sit inter vnumquodque differentia, in alio superfluitas. si ergo est simile ei in omnibus dispositionibus suis, tunc vnum eorum non est primum, & alterum secundum, & si vnum eorum non est simile alteri in omnibus dispositionibus suis, tunc proculdubio vnum eorũ erit primum, & alterum secundum. Illud ergo in quo est vnitatis fixa non dependens ab alio, est vnum purum verum, sicut ostendimus, & illud in quo vnitatis est inuenta ex alio, non est vnum purum verum. si ergo est ex alio, est ex illo primo acquisita vnitatis, prouenit ergo inde vt vni puro vero, & reliquis

liquis vnis sit vnitas iterum, & non sit vnitas iterum nisi propter primum verum, quod est causa vnitatis. Iam ergo manifestum est & planum, quod omnis vnitas post vnum est acquisita creata, veruntamen vnum verum primum purum est creans vnitates, faciens acquirere non acquisitum, sicut ostendimus.

EXAMINA CHRYSOSTOMI

Iauelli Canapitij, super libro de Causis.



PROPOSITIONES contentæ in Libro de Causis, qui à pluribus asseritur compositus, à Philosopho Arabe, siue ab Algazelle, siue ab Alpharabio, siue ab Auempace, multas continet ambiguitates, adeo quod difficile est scire in quo sensu acceptandæ, vel reprobandæ sint plures ex eis. Propterea, decreui singulas examinare secundum quadruplicem viam. scilicet secundum mentem Auctoris, & Procli Platonici, qui & librum consimilem composuit, quem nominauit Elementationes Theoricas, & Aristotelis, & Theologi, vt manifestum sit secundum quam viam, vnaquæque vera, vel non vera sit, & in quo sensu. Sed antequam descendam ad Examen, præpono duo.

Primo, quod in lib. de Causis cuilibet Propositioni apponitur proprium Cõmentum, quod iudicio meo æditum est ab eodem Auctore quicunque fuerit. Nam quoniam Cõmentator alius est ab Auctore, aliquando nominat ipsum, referens se ad eum, nominat dico, aut in indiuiduo, si habetur nomen eius, aut saltem in hoc titulo. Auctor huius libri &c. In hoc autem Cõmento, vt patet legenti, nunquam est relatio ad Auctorem, immo loquitur, vt Auctor exponens dictum suum. Quare in Examine non distinguemus inter Propositionem, & Cõmentum, sed existimabimus quod dicitur in Cõmento dictum esse ab Auctore, & esse eiusdem veritatis, vel falsitatis, vel ambiguitatis cum Propositione Comment.

Secundo,

Secundo, quod non intendo prosequi, nec exponere singula verba, sed per modum resolutorium complecti paucis sententiam Auctoris, & deinde comparare eam doctrinæ Procli, & Aristotelis, & Theologi.

PROPOSITIO PRIMA.

Omnis causa primaria plus est influens &c.

IN hac prima Propositione intendit manifestare ordinem, & differentiam inter causas primas, & secundas, & intendit tres conclusiones.

Prima est, omnis causa primaria plus est influens super causatum quàm causa vniuersalis secunda.

Secunda est, cum remouet causa vniuersalis secunda virtutem à re, causa prima vniuersalis non remouet virtutem ab ea.

Tertia est, causa vniuersalis prima agit in causatum causæ secundæ antequam agat in ipsum causa secunda quæ sequitur ipsum.

Pars prima, secundum mentem Auctoris, probatur quidē exemplo deducto ab esse, & viuo, & homine, quod vt clarum relinquimus, probatur autem ab eodem ratione quæ consistit in hoc. Causa prima adiuuat causam secundam in actione sua, & non econuerso. Item quamcunque actionem habet causa super effectum suum habet. & causa prima, quàm in causis per se subordinatis, de quibus hic intendimus causa media non causat, nisi causante causa prima, est .n. causa media vt mouens motum, ergo causa prima plus influit. nā causat à se. Secunda autem vt recipit à prima.

Secundum mentem Procli, qui in libro suo de Element. Theor. talem propositionem format. Omne productum à causis secundis, à prioribus & vniuersalioribus producitur eminentius, sic probatur. Omnis causa secunda est effectus causæ primæ, ergo habet substantiam, & virtutem actiuam à causa prima, ergo virtus agendi maior, & nobilior est in prima causa, quàm in secunda, sed virtus maior magis, & eminentius producit effectum, vnumquodque enim agens agit
se

secundum modum virtutis suæ, cum igitur idem sit effectus qui producitur à causa prima, & à causis secundis subordinatis, magis & eminentius producitur à causa prima, quàm à secundis .

Secundum doctrinam Arist. aduerte, q̃ licet formaliter non habeamus hanc propositionem, tamen fundamentaliter haberi potest ex 1. Poster. cum inquit . Propter quod vnumquodque & illud magis, sed in proposito, causa secunda agit propter primam, quia in virtute primæ, ergo prima magis agit in effectum, q̃ secunda . Item in 12 Met. tex. 34 inuestigans agens perpetuæ generationis determinat, quod quoniam agens se habens aliter, & aliter perpetuat generationem in virtute primi agentis .i. motoris primi cœli semper eodem modo se habentis, illud primum agens dignius, & eminentius se habet in perpetuando generationem, quæ quidem determinatio fundatur super hoc, primum agens dans virtutem, secundo magis & dignius agit respectu eiusdem effectus ab utroque producti .

Secundum doctrinam Theologi aduerte, q̃ cum omnes causæ secundæ sint à prima create, comparantur ad ipsam, sicut ministri ad Regem, & sicut organa ad principale agens, propterea mouet & inclinat omnia in proprios fines, sed effectus productus à causa principali, & ab organica, magis & nobilius pendet à principali, quàm ab organica, vnde digestio magis est ab anima, quàm à calore naturali, qui agit in virtute animæ . Præterea, causa prima agit à se, & independentem, cum non recipiat virtutem ab alio . Causa autem secunda agit dependenter, ergo dignius & magis influit in effectum, quàm causa secunda . Hæc igitur conclusio acceptanda est secundum omnem sanam doctrinam, quoniam est simpliciter vera .

Pars secunda, ad mentem Auctoris, sic probatur . Causa prima vehementius influit in effectum, & in eo imprimit virtutem suam, quàm causa secunda, ex conclusione præcedenti, ergo virtus primæ causæ magis inhæret effectui, quàm virtus causæ secundæ, quod enim intensius imprimitur magis inhæret, sicut calor intensus causatus in aqua magis inhæret, quàm calor remissus, sed quod magis inhæret tardius remo-

remouetur vt patet de calore intenso, ergo virtus primæ causæ tardius remouetur ab effectu, quàm virtus causæ secundæ, ex consequenti non est necesse ad remotionem virtutis causæ secundæ ab effectu, remoueri ab eodem virtutem primæ causæ.

Secundùm mentem Procli, qui in libro suo tenet impressionem primæ causæ vltimo recedere ab effectu, sic probatur. Causa perfectior extensius & intensius operatur. Patet de sole, qui cum habeat lucem perfectissimam illuminat intensius & extensius, quoniam quantum sit ex se illuminat omnia, sed causa prima perfectior est causa secunda. Dat. n. sibi virtutem, & non econuerso, ergo intensius & extensius operatur, quoniam operatur in omnibus, vt dicemus infra. Sed huiusmodi operans tardius recedit ab operatu, vt patet de sole, cuius lux cum sit intense & extense illuminans, vltimo cessat illuminare. nam extinctis, siue remotis quibuscumque illuminatibus particularibus, vt igne, luna, astris, adhuc lux solaris illuminat, ergo virtus primæ causæ impressa in effectu, tardius remouetur, quàm virtus causæ secundæ.

Secundùm doctrinam Aristotelis sic probatur. Causa prima comparatur ad secundam, sicut causa prior ad Posterio-rem, cum enim non sit processus in infinitum in causis per se subordinatis ex 2. Metaphys. tex. 6. necesse est omnem causam secundam habere rationem medij, aut vltimi, ex consequenti esse posteriorem prima, sed non est necesse ad remotionem posterioris remoueri prius, quoniam non pendet à posteriori, & maxime in causis agentibus, de quibus nunc loquimur, & verificatur in pluribus alijs, vnde Arist. in octauo Physicorum tex. 56. probat motum localem esse primum, quoniam nullus alius motus remanet motu locali remoto, sed bene econuerso. Et in secundo de anima, tex. 31. probat tactum esse primum sensum, quoniam remoto omni alio sensu, adhuc inuenitur tactus, vnde inquit. Tactus quidem inest sine alijs. Multa enim animalium neque visum, neque auditum habent, neque odoratus sensum. Cum igitur causa secunda posterior sit causa prima, non est necesse ad remotionem virtutis causæ secundæ remoueri virtutem causæ primæ.

Secundùm

Secundum doctrinam Theologi sic probatur. Causa prima proprie & principaliter est causa rei secundum esse, & secundum produci. Causa autem, secunda proprie est causa secundum produci, ut patet in omnibus agentibus particularibus artificialibus, & naturalibus, licet enim sol & homo generent hominem, tamen homo genitus conservatur à sole motu suo, & non ab homine generante, sed remota virtute causæ in fieri, non est necesse remoueri virtutem causæ in esse & in fieri, aliter completa rei productione statim desineret esse, ergo remota virtute causæ secundæ non est necesse remoueri ab effectu virtutem causæ primæ. Hæc igitur conclusio sicut, & præcedens acceptanda est secundum omnem sanam doctrinam, quoniam est simpliciter vera.

Pars tertia, patitur difficultatem propter ly antequam, siue prius, dupliciter enim potest exponi. scilicet prius in quo, & prius à quo. Si prius in quo, conclusio erit falsa, sensus enim erit, prima causa pro aliquo instanti, vel tempore producit effectum causæ secundæ, pro quo nundum producit à causa secunda, & id non est verum, quoniam secunda causa non ageret in effectum suum, si iam productus fuisset à prima, aliter productum produceretur, quod implicat, si autem sumatur prius à quo, conclusio erit vera, sensus enim est, prima causa agit à se in effectum causæ secundæ, sed secunda causa non agit à se. Exponatur ergo ly prius, vel antequam, non secundum durationem, sed secundum causalitatem. Et hæc quidem videtur fuisse mens Auctoris. Nam sic eam probat, causa secunda non agit in causatum suum, nisi quia prima causa influit virtutem suam super eam, ergo causa prima facit ut effectus attingatur à causa secunda. Ergo prius attingitur à causa prima: patet autem hanc probationem non valere, nisi exponendo ly prius causaliter, & originatiue.

Secundum mentem Procli, qui in libro suo talem propositionem format. Omnis causa ante causatum operatur, aliter probanda est, sed antequam probetur aduerte, quod Proclus per ly omnem causam intendit causam quæ tantum est causa, & per ly causatum intendit causam quæ est effectus & causa, qualis est causa secunda, quæ est effectus primæ, & causa alterius, ut in his corporalibus, homo generans est effe-

ctus, & est causa hominis geniti, per causam igitur Proclus intendit causam primam, & per caulatum intendit causam secundam, sic autem probat eam, causa prima est magis causa, quàm causa secunda, ergo est perfectioris virtutis, sed perfectior virtus ad plura se extendit, vt patet de luce solis, & prius aduenit ei in quod agit, ergo causa prima operatur antequam operetur causa secunda. Manifestum est autem quod hæc probatio non concludit, nisi de prioritate causalitatis, quoniam de prioritate durationis hæc consequentia non valet, causa prima est perfectioris virtutis, ergo prius duratione operatur in effectum causæ secundæ, quàm causa secunda. Aliter idem effectus iam productus adhuc produceretur, vel causa secunda superflueret.

Secundum doctrinam Arist. sic probatur qualis est ordo inter causas subordinatas, talis est inter earum effectus, quoniam unicuique correspondet proprius effectus, vnde in 2. Phys. tex. 35. docuit reducere effectus in causas suas correspondentes, vt effectum particularem in causam particularem, & effectum vniuersalem in causam vniuersalem, & priorem in causam priorem, & posteriorem in posteriorem, sed inter causam primam, & causam secundam, seruatür ordo prioris, & posterioris. nam cum sol, & homo generant hominem, sol est causa prior, quoniam vniuersale prius est, & homo est causa posterior, ergo effectus causæ primæ est prior, & effectus causæ secundæ est posterior, & posito quod idem effectus sit ab utraque, comparatus causæ primæ fiet prius, & comparatus causæ secundæ fiet posterius, quod quidem prius intelligendum est, vt diximus quo ad causalitatem, causa enim secunda non agit nisi præsupposita receptione virtutis à causa prima, ex consequenti quo ad causalitatem posterius agit, licet pro eodem instanti simul agant, causa autem prima agit non supposita receptione virtutis ab alio priori, ergo &c.

Secundum doctrinam Theologi sic probatur, causalitas supponit esse, quoniam actio est existens, cum vnum quodque agat in quantum est actu, ergo sicut se habet esse causæ secundæ, ad esse causæ primæ, ita causalitas causæ secundæ, ad causalitatem causæ primæ, sed esse causæ secundæ, posterius est esse causæ primæ, quoniam est effectus causæ primæ, vt
di

dicemus infra, ergo causalitas causæ secundæ, super effectum suum posterior est causalitate causæ primæ. Et aduerte hanc deductionem concludere prioritate causalitatis, & non durationis, quoniam non repugnat dari effectum cœuum causæ agenti, & producenti sine motu, & ideo non est necesse quod esse, & causalitas causæ secundæ sint posteriora duratione esse, & causalitate causæ primæ, prædicta igitur tertia conclusio supra, quo ad prioritatem causalitatis, concedenda est secundum omnem sanam doctrinam, quoniam est simpliciter vera, sicut & præcedentes, hæc dicta sunt super primam propositionem Auctoris.

PROPOSITIO II.

Omne esse superius, aut est superius æternitate, & ante ipsam, aut cum æternitate, aut post æternitatem, & supra tempus &c.

IN hac propositione intendit dividere superiora entia in tria genera, primum conuenit Deo, secundum intelligentiæ, tertium animæ. Et aduerte, quod per ly esse superius, intendit esse non subiectum tempori, nec motui, nec corruptioni, ac si dicat, oë esse rei perpetuæ, & immobilis.

Aduerte etiam quod huiusmodi esse diuiditur in tria, primum attribuit Deo, secundum intelligentiæ, tertium animæ, vnde in hac propositione intendit tres conclusiones.

Prima, Deus est supra, & ante æternitatem.

Secunda, intelligentia est, cum æternitate.

Tertia, anima est post æternitatem, & supra tempus, & in horizonte æternitatis.

Prima conclusio ad mentem Auctoris sic probatur, Deus est ipsum esse penitus abstractum, & illimitatum, ergo est causatiuum æternitatis, probatur consequentia, quoniam esse est magis commune quàm æternitas. Nam omnis æternitas est esse, sed non omne esse est æternitas, sed magis cœ est causatiuum minus communis, ergo esse abstractum quod est ipse Deus est causatiuum æternitatis, tunc vltra, ergo est

c ij supra,

supra, & ante æternitatem, quoniam causatiuum est supra, & ante causatura, Deus igitur est supra, & ante æternitatem.

Secundum doctrinam Procli Platonici in libro suo de Elementationibus Theoricis sic probatur. Magis abstractum, & magis commune est prius minus abstracto, & minus communi, vnde prius est ens quàm substantia, & substantia quàm corpus, quoniam non conuertitur subsistendi consequentia, vt patet, sed esse est abstractius, & communis æternitate, omne enim æternum est ens, non autem omne ens est æternum, ergo esse est prius æternitate, sed prima causa est ipsum esse, ergo est ante æternitatem, & alius, ex consequenti est supra, quoniam magis abstractum est superius minus abstracto. Aduerte, q̃ nec probatio Auctoris, nec Procli concludunt secundum veritatem, sed tantum secundum nostrum modum intelligendi. Nam falsum est, omne magis commune esse causatiuum minus communis, & productiuum realiter, aliter animal produceret hominem, & homo vt homo produceret hunc hominem, quod tamen est falsum, quoniam actiones sicut, & esse sunt singularium, præterea cum Deus sit suum esse, & sua æternitas, & omnis sua perfectio, aliter deperiret sua summa simplicitas, non magis causatur sua æternitas quàm suum esse, & quàm ipse Deus. Et ideo non est verum, quod dicit Auctor causam primam esse supra æternitatem, quoniam æternitas est causatum eius. Similiter probatio Procli non concludit, licet enim magis commune secundum prædicationem sit prius minus communi, quoniam non inconuenit remoto minus communi inueniri magis commune, vt remoto homine adhuc potest esse animal, tamen in præsentī proposito fundamentum Procli nō valet, quoniam Deus non est esse commune prædicabile de omnibus, sed esse contentiuum omnis gradus essendi, quod est esse illimitatum, & de tali esse non conceditur quòd sit prius quàm æternitas, nisi forte secundum nostrum modum intelligendi prout prius intelligimus Deum esse, quam esse viuentem intelligentem æternum, sed hic modus intelligendi nullam ponit prioritatem realem aut distinctionem, aut causalitatem inter diuinas perfectiones.

Et ideo Aristot. non acceptaret hanc conclusionem, sed diceret,

diceret, q̄ Deus est sua æternitas. nam sicut in duodecimo Metaph.tex. 39. dixit Deum esse vitam suam, & in tex. 49. esse suum intelligere sic diceret Deum esse suam æternitatem. Vnde inquit in tex. 39. Quare duratio continua, & æterna existit Deo, hoc enim Deus.

Et Theologus idem diceret. Nam secundum Dionysium in secundo cap. de Diu. ho. quidquid pertinet ad perfectionem bonitatis & esse totum Deo essentialiter cōuenit, vt. s. sit essentia bonitatis, & vitæ, & sapientiæ, & æternitatis ceterarumq̄. perfectionum, non ergo prima causa est supra, nec ante æternitatem essentialiter sumptam, sed est ipsa æternitas. Nec obstat q̄ dicit Dionysius in decimo cap. de Diu. no. Deus est ante eum siue æternum, quoniam non intendit de æterno essentialiter, sic enim solus Deus est æternus, sed de æterno participatiue q̄ conuenit substantijs immaterialibus. Vnde Commentans D. Thom. hoc dictum in dicto cap. inquit Deum conuenit laudare communiter per tempus, & eum quia ipse est causa temporalium, & æternorum. Et est supra æternitatem, & tempus prout æternitas, & tempus intelliguntur participata à creatura (& infra) ipse est prior non solum tempore, sed etiam euo, id est æternitate, prout participatur à creaturis, patet igitur conclusionem Auctoris non acceptari quo ad æternitatem essentialiter, sed tantum quo ad æternitatem participatam. vnde & D. Thom. in prima parte, quæst. decima, articulo secundo. ad secundum, adducens hoc dictum Auctoris, non saluat eum nisi in prædicto sensu, dicit enim. Deus dicitur esse ante æternitatem prout participatur à substantijs immaterialibus. ex quibus habetur quòd sumendo æternitatem essentialiter B. Thom. nec Dionysius acceptarent conclusionem dictam. vnde non est necesse quòd à Theologo, & ab Arist. probetur.

Secunda conclusio ad mentem Auctoris sic probatur, intelligens non destruitur secundum substantiam, quoniam est incorruptibilis, vt probabitur infra, & non alteratur, quoniam non patitur variationem, secundum virtutem, nec secundum operationem, sed semper se habet secundum vnā habitudinem, id est eodem modo & vniformiter, tam secundum substantiam, quàm secundum virtutem, & secundum

operationem, ergo est cum æternitate, & parificatur ei. In hac probatione Auctor supponit antecedens vt communiter concessum. Nam apud Philosophos videtur vt principium quòd omnis intellectus separatus immobilis est secundum substantiam, & virtutem, & operationem. consequentiam vero reputat veram ex diffinitione æternitatis quæ dicitur esse mensura rei indeficientis, & inuariabilis siue vni-formis. vnde tanto aliqua propinquant æternitati, & elongantur, à tempore, quanto reducunt à variabilitate secundum substantiam, & secundum operationem, & tanto aliqua propinquant tempori, quanto subiiciuntur variationi, aut secundum substantiam, aut secundum operationem.

Secundum doctrinam Procli in libro suo probatur eodẽ modo, sic enim inquit, omnis intellectus. s. separatus substantiam, & potestatem, & operationem habet in æternitate.

Secundum doctrinam Arist. probatur primo quod intelligentia habeat esse in æternitate. Nam in duodecimo Metaph. tex. 30. inquit necesse est esse sempiternam aliquam substantiam, quoniam est motus æternus qui secundum locum est circularis, vt probatum est in octauo Phys. Et in eodem duodecimo, tex. 44. concludit æternitatem substantiæ in omnibus intelligentijs mouentibus coelos, & dicit, palam, ita quòd tot substantias esse necesse est natura sempiternas. igitur quo ad indeficientiam substantiæ, patet Arist. sensisse intelligentiam adæquari æternitati. Secundo probatur quo ad immobilitatem propriæ operationis quæ est intellectio, & optima dispositio secundum delectationem in intelligendo primam causam. Nam in duodecimo Metaph. tex. 39. dicit deductio autem qualis optima paruo tempore nobis, sic enim semper illud est nobis quidem impossibile, q. d. intellectus separatus intelligens, & desiderans primum principium, est semper in eadem delectabilissima dispositione, quæ nobis pro semper est impossibile, ergo secundum propriam operationem est inuariabilis, ex consequenti est in æternitate, propterea concludit in tex. 41. Quod quidem igitur est substantia alia sempiterna, & immobilis separata à sensibilibus manifestum est, patet igitur quòd Auctor, & Proclus, & Arist. concordant in dicta conclusione.

Secun-

Secundum doctrinam vero Theologi præsens conclusio omnino refutatur quo ad substantiam, & virtutem, & operationem, quoniam operatio supponit virtutem, & virtus substantiam, sed secundum Theologum nihil est ab æterno productum, vniuersitas enim creaturæ incepit in tempore, & solus Deus caret exordio, sed à parte post, id est post intelligentiæ productionem, aliter tenendum est de eius substantia, & aliter de eius operatione. Nam de eius substantia ratione indeficiente potest dici esse in æternitate, non quidem essentialiter, quoniam hoc est proprium Dei. sed participatiue, de operatione autem distinguendum est, quoniam intelligentiæ competit operatio naturalis, vt intelligere se, & alia creata, & Deum vt principium sui esse, & vniuersalem causam omnium, & operari esse corpora mouendo ea applicatione suæ virtutis, & competit ei operatio supernaturalis vt visio, & fructio diuinæ substantiæ, quo ad operationem eius naturalem, non potest dici esse in æternitate, quoniam vt sic mutabilis est, & secundum successionē intellectiōnū, & volitionum, & secundum variam applicationem virtutis suæ ad corpora, vt hotat D. Thom. in prima parte, quæst. decima, articulo quinto. De operatione autem super naturali potest dici q̄ est in æternitate, qm̄ secundum illam immobilis est & efficitur deiformis ex consequenti participat diuina mensura, quæ est æternitas. Hæc igitur conclusio intelligentia est in æternitate, vel cum æternitate, vel participatur æternitati non acceptatur à Theologo nisi quo ad substantiam, & postquam producta est, & secundum operationem super naturalem, vnde non adæquatur Deo in æternitate, Deus enim omnino & vniuersaliter æternus est. Et propterea Dionysius de diuinis no. cap. x. inueniens hanc diuersitatem, inquit quamobrem non simpliciter coëterna Deo qui est ante suū censenda sunt quæ nominantur æterna, sed à sacratissimis eloquijs nusquam discedentes æterna, & in temporalia iuxta cognatos suosq̄. modos debemus accipere, & intendit q̄ ea quæ dicuntur æterna in diuina scriptura non sunt arbitrandæ æterna simpliciter, & æqualiter simul cum Deo, qui est ante æternitatem participatam, sed sequendo intellectum sacri eloquij oportet intelligere aliqua esse æterna secundum suos

modos, id est in quantum existunt immutabiliter ut angelicæ mentes, & ut beatificatæ sunt.

Tertia conclusio antequam probetur declaranda est, quo ad duo.

Primo, quomodo sumitur ly anima.

Secundo, quare dicit eam constitutam in horizonte æternitatis.

Quantum ad primum aduerte, q̃ ly anima non sumitur absolute, sed pro anima cœli quod supponitur animatum tanquam manifesta res, & concessa apud Philosophos Arabes, & præcipue apud Auicē. in lib. 9. suæ Metaph. cap. 4. ubi inter cætera inquit, nos iam ostendimus quod anima cuiusque cœli est eius perfectio, & eius forma, nec est substantia separata &c. Et q̃ Auctor intendat de anima cœli, patet ex eo quod dicit, anima est supra tempus, quoniam est causa temporis, constat autem eandem esse causam temporis, & motus cœli, quoniam tempus consequitur motum cœli, ut primo mensuratum, sed si cœlum est animatum, motus eius causatur ab anima cœli, ex consequenti ab eadem causatur tempus, quod non potest dici de anima humana, cum sit vnita corpori corruptibili, cuius motus non est cōtinuus, nec vniformis, nec potest esse perpetuus.

Quantum ad secundum, aduerte q̃ ideo dicit animam cœli constitutam in horizonte æternitatis, quoniam sicut horizon terminat superius hemisphærium, & est principium inferioris, ita q̃ ut medium de utroque extremo participat, sic anima cœli media est inter intelligentiam, & corruptibilia. nam ratione esse incorruptibilis conuenit cum intelligentia, & ut sic participat æternitatem, ratione autē motus cœli cuius ipsa est causa conuenit cum mutabilibus, & ut sic propinquat tempori, posita hac declaratione aduerte, q̃ Auctor sic probat conclusionem. Anima est substantiæ, & esse indeficientis, ut probabitur infra, & pro nunc supponatur. ergo quo ad substantiam, & esse annexa est æternitati, & propria operatio animæ cœli est motus cœli, qui fit in tempore. ergo quo ad operationem propinquat tempori, & ut sic dicitur annexa æternitati inferius, & inferiori modo quam intelligentia participat æternitatem, quoniam s̃m Auctorem est


est susceptibilior impressionis quam intelligentia, quoniam intelligentia recipit impressionem solum à prima causa, sed anima recipit ab intelligentia, & à prima causa. Quod an sic verum declarabitur infra. Aduerte tamen quod licet anima cœli propinquet tempori propter operationem suam que est motus cœli, tamen est supra tempus, quoniam causa est supra caufatum, sed anima cœli est causa temporis sicut & motus cœli, quoniam est mensura motus cœli, & comparatur ad ipsum sicut proprietas ad subiectum. Eadem autem est causa, & subiecti, & proprietatis eius.

Ad mentem Procli probatur eodem modo. nam, & Plat. ponunt cœlum animatum, vt patet in Timœo, vbi inquit Plato, dicendum est hunc mundum animal esse idque intelligēs re vera diuina providentia constitutum. Et Proclus in libro suo, huiusmodi propositionem format. Omnis anima habens quidem substantiam æternalem, habet operationem aliam secundum tempus quæ est mouere corpus cui vnitur, ex consequenti secundum Proclum media est inter eternitatem & tempus, quoniam secundum substantiam annectitur æternitati, fm operationem propinquat tempori, & hac de causa dixit Auctor animam esse in horizōte æternitatis.

Vtriusque probatio secundum veritatem non concludit de anima cœli, quoniam illa non datur, vt dicemus infra, in probatione Theologi, sed concludit de anima humana, quæ secundum substantiam est indeficiens vt probabitur infra, & sua propria operatio est intelligere componendo, & diuidendo, & cum discursu donec vnita est corpori, & mouere corpus localiter, quæ quidem operationes non absoluuntur à tempore, vt manifestabitur infra, ex consequenti secundum substantiam annectimur æternitati, secundum operationem propinquat tempori.

Secundum autem doctrinam Arist. quo ad animam cœli dubium est quid dicendum. Nam secundum aliquos tenuit Arist. cœlum esse animatum, & vt sic eodem modo probaret hanc conclusionem sicut Auctor, & Proclus.

Secundum alios autem tenuit oppositum, & quoties dicit cœlum animatum præcipue in secundo cœli, tex. 13. vbi inquit. Est autem cœlum animatum, & habet motus
princi-



principium manifestum &c. Per animam intendit intelligē-
tiam motricem quæ applicatur cælo, vt motor proprio mo-
bili, sicut anima suo proprio corpori à qua mouetur, & vt sic
Arist. non acceptaret dictam conclusionem applicatam ani-
mæ cæli, nisi vt dixi sumatur anima pro intelligentia.

Quantum autem ad animam humanam, adhuc est dubiū.
Nam qui tenent ipsum sentire animam intellectiuam esse
mortalem, vt Scotus, & Herueus, & quidam moderni dice-
rent Arist. negaturum hanc conclusionem. Qui autem te-
nent ipsum sentire vt veritas est, animam nostram esse im-
mortalem dicerent Arist. accepturum hanc conclusionem
& probationem Auctoris applicatam non animæ cœlesti,
sed humanæ coniunctæ, & vt euidentius pateat, assumo di-
ctum suum in tertio de Anima tex. 20. Separatus autem est
solum in hoc quod veræ est, & hoc solum immortale, & per-
petuum &c. Ergo intellectus humanus secundum substan-
tiam est perpetuus, & æternus à parte post, & assumo dictū
eiusdem in tertio de Anima tex. 39. & cum speculatur ne-
cesse est phantasma aliquod speculari, sed phantasiari, vel phā-
tasma speculari non absoluitur à tempore cum sit actio
virtutis organicæ, & in 12. Metaph. tex. 51. declarans primū
principium non intelligere componendo aut diuidendo in
quit, aut quod quidem compositorum habet in aliquo tem-
pore &c. i. intellectus qui intelligit componendo, aut diuidē-
do habet suam perfectionem non semper. sed in aliquo tpe,
sed anima humana coniuncta intelligit componendo, & di-
uidendo, & cum discursu. ergo secundum operationem suā
non absoluitur à tempore, & assumo dictum suum in secun-
do de Anima, tex. 18. Anima est principium quo viuimus, sen-
timus, intelligimus, mouemur secundum locum &c. Ergo ani-
ma quo ad motū causatum in corpore non absoluitur à tē-
pore. Igitur secundum doctrinam Arist. humana anima con-
stituta est in horizonte eternitatis, ita q̄ secundum esse anne-
xa est æternitati, & secundum operationem rationalem, &
animalem annectitur tempori. Non tamē est supra tempus,
vt causa eius, quoniam sicut non est causa motus cæli, sic nō
est causa temporis, nisi fortē quo ad suum formale, vt dixit
Arist. in 4. Phys. tex. 131. Quod quomodo intelligendum sit,
diximus

diximus in quæstionibus nostris super quartum Physic.

Secundum doctrinam vero Theologi, sumendo animam in suo proprio significato, quod est esse actum corporis viventis, & dantem non solum motum sed & esse, & applicando conclusionem animæ cœli, non acceptatur hæc conclusio ab eo, quoniam nullus Theologorum ponit cœlum sic animatum, aliter huiusmodi anima illic frustra poneretur, quoniam anima ut forma vnitur corpori propter aliquam operationem per quam indiget corpore. Constat autem cū cœlum sit quintæ essentiæ in eo non posse esse operationē vegetatiuam, neque sensitiuam. Quantum ad intellectiuam non indiget corpore, cum sit non organica, nisi pro quanto phantasmata deseruiunt intellectui quæ non possunt esse in cœlo cum ad partem sensitiuam pertineant. Quantum ad motum localem non est necesse quod vniatur ut forma, sed ut motor tangens suum mobile tactu virtuali. Ad hoc autē sufficit intelligentia applicata, & ideo vanum est ponere cœlū animatum anima informante, nec qui posuerūt ex Theologi cœlum animatum, ut Origenes, & Hieronymus intendebant de animatione anima informante, sed mouente more Platonico, ad quod ut diximus sufficit intelligentia applicata quæ si dicatur anima erit improprie dictum, & quā Auctor intendit de anima cœli sumendo animam proprie ut magis declarabitur in propositione sequente, ideo Theologus in hoc sensu non acceptat hanc conclusionem. Si vero applicatur animæ humanæ coniunctæ, acceptat & probat eam annexam æternitati quo ad esse. Nam est subsistens & incorporea, ut declarabitur infra, ergo habet esse per se, ergo esse suum non pendet à corpore, ex consequenti non corrumpitur ad corruptionem eius, sed habet esse incōsumptibile, unde inquit Dionysius cap. 4. de Di. no. Animæ humanæ habent de bonitate diuina quòd sint intellectuales, habeantq. vitam inconsumptibilem &c. Igitur quo ad esse annexa est æternitati quo ad operationem siue intellectualem, siue motiuam, non absoluitur à tempore, coniuncta enim cum discursu intelligit. Discursus autem est motus, omnis motus est in tempore ex sexto Physic. & motus localis corporis animati causatus ab anima necessario est in tempore, quo

quoniam est inter terminos oppositos, ergo quo ad operationem attingit tempus, vtrum autem quo ad aliquam operationem participet eternitati dicam in propositione sequenti. Hæc dicta sint pro examine secundæ propositionis.

PROPOSITIO III.

Omnis anima nobilis tres habet operationes. nam ex operationibus est eius operatio animalis, & operatio intelligibilis, & operatio diuina &c.

IN hac propositione intēdit manifestare quomodo anima quæ est tertium genus entium superiorum participat operationem Dei, & intelligentiæ.

Aduerte quòd hic Auctor loquitur de anima cœli sicut, de propositione præcedenti, quia nō dubitat cœlum esse animatum vere & proprie. Huic animæ attribuit tres operationes iuxta tres animæ virtutes. Nam vt anima habet virtutem viuificatiuam, directiuam, & motiuam corporis, & vt sic attribuit sibi operationem animalem quæ est viuificare, & mouere corpus cœleste, vt autem est naturæ intellectuales, habet virtutem intellectualem, & vt sic attribuit sibi operationem intelligibilem, quid autem intelligat dicemus infra, vt est causatiua rerum inferiorum per motum cœli, cui supponitur omnis natura elementorum, & elementatorum habet diuinam virtutem participatiue, quoniam sicut Deus est vniuersalis causa productiua omnium entium, sic anima cœli ex virtute sibi impressa à prima causa producit, influit, ministrat, omnia inferiora non quidem per se, sed per motum cœli, & vt sic sibi attribuit operationem diuinam quæ consistet in causalitate, & administratione omnium inferiorum, quoniam in hoc imitatur primam causam.

Secundum mentem igitur Auctoris probatur. Primo, quòd habeat diuinam operationem. Nam imago & exemplum primæ causæ participat operationem eius, sed propria operatio primæ causæ est productio, & administratio omnium entium, vt dicemus infra. Cum ergo in anima cœli,
sit

fit impressa imago primæ causæ, quoniam est naturæ incorporeæ & intellectualis sicut prima causa participat eius operationem non quidem æqualiter, & vniuersaliter, sed super ea quæ producuntur motu cœli. ergo conuenienter sibi attribuitur diuina operatio. Secundo probatur, quòd habeat operationem intellectualem. Nam effectus participat virtutem, & operationem suæ causæ vniuoce, vnde sicut ignis calefacit, sic & aqua facta calida calefacit, licet non eque perfectæ, sed anima cœli est effectus intelligentiæ. nam secundum Auctorem prima causa creauit esse animæ mediante intelligentia, ergo anima participat operationem intelligentiæ. Hæc operatio est intelligere, quoniam intelligentiæ vt intelligentia est competit intelligere, sicut sensui vt sensus est competit sentire. Hæc probatio quomodo fit admitenda vel non, dicam infra, cum adduxero sensum Theologi, & Arist. Tertio probatur, quòd habeat operationem animalem. Nam de proprietate, & natura animæ est vt viuificet corpora, influendo super ea virtutem viuificatiuam, si enim anima non animat id cuius est anima, cessat esse anima, & vt moueat corpora perducendo ad operationes suas, sed hoc est habere operationem animalem, siue vitalem. ergo si hoc est de proprietate animæ non est negandum ab anima nobili qualis est anima cœli.

Ad mentem autem Procli, aduerte, quòd loco animæ nobilis dicit animam diuinam, & sibi attribuit tres operationes conformiter vt Auctor. vnde inquit in libro suo omnes diuinæ animæ triplices habent operationes has quidem vt animæ, id est operationes animales, has autem vt suscipientes intellectum, id est operationes intellectuales, has autem vt Dijs coniuncte, id est operationes diuinas. Huiusmodi autem animas dicit diuinas, ex maxima nobilitate, sicut & cœlum dicitur diuinum corpus propter maximam excellentiam, & virtutem causatiuum, & incorruptibilitatem, vt etiā testatur Arist. in secundo cœli, textu secundo, vbi inquit, vt cœlum sit immortale, & diuinum habentium quidem motum &c. Diuinis animabus corporum cœlestium, Proclus, attribuit primo operationem animalem, quoniam vt diximus. Anima vt anima habet animare id cuius est anima,
sicut

sicut scientia, vt scientia habet facere scientem eum cuius est scientia. Attribuit operationem intellectualem, quoniam intellectu & desiderio mouent cœlo, nulla enim potentiarum animę conuenit his animabus præter dictas, carent enim organo quibus explentur operationes vegetatiue, & sensitiue. Attribuit eis diuinam operationem quæ est vniuersalis influentia, & causalitas, & productio rerum inferiorum, quoniam in hoc assimilantur primæ causæ quantum possunt, si enim in humanis prædicates Reip. dicuntur diuini homines multo magis huiusmodi animæ prædicates toti mundo inferiori per motum cœlestem. In hac igitur propositione sic accipienda est mens Procli, vt dictum est.

Secundum doctrinam vero Arist. supposito q̄ ponat cœlū animatum non acceptatur in cœlo operatio animalis viuificatiua, quoniam ex 3. de anima, tex. 61. in nullo corpore, siue generabili, siue ingenerabili non mansueto datur intellectus discretiui sine sensu, sensus autem non potest esse in cœlo, quoniam in eodem loco probat Arist. nullum corpus simplex posse esse organum sensus. Constat autem cœlum esse corpus simplex, ergo non est in eo sensitiuus gradus. Minus autem est in eo vegetatiuus, quoniam vt probat Arist. in 1. cœli, tex. 21. neque alterabile, neque augmentabile, neque diminubile est cœlum ex consequenti neque vegetatiuus gradus in ei. Nam ex 2. de anima, tex. 35. Opera vegetatiui gradus sunt generare, & alimento vti, quæ procul sunt à cœlo, quantumcunque igitur Arist. poneret cœlum animatum non admitteret animam cœli habere operationem animalem, præterea cum intelligere sit actio non organica, intellectiui, vt intellectiui nullius corporis est actus, ergo anima cœli, quæ si daretur esset tantum intellectiua, non haberet operationem animalem, sumendo autem apud Arist. animā cœli, pro intelligentia mouente attribuitur sibi operatio intellectualis, & valde nobilis. vnde in 12. Metaph. tex. 36. dicit, q̄ primum mouens immobile mouet cœlum sicut appetibile, & intelligibile, quod est sic intelligendum, quod intelligentia applicata primo cœlo, ideo mouet cœlum quia intelligit primum principium, & appetit ei tanquam optimo assimilari. Præterea in tex. 39. dicit in motore cœli esse nobilissimam

bilissimam delectationem quæ consequitur eius nobilissimam intellectionem. Item ad mentem Arist. attribuitur sibi diuina operatio, quoniam ex 12. Metaph. tex. 34. intelligentia mouens cælum motu diurno, causat perpetuam generationem in his inferioribus, & intelligentiæ applicatæ spheris planetarum mouentes planetas sub zodiaco causant alterationem generationis, & corruptionis per accessum, & recessum planetarum à nobis, cum igitur intelligentiæ motrices cælorum habeant vniuersalem causalitatem super inferiora, & hic mundus inferior gubernetur lationibus superioribus ex primo Meteor. manifestum est, quoniam secundum Arist. habent operationem diuinam, quia, scilicet assimilantur primæ causæ in causalitate, & regimine, vt etiã declarabitur infra.

Secundum doctrinam autem Theologi, quoniam negat vt diximus cælum esse vere animarum, nec per animam cæli intelligendum est aliud quam intelligentia, non acceptat in anima cæli operationem animalem ea ratione quam adduximus super doctrinam Arist. nisi quis extenso vocabulo nomet operationem animalem, vel vitalem motionem sui proprii mobilis, & directionem in proprium finem, sicut enim anima mouet corpus animalis localiter p determinata media in debitum, & desideratum finem, sic intelligentia mouet cælum s'm diuersa vbi ex quo motu prouenit generatio, & conseruatio, & transmutatio rerum inferiorem. Accipiat autem operationem intellectualem, quoniam cum sit substantia immaterialis per se subsistens patet, qd est intellectualis. Immaterialitas autem est ratio intellectualitatis, & intelligibilitatis. Item acceptat operationem diuinam modo quidem altiori quam Auctor, & Proclus & Arist. Nam apud Dionysium intelligentiæ dicuntur diuinæ mentes, & apud alios Theologos non solum quia hñt virtutem super inferiora, sed qm diuinæ essentiæ per intellectionem maxime vniuntur, quã intellectionem vocamus visionem beatificam, qua efficiuntur deiformes, & eodem sensu aîæ separatæ vnite primæ causæ p essentialem visionem merentur dici diuinæ aîæ, in hoc. n. consistit perfectior assimilatio ad Deum q habere causa-

causalitatem super inferiora. Nam assimilatio secundum actionem immanentem, nobilior est assimilatione secundum actionem transeuntem, quoniam & actio immanens nobilior est, & iuxta hanc diuinam operationem, tam intelligentia, quam anima humana dicuntur participare æternitatem, quoniam in hac operatione sunt omnino immobiles.

Sed aduerte, quòd licet Arist. & Theologus attribuunt animæ cæli, id est intelligentiæ motrici operationem intellectualem, non tamen acceptant rationem adductam ab Auctore quam supra formauimus. Non enim secundum doctrinam Arist. nec secundum veritatem, prima causa producit animam intellectuam, nec intelligentiam mediante alia intelligentia, quoniam cum sint substantiæ simplices non producuntur ex materia, ex consequenti creantur. Creatio autem est solius, primæ causæ omnino infinitæ, vnde Auctor in hoc videtur sequi opinionem Auicennæ in nono suæ Metaphys. cap. quarto vbi creatricem potentiam attribuit intelligentiis.

Sed dicunt aliqui Auctorem non intendere productionem animæ ab intelligentia quo ad esse, aliter sibi ipsi contradiceret nam dicet infra, omnium entium principium, & primam causam esse bonam, sed intendit de productione secundum informationem intellectus, quia scilicet intelligentia influit, & imprimit formas siue species intelligibiles in intellectu animæ per quas intelligit.

Sed id non acceptatur ab Arist. nec à Theologo, ab Arist. quidem quoniam in tertio de anima, tex. 17. ponit in intellectu agentem potentiam animæ illustrantem phantasmata, & productiuum speciei intelligibilis qua actuatur intellectus possibilis, à Theologo autem quoniam esset homo inferioris conditionis ceteris animalibus. Quoniam habet in seipsis sufficientia principia operationum suarum, si igitur non intelligeret homo nisi reciperet species ab intelligentia non haberet in se sufficientia principia proprie operationis, ex consequenti esset deterius conditionis ceteris animantibus. Præterea posset intelligentia causare speciem caloris in intellectu cæci nati, & sic cæcus intelligeret calorem quod experimur impossibile, non igitur pendet anima
intelle

intellectiua ab intelligentia quo ad esse, nec quo ad informationem manifestum est ex dictis, & hæc tertia propositio non acceptatur ab Arist. applicata animæ cæli, quo ad operationem animalem, applicata autem animæ humanæ, non acceptatur à Theologo, quo ad operationem diuinam nisi in sensu Dionysij, sed id non conuenit nisi animæ beatæ in diuina uisione. Hæc de tertia propositione dicta sint.

PROPOSITIO IIII.

Prima rerum creatarum est esse, & non est ante ipsum creatum aliud &c.

Aduerte, & Auctor in hac propositione intendit assignare causam, propter quam esse superius in secundo gradu, quod est esse intelligentiæ, ut expositum est in secunda propositione est multiplicabile. nam de primo gradu .i. de esse diuino, cum sit purissimus actus, & omnino infinitum, constat non esse multiplicabile.

In hac igitur propositione, intendit quatuor conclusiones. Quarum prima est, ut fundamentum vniuersale de omnibus creatis, & non solum in intelligentijs, licet Auctor intendat applicare intelligentijs.

Prima conclusio, rerum creatarum est esse.

Secunda conclusio, esse est factum superius, & vehemētius unitum omnibus causatis.

Tertia conclusio, esse causatum licet sit vnum, tamen est multiplicabile.

Quarta conclusio, intelligentia superior differt ab inferiori, quia est perfectioris naturæ formaliter, & quia intelligit per vniuersaliores species, & quia influit virtutes, & bonitates in intelligentia inferiori.

Quantum ad primam conclusionem, aduerte, & ly esse potest tripliciter accipi.

Primo, pro esse primæ intelligentiæ creatæ quæ est suprema creatura in ordine vniuersi.

Secundo, pro esse inuento in oībus creatis, tã incorporeis q̃ corporeis, quod supponitur omnibus alijs p̃fectionibus.

Epit. Iauelli.

d Tertio,

Tertio, pro esse per se existente separato, more Platonico, sicut per se homo, per se leo, per se vita, p se bonitas &c.

Iuxta primam acceptionem, videtur ab Auctore introducta prima conclusio. Nam intendens declarare propter qd intelligentia est multiplicabilis. Primo, voluit ostendere quem ordinem teneat in gradibus entium causatorum, & quoniam in intelligentia non solum inuenitur esse, sed & vita, & intellectus, & alie perfectiones quæ omnes causatæ sunt à primo, ideo etiam intendit iuxta secundam acceptionem declarare ordinem ipsius esse intelligentiæ ad alias eius perfectiones. Iuxta igitur primam acceptionem, inquit, prima rerum creatarum est esse. i. in vniuersitate creatorum, primum creatum & nobilius fuit intelligentia, quoniam similior est primæ causæ, & propinquior in suis perfectionibus participatis.

Iuxta secundam acceptionem, inquit, & non est, ante ipsum creatum aliud. i. cum in intelligentia sint multi gradus perfectionum. s. esse, viuere, intelligere, velle, &c. Primus gradus vt basis, & fundamentum fuit esse causatū à primo ente in intelligentia, quoniam viuere supponit esse, & intelligere supponit esse, & viuere, & non econuerso.

Iuxta tertiam acceptionem consideratur à Proclo, qui in libro suo talem propositionem format, participatum diuina proprietate, & deificatorum primum est ens. i. inter proprietates, & diuinas perfectiones participatas. i. productas prima est ens. i. ipsum esse separatum. vnde aduerte secundum doctrinam Platoniam, vt supra diximus magis commune ponitur productiuum minus cōmunis, vnde Proclus etiam supra in propositione secunda, & Auctor probarunt æternitatem productam ab esse qm ens est cōmunius, & abstractius, q̄ æternitas Plato aut inter transcendentia ponit bonum, & vnum prius ente, qm bonum, & vnum fm Platonem dicitur de ente, & de non ente, vt de materia prima, q̄ computabat inter non entia pp admixtam priuationem, & tamen dicebat ipsam bonam, qm desiderat bonum. i. formā, & est vna, quoniam ex se est indiuisua, & diuisionem recipit à quantitate & à forma, ens autem dicitur tantum de ente, quoniam nihil prædicatur de suo opposito.

Iuxta

Iuxta igitur principium positum. *s. q* magis commune sit productuum minus communis opinatur Proclus q̄ primum productum separatum sit ens, non autem bonum, nec vnum, quoniam non habent prius à quo producantur, vnde possit ad mentem Platonis Deum esse ipsum per se bonum, & per se vnum in productum, primum autem creatum est esse, secundum est vita, tertium est intellectus, & sic procedebat in productione separatorum.

Verum quia via Platonis in positione separatorum non acceptatur ab Arist. vt patet in 7. & 12. Metaph. & in 1. Eth. nec acceptatur à Theologo, nec principium Platonicum est verum regulariter. *s. quod* magis commune sit productuum minus communis, vt diximus in secunda propositione. Nec bonum & vnum est communius ente, vt dicemus infra, ideo positio Procli in expositione huius conclusionis omnino refutatur, standum est igitur in prima, & secunda acceptione.

Secundum doctrinam Arist. præsens conclusio, licet verificetur quo ad primam acceptionem, quoniam ex 12. Metaphys. tex. 29. cum tres sint substantiæ, duæ quidem naturales vt corpora corruptibilia, & incorruptibilia vt cælum, & tertia abstracta vt intelligentia, hæc est nobilior ex consequenti primum locum, & gradum continet inter producta, tamen proprie verificatur quo ad secundam acceptionem, prout esse participatur ab omnibus existentibus. Nam quod simplicius est, & ad quod omnia alia superaddunt vniuersalius est, & inter producta prius est, quoniam produci potest sine alijs, & non econuerso, sed inter omnes perfectiones comunicatas à primo, esse simplicius est, primum enim quod de vnoquoque concipimus est ens, & est vniuersalius, cuicunque enim rei creatæ communicatur esse, sed non aliæ perfectiones, & aliæ perfectiones includunt esse, & non econuerso, vt patet in latitudine entium, ergo inter producta est primum, & ideo inuenitur res cui debetur solum esse, vt elementum, alicui esse, & viuere &c. In nullo autem inuenitur viuere, nec alia perfectio in quo non inueniatur esse, primum igitur inter producta est esse, sicut ad mentem Aristotelis in secundo de anima, textu 31. primus gradus in

animatis productis, est vegetatius, quoniam communis est omnibus animatis, & potest inueniri sine alijs, vt in planta, & non econuerso. Quoniam igitur primum fundamētum omnium perfectionum est esse, sequitur contra Platonem quod vnum, & bonum posteriora sunt ente, addunt enim in sua ratione formali super ens. nam vnum addit in diuisionem, bonum autē addit respectum ad appetitum, ergo vanum est dicere bonum, & vnum esse productiua entis, aliter productum esset prius productiuo, nec est verum materiam primam esse bonam, nisi in ordine ad esse. Quoniam bonum & perfectum idem sunt, prima autem perfectio est esse quā vt diximus supponimus omni alij perfectioni. ergo materia prima eo modo est bona quo est ens, & quoniam est ens in potentia est bona in potentia, & quoniam ex se nunquam est bona actu, hinc patet bonum esse minus commune quā ens, dicitur enim ens de ente in potentia, & de ente in actu. Bonum autē quoniam fundatus in esse, non dicitur nisi de ente in actu, vnde rosa generanda est ens, non tamen est bona.

Secundū doctrinam igitur Arist. hæc conclusio est vera, prima rerum creaturarum est esse, iuxta primam, & secundam acceptionem. Non autem secundū tertiam, & à via Arist. in hoc non dissentit Auctor.

Secundū doctrinam Theologi, aduerte quod omnes conueniunt in vno, & discordant in alio, conueniunt quidem in hoc quod nullius eorum concedit ordinem, & distinctionē realem inter prima prædicata abstracta siue vniuersalia, non enim ponūt ens separatū distinctū à bono separato, nec à viuo separato, nec ab intelligente separato, sed omnia idē sunt in primo, vt diximus in secunda propositione, ex consequenti ab eodem primo qui est Deus, producit & esse, & bonitas, & omnis alia perfectio in creatura, differunt autem in ordine formali inter huiusmodi separata. Nam omnes Theologi sequentes viam Arist. dicunt quod licet Deus sit realiter ens viuens intelligens bonus, tamen prius consideratur quod est ens quam viuens, quam vnus, quam bonus, quoniam inter omnes conceptus, conceptus entis est simplicior ex cōsequenti est prior. Theologi autem sequentes viam Platoniam, vt Dionys. dicunt quod licet Deus sit realiter omnia
supra-

supradicta, tamen prius consideratur vt bonus, vt vnus, quā vt ens, vnde agens de Diu. no. prius agit de bono, sed si consideremus vtriusque opinionis motiuum, nulla est in re dissensio. Nam Theologi sequentes Arist. considerant hæc abstracta, vt ex natura rei conueniunt Deo, & vt sic prius verificatur de Deo, ens quā bonum, quoniam bonum supponit esse. Sequentes autem Platonem considerant hæc vt conueniunt Deo, sub ratione causalitatis, & vt sic prius ei conuenit bonum quam ens, quoniam bonum signat causam finalem, ens autem causam agentem, quoniam vnumquodque agens agit inquātum est actū, sed inter causas prima est causa finalis. ergo &c. Non igitur inconuenit ens secundum se esse prius bono, & tamen in ratione causæ esse posterius.

Et quoniam Auctor in hac conclusione prima rerū creatarum est esse, considerat esse in ordine ad causam creatantem siue ad primam causam agentem, quæ est agens inquantum est ens, ideo omnes Theologi in hoc concordant quod primus effectus productus à primo ente est esse, & id quidem rationabiliter, quoniam effectus vniuersalissimus est à causa vniuersalissima; & prius cum sit fundamentum effectuum minus vniuersalium. Iuxta igitur primam, & secundam acceptionem conceditur hæc conclusio, à Theologo, & ab Aristotele. Iuxta tertiam autem omnino reprobatur. Hæc de prima conclusione dicta sint.

Quantum ad secundam conclusionem, aduerte quod ly esse sumitur proprie iuxta primam acceptionem. i. pro esse intelligentiæ, & ad mentem Auctoris probatur sic. Quod est propinquius summæ simplici, & puro vero quod est, & primum ens, est superius, id est excellentius, & aliud, & magis vnum omnibus causatis à primo. Effectus enim propinquior causæ, magis participat perfectiones causæ, sed intelligentia quoad esse, & naturam suam est propinquior summæ simplici, & puro vero, cum sit eius primus, & immediatus effectus, ergo est altior, & simplicior inter creata.

In hac conclusione, & in ratione adducta concordat Proclus, qui in lib. suo inquit. Omnis intellectus separatus impartibilis est, ergo simplex. Item est sicut speculum diuinæ celsitudinis, ergo primum & nobilissimum gradum tenet in

entibus, Arist. idem sentit. vnde vltimam partem suæ Metaphys. disponit in consideratione huius supremi gradus, & in 1. cœli, tex. 100. declarat intelligentias esse inalterabiles, impassibiles, intransmutabiles, ex consequenti immateriales, & habentes vitam sufficientissimam in toto æterno. i. semper ex consequenti nobilissimas in esse; Theologus licet distinguat inter intelligentias bonas, & malas ex voluntate, tamen quo ad naturam excellentiores, & simpliciores ponit inter omnia creata. Nam determinat esse substantias penitus incorporeas, immateriales intellectuales, quibus nobiliori modo impressa est imago diuinæ naturæ, quàm in anima humana. In hac ergo conclusione apud omnem veram doctrinam non cadit ambiguitas.

Tu tamen aduerte, quod hæc conclusio potest verificari quo ad secundam acceptionem. Nam esse participatum ab omni existente, superius est. i. vniuersalius, quàm aliæ perfectiones, in quolibet ei existente inuenitur, non tamen in quolibet inueniuntur, aliæ perfectiones, vt patet, item est magis vna quoniam minus includit. Nam aliæ perfectiones addunt super ipsum, vt patet ergo &c. Hæc de secunda conclusione dicta sint.

Quantum ad tertiam conclusionem aduerte, quod sumendo ly esse applicatum intelligentiæ ad mentem Auctoris, sic probatur. Esse intelligentiæ licet sit simplex. i. non compositum ex partibus quantitatis, nec ex materia, & forma tamen compositum est ex finito, & infinito. ergo multiplicabile est, quod componatur ex finito, & infinito declaratur. nam postquam intelligentia producta est, habet virtutem vt sit semper, ergo secundum durationem est infinita, & suum esse est participatum, ergo finitum & limitatum.

Quod enim participat aliquam perfectionem non participat vniuersaliter vt inuenitur in primo, sed particulariter, vt patet in participantibus lucem solis. Constat ergo ex potentia, siue virtute sempiterna essendi, & ex esse limitato, ergo ex finito, & infinito. Quod autem consequentia sit vera declaratur sic, participato vt participato non repugnat multipliciter participare, quoniam sem nullum modum continet vniuersalem perfectionem suam, aliter non esset tale

per participationem, sed per essentiam, sed esse intelligentiæ est participatum cum sit productum: ergo tali esse quamuis sit simplex non repugnat multiplicari.

Secundum autem doctrinam Procli, qui in libro suo talem propositionem format omne ens immobile .i. omne ens intransmurabile scilicet substantiam, & tamen ens .i. à primo ente productum, ex fine est, & infinito, sic probatur. Esse productum immobile non est esse abstractum, sed receptum in eo cuius est esse. Omne esse receptum multiplicabile est, scilicet naturam recipientium. ergo cum esse intelligentiæ sit esse non abstractum, sed receptum in intelligentia, erit multiplicabile. Quod autem esse productum non sit esse abstractum, probatur, quoniam esse abstractum est esse ut esse, ex consequenti continet omnem perfectionem essendi, sicut albedo abstracta continet omnem perfectionem albedinis, sed esse productam non est esse ut esse, sed hoc, vel illud esse, ex consequenti non continet omnem gradum essendi, quoniam omnis terminus productionis extra Deum est determinati generis, ergo non est esse abstractum. Quod autem omne esse receptum sit multiplicabile probatur, quoniam cum non contineat in suo recipiente omnem gradum essendi potest recipi secundum diuersos gradus ex consequenti potest multiplicari, sicut albedo recepta in subiecto, quia recipitur secundum diuersos gradus, ideo potest multiplicari, posuit autem Proclus huiusmodi ens constare ex fine, & infinito, eadem ratione quam supra assignauimus.

Secundum doctrinam Arist. hæc conclusio acceptatur, & probat eam in 12. Metaphys. tex. 43. ubi ex pluralitate motuum cœlestium concludit pluralitatem intelligentiarum, necesse est enim omnem motum æternum esse à motore immobili, & immateriali æterno, ut illic deducit Arist. & licet non adducat rationem Auctoris, scilicet compositionem ex finito & infinito, tamen non negaret eam ad sensum suprapositum. Nam Aristot. ponit has substantias æternas in 12. Metaphys. tex. 30. ergo infinitas duratione, & multiplicat eas, ergo non sunt infinite secundum esse intensiue, aliter darentur plura entia simpliciter infinita quod est impossibile.

Secundum doctrinam Theologi, hæc conclusio acceptatur. Nam Dionysius, inquit, in cap. 14. celestis hierar. Multi sunt beati exercitus supernarum mentium, & ratio adducta hic ab Auctore admittitur: unde D. Th. in prima parte, quæst. 50. art. 2. ad quartum adducens dictum Auctoris inquit. intelligentia est infinita inferius, quia non recipitur in materia, forma. n. limitatur per materiam, & extra materiam illimitata remanet, est aut finita superius quia habet esse à superiori. Hæc igitur conclusio sem oēs recte sentientes vera est.

Quantum ad quartam conclusionem aduerte difficultatem eius consistere in hoc, quoniam difficile est inuestigare principium distinctiuum. Non enim est materia, nec quantitas cum sint substantiæ incorporeæ, nec sola accidentia diuersa sufficiunt, aliter non multiplicarentur essentialiter. Igitur sciendum est quod in substantijs creatis, duplex distinctio potest assignari, scilicet distinctio realis materialis, & hæc est per materiam siue in qua, siue ex qua, & distinctio realis formalis; & hæc fit per gradus essentialis perfectionales reperibiles in natura distinguibili, verbi gratia Socris & Plato distinguuntur natura humana tantum materialiter, homo & leo distinguuntur in natura animalis formaliter, quoniam natura animalis partitur per gradus perfectionales in speciebus suis, quorum vnus est superior ad alterum sicut in numeris, & inter eos datur primus per propinquitatem ad aliquod summum, & sequentes deficiunt à perfectione primi, secundum quod magis vel minus distant à primo, in proposito. intelligentiæ cum sint immateriales non distinguuntur nisi distinctio reali formali, pro quanto in earum natura dantur gradus inter quos est vnus primus ex propinquitate maiori ad primum ens, & reliqui sunt veluti potentiales, & imperfecti magis, & minus secundum maiorem, vel minorem elongationem à primo. His præpositis aduerte quod Auctor probat conclusionem à priori, & à posteriori, à priori quidem sic, intelligentia prima quæ est immediate post primam causam est completa in virtute sua, & in reliquis bonitatibus, id est perfectionibus suis. Intelligentiæ autem sub sequentes, licet sint intelligentiæ non sunt complete. i. non participant æque perfectis gradibus virtutem, & alias perfectiones &c.

Ergo

Ergo superior differt ab inferiori quia est perfectioris naturæ formaliter, consequentia nota, sed probandum est antecedens, arguitur igitur sic, Magis propinquum summæ perfectio participat perfectiori gradu, perfectiones illius, & minus propinquum imperfectiori gradu, ut patet in calefactibilibus respectu ignis, sed intelligentia prima est propinquior primæ causæ summæ perfectæ, & sequentes intelligentiæ minus propinquæ, ergo &c. A posteriori autem probat dupliciter, primo ab actione immanenti, secundo ab actione transeunte, ab actione immanenti sic Intelligentia superior intelligit per species latiores, & vniuersaliores, ergo intellectio sua est nobilior, ergo natura nobilior, quoniam actio nobilior est nobilioris agentis. Intelligentia autem inferior intelligit per species minus vniuersales, ergo &c. Aduerte quod vis rationis manifestabitur infra in propositione decima, ubi declaratur positio specierum magis vniuersalium in superiori intelligentia, & ex hoc concludetur nobilior natura intelligentiæ superioris, ab actione autem transeunte sic arguit intelligentia superior influit bonitates suas in intelligentia inferiori, & non econuerso. ergo est perfectioris naturæ ex consequenti distinguuntur per gradus perfectionales suæ naturæ antecedens probatur, prima causa influit bonitates suas in intelligentia superiori tanquam in suo nobiliori, & propinquiori effectu, ergo consequens est ut in intelligentia superior influat in inferiori. Superius enim influit in inferius per medium, ut ignis calefacit manum per medium aërem, consequentia autem sic probatur. Quod influit in aliud, respectu illius est actus, & illud est in potentia, quoniam agens actu est, & recipiens potentiale. Actus autem perfectior est potentia, ergo intelligentia superior est perfectioris naturæ, ergo &c. Constat igitur intelligentias distinguere, & multiplicari secundum gradus formales reperibiles in natura abstracta, penes quos gradus sumuntur in eis differentiarum specificarum nobis ignote.

Secundum doctrinam Procli, hæc conclusio sic probatur, cum prima causa sit ipsa vnitas propter omni modam negotiationem compositionis, & multiplicatis, procedunt eo ordine intelligentiæ à Deo, quo & numeri ab vnitate, videmus

videmus aut in numeris distinctionem, & multiplicationem assignari secundum minorem, & maiorem compositionem. nam binarius ut propinquissimus unitati minus compositus est, ternarius autem plus, & quaternarius plus, & sic successive, sic & in intelligentijs. natura primæ intelligentiæ minime composita est, secundæ autem plus, tertiæ plus, quartæ plus, & sic descendendo usque ad animam intellectiuā, quæ ut infimū gradum continens in intellectualibus, multū diuersitatē habet in potentijs in proprijs operationibus suis, igitur secundum viā Platoniam quā sequitur Proclus dicemus intelligentiās multiplicari secundum maiorem, & minorem simplicitatem substantiæ suæ.

Secundum doctrinam Arist. hæc conclusio ea ratione probatur qua & Auctor processit. scilicet ex gradibus formalibus naturæ abstractæ. Nam in 12. Metaph. tex. 49. pro principio habet Arist. quod primum mouens non potest plurificari numero quia caret materia. Omnis ergo plurificatio in abstractis est formalis. id est specifica, quæ cum non possit sumi à materia cum sint immaterialia, necessario sumitur à gradibus formalibus, ut supra diximus, unde in 8. Metaph. tex. 10. assimilauit naturas específicas numeris in quibus est alia, & alia species additione, vel subtractione unitatis sic in naturis specificis est variatio additione, vel subtractione gradus formalis, & id verificatur, tam in naturis corporeis, quàm incorporeis, licet. n. homo multiplicetur in indiuiduis per materiā, tamen animal multiplicatur in speciebus, non per solam materiā, sed per gradus in quibus partitur natura animalis. Et ad insinuandum distinctionem ac multiplicationem realem formalem, tam in abstractis, quàm in corporeis, dixit Arist. in 1. cœli, tex. 100. unde & alijs comunicatum est. scilicet à primo ente, his quidem clarius. scilicet abstractis, his autem obscurius. scilicet corporeis esse & viuere. scilicet per diuersos gradus. Declarauit et Arist. distinctionem in separatis à posteriori. scilicet ab effectu qui est motus. nam in 12. Metaph. tex. 44. inquit. Quod quidem igitur sint substantiæ. scilicet separata, & harum quæ prima, & secunda, secundum ordinem eundem rationum astrorum palam &c. & intendit quod manifestum est, esse substantias separatas motrices cœlorum, inter quas est ordo dignitatis, & perfectionibus qualis est ordo in motibus, & in sphaeris cœlestibus, quod quia prima sphaera nobilior est, &

motus diurnus nobilior, intelligentia illi applicata nobilior, & perfectior est, & quia sphaera Saturni nobilior est sphaera Iouis, & minus nobilis, q̃ sphaera prima, eodem modo se habet motus eius, & intelligentia applicata, & sic descende usque ad ultimam sphaeram.

Secundum doctrinam Theologi, eadem conclusio accipitur, probatur q̃ a priori eadē ratione quam adduximus de mente Auctoris. unde D. Th. in prima parte, q. 75. art. 7. assignans differentiam inter animam, & intelligentiam inquit de distinctione intelligentiarum. In substantijs in materialibus non potest esse diuersitas s̃m numerum, absque diuersitate s̃m speciem, & absque naturali .i. substantiali inaequalitate, quia cum nō sint compositae ex materia & forma, sed sint formae subsistentes, manifestum est q̃ necesse erit in eis esse diuersitatem in specie, non .n. potest intelligi quod aliqua forma separata sit nisi vna vnius speciei, sicut si esset albedo separata, non potest esse nisi vna tantum. Hæc .n. albedo non differt ab illa nisi per hoc q̃ est huius, vel illius, diuersitas autem s̃m speciem semper habet diuersitatem naturalem. .i. sit s̃m gradus formales naturæ, sicut in speciebus colorum vnus est perfectior altero, & similiter in alijs, & hoc ideo quia differentiae diuidentes genus sunt contrariæ. Contraria autem se hñt s̃m perfectum, & imperfectum. principium .n. contrarietatis sunt habitus, & priuatio ex 10. Metaphys. & c. Patet igitur q̃ differentia, & plurificatio in intelligentijs est per gradus essentielles formales naturæ abstractæ s̃m perfectius, & minus perfectum, probat etiam Theologus eandem conclusionem a posteriori, qm̃ superior illuminat, & inferior illuminatur. Item qm̃ superior intelligit per vniuersaliores species, ergo est perfectior & c. Verum de his loquemur infra & pro nunc supponantur, hæc pro examinatione quartæ propositionis dicta sint.

PROPOSITIO V.

Intelligentiæ superiores primæ, quæ sequuntur causam primam imprimunt formas secundas & c.

In

IN hac propositione Auctor tractat de distinctione animæ intellectiue prout distinguitur secundum opinionē suam in animam cœlestem, & animam humanam, & intendit declarare tria.

Primo, à quo imprimitur anima.

Secundo, quomodo multiplicatur.

Tertio, assignat differentias inter animam cœli, & animā humanam.

Quantum ad primum, ponit hanc conclusionem anima est ex impressione intelligentiæ secundæ. Ad euentiam huius conclusionis aduerte, q̃ ibi impressio sumitur pro productione in alio, sicut imago sigilli imprimitur in cœra quia producit in ea, & quia de ratione animæ est vt anime corpus & moueat, & non animat nec mouet corpus nisi sit intrinseca ei, ideo sua productio conuenienter dicitur impressio. Intendit autem Auctor sic arguere ad conclusionem, intelligentiæ superiores primæ imprimunt, id est produunt formas secundas, id est intelligentias secundas, ergo intelligentiæ secundæ imprimunt animam. Consequentia videtur valere ex hoc quod si extremum est causa mediij medium est causa vltimi. In genere autem intellectuāli causato, primā intelligentia est extrema, secunda est media, & anima est vltima, quoniam obrinet infimum gradum in intellectuālibus cum habeat rationem partis, antecedens autem Auctor habet pro manifesto, licet decipiatur vt dicemus.

Secundū doctrinam Procli Platonici, qui tenet ad viam Platoniam effectum magis communem esse à causa magis communi, & minus communem à causa minus communi, cum in anima sit esse, & intellectualitas, dicendum esset, quod anima quo ad esse imprimitur à primo ente, siue prima causa quo ad intellectualitatem imprimitur ab intelligentia, vt vnumquodque producat à suo vniuoco, sicut calidum à calido, lucidum à lucido, viuū à viuo, intellectuāle ab intellectuāli, ens ab ente.

Secundū doctrinam Arist. hæc conclusio non acceptatur nisi in sensu quem dicam. nam de anima cœlesti non potest acceptari, quoniam vt diximus supra ad mentem Arist. non datur, nisi sumendo animam pro intelligentia, quod est

improprie loqui, de anima humana non potest acceptari quo ad esse supponendo quòd tenuerit eam immortalem. Nam vt sic creatur, creatio autem est opus solius agentis primi infiniti, ergo non est ab intelligentia, si autem considerare anima non quo ad esse, sed quo ad informationem verū esse, quòd imprimitur ab intelligentia non quidem per se, sed per motum cœli, quo producitur & disponitur corpus ad receptionem animæ. Nam sol & homo generant hominem, de anima autem bruti, non est dubium quod quo ad esse producitur ab intelligentia per motum cœli, quoniam educitur de potentia materiæ actione agentis naturalis attinentis essentiam animæ brutalis, verum quia Auctor videtur loqui tantum de anima cœli, & humana, ideo hæc conclusio quo ad totam substantiam animæ, & quo ad esse, & quo ad intellectualitatem, & omnem suam naturalem perfectionem negaretur ab Arist. & diceret quòd sicut à primo ente habet esse habet omnem aliam perfectionem substantialem sibi conuenientem. Et ratio adducta pro Auctore non valet. Negaret enim Arist. antecedens, sicut & negandum est. Similiter ratio adducta à Proclo non valet, quoniam illud assumptum, de causa & effectu magis & minus communi, non concludit distinctionem realem in effectibus, & in causis, sed tantum distinctionem formalem. Nam in quinto Metaph. docens Arist. in cap. de causis, reducere effectum in causam dicit sanitatis causam esse medicum & artificem, non tamen distinguuntur realiter medicus & artifex, quoniam artifex est vt genus, & medicus species, sic in proposito licet in anima sit esse, & intellectualitas, & multæ aliæ perfectiones, omnes tamen sunt ab vna prima causa quæ in se realiter continet omnem gradum essendi, & omnem perfectiones.

Secundum doctrinam Theologi, hæc conclusio non acceptatur, quoniam cum anima intellectiua si per se subsistens per se habet esse, & per se producitur, & non ex materia, cum sit immaterialis, ergo creatur, ergo est a solo Deo, & non ab intelligentia, quoniam cum sit virtutis finite non agit nisi aliquo præsupposito, & ad rationem Auctoris, & Procli responderet Theologus sicut responsum est ad mentem Arist. Et aduerte sicut etiam diximus in tertia propositione videtur

tur Auctor in hac conclusione sequi viam Auic. in lib. 9. suæ Metaph. cap. 4. vbi imaginatur animas cœlestes produci ab intelligentijs, & animas humanas ab vltima intelligentia quam appellat datorem formarum, sed hæc imaginatio Auicennæ penitus irrationabilis est.

Primo, quia ponit cœlos vere animatos sine necessitate, ad causandum enim motum localem, vt diximus supra, non est necesse motorem vniri vt forma, sed sufficit tangere suū mobile tactu virtuali.

Secundo, quia creatricem potentiam attribuit creato, cū sit solius virtutis infinite agere, nullo præsupposito.

Tertio, quia fundamentum suum non est verum. s. quòd ab vno in quantum vnum non procedit nisi vnum, hoc enim est verum tantum in agente naturali, determinato ad vnum. Non autem in agente intellectuāli, quia agit per scientiam suam, quæ potest esse principium multorum, sicut ædificator per artem suam plura, & diuersa ædificia producit, hæc igitur prima conclusio ab omnibus secundum veritatem relinquenda est.

Quantum ad secundum ponit hanc conclusionem. Non multiplicatur anima nisi per modum quo multiplicantur intelligentiæ, & intendit sic arguere. Modus, siue ratio per quam multiplicantur intelligentiæ inuenitur in anima, ergo eodem modo multiplicatur sicut intelligentia, consequentia patet probatur antecedens. Ideo multiplicatur intelligentia, vt diximus supra in propositione quarta, quoniam constat ex infinito & finito, infinito quo ad perpetuam durationem, & finito quo ad esse suum, quod est esse participatū cui repugnat esse infinitum, sic & anima intellectuā de qua nunc loquimur constat ex infinito, quoniam est immortalis vt etiam probabitur infra, ex consequenti est infinite durationis, & suum esse est participatum cum sit causatum, ergo est finitum. patet igitur quod eodem modo multiplicatur sicut intelligentia.

Quantum ad doctrinam Procli sequentis viam Platonis, hæc conclusio clarius probatur, quoniam cum anima apud Platonem non sit forma, nec sit pars, sed completa in specie vnita corpori non sicut actus, sed sicut motor, manifestū est, quòd

quod si multiplicatur, multiplicatur ut intelligentia quæ est substantia completa, & ratio de infinito & finito, ita verificatur in anima sicut in intelligentia.

Quantum ad doctrinam Arist. hæc conclusio non acceptatur nisi quo ad modum generalem, non autem quo ad modum proprium. Nam cum intelligentia sit completa substantia, multiplicatur sine habitudine ad corpus, & per gradus formales, ut diximus in quarta propositione, sed anima est actus receptibilis in materia, ideo multiplicatur per habitudinem ad materiam. Nam quilibet actus fit in propria materia ex 2. de anima, tex. 26. Ratio igitur multiplicatiua animæ est materia quæ est ipsum corpus, ex quo sequitur quod si corpora sunt diversarum specierum, & animæ similiter, & si corpora sunt eiusdem speciei, & animæ similiter. Alio igitur modo multiplicatur intelligentia, & alio modo anima.

Secundum doctrinam Theologi, cum teneat animam intellectiuam esse formam dantem esse ei cuius est forma non est acceptanda nisi in sensu, quo acceptata est ab Arist.

Quantum ad tertium in quo intendit assignare differentias inter animas distinctas, aduerte quod secundum Auctorem omnis anima intellectiua, aut est cœlestis, aut humana. Cœlestes appellat superiores, humanas appellat inferiores, inter eas ponit tres differentias.

Prima est, ex perfectionibus suis intrinsecis.

Secunda, ex influentia, qua influit una super alteram.

Tertia, ex influentia qua influunt super propria corpora.

Quantum ad primam differentiam dicit, quod animæ superiores sunt completæ perfectæ paucæ declinationis, & separationis .i. habent in se omnem perfectionem conuenientem animæ intellectiuae, & præcipue secundum actum intelligendi, quoniam in eo sunt paucæ declinationes .i. mobilitates, non enim est necesse quod venientur scientiam ex sensibilibus cum non habeant potentias sensitivas, & sunt paucæ separationis .i. interruptionis quo ad actum intelligendi, nihil enim impedit quin semper, & actu intelligant, animæ vero inferiores sunt in complemento, & declinatione sub animabus superioribus .i. tendunt ad completam perfectionem intellectualem ex sensibus, & continuo exercitio, & ideo sunt in
de

declinatione, id est in motu quo ad actum intelligendi propter tres operationes intellectus, scilicet simplicium apprehensionem compositionem, & diuisionem, & discursum.

Quantum ad secundam differentiam dicit, quod animæ superiores influunt bonitates suas super inferiores, sed tu sub intellige, & non econuerso, & huius ratio secundum Autorem est, quoniam sicut se habent intelligentiæ superiores ad inferiores, ita se habent animæ superiores ad inferiores, sed ut dixit in quarta propositione intelligentiæ superiores influunt inferiores. Comparatur enim ad inferiores sicut actus ad potentiam, ergo animæ superiores influunt in inferiores communicantes sibi bonitates, & perfectiones suas, sicut sol communicant lucem suam lunæ.

Quantum ad tertiam differentiam dicitur, quod id quod est impressum ab anima superiori in corpore cœli est fixum, & stans, & motus eius est motus æqualis & continuus, id est anima cœli dat esse fixum stans, id est incorruptibile quia non vnitur materiæ subiectæ priuationi, nec per qualitates contrarias, & causat in cœlo motum æque velocem, & sine interruptione, quoniam non est ei labor nec lassitudo in mouendo, lassitudo enim prouenit ex organis alterabilibus quæ non sunt in cœlo, cum sit alterabile. Id autem quod est impressum ab anima inferiori in corpore humano est debile euanescens, & destructibile, veruntamen permanet impressio per generationem, id est anima humana dat homini esse debile corruptibile quod paulatim deficit, quoniam corpus hominis ex contrarijs est, & anima ei vnitur per qualitates contrarias, ex consequenti, quoniam organa lassabilia sunt non mouet nisi motu irregulari, & interrupto. Tamen bonitate diuina licet esse hominis non permaneat idem numero permanet idem successione per generationem.

Secundum doctrinam Procli sequentis viam Platonis tenentis cœlum animatum, ut diximus supra. Istæ tres differentiæ non acceptantur, & præcipue prima, nec tertia. nam secundum Platonem in Phædro omnes animæ intellectiue siue superiores, siue inferiores creantur complete, & perfecte secundum habitus intellectuales, licet quæ vnuntur corpori terreno patiantur obliuionem, similiter non acceptatur
tertia

tertia differentia, quoniam secundum Platonem nō solum anima cœli, sed & anima humana nunquam deserit corpus cui primo, & per se vnitur, quod non est terrenum corruptibile, sed aëreum subtile incorruptibile, huic autē terreno vnitur quasi extraneæ, & est animæ vt carcer, secunda differentia aliquantulum acceptatur non solum quia animæ cœlestes influunt in animabus humanis, sicut corpora cœlestia in corpora inferiora, sed inter animas humanas, quædam sunt alijs excellentiores, quæ animabus debilibus præbent viam recte intelligendi, & viuendi.

Secundum doctrinam Arist. apud eos qui sentiunt enim tenuisse cœlum vere animatum prima differentia acceptatur, cum enim anima cœli careat sensibus, & sit intellectiua, oportet tenere eius intellectum completum, & perfectum esse quo ad actum primum, & semper actu intelligere, quoniam intellectu & voluntate mouet cœlum motu continuo, ex duodecimo Metaphys. tex. 36. Animæ vero inferiores imperfecte sunt, quoniam ex tertio de Anima, tex. 5. Intellectus humanus in sui principio est in mera potentia in genere intelligibilem, nec reducitur ad actum nisi paulatim, & per intellectum agentem quo est omnia facere, id est ex intelligibilibus in potentia facere intelligibilia actu, ex tertio de anima, tex. 18. Apud illos autem qui sentiunt Arist. tenuisse cœlum non esse animatum nisi æquiuoce sumendo in intelligentiam pro anima. Hæc prima differentia non habet locum, cum non dentur animæ superioris. Comparare autē intelligentiam humanæ animæ in ratione animæ, cum non sine vniuoca, comparatio impropria est, ex septimo Phys. ex consequenti licet intelligentia apud Arist. sit completa, & perfecta. Anima autem humana incompleta, & imperfecta, tamen hanc comparisonem in ratione animæ non admitteret, sed in ratione substantiæ intellectualis, in qua & intellectus, & anima humana conueniunt. Secunda autem differentia non acceptatur, quoniam siue sumatur anima cœli pro vera anima, siue pro intelligentia, negaret Arist. eam agere, vel influere in anima humana inquantum intellectiua est, quoniam in tertio de Anima, tex. 19. tenet proprium & naturale actiuum eius esse intellectum agentem qui est

potentia animæ, cuius actio supponit phantasmata, & hæc supponunt naturam sensitivam. Tertia differentia, sustinet do cælum esse vere animatum, acceptatur, quoniam ut sic dat cælo esse perpetuum quo dicitur diuinum, & immortale corpus, ex secundo cæli, textu tertio. Animam autem humanam clare esse corruptibilem constat, quoniam vnitur materiæ cum dispositionibus alteratiuis. Sustinendo autem cælum non esse vere animatum non acceptatur, quoniam intelligentia cum sit perfecta in specie non dat esse cælo neque incorruptibile, neque corruptibile.

Secundum doctrinam Theologi, negantis cælum esse vere animatum, nulla harum differentiarum acceptanda est, quoniam omnis differentia est entium differentium differentia. Cum autem non detur anima cæli, non est entium differentium. Si autem sumatur anima cæli pro intelligentia, ut dictum est, comparatio erit nulla. Hæc igitur propositio quanta apud recte sentientes non acceptatur, ideo dimittatur.

PROPOSITIO VI.

Causa prima superior est omni narratione, & deficiunt linguæ &c.

IN hac propositione intendit Auctor declarare quomodo causa prima est inenarrabilis, & indicibilis ab intellectu creato, & maxime ab intellectu nostro, & causa huius est, quoniam prima causa est vincens omnem scientiam nostram. Igitur proponit hanc conclusionem Causa prima non potest enarrari, ita quod deficiunt omnes linguæ a narratione eius. Quam quidem conclusionem intendit sic probare. Esse & substantia primæ causæ non potest narrari, id est explicari per propositionem affirmatiuam, ergo causa prima non potest enarrari. Antecedens probatur. Si substantia & esse potest narrari, aut per causas priores, aut per causas secundas, non primo modo, quoniam est supra omnem causam, ergo non habet causam priorem, non secundo modo, quoniam narratio eius per causas secundas deficiens. & diminuta est, non enim per ipsas enarratur, nisi quia illuminantur. i. participant perfectiones primæ causæ, & ipsa non illuminantur.

illuminatur ab alio cum sit lumen purum, id est pura & simplex perfectio, sed per perfectiones participatas non sufficienter enarratur esse, & substantia primæ causæ, quoniam cum sint limitate & singulares, non adæquate repræsentant vniuersalem, & illimitatum, & simplicissimam perfectionem esse, & substantiæ primæ causæ. Secundo arguitur sic, prima causa est incognoscibilis, ergo est inenarrabilis, consequentia patet, quoniam sicut intelligimus sic enunciamus, sunt enim voces signa conceptuum. Antecedens autem probatur sic, quidquid cognoscitur aut cognoscitur per causam, aut per seipsum, aut per effectum, sed nullo horum modorum causa prima est cognoscibilis. nam si est cognoscibilis per causam, ergo ipsa est effectus, & ut sic habet causam priorē, ex consequenti non erit prima causa, nec erit purum lumen, nec purus actus, omnis enim effectus habet actum admixtum potentiz, nec est cognoscibilis per seipsam, omnis enim res quæ per seipsam cognoscitur, aut est sensibilis, aut imaginabilis, aut cogitabilis, siue opinabilis, aut intelligibilis, sed prima causa, cum sit omnino abstracta à materia, est supra omnia sensibilia, & imaginabilia, & cum sit immobilis est supra omnia cogitabilia, siue opinabilia, opinio enim est de his quæ aliter se habere possunt, & cum sit supra ens causatum non est intelligibilis ab intellectu nostro. nam obiectum intellectus nostri pro hoc statu est quiditas rei materialis, nec est intelligibilis per effectum, quoniam si per effectum, ergo per effectum maxime similem illi, hic autem est intelligentia, sed nec per hunc intelligibilis est. nam licet Deus sit naturæ intellectualis sicut intelligentia, tamen est excellentiori modo, & præterea nullus effectus adæquat virtutem primæ causæ, ergo non est per ipsum intelligibilis, ex consequenti inenarrabilis, siue ineffabilis, & aduerte quòd Auctor intendit de perfecta cognitione, & enarratione, aliter ut patet ratio sua non concluderet, item licet apud omnem intellectum creatum, prima causa sit incognoscibilis perfecte ex puris naturalibus, & inenarrabilis, tamen Auctor intendit de homine pro hoc statu, cuius signum est quòd facit hanc deductionem narratio non fit, nisi per loquelā, & loquela per intelligentiam, & intelligentia

tia per cogitationem, & cogitatio per meditationem, & meditatio per seipsum, causa autem prima est super omnes has res. ergo est inenarrabilis. Manifestum est autem quod hæc deductio non verificatur in Angelo, quoniam caret sensu, ergo cum dicit causam primam esse superiorem omni narratione intendit proprie de narratione humana, licet ut dixi verificetur respectu cuiuslibet intellectus creati.

Secundum doctrinam Procli eadem conclusio acceptatur format enim in libro suo talem propositionem omne ens ipsum quidem propter super substantialem unionem indicibile est, & incognoscibile omnibus secundis, à principiantibus autem capibile est, & cognoscibile propter quod solum primum penitus ignotum tanquam amathecum ens, id est omne per se ens, ut idea hominis, equi, leonis, est inducibile, & incognoscibile ab omnibus secundis, id est ab omnibus alijs substantijs separatis subsequentibus, sed à participantibus est cognoscibile, & capibile, puta ab hoc homine cognoscitur per se homo, quoniam secundum Platonem ideo sunt causæ scientiæ nostræ, & generationis rerum singularium sub specie, sicut etiam sibi attribuit Arist. in 7. Metaph. primum autem, id est prima causa est penitus ignotum, quoniam est ens amathecum, id est nulli posterius, sed primum simpliciter, ex consequenti excedit omne ens secundum quod ens productum, sed adverte quod Auctor format conclusionem solum de prima causa, & est verissima, quoniam cum ex sua illimitatione excedat improporcionabiliter omnem intellectum creatum est per essentiam suam incognoscibilis, & ineffabilis. Proclus autem extendit conclusionem ad omnem formam idealem, quæ cum non sint illimitate, nec improductæ non inconuenit ab intellectu creato perfecta cognosci, & capi, quod autem dicit primum esse penitus ignotum, intelligendum est quo ad essentialem cognitionem, quoniam nulla creata species, nec substantia est sufficienter representatiua illius diuinæ illimitationis. Hanc autem illimitationem obtinere diuina substantia, quoniam ut inquit Proclus, nulli est posterior, à quo possit limitari.

Secundum doctrinam Aristot. conclusio acceptatur, dum modo applicetur primæ causæ, & intellectui humano coniuncto,

iuncto, sicut videtur Auctor applicare. nam si apud Arist. in secundo Metaph. tex. 1. se habet intellectus noster ad notissimam naturam, i. ad substantias separatas, sicut oculus noctue ad lumen solis, multo magis deficiet in cognitione, & narratione primæ causæ, quæ est supremum intelligibile, supremum appetibile, & supremum bonum in natura ex 12. Metaphys. tex. 51. Item si eleuatur intellectus noster ad separata per hæc sensibilia, manifestum est quod pro hac via nullum separatorum quiditatiue cognoscere possumus ex consequenti, nec enarrare, ergo id longe amplius verificat de prima causa.

Secundum doctrinam Theologi, determinantis primam causam penitus infinitam, & superexcedentem in infinitum quodcumque creatum, acceptatur hæc conclusio. Vnde Dionysius in primo capitulo de Diu. no. inquit. Quem. s. Deum neque cogitare possibile est, neque dicere, neque totaliter aliquo modo contemplari, propter quod ab omnibus est segregatus, & super ignotus, & super omnes cœlestes mentes incomprehensibili virtute est collocatus &c. & infra in eodem capitulo, inquit. omnibus autem vniuersaliter est incomprehensibilis, & neque sensus eius est, neque phantasia, id est imaginatio, neque opinio, neque nomen, neque sermo, neque tacitus, neque scientia &c. Et tu intelligæ hæc omnia verificari, quo ad infinitam essentiam suam, & à priori, siue quo ad cognitionem essentialem, & quiditatiuam, quoniam ad illam non pertingimus, nisi diuina essentia vniatur intellectui ut forma intelligibilis quod non datur nisi lumen diuinum eleuet intellectum ad tantam celsitudinem, sed id non est naturæ, sed gratiæ. Dionysius autem loquitur de virtute naturæ. De statu autem gloriæ inquit in eodem capitulo. Tunc autem quando incorruptibiles, & immortales erimus Christi formam, & beatissimum consequemur finem, semper cum Domino erimus visibili quidem ipsius Dei apparitione in castissimis contemplationibus adimpleri, manifestissimis circa nos splendoribus refulgente, sicut circa discipulos in illa diuinissima transformatione &c. Sed dices si de Deo non est nobis naturaliter nomen, neque sermo, neque scientia, quo modo de Deo verificantur nomina sibi attributa, & quomodo à nobis laudatur, & quomodo cœli enarrant gloriā eius?

Responſio ſecundum doctrinam Dionyſij in eodem cap.
per diuina nomina quæ nobis à ſacra ſcriptura traduntur,
duo cognoscimus, ſcilicet communicationem diuerſarum
bonitatum, & perfectionum in creaturis, & ipſum principiũ
communicationis, verbi gratia, cum dicimus Deum viuẽ-
tem cognoscimus communicationem vitæ in creaturis, &
principium huius communicationis eſſe Deum, & hoc qui-
dem principium non cognoscimus per diuina nomina, ſicut
eſt. i. perfecte & eſſentialiter. nã vt ſic indicibile eſt, & inſcru-
tabile ex creaturis, & propterea cõcludit Dionyſius, melior
eſt omni ſermone, & omni cognitione, & ſuper mentem vni-
uerſaliter, & ſuper ſubſtãtiã. i. ſuper quodcunque exiſtens
creatum collocatur. Omnis igitur diuina laus, & gloria ſibi
data, ſiue ab Angelis, ſiue ab hominib. fundatur non ſuperſa-
cialem viſionem, ſed ſuper cõmunicationem diuinarum per-
fectionum, & ſuper negationem imperfectionum, per quã vt
poſſumus confuſe circunloquimur intrinſecas Dei perfe-
ctiones, dixi, non ſuperſacialem viſionem, qm̃ nunc loqui-
mur de cognitione, & enarratione naturali quam poſſit in-
tellectus creatus habere de Deo, ſed hæc cognitio pene nul-
la eſt ſimiliter enarratio cõparata illi diuinæ immenſitati, pa-
ter igitur hanc ſextã propoſitionem eſſe ſimpliciter veram.

PROPOSITIO VII.

Intelligentia eſt ſubſtantia quæ non diuiditur &c.

IN hac propoſitione, Auſtor intendit manifeſtare eſ-
ſentiam intelligentiæ, & quoniam à nobis quiditatie
cognosci non potelt, nec per propriam differentiam, id-
eo per negationes procedit, quibus circuloqui intendit eius
ſubſtantialem perfectionẽ. Põnit igitur talem concluſionẽ,
intelligentia eſt ſubſtantia quæ non diuiditur. i. eſt ſubſtan-
tia indiuiſibilis, & impartibilis, quod ſit ſubſtantia pro mani-
feſto habet, qm̃ cum ſit producta, & finita in aliquo prædi-
camento locatur. Conſtat autem qd non in prædicamento
accidentis, aliter accidens eſſet nobilior pars vniuerſi, tenet
enim intelligentia ſupremam dignitatem poſt primam cau-
ſam,

sam, vt patet ex propositione secunda. Continetur igitur in prædicamento substantiæ, & in hoc differt à prima causa, quæ & sua illimitatione nulli prædicamento astringitur. vn de non debet dici substantia, sed supersubstantia, sicut super esse superuita, superbonitas &c. Quod autem sit indiuisibilis, & impartibilis, probat dupliciter, primo à sufficienti diuisione, secundo à signo. Quantum ad primum sic arguit. Omne quod diuiditur, aut diuiditur, quia habet magnitudinem siue per se, vt linea vel superficies, siue per accidens, vt albedo extensa in superficie diuiditur ad diuisionem superficiei, aut quia est corpus, aut quia est sub motu, quoniã omne mobile est diuisibile, aut secundum multitudinem, & est illud quod in se continet multa quorum vnum est separabile ab altero, sicut animal continet sentire, vegetare &c. Et potest amittere ipsum sentire, stante ipso vegetare, vt patet in dormiente, & in epileptico &c. sed intelligentia nullo istorum modorũ est diuisibilis, ergo &c. Minor sic videtur probare. Omnis diuisio est in tẽpore, qm̃ diuisio est progressus, siue motus ab vnitæte ad multitudinem, cum de ratione diuisionis sit pluralitas, sed omnis motus est in tempore. ergo omne diuisibile qm̃ diuiditur mensuratur tpe, sed intelligentia quo ad substantiã est in æternitate, vt dictum est in secunda Propositione. ergo nõ est in tpe, immo est altior oĩ tpe.

Quantum ad secundum arguit sic. Quod reddit ad essentiam suam, scilicet intelligendo seipsum, non habet magnitudinem, neque est corpus, ex consequenti non est in motu, omne enim mobile, quantum est, & sic est diuisibile secundum magnitudinem, secundum corporeitatem, secundum motum, sed intelligentia reddit ad ipsam intelligendo essentiam suã, ergo &c. Minor probabitur infra. Maior autem sic probatur. Omne habens magnitudinem & corpus, habet partes, quarum vna distat ab alia secundum situm. ergo non potest ad seipsum redire, siue super seipsum conuerti. ergo quod reddit ad essentiam suam, scilicet intelligẽdo seipsum non habet magnitudinem, nec est corpus, nec est in motu, quod autem intelligentia indiuisibilis sit secundum multitudinem intrinsecam, id est quod licet in se contineat multas perfectiones, pura esse, vitam, cognitionem, desiderium &c.

tamen sunt abinuicem inseparabiles, ita quod non potest remoueri cognitio, & remanere vita, vt fit in nobis, probatur sic. Intelligentia maxime propinquat vni, id est primæ causæ quæ est maxime vna, ergo habet perfectiones maxime vnitas. ergo inseparabiles abinuicem. Prima consequentia probatur. nam ex eo quod propinquat vni, nobiliori modo habet in se perfectiones, sed nobilius est habere vnitas quam separabiles. vnitas enim dignior est diuisione. Cuius signum est, quod in prima causa omnes perfectiones sunt vna simplex perfectio, & inseparabiles, sed prima conditio non potuit seruari in intelligentia, quoniam cum sit producta iam in ea cadit compositio. ergo conueniens fuit in ea seruari secundam propter propinquitatem ad primam causam. Manifestum est igitur intelligentiam nullam habere magnitudinem, neque corpus, neque motum corporeum, neque multitudinem perfectionum abinuicem separabilium, ex consequenti est substantia indiuisibilis, impartibilis, non subiecta tempori, sed æterna, vt ostendimus supra.

Secundum doctrinam Procli eadem conclusio acceptatur. nam in libro suo hanc propositionem ponit. Omnis intellectus impartibilis est substantia, & sic probat. Omne partibile aut est partibile secundum magnitudinem, siue corporeitatem, aut secundum operationes, aut secundum motum, aut secundum multitudinem modo quo expositum est ad mentem Auctoris, sed intelligentia non est partibilis secundum corporeitatem. est enim incorporea, quoniam conuertitur intelligendo se super substantiam suam, quod repugnat omni corporei propter extensionem partium, & vt magis declarabitur infra. neque secundum operationes, quoniam inquit Procl. Omnes operationes partibiles sunt in tempore, si enim partiuntur vna fit post aliam, ex consequenti interuenit tepus, sed intelligentia est per omnia æternalis & secundum substantiam, & secundum operationem ad mentem Procli, vt dictum est in secunda propositione, neque secundum motum, quoniam partibile secundum motum variabile est. intelligentia autem est inuariabilis, & immobilis cum sit æternalis, neque secundum multitudinem intrinsecam, quoniam intelligentia impartibiliter habet multitudinem perfectionum ex propinquitate

ad

ad primum vnum, & primam causam. Et aduerte probationem Procli quo ad impartibilitatem multitudinis coincidere cum probatione adducta secundum mentem Auctoris.

Secundum doctrinam Aristot. hæc conclusio acceptatur. nam in 12. Metaph. tex. 41. loquens de substantia intelligentiæ inquit. Verum sine parte indiuisibilis est. Et ratio quidem Arist. est, quoniam in 12. Metaph. tex. 30. probauit eam immaterialem, quoniam eius substantia est actus, cum semper actu moueat. Si immaterialis, ergo non quanta. Quantitas enim primo consequitur materiam. Si non quanta, ergo impartibilis quantitatiuæ. Item in 12. Metaph. tex. 41. probat eam nullam magnitudinem habere, quoniam non magnitudinem infinitam, illa enim non datur, nec magnitudinem finitam, quoniam cum moueat tempore infinito, habet potentiam infinitam, quæ non potest esse in magnitudine finita, ut iam probauerat in 8. Phys. tex. 78. & 79. Item in 2. Metaph. tex. 35. Probat quod est mouens immobilis, quoniam si est mobilis est in potentia, si in potentia, ergo substantia eius non est actus, si non est actus, ergo poterit non mouere, ex consequenti motus cæli, poterit esse non continuus perpetuus quod Arist. pro inconuenienti habet, est igitur immobilis, ergo impartibilis secundum motum. Item in 12. Metaph. tex. 41. probat eam inalterabilem, & impassibilem, ergo perfectiones suæ intrinsecæ inseparabiles sunt, ergo est indiuisibilis secundum multitudinem. Hæc igitur conclusio vera est secundum Arist. & in se, licet fundamentum suæ probationis, scilicet motus æternus non acceptetur à Theologo, ut dicemus.

Secundum doctrinam Theologi hæc conclusio acceptatur, unde Dionysius in quarto cap. de Diu. no. inquit. primæ creaturæ, sicut incorporales, ita & immateriales intelliguntur, ergo sunt impartibiles, secundum magnitudinem, & corporeitatem, & signum quidem carentiæ materiæ, & magnitudinis sumitur à sua propria operatione, quæ est intelligere, hæc enim cum nullus, sit organi corporei, signat intellectum esse immaterialem, & incorporeum, & cum non minus possit esse abstracta natura rei, quam eius potentia actiua, quoniam originatur potentia à natura rei, sequitur substantiam intelligentiæ esse remotam ab omni materia, &
magni

magnitudine . Item intelligentia ex eo quod est immaterialis, est immobilis, motu physico, omne enim mobile physicum habet materiam, & est quantum vt etiam probat Philosophus in sexto Phys. Si immobilis, ergo non est diuisibilis, secundum motum. Item omnes perfectiones impressæ à prima causa in intelligentia sunt cōnaturales, & veluti proprietates suæ, ergo sunt inseparabiles, ex consequenti est indiuisibilis quo ad multitudinem perfectionum suarum, eo modo quo ex posuimus etiam ad mentem Auctoris .

Tu tamen aduerte quòd licet Theologus concordet cū Auctore, & Proclo, & Arist. in conclusione, non tamen in probatione . nam vt diximus supra, licet secundum substantiam mensuretur æternitate participata, non tamen quo ad operationes suas naturales. nam in intellectationibus, & volitionibus, & applicationibus suæ virtutis ad corpora mouendam potest esse successio, & vt sic subijcitur tempori, dixi autem operationes naturales, vt secundum operationem beatificam, secundum quam mensurantur æternitate, patet ergo quòd illa ratio Auctoris, & Procli fundata super hoc quod intelligentia est omnino æternalis non concludit . Item ratio Arist. fundata super motum æternum, non acceptatur cū ponat motum cœli, & tempus, & vniuersitatem creaturarū incepisse, secundum durationem, & de hoc loquemur diffusè in propositione vndecima . Hæc de septima propositione dicta sint.

PROPOSITIO VIII.

Omnis intelligētia scit, quod est supra se, & quod est sub se &c.

IN hac propositione intendi declarare modum quo in intelligentia intelligit quod est supra se, id est causam primam, & quod est infra se, id est corporea, & materialia, & intendit hanc conclusionem, intelligētia scit quod est supra se inferiori modo quā sit id quod est supra se, & scit quod est infra se altiori modo quā sit illud in se, quam quidem conclusionem intendit sic probare. omnis sciens non scit rē meliorem,

meliozem, & inferiozem, & deteriozem, nisi secundum modum substantiæ ipsius scientis, & sui esse, & non secundum modum, secundum quem res sunt, sed substantia, & esse intelligentiæ inferiora sunt, eo quod est supra se, id est prima causa, quoniam illa infinita est, hæc autem finita, ergo inferiori modo scit primam causam, quam sit prima causa. nam est infinita intelligibilis, & ab intellectu infinito comprehensibilis, & tamen ab intelligentia finita intelligitur, nec à suo intellectu finito comprehenditur, ergo imperfectiori modo cognoscitur ab intelligentia, quam sit prima causa in se, & substantia intelligentiæ, & suum esse, altiora & nobiliora sunt, quam res corporeæ, & sensibiles, quoniam actus sunt, & æternæ, & intellectuales ex toto, ergo altiori modo, & nobiliori sciuntur ab intelligentia, quam sint illa in se. Minor quidem huius rationis manifesta est, sed superest declarare maiorem. Vnde aduerte quod sciens non sit sciens actu, nisi in quantum actuatur forma rei cognitiæ, quæ est cognoscendi principium, actuatur autem in quantum recipit eam, recipit autem secundum modum substantiæ suæ, quia vnum quodq. recipitur per modum recipientis. puta si recipiens est nobile, receptum dato quod in se sit non nobile, recipitur nobiliter, & si recipiens sit ignobile, receptum autem in se nobile, recipitur ignobiliter, quoniam trahitur receptum ad naturam recipientis præcipue in ratione cognoscendi propterea entia abstracta in nostro intellectu habent ignobilius esse, entia vero materialia habent esse nobilius, quoniam immateriale, quia igitur sciens, sit sciens, quia recipit formam rei cognitiæ, & recipit secundum modum suæ substantiæ, & non secundum modum substantiæ rei cognitiæ verum est, quod omnis sciens non scit rem meliorem, nec decentiorem, nisi secundum modum substantiæ ipsius scientis. vnde in proposito ad mentem Auctoris, cum intelligentia comparatur ad primam causam ut causatum, & ad res materiales inferiores, ut causa, quoniam per motum cœli causat eas, sequitur quod cum causatum sit inferius sua causa, sciet primam causam imperfectiori modo, quam sit in se, & sciet materialia perfectiori modo quam sit in se. nam & substantia sua est inferior prima causa, & est superior rebus materialibus.

Tu tamen aduerte quòd hic loquitur Auctor de modo cognitionis . ex parte cognoscentis, & non de modo, ex parte rei cognitæ . nam ex parte cognoscentis verum est quod dicit, scilicet quòd cognoscit secundum modum substantiæ suæ, & non secundum modum quo res sunt, puta prima causa est infinitè in se intelligibilis, & tamen ab intelligentia intelligitur finitè, quoniam sua substantia, & sua intellectualitas sunt finitæ, ex parte autem rei cognitæ intelligit rem sicut est, aliter falsè intelligeret, puta licet intelligat primam causam finitæ, tamen intelligit eam esse infinitæ intelligibilem, & licet intelligat rem materiale immaterialiter, quia per speciem abstractam à conditionibus materiæ, tamen intelligit eam habere esse materiale .

Secundum doctrinam Procli acceptatur eadem conclusio : nam in suo libro ponit hanc propositionem, omnis intellectus, scilicet separatus est intellectualiter, quæ ante ipsum, & quæ post ipsum, id est in suo intellectu sunt modo intelligibili, & superiora, & inferiora, nam sicut quæcunque sunt in sensu, sunt modo sensibili, & quæcunque sunt in materia modo materiali, sic quæcunque sunt in intellectu, sunt modo intelligibili, & sicut quæcunque recipiuntur in sensu, recipiuntur secundum virtutem sensus, & quæ recipiuntur in materia, secundum dispositiones materiæ, ita omnia recepta in intellectu, recipiuntur secundum modum, & virtutem ipsius intellectus, igitur sicut lux solis debiliter recipitur in visu, quia excellentior est ipso visu, & lux lampadis perfectè, quia visus perfectior est, sic superiora entia debiliter recipiuntur in intellectu separato, & inferiora perfectè, & altiori modo, quam sint in se, & id totum fundatur super illud principium, cognitum dum cognoscitur proportionatur cognoscenti .

Secundum doctrinam Arist. acceptatur eadem conclusio . nam in tertio de anima, tex. 37. pro principio habet quòd intelligibile in actu, quod in intellectu creato, non est verum per identitatem, nisi quando intelligens intelligit seipsum, quando autem intelligit alia à se, non est vera identice, sed receptivè vel informativè spiritualiter, vnde inquit illic Aristot. lapis non est in anima, sed species lapidis, est igitur secundum

dum Arist. res intelligibilis ipse intellectus. quia recipitur in intellectu intelligibiliter, sed quod recipitur in aliquo modificatur in eo, quia recipitur secundum virtutem, & capacitatem siue habilitatem recipientis, ergo quando superius recipitur intelligibiliter in intelligentia, modificatur in ea, ergo inferiori modo, quam sit in se, & quando inferiori recipitur in ea, recipitur altiori modo, quam sit in se, ex quibus sequitur quod dum intellectus recipit superius, intellectus quidem sit dignior, sed superius quodammodo sit indignius & quando recipit inferiori est opposito modo, unde Arist. in 12. Metaph. inuelligans, in tex. 51. quid Deus intelligat dicit, quod dignissimum, & honorabilissimum intelligit, id est seipsum, & non transmutatur, scilicet ad intelligendum aliud, indignius enim, quasi dicat. Cum omne extra Deum sit indignius Deo, si transmutaretur ad intelligendum aliud, intellectus eius vilesceret, quoniam, scilicet reciperet indignius. propterea concludit, seipsum ergo intelligit, siquidem est potentissimum. Quomodo autem alia intelligat, ita eius intellectus non vilescat, non est opus nunc discutere.

Secundum doctrinam Theologi, eadem conclusio acceptatur, & ratio sua est, quando intelligentia intelligit intelligentione naturali, id quod est supra se, id est primam causam intelligit eam per sui substantiam, & per alia creata quæ in infinitum deficiunt à diuina perfectione representanda, ergo non intelligit eam, sicut est in se intelligibili, ergo intelligit eam imperfectiori modo, quam sit in se intelligibilis, & non solum intelligentione naturali, sed etiam beatifica, quoniam dato quod prima causa efficiatur forma intelligentiæ, tamen non comprehenditur ab ea, quoniam inadæquatur sibi, cum sit limitata, quæ autem sunt infra intelligentiam ut corporea, & materialia intelligit altiori modo, quam sint in se quoniam intelligit ea per sui substantiam quæ est nobilioris gradus cum sit immaterialis, & intellectualem, & intelligit ea per species congenitas de quibus loquimur infra, sufficientissime representatiuas in specie, & in singulari. uerum ergo est dicere intelligentiam intelligere quod est supra se inferiori, & imperfectiori modo, quam sit illud in se, & intelligere quod est infra se, altiori modo, quam sit illud in

in se & aduerte q̄ semper loquimur de modo cognitionis, ex parte cognoscentis. Hæc de octaua propositione dicta sint.

PROPOSITIO IX.

Omnis intelligentiæ fixio, & essentia eius est per breuitatem puram, quæ est causa prima.

IN hac propositione intendit manifestare quid est supra intelligentiã, à quo dependet, & à quo habet esse perpetuum, & intendit hanc conclusionem, omnis intelligentiæ fixio. i. esse fixum, & indeficiens est à prima causa effectiua, quæ est pura bonitas, & hanc conclusionem probat dupliciter. Primo ex operatione intelligentiæ. Secundo ex conditione primæ causæ ibi, & quia causa quidē prima &c.

Quantum ad primum aduerte duo. Primo, q̄ licet prima causa multas habeat actiones, scilicet immanentem, & trāseuntem, tamen dicitur prima causa, quia mouet, conducit, seruat, regit, & dominatur omnibus, ideo nominatur Princeps, Rex, Dominus vniuersorum. Secundo, licet intelligentia applicata cœlo habeat multas actiones, vt pote intelligēs desiderans mouens influens &c. tamen hic consideratur ab Auctore vt influit, in cœlo, & per motum suum influit in generabilibus, tam simplicibus, quā mixtis, & ordinat motus, & generationes, & permutationes inferiores, & regit, & disponit, inferiori per tempora, & variationes temporum & retinet, & conseruat res inferiores modo eis conuenienti, & applicat causas particulares effectibus suis, vt ignem ad comburendum arborem ad fructificandum, hominem ad generandum, ita quod cessante intelligentia à motu cœli, deperiret in mundo inferiori omnis naturalis actio, & ordo, & dispositio propter quod sicut prima causa est vniuersalis princeps, & moderator totius entis, sic intelligentia mouēs cœlum est domina, & regulatrix, & princeps mundi inferioris, esse igitur dominatiuum, & gubernatiuum conuenit primo, & essentialiter primæ causæ, participatiue autem, & modificate conuenit intelligentiæ. His suppositis sic arguitur ad conclusionem, quicumque participat propriam operationem

tionem alicuius, necesse est ut pendeat ab eo . nam quia luna participat operationem solis, scilicet illuminare, necesse est ut esse luminosum in sit sibi à sole , & si discipulus docet alium necesse est, ut recipiat doctrinam à docente, sed intelligentia participat propriam operationem primæ causæ, scilicet producere regere disponere continere entia non quidē absolute ut prima causa, sed modificate ut diximus, ergo necesse est ut pendeat effectiue à prima causa quæ est bonitas pura, quæ autem sint contenta , & gubernata ab intelligentia, inquit Auctor, & intelligentia comprehendit generata, & naturam, & horizontem naturæ, scilicet animam, & per generata intendit vniuersitatem rerum generabilium, & corruptibilium quos comprehendit, & continet, & disponit mediante motu cœlesti, & per naturam intendit virtutes naturales quæ sunt principium motus, & quietis in corporibus naturalibus inter quæ cœlum est primum corpus naturale, & per horizontem naturæ, intendit animam cœli, quod secundum Auctorem est animatum, quam dixit supra esse in horizonte æternitatis, quoniam secundum esse est æterna, inquam autem est principium motus cœli propinquat tempori. Hanc igitur dicit esse in horizonte naturæ, quoniam secundum naturam intellectualem, se tenet cum intelligentia, secundum virtutem motiuam corporis se tenet cum formis naturalibus, dicit igitur Auctor, ideo intelligentia continet, & disponit generationem, quia est supra naturam, id est virtutem corporis cœlestis, & continet eam, & continet naturam, id est disponit virtutem cœlestem, quia est supra animam cœlestem cum intelligentia, sit substantia omnino abstracta cum igitur sub intelligentia, non sint nisi anima cœli, & natura cœli, & hæc inferiora generabilia, tam simplicia, quam mixta, sequitur quod intelligentia continet, & regit omnes res, & id obtinet intelligentia, quoniam est effectus propinquissimus primæ causæ quæ supereminet intelligentiæ, & anima cœli, & naturæ, & omnibus inferioribus, sicut vniuersalissimum causans, & regens, & disponens omnia, patet igitur à signo sumpto ex operatione intelligentiæ, quomodo pendet à prima causa, quæ est pura bonitas.

Secundo Auctor probat eandem conclusionem, ex eminentia

nentia primæ causæ: vnde nota quòd cum prima causa obtineat primatum, & summitatem omnium perfectionum, est enim primum esse, primum bonum, prima vita, prima essentia intellectualis, prima scientia, prima potentia motiua, productiua, principiatiua, sequitur ex illo principio accepta to apud quemcunque recte sentiente, primum & maximum in aliquo genere, est causa, & metrum omnium illius, quòd prima causa sit creans omnes perfectiones inuentas extra ipsam, igitur cum sit supra intelligentiam, & animam, & naturam, sequitur quòd ab ea pender esse omnis rei naturalis, & esse, & virtus animæ, & esse, & virtus, & scientia, & potentia diuina, id est regitiua intelligentiæ, & ratio quidem propter quam prima causa supereminet omnibus, scilicet intelligentiæ, & animæ, & naturæ est, quoniam habent yliachim, id est aliquam compositionem materialem, vt naturalia quæ componuntur ex materia, & forma, vel per modum materiæ, vt anima, & intelligentia quæ componuntur ex esse, & essentia, & esse habet rationem actus, essentia autem rationem potentie, sed prima causa non habet yliachim, sed est summæ simplex, & est tantum esse, id est purus actus.

Sed forte dicet aliquis, si causa prima est tantum esse, ergo videtur esse communis essentia, quæ de omnibus prædicatur, quòd tamen est falsum, quoniam Deus esset vniuersale esse: cui vt vniuersali non debetur aliqua operatio, agere enim est singulare, ex consequenti Deus non produceret intelligentiam, nec aliud.

Respondetur negando consequentiã, dicitur enim Deus esse tantum, id est esse non limitatum, nec receptum in aliquo, sed infinitum in se continens omnem essendi gradum, quod seipso distinctum est à quocunque alio, & non per aliquod recipiens. nam abstracta seipsis sunt hæc, composita autem per materiam indiuiduantur, vnde sicut si daretur albedo separata, seipsa esset hæc, albedo autem recepta, sic hæc per materia, sic Deus seipso in se indiuisus est, & distinctus à quolibet alio, in his comprehenditur intentio Auctoris in hac nona propositione.

Tu tamen aduerte q̃ duo hic dicta ab Auctore non acceptantur vt diximus etiam supra, primo dictum de anima
cœli.

cœli, nam non tenetur secundum veritatem cœlum esse proprie animatum, secundo dictum suum, cum dixit Deum creare animam, & naturam, & reliquas res mediante intelligentia, id enim reprobauimus in propositione tertia.

Secundum doctrinam Procli acceptatur eadem conclusio. nam in libro suo super hanc propositionem ponit.

Omnium entium principium, & causa prima, bonum est, & accipit ly bonum, propter se bono, more Platonico, quod est purum, & per se subsistens bonum, & concordat cum Platone in Timæo, vbi inquirens rationem creandi mundum in Deo, inquit. Dicamus igitur quam ob causam illæ rerum Auctor generationem, & hoc vniuersum constituit bonus erat, bonus autem nulla vnquam aliqua de re inuidia tangitur, ergo cum liuor ab eo alienissimus esset, omnia sibi quantum fieri poterant similia fieri voluit, hæc ibi, Ratio autem Procli, secundum doctrinam Platonis est, quoniam quod est tale per essentiam, causa est eius quod est per participationem, sed Deus est bonus per essentiam, quoniam est à se bonus, ergo est causa intelligentiæ, & omnium entium quæ sunt bona per participationem, quoniam sunt in æqualiter, & limitate, & pluraliter bona.

Secundum doctrinam Arist. eadem conclusio acceptatur. nam in secundo Metaph. tex. 4. dixit vnumquodque maxime ipsum, aliorum dicitur, scilicet causa secundum quod est in alijs, puta ignis calidissimus. etenim est causa alijs hic caloris, ex hoc ergo principio deducitur ex doctrina sua, quæ maxime ens, est causa omnis entis, & maxime bonum est causa omnis boni, cum igitur prima causa sit huiusmodi, ergo est causa, & intelligentiæ, & naturæ, & omnium entium, quod confirmat Comment. in 2. Metaph. cōment. 4. vbi inquit, omnia entia non acquirunt esse, & veritatem, nisi à prima causa, quæ est maxime ens, & alia sunt entia per ipsam, & Arist. in 12. Metaph. tex. 52. inuestigans qualiter hoc vniuersum habet bonum, assignat duplex bonum, scilicet intrinsecum quod dicit esse ordinem inter partes vniuersi, & extrinsecum, siue separatum, ad quod ordinantur omnia, sicut exercitus ad ducem, & hoc bonum concludit esse vnum, & vniuersalem Principem in vniuersitate entium. Ab hoc igitur

Bpit. Iauelii. f bono,

bono, vt præposuerat in tex. 18. vt à principio. Primo, pendent cœlum, & natura .i. superiora, & inferiora entia.

Secundùm doctrinam Theologi eadem conclusio accipitur. nam Dion. in 4. cap. de Diu. nom. ostendens excellentiam huius nominis bonum in Deo inquit, & quoniam eo quod est bonum est substantiale bonum, ad omnia existentia extendit bonitatem, etenim sicut noster sol, non ratiocinans, aut præligens, sed per ipsum esse illuminat omnia participare valentia lumine ipsius, ita quidem, & bonum omnibus existentibus proportionaliter immittit radios bonitatis &c.

Deinde in particulari declarat quomodo ex primo bono subsistunt substantiæ intellectuales, & animæ, & irrationabilia, & corruptibilia vsque ad materiam primam, & cœlestia corpora. Ratio autem Theologi ad conclusionem eadem est, cum ea quæ adducta fuit, secundùm doctrinam Platonis, & Arist. Hæc dicta sint de nona propositione.

PROPOSITIO X.

Omnis intelligentia plena est formis, veruntamen ex intelligentijs, sunt quæ continent formas plus vniuersales &c.

IN hac propositione intendit Auctor declarare quibus medijs intelligentiæ sciunt quæ sunt extra se præter causam primam. Dico autem quæ sunt extra se ad differentiam propriæ essentiae, de cuius intellectione loquemur in propositione decimatertia. & dico præter causam primam, quoniam illa est maior omni narratione, & omni scientia creata, quo ad cognitionem perfectam, & essentialē, de qua hic intendit Auctor, in hac igitur propositione, ponuntur duæ conclusiones ad mentem Auctoris.

Prima conclusio, omnis intelligentia plena est formis .i. speciebus intelligibilibus congenitis per quas perfecte intelligit, quæ sunt extra se.

Secunda conclusio, omnis intelligentia quanto superior, tanto per pauciores, sed vniuersaliores formas intelligit, & quanto

quanto inferior, tanto per plures, & minus vniuersales species intelligit.

Quantum ad primam conclusionem, aduerte, q̃ Auctor non probat eam, sed vt manifestum ponit, quoniam principium intelligendi in intelligentia omnia alia creata, aut est sua propria essentia, aut species abstracte à rebus sicut abstracta hic humanus intellectus, aut species impressæ sibi à prima causa in sui creatione, non propria essentia, quoniam cum sit limitata ad genus, & certam speciem non est sufficienter representatiua omnium generum, & specierum in entibus; sed .i. propriam diuinæ essentia, ex sui illimitatione, & ex continentia omnis gradus essendi, nec species abstracte à rebus, ille .n. supponunt vim imaginatiuam, siue phantasiā, & illustrationem phantasmatum ab intellectu agente, quorum vtrunque Procul est ab intelligentia cum sit substantia mere intellectus, ergo à sufficienti diuisione, necesse est ponere in ea species concretas sufficienter representatiuas rerum ab ea cognoscibilem.

In hac conclusione concordat Proclus qui in suo lib. talem propositionem ponit. Omnis intellectus plenus est specierum, & ratio huius in via Platonica est, quoniam Plato ponebat formas abstractas, vt per se hominem, per se leonem &c. Et sub his formis ponebat ordinem intellectuum separatorum, & hos intellectus actuari illis formis abstractis, vt intelligant, necesse est .n. intellectum informari forma sui obiecti inesse intelligibili, sicut informatur sensus specie rei sensibilis, hæc aut informatio fit per impressionē specierum, ergo necesse est in intellectu separato fieri impressionem formarū abstractarū quas Proclus hic vocat species.

Eandem conclusionem acceptaret Arist. licet non habeamus eam expressam in doctrina sua, certum est enim quod in 12. Metaph. tex. 36. ponit cælum moueri à motore suo per intellectum, & desiderium, quo motu producit inferiora, secundum vnāquāque speciem, ergo intelligit cælum motum, & inferiores naturas, ergo necesse est, vt in intellectu suo habeat esse spirituale rerum naturalium producibilem: est enim intelligentia, vt artifex in cuius intellectu sunt formæ artificiatorum, ita q̃ sicut artificia habent

duplex esse. scilicet in materia, & in mente artificis, ita formæ rerum productibilium motu cœli, duplex habent esse. scilicet naturale in materia, & spiritale in intelligentia, & id confirmatur per Comment. qui in 12. Metaph. li. tex. 36. inquit, istæ enim formæ, scilicet rerum productibilium forte videntur habere duplex esse, scilicet esse in actu. quod habent in materia, & esse in potentia. scilicet actiua, quod habent in illa forma. scilicet intelligentia mouente, & dico potentiam quemadmodum dicimus, quod formæ artificiales habent esse in actu, in materia, & in potentia in anima artificis. Vnde hæc formæ videntur habere duplex esse. scilicet abstractum, & materiale, & hoc quidem est quod facientes formas volunt dicere, sed non perueniunt ad ipsum. Hæc Cōment. & per facientes formas intendit Platonicos facientes ideas, patet igitur quod ad mentem Arist. & Comment. intelligentia est plena formis, sicut intellectus artificis potentis producere artificia cuiuscūque generis.

Bandem conclusionem acceptant Theologi, præcipue Dionysius, qui inquit in quarto capitulo, de Diu. nom. in intellectus super mundani intelligunt, & illuminantur, secundum existentium rationes, id est formas intelligibiles, & August. in secundo super Genesim, ad litteram tenet, rerum rationes, id est rerum productibilium essentias prius productas fuisse in mente Angelica, quam in materia. Ratio autem Theologi ad hoc, stat in conformitate inter naturam corporealem, & spiritalem, videmus enim materiam inferiorem non perfici, nec repleti forma quam habet. sed successiua receptione formarum fit in actu, materia vero superiorum penitus perficitur forma sua, nec est in potentia ad aliam, sic intellectus humanus non perficitur, nec completur aliqua specie intelligibili, sed in principio est in pura potentia in genere intelligibilium, & venatione sensuum, ac illustratione intellectus agentis, paulatim actuatur speciebus abstractis, intellectus autem intelligentiæ, quia omnino separatus est à rebus materialibus, recipit ex influxu primæ causæ in sui creatione, formas intelligibiles quibus intelligit quæ sunt extra se sicut & cœlum recipit formam, quia seruetur in esse perpetuo, & potest agere in inferioribus actione perpetua.

Quantum ad secundam conclusionem Auctor intendit
talem

talem propositionem, quod est propinquius maxime, vni & perfectissimo enti est minus multiplex, & magis vnum, & vehementioris virtutis, quod autem est minus propinquum est opposito modo. quoniam minus accedit ad conformitatem illius primi, sed intelligentiæ superiores propinquiores sunt maxime vni, & perfectissimo enti cum sint altioris gradus in entibus, intelligentiæ autem inferiores minus propinquant, ergo intelligentiæ superiores sunt minus multiplices, & magis vnæ, intelligentiæ autem inferiores sunt opposito modo, ex consequenti intelligentiæ superiores, & in substantia, & in intellectu, & in operatione minus multiplices sunt, & vehementioris virtutis, inferiores autem opposito modo, ita quod formæ per quas superiores intelligunt sunt minus multiplicatae, & magis perfecte, in inferioribus autem opposito modo. vnde aduerte quod accidit in intelligentijs, sicut in agentibus naturalibus. nam primum agens naturale, id est cælum, quia superius, & perfectius est. vna qualitate, id est luce multipliciter influit, & operatur in inferioribus. nam illuminat calefacit exiecat, mollificat generat. Agentia autem naturalia secundaria vt elementa, & elementata multis qualitatibus multiplicat actiones. nam ignis leuitate ascendit, calore calefacit luce illuminat & c. Sic est in intelligentijs inter quas superiores assimilantur primo agenti naturali inferiores autem secundarijs agentibus, & id totum prouenit ex maiori, & minori propinquitate ad purum vñ. Vnde concludit Auctor, qd formæ intelligibiles, quæ veniunt ex intelligentijs primis, ex intelligentijs secundis sunt debilioris processionis, & vehementioris separationis. i. multiplicatis, qm cum sint minus perfecte, secundum substantiam, nō possunt eas recipere in illa vnitatem, & vniuersalitate, secundum quam recipiuntur in primis. vnde se habent inferiores intelligentiæ ad superiores, sicut discipulus ad doctorem qui recipere non potest plurium conclusionum notitiam, nisi per distinctas, & ordinatas & dearticulatas propositiones à Doctore tradatur. Doctor autem virtute ingenij, & sufficiencia habitus scientifici ex vno principio deuenit in notitiā multarum conclusionum, patet igitur, secundum Auctorem ratio pp quā intelligentiæ, quanto superiores, tātō per pauciores,

sed vniuersaliores .i. in representando plura, nō solum quo ad prædicata communia, sed etiam propria, & specifica species intelligunt, inferiores autem, quanto inferiores, tanto per plures, & minus vniuersales species intelligunt.

Eadem conclusio acceptatur à Proclo . nam in libro suo talem propositionem format, omnis intellectus plenus est specierum, hic quidem vniuersaliorum, hic autem particulariorum, & ratio quidem ad mentem Procli est hæc virtus intellectiua, quanto est altior, tanto est vniuersalius medium per quod intelligit, & quanto inferior, tanto est particularius medium, & id quidem pater, ex parte vtriusq; extremi . nam quia diuinus intellectus altissimus est, ideo per vnicum medium vniuersalissimū in representando intelligit omnia, & illud est essentia sua, intellectus aut humanus, quia infimus est, multiplicia, & particularia sunt media, quibus rerum naturas intelligit, intelligit .n. vnamquaque naturam per propriam, & distinctam speciem, ergo intellectus intermedius, quanto magis p̄pinq̄uant diuino intellectu, tanto p̄ vniuersaliores species intelligūt, & quāto magis distāt, ac p̄pinq̄uat intellectui humano, tāto p̄ particulariores species intelligūt.

Eadem conclusio, supposita prima, acceptaretur ab Arist. nam in 12 Metaph. tex. 44. ponit excessum perfectionis, & dignitatis intelligentiarum, s̄m ordinem sphaerarum mobile, & motum, vt quia suprema sphaera est primum intelligentia illic applicata est perfectior, deinde alia, secundum ordinem motuum, sicut igitur intelligentia à qua est primus motus est perfectior, secundum substantiam, & virtutem motiuam est etiam perfectior, secundum virtutem, & operationē intellectualem, quoniam mouet intelligens, & desiderans ex 12. Metaph. tex. 36. Si est perfectior, secundum intellectiōē. ergo perfectiori specie intelligit, perfectior autem species est vniuersalior, quoniam est principium cognoscendi plura intensiue, & extensiue: dummodo sit sufficienter representatiua in genere, & in specie vt nunc supponimus de speciebus non abstractis à rebus quales sunt in intelligentia, igitur intelligentia quanto superior, tanto per vniuersaliores, & quanto inferior, tanto per particulariores intelligit, quoniam quanto superior, tanto vigorosior, & quanto inferior,

tanto

tanto minus vigorosa in mouendo, & intelligendo idem cōfirmatur de intentione Comment. qui in 12. Metaph. Comment. 44. assimilat intelligētias motrices artificibus sibi mutuo deseruientibus in vno artificio, in quo necessarij sunt multi artifices subordinati, qui tamen omnes ordinantur ad vnū supremum, & dat exemplum de arte æquitandi, cui deseruit ars faciendi frena, & multæ aliæ artes, in quibus artibus, sic disponuntur artifices, & quanto magis propinquant primo artificio, habent maiorem intelligentiam, & vniuersaliorem, quanto autem magis distant habent minorem, & particulariorem, sic est intelligendum inquit Comment. de istis corporibus, scilicet cœlestibus cum suis formis, scilicet intelligentijs à quibus mouentur, & de istis formis adinuicem, multum enim assimilantur artificijs quę seruiunt sibi adinuicem, & quę intelligunt adinuicem, sed differentia inter ista, & artificialia est quòd formæ artificij mouentes artifices sunt in materia, iste autem non, quasi dicat, sed sunt in intelligentia intelligibiliter. Pater igitur ad mentem Arist. & Comment. intelligentias superiores habere intellectiones vniuersaliores ex consequenti formas vniuersaliores, inferiores autem opposito modo.

Eadem conclusio acceptatur à Theologo. nam Dionys. in 12. cap. de cœlesti hierarchia, inquit sanctorum Cherubin: ordo participat sapientiam, & scientiam altiore. i. vniuersaliorem, sub ipsis autem essentiarum dispositiones. i. ordines spirituum dispositi sub Cherubin, participant quidem, & ipsi sapientiam, & scientiam particularem, tamen illis subiunguntur. ratio vero Theologi ad hanc conclusionem est hæc, in vniuersitate entium, tanto aliqua sunt superiora, quāto sunt vni primo. i. Deo propinquiora, & similia. Deus autem plenissime intelligit omnia per vnum vniuersalissimum medium, quod est essentia sua, ergo inter substantias intellectuales, quæ sunt superiores, ex consequenti similiores Deo, & propinquiores Deo, licet non habeant sufficientiam cognitionis per suam propriam essentiam intelligunt, tamen per pauciores, sed vniuersaliores species, & quæ sunt inferiores, ex consequenti minus similes, & ppinque Deo, intelligunt per plures, & minus vniuersales species. Aliqui

autem Theologi sumunt rationem à similitudine communicationis luminis corporalis . nam sicut à sole , vt à fonte totius luminis, maius lumen procedit ad lunam, quam ad aërem, & ad aërem, quam ad corpora colorata, sic à primo lumine intellectuali, quod est Deus, procedit maior, & vniuersalior cognitio in primis intelligentijs, quam in secundis, & maior ac vniuersalior in secundis, quam in vltimis, & maior ac vniuersalior in vltimis, quam in intellectu humano, & maior in intellectu humano, quam in sensu . Hæc de propositione decima dicta sunt .

PROPOSITIO XI.

Omnis intelligentia intelligit res sempiternas quæ non destruuntur neque cadunt sub tempore &c.

IN hac propositione Auctor intendit declarare, quid intelligendo causet intelligentia, & quoniam omne causatum, aut est incorruptibile, aut corruptibile, ponit hanc conclusionem, omnis intelligentia intelligit, id est intelligendo causet res sempiternas, quæ non destruuntur, vt cælum, & intelligentia, & anima intellectiua, neque cadunt sub tempore, & hoc dicit propter motum cæli, qui licet sit sempiternus, secundum Philosophos. tamen mensuratur tempore, & hic motus, secundum Auctorem nō causatur immediate ab intelligentia, sed ab anima cæli, vt diximus in tertia propositione, quam ponit distinctam ab intelligentia . Hanc autem conclusionem, sic probare intendit, intelligentia producit effectus suos, secundum suum esse, quia vnumquodque producit sibi simile. ergo quale est suum esse, tales erunt eius, effectus, sed esse suum est sempiternum, & incorruptibile, & non cadit sub tempore, sed parificatur æternitati, vt dictum est in propositione secundâ. ergo eius effectus sunt res sempiternæ, quæ non destruuntur, nec cadunt sub tempore. Ex hac conclusionem ponit Auctor corollarium . ergo res destructibiles, vt elementa, & elementata non sunt immediate ab intelligentia æterna, sed ex causa corporea quale est cælum, mediante motu, vel temporali, qualis est anima cæli mouens

mouens cœlum, quæ licet secundum substantiam sit æterna, tamen in quantum est causa temporis est temporalis. Hæc est intentio Auctoris in præsentī propositione, quæ quantā veritatem cōtineat, manifestabitur in positione Theologi.

Hanc conclusionem videtur acceptare Proclus, nam in lib. suo ponit duas propositiones, quarum sensum Auctor in vna perstrinxit.

Prima est, omnis intellectus, scilicet separatus perpetuum est proxime, & intransmutabilem secundum substantiam substitutorum, id est omnis intelligentia proxime, & immediate intelligit entia perpetuā, & immutabilia secundum substantiam sub se constituta.

Secunda est, omnis intellectus intelligendo instituit quæ post ipsu n, id est omnis intelligentia intelligendo producit entia sequentia post ipsam, eiusdem tamen rationis, scilicet æterna, & incorruptibilia, & ratio Procli identificatur rationi Auctoris, scilicet quia intelligendo esse suum producit effectum, intelligit autem esse suum æternum, & indestructibile. ergo producit effectum æternum, & indestructibilem.

Tu tamen aduerte q̄ licet Proclus sit Platonicus, tamen in doctrina Platonis non admittitur hæc conclusio vniuersaliter, sed tantum in prima causa. nam in Timæo postquā Plato docuit cœlos, & motores eorum, quos vocat Deos cōditos à Deo æternos, & immortales intendens declarare quomodo hæc inferiora animantia producta sunt inter quæ velut Princeps est homo, dicit Deum cōmisisse hanc productionem Dijs immortalibus ne si fierent hæc animantia à Deo essent immortalia sicut ipsi Dij, & quoniam anima humana est immortalis dicit Plato Deum cōmisisse Dijs formationem corporum corruptibilium, ipse autem gignit animam, quoniam apud Platonem est hoc velut principium quidquid à Deo sine media causa producitur incorruptibile, & immortale est. Vnde in Timæo introducit Deum dicentem, quæ à me facta sunt, me ita volente indissolubilia sunt, & iterum. Hæc vero, scilicet animantia inferiora si à me solo, id est sine causa media fiant, vitæque donentur Dijs adæquabuntur, id est erunt æterna, & immortalia sicut Dij; igitur ad mentem Platonis tenendum est q̄ solus Deus intelligendo

telligendo producit res sempiternas, & incorruptibiles, quoniam esse suum est simpliciter, & ex se æternum, ceteræ autē intelligentiæ, cum non sint ex se æternæ, & immortales, sed à Deo immediate productæ, possunt producere corruptibilia compositione partium elementarium adinuicem. Vnde loquens in timæo de formatione corporis humani facta à Dijs inquit, itaque accepto ab illo .s. Deo mortalis animantis .i. hominis immortalis principio .i. anima, sui effectorem imitati. s. Dijs ignis, æris, aquæ, terræ, particulas quas rursus redderent mundo mutuabantur, easq. inter se copulabant &c. Constat ergo quod via Platonica, nec conclusio, nec corollarium acceptandum est.

Secundum doctrinam Aristot. conclusio non est acceptanda, quoniam æterna incorruptibilia non procedunt in esse ex transmutatione materiæ, sed virtute creatiua, quæ est solius causæ infinitæ, vnde intelligentiæ ex suo intelligere, nullius sunt causæ nisi mediante motu cœli, propter quod opinatus est Arist. in 12. Metaph. tex 48. nullam substantiam impassibilem quales sunt intelligentiæ esse sortitam optimum finem. i. habere ultimam perfectionem nisi ex motu & Côm. in 12. Metaph. Comm. 48. inquit, nulla substantia abstracta est quæ non moueat, quia tunc inueniretur in dispositione diminuta. i. non in optima, & debita perfectione, & breuiter apud Arist. nisi mouerent cœlestia corpora essent ociose, ex consequenti nullum esset ab eis causatum exterius, neque æternum, neque generabile, propter quod dicendum est ad mentem Arist. quod intelligentiæ excepta prima causa nihil producunt æternum, sed producunt generabilia, & corruptibilia non per seipsa, sed per causam corpoream. i. per motum cœlestem: forma enim abstracta per se nihil imprimit in materia, sed necesse est accedere agens medium corporeum, sic diceret Arist. & eius Comment. verum quid veritatis contineat doctrina Arist. & Comment. declarabitur immediate sequentibus.

Secundum doctrinam Theologi, quo ad primam, & vniuersalem rerum productionem, nec conclusio, nec corollarium acceptandum est, processerunt enim omnia à prima causa, quoniam per creationem iuxta sacram doctrinam produciunt

dierunt inesse. Quantum autem ad successiuam generationem inferiorum, & conseruationem tenendum est corollarium q̄ .s. generabilia producuntur per causam corpoream. i. per cœlum motum ab intelligentia, ita q̄ intelligentia est, sicut artifex, cœlum autem est instrumentum, & in hoc accipimus dictum Comment. in 12. Metaph. comm. 44. vbi inquit, dispositio corporum cœlestium. i. motorum cœlestium, simul cum mobilibus suis in iuuamento adinuicem in creādo entia quæ sunt hic. i. in causando inferiora, & conseruando ea, est sicut dispositio regentium bonorum, qui se iuuant adinuicem in regendo bonam ciuitatem &c. Nec valet ratio adducta ab Auctore quæ etiam est Procli, licet. n. intelligentia habeat esse æternum saltem postquam producta est, & intelligat se habere esse æternum, & intelligendo opereatur, quia est sicut artifex agens per intellectum, non tamen est necesse q̄ producat talem effectum, qualis est ipsa, quoniam distinctio est inter agens naturale, & agens per intellectum in hoc q̄ agens naturale agit talem effectum qualem potest, & quando potest, agens autem per intellectum, non agit iuxta posse, sed sicut decet, & sicut vult, & quando vult, non .n. medicus dat tantum medicinæ infirmo quantum potest, nec semper, sed quantum, & quando expedit, cum igitur intelligentia agat per intellectum, non est necesse q̄ agat effectum quale est esse suum, sed vt apprehendit esse decens in vniuerso, & quando expedit, & aduerte, q̄ si hæc ratio Auctoris concluderet. Deus necessario produxit omnia ab æterno, & omnia perfectissima, quoniam esse diuinum est æternum, & perfectissimum.

Item aduerte, q̄ licet Theologus admittat hæc inferiora produci ab intelligentia per motum cœli, vt etiam tenet Arist. tamen non admittit fundamentum Arist. quo opinatus est intelligentias fore ociosas, nisi mouerent cœlos, & non sortiri vltimam perfectionem, nisi ex motu. nam cum sint altioris ordinis, & excellentioris naturæ, quam corporea nō inconuenit q̄ dentur aliquæ intelligentiæ non proportionate motibus cœlestibus, sed nobilioribus officijs dedicate, vt assistere primæ causæ, nec etiam intelligentiæ applicatæ cœlestibus corporibus sortiuntur vltimam perfectionem ex motu

motu sed contemplatione primæ causæ . Nam fm Arist. in 10. Eth. vltima perfectio naturæ intellectualis stat in actione immanenti, quæ est actio intellectus circa diuina. Manifestū est igitur ex prædictis qualiter non est acceptanda, hæc vndecima propositio, licet acceptandum sit corollarium modo expolito, & hæc de vndecima propositione dicta sint .

PROPOSITIO XII.

Primorum omnium quædam sunt in quibusdam per modum quo licet, id est conueniens est, vt sit vñū eorum in alio &c.

IN hac propositione Auctor intendit declarare quō intelligentiæ, tam superiores, quàm inferiores se inuicē intelligunt, & quā res intelligibilis intelligitur inquātum est in intelligentia aut per essentiam suam, aut per formam intelligibilem, aut per suum simile, aut per suum oppositū, ideo Auctor proponit hanc propositionem, vt principium primorum omnium &c. Id est entia prima quales sunt intelligentiæ, ita se habent quod vnum est in alio, fm quod conuenit ipsum in esse, & hoc principium declarat per vniuersalia, & prima prædicata, quæ sunt esse viuere intelligere, inter quæ vniuersalius est esse, quæcunque enim viuunt & intelligunt sunt, sed nō econuerso, post esse vniuersalius, est viuere, quæcunque. n. intelligunt viuunt, sed non econuerso, dicit ergo Auctor, quod inesse sunt vita, & intelligentia, id est gradus viuēdi, & intelligendi, & in vita sunt esse, & intelligentia, & in intelligentia sunt esse, & vita, & licet Auctor non declarat diuersitatem essendi, tu tamen considera, quod alio modo in esse, sunt vita, & intelligentia, quā sunt potentialiter, & in vniuersali radice, sicut homo, & leo, sunt in altero potentia liter vt in suo genere, & in vita sunt esse, & intelligentia, sed est in vita formaliter, quoniam vita in sua ratione formali includit esse, & intelligentia est in vita, vt in sua cōmuni radice. nam quæcunque viuunt quædam cognoscentia sunt quædam non, & inter cognoscentia quædam intelligunt, quædam

quædam non, vt bruta, & intelligentia sunt esse, & vita formaliter, quæcunque enim intelligunt formaliter viuunt, & sunt. patet ergo q̃ prima prædicata sunt in seinuicem non eodem modo, sed vnumquodque est in alio modo sibi conuenienti, sic in proposito cum intelligentiæ obineant primum gradum in entibus creatis superior est in inferiori, & econuerso, modo sibi conuenienti, qui autem sint isti modi apud Auctorem difficile est videre propter obscuritatem verborum quæ forte viciata sunt ex defectu transferentium, & si non sunt viciata continent manifestam falsitatem, quo ad duo. Primo, cum dicit esse, & vita in intelligentia sunt duæ intelligentiæ, & esse, & intelligentia in vita sunt duæ vitæ, & vita, & intelligentia inesse sunt duo esse. nam si intendit distinctionem realem cum dicit duæ intelligentiæ, duæ vitæ, duo esse, non potest sustineri, quoniam sequeretur quòd intelligentia quæ vere habet esse, & viuere, & intelligere non esset vnum per se, quoniam ex pluribus entibus in actu distinctis realiter non sit vnum per se, sed vnum aggregatione, si autem intendit distinctionem formalem, potest admitti, quoniam alia est ratio esse, & vitæ, & intelligentiæ. Secundo, cum dicit, quia vnumquodque primorum, vel principiorum, aut est causa, aut causatum &c. In hoc videtur innuere quòd intelligentiæ comparate adinuicem se habent, vt causa & causatum, ita quòd intelligentia superior est causa inferioris, ex consequenti est in inferiori, vt causa in effectu, & intelligitur ab inferiori, vt causa eius, & intelligentia inferior est in superiori, vt effectus in sua causa, ex consequenti intelligitur à superiori vt effectus eius, sicut artifex intelligit artificiatum, & hanc doctrinam de causa, & causato inter intelligentias Auctor tenuit in propositione tertia, & in quinta, & reprobauimus eum, quoniam in hoc videtur sequi viam Auicennæ, vt illic diximus in lib. 9. sup̃ Metaph. cap. 4. non ergo vere dici potest intelligentias se mutuo intelligere, quia vna est in alia, secundum modum causæ, vel causati, sed secundum alium modum quem dicemus ad mentem. Theo. vnde in hoc relinquimus Auctorem vt deficientem. Secundum doctrinam Procli acceptatur eadem propositio. nam in libro suo ponit consimilem in sententia, inquit

enim

enim omnia in omnibus, proprie autem in vnoquoque. i. omnia prima, sicut esse vita intellectus sunt in omnibus primis, se vnumquodque est in alio proprie. i. secundum modum conuenientem, & exponens inquit, etenim in ente vita, & intellectus, & in vita esse, & intelligere, & in intelligere esse, & vita, declarans autem modum conuenientem, quo vnum est in alio inquit, sed alicubi quidem intellectualiter, alicubi autem vitaliter, alicubi vero per modum entis, & intendit qd vita, & intellectus sunt in esse essentialiter, sunt .n. quidam modi essendi, & in vita sunt esse, & intellectus vitaliter, & in intellectu sunt esse, & vita intellectualiter. nam esse intellectus est esse intellectuum, & vita intellectus est ipsa intellectio, vita .n. proprie signat operationem propriam viuientis, patet igitur quomodo s^m Proclum, vnumquodque primorum abstractorum est in alio, s^m modum conuenientem, prima autem abstracta, & subsistentia per se, sunt esse, vita, & intellectus s^m viam Platonis, sunt .n. prima, & vniuersalia prædicata inter quæ magis vniuersale est esse, deinde vita vt minus vniuersale, & deinde intellectus vt adhuc minus vniuersale, verum quomodo in doctrina Procli ex his dictis vna intelligentia fit in alia, ex consequenti vna sit intelligens aliam, elici non potest, ideo videndum est quid diceret Arist. Deinde quid Theologus.

Secundum doctrinam Arist. tenendum est quod intelligentiæ seinuicem intelligunt. nam dictum est in propositione decima, de mente Arist. & Comment. quod intelligentiæ cognoscunt hæc inferiora quæ producunt per motum cæli, quoniam sunt vt artifices in quorum intellectibus, sunt formæ secundum esse spiritale suorum artificiatorum, ergo multo magis cognoscunt se mutuo. Maior .n. est similitudo inter intelligentiam, & intelligentiam, quam inter intelligentiam, & hæc materialia, de modo autem quo vna intelligit aliam, non est clarum in doctrina sua. nam aliqui volunt ad mentem Arist. qd vna intelligat aliam per substantiam ipsius intelligentis tanquam per simile substantiæ ipsius intellecte, puta quoniam substantia intelligentiæ Saturni similis est substantiæ intelligentiæ Iouis, per suam substantiam intelligit intelligentiam Iouis, sed id non videtur consonum. Nam

cum

cum omnes differant specie ex doctrina Arist. in 12. Metaph. tex 49 ubi inquit. Quæcunque sunt numero multa, multam habent materiam, non est similitudo inter eas nisi secundum genus, ergo mutua cognitio erit tantum in genere, ex consequenti confusa, & imperfecta. Alij autem volunt unam ab alia cognosci per substantiam cognite. Arbitrantur .n. quod substantia intelligentiæ cognoscendæ uniatur intellectui intelligentiæ cognoscentis, ut forma, siue species intelligibilis eo modo quo dixit Comment. in 3. de anima intellectum agentem quem ponebat substantiam separatam intelligi ab intellectu possibili quando intellectus agens unitur ei non solum ut efficiens, sed ut forma intelligibilis, sed nec id potest haberi ex doctrina Arist. Nam secundum ipsum manuducimur in cognitionem separatorum quomodo intelligent, ex his quæ videmus fieri in intellectu humano, siue in anima intellectiva. Dixit autem in 3. de anima, tex. 37. Quod anima est quodammodo omnia, quoniam est sensibilia secundum sensum, & intelligibilia secundum intellectum, & in tex. 38. declarans dictum suum inquit, necesse est autem aut ipsa esse, aut species .i. necesse est quod anima sit omnia, quia omnia habet in se realiter, aut quia est receptiva specierum repræsentantium naturas sensibiles, vel intelligibiles, & interimens primum inquit, ipsa quidem non sunt, non enim lapis in anima est, sed species lapidis, igitur proportionaliter intelligentia non est in alia intelligentia, sed species repræsentativa intelligentiæ, unde videtur dicendum quod si in intelligentia sunt formæ rerum materialium, quas producunt per motum, ut diximus in decima propositione, multo magis sunt formæ intelligibiles intelligentiarum per quas unaquæque est alia secundum esse intelligibile, eo modo quo dixit Aristot. quod sensus in actu est sensibile in actu, & sensus in potentia est sensibile in potentia, & intellectus in actu est intelligibile in actu, & intellectus in potentia est intelligibile in potentia, sic videtur tenendum ad mentem Arist. quantum spectat ad hanc duodecimam propositionem.

Secundum doctrinam Theologi tenendum est intelligentias se mutuo intelligere cum sint substantiæ immateriales ex consequenti intelligibiles actu, & sint eiusdem ordinis, quoniam omnes

omnes sunt entia abstracta, ex consequenti adinuice proportionata nam ratio propter quam anima coniuncta nō intelligit abstracta quiditatiue est, qm̄ vt existens forma corporis, sapit naturam materialium, licet quo ad esse non pendeat à materia; & ideo vt sic improporcionata est substantijs abstractis, cum igitur hæc ratio cesset in intelligentijs sequitur quod mutuo, & quiditatiue se intelligant. De modo autem dicendū q̄ non se intelligunt, quia vna sit causa alterius qm̄ id non admittit Theologus, & D. Thom. in prima parte, quæst. 56. articulo secundo ad secundum vbi introduxerat Auctorem libri de causis, non admittit eum in huiusmodi causalitate, nec se mutuo intelligunt per proprias substantias rationibus quas adduximus ad mentem Arist. quas & Theologus admittit, sed per species congenitas impressas diuino lumine in intellectu cuiuslibet intelligentiæ. nā si intelligentia est plena formis representatiuis naturalibus corruptibilium quas producit motu cæli, multo magis est plena formis representatiuis substantiarum immaterialium, qm̄ inter eas maior, & quasi sine p̄portione est similitudo, & hæc fuit doctrina diui Augustini qui super Genesim ad literā innuit duplicem mundum, scilicet intelligibilem, & hic est intellectus separatus, siue Angelicus in quo à diuino verbo, vt prima arte impressæ sunt omnes rerum species modo intelligibili sicut si in oculo impressæ fuissent omnes colorum species secundum esse intentionale, & mūdū realem, in quo p̄ductæ sunt secundum esse naturale, omnes rerum spiritalium, & corporalium naturæ, quibus integratur vniuersum, & quæ in intellectu separato intelligibiliter depictæ fuerant, sicut in corpori cælesti seminaliter indite fuerūt omnes materiales formæ, tu tñ aduerte q̄ species representatiue intelligentiarum inferiorū impressæ sunt in intelligentijs superioribus excellentiori modo, & species representatiue intelligentiarum superiorum impressæ sunt in intelligentijs inferioribus deficientiori modo, quoniam vt diximus supra, vnumquodque receptum proportionatur recipienti, & est simile de cōceptu discipuli, qui nobilitiori modo recipitur in intellectu doctoris, & cōceptus doctoris defectuose, & obscure recipitur in intellectu discipuli. Hæc de p̄positione duodecima dicta sint.

Propo.

PROPOSITIO XIII.

Omnis intelligentia intelligit essentiam suam &c.

IN hac propositione intendit Auctor declarare quomodo intelligentia intelligit seipsam, & se intelligens intelligit alias res, & intelligens alias res intelligit se. Intendit igitur tres conclusiones, quarum prima est.

Omnis intelligentia intelligit essentiam suam.

Secunda, dum intelligit essentiam suam, intelligit alias res.

Tertia, dum intelligit alias res intelligit seipsam.

Quantum ad primam conclusionem, adverte quod substantia separata, ratione immaterialitatis intellectiva est, & est intelligibilis actu. Nam naturæ corporales, ideo sunt intelligibiles in potentia quia materiales, & non sunt intelligibiles actu, nisi per abstractionem à conditionibus materialibus virtute intellectus agentis: ergo naturæ ex se immateriales, non indigent fieri intelligibiles actu, sed sunt ex se intelligibiles actu. Tunc ultra: ergo ab illo intellectu intelliguntur, cui sunt unitissime. Maxime autem uniuntur proprio intellectui, quoniam in eadem substantia conveniunt, ergo seipsas non solum intelligunt, sed & primo, & perfectissime, quoniam sua essentia est suum connaturale, & proportionatum obiectum, alia autem intelligunt in quantum uniuntur sibi per species intelligibiles impressas, & hæc rationem innuit Auctor cum dicit. Quod est, cum intelligens, & intellectum sint simul, q. d. ideo intelligentia intelligit essentiam suam, quoniam eadē substantia est intelligens, & intelligibilis actu, ergo est intellecta à seipsa, & subdit. Cum ergo intelligentia est intelligens, aut intellectum, scilicet à seipsa, tunc videt essentiam suam, & quando videt essentiam suam scit, & intelligit, id est cognoscit se per intelligentiam, id est per actum intelligendi &c.

Quantum ad secundam conclusionem, adverte quod in essentia intelligentiæ, ut diximus in propositione decima, & in propositione præcedenti, depictæ sunt formæ intelligibi-

les repræsentatiue rerum immaterialium, & corporearum sicut imagines in speculo, sicut igitur si speculum videret se ipsum, videret omnia repræsentata in eo, quia sunt simul cū eo, non secundū esse reale, sed secundū esse repræsentatiuum, sic qm̄ intelligētia intelligit seipsam, cui sunt vnite alię res per modum intelligibilem, & non secundū esse reale, dum intelligit essentiam suam, intelligit alias res repræsentatas in ea per species impressas, & id intendit cum dicit, & quando scit essentiam suam scit reliquas res quę sunt sub ea, quoniam sunt ex ea, & declarans q̄ non sunt in ea secundū esse reale, sed intelligibiliter inquit, veruntamen sūnt in ea per modum intelligibilem, quia, scilicet per species intelligibiles per quas intelligentia, & res intellectę sunt vnū.

Quantum ad tertiam conclusionem, aduerte q̄ sicut videns res in speculo videt speculum, vtpote cōtentiuum imaginum per quas videtur imaginata, sic intelligentia intelligens alias res per species impressas in essentia sua intelligit essentiam suam, vtpote contentiuam huiusmodi specierum, ex quibus omnibus sequitur, quòd intelligētia eodem actu intelligit se, & alias res, & quoties intelligit alias res, intelligit essentiam suam, sicut eodem actu videtur speculum, & res in speculo, & econuerso.

Secundū doctrinam Procli eadem propositio acceptatur. nam in libro suo talem propositionem format, omnis intellectus, scilicet separatus intelligit seipsum, & ratio est. quoniam cū inter omnia creata sint propinquiore primę causę similiores sunt eidem quo ad actionem intellectualem, non tamen adæquantur ei sed prima causa intelligit se ipsam primo, & perfectissime, ergo intelligentia vt propinquissima intelligit seipsam. Dixi autem non tamen adæquantur ei, quoniam prima causa intelligit se, & omnia alia per essentiam suam, vt contentiuam omnium perfectionū, sed intelligentiæ non intelligunt perfecte nisi seipsas per essentias suas. Alia autem intelligunt per species impressas, qm̄ eorum essentiæ sunt limitate, ex consequenti non continēt, nec repræsentant omnes alias perfectiones, nec id repugnat secundę conclusioni suppositę, quoniam aliud est cognoscere alias res, quia cognoscitur essentia vt in ea depictę sunt species

species intelligibiles &c. Et cognoscere eas quia cognoscitur essentia, ut realiter contenta omnium perfectionum, primum enim est verum, & secundum est fallum.

Secundum doctrinam Arist. acceptatur eadem propositio. Nam in 12. Metaph. tex. 52. inuestigans quomodo primum principium intelligit se, & est sua intellectio, dicit quod in non habentibus materiam idem est intellectus, & res intellecta, ubi inquit Cōment. Declaratum est igitur quod omne carens materia, & intellectus, & intellectum in eo idem est, & dicit infra, sic debet esse in alijs intelligentijs abstractis, sed primus est simplicior earum. Constat autem quod omnes intelligentiæ sunt abstractæ à materia, ergo in eis intelligens, & res primo intellecta sunt idem, ergo primo intelligunt seipsas.

Secundum doctrinam Theologi acceptatur eadem propositio. Nam D. August. in 2. super Genesim ad literam dicit Angelum in sua formatione cognovisse, immo semper seipsum cognoscit, quoniam si forma intelligibilis actu, est unita intelligenti, intelligitur sicut si species albi unita est vi sui, videtur album, sed Angelus est forma intelligibilis actu cum sit substantia immaterialis, & est unita intellectui suo, quoniam in eadem substantia conveniunt, ergo Angelus se ipsum intelligit, ad hoc autem quod seipsum intelligat, non est necesse in intellectu suo imprimi speciem intelligibilem, quoniam suamet essentia unitur intellectui suo, ut forma intelligibilis, dato quod sit per se subsistens. nam ad hoc quod forma sit principium actionis, non est necesse quod inhæreat alteri. unde si calor ignis per se subsisteret ita esset principium calefactionis, sicut inhærens igni. Hæc dicta sunt de decimatertia propositione.

PROPOSITIO XIII.

In omni anima res sensibiles sunt per hoc quod est exemplum eis, & res intelligibiles in ea sunt quia scit eas.

IN hac propositione intendit Auctor declarare quomodo omnes res sunt in anima, sed aliter res sensibiles, &

aliter res intelligibiles, & intendit tres conclusiones.

Prima, res sensibiles sunt in anima vt in exemplo, vel exemplari, ex consequenti vt in causa.

Secunda, res intelligibiles .i. immateriales, vt intelligentiæ sunt in anima, vt in sciente causas suas.

Tertia, tam res sensibiles, quàm intelligibiles aliter sunt in anima, & aliter in seipsis.

Quantum ad primam conclusionem, aduerte, q̃ Auctor hic non loquitur de anima vniuersaliter, sed de anima cœlesti. vnde inquit, & intelligo per animam virtutem agentem res sensibiles, quæ quidem virtus per motum cœli causat hæc sensibilia, vt diximus supra, Auctor opinatur cœlos animatos anima distincta ab intelligentia, & motum cœli esse immediate ab anima, & non ab intelligentia. De hac igitur anima dicit q̃ res sensibiles sunt in ea ut in exemplo, quoniam cum hæc anima moueat cœlum, & producat sensibilia per intellectum, necesse est vt in se contineat similitudines, siue species exemplares ad quarum similitudines res sensibiles producuntur, & vt sic anima assimilatur artifici, de quo verum est dicere anima artificata quorum est artifex, esse in artifice vt in exemplo, quoniam in mente sua continet similitudines artificatorum, & id intendit Auctor cum dicit. Res igitur quæ imprimuntur. i. causantur ex anima sunt in anima per intentionem exempli. s. quia res sensibiles exemplificantur secundum exemplum animæ .i. producuntur secundum exemplum, & ideam quam habent in anima cœlesti, vt in efficiente per intellectum.

Quantum ad secundam conclusionem, aduerte s̃m doctrinam Auctoris in propositione quinta, q̃ anima est causata ab intelligentia, & producta sibi similis, quoniam intellectualis ex consequenti anima est imago intelligentiæ, & intelligentiæ sunt in anima, vt imaginata in sua imaginæ, & vt causæ in suo simili effectu, & anima intelligens intelligentias, intelligit eas vt causas suas, & quomodo est imago earum, & habet esse acquisitum ab eis, & hoc innuit Auctor cū dicit, & res quæ cadunt super animam sunt in ea per modum acquisitum. i. ideo sunt in anima, quia anima scit eas esse causas suas, à quibus acquisiuit esse sicut imago ab imaginato.

Quantum

Quantum ad tertiam cōclusionem, aduerte, q̄ cum vñū-
quodque sit in alio fm̄ modum naturæ ipsius cōsistentis,
& anima sit immaterialis, & incorporea res sensibiles sunt
in anima modo immateriali, & incorporea, & virtus animæ
est immaterialis, & incorporea licet res sensibiles sint mate-
riales, & corporeæ, & virtus animæ est indiuisa, & sine dimē-
sione, & tamen producit res sensibiles diuisibiles, & dimen-
sionatas, & ratio huius est, quoniam anima non est vt agens
naturale. Quod est agens per formam naturalem, sed per ap-
prehensionem vt artifex, ideo sufficit, q̄ in se contineat effe-
ctus materiales, & corporeos, & dimensionatos secundū
esse spiritale, & indiuisibile. Res autem intelligibiles .i.
abstractæ à materia cum sint in anima vt intellectū in in-
telligente, & non vt in causa, sunt in anima modo quo intel-
ligit anima. Anima autem intelligit compositione, diui-
sione, discursu, ergo licet res intelligibiles sint in se simpli-
ces, & immobiles, & indiuisibiles, tamen intelliguntur ab
anima, modo compositorum, & diuisibilium, & quodam mo-
tu. Discursus enim motum importat. Et hoc totum in-
nuit Auctor cum dicit. Iam ergo ostensum est, q̄ res intelli-
gibiles, & res sensibiles sunt in anima, veruntamen res sensi-
biles corporeæ, & motæ sunt in anima per modum animalē
vnitum .i. per modum immaterialem indiuisum, & res intel-
ligibiles vnitæ .i. simplices, & indiuisæ, & quiescente .i. im-
mobiles sunt in anima per modum qui multiplicat motum,
quia .i. intelliguntur compositione, & discursu, ex conse-
quenti quodam motu.

Secundū doctrinam Procli acceptatur eadem propo-
sitiō. nam in libro suo, talem propositionem format. Om-
nis anima est omnes res. exemplariter quidem .i. per modū
exempli sensibilia, iconice autem .i. per modum imaginis in-
telligibilia, & declaratur eodem modo apud Proclum sicut
declaratum est in prima, & in secunda cōclusionē ad men-
tem Auctoris. Nam & apud Proclum anima cōlestis est
causa productiua sensibilibus per intellectū, ergo se habet
ad illa vt exemplar, & similitudo, & est imago superiorum
entium intelligibilium, quia similitur illis, cum sit conue-
niens cum eis in natura intellectuāli.

Secundum doctrinam Arist. acceptatur eadem propositio . Nam in tertio de anima, tex. 37. inquit omnia ea quæ sunt quodammodo est anima, sed apud Arist. alia ratione, quam ea quæ est assignata ab Auctore, & à Proclo, immo Aristoteles non acceptaret eam, qm non est anima in cælo nisi intelligentia, & causalitatem per intellectum mediante motu cæli super sensibilia, attributam ab Auctore, & Proclo animæ cælesti, Arist. attribueret intelligentiæ mouenti. Quod igitur Auctor attribuit animæ cælesti, Arist. attribuit animæ humanæ, sed alia ratione . Nam dicit Arist. in tertio de anima, tex. 37. ideo anima est quodammodo omnia, quoniam entia, aut sunt sensibilia, aut intelligibilia, anima est omnia sensibilia secundum sensum, quoniam est receptiuus specierum sine materia, & intellectus est omnia intelligibilia, cum sit receptiuus specierum intelligibilium . unde sicue manus est virtualiter omnia artificata, quoniam cum sit organum organorum est effectiua diuersorum artificatorum, sic anima ratione sensus, & intellectus est quodammodo omnia entia, dicit autem quodammodo & non simpliciter, quoniam est omnia modo animæ, id est spiritualiter & non modo rerum, id est realiter, & essentialiter, propterea inquit illic Arist. lapis non est in anima, sed species lapidis .

Secundum doctrinam Theologi hæc propositio applicata cælesti animæ non acceptatur, quoniam illa non datur, vt diximus supra, nec si daretur, acceptaretur secunda conclusio, quoniam apud Theologum anima non est imago intelligentiarum, quoniam est originata à sola prima causa, & dicitur facta ad imaginem eius . Applicata autem animæ humanæ acceptatur quod omnia sunt in anima, & sunt aliter in anima quam in seipsis, & ratio Theologi, non est ratio Auctoris, sed ea quam assignauimus ad mentem Arist. cui in hoc concordat Theologus . Hæc de decimaquarta propositione dicta sint .

PROPOSITIO XV.

Omnis sciens qui scit essentiam suam est rediens ad essentiam suam reditione completa &c.

In

IN hac propositione intendit Auctor declarare, quò se habet anima ad seipsam quo ad intellectionem, quo ad substantiã, & intendit duas conclusiones principaliter.

Prima, anima scit essentiam suam, siue intelligit seipsam.

Secunda, anima subsistit in seipsa, id est est substantia per se subsistens. non indigens inniti alteri.

Quantum ad primam conclusionem, aduerte q̃ Auctor non probat eam, forte existimans ab omnibus concessam, ex eo q̃ dixit in propositione præcedenti q̃ scit res sensibiles, & res intelligibiles quæ sunt distincte ab anima, ergo multo magis scit seipsam, cum scit magis intrinseca sibi ipsi, q̃ alia. Et quoniam dixit in propositione decimatertia q̃ ideo intelligentia intelligit essentiam suam, quoniam cum sit immaterialis est intelligibilis actu, & cum sit intelligens, ergo intelligens, & intellectum sunt simul. Eandem rationem putauit Auctor forte verificari de anima rationali cum sit immaterialis intellectualis, & per se subsistens vt dicetur, imperfectiori, tamen modo, quàm intelligentia.

Eandẽ conclusionem tenet Proclus, & eius ratio est, qm̃ si ex præcedenti propositione anima scit res intelligibiles, id est entia abstracta, per modum imaginis, vt declarabimus ad mentem Procli, multo magis scit seipsam, quoniam est magis proportionata sibi ipsi quam entibus superioribus.

Eandem conclusionem tenet Aristot. in tertio de anima, tex. 1. 5. vbi inquit. Est autem ipse, scilicet intellectus intelligibilis sicut est alia, & rationem assignans inquit. In his. n. quæ sunt sine materia, idem est intellectus, & quòd intelligitur, sed intellectus est immaterialis, ergo &c.

Eandem conclusionem tenet Theologus, vt patet apud D. Thom. in prima parte, quæst. 81. articulo primo. Tu tamen aduerte quòd licet omnes recipiant conclusionem differunt, tamen in assignando modum quo anima seipsam cognoscit, nam ab Auctore modus nullus assignatur, licet applicando animæ cœlesti possimus dicere ex propositione præcedenti quòd cognoscit seipsam in quantum cognoscit se esse exemplar inferiorum sensibilibus, & se esse imaginem entium superiorum intelligibilibus, verum vt diximus in præcedenti propositione. Nec anima cœli, nec ratio adducta ab

Auctore, acceptatur ab Arist. nec à Theologo, & de humana anima in propositione præcedenti nihil locutus est, ideo relicto eo, videamus modum quem ad mentem Platoniorum assignaret Proclus. Tu igitur aduerte, quod apud Platonicos omnes intellectus separati intelligunt, & intelliguntur à se ipsis in quantum participant primum intellectum dictum in intellectu idealem, cuius participatio tanta est quod seipsus per essentias suas intelligunt in hoc imitantes primum intellectum, qui se per seipsum intelligit verum, quia anima est inferioris ordinis licet participet superiora entia, tamen non est tanta participatio, quod se per essentiam suam cognoscat, sed per participationem superioris hominis sibi naturaliter infusi à superioribus entibus abstractis. Vnde aduerte, quod se habet primus intellectus, & alij intellectus separati, & anima sicut sol, & astra, & gemma. Nam sol ex se habet lucem, quia & illuminat alia, & ut ita dicam à seipso illuminatur, astra autem recipiunt lumen à sole quo, & illuminant inferiora præcipue terrena, & polita corpora, & illuminantur. Genitrix autem quia est corpus terrenum recipit quidem lumen ab astris, sed debile, quo debiliter illuminatur, & debilius illuminatur, sic & anima secundum Platonicos debiliter recipit lumen intellectualem ab intellectibus separatis, quo debiliter intelligit seipsam, & debiliter intelligit alia.

Secundum Arist. autem in 3. de anima, tex. 5. quoniam intellectus noster est mere potentialis in genere intelligibili non est intelligibilis à seipso, nisi ut sit actu. Et pro hac vita connaturale est sibi, ut fiat actu non per participationem intellectuum separatorum, cum sit forma in materia, sed per species abstractas via sensus, & illustratione intellectus agentis, ideo sicut per huiusmodi species intelligit alia à se, sic intelligit seipsum, non tamen eodem modo, quoniam intelligit alia à se directe, seipsum autem reflexe, puta intellectus directe per speciem lapidis intelligit lapidem, reflexe autem & conuersive, intelligit se intelligere, deinde se esse intelligentem, deinde se esse substantiam intellectualem, ex consequenti immaterialem incorpoream independentem à materia per se subsistentem separabilem à corpore, ut perpetuum à corruptibili.

Secundum Theologum vero dicendum quod non intelligit se per essentiam suam, quoniam cum tres sint intellectus, diuinus, angelicus, humanus, primus est purus actus, ideo intelligit se, & omnia alia per essentiam suam. Angelicus autem est actus admixtus potentiae, & in quantum est actus intelligit se per essentiam suam, in quantum est in potentia intelligit alia per species impressas quibus reducitur de potentia ad actum, humanus vero est mere in potentia in genere intelligibilem. ergo necesse est ut intelligit se, p. quanto reducitur ad actum. Reducitur autem per species abstractas à rebus, ergo non per essentiam suam, quæ est sicut materia in genere intelligibilem, sed per species abstractas intelligit alia & se, sed alia per species directe, se autem per actum suum, percipimus enim nos habere animam intellectiuam ex eo quod percipimus nos intelligere. nam ex actu intelligitur potentia, ex potentia essentia operantis. Hæc de prima conclusione dicta sint.

Quantum ad secundam conclusionem, aduerte, q. apud Auctorem idem est animam per se subsistere, & animam redire, siue conuerti ad substantiam suam. Vnde exponens se inquit, & non significo per redditionem substantiæ ad essentiam suam, nisi quia est stans fixa per se non indigens in sui fixatione. i. permanetia, & sui essentia re alia regente ipsam, quod est quia substantia simplex est sufficiens per se ipsam, & ratio huius est, quia non per se subsistentia ut formæ naturales, & accidentia in quantum sustentantur per subiectum, vel materiam dicuntur conuerti ad aliud à quo ut à fundamento pendet sua permanentia, & suum esse, quæ ergo subsistunt in seipsis non innitentia alteri dicuntur conuerti ad essentiam suam, & non ad aliud. Patet ergo quod idem est, rem per se subsistere, & ad suam essentiam conuerti, & habere esse per se, sic declarata conclusione, aduerte quod Auctor intendit hanc probationem. Quicumque scit essentiam suam, scit eam scientiam quæ est actio intelligibilis, ergo scit se scire essentiam suam. ergo reddit vel conuertitur ad operationem suam intelligibilem, quoniam scia se scire, ergo per operationem intelligibilem reddit ad essentiam suam, quoniam, si rediret ad operationem suam, & non ad essentiam, perfectior

Etior esset operatio sua quam essentia, quoniam conuersio fit ad perfectius, sicut accidens cōuertitur ad subiectum, qm̄ ei innititur, quicunque ergo conuertitur ad essentiam suam conuertitur conuersione completa, id est omnimoda, quia & secundum operationem, & secundum essentiam. Et cum dictum sit idem esse, conuerti ad substantiam suam, & esse substantiam per se subsistentem, ergo quicunque scit essentia suam, est per se subsistens, sed per primam conclusionem anima scit essentiam suam, ergo est per se subsistens.

Secundum Proclum non solum hæ duæ conclusiones acceptantur, sed & aliæ plures quarum prima est.

Omne ad seipsum conuersiuum, est incorporeum, hæc notificata est in propositione septima, vbi dictum est quod corpori repugnat conuerti super seipsum, propter extensionem partium quarum vna distat ab alia. Quod autem super seipsum conuertitur, secundum totum, & quodlibet sui super seipsum conuertitur. Hinc est quod repugnat potentia organice conuerti super seipsam, & super operationem suam, non enim sensus sentit se sentire. Intellectus autem quoniam inorganicus est intelligit suum intelligere, patet ergo quod necesse est, omne ad se conuersiuum esse incorporeum.

Secunda, omne ad se conuersiuum habet substantiam separabilem ab omni corpore, quoniam, cum repugnet corpori ad seipsum conuerti omne ad se cōuersiuum habet operationem sine corpore. Quod autem habet operationem sine corpore potest esse sine corpore, quia vnumquodque sicut se habet ad operari ita ad esse, ergo est separabile ab omni corpore.

Tertia, quæ concordat cum secunda conclusione supposita. Omne ad seipsum conuersiuum, est per se subsistens, quoniam vnumquodque conuertitur ad id per quod sustentatur, vt accidens ad subiectum vitis ad arborem discipulus disputans ad Doctorem, ergo si aliquid ad seipsum conuersiuum est, per seipsum subsistit.

Quarta, omne quod secundum operationem ad seipsum conuertitur, etiam secundum substantiam ad seipsum conuertitur, quoniam cum sit perfectionis conuerti ad seipsum, si cōuertitur ad seipsum secundum operationem, & non sē substantiam,

stantiam, ergo operatio sua esset perfectior quàm substantia, quod est falsum, quoniam illa est accidens, ergo &c.

Quinta, omne sui ipsius cognoscituum, est omni quaque ad se conuersiuum, quoniam si cognoscit seipsum, est conuersiuum ad se secundum operationem, si secundum operationem, ergo secundum substantiam per conclusionem præcedentem, & non dantur plures modi conuertendi ad se, ergo &c.

Sexta, omnis anima est substantia incorporea, & separabilis à corpore, & tu intellige de anima intellectiua, quoniam cognoscit seipsam, ut visum est in prima conclusione posita ad mentem Auctoris, & Procli, ergo conuertitur super se ipsam, ut patet per conclusionem præcedentem. Ergo est incorporea per primam conclusionem Procli, ergo est separabilis à corpore per secundam conclusionem eiusdem, patet igitur quomodo in hac decimaquinta propositione concordat Proclus cum Auctore.

Secundum doctrinam Arist. visum est quomodo acceptat primam conclusionem Auctoris, nunc videndum est quomodo acceptat secundam, scilicet quod anima intellectiua est per se subsistens. Aduerte igitur, quod in secundo de anima, tex. 12. docuit ex modo operandi venari modum subsistendi, unde dixit, si anima habet aliquam operationem per se, id est propriam sibi, in qua non communicat corpus ut instrumentum, nec recipitur in corpore, separabilis est à corpore ex consequenti habet esse per se, & per se subsistit, & in tertio de anima, tex. 6. & 7. determinat quod habet operationem per se, quoniam intellectus est potentia non organica, ergo est potentia non coniuncti, sed propria animæ, ergo intelligere est proprium animæ, cuius enim est potentia eius est actio, ergo anima habet esse per se, ex consequenti per se subsistit, hæc fuit mens Aristotelis secundum recte sentientes, & improbationem eorum qui tenent oppositum diffuse scripti mus in prima parte D. Thom. in quest. 75. art. 6.

Secundum doctrinam Theologi, acceptatur eadem conclusio, & suum fundamentum non discordat à doctrina Arist. nam cum operatio sit existentis, vnumquodque operatur sicut est existens, si operatur per se, est existens per se, si non operatur per se, non est existens per se, sed anima operatur per

per se, quoniam intelligere est effectiue, & receptiue solius animæ. nam si esset alicuius potentiæ organicæ, esset determinatum ad aliquod genus entis, videmus enim auditionem determinatam tantum ad sonum, visionem ad calores, tactum ad qualitates tangibiles. Intelligere autem circa ens, & quod libet genus entis, ergo, non expletur per aliquam organicam potentiam, sed per solum intellectum, qui est potentia solius animæ, & non coniuncti. Ergo anima est per se existens, & id confirmatur dicto diui Augusti. in decimo de trinita. cap. 7. ubi inquit. Quisquis videt mentis naturam, & esse substantiam, id est per se subsistentem, & esse incorpoream. Hæc de decimaquinta propositione dicta sint, in qua concordant omnes recte sentientes.

PROPOSITIO XVI.

Omnes virtutes quibus non est finis pendentes sunt per infinitum primum, quod est virtus virtutum, non quia ipsa sit acquisita stans fixa in rebus entibus, immo est virtus in rebus entibus habentibus fixationem &c.

IN hac propositione intendit declarare, quomodo omnes virtutes infinitæ pendent ab vna prima virtute infinita, & aduerte quod per virtutes infinitas, intendit intelligentias, quæ dicuntur infinite non intensiue, sed extensiue propter durationem infinitam postquam productæ sunt, cum sint immateriales ex consequenti indefectibiles, per primam virtutem infinitam intendit creatricem Dei virtutem, quæ est infinita intensiue, & extensiue, & dicit quod est virtus virtutum, id est contentiua omnium virtutum, & superior omni virtute, & ad probationem propositi elicio ex Auctore quatuor fundamenta.

Primo, intelligentia non est virtus absolute, & pure, sed est quædam virtus particularis, & determinata ad talem gradum, quoniam si esset pura virtus, & illimitata non
 759 plurifi

plurificarentur intelligentiæ, sicut albedo si esset separata in se continens omnem perfectionem albedinis esset implurificabilis. Prima autem virtus infinita est virtus simpliciter, & pure, & essentialiter.

Secundo, intelligentia est virtus finita superius, qui cum sit quædam virtus exceditur à supremo quod est virtus pura, sicut calor in aqua exceditur à puro calore, & remanet infinita inferius, quia non exceditur, nec comprehenditur ab entibus quæ sunt post ipsam. Inferioris enim est excedi, & non excedere, sed prima virtus est infinita superius, quia cū sit prima non habet superius à quo terminetur, & est infinita inferius. Quoniam virtus absolute non comprehenditur à particulari virtute. Omnis autem virtus post primam est particularis virtus.

Tertio, ens primum est mensura entium intelligibilium, id est abstractorum, & entium sensibilium, quoniam primum in vnoquoque genere est mensura, ex consequenti entia intelligibilia, ut intelligentiæ sunt mensurate à primo ente.

Quarto, ens primum ens supra infinitum, id est excellentius quocunque ente creato infinito. Ex his fundamentis probatur sic propositum. Omnis particularis virtus, & quæ est infinita tantum inferius, & quæ ut limitata mensurata est, & quæ licet infinita, non tamen est supra infinitum, pendet à primo infinito quod est virtus pura, & infinitum superius, & inferius, & mensurata entium intelligibilium, & sensibilium, & est supra infinitum, & tale primum est Deus creans & mensurans vnumquodque conuenienti mensura, sed omnes virtutes quibus non est finis extensivæ, scilicet intelligentiæ, sunt quædam virtutes, ut declaratum est, & sunt infinitæ, tantum inferius, & sunt mensurate à primo, & non supra infinitum cum non sit omni modo infinitæ. Ergo pendent à primo infinito quod est virtus pura &c.

Ex hoc primo, & principali proposito elicit Auctor corollarium quod est hoc, sicut primum infinitum est causa à qua pendent omnes virtutes infinitæ, ut intelligentiæ, & quæcunque habent durationem infinitam, sic vita lumen bonitas, & reliquæ primæ perfectiones sunt causæ rerum omnium

nium habentium vitam, & lumen, & reliquas bonitates. unde primum vita, primum lumen prima bonitas sunt causæ omnis vitæ, & luminis, & bonitatis increatis abstractis, & mediantibus illis descendunt in entibus corporeis. Et quoniam Deus est ipsa prima vita, prima lux, prima bonitas, ideo ab ipso descendunt istæ, & reliquæ perfectiones sicut omnis infinitas est à prima infinitate quæ est Deus.

Secundum Proclum acceptatur eadem propositio, unde in libro suo talem propositionem format. Omnis multitudo potentiarum infinitarum ab una prima infinitate exorta est, quæ non ut participata potentia est, neque in participantibus subsistit, sed secundum seipsam, & huius quidem probatio secundum doctrinam Platoniam est, quod omne inuentum in pluribus reducitur ad unum primum quod est tale per essentiam, quod illa plura participant, quod non est ut participatum, nec in participantibus subsistit, sed est tale primo, & secundum seipsum, sed potentia infinita quo ad durationem inuenitur in pluribus, ut in intelligentijs, & in anima, & in cælo, ergo reducitur ad unum primum, cuius essentia secundum seipsam, & primo est infinita, hic autem est Deus, ergo &c.

Secundum doctrinam Arist. aliqui tenent hanc propositionem non esse acceptandam nisi in genere causæ finalis, arbitrantur enim quod licet secundum Arist. detur in vniuerso unum primum ad quod ordinantur omnia, sicut exercitus ad ducem, ut habetur in 12. Metaph. tex. 52. ubi dicitur, ad unum quidem omnia coordinata sunt. Et Comment. exponens inquit, apparet enim quod hoc commune est omnibus entibus, scilicet quod omnia sunt propter unum, & quod actiones eorum sunt erga illud unum, & est prima causa, quemadmodum omnia quæ sunt in domo propter Dominum domus sunt &c. Tamen dicunt Arist. non posuisse unum vniuersale efficiens. quoniam entia æterna necessaria permanentia an differentiam motus cæli, non habent esse effectiue ab alio. Et huius opinionis videtur Comment. & sequentes eum. Nam in 12. Metaph. comment. 18. reprobatur creationem, & in comment. 41. arguens contra Ioanne grammaticum dicit aliquod esse necessarium, & æternum ex alio non est verum nisi in mo

tu cœli tantum, quoniam motus habet esse à motore. Commentator ergo vult quòd omne ens permanens æternum, & necessarium vt sunt intelligentiæ, non habeant esse necessarium, & æternum ab alio, ex consequenti non pendent effectiue à primo infinito. Alij autem dicunt propositionem acceptandam secundum doctrinam Arist. in genere causæ efficientis, quoniam Arist. sensit, quodcunque ens, & omnes modos entis esse effectiue à primo. Nam in 2. Metaph. tex. 4 inquit vnumquodque vero maxime ipsorum aliorum dicitur secundum, quòd etiam alijs inest vniuocatio, puta ignis est calidissimus, & enim est causa alijs hinc caloris. Nec potest exponi de causa finali, quoniam exemplificat de igne vt calidissimo, quem constat esse causam effectiuam caloris in alijs calidis. Et ipsemet Comment. exponit de causa efficiente dicens, omnia enim entia non acquirunt esse, & veritatem nisi ab ista causa, scilicet à causa prima &c. Constat autem q̄ acquirere esse denotat causam effectiuam, & hæc est veritas, & non est acceptandus Comment. in hoc, & negandum est ei nullum esse necessarium, & æternum permanens ex alio. Et quidem quòd secundum Arist. detur creatio contra Cōment. discutissimus in 12. Metaph. Similiter quòd non inconuenit aliquod necessarium permanens habere causam effectiuam. Nam in 2. Metaph. de his quæstiones particulares fecimus, & hanc viam contra Comment. tenet D. Thom. vt fidelissimus Aristotelis expositor.

Secundum Theologum, acceptatur eadem propositio, & totum corollarium, & ratio sua est hæc. Quod conuenit alicui primo, & per se, si inuenitur in alijs, inuenitur in quantum participant ipsum, vt patet de luce, quæ quoniam primo, & per se conuenit soli, in quibuscunque inuenitur, ideo inuenitur quia participant lucem à sole mediante, vel immediate, sed esse, bonitas, infinitas, vita, lumen, intellectuale, & reliquæ perfectiones primo, & per se conuiuunt primæ causæ, quoniam cum sit prima est penitus independens secundum omnem suam perfectionem, ergo in quibuscunque huiusmodi perfectiones inueniuntur, tam in intelligibilibus, quam in sensibilibus inueniuntur, quia participant perfectiones primæ causæ. Est enim illa à qua, in aqua, & ad, quam sunt omnia.

29 E X A M I N A.
omnia. Hæc de propositione decimasexta dicta sint.

PROPOSITIO XVII.

Omnis virtus vnita plus est infinita quàm multiplicata &c.

IN hac propositione intendit declarare, vnde sumitur maior infinitas, & minor in virtutibus infinitis quas dixit in propositione præcedenti pendere à primo infinito, & ponit hanc conclusionem. Omnis virtus vnita plus est infinita quàm multiplicata, id est cuiusque virtuti create competit infinitas; magis est infinita existens indiuisa quàm multiplicata. Antequam probetur, aduerte quod ly infinitas nō sumitur secundum durationem, quoniam cum omnes intelligentiæ, & corpora cœlestia, & animæ sint indefectibilia, sunt æqualis infinitatis quo ad durationem, licet non sint æque indiuisa, nec æqualis simplicitatis. Minor enim est vnitas in intelligentia inferiori quàm in superiori, cum intelligat per plures species, & adhuc minor in anima intellectiua propter pluralitatem potentiarum intellectiuarum, & sensitiuarum, & adhuc minor simplicitas est in corpore cœlesti propter compositionem ex forma, & materia, & propter partes quantitativas, sumitur ergo ly infinitas secundum perfectionem, & virtutem, quæ licet absolute non inueniatur nisi in prima causa, tamen secundum quid, & comparatiue inuenitur in ente abstracto pro quanto eius virtus est minus sparsa, & efficacior, & vniuersalior est in operando, vnde pro rei veritate propositio Auctoris sic intelligenda est. Omnis virtus permanens vnita, & indiuisa perfectior, & fortior, & vniuersalior est quam diuisa, & plurificata; & ad hunc sensum procedit probatio sua ex ratione assignata, ratione sic arguit, virtus permanens vnita, & indiuisa propinquior, & conformior est primo vni, id est primæ causæ quæ est maxime vna, & simplicissima cuius virtus est perfectissima, & absolute infinita, & virtus diuisa remotior ac diuisor est ei, ergo virtus permanens vnita, & indiuisa perfectior est, & si aliqua infinitas conuenit ei, est plus infinita, & partita siue multiplicata

plicata imperfectior, & minus infinita est, consequentia patet quoniam vnumquodque aptum participare virtutem aliquius summi, quanto magis propinquat ei tanto magis participat, & quanto magis distat, tanto magis imperfectitur & minus participat, & magis finitatur ac arctatur, unde vnitas est causa infinitatis, & diuisio causa finitatis.

Signo autem sic arguit, virtus vnita agit fortiores, & mirabiliores operationes, & quanto magis partitur tanto debiliores agit operationes, ergo vnita est fortior, & perfectior, & magis infinita si qua infinitas ei competit, & diuisa est debilior, & imperfectior, & magis finita, consequentia patet, quoniam modus operandi declarat modum virtutis, & hoc quidem signum ad sensum patet. Nam ignis vnitus intense calefacit, diuisus autem debiliter. Mille homines vniti in exercitu superant quinque millia dispersos &c. Propter quod concludit Auctor quod quanto vehementior sit vnitas virtutis est infinitas in ea magis apparens, & sunt operationes eius magnæ, & mirabiles.

Secundum doctrinam Procli, acceptatur eadem conclusio. Nam in libro suo format talem propositionem. Omnis virtus vnitiore existens est infinitior quam plurificata, & eadem est probatio Procli, & Auctoris.

Secundum doctrinam Arist. acceptatur eadem conclusio, sub hac forma, virtus vnita fortior, & perfectior est seipsa dispersa. hanc declarat in j. lib. Meteor. in capite de impressionibus humidis generatis in aëre, vbi agens de grandine, docet eam generari ex intensa frigiditate congregata, & vnita in nube tempore calido, propter diffusam caliditatem in aëre, quam vt sibi contrariam diffugiens frigiditas, vnit se, & vnita mirabiles actiones facit, vt congelare guttas aquæ in tanta multitudine, & magnitudine, & tam breui tempore vt sæpe videmus in grandine. Eandem causam inquit Arist. frigida calent sub terra in hieme, quoniam ex frigiditate diffusa in superficie terræ congregatur & quodammodo concentratur caliditas in visceribus terræ, ex qua congregatione efficitur fortior, & ideo calefacit aquas subterraneas, & quoniam in æstate fugata frigiditate ab aëre, & superficie terræ, paulatim disgregatur caliditas prius vnita, & eua-

porat ideo cessat calor ab aquis subterraneis, alia signa adducuntur ut de calce, cui si super infundatur aqua feruet, quoniam partes ignis prius disperse per infusionem aquæ uniuntur, & fortiores effecte causant ebullitionem, quam causare non possunt existentes disperse, manifestum est ergo, quod unitas, fortificat virtutem, pluralitas autem & diuisio debilitat, & si aliqua infinitas, siue vniuersalitas conuenit virtuti, conuenit ei ut vna, & non ut diuisa.

Secundum doctrinam Theologi, acceptatur eadem propositio. Nam apud eum est ut principium, quod virtus quanto superior, & magis unita tanto ad plura se extendit quod quidem declaratur in potentijs sensitiuis. Nam quia sensus communis superior est ad sensus exteriores, vnus existens apprehendit omnia obiecta sensuum exteriorum, & ultra hoc cognoscit differentiam inter ipsa obiecta. Item in potentijs intellectiuis. Nam quoniam intellectus est superior ad sensus exteriores, & interiores, ideo vnus existens cognoscit corpora & incorporea, substantiam & accidentia, sensus autem tantum accidentia apprehendit. Item in substantijs separatis in quibus non est diuisio virtutis cognoscitiue per intellectiuam, & sensitiuam. Intellectus earum existens vnus cognoscit superiora intelligibilia, & inferiora sensibilia in vniuersali, & in singulari, ita quod ex sua indiuisione sortitur quandam infinitatem. Item patet in forma cœli, & qualitate eius, scilicet luce, quæ vna existens causat quodammodo in finitos effectus, vnde quæ aguntur ab agentibus particularibus, plurificatis formis, & qualitatibus, aguntur à cœlo vna forma, & vna qualitate, manifestum est ergo, quod unitas est causa maioris vniuersalitatis, & infinitatis in virtute in operando, & maioris perfectionis, diuisio autem & pluralitas causa est opposita. Hæc de propositione decima septima dicta sint.

PROPOSITIO XVIII.

Res omnes habent essentiam propter ens primū, & res viuæ omnes sunt motæ per essentiam suam propter vitam primam, & res intelligibiles omnes habent scientiam propter intelligentiam primam &c.

In

IN hac propositione intendit declarare quomodo omnia pendent à prima causa, quo ad omnes gradus conuenientes eis secundum naturam suam, verbi gratia, quoniam prima causa, est primum ens, & est prima vita, & est primum intelligens, siue prima intelligentia, id est primus, & purissimus actus intelligendi, ita quod existens simplicissima absque distinctione reali, est hæc tria, & omnis alia perfectio, & quoniam in creatis inuenitur triplex ordo, quoniam quædam tantum sunt, vt elementa, & elementata inanimata, & quædam sunt & viuunt, eo quod mouent seipsa aliqua specie motus, viuencia enim sunt quæ seipsa mouent. Et quædam sunt & viuunt, & intelligunt vt intelligentiæ, intendit probare quod omnes res vt habent esse sunt à prima causa, vt est primum ens, & omnia viuencia mouent seipsa propter primam causam, vt est prima vita. Et omnia intelligentia intelligunt propter primam causam, vt primum intelligens, siue prima intelligentia. Non tamen eodem modo, quoniam dat omnibus esse per creationem, sed dat vitam, & scientiam per modum formæ.

Primum quidem intendit sic probare. Cum omnis causa det aliquid suo causato in quo assimilatur causæ, causa prima in quantum primum ens dat rebus esse in quo assimilantur ei, vt est primum ens, & in quantum prima vita dat vitam, id est mouere seipsa, dat autem vitam in quantum prima causa est primum quietum sempiternum, id est primum mouens immobile, quoniam cum in mouentibus, & motis non sit processus in infinitum, necesse est omnem motum reduci ad aliquod primum immobile. Et in quantum est primum intelligens dat omnibus intelligentibus scientiam, quoniam scientia in creatis intellectualibus est participatio primi intelligentis.

Secundum autem potest sic probari. Cum ens primum sit immobile, & sit causa causarum illud dat per modum creationis quod dat nullo præsupposito, hoc autem est esse quod vt fundamentum præsupponitur omni alio perfectioni, & ipsum nihil prius præsupponit, vt diximus in secunda propositione, ergo dat esse omnibus entibus per modum creationis. Illud autem dat per modum formæ, quod videtur superaddi ipsi esse tanquam forma materiæ, hoc est vita, &

scientia, siue intelligentia . Nam videntur perficere ipsum esse, & qualificare . Vnde interrogati quale esse habet planta, respondemus esse viuum, & quale esse habet homo , respondemus esse scientificum, vel rationale, & intelligentia habet etiam nobilitiori modo esse intellectuale . Ergo prima causa dat viuentibus , & intellectualibus vitam , & scientiam per modum informationis .

Secundum doctrinam Procli, acceptatur eadem propositio. nam in libro suo talem propositionem format . Omnia quidem qualitercunque entia ex fine sunt , & infinito propter primum ens, & omnia viuentia sui ipsorum sunt motiua propter vitam primam, omnia autem cognitiua cognitione participant propter intellectum primum . Sed aduerte qd Proclus non tenet conclusionem hanc eo sensu, quo Auctor . Nam quod entia creata consent ex finito, & infinito, non verificatur proprie nisi in rebus incorruptibilibus, vt in intelligentia, & in anima, quoniam vt diximus in propositione quarta, quia participant esse sunt finitæ, & quia habent virtutem, vt sint semper sunt infinitæ . Proclus autem extendit constantiam ex finito, & infinito ad omnia qualitercunque entia, ex consequenti tam corruptibilia, quam incorruptibilia, & tamen de corruptibilibus, patet quod non sunt infinita in duratione nisi forte secundum speciem, quoniam apud Philosophos species rerum sunt æternæ . Item primum ens prima vita, prima intelligentia , siue primus intellectus apud Auctorem non distinguuntur realiter, quoniam prima causa existens simplicissima est hæc tria Apud Proclum autem distinguuntur realiter, quoniam primum ens est idea entis, & prima vita est idea vitæ, & primus intellectus est idealis intellectus . Et quoniam in hoc non bene sentit, cum sint in rei veritate perfectiones primæ causæ, in qua nulla stat distinctio absolutorum, ideo in hoc relinquendus est, & tenendus est sensus Auctoris, cui concordat Arist. & Theologus, vt manifestabitur infra .

Secundum doctrinam Arist. acceptatur eadem propositio. Nam in 12. Metaph. tex. 13. & in 7. lib. tex. 30. dicit palam vero ex dictis, quia quodammodo sunt omnia ex vniuoco, id est ex sibi simili, vt homo ex homine, domus ex domo intellecta,

telleſta, calor ex calore &c. Ergo fit ens ex ente vita ex vita, intellectus ex intellectu. Et in lib. 10. docuit vnoquoque genere dari vnum primum vt meſura, qua meſurantur omnia illius generis, & illud eſt cauſa meſuratorum, ergo omnia entia meſurantur, & accipiunt eſſe à primo ente, & omnia viuentia accipiunt vitam, & mouent ſe propter primam vitam, & omnis natura intellectuua accipit ſcientiam, & intellectum à primo intellectu, & in lib. 12. tex. 39. docuit Deū eſſe vitam ſuam & intelligentiam ſuam, & cum ſit. primum principium. ergo eſt primum ens prima vita primus intellectus. ergo ſecundum Ariſt. à prima cauſa, vt eſt primum ens omnia entia habent eſſe, & omnia viuentia ſunt mota inquantum eſt prima vita, & omnia intelligentia habent ſcientiam, & intellectum inquantum eſt primus intellectus.

Secundum doctrinam Theologi, acceptatur eadem propoſitio. Nam à D. Dionyſ. in lib. de Diu. nom. cap. 5. duo habemus. Primo q̃ hæc tria, eſſe vita ſapientia in Deo ſunt vnū nec aliquam diſtinctionem realem important. vnde inquit. Non autem aliud eſſe bonum dicit, & aliud exiſtens, & aliud vita, & aliud ſapientia, neque multas cauſas, & aliorum alias produſtiuas deitates, ſed vnus Dei eſſe omnes bonos proceſſus, & à nobis laudatas nominationes. Secundo q̃ Deus vt ens, ſiue exiſtens, verius autem ſuperexiſtens eſt cauſa omnium exiſtentium, & vt vita omnis vitæ, & vt ſapientia omnis ſapientiæ, & ſcientiæ, & cognitionis, de primo inquit in dicto quinto cap. omnis quocunq; modo exiſtentis præexiſtens eſt principium, & cauſa. Et omnia ipſo participant, & à nullo exiſtentium recedit, de ſecundo inquit in 6. cap.

Omnis vita, & viuificatiuus motus eſt ex vita quæ eſt ſuper omnem vitam, & principium omnis vitæ. De tertio inquit in cap. 7. Diuina ſapientia omnium eſt mentis, & rationis, & omnis ſapientiæ, & prudentiæ cauſa, & ipſa eſt omne conſilium, & ab ipſa, & omnis cognitio, & prudentia &c. Et hanc quidem cauſalitatē multiplicem manifeſtât Dionyſius in eodem lib. in cap. 5. conuenienti ſimilitudine ſumpta à ſole, & inquit, ſi enim noſter ſol ſenſibilium ſubſtantias, & qualitates, & quidem multas, & differentes exiſtentes, tamen ipſe vnus exiſtens, & vniformæ lucendo ſuperfundens

lumen renouat, & nutrit, & custodit, & perficit, & discernit, & vnit, & resflorere facit, & germinabilia esse facit, & auget, & commutat, & collocat, & ex planta prodire facit, & sursum mouet, & viuificat omnia, & totorum vnumquodque iuxta proprietatem suam eodem, & vno sole participat, & multorum participantium causas vnus sol in seipso vniformiter præcepit, multo magis in causa, & ipsius, scilicet solis, & omnium existentium, quæ, scilicet est Deus, præexistere exemplaria, scilicet esse vitam sapientiam bonitatem secundum vnā supersubstantialem vnitionem cōcedendum est, quoniam & substantias producit secundum excessum à substantia, id est secundum virtutem qua excedit omnes substantias, &c. Hæc de propositio decimaottaua dicta sint.

PROPOSITIO XIX.

Ex intelligentijs est, quæ est intelligentia diuina, quoniam ipsa recipit ex bonitatibus diuinis quæ procedunt à causa prima per receptionem multam &c.

IN hac propositione intendit Auctor declarare, quomodo entia diuersimode participant diuinas perfectiones secundum quoddam magis, vel minus propinquant primæ causæ à qua pendet ex propositione præcedenti. Et quoniam in vniuerso sunt tres principales ordines, scilicet ordo intelligentiarum, ordo animarum, ordo corporum, ideo iuxta hos tres ordines ponit tres conclusiones.

Prima est. Inter intelligentias, quædam est intelligentia diuina, quædam est intelligentia tantum.

Secunda est. Inter animas quædam est anima intelligibilis, id est intellectualis, quædam est anima tantum.

Tertia est. Inter corpora naturalia, quædam habent animam, quædam sunt corpora naturalia tantum sine anima.

Pro euidencia harum conclusionum, aduerte, quod cum omnes isti ordines dependeant à Deo, vt declaratum est in propositione præcedenti, sic disponuntur quod supremum primi ordinis multum participat diuinam dignitatem, & vniuersalem

lem causalitatem, & clarissimam ac vniuersalem per pauciora media omnium cognitionem propter propinquitatem ad primam causam à qua perfectius, & abundantius recipit diuinas perfectiones, & ideo supremæ intelligentiæ ex hac propinquitate, & abundanti receptione diuinarum perfectionum, & multa similitudine ad primam causam, dicuntur non solum intelligentiæ, sed diuinæ tanquam diuina simulaera, sicut primi existentes in hoc mundo inferiori apud regem non solum dicuntur curiales, sed regij curiales. Et quoniam inferiores intelligentiæ huius primi ordinis, non ita propinquant primæ causæ, ex consequenti non ita perfecte recipiunt diuinam perfectionem, nec vniuersalem causalitatem, sunt quidem intelligentiæ, quoniam secundum se totas sunt intellectuales naturæ, sed non dicuntur diuinæ intelligentiæ, sed intelligentiæ tantum, sicut curiales secundarij dicuntur quidem curiales, sed non regij, quoniam non multam dignitatem, & auctoritatem recipiunt à rege in comparatione ad primiores. Eodem modo disponitur secundus ordo sub primo, quod superius secundum ordinem ex propinquitate ad primum participat de natura primi quod est esse naturæ intellectualis. unde in ordine animarum supreme, & magis perfecte, ut animæ humanæ non solum sunt animæ, sed ex propinquitate ad primum ordinem participant de intellectualitate, & dicuntur animæ intellectuales. Inferiores autem animæ ex distantia ad primum ordinem sunt quidem animæ. Quoniam commune est cuilibet animæ viuificare dirigere, & conseruare corpus. Eodem quoque modo disponitur tertius ordo sub secundo, quod suprema corpora ex propinquitate ad animam secundum perfectionem non solum sunt corpora, sed sunt participantia animam & vitam, & dicuntur animata corpora, inferiora autem utpote multum imperfecta, & ex distantia ab ordine secundo sunt corpora tantum, id est habentia tantum esse naturale. Et in hac declaratione comprehenditur intentio Auctoris in tota hac propositione.

Secundum Proclum acceptatur eadem propositio, cum tribus conclusionibus. Vnde in libro suo talem propositionem format. Omnis intellectualis ordinationis, id est in ordine separatorum intellectum hi quidem sunt diuini intel-

lectus, suscipientes Deorum participationes, hi autem intellectus solum, & omnis animarum ordinationis, hæ quidem animæ intellectuales sunt, ad intellectus suspense proprios, hæ autem animæ solum, & corporalis natura hæ quidem & animas habet astantes, hæ autem sunt naturæ solum, animarum expertes. Et aduerte, q̃ in secunda, & tertia patte propositionis. s. quo ad animas, & corpora non discordat à mente Auctoris, sed in primo ordine discordat in hoc, q̃ Proclus vult intelligentia supream dici diuino intellectus ex multa participatione Deorum, id est primarum formarum idealium, quæ sunt primum esse, prima vita, primus intellectus, quas more Platonico appellat Deos, & ponit distinctionem realē inter eas, vt diximus in propositione præcedenti. Auctor autem vult q̃ dicantur diuinæ intelligentiæ ex multa participatione tantum vnius primæ causæ quæ realiter, & simpliciter est primum ens prima vita, primus intellectus, prima bonitas &c. Et quoniam mens Auctoris in hoc est consona veritati, & concordat Arist. & Theologo, vñ dictum est in propositione præcedenti, ideo sensus Procli relinquendus est, & secundum veritatem loco eius quod dicit, suscipientes Deorum participationes, dicatur, suscipientes vnius primæ causæ participationes &c.

Secundum doctrinam Arist. acceptatur eadem propositio. Nam apud ipsum habemus hoc principium, quando aliqua plura ordinate ab vno primo procedunt, propinquiore illi principio perfectiora, & magis illi similia sunt, vt patet de lumine procedente ordinate à sole ad astra ad elementum æris, ad elementum aque, ad elementum terræ. nam perfectius recipitur in astris, imperfectius in aëre, adhuc imperfectius in aqua, & imperfectissime in terra propter opacitatem, & multam distantiam. Constat autem quod in ordine intelligentiarum, quæ sunt superiores, propinquiore sunt primo principio, istæ autem sunt secundum Arist. quæ sunt applicate superioribus sphaeris, inter quas prima in nobilitate, & perfectione, & causalitate est intelligentia octauæ sphaeræ quæ secundum Arist. est primum mobile. Deinde in intelligentia Saturni. Deinde Iouis, & sic discedendo. Nam sic ordinat eas in 12. Metaphys. tex. 44. vbi inquit Comment.

Quo-

Quoniam vero ordinatio istorum mouentium à primo motore, oportet vt sit secundum ordinem stellarum orbiu, manifestum est etiam qd prioritas eorum in loco, & in magnitudine facit eos priores in nobilitate &c. Si igitur propinqua primo principio nobiliora sunt & perfectiora merito dicuntur diuina entia, & in proposito dicuntur diuinæ intelligentiæ. Habemus & aliud principium ab Arist. in 10. Metaph. tex. 23. qd medium retinet naturam extremorum. Cū igitur anima humana media sit inter intelligentias, & animas inferiores, quoniam secundum Arist. in secundo de anima, tex. 22. videtur alterum genus animæ esse, & hoc solum contingere separari sicut perpetuum à corruptibili, necesse est in quantum respicit intelligentias esse naturæ intellectiue, & in quantum respicit animas inferiores esse animam. Inferiores autem animæ sunt animæ tantum. Item habemus ab Arist. in 3. Phys. tex. 27. quod cum omne corpus naturale moueatur aliquo motu, aut mouetur à seipso, aut ab alio, si à seipso, est animatum, distinguitur enim omne animatum in partem mouentem, & in partem motam, cuius motus principium sit anima, siue motus sit alteratio, siue augmentum, siue decrementum siue motus localis, si autem mouetur ab altero est corpus in animatum. Ergo secundum Arist. inter corpora naturalia quædam sunt animata, & corpora, quædam autem sunt corpora tantum.

Secundum doctrinam Theologi, acceptatur eadem propositio, & quidem qd supremæ intelligentiæ merito dicantur diuinæ intelligentiæ, quoniam propinquæ sunt primæ causæ, à qua recipiunt abundantius diuinas perfectiones vt testificatur Dionysius de cœlesti hierar. cap. 7. vbi exaltans primam hierarchiam inquit: pulchre igitur prima cœlestium hierarchiarum, ab excellentissimis essentijs sanctificatur, ordinem habens omnibus altiore, hoc est circa Deum immediate collocatur, & primo operantes theophaniæ, id est diuinæ manifestationes, vel illuminationes, & perfectiones in eam tanq̃ proximam, id est Deo immediatam disternuntur, hæc illæ, ex quibus constat, qd cum prima hierarchia sit immediata Deo, & recipiat perfectiones, & illuminationes immediate à Deo, & sit altioris ordinis, & aliarum intelligentiarum reci-

recipiant perfectiones, & illuminationes mediantibus supremis, merito supremæ dicuntur diuinæ, inferiores autem dicuntur intelligentiæ tantum, similiter q̃ perfectiores animæ sint non solum animæ, sed etiam intellectiua, imperfectiores autem sint animæ tantum, & q̃ perfectiora corpora sint non solum corpora, sed etiam animata, imperfectiora autem sint corpora tantum, declaratur ex fundamento posito à Dionysio in lib. de Diu. cap. 7. vbi inquit diuina sapientia est omnium effectiua, & super omnia concordans, & indissolubilis omnium concordationis, & ordinis causa, & semper fines primorum coniungens principijs secundorum, & vnā omnium conspirationem, & harmoniam pulchre operans, hæc Dionysius. Ex quibus habetur, q̃ cum intelligentiæ sint in primo ordine entis, & animæ in secundo, & corpora in tertio. Intelligentiæ vltimæ, & primæ. i. perfectiores animæ debent esse coniunctæ, ita. s. quod participant de natura intellectuali ex consequenti non solum sint animæ, sed etiam intellectuales, similiter animæ, & perfectiora corpora debent conuenire, vt. s. non solum sint corpora, sed corpora habentia animam, & sic seruatur, vt inquit Dionys. pulcherrima consonantia in ordinibus vniuersi. Hæc de propositione decimanona dicta sint.

PROPOSITIO XX.

Causa prima regit res creatas omnes, præter quod commisceatur cum eis &c.

Intendit Auctor in hac propositione manifestare modum quo prima causa regit omnia creata, absque diminutione perfectionis suæ, quæ consistit in simplicitate, & vnitatem virtutis suæ, ita quod ex hoc vniuersali regimine nullam patitur distractionem virtutis, & licet sua virtus separata sit, & exaltata, tamen ex hoc non impeditur perfectissimum regimen, & ad manifestationem sui propositi tendit ex tribus. Primo, q̃ prima causa regit omnia entia influendo in eis bonitates suas, quas ex parte sui influit vna influxione, & vno modo. Secundo, q̃ licet prima causa ex parte

parte sui influat vno modo. Et vna influxione, tamen res recipiunt huiusmodi perfectiones diuersimode secundum modum suæ virtutis, & sui esse. Tertio, q̄ omne regens præter causam primam regit diminute, & solum regimen primæ causæ est optimum, & pulcherrimum.

Primum sic manifestat, causa prima influit bonitates in rebus, non per aliquod accidens medium, sicut agentia creata quæ agunt per qualitates suas actiuas, sed influit per essentiam suam, & suum esse quod est virtus sua, ita q̄ essentiam, esse, virtus, bonitas, non distinguuntur, cum igitur essentia, esse, virtus in prima causa sint vna res, sequitur, q̄ ex parte sui influit vno modo, & vna influxione super omnes res, sicut & sol quantum sit ex parte sui effudit vno modo lumen super omnia illuminabilia, & Doctor vno modo quantum sit ex se illuminat omnes discipulos, proponens omnibus eandem conclusionem per eadem media.

Secundum sic manifestat, recipientia diuersificantur in virtute, & in esse ex consequenti diuersificantur in capacitate, & aptitudine recipiendi, ergo non omnia sunt æqualiter receptiua, immo aliqua plus, & aliqua minus, quæ tamen diuersitas provenit ex magnitudine largitatis diuinæ, & bonitatis, quæ ex immensitate sua, non potest recipi in rebus nisi multipliciter, & diuisim, & inæqualiter, sicut quoniam nullū illuminabile est capax tantæ lucis, quanta est in sole, necesse est q̄ secundum plus & minus in diuersis recipiatur secundū diuersitatem naturæ, & esse earum.

Tertium sic manifestat, sicut omne agens creatum distat à suo facto, quia non agit per essentiam suam, sed per instrumenta, & dispositiones quibus coaptat se facto suo, sic omne regens creatum distat ab eo quod regit, quia non regit per essentiam suam, sed per virtutes medias, puta per scientiam per prudentiam &c. Sed ex eo q̄ agens creatum agit per dispositiones superadditas essentiæ suæ non est purum, & sufficientissimum agens, ergo nec regens creatum, quia regit per virtutes superadditas essentiæ suæ est sufficientissimum & verum regens, cum igitur prima causa regat omnia per virtutem quæ est essentia sua, ex consequenti est indistans à rebus gubernatis, sequitur regimen suum esse in fine de

decoris, & sine defectu & tortuositate .

Ex his probatur sic propositum . Regimen primæ causæ non debilitat vnitatem eius , nec distrahit virtutem eius regit, ergo omnia absque hoc q̄ cōmisceatur eis . Antecedens probatur . Prima causa regit omnia per essentiam suam quæ est virtus sua, & non per dispositiones medias sicut regentia creata, ergo &c. Nam ideo regimen regentis creati debilitat vnitatem eius distrahit virtutem , quia regit per dispositiones superadditas essentia suæ, cum igitur prima causa nō regit, nec agat nisi per essentiam suam sequitur , q̄ regimen eius non debilitat vnitatem eius, nec distrahit virtutem eius . Consequentia autem prima declaratur sic . Nam ex alio prouenit q̄ regens immisceatur rebus rectis, nisi quia regit per instrumenta, & dispositiones superadditas quibus inclinatur & coaptat se rebus rectis ex qua coaptatione incurrit. Quandam compositionem siue commixtionem, cum igitur prima causa regat omnia per essentiam suam exaltatam super omnia, & per indiuisibilem virtutem suam, sequitur q̄ regit omnia absq; hoc q̄ cōmisceatur eis. Hinc patet error Auer. in 12. Metaph. cōment. 37. qui abstulit à Deo regimen, & sollicitudinem indiuiduorum vt indiuidua sunt, vbi inquit sollicitudo circa indiuiduum tali modo q̄ nullus habeat communicationem cum eo, hoc non est fas bonitati diuine &c. Iudicauit enim Auer. de regimine diuino, sicut de regimine humano, in quo quia regens regit per dispositiones medias, & coaptat se rectis ex qua coaptatione distrahitur virtus sua incurrit quandam vilitatem ex qualitate eorum quæ regit, & imperficitur, sed hoc iudicium est penitus irrationabile, quoniam vt diximus Deus regit res per essentiam suam, absque hoc q̄ commisceatur eis. Item patet error Epicurei, qui posuit Deum ociosum de nullo ente curam habere credens esse impossibile Deum regere, & non distrahi virtutem suam nec inquietari , quoniam videbat in regimine humano regentes inquietari. Non regentes autem gaudere quiete sua, sed vt diximus nō est similis ratio, quoniam Deus sua essentia quæ est exaltata super omnia, & quæ est virtus sua, & vno influxu ex parte sui gubernat omnia. Regens autem humanum, per instrumenta, per varias applicationes, & per
disposi

dispositiones superadditas essentiae suae regit, ideo inquietudinis distractiones multiplices paritur, & debilitatem virtutis, nobilitatem, & vilitatem recipiens ex conditionibus eorum quae regit, quoniam omnis humana actio qualificatur ex obiecto circa quod est, sicut & scientia recipit nobilitatem, & vilitatem ex obiecto, quod non contingit in diuina scientia, quoniam scit omnia in essentia sua, & ideo scit omnia: operatur in omnibus, regit omnia, sine aliqua imperfectione sua, quoniam scit, operatur, regit, omnia par esse suum.

Secundum doctrinam Procli, acceptatur eadem propositio. nam in libro suo talem propositionem format. Omne diuinum, & prouidet secundis, & ereptum est ab his quibus prouidetur &c. Per ly secundis intendit entia corporea, tam animata, quam inanimata, per ly diuinum intendit Deum summum, & substantias separatas quas Deos vocant Plato. Nam secundum viam Plato, triplex est prouidentia.

Prima, attribuitur summo Deo, qui principaliter prouidet substantijs intellectualibus, & toti vniuerso quo ad genera, & species, & vniuersales causas.

Secunda, attribuitur Dijs secundis, qui prouident indiuiduis rerum generabilium, & corruptibilium.

Tertia, attribuitur demonibus qui prouident hominibus quo ad actus humanos.

In hoc ergo q̄ Proclus dicit omne diuinum, intendit non solum primum Deum, sed & Deos secundos, per ly ereptum, intendit exemplum, siue non commixtum rebus prouisis eo modo quo exposuimus secundum Auctorem. Et ratio quae adducitur secundum mentem Procli est eadem cum ratione adducta ad mentem Auctoris, quia scilicet Dij prouidentes, prouident per esse suum, & non per aliquam habitudinem, siue dispositionem superadditam essentiae eorum, per quam aptentur, siue proportionentur rebus prouisi sicut faciunt regentes humano regimine, quos necesse est commisceri, & distrahi. quoniam diuersis prouident diuersis dispositionibus & medijs, vt paterfamilias, alia lege prouidet filijs, alia seruis, alia bestijs. Sed Dij suo esse sua essentia quae est virtus, & lex eorum prouident rebus, ideo prouident, & tamen sunt erepti, id est non commixti prouisis, nec patiuntur diuersi-

uerificationem virtutis ex suo regimine .

Tu tamen aduerte, quòd ratio adducta ad mentem Procli, non verificatur nisi in prima causa, quoniam omnis virtus actiua in creatis est quid additum essentia, & est accidens sicut actio sua . Nam in solo primo cui repugnat omnis cõpositio, & virtus, & actio est essentia sua propter quod tenendum est intelligentias regere per dispositiones superadditas essentia, nec inconuenit eas pati diuerificationem virtutis, & aliquo modo commixtionem cum his quæ reguntur, cum non sint purum agens, nec eis repugnet potentia, & actus . Et ideo Auctor secundum veritatem processit, qui regimen per esse suum, & propriam essentiam, & non per dispositionem superadditam attribuit soli primæ causæ, similiter triplex prouidentia secundum viam Plato. non est sustinenda, & improbabitur infra.

Secundum doctrinam Arist. acceptatur eadem ppositio . Nam in 12. Metaph. duo habemus ab Aristotele, primo q̃ partes vniuersi habent ordinem adinuicem sicut partes ciuitatis, aut exercitus, & omnes habent ordinem ad vnum primum distinctum & separatum, & vniuersalem principem, à quo est ordo in partibus vniuersi, vnde inquit in tex. 52. Omnia vero ordinata sunt aliqualiter, & ad vnum quidem omnia coordinata sunt, scilicet ad primam causam à qua ordinantur, & disponuntur sicut ab vniuersali regente, & principe, sicut partes familiæ disponuntur à Domino domus, vt inquit illic Cõment. Et id manifeste concludit in tex. 55. vbi reprobans eos qui ponebant substantiam vniuersi in connexionem, ita q̃ vnum ens non confert alteri, ex consequenti ponebant plura prima principia dicit, Entia vero nolunt male disponi, pluralitas autem principatuum mala, vnus ergo princeps, quasi dicat, totum vniuersum est sicut vnum regimen, & dominium, ergo oportet q̃ ab vno principe ordinetur & regatur, consequentia patet, quoniam videmus q̃ non stat bonitas regiminis cum pluralitate primorum regentium, vnus ergo est regens omnia entia . Quòd autem non commisceatur eis: nec distrahatur virtus eius, patet ex secundo, q̃ habemus ab Arist. in 12. Metaph. tex. 51. vbi determinat q̃ primum principium est sua intelligentia, & ex consequenti

ti omnis actio sua est substantia sua, ex quo habemus, quòd cum per intelligentiam, & scientiam suam regat entia, & producat (nostra enim scientia causata est à rebus, scientia autem Dei est causa entis, ut inquit Còment. in 12. Metaph. còment. 5 1.) & intelligentia sit essentia sua, sequitur q̃ regit res non per dispositiones medias, sed per essentiam suam, quæ cum sit exaltata super omnes res, non est còmixtibilis cum eis, nec virtus enim quæ est essentia sua est distrahibilis sicut, nec radius solis minuitur ex eo q̃ transit per varia corpora. Et si tu bene consideras, ratio adducta ad mentem Aristot. non dissentit ab ea quam adduximus ad mentem Auctoris, utrum autem prima causa omnia regat in vniuersali, & particulari, & quo ad singulas actiones, tam in superioribus, quàm inferioribus entibus ad mentem Aristot. non spectat præsentì propositioni, de hoc vero locuti sumus in quæstionibus nostris super 12. Metaph.

Secundùm doctrinam Theologi, acceptatur eadem propositio. Nam cum Deus sit causa creaturarum per intellectum, non solum quo ad esse creaturarum, sed etiam quo ad quodcunque bonum in eis repertum, & ordo earum in debitum finem sit bonum in eis, sequitur, q̃ Deus sua intelligentia quæ est essentia sua ordinat, & dirigit omnia in debitum finem, sic autem ordinare, & dirigere, est regere, & quoniam eodem agit & dirigit, patet q̃ sicut omnium est causa effectiua, sic est omnium causa ordinatiua, & propterea non admittit Theologus triplicem prouidentiam assignatam ad mentem Platonis. Tu tamen aduerte, q̃ licet prima causa omnia ordinet, & dirigat in finem, tamen talem ordinem non exequitur per se ipsum, quo ad omnia, sed per causas secundas, ut gubernat inferiora per superiora, id est per intelligentias, & corpora cœlestia, ut dicemus in propositione vigesima tertia, per seipsum autem gubernat naturas intellectuales, ut sibi similes. Hæc de propositione vigesima dicta sint.

PROPOSITIO XXI.

Primū est diues per seipsum, & est diues magis &c.

In

IN hac propositione intendit Auctor declarare primam causam esse sufficientissimam ad regendum omnia, quae sufficientia consistit in abundantia, & continentia omnium bonitatum, & perfectionum quas Auctor nominat diuitias, qui enim regit, & non continet bona distribuenda subditis, diminute regit, unde ad omnimodam sufficientiam regiminis, duo requiruntur, primo debita, & certa sapientia, qua sciat regens subditos dirigere, & ordinare in finem, secundo abundantia mediorum conferendorum subditis, ut consequantur finem. Quid enim prodesset Principi scire ordinare militem contra hostes, nisi prouideret ei de medijs, ut de pecunia, & armis, & equis &c. Ad declarandam igitur sufficientiam regiminis in prima causa, in hac propositione intendit Auctor hanc consequentiam. Prima causa est diues per se ipsam, ita quod nullo extra ipsam indiget, & est magis diues, id est super omnia diues, ergo sufficientissime regit omnes res, consequentia patet, quoniam ex eo quod est maxime diues per seipsam continet in se omnia media conferenda rebus gubernatis, ergo sufficientissime regit. Antecedens verò probatur ab Auctore pro utraque parte. Et primo quod fit diues per seipsam. Secundo, quod magis diues quam omnia alia.

Quantum ad primum arguit sic. Prima causa est vnitas, & non sparsa in seipsa, sed pura vnitas, quia omnino indiuisibilis, & omnino incomposita, cum sit simplicissime simplex, aliter non esset primum ens, quoniam omne compositum posterius est suis componentibus, ergo est diues, & sufficiens per seipsam, probatur consequentia. Vnitas, id est simplicissime simplex, & compositum sunt opposita, quoniam compositum indiget componentibus, neque enim ex seipso est, simplicissime autem simplex, nullo extrinseco indiget, quoniam à nullo pender. ergo sicut omne compositum est diues per aliqua ex quibus est, & à quibus pender, sic simpliciter simplex est diues per seipsum, sicut habet esse per seipsum.

Quantum ad secundum sic arguit. Prima causa influit bonitates in omnibus rebus, & nulla influit in ea, immo omnes accipiunt ab ea, quoniam posterius accipit à priori, &
non

& non econuerso. ergo omnes res tam intellectuales, quàm corporales non sunt diuites per se ipsas, immo sunt indigētes vno primo diuite influente super eas bonitates, & omnes gratias, ex consequenti est diues super omnia, & sic est sufficientissimum regimen eius.

Secundum doctrinam Procli, acceptatur eadem propositio. Nam in libro suo format talem propositionem.

Omne diuinum primo, & maxime est simplex .i. licet in entibus sint multa simplicia, intelligentiæ enim habent essentiam quæ non diuiditur, vt dictum est in propositione septima, tamen ens diuinum est primo, & maxime simplex, quoniam non compatitur secum aliquam minimam compositionem, neque ex his, neque cum his, omne autem creatum compatitur secum compositionem saltem subiecti, & accidentis, deinde subiungit Proclus. Et propter hoc .i. propter maximam, & primam simplicitatem est maxime per se sufficiens. Ad euentiam huius dicti aduerte tria.

Primo, quod dicit Auct. per seipsum diues, dicit Proclus per se sufficiens. nam per seipsum diues nullo extra ipsum indiget. ergo solus sibi sufficit.

Secundo, Proclus intendens ex simplicitate diuina probare sufficientiam suam per seipsam, prius probat eius maximam simplicitatem, & arguit sic. Prima causa est prima vnitas, sicut enim est primum ens, & prima bonitas, sic est prima vnitas, ergo pura vnitas, ergo maxima vnitas sicut puta albedo est maxima, id est perfectissima albedo, si maxima vnitas, ergo maxima simplicitas. nam simplicitas negat diuisionem in plura, & compositionem ex pluribus, ex consequenti simplicitas includit vnitatem, qualis ergo est vnitas in prima causa, talis est simplicitas, si ergo est prima, & maxima vnitas, est etiam prima, & maxima simplicitas.

Tertio, ex maxima & prima simplicitate intendit concludere primam causam esse per se sufficientem, sicut etiam concludit Auctor. nam omnia composita indigent suis componentibus, & agente vniente componentia simul. ergo non sunt per se sufficientia, simplicia autem non indigent his. ergo sufficientiam suam habent in seipsis, cum igitur causa prima sola sit simplicissima in se vnitissime, & indiuisibiliter

continens vniuersalem bonitatem, sequitur quòd est per se sufficiens.

Secundùm doctrinam Arist. acceptatur eadem propositio. Nam in 5. Metaph. cap. de perfectò inter alios modos quibus dicitur perfectum assignans modum quo dicitur aliquid perfectum vniuersaliter, id est absolute, & non solum in aliquo genere inquit. Quædam, scilicet dicuntur perfecta modo vniuersali, ita quòd nò deest eis nobilitas in vnoquoque genere, & nihil est extra illa, scilicet quod non contineatur in illis, & Comment. ibi applicans dictum Arist. inquit, & ita est dispositio primi principij, scilicet Dei. Deus igitur in se continet omnes bonitates, & nulla est bonitas extra ipsum, nisi vt participatio diuinæ bonitatis, ergo per se sufficiens est, & in 12. Metaph. tex. 37. ponens correspondentiam, & proportionem inter intelligibilia, & appetibilia determinat quòd sicut substantia simplex quæ est purus actus, vt Deus est primum intelligibile, ita & primum appetibile, & optimum, ex consequenti est vniuersale bonum non secundùm vniuersalem prædicationem, sed secundùm vniuersalem continentiam. ergo est per se sufficiens. Confirmatur ex eius dicto in septimo lib. Polic. vbi inquit Testis est Deus qui beatus est, non propter aliquod externorum, sed per seipsum, quia talis est secundùm naturam &c. sed apud Arist. felicitas, & sufficientia omnium bonorum idem sunt. ergo si Deus per seipsum beatus est per seipsum. sufficiens est.

Secundùm doctrinam Theologi, acceptatur eadem propositio. nam secundùm Dion. in lib. de Diu. no. cap. 13. Deus est vniuersalissime perfectus, quia omnium perfectiones in se excellentissime continet, & in omnibus influat bonitates suas incessabili largitione, vnde inquit. Perfectum autem rursum dicitur, & sicut inaugmentabile semper perfectum, & sicut nò minorabile, sicut omnia in seipso præhabens, & supermanens secundùm vnā impausabilem, & eandem, & super plenā, & imminorabilem largitionem, secundùm quam perfecta oia perficit, & propria adimplet perfectione &c. ergo ex vniuersalissima sua perfectione quæ à nullo extrinseco pendet, immo quæ communicatur extrinsecis, manifeste concluditur, omnimoda & per se sufficientia diuina. Item
secundùm

secundum Dionys. in eodem lib. & eodem cap. Theologia laudat omnium causam, vnius nominatione propter exceedētem totius diuinæ vnitatis simplicitatem, in qua omnia singulariter congregata sunt, & superunita. supersubstantialiter ergo sicut ad mentem Auctoris, & Procli ex diuina vnitae, & simplicitate conclusimus Deum per se sufficientem ita quod sufficientia sua à nullo alio pendet, sic secundum Dionys. eodem medio eandem conclusionem probare manifeste possumus. Hæc de propositione vigesima prima dicta sint.

PROPOSITIO XV.

Causa prima est super omne nomen quo nominatur &c.

Intendit Auctor hic manifestare celsitudinem primæ causæ ex hoc signo, quod est super omne nomen quod possit sibi attribui ab intellectu nostro. Et licet ex dictis in Propositione sexta, vbi probatum est quod est maior omni narratione & omni loquela, cum loquela, & narratio fiant per nomina, possit esse manifestum quod est maior omni nomine sibi attributo, tamen hic particularem propositionem format de diuina nominatione, quoniam intendit eam probare medio non tacto in Propositione sexta. Intendens igitur probare primam causam esse super omne nomen, sic procedere videtur, omne nomen à nostro intellectu inuētum aut est abstractum, aut concretum, quorum nullum proprie conuenit primæ causæ. ergo est super omne nomen. Antecedens probatur pro prima parte. Omne nomen significat vt quo, vel per modum formæ, & sic est abstractum, vt deitas, humanitas, albedo &c. vel significat vt quod, vel per modum compositi, vt Deus, homo, album &c. & sic est concretum. Pro secunda parte, probatur sic. Nomen abstractum significat per modum diminuti, quoniam signatum nomine abstracto non est quod subsistit, nec quod agit, sed quo agens agit, non enim humanitas subsistit, nec operatur, sed homo, nec calor calefacit, sed calidum, sed in Deo nulla est diminutio. ergo nomen abstractum non proprie conuenit Deo

Nomen autem concretum licet significet ut completum .i. id quod est, & quod subsistit, & quod agit, tamē significat formam limitatam, vel ad subiectum, vt albū, vel ad materiam, vt homo : ex consequenti nomen concretum apud nos videtur significare naturam limitatam, id autem non competit Deo, quoniam cum sit agent creans, & influens bonitates suas in rebus influxione perfecta & vna, licet res diuersimode eas recipiant sē modum quo possunt recipere, necesse est diuinam bonitatem esse sine fine, & interminatam. ergo quocunque nomine nominetur, imperfecte & quasi improprie nominatur, ergo est super omne nomen ab intellectu nostro inuentum.

Secundū doctrinam Procli, & Arist. & Theologi acceptatur eadem propositio, quoniam vnumquodque eo modo minatur quo intelligitur, cum nomina sint signa conceptū, sed Deus ex sua infinitate est super omnem scientiam, & conceptum nostrum. ergo super omne nomen, & ideo bene dixit Dion. in j. cap. de Diu. no. Deus omnium quidem existentium comprehensiuus, omnibus autem vniuersaliter est incomprehensibilis, & neque sensus eius est, neque phantasia, neque opinio, neque nomen, neque sermo. s. declarās immensitatem substantiæ suæ, & infra in eodem cap. inquit exponens illud, quare interrogas nomen meum, quod est admirabile &c. Nunquid autem non hoc vere est mirabile nomē, quod est super omne nomen, quod est innominabile, quod est collocatum super omne nomen, quod nominatur siue in seculo isto, siue in futuro.

PROPOSITIO XXIII.

Omnis intelligentia diuina scit res per hoc quod est intelligentia, & regit eas, per hoc quod est diuina &c.

Quoniam non solum prima causa regit, sed etiam intelligentiæ. nam per motum cœli regunt inferiora, & regulant in motu quo ad velocitatem, & tarditatem corpora cœlestia,

lestia, ideo intendit in hac propositione declarare, vnde habet intelligentia quòd sit regens, & dicit tria.

Primo, quòd non regit in quantum intelligentia.

Secundo, quòd regit in quantum diuina.

Tertio, quòd regimen primæ causæ sublimius est, & altioris ordinis quàm regimen intelligentiæ.

Quantum ad primum aduerte, q̃ sicut essentialē est lucido lucere, calido calefacere, sic essentialē est intelligenti intelligere, & scienti scire. non ergo est essentialē intelligentiæ in quantum intelligentia regere, sed intelligere, & in hoc stat sua perfectio, & complementum, quoniam vnumquodque perficitur sua propria operatione.

Quantum ad secundum aduerte, q̃ cum principium regiminis sit auctoritas quæ consistit in virtute regulatiua & influentia bonitatis super subditos, ex eo intelligentia est regens, à quo habet auctoritatem, & causalitatem influentiæ bonitatis. hoc autem habet à Deo vt vniuersali Auctore & Domino, ex propinquitate & similitudine quam habet ad ipsum. est ergo regens in quantum participat virtutem, & potentiam diuinam. ergo non in quantum intelligentia, sed in quantum diuina, quod enim participat actionem alicuius principalis agentis denominatur nomine principalis agentis, vnde sicut lapis comburens participat actionem ignis: sic denominatur ab igne. dicitur enim lapis ignitus, igitur quoniam intelligentia participat actionem Dei, quæ est dominari, & regere, conuenienter dicitur intelligentia diuina, sicut lapis dicitur ignitus, non in quantum lapis, sed in quantum comburit, vnde intelligentia quæ non regit non dicitur diuina, sed intelligentia tantum, vt dictum est in propositione decimanona.

Quantum ad tertium aduerte, q̃ quadruplici ratione assignata ab Auctore regimen primæ causæ sublimius est.

Primo, quia prima causa dat virtutem regitiuam intelligentiæ, & non econuerso.

Secundo, quia quæcunque reguntur ab intelligentia reguntur etiam à prima causa. nam (vt diximus in Propositione prima) quamcunque actionem habet causa secunda super effectum suum habet, & causa prima, quia non agit nec

mouet nisi agente. & mouente causa prima.

Tertio, quia prima causa sicut producit oēs res, sic etiam regit. intelligentia autem non regit omnia, sed tantum corpora, soli enim creatori natura intellectualis ut intellectualis subijcitur.

Quarto, quia omnia desiderant primā causam modo suo, quoniam est bonum vniuersale, in quo continetur omne bonum, & cum omnia appetant bonum sequitur quod desiderant illud, in quo & à quo est omne bonum, non autem omnia desiderant intelligentiam, cum sit particulare, & determinatum bonum. constat ergo regimen primæ causæ esse sublimius, & altioris ordinis, cum non habeat regimen supra, & sit vniuersalissimum.

Secundum doctrinam Procli, acceptatur eadem propositio. nam in suo libro talem propositionem format. Omnis diuinus intellectus intelligit quidem ut intellectus, prouidet autem ut Deus. Vnde aduerte, quod sicut proprium est sensui sentire, & voluntati velle, sic proprium est intellectui ut intellectus est intelligere. regere autem & producere non est proprium intellectus, sed in quantum intellectus practicus actuatus specie, siue forma rei producibilis. puta intellectus ædificatoris est causa ædificandi, prout habet in se domum cognitam, cum igitur intellectus ut intellectus non regat, id habet aliunde, puta quia efficitur Deus participatiue, recipiens à prima causa multam virtutem, & auctoritatem ex propinquitate ad illam, ex qua receptione participat & formam, & actionem, & nomen primæ causæ, quæ sunt virtus regitiua, regimen, Deus. nam & in humanis qui accipiunt auctoritatem regendi à primo domino, dicuntur dominari, & domini, ergo &c.

Secundum doctrinam Arist. acceptatur eadem propositio. Et quidem quod intelligentia ut intelligentia intelligat secundum Arist. manifestum est, quoniam sicut proprium est lucidi lucere, & calidi calefacere, & visus videre, sic intelligentiæ intelligere, & qui auferret ab intelligentia intelligere destrueret eam, vnumquodque enim est propter operationem, & quod intelligentia ut intelligit non regat, patet quoniam inquit Arist. in tertio de anima, tex. 58. Scientificum autem

non

non mouet, sed manet, id est intellectus in quantum intelligens speculative non mouet, id est non causat, non agit ad extra, sed quiescit. ergo non regit, quod autem regat ut accipit virtutem, & auctoritatem à primo, patet, quoniam in 12. Metaph. tex. 51. assimilauit vniuersum exercitui, in quo propinquiore Duci accipiunt potestatem à Duce, & regunt inferiores. ergo in vniuerso entia propinqua primo, ut sunt intelligentiæ, accipiunt virtutem, sicut & esse à primo, & regunt inferiora. Vnde dixit in primo Meteor. quod necesse est mundum inferiorem regi, & gubernari rationibus superioribus, id est motibus cœlestibus, si ergo motibus, ergo & motoribus causantibus motum quales sunt intelligentiæ. Nam pro tanto ista est vera à qua calefit calefactione, quia calor siue calidum calefacit. ergo à simili hæc est vera. Mundus gubernatur motu cœlesti, quia gubernatur motore influente &c.

Tu tamē aduerte, quod Arist. in hoc dissentit ab Auctore, quoniam non concedit intelligentias nisi secundum numerum motuum cœlestium, ut patet in 12. Metaph. tex. 48. vbi & Comment. inquit. Necesse est ut via numerandi ista sit ex numeratione motuum stellarum, ex consequenti apud Arist. omnes intelligentiæ mouent. ergo omnes regunt. ergo omnes sunt diuinæ, quia non dicuntur diuinæ, nisi quia regunt, in hoc imitantes primum. Apud Auctorem autem (ut patet in propositione xix.) quædam sunt intelligentiæ diuinæ, ut supremæ, quædam sunt intelligentiæ terrestres, ut inferiores, quoniam cum sint nobiliores tota substantia corporea, non est necesse omnes esse applicatas corporibus cœlestibus, sed deputari altiori exercitio, puta assistere primo, sed id ad Theologum spectat.

Secundum doctrinam Theologi, acceptatur eadem propositio. Et primo, quod intelligentia ut intelligentia non regat, probatur, quoniam omnes regerent, cum omnes intelligant, sed secundum Theologos non omnes regunt, nec præsident rebus corporeis. nam secundum Dionysium in lib. de cœlesti hierarchia, cap. sexto. Primæ & supremæ intelligentiæ assistunt circa Deum semper & attente, ipsi immediate ente alias unire. Quod autem ut diuinæ regant probatur, quoniam cum sint causæ secundæ, illis communicatur virtus regitiua. quæ

essentialiter conuenit Deo, vt patet per Dionysium in lib. de diuinis no. cap. 12. & in quantum communicantur intelligentijs dicuntur Domine, & reſtrices, & Dij. vnde inquit Dionysius in eodem cap. Sanctos autem & reges, & dominos, & Deos vocant eloquia in singulis principales ornatus, per quos secundi ex Dei donis accipientes illorum distributionis simplicitatem circa sui ipsorum differentias multiplicat, id est diuina eloquia vocant illos Angelos sanctos & reges, & dominos, & deos siue diuinos qui tenent primos gradus in singulis ordinibus, quia recipiunt Dei dona, & virtutem in maiori simplicitate, quoniam Deo magis assimulantur, in quo est simplex & vniformis bonitas, & virtus, & sic per principales ex sua simplicitate distribuit illis, & huiusmodi dona multiplicantur in inferioribus secundum eorum differentias. Patet igitur quod intelligentiæ in quantum diuinæ, id est in quantum recipientes Dei dona, vt auctoritatem & potentiam regitiuam dicuntur regere, & dominari inferioribus, tam in ordinibus Angelorum, quam in naturis corporeis. Quod autem Dei regimen alius sit, & melius quam regimen intelligentiæ apud Theologum manifestissimum est. Nam inquit in eodem capite, laudare nos conuenit illi qui est infinitorum nominum, sicut sanctum sanctorum regem regnantium, dominum dominorum, & Deum Deorum & c. Et declaratis quid sit sanctitas regnum dominium deitatis subdit. Igitur hæc quidem in causa excedente omnia laudare conuenit, & addendum est, ipsam esse excedentem sanctitatem, & regnum, & dominationem, & superpositam ac amplissimam deitatem, etenim ex ipsa est distributa omnis munda diligentia, & omnis sincera mundicia. Item omnis ordo rerum, ornatusque distinctus, in coincinitatem, & inæqualitatem in congruentiam eliminans, & ad ordinatissimam identitatem reſtitutionemque gestiens. Rursus omnium pulchrorum bonorumque perfecta possessio. Hæc de propositio vigeſimatercia dicta sint.

PROPOSITIO XXIIII.

Causa prima existit in omnibus rebus secundum
vnam

vnam dispositionem, sed res omnes non existunt in causa primam secundum vnā dispositionem &c.

IN hac propositione intendit Auctor declarare quomodo entia diuersimode reguntur à prima causa. Reguntur autem in quantum influit in eis bonitatem suam, & in quantum entia recipiūt, & in hac propositione dicit duo.

Primo, quod prima causa existit, scilicet per influxum bonitatis in omnibus rebus secundum vnā dispositionem, id est secundum vnā actionem, quoniam diuina actio est virtus, & essentia Dei, quæ non potest plurificari.

Secundo, quod res omnes, non autem in prima causa influente secundum vnā dispositionem, id est receptionem, quoniam quælibet recipit secundum modum naturæ suæ, ut quædam recipiunt vnite, vel indiuisibiliter, ut substantiæ simplices, quædam recipiunt multipliciter, ut substantiæ compositæ, quædam recipiunt æternaliter, ut incorruptibilia, quædam temporaliter ut corruptibilia, quædam corporaliter ut materialia, quædam spiritualiter, ut immaterialia.

Hanc igitur propositionem Auctor probat sic. Quando agens est vnum, & recipiens diuersum diuersitas receptionis provenit ex parte recipientium, & non ex parte agentis, ut quoniam lux solis est vna illuminat omnia vna illuminatione actiua, non tamen omnia recipiunt lumen eodem modo, quoniam recipientia sunt diuersa, ut corpus tersum, corpus diaphanum, corpus terrestre, sed prima causa est vnum, & simplicissimum agens, & sua virtus, & sua bonitas est vna, ergo ex parte primæ causæ non diuersificatur influxus bonitatis in rebus, sed ex parte recipientium quæ sunt diuersarum naturarum, & vnaquæque recipit modo suæ naturæ temporaliter, vel æternaliter, & ut sic diuersificatur influxus diuinæ bonitatis. Quod si agens esset diuersum, & recipiens vnum diuersitas receptionis proveniret ex diuersitate agentis, ut quoniam calidum, & frigidum sunt diuersa agentia, & aqua est vnum recipiens, recipit à calido calorem, & à frigido frigiditatem, verum cum in proposito causa prima agens sit penitus vna, ex parte sua est in omnibus rebus vna influxione, sed quoniam res non sunt vnum recipiens,

recipiens, sed diuersum, ex parte rerum non sunt in prima causa secundum vnā receptionem bonitatis influxe.

Tu tamen aduerte, quod in hac propositione comparat Auctor primā causā ad res vt regentem, & non vt creatā. Nam vt regens, & dominās supponit res in esse, quoniā cum regnum, & dominium sint relationes supponunt extrema actū ex cōsequenti vt regens infinit bonitates suas in rebus existentibus quibus deducuntur in proprios fines & quoniam sunt diuersē recipiunt diuersimode hūmōi bonitates vt dedimus exemplum de luce solis, vt creans autem non supponit recipiēs, quoniam creatio nihil supponit, vnde si quæ- ratur, cum Deus creans sit penitus vnus sicut & regens, & vt creans non supponat diuersitatem recipientium, vnde prouenit pluralitas, & diuersitas creaturarum. Diceret Auctor, quod id prouenit ex diuino intellectu qui in diuina essentia, vt contentiua omnium graduum essendi cognoscit ad perfectionem vniuersi creandi, oportere esse plures, & inæ- quales gradus entium, vnde sicut artifex vna arte producit diuersa artificiatā, vt ædificator vna arte domificatiua producit domum paruā, magnā, triangulārem & rotundā &c. Sic prima causa vna scientia sua adiuncta voluntate producit diuersitatem entium.

Item aduerte, q̄ Auctor ibi, ergo secundum modum &c. Ex eo quod dixit diuersitatem receptionis prouenire ex diuersitate recipientium elicit hoc corollarium, entia secundum modum quo propinquant primæ causæ recipiunt bonitates eius, vnde propinquiora perfectius, & abundantius recipiunt, & quoniam entia intellectualia propinquiora sunt, vt pote similia, ideo perfectius recipiunt, & quoniam intellectualia cognoscunt bonitates receptas, ideo delectantur, & delectatio est secundum proportionem cognitionis bonitatis recepte, vnde primæ intelligentiæ, perfectius recipiunt, perfectius cognoscunt, perfectius delectantur.

Secundum doctrinā Procli, acceptatur eadem propositio. Nam in libro suo, hanc propositionem format. Omnes quidem Dijs adsunt eodem modo, nō autem eodem modo omnia Dijs adsunt, sed singula secundum ipsorum ordinem participant illorum præsentiam, hoc quidem vni-
miter,

miter, hoc autem multiplicatim, & hoc quidem perpetuo, hoc autem temporaliter, & hoc quidem in corpore, hoc autem incorporaliter. Quam propositionem non est necesse aliter declarare, quoniam patet ex declaratione facta ad mentem Auctoris, & corollarium elicited ab Auctore consonat doctrinæ Platonice quam sequitur Proclus. Nam apud Platonem pro principio habetur quod entia secundum propinquitatem, & distantiam à primo bono, plus & minus recipiunt ab eo bonitates, & quæ sunt naturæ intellectualis quanto propinquiora sunt illi, tanto magis assimilantur illi in cognitione, & dilectione, & delectatione, sed primum bonum est maximus sui cognitor, & amator, & seipso maxime delectatur cum sit primum intelligibile, & primum appetibile, & sibi ipse maxime unitum. Ergo entia intellectualia quanto propinquiora sunt primo bono, tanto magis cognoscunt, & amant, & delectantur bonitatibus ab eo receptis.

Secundum doctrinam Arist. acceptatur eadem propositio. Nam in octauo libro Metaphys. tex. 11. quærens unde provenit diuersitas rerum si materia est vna omnium generabilium, & determinans concludit, quod licet materia prima sit vna omnium, tamen materię proxime possunt esse diuerse. nam alia est materia phlegmaris, puta humidum frigidum alia materia cholere, puta calidum siccum, unde inquit Arist. si agens est diuersum, & materia proxima receptiua sit vna, fiunt res diuersæ, vt ex ligno fit domus & fit nauis, quoniam alia est ars ædificatiua, & nauificatiua, & posito quod esset eadem ars, & idem artifex realiter, tamen quia alia idea agit domum, & alia nauim dicitur diuersum agens formaliter, si autem agens est vnum, & materia est diuersa, fit diuersitas rerum ex parte materię, vt idem artifex per eandem ideam facit duas fialas vnam ex argento, aliam ex auro si vero agens & materia sint diuersa ex parte vtriusque provenit diuersitas. Quod si agens est vnum & materia vna productum erit vnum. In casu proposito, prima causa reagens est vna, & entia recta sunt diuersa, ergo diuersitas receptionis bonitatem diuinarum, provenit ex rebus diuersis, & diuersimode recipientibus, & non ex unitate primæ causæ

causæ influentis . Similiter corollarium positum ab Auctore acceptatur ab Arist. Nam in primo cœli, tex. 39. Loquens de entibus æternis habentibus sufficientissimam vitam, & quæ sunt extra cœlum dicit, unde & alijs communicatum est his quidem clarius, his autem obscurius esse, & viuere. i. cum à perfectissimo fiat derivatio ad minus perfecta, & causa prima sit perfectissima sequens est, vt ab ea ad alia fiat derivatio, & communicatio esse, & viuere non quidem æqualiter, sed his quidem clarius .s. propinquieribus, his autem obscurius .s. magis distantibus, vt corruptibilibus . Quod autem propinquiora primæ causæ intelligentia, & desiderantia delectentur, manifestat Arist. in 12. Met. tex. 39 vbi facit talem comparisonem . Si nos intelligentes eo modo quo possumus, & non semper diuinas perfectiones optime delectamur, multo magis entia intellectualia æterna, vt intelligentiæ delectantur, quoniam illis est intellectio continua, & semper, ex consequenti eorum delectatio est sempiterna .

Secundum doctrinam Theologi, acceptatur eadem propositio. Nam cum propositio intelligatur non de productione rerum, sed de earum regimine, & gubernatione à prima causa, sumenda est diuersitas ex parte rerum, & non ex parte regentis, quia vna actione, vna virtute gubernat omnia . Nam regere est dirigere, & producere rem per debita collata media in bonum finem, dirigere autem motus est, & motus cum sit actus mobilis à mouente, diuersitatem accipit à diuersitate mobilium, & non à mouente, stat enim vnum agens causare plures passiones in distinctis substantijs . Nam ignis A, potest calefacere plura calefactibilia, & licet calefactio actiua, vt est ab igne sit vna, tamen calefactio passio diuersificatur, vt diuersificantur receptiua, sic est in proposito de diuino regimine in quo seruatur vnitas ex parte regentis, & sumitur diuersitas ex diuersitate rerum recipientium diuinum regimen . Quod autem entia secundum maiorem, & minorem propinquitatem ad primam causam recipiant maiores, & minores perfectiones, patet apud Theologum, ratio, quoniam propinquius perfectissimo magis participat ipsum, sicut propinquius lucidissimo magis illuminatur, & minus propinquum minus. Et quod entia intellectualia delectentur

lectentur in cognitione diuinarum perfectionum quæ sibi communicate sunt à prima causa, & delectatio proportionetur perfectioni collate, & cognite: patet ratio, quoniam delectatio est de bono cognito præsentī, & vnito ipsi cognoscenti. ergo delectatio graduatur secundum quod graduatur ipsum bonum cognitum, vt scilicet paruum bonum parum delectet, & magnum magis, & maximum maxime, vnde Deus est infinite felix, quoniam cum sit bonum infinitum infinite delectatur in seipso. Hæc de propositione vigesimaquarta dicta sint.

P R O P O S I T I O X X V.

Substantiæ vnitæ intelligibiles non sunt generate ex re alia, omnis substantia stans per essentiam suam, non est generata ex re alia &c.

IN hac propositione intendit manifestare, q̃ aliquæ substantiæ ita disponuntur à prima causa, q̃ non indiget generari ab aliquo generante, sumendo generans proprie, quod. sc. educit generabile de potentia ad actum per generationem physicam, quæ est terminus alterationis, sed huiusmodi substantiæ acquirunt simpliciter esse completum à prima causa, sine præcedenti alicuius esse imperfecti, & potenciali, ponit igitur talem propositionem. Omnes substantiæ vnitæ intelligibiles non sunt generate ex re alia .i. omnes substantiæ simplices intellectuales quales sunt intellectiæ, & anima intellectiua, non sunt generate ex re alia .i. nec ex materia, nec ex aliquo generante proprie dicto, hanc sic probat. Omnis substantia simplex intellectualis est stans per essentiam suam .i. est subsistens secundum seipsam, vt in hoc distinguatur à re subsistente non secundum se ipsam, sed quia habet formam fundatam in materia, vt composita materialia. Omnis substantia subsistens secundum seipsam non est generata ex re alia modo exposito, ergo &c. Prima propositio fuit probata supra in propositione decimaquinta, vbi declaratum est, quod omne sciens essentiam
suam

suam, est rediens ad essentiam sua redditione completa, ex consequenti est per se subsistens. Secunda autem propositio probatur hic ab Auctore sic. Omnis substantia generata ex re alia siue sumatur ly ex ut dicit materiam siue ut dicit causam efficientem tendit ab esse diminuto, id est potenciali ad esse completum, id est actuale. Nam generatio est via à diminutione ad complementum, quoniam enim termini sunt oppositi, & terminus à quæ habet rationem non esse, terminus autem ad quem habet rationem esse. Nam ex non calido fit calidum, est non homine fit homo, id est ex homine in potentia fit homo actu. Res ergo generanda prius est subesse diminuto, & per actionem generantis disponens materiam educitur de imperfecto ad perfectum, & quoniam omnis generatio adiuncta alteratione fit in tempore, sequitur quod omnis substantia generata ex re alia, prius tempore habet esse diminutum quam completum, sed substantia subsistens secundum seipsam non prius habet esse diminutum postea completum, quoniam cum sit forma siue actus, & non habeat materiam partem sui, quoniam producit totaliter producit, scilicet ex puro non esse, ex consequenti accipit suum esse completum à prima causa, in instanti non per generationem, sed per simplicem fluxum, & sua formatio siue productio, non est via ab imperfecto ad perfectum qualis est generatio Physica, sed est comparatio siue relatio ad primam causam à qua in esse completo producit, nullo potenciali supposito, ergo omnis substantia subsistens secundum seipsam non est generata generatione proprie dicta ex re alia, id est nec ex materia; nec ex genere Physico. Licet acquirat esse completum à prima causa, non præcedere aliquo esse diminuto, vel potenciali.

Secundum doctrinam Procli, acceptatur eadem propositio. Nam in libro suo talem propositionem format. Omne per se subsistens est ingenerabile; & accipit ly per se subsistens non absolute, quoniam individua substantiæ, ut Socrates Plato cum sint per se subsistentes (non enim innituntur alij, sed habent esse per se, & completa sunt in natura sua) non essent genita, sed accipit ly per se subsistens in sensu Auctoris, scilicet subsistens secundum seipsum, & non quia habet formam in materia, ex cuius compositione resultat

sultat compositum subsistens, & sic ly per se subsistens est restringendum ad substantiam immaterialem quales sunt ideę apud Platonem, & intelligentię, & animę intellectuales. Et Proclus eadem via probat, qua probauit Auctor, ideo recurre ad probationem suprapositam.

Secundum doctrinam Arist. acceptatur eadem propositio. Nam in octauo Metaphys. tex. 15. & 16. Quærens Aristotelis quid faciat diffinitionem esse quid vnum, id est significatum diffinitionis quæ est essentia rei, vt propter quid natura hominis est quid vnum, & natura equi, & natura intelligentiæ, & determinans dicit in rebus compositis in quibus, est generatio, ideo res est vna, quia vna pars est potentia, scilicet materia, & alia est actus. & ex potentia, & actu sine alio medio fit vnum, modo fit agens qui per generationem educat rem de potentia ad actum, vnde inquit. Quid igitur causa huius est. Scilicet quod est potentiū ens, actu fit propter faciens, in quibus est generatio, nulla nanque est causa altera. In rebus autem non habentibus materiam neque sensibilem, vt naturalia, neque intelligibilem vt mathematica statim, id est non per generationem, nec per educationem de potentia ad actum, nec receptionem formæ in materia, se secundum se sunt vnum sicut, & ens, vnde inquit quapropter nulla est alia causa, scilicet intrinseca, nec extrinseca, faciens autem generans, vnum essendi in his neque essendi ens aliquid, statim enim, id est sine transitu ab imperfecto ad perfectum vnumquodque est ens aliquid, & vnū aliquid.

Tu tamen aduerte quod licet Arist. neget in his substantijs simplicibus generans, & educationem, de potentia ad actum, non tamen negaret quid recipiant esse statim perfectū per simplicem actionem primæ causæ, à qua vt diximus supra in propositione decimaoctaua ad mentem Arist. omnia pendunt effectiue, & id consonat dicto Comment. in duodecimo Metaphys. comment. 44. qui arguens quosdam ponētes agens in abstractis inquit, mos vero qui iam est inter modernos in dicēdo quod à tali motore prouenit talis motor, aut consequitur, aut præcedit, aut talia verba, non vere intelliguntur de istis principijs abstractis, omnia enim ista sunt

sunt dispositiones agentium superficieremus non vere. Ab agente .n. nihil prouenit, vt diximus nisi extrahere illud qd' est in potentia ad actum, sed illic non est potentia .i. esse potentiale, vnde nec agens, quod .f. agit actione quæ est motus, tantum .n. est illic intellectus, & intellectum, & perfectum, & perficiens &c. Perficiens autem est prima causa, perfectum vero est substantia simplex, facta in esse perfecto à prima causa non mutatione, sed sua scientia, & voluntate, & simplici effluxu.

Secundum doctrinam Theologi, acceptatur eadem propositio. Nam cum omne generatum generetur ex materia in qua habet esse in potentia, & substantiæ subsistentes secundum seipsas sint simplices ex consequenti immateriales, sequitur qd non generentur ab aliquo generante proprie dicto. Omnis .n. motus, & mutatio physica supponunt materiam, & generans generat supposita materia, cuius actione quod erat in esse potenciali reducitur ad esse actuale, verum non sunt entia nisi quod per participationem accipiunt esse perfectum, nullo supposito à primo ente perficiente. Hæc de propositione vigesimaquinta dicta sint.

PROPOSITIO XXVI.

Omnis substantia stans per seipsam non cadit sub corruptione &c.

QVia in propositione præcedenti probauit omnem substantiam subsistentem secundum seipsam non generari ab aliquo generante proprie dicto ex consequenti in generabilem esse generatione physica, in hac propositione ostendit eandem esse incorruptibilem corruptione proprie dicta, vt excludam annihilationem, & antequam ad probationem deueniam, aduerte, qd ly per seipsam dupliciter potest exponi.

Primo, vt per ly per seipsam excludatur, omnis alia causa, tam extrinseca, quam intrinseca, & vt sic non verificatur nisi de prima causa quæ à se, & ex se subsistit, vt primum ens penitus independens.

Secundo,

Secundo, vt per ly per seipsam excludatur causa intrinseca formalis. nam composita non subsistunt nisi quia forma per quam sunt actu, est in materia, & tandiu subsistunt, quam diu stat vnio formæ, & materiæ, & causa corruptionis est separatio formæ à materia, & propterea non possunt composita dici subsistere per seipsam. i. secundum totam essentiam, sed per partem. i. per formam vnitam materiæ, substantiæ autem incompositæ & immateriales, quoniam sunt formæ, & actus, dicuntur stare per seipsas. i. suas simplices essentias ex consequenti si cadunt in corruptione non cadunt per separationem partis à parte, sed per separationem eiusdem simplicis essentiæ à seipsa.

Facta hac declaratione, aduerte probationem Auctoris consistere in hoc. Omne quod corrumpitur non corrumpitur nisi quia separatur à causa per quam est actu, vt homo corrumpitur quia separatur ab anima, & sic quodcunque aliud corrumpitur, sed substantia stans per seipsam non potest separari à causa per quam est actu. nam est actu per suam simplicem essentiam, & non per formam in materia, & non potest separari à sua essentia, aliter idem separatur à seipso, & præterea cum essentia sua sit causa subsistendi in hac simplici substantia, quoniam sua essentia est ens, & vnum ex propositione præcedenti, hæc simplex substantia comparatur ad essentiam suam sicut causatum ad causam. Tunc sic.

Quando causa & causatum sunt vnum, impossibile est causatum separari à causa, ut patet, sed substantia simplex est sua essentia, & subsistit per suam essentiam, & vt sic in idem coincidunt causa & causatum, ergo impossibile est eam separari ab essentia, & cum per essentiam suam sit actu, semper erit actu, ergo non cadit sub corruptione.

Tu tamen aduerte, qd vt dicit Auctor substantia stans per seipsam non est causa sui ipsius existendi actu nisi per respectum ad causam primam, à qua producta est secundum esse perfectum, vt diximus in propositione præcedenti, ex quo sequitur, qd licet respectu causæ formalis intrinsece non possit deficere, tamen respectu causæ primæ defectibilis est, existit enim conseruatione primæ causæ qua sub tracta tenderet in non ens.

Secundum doctrinam Procli, acceptatur eadem propositio. nam in lib. suo, talem propositionem format. Omne per se subsistens est incorruptibile. Et intendit per ly per se scilicet ipsum, & scilicet totam suam essentiam ad differentiam compositorum quæ subsistunt ratione partis .i. quia habent formam in materia. Et sic apud Proclum sicut etiam apud Auctorem, ly per se subsistens non verificatur nisi de substantia simplici ut est intelligentia, & anima intellectiva, & hanc quidem propositionem probat Proclus eodem modo quo probavit Auctor, quare sufficit probatio Auctoris.

Secundum doctrinam Arist. acceptatur eadem propositio. Nam in lib. de longitudine, & breuitate vitæ, assignans causas corruptionis in compositis, & in simplicibus, dicit de compositis illa esse corruptibilia, quæ componuntur ex partibus corruptibilibus, ut elementata quæ constant ex elementis corruptibilibus. Quapropter si partes alicuius compositi sunt incorruptibiles, & ipsum erit incorruptibile sicut corpus cæleste, cuius forma non inest materiæ cum qualitatibus contrariis, nec materia subest priuationi. Cum autem substantiæ simplices careant materia, & non insint eis qualitates actiue, & passiue, constat, quod non possunt corrumpi, ut corrumpuntur composita, loquens autem de corruptione simplicium, quales sunt formæ accidentales, & substantiales, dicit quod dupliciter possunt corrumpi. scilicet per se, & per accidens, per se quidem corrumpuntur à suo contrario, ut siccitas corrumpitur ab humiditate, & scientia ab ignorantia prauæ dispositionis, per accidens autem corrumpuntur ad corruptionem sui subiecti cui innituntur, & à quo conseruantur, ut corrupta à qua corrumpuntur qualitates eius, & corrumpuntur forma eius, sustentabatur enim in materia per qualitates eius, sed neutro modo substantiæ simplices possunt corrumpi, non quidem per se, quoniam substantiæ nihil est contrarium, nisi ratione qualitatū contrariarum quæ non insunt substantiis simplicibus, cum sint extra naturam elementorum, nec per accidens, quoniam cum sint immateriales non sunt formæ innitentes materiæ, ergo omni modo corruptionis sunt incorruptibiles, & propterea dixit Arist. in j. cæli tex. 100. de huiusmodi substantiis quod sunt
 entia

entia in alterabilia, & impassibilia optimam habentia vitā, & per se sufficientissimam perficiunt toto æterno. i. non temporalem, sed æternam. Et in lib. 9. Metaph. tex. 19. dicitur quod in eis non est malum, neque peccatum. i. defectus naturalis, neque corruptio, etenim corruptio est malorum.

Secundum doctrinam Theologi, acceptatur eadem propositio. Nam Dionysius sic loquitur de intelligentiis in cap. de Div. nom. Propter istos. scilicet diuinæ bonitatis radios, sunt, viuunt, & vitam habent indeficientem, & immunem, à corruptione vniuersa. Morte, materia, & generatione, mundæ existentes. De animabus autem intellectiuis in eodem cap. sic dicit, post illas claras, & admirabiles, mentes animæ, & quæcunque sunt bona animarum, sunt propter bonitatem supremæ bonam, quod scilicet intellectuales sunt, quod habent substantialem vitam inconsumptibilem. i. immortalem, & ratio quidem Theologi qua probatur & intelligentiæ, & animæ incorruptibilitas est eadem cum ea quæ adducta est secundum Auctorem, & breuiter reassumpta stat in hoc. Cum intelligentia & anima ex propositione decimaquinta subsistant sibi seipsas, & non ratione partis, ut composita, necesse est, quod sint simplices essentia suæ formæ. Igitur si corrumpuntur quod corrumpantur per se, quoniam nulli alteri innituntur, quæcunque autem subsistentia per se corrumpuntur, ideo corrumpuntur, quia aliquid ab altero separatur, puta forma à materia. Hoc autem non potest esse in simplici forma subsistente, ut patet, ergo necesse esset, vel formam separari à seipsa quod est in imaginabile, vel esse separari à forma, quod est impossibile, quoniam est proprietas formæ, forma enim dat esse, proprietas autem est separabilis ab eo cuius est, quare sicut habere tres est inseparabile à triangulo, sic esse est inseparabile à forma subsistente. Hæc de propositione vigesima sexta dicta sunt.

PROPOSITIO XXVII.

Omnis substantia destructibilis, aut est composita, aut est delata super rem aliam &c.

k ij In

IN hac propositione intendit ostendere causas, & conditiones propter quas substantiæ aliquæ sunt corruptibiles, & dicit, id prouenire ex altera duarum causarum. Prima, est compositio. Secunda, est delatio, vel sustentatio super rem alteram, ex prima causa corrumpuntur, tam elementa, quàm elementata, est secunda corrumpuntur formæ accidentales quæ innituntur subiecto, & formæ substantiales quæ innituntur materiæ subiectæ priuationi, & propositum suum sic probat. Omnis substantia corruptibilis indiget aliquo quo stante habet esse, & quo remoto desinit esse. Illud autem non potest esse, nisi aut partes componentes, quibus stantibus unitis, stat compositum, & quibus separatis abinuicem destruitur compositum, ut patet de corpore elementato, & de artificiatis quæ resoluntur in ea ex quibus constant, aut est subiectum deferens, & sustentans rem, quando enim subiectum est debite dispositum conseruatur res innixa subiecto, siue sit forma accidentalis, siue substantialis. Nam agens destruens aquam destruit accidentia aquæ, quæ innituntur aquæ, & destruit formam aquæ, quæ sustentatur in materia. Et quoniam omnes formæ naturales rerum inferiorum præter animam intellectiuam innituntur materiæ, ideo sunt corruptibiles, & transmutatione materiæ ad aliam formam. Patet igitur, quod omnis substantia corruptibilis, ideo corrumpitur quia est composita ex partibus separabilibus abinuicem, aut quia sustentatur in esse per aliquod subiectum differens. Ex quibus corollarie sequitur, quod si aliquod compositum constat ex partibus inseparabilibus abinuicem, ut corpus cœleste, illud est incorruptibile, non quia compositum, sed quia tali modo compositionis est compositum. Item si aliqua forma sit non innitens materiæ, quia non educta de potentia eius, sed est per se subsistens, talis non est delata super materiam, & licet informet materiam, tamen non corrumpitur propter separationem à materia, ut est anima intellectiua, de cuius incorruptibilitate satis pertractauimus in prima parte D. Th. in q. 75. super quintum articulum.

Secundùm doctrinam Procli, acceptatur eadem propositio, quam & ipse sententialiter ponit in libro suo, & probatio

tio sua est conformis penitus probationi Auctoris, & præterea cum omnis corruptio fiat per separationem alicuius ab aliquo, necesse est, q̃ hæc separatio fiat, aut ratione partium componentium, aut subtractione subiecti deferentis: ergo omnis substantia corruptibilis, aut est composita, aut delata super aliam rem.

Secundum Arist. acceptatur eadem propositio. nam secundum in 12. Metaph. tex. 29. materia est causa non effendi, & corruptionis. Vnde probans intelligentias esse immateriales dicit, sempiternas enim oportet esse, q. d. si habent materiam possunt non esse, ergo non erunt sempiternæ. Omne igitur corruptibile habet materiam ex qua, vel in qua, si ex qua. ergo est compositum, si in qua ergo sustentatur per materiam ut formæ accidentales, & substantiales, sustentari autem idem est quod differri. Ergo secundum Arist. omnis substantia corruptibilis, vel est composita, vel delata super aliam rem.

Tu tamen aduerte, q̃ licet materia secundum Arist. sit principium non effendi, tamen ad hoc quod sit principium non effendi secundum substantiam, necesse est ut recipiat formam cum qualitatibus contrariis, & quoniam id non contingit in cælo, ideo in primo cæli probavit cælum esse inalterabile, ingenerabile, incorruptibile, & tamen in cælo posuit materiam. Quoniam in omni mutatione physica, etiam secundum locum supponitur materia, ex 12. Metaph. tex. 6. Cum igitur cælum mutetur secundum locum, patet quod in eo est materia, verum quia est alterius rationis à materia inferiori, non est principium non effendi in cælo secundum substantiam, sed secundum diuersa vbi. Item aduerte ex doctrina quam dedit in 2. lib. de anima, tex. 21. videtur anima ut intellectiua esse alterum genus animæ ex consequenti non inniti materię sicut vegetatiua, & sensitiua, aliæ formæ materiales, & sic esse separabilem à corpore, ut perpetuum à corruptibili, cuius signum sumitur quia habet operationem in qua non communicat corpus, ut organum, ex quo sequitur quod sicut in operando non innitur corpori, sic, nec in essendo. vnde inter omnes formas inferiores erit per se subsistens, & incorruptibilis. Ex doctrina igitur Arist. habemus,

mus, quòd omne corruptibile habet materiam ex qua, non simpliciter, sed subiectam priuationi, ut ex hoc excipiat corpus cœli, vel materia in qua non simpliciter, sed vt defecentem, vel sustentantem, vt ex hoc excipiat anima intellectiua.

Secundùm doctrinam Theologi, acceptatur eadem propositio. Nam cum generatio & corruptio sint oppositæ, habent fieri circa idem. ergo omne corruptibile est generabile, sed generabile non est nisi compositum, & quod educitur de potentia subiecti, vel potentia materiæ, & omne tale inicitur subiecto, vel materiæ, ex consequenti est sustentatum super rem aliam, ergo corruptibile non est nisi compositum, & quod de potentia subiecti, vel materiæ eductum est. Minor sic probatur, omne quod generatur, aut generatur per se, aut per aliud .i. ad generationem alterius. Si per se, ergo est compositum. In omni enim generatione per se subiicitur materia, ex qua per receptionem formæ constituitur compositum, & in hoc distinguitur generatio à creatione in qua nihil supponitur, si per accidens. ergo est eductum de potentia subiecti, vt dum sit aqua, generatur frigiditas, vel de potentia materiæ, vt dum agens disponit materiam educit formam aquæ de potentia materiæ. ergo omne genitum per accidens est delatum super subiectum, vel super materiam, ex consequenti cum omne corruptibile sit generabile, & eo modo corruptibile, quomodo est generabile, sequitur omne corruptibile esse compositum, vel delatum. i. sustentatum super rem aliam, qua stante stat, & qua remota remouetur nisi corrumpatur à suo contrario. stat enim frigiditatem aquæ corrumpi à calore, & tamen aquam non corrumpi, ut diximus supra etiam ad mentem Arist. Hæc de propositione decimaseptima dicta sint.

PROPOSITIO XXVIII.

Omnis substantia stans per seipsam est simplex, & non diuiditur &c.

QVIA in propositione vigesima sexta manifestauit substantiam

stantiam existentem per seipsam esse incorruptibilem, hic declaratur quomodo se habeat quo ad diuisionem, & compositionem, & intendit duas conclusiones: quarum prima est, substantia stans per seipsam non diuiditur .i. est impartibilis, & indiuisibilis. Secunda est, substantia stans per seipsam est simplex .i. non composita ex multis, sed antequam descendam ad probationes, aduerte duo: primo, quod simplex & impartibile licet sunt idem re, tamen ratione differunt, quoniam impartibile formaliter excludit diuisionem, simplex autem formaliter excludit compositionem. Re tamen sunt vnum, quoniam omne partibile quoddam totum est, & vt sic compositum est, ergo impartibile incompositum est, & omne compositum partibile est, & vt sic diuisibile, ergo omne simplex indiuisibile est. Aduerte secundo, vt etiam diximus in propositione vigesima sexta non est idem, substantiam stare, siue existerre, siue subsistere p se, & subsistere per seipsam, vel per essentiam suam. nam existerre per se verificatur de omni quod subsistit siue ratione partis, vt composita materialia quæ subsistunt ratione formæ vnitæ materiæ, siue ratione totius essentia, vt intelligentia, quæ se totis subsistunt cum sint formæ complete non vnibiles materiæ. Existerre autem per seipsam, vel per essentiam suam non verificetur nisi de substantia, quæ se tota, siue ex se subsistit, vt per ly ex se excludatur causa formalis intrinseca, ad differentiam compositorum materialium, non autem excludatur causa prima agens aqua pendet, vt diximus in propositione vigesima nona.

His præpositis, aduerte probationē Auctoris pro prima conclusione consistere in hoc, si substantia stans per seipsam est diuisibilis in partes, ergo omnis pars est stans per seipsam quod est falsum, consequentia sic probatur, quod conuenit alicui secundum seipsum .i. secundum totum cuilibet parti eius conuenit si est diuisibile, vt si sol secundum se totum est lucidus secundum omnem partem est lucidus, & si mobile secundum totum mouetur secundum omnem partem mouetur, ergo si substantia stans per seipsam .i. secundum se totam diuisibilis est, omnis pars stabit per seipsam, falsitas autem consequentis sic manifestatur, si omnis pars stat per seipsam, ergo nulla innitetur alteri, repugnat enim aliquid per se stare,

& inniti alteri, si nulla innitur alteri, ergo non constituent compositum, ergo aliquid habebit partes, & non erit compositum, quod est impossibile.

Secundam conclusionem sic probat Auctor, si substantia stans per seipsam non est simplex, sed composita, ergo quælibet pars stabit ex alia, quoniam cum stet secundum se totam, quælibet pars pendet ex alia, sed hoc est falsum, quoniam cum in quolibet composito sit ordo partium, in eo est assignare partem meliorem, & viliolem, ut in composito essentiali forma est melior materia, in composito elementato elementum prædominans, ut sic melius est. In composito quantitativo pars prior uidetur nobilior, si ergo substantia stans secundum se tota est composita, & quælibet pars pendet ex alia, sequitur meliorem pendere à viliori, & viliolem à meliori. Quapropter infert Auctor substantiam stantem per seipsam esse incompositam, quoniam per seipsam sibi sufficit, ex consequenti non indiget partibus, à quibus recipiat sufficientiam, sicut composita accipiunt sufficientiam, sicut & esse à partibus. Integratur enim totum ex partibus. Et quoniam est simplex & impartibilis, ideo est incorruptibilis, ut probatum est in propositione vigesima-septima.

Secundum doctrinam Procli, acceptatur eadem propositio. nam in libro suo, talem propositionem format. Omne per se stans .i. secundum seipsum, impartibile est & simplex, probat autem sic, si omne stans secundum seipsum est partibile, cum stet secundum se totum, & non ratione partis, ut declaratum est, ergo stat secundum quamlibet partem, ergo quælibet pars fundatur in alia, unumquodque enim fundatur in eo per quod stat, si ergo stat secundum quamlibet partem, quælibet fundatur in alia. Nam sic stans ratione partis, ideo stat quia una pars fundatur in alia, puta forma in materia, sic stans secundum se totum, ideo stat si est partibile, quia quælibet fundatur in qualibet, hoc autem est impossibile, quoniam fundans & fundatum se habent, ut causa & effectus, quæ cum sint opposita non possunt conuenire eidem secundum idem, non ergo stans per seipsum est partibile, si impartibile ergo est simplex. Nam idem re sunt, ut
dixi

diximus supra licet differant ratione .

Secundum doctrinam Arist. acceptatur eadem propositio , & sufficienter probata est supra in propositione septima, quo ad intelligentias de mente eius . Nam hæc propositio , omnis substantia stans per seipsam &c. vt diximus in propositione vigesima quinta, non verificatur nisi de intelligentia, & anima intellectiua, & quidem quo ad intelligentias quod sint indiuisibiles, & simplices, vide probationes factas in propositione septima . Quod autem idem verificetur de anima intellectiua, ut intellectiua est probatur ex eo quod dixit in tertio de anima, tex. 4. vbi inquit . Necessè est itaque, quoniam omnia intelligit immixtum esse .i. non habere aliquam naturam corpoream, nec materialem, ex cōsequenti esse sine organo, quoniam si aliquod organum haberet sicut sensitiuum, iam non cognosceret omnia, sed suū obiectum esset determinati generis , sicut auditus circa sonum, & visus circa visibile &c. Et in tex. 12. inquit . Dubitabit autem utique aliquis si intellectus simplex est, & impassibilis , & nihil nulli habet commune &c. Vbi supponens intellectiuum principium esse simplex & impassibile , & in organicum quærit quomodo potest intelligere cum intelligere sit quoddam pati . Ex quibus dictis constat Arist. cognouisse animam intellectiuam, vt intellectiuam, esse eleuatam super omnem naturam corpoream & materialem, ex consequenti esse simplicis & inextense, & indiuisibilis substantiæ sicut intelligentiæ, in hoc tamen differens ab eis qd̄ est actuatiua materiæ, non tamen pendens ab ea . Et id cognouit Arist. ex operatione intellectiua , quæ non expletur per aliquod organum , & suum obiectum non est tantum vnius generis, sed ens in quantum ens .

Secundum doctrinam Theologi, acceptatur eadem propositio, & quidem quod verificetur de intelligentia, iam probatum est in propositione septima, vbi & adduximus dictū Dionysij . Quod autem verificetur de anima intellectiua probatur, quoniam secundum Theologum est tota in toto , & tota in qualibet parte corporis , non quidem quo ad totalitatem potentiarum, aliter omnes potentiæ animæ essent in pede, & in manu &c. Sed quo ad totalitatem essentiæ .

ergo

ergo essentia eius est omnino inextensa, & per se, & per accidens ex consequenti est omnino indiuisibilis, & incompressa, & signum omnimode in extensionis manifestatur per actum intelligendi, propria enim operatio formæ extensæ est circa singularia tantum, operatio autem animæ intellectiue est circa vniuersale, & intellectus recipit speciem vniuersalem in repræsentando, ergo constat animam intellectiuam secundum essentiam suam esse eleuatam super materiam, & non extendi in corpore extenso, sicut extenduntur per accides formæ substantiales materiales, & accidentales quæ recipiuntur in quanto. Extenditur enim albedo ad extensionem superficiæ, ex consequenti anima intellectiua est impartibilis, & simplex, & per se, & per accidens. Hæc de propositione vigesima octaua dicta sint.

PROPOSITIO XXIX.

Omnis substantia simplex est stans per seipsam, scilicet per essentiam suam &c.

Pro euidencia huius propositionis, aduerte duo. Primo, quod cum propositio præcedens sit vniuersalis affirmativa. & hæc sit vniuersalis affirmativa. non videtur hæc conuersio valere, quoniam vniuersalis affirmativa. non conuertitur nisi in particularem affirmativam. ut hic, omnis homo est animal, ergo quoddam animal est homo. nam si dicatur, ergo omne animal est homo, patet consequentiam esse falsam, sic in proposito, licet hæc sit vera omnis substantia stans per seipsam est simplex, tamen hæc videtur falsa, omnis substantia simplex stat per seipsam, quoniam aliquæ substantiæ simplices, ut formæ naturales, & omnes animæ præter intellectiuam non stans .i. non subsistunt per seipsas, nec per alterum. Ad hoc igitur dicendum est, quod intentio Auctoris non fuit loqui de omnibus substantijs simplicibus, sed de his quæ subsistunt, veluti, si diceret, omnis substantia simplex stans, stat per seipsam, & est verum ad differentiam substantiæ compositæ stantis, quæ non stat per seipsam, sed ratione partis, ut diximus in propositione vigesima octaua. Et sic patet quod instantia adducta

ducta de formis naturalibus non valet, quia non stant, ex cō
sequenti non stant per seipsas, nec per alterum. Aduerte
secundo, q̄ licet Auctor hanc conuersionem faciat, & conuer
sam probauerit quæ fuit propositio præcedens, tamen con
uertentem non probat quæ est præsens propositio, & existi
mo, id fecisse, quoniam in omni bona conuersione, ab vna
ad reliquam est manifesta cōsequentia, bene enim sequitur
quòd si nullus homo est lapis, nullus lapis est homo. Et in
terminis conuertibilibus, patet vniuersalem affirma. conuer
ti in vniuersalem affirma. vt si omnis homo est risibilis, om
ne risibile est homo, & quoniam ista duo sunt conuertibilia,
substantia stans per seipsam, & substantia simplex stans ideo
bene sequitur, q̄ si hæc est vera, omnis substantia stans per se
ipsam est substantia simplex stans, etiam hæc est vera, omnis
substantia simplex stans, est stans per seipsam, hanc puto
esse rationem quare Auctor non probatur eam, verum quia
in commento ponitur alia propositio, quæ talis est, substan
tia stans per seipsam est causata sine tempore, & est in substā
tialitate sua superior substantijs temporalibus. Cui concor
dat Proclus formans talem propositionem, omne stans per
seipsum est exemplum ab his quæ tempore mesurantur se
cundum suam substantiam, & hæc propositio probatur in cō
mento, & ex ea possumus elicere probationem propositio
nis posite ab Auctore, ideo primo formo probationem pro
positionis posite in commento, deinde elicio probationem
positæ propositionis ab Auctore, probatio stat in hoc, nulla
substantia stans per seipsam est generata, vt probatum est in
propositione vigesimaquinta omnis substantia causata in tē
pore, & mesurata tempore est generata. Ex hoc enim men
suratur tempore, quia esse eius variatur per generationem,
& corruptionem, vnde quia cælum, secundum substan
tiam suam est incorruptibile, quo ad substantiam non men
suratur tempore, sed pro quanto est sub motu. Ergo nulla
substantia stans per seipsam est causata in tempore, ira scili
cet quòd ipsa secundum substantiam mensuretur tempore,
sed est eleuata super omnia temporalia, ex hac probatio
ne potest sic elici probatio propositionis posite ab Aucto
re, omnis substantia simplex stans, est non generata,
nec

nec mensurata tempore, ergo est incomposita, nam omne genitum, & mensuratum tempore est compositum. Genitum enim constat ex materia & forma, & mensuratum tempore est mobile, & omne mobile est diuisibile, ergo compositum. Tunc ultra si stat, & est incomposita, vt dictum est, ergo stat per seipsam, quoniam cum careat partibus non potest dici quòd sit ratione partis, hoc enim est proprium compositorum, vt dictum est in propositione vigesima-octaua.

Eadem propositio quoniam conuertens est præcedentis, & præcedens acceptatur à Proclo, & ab Arist. & à Theologo, vt probatum est, ex consequenti & hæc acceptatur, nec indiget alia probatione, nisi vt probauimus, quoniam illa probatio procedit ex fundamento in quo conueniunt & philosophus, & Theologus. Propositio autem posita in commento, scilicet substantia stans per seipsam causata est sine tempore, ita quod non mensuratur tempore quo ad esse suum ultra hoc quod acceptatur à Proclo, vt visum est, acceptatur etiam ab Arist. Nam cum sit immaterialis, vt dictum est supra, & incorruptibilis. Incorruptibilia autem sunt semper, & quæ semper sunt non continentur sub tempore, nec mensurantur, quoniam dicit Arist. in 4. Phys. tex. 117. est accipere maius tempus omni contento sub tempore, quare manifestum est, quoniam quæ semper sunt, secundum quod semper sunt, non sunt in tempore, neque enim continentur tempore, neque mensuratur esse eorum sub tempore, signum autem quoniam nihil patiuntur à tempore, tanquam non entia in tempore hæc illæ. Et in primo cæli, tex. 100. inquit propter quod quidem, neque in loco quæ ibi apta nata sunt. s. extra cælum, neque tempus ipsa facit senescere. patet igitur qd substantia stans per seipsam est superior omni tempore nec eius productio, cum non sit vera generatio, mensurantur tempore.

Eadem propositio acceptatur à Theologo. Nam Dion. de Di. nom. cap. 10. assignans differentiam inter eum, & tempus dicit. Eum appellat. s. sacra scriptura, secundum quod & proprietas eui est, antiquum & inuariabile atque secundum totum ipsum quod dicitur esse metiri, tempus autem scriptu

Scriptura in generatione & corruptione ponit aliasq. se aliter habens. i. sacra scriptura appellat eum illud, quod est mē-
sura esse antiqui .i. non incipientis de nouo, & inuariabilis,
& mensuratur ab euo secundum totum, & non per partem
post partem. Tempus autem ponitur mensura eorum quæ
generantur, & corrumpuntur, & aliter se habent, vnde inquit
illic Dionysius, quod pro hac vita mensuramur tempore,
post hanc vitam autem erimus participes eui, quoniam facti
erimus incorruptibiles &c. Ex his ergo habemus duo, pri-
mo, quod substantia mensurata tempore habet principium,
& finem in tempore, secundo quod esse mensuratum tem-
pore est variabile per generationem & corruptionem. Cum
igitur substantia stans per seipsam sit incorruptibilis, ut pro-
batum est in propositione vigesima sexta, sequitur quod non
habet principium & finem in tempore, nec eius esse est trans-
mutabile. Ex consequenti non mensuratur, nec continetur
sub tempore, sed est altior omni re temporali. Hæc de pro-
positione vigesima nona dicta sint.

P R O P O S I T I O X X X.

Omnis substantia creata in tempore, aut est sem-
per in tempore, & tempus non superfluit ab ea, quo-
niam est creata & tempus æqualiter, aut superfluit su-
per tempus, & tempus superfluit ab ea, quoniam est
creata in horis temporis quibusdam &c.

IN hac propositione intendit declarare, q̃ conuenien-
ter in vniuerso create sunt duæ naturæ temporales, qua-
rum vna adæquatur tempori, ita quod non fuit, nec erit
aliqua pars temporis in quo illa non sit, ita quod si tempus
est æternum adæquatur tempori æterno, & si tempus est fini-
tum ante, & post adæquatur toti tempori finito, ea ratione
qua est temporalis, & hæc est natura corporis cœlestis. Dixi
notanter ea ratione qua est temporalis, quoniam cœlum se-
cundum substantiam, cum sit incorruptibile, & esse inuariabi-
le,

le, non continetur, nec mensuratur tempore, vt dictum est in propositione præcedenti. Cælum autem vt motum mensuratur tempore, quoniam tempus est mensura motus, & prout est sub motu dicitur substantia temporalis quàm Auctor dicit creatam in tempore inquantum, scilicet est sub motu, & non quo ad esse. Cælum igitur vt motum, est natura temporalis adæquata tempori, quoniam tempus non fuit quin fuerit motus cæli, nec erit quin tunc sit motus cæli. Nā sic se habent quod posito vno ponitur reliquum, & remoto vno remouetur reliquum, vt magis declarabitur secundum doctrinam Arist. Alia natura temporalis est in adæquata tēpori, ita quod est dare tempus in quo illa non est, nec mouetur, vt natura omnium sub cælo quæ dicuntur generabilia, & corruptibilia quæ aliquo tempore sunt & mouentur, & aliquo tempore non sunt nec mouentur. Hanc igitur conclusionem probabimus ad mentem Auctoris, deinde ponitur corollarium ad mentem eiusdem. Probatio conclusionis stat in hoc. Cum substantiæ incorporeæ æternæ, & substantiæ generabiles sint penitus dissimiles, quoniam illæ sunt semper, & sunt immobiles, istæ autem non semper sunt, & sunt mobiles, non se consequuntur immediate, sed per aliquod mediū, quod de vtroque extremo participat. Nam hunc videmus ordinem in rebus, quod similia seinuicem immediate consequuntur, dissimilia aut quodam medio, vnde in elementis, quoniam aqua est dissimilis igni in vtraque qualitate, non sequitur ad ignem immediate, sed mediat aer qui participat qualitates vtriusque. nam est calidus, & vt sic assimilatur igni, & est humidus, & vt sic assimilatur aquæ, vt igitur hic ordo seruetur in substantijs creatis conueniens est, vt inter substantias æternas immobiles, & substantias temporales non æternas, & mobiles mediet substantia æterna tēporalis mobilis. Nam inquantum habet esse æternū, id est inuariabile, assimilatur substantijs æternis immobilibus, & dissimilatur substantijs tēporalibus non æternis, & inquantum est sub motu assimilatur his substantijs non æternis mobilibus, & quia est sub motu dicitur tēporalis, ratione autem esse immutabilis dicitur æterna, & hæc est natura cæli, vt diximus, conuenienter, ergo datur natura causata in tēpe adæquata tempori, & natura cau-

sata

fata in tempore inadæquata tempori, sed p̄ima est sub tempore non ratione esse, sed ratione motus, secunda autem est ratione vtriusque, & ideo dicitur simpliciter temporalis.

Corollarium positum ad mentem Auctoris . Incipit ibi iam ergo ostensum est ex hoc &c. Et intendit, q̄ cum duæ sint naturæ æternæ vna simpliciter æterna, & nullo modo tēporalis, vt substantia abstracta, alia æterna, & temporalis ratione motus vt substantia cœli, duæ sunt perpetuæ durabilitates . Nam & substantia abstracta, & substantia cœli, cum sint creatæ incorruptibiles in æternum stant, & tamen inter eas assignatur triplex differentia, prima est q̄ substantia abstracta est natura fixa stans immobilis moto Phys. Cū enim sit simplex, & indiuisibilis ex propositione vigesima octaua est immobilis physicæ . Omne enim mobile est diuisibile, vt probat Arist. in 6. Phys. tex. 39. Substantia autem cœli mouetur, vt patet, & vt sic instabilis est, secunda est quod substantia, abstracta est tota simul non habens prius & posterius, substantia autem cœli nō ratione esse, sed ratione motus habet quandam successionem, quoniam in motu vna pars succedit alteri, sicut & in tempore, tertia est quod perpetuitas substantiæ abstractæ est per essentiā suam, id est per seipsam, & nullo modo ratione partium, cum sit simplex immobilis, perpetuitas autem cœli ratione esse, & ratione motus sit existens per partes . nam & compositum & mobile est, sed inquantum compositum, existit ratione partium permanentium, inquantum autem est mobile & mouetur, existit ratione partium sibi succedentium, quarum vna est prior, altera posterior . Manifestum est igitur quod duæ sunt perpetuæ durabilitates create, & quomodo adinuicem differunt.

Eadem propositio acceptatur à Proclo . nam talem propositionem format. Omne quod secundum tempus existit, aut eo quod semper in tempore est, aut aliquando in parte temporis, hypostasim habens, id est omne temporale, aut est in omni tempore, vt cœlum, aut pro aliqua parte temporis, vt inferiora generabiliora, & quod hæc diuisio sit sufficiens sic inuestigat Proclus. Inter hæc duo extrema ens semper & immobile, ens non semper & mobile, possumus imaginari tria media .

Primum sit, ens semper, & mobile semper.

Secundum sit, ens non semper, sed mobile semper.

Tertium sit, ens semper, & mobile, sed non mobile semper, sed tantum primum est dabile. nam secundum implicat. cum .n. motus supponat subiectum. impossibile est qd sit mobile semper, & non sit ens semper, & militer, tertium non est dabile. nam si est ens semper & mobile, mobilitas sequitur naturam eius, ex consequenti semper conuenit ei. Restat igitur, qd inter ens semper & immobile, & inter ens non semper & mobile, mediat solum ens semper, & mobile semper, sed hoc dicitur semper in tempore esse, vt cœlum, ergo sunt tantum duæ naturæ temporales, quarum vna est pro omni tempore, & alia pro aliquo tempore.

Eandem propositionem acceptat Arist. Nam in 12. Met. tex. 5. dicit, Substantiæ vero tres. Vna quidem sensibilis, cuius alia quidem sempiterna, alia corruptibilis, alia vero immobilis &c. & de hac sensibili diuisa in sempiternam, & corruptibilem, reassumens in eodem libro tex. 29. dicit.

Quoniam autem tres erant substantiæ. Duæ quidem quæ physicæ, & vna quæ immobilis &c. ergo sensibilis sempiterna, vt cœlum est substantia physica, ergo mobilis, quia natura est principium motus, ergo temporalis vt mobilis. nam cum tempus sit numerus motus, omnis natura vt mobilis cadit sub tempore, corruptibilem autem esse temporalem clarum est, ergo concordat Arist. cum Auctore duas .s. esse naturas temporales, vnā adæquatam tempori, aliam inadæquatam.

Et aduerte, qd ratio adducta ad mentem Auctoris .s. qd omnino dissimilia non se consequuntur, nisi cum aliquo medio habente similitudinem cum vtroque extremo, tangitur ab Arist. in alio proposito. nam in 8. libro Phys. tex. 37. comparans mouens non motum ad motum non mouens, puta animam mouentem ad lapidem motum, aduertens omnimodam dissimilitudinem inter ea, quia anima mouet & non mouetur, lapis mouetur & non mouet, ponit medium communicans cum vtroque .s. mouens & motum, puta manum quæ mouet lapidem, & mouetur ab anima, & in quantum mouet simulatur animæ vt mouenti, & in quantum mo-

uetur

ueretur similatur lapidi vt moto. Pater igitur quòd rerum ordo exigit vt omnino dissimilia non immediate, sed cum aliquo medio se consequantur, & tu applica ad conclusionem positam ab Auctore.

Eadem propositio acceptatur à Theologo, sed alio quidam modo quàm à Philosophis, vnde aduerte, quòd quo ad substantiam concordat cum Philosophis, tenet enim substantiam cœli perpetuam, & inferiorum corruptibilem sicut & Philosophi, quo ad adæquationem, vel inadæquationem temporis ratione motus discordat à Philosophis. nam licet Theologus, & Philosophus teneant cœlum motum adæquari temporis, inferiora autè inadæquari, tamen in hoc discordant, quod Philosophus credens mundum æternum ante, & post tenet motum cœli adæquari toti temporis, quod secundum ipsum est infinitum. Theologus autem tenet ipsum adæquari toto temporis, quoniam tempus consequitur ipsum, non solum vt mensura mensuratum, sed vt accidens proprium subiectum, primum enim mensuratum à tempore est motus diurnus primi mobilis, & ipso mensuramus omnem motum. quoniam simplicissimus, & regulatissimus est, verum quia secundum Theologum totum tempus est finitum, quoniam non fuit ante, nec erit post motum cœli. Dicendum est quod cœlum ratione motus adæquatur toti temporis, quod tamen finitum est, inferiora autem secundum idem numero inadæquantur toti temporis infinito secundum Philosophum, & toti temporis finito secundum Theologum. Dixi autem secundum idem numero, quoniam nulla eadem pars elementi est perpetua, licet elementa per mutuam generationem remaneant perpetua, nec ali quod elementatum idem numero est perpetuum, licet successione generationis perpetuetur in specie. cœli autem & specie, & numero perpetui sunt. Dicta sint hæc quo ad propositionem trigessimam.

PROPOSITIO XXXI.

Inter rem cuius substantia, & actio sunt in momẽto æternitatis, & inter rem cuius substantia, & actio

sunt in momento temporis existens est medium, & est illud cuius substantia est ex momento æternitatis, & actio est ex momento temporis.

Sicut in propositione præcedenti, manifestauit duas esse naturas temporales. Vnam adæquatam tempori, vt cælum motum. Alteram inadæquatam, vt corruptibilia sic in hac propositione manifestat duas esse naturas æternas, siue perpetuas. Vna est omnino æterna, quoniam & substantia, & actio mensurantur æternitate, & hæc est intelligentia, quæ secundum Auctorem parificatur æternitati, ex secunda propositione. Altera est non omnino æterna, quoniam eius substantia mensuratur æternitate, & actio mensuratur tempore, & hæc est anima intellectiua, quam dixit Auctor in propositione secunda, esse constituta in horizonte æternitatis, quod quo modo intelligendum sit illic exposuimus.

Sed antequam probetur propositio declaranda sunt duo.

Primo, quid significat ly momentū æternitatis, & ly momentum temporis.

Secundo, verum hæc propositio possit ita verificari de cælo sicut de anima.

Quantum ad primum, aduerte, qd ly momentum videtur Auctor intelligere mensurationem. nam hanc propositionem traxit à Proclo, vt videbitur, & Proclus loquitur manifeste de mensuratione. intendit ergo Auctor sic dicere. Inter rem cuius substantia, & actio mensurantur æternitate, & rem cuius substantia, & actio mensurantur tempore, cadit res cuius substantia mensuratur æternitate, & actio mensuratur tempore.

Quantum ad secundum, aduerte, qd in propositione præcedenti, dixit cælum esse naturam temporalem, quoniam motus eius est in tempore. Hic autem dicit dari naturam mediam inter rem penitus æternalem, & rem penitus temporalem, cuius actio sit in tempore, & substantia in æternitate. cum igitur actio sit agentis, & motus sit rei mobilis est enim actus mobilis, & anima sit à qua est actio, verius intelligendam est de anima, quam de cælo: quoniam cælum ut

motum

motum magis habet rationem passi quam agentis, Posito igitur q̄ intelligatur de anima: sic probat eam Auctor ex fundamento posito in propositione præcedenti. Ordo rerum requirit q̄ dissimilia se consequantur cum quodam medio, vt declarauimus supra, sed res æternæ secundum substantiam & operationem, & res temporales secundum substantiam & operationem sunt penitus dissimiles. ergo inter eas debet mediari res, cuius substantia sit æterna, & actio temporalis, vel res cuius actio sit æterna, & substantia temporalis: sed hoc secundum est impossibile, quoniam actio supponit agens. ergo subtracto agente subtrahitur actio. ergo si agens non est æternum, actio non erit æterna. ergo datur primum, & hoc est anima intellectiua coniuncta corpori, cuius substantia quod sit æterna saltem à parte post, & eius actiones non absoluantur à tempore declarauimus in propositione ne secunda. Vide illic.

Eadem propositio acceptatur à Proc. nam talem propositionem format. Omnis eius quod omni quaque æternale est secundum substantiam & operationem, & eius quod substantiam habet in tempore medium est, quod hac quidem .s. substantia æternale est, hac autem .s. operatione tempore mensuratur, & eam probat conformiter Auctori, sicut, & propositionem præcedentem.

Eandem propositionem acceptat Arist. secundum saniores eius Expositores, qui ad mentem eius tenent animam immortalem, & pro hoc statu omnem operationem suam fieri in tempore, quod quomodo sit declarauimus in propositione secunda. Vide illic.

Eandem acceptat Theol. cuius mentem diffuse declarauimus in secunda propositione, vbi proposui, vtrum anima intellectiua non solum quo ad substantiam, sed etiam respectu alius cuius suæ operationis sit æterna, & id determinauimus in propositione tertia. Hæc de propositione trigesima prima dicta sint. nam totalis eius declaratio pender ex propositione secunda.

PROPOSITIO XXXII.

Omnis substantia cadens in quibusdā dispositioni-

pliciter temporalis est verax generatio modo exposito . ergo res media quæ partim est æterna , & partim temporalis est ens , & generatio simul , non tamen vno modo , sed duobus . nam quæ ratione est æterna est ens , & quæ ratione est temporalis est generatio , id est in transmutatione posita .

Probata conclusione Auctor infert corollarium ibi . Iam ergo manifestum ex eo quod & c. in quo reducit naturam simpliciter temporalem in causalitatem naturæ quo ad substantiam æternæ , & quo ad operationem temporalis , & hanc reducit in causalitatem primi & supremi , qui est Deus . & hunc ostendit omnino in causatum , sed causam omnium . Intendit ergo sic dicere . Cum optima rerum dispositio requirat quod inferiora causentur à superioribus , & superiora à supremo , & illic sit status , ita quod supremum est tantum causa , consequens est ut res quæ sunt generatio , modo supra exposito , dependeant à re quæ est ens & generatio , quæ est anima cæli secundum Auctorem , nam animæ cælestes per motum cæli causant hæc generabilia , & animæ istæ pendunt ab esse puro , id est à Deo qui est prima causa , à qua pendet duratio omnium rerum sempiternarum , & destructibilium . Cum enim in se contineat omnes gradus essendi eminenter , est causa omnium graduum , & modorum entium . Quod autem Deus sit independens , & ab eo pendeant omnia , sic manifestat . Deus est vnitas non acquisita , id est non acquirenda esse ab alio , & omnes alie vnitates , id est omnes alie subtilitate simplices sunt acquisite , id est acquirunt esse ab alio . ergo solus Deus est independens , & ab eo pendunt omnia . An recedens probatur sic . Cum Deus sit vnitas prima , est vnitas per essentiam . ergo si alie vnitates non essent acquisitæ , essent vnitates per essentiam . & sic non differunt à prima tantumquam per omnia exilientes similes primæ , & si prima esset acquisita , iam non esset prima , quoniam omne acquisitum participat participans autem supponit id quod participatur . verum prius . sic ergo Deus esset vnitas secunda sicut & reliquæ vnitates , & sic auferetur ordo in entibus . ordo enim requirit vnum primum à quo pendunt alia . Cum igitur hæc sint in convenientia manifestum est quod omnis vnitas , præter vnum verum primum est acquisita & causata , & ipsum vnum ve-

rum primum est causans alias vnitates, & faciens acquirere non acquisitum, id est faciens acquirere esse quod non habent ex se, & se, & sic Auctor sicut incepit librum suum à prima causa in propositione prima, sic in eadem terminat ipsum, qui est Deus gloriosus & sublimis.

Eandem propositionem acceptat Proclus. nam talem propositionem format. Omne quod hæc quidem æternale, id est ratione substantiæ, & hæc temporale, id est ratione actionis, est ens simul & generatio, & manifestat conformiter sicut Auctor. Item acceptat vltimum conclusum, talem enim propositionem format. Omnis Deus participat, excepto vno. Pro quo aduerte, quòd ad mentem Plato. sicut Deus dicitur primum ens, primum vnum, primum bonum, sic substantiæ abstractæ quas Plat. vocat formas abstractas propter propinquitatem, & similitudinem ad Deum dicuntur Dij, & vnitates secundæ, & quoniam omne post primum participat primo, & primum non habet prius quo participet, ideo dicit Proc. quod omnis Deus, id est omnis forma abstracta participat, quia communicantur eis perfectiones à primo, excepto vno, id est primo ente, & primo vno quo nõ datur prius. Vnde omnia entia se habent ad Deum, sicut omnes numeri ad vnitatem. nam omnes participant vnitati vt posteriores. vnitas autem non participat numeris, quoniam prior & independens est.

Eadem propositio acceptatur ab Aristot. nam secundum principia sua vnumquodque est ens in quantum est actu, & tanto minus est ens, quanto magis est in potentia. vnde materia primo vltimum gradum habet in latitudine entium, & successiva parum habent de entitate. nam non sunt nisi dũ sunt, vt patet de motu & tempore, ex quibus sequitur quod sempiterna sunt vere entia, quoniam in nono Metaph. tex. 17. dicit Arist. in sempiternis vt sempiterna sunt, nihil est potentia, quod enim est in potentia vt sic potest esse, & non est se, corruptibilia autem cum sint magis in potentia, quàm in actu nõ sunt vere entia, sed potius variationes entium quas & Procl. nominat nomine generationis. ergo quæ sunt sempiterna secundum substantiam, & temporalia secundum actionem sunt simul entia, & variationes entium. Quod autem

autem ad mentem Arist. omnia pendeant à primo, satis diximus in propositione decimaottau.

Eadem propositio acceptatur à Theologo: nam apud ipsum quod est æternum est totum simul & perfectum, in augmentabile & imminorabile secundum perfectionem, quod autem est temporale secundum substantiam, & operationem nunquam habet esse fixum, sed pro tanto tempore ad perfectionem tendit, & pro tanto à perfectione paulatim recedit donec deficiat, unde generabile potius est generatio & corruptio entis quam ens, exillit enim in tota duratione sua sub motu acquisitio, & perditio, quidquid ergo est æternum est vere ens, & quod est temporale est potius generatio & corruptio entis quam ens. ergo natura media est simul ens & generatio & corruptio entis, quoniam eius actiones sunt in generatione & corruptione, quoniam accedente posteriori definit prior, nam & in cælo accedente sole ad meridiem definit esse in oriente, & anima transit à simplici apprehensione ad compositionem & diuisionem, &

ab his ad discursum. Quod autem à primo vno pendeant omnia, & ipse sit independens de-

clarauimus in propositione decimaot-

tau. Et hic termino Examina-

tiones nostras super librum

de Causis, ad laudem

primæ & vniuer-

salissimæ

Causæ, quæ super

omnia exaltatur. Amen.

NVMERVS TRACTATVVM

super tres libros de anima.

Primi libri.

Primus tractatus super proœmium Aristotelis.

Secundus tractatus super opinionem Platonis.

Secundi libri.

**Primus tractatus de diffinitione animæ secundum
Aristotelem.**

**Secundus tractatus de potentijs animæ in communi,
& de vegetabilibus.**

Tertius tractatus de sensibus exterioribus.

Tertij libri.

Primus de sensibus interioribus.

Secundus de intellectu possibili, & agente.


Tertius de potentia appetitiua, & motiua.

85
CHRYSOStOMI IAVELLI
CANAPITII

EPI TOME

SVPER LIBROS DE ANIMA

ARISTOTELIS.



VPER procemium Philoso-
phi de anima formamus vni-
cum tractatum, & relinque-
mus totum primum librum
in quo referuntur opin. anti-
quorum, quæ parum nobis
sunt utiles: Verum quidem
est, quod opinio Platonis est
magni sensus. & ideo de ea
composui particularem tract.
Nec recto sensu improbat

ab Arist. sed solum quo ad verba, ut testatur B. Th. in primo
de anima. ideo improbatio Arist. non est magnipendenda.
Formamus ergo duos tractatus.

Primum, super procemium.

Secundum, super opinionem Plat.

*Tractatum primum diuidimus in quin-
que capita.*

IN primo, ostenditur dignitas scientiæ de anima.
In secundo, ostenditur utilitas eiusdem scientiæ.
In tertio, ostenditur difficultas scientiæ eiusdem.
In quarto, ostenditur, quod Phys. debet considerare de
anima.

In quinto, soluentur dubia quædam circa determinata.

Caput

TRACTATVS I.
CAPVT PRIMVM.



IRCA primum cap. ponitur hæc conclusio inter omnes scientias præter scientiam diuinam, quæ est metaphyl. & rheologia reuelata, scientia de anima est melior, & honorabilior. & per consequens nobilior. Antequam probetur præponuntur tria. Primum est, omnis scientia est bona. nam perficit intellectum nostrum. ergo est bona, omne enim perficiens, alterum habet rationem boni. Secundum est, aliqua scientia est laudabilis, & aliqua honorabilis probatur, scientia practica est laudabilis, quia bonum laudabile est illud, quod non queritur propter seipsum, sed propter nostrum commodum, ut laudamus equum, quia defert æquitatem, sed scientia practica non queritur propter seipsam, sed propter opus, ad quod ordinatur, ut Politica queritur propter regimen ciuitatis. ergo scientia practica est laudabilis. scientia vero speculatiua est honorabilis: quia bonum honorabile est illud quod propter seipsum queritur: & non ordinatur ad aliud, ut felicitas, quæ est summum, & ultimum bonum, sed scientia speculatiua propter seipsam queritur. Non. n. ordinatur ad opus, ut patet ex definitione sua. ergo scientia speculatiua est honorabilis. Tertium est, una scientia speculatiua est nobilior altera duobus modis. Primo, quia est certior, & habet demonstrationes certissimas, ut mathematicæ, quæ demonstrant ad sensum conclusiones suas. Secundo, quia est de nobiliori subiecto, ut astrologia est nobilior prospectiua. illa. n. est de corpore cælesti, quod est nobilius linea visuali, quod si dentur duæ scientiæ, quarum una sit certior. & de ignobiliiori subiecto, alia vero sit incertior, sed de nobiliori subiecto, secunda dicitur nobilior prima, unde astrologia est nobilior geometria, quia licet sit incertior geometria, est tamen de nobiliori subiecto, quod est corpus cæli, & ideo bene dixit philosophus in lib. 12. de anima 11, magis affectamus scire modicum de rebus altissimis, etiam si topicæ, & probabiliter illud sciamus, quam scire multum & per certitudinem de rebus minus nobilibus. His tribus
præ-

præsuppositis sic probatur conclusio, scientia de anima est de nobiliori subiecto, anima enim est subiectum saltem speciale in hoc libro, & anima est nobilior inter creaturas inferiores, nec datur eis nobilior anima, nisi sublâtix separata, & deus gloriosus, & scientia de anima est certior, quia habet demonstrationes certiores, ergo inter omnes scientias præter scientiam diuinam scientia de anima est nobilior. Quomodo vero habeat demonstrationes certiores sic declarandum est. Demonstratio potest esse certior dupliciter, primo, quia procedit ex propositionibus notioribus, quo ad nos, & quo ad naturam suam, ut demonstrationes mathematicæ, secundo, quia procedit ex notioribus quo ad nos, inquit us non fallimur, ut quando ex effectu notissimo demonstramus causam, & dico ex effectu notissimo, sicut cum demonstramus hominem habere pulmonem ex hoc effectu notissimo, qui est respirare, & tales sunt demonstrationes libri de anima. nam per obiectum potentix nobis notissimum cognoscimus operationem potentix, puta per colorem, qui est obiectum visus cognoscimus actum viuendi, & per actum potentix cognoscimus potentiam, ut per videre cognoscimus visum, & per potentiam cognoscimus ipsam substantiam animæ, ut dicemus infra, dicimus ergo quod scientia libri de anima habet demonstrationes certiores, non quidem absolute, ut sunt mathematicæ, sed quia procedunt ab his, quæ sunt notissima nobis, quilibet enim in se experitur, quod nutritur, quod augetur, quod sentit, quod appetit, quod intelligit, & ab his effectibus notissimis cognoscimus potentias animæ, & substantiam animæ, ut declarabitur in toto secundo lib. patet ergo, quod hæc scientia est nobilior alijs. & licet non habeat demonstrationes certiores per causas, ut habet mathematica, tamen habet nobilior subiectum, per quod dicitur scientia nobilior, etiam si non sit adeo certa, ut sunt scientiæ mathematicæ. Nota tamen quod possumus dicere hanc scientiam esse nobiliorem, non quidem inter omnes alias, sed inter omnes partes scientiæ naturalis, puta quod est nobilior, quàm scientia libri de cælo, & quàm scientia libri Meteor. & quàm scientia libri de minera. & quia habet nobilior subiectum, & habet certiores demonstrationes,

strationes, licet enim omnes partes scientiæ naturalis demonstrent ab effectu notiori, tamen scientia hæc demonstrat ab effectu non solum notiori, sed notissimo ad sensum, vt declaravi paulo ante. Hæc conclusio sic intellecta nullā habet difficultatem. Hæc sufficiant de primo capite.

CAPVT II.

Circa secundum cap. ponitur hæc conclusio. Scientia de anima est utilis cuiuslibet alteri scientiæ, probatur inductiue, primo est utilis logicæ, quia in hac scientia, vt dicitur in tertio libro, agitur de operationibus intellectus, quæ sunt simplicium apprehensio, compositio, & diuisio, & discursus à noto ad ignotum, sed circa hæc etiam versatur logica, nam in prædicamentis agitur de notitia terminorum incomplexorum, in libro Perihet. agitur de compositione, & diuisione &c. hæc omnia habes in compen.ma. in principio prædicabilium, vbi assignatur diuisio logicæ, secundo est utilis scientiæ morali, vt patet in secundo Eth. vbi inuelligatur in quibus potentijs animæ possit esse virtus, & vitium & etiam in decimo Eth. determinatur, quod felicitas consistit in cognitione intellectua rerum altissimarum, sed in hac scientia tractatur de potentijs, & passionibus animæ, & de intellectu, ergo est utilis scientiæ morali. tertio est utilis scientiæ naturali, præcipue illis partibus, quæ tractant de corpore animato vegetabili, vel sensitiuo, non enim potest cognosci corpus animatum, nisi cognoscatur anima, quæ est principium omnium actionum rei animatæ, ergo est utilis scientiæ naturali: quarto est utilis metaphysicæ, quia non possumus cognoscere, quomodo substantiæ separatae habeant intellectum, & intelligant, nisi haberemus cognitionem de intellectu humano in hac scientia & per cognitionem intellectus humani deuenimus in cognitionem intellectus separati, & diuini, vltimo est utilis omni scientiæ in cōmuni, & omni habitui intellectuali, quæ sunt sapientia, prudentia, opinio &c. nam intellectus est illę qui causat omnes hos habitus, vt dicemus in tertio libro. cum ergo in hac scientia cognoscamus causam omnis sciētiz, sequitur quod
est

est vtilis omnibus scientijs . & habitibus intellectualibus .
Hæc de secundo capite sufficiant .

CAPVT III.

Circa tertium cap. ponitur hæc conclusio. Hæc scientia licet sit vtilis, est tamen valde difficilis, probatur dupliciter: primo, difficile est diffinire quid sit anima, & hoc multipliciter, primo est difficile inuenire viam diffiniendi. nam aliqui volunt, quod omnis diffinitio inuestigetur per demonstrationem, sicut tenuit Hippocras. Aliqui dicunt, quod omnis diffinitio inuestigatur per diuisionem, sicut tenuit Plat. Aliqui autem per compositionem, quæ autem via sit melior, dicemus in quinto cap. Secundo, est difficile inuenire genus, quod ponitur in diffinitione animæ, vtrum sit substantia, an accedens, an corpus, an actus, an potentia. Tercio, est difficile inuestigare, quomodo diffiniatur anima, an sicut vnum genus, vel vna species specialissima, vel vna anima numero. nam Plato dicebat, quod anima separata, vt idea quæ erat causa animarum particularium, & de ea sola, vt de vniuersali separato detur diffinitio. secundum Arist. vero diffinitur anima in communi, quæ quidem non est quoddam vniuersale separatum, sed solum habet esse in hac, vel in hac anima, vnde diffinitio quæ datur de anima debet competere cuiuslibet animæ, & dicit Aristot contra Plato, quod vniuersale, puta animal, genus aut nihil est, aut est posterius singularibus, quod an sit verum declarabitur in quinto capite. Quarto, difficile est diffinire animam, quia difficile est inuenire vnam diffinitionem de anima, per quæ cognoscamus etiam potentias animæ, & passiones suas. nam diffinitio subiecti debet esse medium ad demonstrandum passiones de subiecto, vt diximus in 1. Poster. sicut per diffinitionem hominis demonstramus hominem esse risibilem, similiter quia difficile est cognoscere differentias essentielles, & quoniam aliquando describimus rem per sua propria accidentia, vt cum describimus asinam per rudibile, necesse est quod cognoscamus accidentia propria animæ, vt per ea adiuuemur ad cognoscendum quid sit anima, nam inquit Arist.

acci.

TRACTATUS I.

accidentia magnam partem cōferunt, id est valde vtilia sunt ad cognoscendum quod quid est, id est diffinitionē, & essentiam rei, quod quomodo verum sit dicemus in quinto cap.

Secundo principaliter hæc scientia est difficilis propter potentias animæ, de quibus nescitur, an sint potentia solius animæ, an totius animati, vt vegetatiuæ, & sensitiuæ potentia, non enim sola anima nutritur, nec sentit, sed ipsum animal, similiter potentia appetitiuæ, & passionēs, vt est timor, & ira videntur esse totius animalis, sunt enim actus earum cum transmutatione corporis. Nam qui timet palefcit, vel tremit, qui irascitur habet ebullitionem sanguinis circa cor. Quod si quis dicat, propter quid hæc inuestiganda sunt. Respondet philosophus, vt sciamus si anima intellectiua sit incorruptibilis, & remaneat, postquam est separata à corpore. Nam si nulla potentia, nec actio esset propria solius animæ, non remaneret separata à corpore, tunc enim esset otiosa in natura, si nullam operationem propriam haberet. Et cum nihil otiosum sit in natura, vt dicitur in secundo de cælo, sequitur quod ipsa anima post mortem corrumpetur, vt ergo possimus sustinere, quod anima nostra est incorruptibilis debemus inuestigare, si aliqua ex potentijs, & operationibus animæ, sit propria solius animæ, patet ergo quomodo hæc scientia est difficilis, hæc sufficiant de tertio cap.

CAPVT IIII.

Circa quartum caput ponitur hæc cōclusio, physicus debet considerare de anima, probatur sic, physicus debet considerare de potentijs, & operationibus animæ, ergo debet considerare de anima, probatur consequentia, quia vt dicitur in primo poster. eadem scientia considerat subiectum, & proprias passionēs subiecti, vt arithmetica considerat numerum, & parem, ac imparem, vt passionēs numeri, ergo si physicus considerat potentias animæ, quæ sunt velut suæ passionēs propriæ, etiam debet considerare de anima antecedens vero probatur sic, potentia anima diffiniuntur per materiam naturalem, vt diffinitur visus sic, visus est potentia affixa organo oculi, cuius obiectum est color,

lor, materia naturalis in qua est visus, est oculus, tunc sic, ea quæ diffiniuntur per materiam naturalem, vel quæ habent esse in materia naturali, considerantur à physico, vt dictum est in secundo phyllicorum, sed potentia animæ saltem vegetatiue, & sensitivæ diffiniuntur per materiam naturalem, vt patebit in secundo libro. ergo potentia animæ considerantur à physico.

Verum quia de potentijs animæ solet dari duplex diffinitio, una per solam formam sine materia naturali, vt quando sic diffinitur ira. Ira est appetitus vindictæ propter malum illatum, aliquando diffinitur per materiam naturalem, vt quædo sic diffinitur, ira est accensio sanguinis circa cor. dicit philosophus, quod prima diffinitio est logicalis, & insufficientis, quia non explicat sufficientem naturam rei diffinitæ. nam cum res diffinita puta ira, habeat esse in materia naturali, id est in corde, ex quo non ponitur in prima diffinitione materia naturalis, ideo est insufficientis, secunda vero diffinitio est melior, quia indicat rem secundum esse, quod habet in materia naturali, perfecta vero diffinitio fiet, si utraque diffinitio coniungatur, vt hic, ira est accensio sanguinis circa cor propter appetitum vindictæ ex malo illato, licet etiam si sic diffiniatur domus, domus est quid compositum ex lapidibus, & cemento, & tecto, vt nos defendat à pluvia, & ab æsto. Ex his ergo patet, quod diffinitio animæ, & potenciarum, si debet esse sufficiens debet dari per causam formalem, & per causam materialem, & id studebimus observare in toto secundo, ac tertio lib. ubi sigillatim diffiniemus, & animam, & potencias, ac passiones suas, quæ sunt in appetitu sensitivo, hæc de quarto cap. sufficiant.

CAPUT V.

IN quinto cap. soluenda sunt quedam dubia, quæ oriuntur ex prædictis.

Primo, queritur propter quid philosophus facit speciale librum de anima. Nam tractando de rebus animatis, in reliquis libris, puta de vegetabilibus, & de animalibus, et tractasset de anima cum sic sit forma rei vegetabilis, & animalis.

Ad

Ad hoc respondet B. Th. in principio sui commentii super lib. de anima sic, in qualibet scientia prius cōsideranda sunt communia, & seorsum, ne eadem sæpius repetantur, & inutiliter, deinde deueniendum est ad considerationem rerum particularium, cum ergo philosophus in lib. sequentibus habeat considerare de rebus animatis in particulari, vt in lib. vegetabilium, & in lib. de animalibus, primo debuit seorsum tractare de eis, quæ sunt communia rebus animatis, hæc autem sunt anima, & potentia, & operationes sue. nam in quolibet animato est anima, & alie quæ ex potentijs, & operationibus suis, vt dicitur in secundo libro. ergo conuenienter prius, & seorsum philosophus tradit scientiam de anima, & potentijs suis. Hunc ordinem seruauit etiam in libris de physico auditu, in quibus tractat ea quæ sunt communia cuilibet enti mobili, vt declarauit in primo tractatu super primum librum Phys. In alijs autem partibus philosophiæ naturalis tractat de vario ente mobili, vt in tractatu eodem declarauit in diuisione vniuersali totius philosophiæ naturalis, ne ergo congeretur Philosophus sæpius repetere cognitionem de anima, voluit in libro particulari de ea pertractare.

Secundo quaeritur quod est subiectum adæquatū in hoc libro. Respondeo secundum Alber. quod est ens mobile animatum simpliciter. Dico ens mobile quoniam subiectum totius physici est etiam subiectum in omni parte physici, sed ens mobile est subiectum in tota physica, vt patet in primo nostro tract. in primo Phys. ergo est subiectum etiam hoc libro. Dico animatum vt per hoc distinguatur hic liber à libris præcedem. vbi agitur de ente mobili simplice vel composito, sed in animato, vt patet in lib. de cælo, & in libro de generatione, & in libro meteororum, & in libro mineralium. Dico simpliciter, id est non applicatum ad particulare genus entis animati, vt per hoc distinguatur à libris seq. in quibus agitur de ente mobili animato secundum diuersum genus, vt in libro vegetabilium de ente mobili animato vegetatiuo, & in libro de animalium de ente mobili animato sensitiuo. Hæc conclusio probatur sic à sequentibus Alber. Idem est subiectum totius physici & cuiuslibet partis

partis eius, quia tota scientia & quælibet eius pars ordinatur ad cognitionem vnius rei, qua cognita sciens quiescit, vt tota logica ordinatur ad cognitionem entis, rationis, quo cognito secundum omnes modos suos logicus quiescit ergo idem est subiectum in tota vna scientia & in omni parte sua, sed ens mobile est subiectum in tota physica. ergo & in hoc libro sub tali quidæ ratione vt distinguatur ab alijs partibus physica. Ratio quidem talis est hæc, animatum simpliciter, quæ iam declarata est.

Nota tamen quod D. Ioan. Iandunus & D. Galet. dicunt quod anima est subiectum in hoc libro, & probant dictis Philosophi, primo hic in præmio, vbi ait quod propter certitudinem & nobilitatem, & eiusdem intentionis videtur esse B. Thom. & manifestabitur in quæstionibus ordinarijs, sed qui sequuntur Alber. dicerent quod sufficit animam esse subiectum speciale, sed non adæquatum. Quomodo autem differant subiectum adæquatum & speciale declaravi in primo tractatu super primo lib. Phys. Similiter Iandunus probat rationibus sic. In hac scientia quæruntur principia & partes & passionēs animæ. ergo est subiectum, probatur consequentia, quia vt dicitur in primo Poster. Illud est subiectum in scientiam cuius principia & partes & passionēs quæruntur. ergo anima est subiectum.

Ad hoc dicerent Albertistæ quod antecedens est falsum, nam vt declarabitur in secundo & tertio libro non consideratur potentia nec operationes animæ, vt sunt solus animæ, sed vt sunt totius animati, immo nec consideratur intel ligere quod videtur esse propria actio animæ, nisi vt est per phantasmata, quæ sunt subiectiua in phantasia, quæ est potentia affixa organo, & sic est potentia totius animalis & non solius animæ.

Secundo arguitur sic. Anima est vniuersale & principale consideratum, & distinguit hunc librum ab alijs partibus Physicæ. ergo anima est subiectum adæquatum.

Ad hoc dicunt Albertistæ quod solum. secunda pars est vera, scilicet anima est principale consideratum, prima vero, & tertia est falsa, nam ly animatum simpliciter distinguit hunc librum ab omnibus alijs, & est vniuersale confi-

Epic. Iauelli.

m

deratum,

deratum, quia nihil tibi consideratur quod cōueniat soli ani-
mæ, sed vt habet ordinem ad ens mobile animatum simplici-
ter. Sic responderet Albertus ad quæsitum. Determinatio-
nem autem Thomistarum videbis in quæst. ordinarijs.

Tertio quæritur quæ sit sufficiens via inuestigandi diffini-
tiones secundum Arist.

Ad hoc dicitur secundum D. Albert. in primo de anima. q.
via sufficiens est diuisio, deinde compositio, quod sic declara-
tur. si volo definire hominem primo sic distingo, entium
quoddam est substantia, quoddam est accidens, ecce prima di-
uisio, substantiarum quædam corporea, quædam incorpo-
rea, ecce secunda diuisio. Corporum quoddam anima-
tum &c.

Item animatorum quoddam sensitium, quoddam non
sensitium. Item sensitiuorum quoddam rationale, quod-
dam irrationale. Peractis ijs diuisionibus postea per compo-
sitionem colliguntur partes diffinientes sic. Homo est sub-
stantia, quia non est accidens, & corporea, quia nō est incor-
porea, & animata, quia non est inanimata, & sensitiua & ra-
tionalis, quia non est irrationalis, ecce quomodo sola diui-
sio non est sufficiens, vt dicebat Plat. sed est necesse primo di-
uidere, secundo componere. adinuicem partes diuidentes
non oppositas, vt declarauit in exemplo de homine.

Quarto quæritur quō propositio inducta contra Plat. sit
vera, scilicet vniuersale aut nihil est, aut est posterius singula-
ribus.

Ad hoc dicitur secundum B. Thom. & Alber. & Egid. q.
vniuersale puta animal sumitur tripliciter. primo conside-
ratur secundum se & absolute, puta animal vt animal, & ho-
mo vt homo, non habendo respectum ad sua singularia, & sic
vniuersale est prius suis singularibus. nam bene sequitur. So-
crates est, ergo homo est, non tamen sequitur e conuerso, ho-
mo est, ergo Plato est, & sic patet, q. homo est prior sē se suis
singularibus, quia ab eo non conuertitur subsistendi conse-
quentia, sicut etiam dicimus, q. vnum est prius duobus, licet
enim hæc sit bona consequentia, duo sunt, ergo vnum est, nō
tamen sequitur, vnum est, ergo duo sunt, secundo conside-
ratur vt habet esse in suis singularibus, puta consideratur
homo

homo vt est Socrate, & Plato. & sic nec est prius, nec posterius suis singularibus, sed est simul cum eis, & generatur vel corrumpitur per accidens, sicut generatur vel corrumpitur sua singularia.

Tertio consideratur vt est sub intentione secunda, puta consideratur homo vt est species, vel in quantum prædicatur de pluribus differentibus numero, & sic dico quòd est posterius suis singularibus, nam intellectus attribuit homini hanc intentionem secundam, postquam còsiderauit quod homo secundum suum significatum potest conuenire differenter huic & huic homini, & sic patet quod est posterius suis singularibus, & de vniuersali sic accepto dicit Auer. in 11. lib. Meteor. vniuersalia apud Arist. sunt collecta ex particularibus ab intellectu, quia accipit inter ea similitudinem, id est quia cognoscit quod conueniunt in vna diffinitione communi, puta cognoscit, quod quilibet homo conuenit in hoc quod est esse animal rationale, & per talem conuenientiam, homo prædicatur de pluribus. quando ergo dicit Arist. contra Plat. quod vniuersale aut nihil est, aut est posterius singularibus, accipit vniuersale tertio modo, quasi dicat homo vt species si accipiatur separatim à singularibus nihil est, quia non datur homo qui habeat esse extra omnes homines singulares, vt dicebat Plat. Si autem sumatur vt habet esse in intellectu, sic est posterius singularibus, prius enim intellectus considerat quod singularia conueniunt in vna diffinitione communi, quam formet hunc conceptum, qui est prædicari de pluribus, & hæc est diffinitio vniuersalis sumpta tertio modo.

Quinto quaeritur quomodo accidentia magnam partem conferant ad cognoscendum essentiam rei.

Respondeo quod cognitio rei est duplex. Prima est cognitio per diffinitionem, vt cum cognosco quòd homo est animal rationale. Secunda est per discursum, vt cum cognosco quod homo est risibilis per discursum, id est procedendo à noto ad ignotum syllogizando.

Quantum ad primam cognitionem dico quòd accidentia propria sunt valde vtilia, tamen quia sæpe sumuntur pro differentijs essentialibus, quoniam ipse differentie sunt nobis incognite, vt cū in diffinitione equi ponimus hinnibile

quia nescimus propriam differentiam equi qua distinguitur a quolibet alio animali, tunc etiam quia disponunt intellectum nostrum ad cognoscendam propriam differentiam, nam in naturalibus procedimus ab effectibus propriis ad proprias passiones à propriis passionibus ad differentiam specificam, puta quia video hominē ridere, cognosco quod est risibilis, ex hoc cognosco quod admiratiuus, ex hoc cognosco quod est rationalis, quæ est differentia, specifica hominis, ecce quod hæc accidentia, scilicet ridere, esse risibilem, esse admiratiuum, sunt valde vtilia ad cognoscendum differentiam specifica hominis, & sic patet, quod accidentia propria sunt vtilia ad cognitionem rei quæ habetur per diffinitionem.

Quantum ad secundam cognitionem quæ habetur per discursum dico, quod accidentia propria sunt valde vtilia, præcipue in scientia naturali, in qua ut in pluribus probamus conclusiones per effectum proprios, & proprias operationes, & proprias figuras, nam per accidentia propria probamus rem habere esse, & esse talem, puta æternum, vel corruptibilem &c. ergo accidentia propria vtilia sunt ad cognitionem rei, quæ habetur per discursum, probatur antecedens sic, per motum æternum & circularem probat Philosophus dari primum motorem, ut per suam propriam operationem, & non solum dari primum motorem, sed etiam esse æternum, & vnum, & infinitum, & incorporeum.

Item per motum circularem, qui est proprius corpori celesti, probat Philosophus in primo cæli. corpus cæleste non esse compositum ex elementis. patet ergo quomodo per accidentia propria cognoscimus, argumentando, multa prædicata, præcipue rerum naturalium, & sic verum est, quod accidentia magnam partem conferunt ad cognoscendum essentiam rei, siue per diffinitionem, siue per discursum. Hæc suf-

ficient pro primo tractatu super
primum librum de
anima.

TRACTATVS SECVNDVS SVPER

*primum de anima, in quo exponitur opinio Platonis
secundum rerum sensum quem habuit
de anima.*



In hoc secundo tractatu intendimus exponere opinionem Plato. de anima quam occultat in Thimæo sub metaphoris, quasi indignum existimās quod vulgares & prophani secretum hoc apprehenderent, vel auit igitur sensum verum sub metaphoris, vt soli sapientes ac depurati animi illum complectantur, plebeis autem mentibus seruetur occultum, vt igitur id philosophiæ arcanum, studiosis elucescat: diuidimus hunc tractatum in quinque capita.

In primo, refertur sententia Plat. de anima, vt habetur in Thimæo.

In secundo, declaratur de qua anima proprie loquitur in Thimæo.

In tertio, declaratur quot sunt numeri, ex quibus secundum Plato. componitur anima, & quot proprietates habet.

In quarto, declaratur quomodo tales proprietates reperiuntur in cœlo.

In quinto, declaratur quomodo prædictæ proprietates reperiuntur in anima cœli, & per consequens in anima nostra, & sic manifestum erit, quod opinio sua de anima, nullū continet inconueniens.

CAPVT PRIMVM.

In primo capite declaratur quod dicebat Plat. de anima in Thimæo. vnde nota quod Plat. tria considerabat in anima.

Primo, quomodo comparatur ad corpus.

Secundo, ex quibus principijs constituitur.

Tertio, quomodo se habet ad operationes suas.

Quantum ad primum dicit Plat. quod anima comparatur ad corpus, non quidem vt forma dans esse ipsi corpori,

sed vt mouens ipsum corpus, mouet autem corpus prout est
 connexa, id est colligata & applicata ipsi corpori; sicut ma-
 nus mouet baculum, non quia dat esse baculo, sed quia est
 applicata ipsi baculo, ex quo sequitur secundum Plat. vt ip-
 semet testatur in libro qui dicitur Alcibiades de homine, quod
 homo non constat ex anima & corpore; velut ex forma &
 materia, vt tenet Arist. sed ipsa anima est totus homo essen-
 tialiter, corpus vero est instrumentum, in quo operatur, vn-
 de secundum Plat. sic definitur, homo est anima vtens cor-
 pore. Quod autem opinio Plat. quantum ad hoc primum
 non sit vera declaratur sic, Id quod est homo potest operari
 per se operationes quae sunt in homine, sed anima non po-
 test operari per se operationes hominis, non enim potest
 per se sentire, quia expletur per organum corporeum, vt pa-
 tet ergo anima non potest per se sentire, nec per se nutrire,
 vt patet, nec per se appetere bonum cognitum per sensum,
 appetitus enim sensitivus est in corde vt in suo organo, cum
 igitur anima non habeat aliquam operationem sepe tam in
 homine sibi propriam, nisi ipsum intelligere, vt dicitur in
 tertio de anima, sequitur quod homo non sit anima, sed po-
 tius quid compositum ex anima & corpore, vt tenet Arist.

Quantum ad secundum dicit Plat. quod anima est consti-
 tuta ex elementis, id est suis principiis quae secundum ipsum
 sunt numeri harmoniaci, id est consonantes vt habeat natu-
 ralem sensum harmoniae, & feratur secundum motus conso-
 nantes, id est operetur operationes concordantes & proportio-
 natas, vt declarabimus infra.

Quantum ad tertium dicit Plato. quod anima operatur
 prius secundum aspectum rectum, quem aspectum rectum
 Deus reflexit in circulum, ordinauit enim Deus quod prius
 intelligeret alia entia, per rectum aspectum, & postea seip-
 sam intelligeret per modum cuiusdam circulationis & re-
 flexionis. Diuidens quidem Deus vnum circulum in duos
 circulos dupliciter ordinatus. Item vnum circulum in se-
 ptem circulos veluti essent caeli motus sicut animae motus.
 Hic continetur enigmatica tota opinio Plat. de anima, quam
 quidem declarabimus sequendo intentionem Iamblici Mar-
 silij Ficini.

CAPVT II.

IN secundo caput, declarandum est de qua anima Plat. proprie loquitur in Thim. Vnde nota secundum expostores praedictos quod illic principaliter loquitur de anima cœli. Posuit enim Plato. cœlum veræ animarum tanquam quoddam immortale animal, quæ quidem anima est intellectualis, & collocatur à Plato. in quarto gradu entium intellectualium. Nam Plato. posuit ut asserit Apul. in lib. de Deo Socratis. sex gradus entium intellectualium.

In primo gradu posuit Deum gloriosum, quem nuncupavit per se bonum & per se vnum, cuius bonitas & vnitatis non dependet ab alia. hunc etiam nuncupat primum Deum patremque deorum.

In secundo gradu posuit Deos secundos, quos dicit esse secundas bonitates & unitates, participantem immediate primam bonitatem & unitatem, quæ est in summo ac primo Deo.

In tertio gradu posuit intellectus separatos, qui nullis corporibus sunt uniti, sed sunt substantiæ penitus separatæ, hos alij Philosophi dicunt esse intelligentias, & sacri Theologi dicunt esse angelos.

In quarto gradu posuit animas cœlorum, quæ quidem, licet secundum suam naturam sint intellectuales, tamen sunt colligatæ corporibus cœlestibus, & quia corpora cœlestia sunt nobilissima corpora, ac perpetua ex voluntate primi dei, ideo animæ cœlorum sunt nobilissimæ inter omnia genera animarum.

In quinto gradu posuit animas Dæmonum, quas dicit esse intellectuales, sed colligatæ sunt corporibus æreis: vnde opinatur quod dæmones sunt animalia habentia corpus æreum, animam vero intellectuam, ut testatur Apul. in lib. de Deo Socr.

In sexto gradu posuit animas humanas, quæ licet sint intellectuales, tamen infimæ sunt & ignobiliores inter omnia entia intellectualia, cuius signum dicit esse, quod unitur ignobiliori corpori, quale est corpus humanum, terrene, opacum, seculentum, & corruptibile. Ex his igitur patet, quod

TRACTATUS II.

in quarto gradu ponebat animas cœlorum . & de his gradibus entium intellectualium infra posui figuram .

| [Sex gradus entium intellectualium secundum Platonem .] | | | | | |
|---|--------------|--------------|-----------|-----------|-------------|
| / | / | / | / | | |
| / | / | / | / | | |
| [Deus] | [Dij se-] | [Intelle-] | [Animæ] | [Animæ] | [Animæ] |
| [per se] | [cundi se] | [&us se] | [cœlo-] | [dæmo-] | [humana.] |
| [bonus] | [cundæ] | [parati .] | [rum .] | [num .] | |
| | [bonita] | | | | |
| | [tes , &] | | | | |
| | [vnita-] | | | | |
| | [tes .] | | | | |

Hanc igitur animam cœli posuit Plato esse constitutam ex numeris , & consonantijs harmonicis duplici de causa . primo : quia vt refert Arist. in 2. libro de cœlo . & Macrobi. in lib. de somno Scip. Pythagorici , & Platonici dicunt , quòd ex vario ex motu sphærarum cœlestium causantur soni maxime consonantes , & proportionati , quos quidem aures mortalium non audiunt , quoniam adeo assueuerunt audire strepitus improporcionales , qui causantur in his inferioribus , quòd quasi surduerunt , sicut maleatores penæ surdi efficiuntur ex grandi , & frequentato ictu malleorum , & quia motus cœlestium sphærarum causantur ab animabus cœlorum , sicut à proprijs suis motoribus , ideo posuit Plat. animas cœlorum cõponi ex numeris harmonicis , vt possent causare motus harmonizatos , ac consonantes . secunda causa est , quia vnumquodque delectatur in eo quod est sibi simile , & connaturale . cum ergo videret Plat. quod anima delectatur in rebus proportionatis , puta delectatur visus luce temperata , offenditur autem à luce excellenti , vt patet dum intuetur

intuetur solem, & delectatur auditus sono mediocri, & consonanti, ut patet in instrumentis musicis. cristatur autem in sono acuto, ut patet in conitruo, opinatus est, quod harmonia, & consonantia essent de natura animæ, & quod componeretur ex numeris harmoniacis. patet igitur quod in Thimæo loquitur principaliter de anima cæli, & quoniam secundum Plato. anima humana imitatur animam cæli. ex consequenti secundum eum, & animæ nostræ componuntur ex numeris harmonicis. Quod qualiter sit. dicam in cap. sequenti.

CAPVT III.

IN tertio cap. declarandum est, qui sunt numeri, ex quibus componitur anima secundum Plat. & quot proprietates habent. Dico igitur, ut habetur in Thimæo, & illi numeri sunt componentes animam 1. 2. 3. 4. 8. 9. 27. & continent in se quinque proprietates, scilicet consonantiam aspectum rectum, duplicem coordinationem, identitatem, & diuersitatem, reflexionem in circulum. primo continent in se consonantiam, nam in eis reperiuntur principales consonantiæ musicales, quæ quidem sunt sex. scilicet diapason, diapente, diatesseron, & diapason, & diatesseron composita, tonus ex diaphason, & diapente composita. Quod prædictæ sex consonantiæ fiant ex prædictis numeris declaratur sic. Inter unum, & duo, est diapason, quia est proportio dupla inter 1. & 2. est diapente, quia ibi seruatur proportio sexquialtera, inter 2. & 3. est diatesseron, quia seruatur proportio sexquialtera, inter 3. & 4. est diatesseron, quia seruatur proportio sexquialtera, inter 4. & 8. est consonantia composita ex diapason, & diatesseron, quia ibi seruatur proportio dupla superbi-partiens. nam 8. continet bis tria, & duas vnitates inter 2. & 9. est tonus. nam ibi seruatur proportio sexquialtera. nam 9. continet 8. & octaua partem inter 8. & 27. est consonantia composita ex diapason, & diapente, quia ibi seruatur proportio tripla. nam ter nouem, constituunt 27. patet ergo, Quomodo in eis numeris continentur, consonantiæ musicales, quæ etiam dicuntur harmoniacæ, & earum figuram infra disposui: ut, vides.

[Dupa

| | | | | |
|---------------------------------|------------------------|------------------------|--|--|
| [Dupla super bipartiens .] | | | | |
| Δ | Δ | Δ | Δ | Δ |
| [propor- tio du- pla .] | [sexqui altera .] | [sexqui tertia .] | [sexqui octa- ua .] | [tripla .] |
| [1 . 2 .] | [3 . 4 .] | [8 . 9 .] | [27 .] | |
| [diapa- son] | [diapen- te .] | [diatess- eron .] | [cōpo- sita ex diapa- son, & diatess- eron .] | [cōpo- sita ex diapason, & diapen- te .] |

Secundo, continent aspectum rectum in hoc sensu, quod posterior semper excedit priorem, patet enim quod 2. excedunt 1. & 3. excedunt 2. & 4. excedunt 3. & procedit vsque ad 27. hanc autem excedentiam intendebat Plat. per aspectum rectum.

Tertio, continent duplicem coordinationem, vnam parium, aliam disparium. nam ex vno latere possunt omnes pares figurari, scilicet 2. 4. 8. & ex alio latere possunt omnes impares describi, scilicet 3. 9. 27. & nota quod apud


Plat. pares dicuntur numeri dupli. nam 2. continent his 1. & 4. bis 2. & 8. bis 4. impares di-

cuntur tripli. nam 3. continent ter 1. & 9. ter 3. & 27. ter 9. Hac du-

plex coordinatio patet in figura sequenti.

Quarto

Quarto conti-
netur in eis iden-
titas, & diuersi-
tas. nam est iden-
titas ex parte nu-
merorum impari-
um, & diuersi-
tas ex parte nu-
merorum pariu.
Quod sic declara-
tur. Si omnes nu-
meri impares or-
dinati adinuicē
cōponantur, sem-
per resultabit ea-
dem species nu-



meri, scilicet numerus quadratus. Dicitur autem numerus quadratus ille, qui consurgit ex ductu alicuius numeri in se ipsum semel, ut 4. est numerus quadratus duorum. nam bis 2. constituunt 4. & 9. est quadratus trium. nam ter tria cōstituunt 9. Quod igitur ex parte imparium, si adinuicem cōparātur semper seruetur numerus quadratus declaratur sic. Sumatur vnitas cum primo impari, qui est tria, ex 1. & 3 cōstituuntur 4. qui est quadratus duorum. nam bis 2. constituunt 4. deinde sumatur secundus impar, scilicet 5. & componatur cum ipsis 4. constituuntur 9. qui est quadratus triū. nam ter tria constituunt 9. deinde sumatur 3. impar qui est 7. & componatur cum ipsis 9. constituuntur 16. qui est quadratus quater 4. constituunt 16. deinde sumatur 5. impar qui est 9. & componatur cum 16. constituunt 25. qui est quadratus. nam quinquies 5. constituunt 25. & sic procedendo, & sumendo impares ordinate, & apponendo priori numero quadrato seruetur numerus quadratus, ut patet in figura sequenti, in qua ordinantur numeri quadrati, vsque ad 100.

& potest augeti in infinitum.

TRACTATVS II.

| | | | | |
|------|------|-----|-----|-----|
| [1 | 3] | 4 | [1 | 4] |
| [5 | 4] | 9 | [2 | 4] |
| [7 | 9] | 16 | [3 | 4] |
| [9 | 16] | 25 | [4 | 4] |
| [11 | 25] | 36 | [5 | 4] |
| [13 | 36] | 49 | [6 | 4] |
| [15 | 49] | 64 | [7 | 4] |
| [17 | 64] | 81 | [8 | 4] |
| [19 | 81] | 100 | [9 | 4] |

Quod autem ex parte parium sit diuersitas declaratur sic. Si numeri pares ordinari adinuicem componantur, constituuntur diuersæ species numerorum, & non vna, & eadem, sicut seruatur in numeris imparibus. nam si sumatur primus par. s. 2. & secundus par. s. 4. & adinuicem componantur constituunt 6. qui dicitur numerus superficialis. Si autē sumatur tertius par. s. 6. & componatur cum priori 6. constituitur 12. qui dicitur numerus solidus, patet ergo, quod variatur species ex compositione numerorum parium adinuicem, & sic in eis continetur diuersitas, hic non est necesse aliam quam figuram describere.

Quinto in prædictis numeris continetur reflexio quasi circularis. nam in eis possumus producere à paribus ad imparia, & ab imparibus ad paria, quasi reflectendo, & hoc sic declaratur. Sumatur vnitas, & addatur binario fiet impar. s. ternarius, inde addatur quaternario, fiet impar, scilicet quinquarius. inde addatur octonario fiet impar. s. nouenarius, ex parte vero imparium si eis ordinate addatur vnitas fiet processus ad paria. nam si vnitas addatur ternario fiet quaternarius, & si addatur nonario fiet denarius, & si addatur 27. fiet vigesimus octonarius. Patet ergo quomodo sit processus à paribus ad imparia, & ab imparibus ad paria, quasi refle-

si reflexione circulari, figura huius duplicis processus patet ibi.



CAPVT IIII.

IN quarto cap. declarandum est, quomodo istæ quinque proprietates reperi in prædictis numeris, reperiuntur etiam per similitudinem in corporibus cœlestibus, primo igitur reperitur in cœlo consonantia, & proportio, & hoc est respectu motuum. nā vel ex motu cœlorum causantur soni, consonantes, vt tenent Pythagorici, & Platonici, vel saltem secundum Arist. & omnes astronomos sunt motus proportionales, pro quanto omnes sphaeræ, mouentur regulari, & continuo motu, vt dictum est in octauo Phys. & planetæ varijs temporibus perficiunt motus suos in zodiaco, puta Sol in vno anno, Luna in mense, Mars in duobus annis, Iupiter in quinque, Saturnus in 30. vt patet in tract. de sphaera, ex his igitur varijs temporibus, ac motibus deprehenditur, quod in motibus cœlorum est mira proportio, secundo est in eis aspectus rectus. nam propter polos mundi imaginantur astronomi, quod quædam linea recta, quam

quam appellant axim pertranseat per centrum terræ, cuius extremitates pertingunt ad primum mobile, velut duo puncta, quorum alterum dicunt esse polum arcticum, & alterum polum antarcticum, super hos polos mouetur primum mobile ab oriente in occidentem, & secum rapit sphaeras planetarum, propter igitur hanc lineam rectam, id est axim, & motum ab oriente in occidentem, dicitur esse aspectus rectus in cælo, tertio est in cælo duplex coordinatio propter polos qui alio, & alio modo ordinantur in cælo. nam poli mobilis primi, scilicet arcticus, & antarcticus sunt illi, super quos mouetur primum mobile, & omnes alij planetæ motu raptus ab oriente in occidentem in 24. horis. poli vero planetarum, super quos mouentur sub zodiaco motu proprio, & opposito, scilicet ab occidente in orientem situantur in alia parte cæli, ut patet in tract. de sphaer. nam alter est in circulo arctico, & alter in circulo antarctico, distant quæ à polis primi mobilis fere, 24. gradibus. prima igitur ordinatio sumatur secundum situm polorum primi mobilis, & secundum motum ab oriente in occidentem. secunda ordinatio sumitur secundum situm polorum planetarum, & secundum motum ab occidente in orientem. quarto est in cælo identitas, & diuersitas, identitas quidem propter primum mobile, quod mouetur unico motu, & velocissimo, & regulari ab oriente in occidentem in 24. horis. secundo est diuersitas propter planetas qui mouentur diuersis motibus. nam in quantum rapiuntur à primo mobili mouentur ab oriente in occidentem quolibet die, sicut primum mobile, in quantum vero contra nituntur mouentur sub signis zodiaci diuersimode ab occidente in orientem, ut Luna in mense, Sol in anno &c. quinto est in eis reflexio circularis, immo est vera circularis, probant enim Philosophus in 8. Phys. & Astronomi, quoddam cælum mouetur solo motu circulari, qui est ab eodē ad idem, non quidem per lineam rectam, nec per arcum, sed per duos semicirculos, superiorem, & inferiorem, ut declarat in 8. Phys. de his feci figuram, in qua non deprehenduntur, nisi octo cæli. non enim plures posuit Arist. nec Plat. & non deprehenduntur consonantia, & motus circularis. Hæc enim signantur in materia eleuata.

CAPVT V.

IN quinto cap. declarandum est, & quomodo hæ proprietates reperiuntur in anima cœli, & ex consequenti in anima nostra, & quomodo operationes animæ simulantur motibus cœlorum.

Circa primum dico, quod in anima est consonantia, & proportio respectu suarum operationum. nam omnes potentie animæ naturaliter feruntur in actus suos secundum consonantiam, ut patet in visu qui ex tenebra, & ex intensa luce offenditur, delectatur vero in temperate lucido, vel colorato. Item intensus calor offendit tactum, similiter intensa frigiditas, & delectatur in medio modo se habente. idem patet ex experientia in omnibus alijs potentijs, quæ offenduntur extremis, & delectantur in medijs proportionatis. propter quod sapienter dixit Hyparcus, quod anima habet sensum connaturalem harmoniæ.

Secundo, in anima reperitur aspectus rectus respectu rerû cognoscibilium, quæ sunt extra animam, nam alia entia, præcipue sensibilia naturalia, anima cognoscit directe, prout causant species sensibiles siue intelligibiles in potentijs animæ per quas entia ipsa directe cognoscantur.

Tertio, in anima reperitur reflexio quasi circularis respectu ipsiusmet animæ prout seipsam intelligit. nam anima non intelligit se directe, sed reflexe. dicemus enim in secundo libro quod hic est modus naturalis ipsi animæ, ut primo & directe cognoscat obiecta, secundo actus, tertio potentias, quarto essentiam ipsiusmet animæ. Quia ergo hæ intellectio incipit ab anima & tendit directe ad obiecta extrinseca, & postea ab omnibus extrinsecis reuertitur ad animam, prout anima postquam cognouit alia cognoscit etiam seipsam, dicitur reflexio. Et quia hæ intellectio incipit ab eodem & reuertitur ad idem, quia incipit ab anima & reuertitur ad animam, potest dici reflexio, quasi circularis.

Quarto reperitur in anima duplex ordinatio propter duplicem modum cognoscendi, qui est in anima, nam est modus sentiendi & modus intelligendi, qui distinguuntur in hoc, quod

TRACTATUS II.

quod sensatio est à potentia organica & circa singularia, sed intellectio est à potentia non organica, & circa vniuersalia, vt declaratur in tertio libro in tractatu de intellectu. igitur hic duplex numerus cognoscendi potest dici duplex coordinatio.

Quinto reperitur in anima identitas & diuersitas propter varias potentias suas, nam in potentijs intellectiuis est identitas, sunt enim simplices immateriales & organice. In potentijs vero vegetatiuis, sensitiuis, appetitiuis sensitiuis, & motiuis executiuis est diuersitas, sunt enim organice extense per accidens & materiales. Ex ijs igitur patet quomodo in anima reperiuntur quinque proprietates, quæ sunt in prædictis numeris harmoniacis, & propter hanc similitudinem proprietatum dixit Plato animam componi ex prædictis numeris.

Circa secundum quomodo operationes animæ assimilantur motibus cælorum secundum Platonem, sic accipe. In cælo duplex est motus, vnus ab oriente ad occidentem, qui est primi mobilis, alius ab occidente in orientem, qui est proprius planetarum, hic motus planetarum diuiditur in septem motus, eo quod sunt septem planete, & quilibet mouetur suo motu proprio, sic accidit in intellectu quæ est operatio animæ intellectiue. nam hæc est duplex, prima est qua intelligit substantias separatas, siue diuina entia, & hæc assimilatur motui primi mobilis, est enim nobilissima, & simplicissima eo quod substantiæ separatæ sunt obiecta simplicia & immaterialia, secunda est qua intelligit entia corporea inferiora, & hæc assimilatur motui planetarum, est enim inferior & ignobilior prima, eo quod entia corporea sunt ignobiliora substantias separatæ, & diuiditur in 7. intellectiones sicut diuiditur motus planetarum in 7. motus, istæ autem 7. intellectiones distinguuntur secunda genera obiectorum corporalium, quæ sunt ista in primo gradu situantur elementa. in secundo sunt vapores, qui ex aliquibus elementis compositi sunt, sed imperfectæ, in tertio sunt composita ex omnibus elementis, sed inanimata, vt sunt mineralia, & lapides, in quarto sunt vegetabilia, in quinto sunt sensitiua imobilia, in sexto sunt sensitiua mouentia secundum locum, in septimo sunt rationalia, vt homo ratiocinatur & sentit & mouetur

mouetur secundum locum, circa igitur hæc septem obiecta negociatur anima intellectiua septem intellectiōibus, & sic patet quomodo intellectiōes animæ assimilantur motibus cœlestibus.

Hic terminatur expositio opinionis Platonice de compositione animæ ex numeris harmoniacis, in qua sequutus sum partim B. Tho. in Commento primi libri de anima, & Iamblicum, & Dominum Marsilium Ficinum fidiſſimum Platonis interpretem.

TRACTATUS PRIMVS SVPER

secundum librum de Anima.



VPER secundum librum de anima formamus tres tract.

In primo, inuestigatur quid sit anima secundum Arist.

In secundo, agitur de potentijs vegetatiuis.

In tertio, agitur de potentijs sensitiuis exterioribus.

TRACTATUM primum diuidimus in tria capita.

In primo, inuestigatur diffinitio animæ, quæ datur per materiam in qua recipitur anima.

In secundo, inuestigatur diffinitio animæ quæ datur per formam, & per hanc diffinitionem demonstratur quod prima diffinitio vere competit animæ.

In tertio, inuestigatur quomodo diuersa principia viuendi, vt est vegetatiuum, & sensitiuum se habeant ad animam.

CAPVT PRIMVM.

IN primo capite inuestigatur quid sit anima in communi, diffinitendo ipsam per materiam, in qua recipitur, & ibi sunt tria.

Primo, ponuntur quædam diuisiones.

Secundo, ex ijs diuisionibus colligitur diffinitio animæ.

Epit. Iauelli.

n

Tertio,

Tertio, declaratur quòd ipsa diffinitio sit bona.

Circa primum, sit hæc prima diuisio, entium quoddam est substantia, quoddam quantitas, quoddam qualitas &c. vsque ad vltimum prædicamentum.

Secunda diuisio, substantia naturalis diuiditur in materiã, formam, & compositum, vt lignum diuiditur in materiã primam, & in formam receptam in materia ligni, & ipsum lignum quod est compositum ex materia & forma, inter quæ est differentia quod materia non est ens in actu, sed est in potentia, forma vero est per quam res habet esse in actu, compositum vero est illud quod est actu, vt Socrates compositus ex materiã & anima est actu homo, & est hoc aliquid, id est singulare. Quot conditiones requirantur ad hoc aliquid, iam declaravi in compendio minori in prædicamento substantiæ, & quia forma facit rem esse actu, ideo forma dicitur esse actus, & apud Græcos appellatur Edelechia.

Tertia diuisio, actus est duplex, scilicet primus & secundus.

Actus primus est ipsa forma siue substantialis, siue accidentalis, quæ actuat materiã in qua est, vnde forma ignis est actus primus, sed substantialis, quia facit materiã ignis esse actu, & calor in manu est actus primus, sed accidentalis, quia facit manum esse actu calidam.

Actus secundus est operatio rei, cuius principium est ipsa forma, puta sentire est actus secundus, quia est à sensu qui est actus primus, & scire est actus secundus, qui est à scientia quæ est actus primus, cum sit forma accidentalis. Et nota quòd hæc tres diuisiones posite sunt ad inuestigandum genus quòd ponitur in diffinitione animæ. Alias tres ponit Philosophus ad inuestigandum materiã in qua recipitur anima, cum enim anima sit forma, vt dicemus, inuestigandum est in qua materia recipitur.

Prima igitur diuisio est hæc, substantiarum quædam est corporea, vt cælum, & homo, & lapis &c. quædam est incorporea, vt intelligentiæ, & Deus gloriosus, inter quas est hæc differentia, quòd substantia corporea cognoscitur per sensum, cum sit quantæ & subiecta accidentibus corporeis, vt sunt colores, & sapores, & figure &c. substantia vero incorporea solo intellectu cognoscitur & non subiecitur sensui,

cum ia ea non sint accidentia corporea.

Secunda diuifio, fubftantia corporea eft duplex, quædam eft naturalis, vt funt illa quæ habent in fe naturam. i. principium motus & quietis, vt declarau in primo tract. fuper fecundum librum Phyf. quædam eft artificialis, vt funt ille quarum principium eft agens artificiale, vt domus, quæ eft ab ædificatore, & gladius qui eft à fabro, inter quas eft hæc differentia quòd fubftantia corpora naturalis eft fubftantia quo ad materiam & quo ad formam, vt materia prima ligni eft fubftantia, licet in potentia, & forma ligni eft fubftantia, fed in artificialibus fola materia eft fubftantia, forma vero eft accidens, vt in gladio ferrum eft fubftantia, fed figura quæ eft forma gladij non eft fubftantia, fed qualitate, & ponitur in quarta fpecie qualitatís.

Tertia diuifio, corporum naturalium, quædam viuunt quædam non viuunt, illa viuunt quæ nutriuntur, & augmentantur, vt plantæ, & animalia, quod quomodo fiat declarabo in tractatu fequenti. illa non viuunt, quæ nec nutriuntur nec augentur, vt elementa, & lapides, & metalla &c. Et nota quòd fi inueniantur aliqua inanimata nutriri & augeri, vt ignis qui videtur nutriri ex lignis combuftis, & lapides, qui poft longum tempus videntur facti maiores, illud nutriri & augeri eft æquiuocum & improprium, vt declarabo in fequenti tractatu. Nota etiam quòd illa proprie viuunt quæ mouent feipsa, vt diximus in oñauo Phyf. fumendo motum etiam metaphyficum, vnde quæcunque mouent fe motu locali, vel motu nutritionis & augmenti dicuntur viuere, fimiliter quæcunque mouent fe motu metaphyfico, dato cafu quod non moueantur aliquo motu phyfico dicuntur viuere & hoc modo intelligentiæ & Deus gloriofus dicuntur viuere, quia licet non nutriantur nec augeantur nec moueantur fecundum locum, ramen intelligunt & volunt qui funt motus Metaph. & fic dicuntur viuere.

Secundo principaliter ex ijs diuifionibus fic colligitur difinitio animæ. Anima eft actus primus corporis phyfici organici potentia vitam habentis, hæc diffinitio declaratur quo ad fingulas partes. primo dicitur quod eft actus, & probatur fic, omnis fubftantia naturalis aut eft materia, aut for

ma, aut compositum, ut dictum est supra, sed anima non est materia puta corpus, quia anima recipitur in materia puta in corpore, sed materia non recipitur in materia, nec corpus in corpore, immo potius materia in se recipit aliquid quam recipiatur in alio. ergo anima non est materia nec corpus, nec est compositum, quia compositum ex anima & corpore est illud quod viuit, sed anima non est id quod viuit, sed est id quo animatum compositum viuit. ergo anima non est compositum. ergo à sufficienti diuisione est forma, sed forma est actus, quia forma dat esse actu rei cuius est forma, ut anima facit Socratem esse actu hominem. ergo conuenienter dicitur quod anima est actus, secundo dicitur quod est actus primus, id est substantialis & probatur sic, anima dat esse actu simpliciter rei animatae quae solum erat in potentia. ergo est actus substantialis. probatur consequentia, quia haec est differentia inter actum substantialem & actum accidentalem, quia actus, id est forma substantialis facit rem esse actu simpliciter, quae prius erat solum in potentia, actus vero, id est forma accidentalis facit rem esse secundum quid, id est secundum aliquod accidens, puta calor facit manum esse actu, non quidem absolute, quia iam est actu substantia, sed facit ipsam esse actu calidam. si ergo anima facit rem animatam esse actu simpliciter, cum solum in potentia esset sequitur quod est actus primus, id est forma substantialis, tertio dicitur corporis physici, quod probatur, cum omnis anima recipiatur in corpore ut forma in sua materia. ergo vel recipitur in corpore physici. i. naturali, vel in corpore artificiali, non in secundo, quia nobiliori corpori debetur nobilior forma, sed corpus physicum est nobilior artificiali, cum sit substantia quo ad materiam & quo ad formam, ut dictum est supra. ergo corpori naturali debetur nobilior forma, quae est anima, est enim nobilior inter omnes formas receptas in materia, ut dicemus infra. ergo anima est actus primus corporis physici & non artificialis, quarto dicitur organici. unde nota quod corporum naturalium quaedam sunt organica, quaedam non.

Corpora organice sunt illa quae habent diuersas instrumenta & varias partes propter exercenda varia opera quae com-

competunt rei, vt corpus hominis est organicum, habet enim diuersa instrumenta vt diuersas operationes exerceat, pura habet oculos vt videat, linguam vt loquatur &c.

Corpora non organica sunt illa quæ non habent diuersas partes propter diuersas operationes exercendas, vt corpus lapidis, & terra, & aliorum inanimatorum, probatur vero quod anima sit actus primus corporis physici organici sic, anima planetarum est in corpore organico. ergo multo magis anima sensitua, consequentia est manifesta, quia si anima imperfecta, vt vegetatiua, est in corpore organico, à maiori anima perfectior, vt anima sensitua, est in corpore organico. Antecedens vero probatur sic, In planta sunt diuersæ partes propter diuersa opera, vt sunt radices loco oris, vt attrahat nutrimentum ex terra, & est cortex vt protegat truncum, & sunt folia vt protegat fructum. ergo anima plantarum est actus corporis organici. Vltimo dicitur vitam in potentia habentis quod sic declaratur.

Vita sumitur dupliciter, primo pro esse viuo, secundo pro operatione vitæ, & audire, nutrire, videre &c. Corpus physicum organicum habet vitam actu.

Sumendo vitam, primo modo, quia actu viuificatur ab anima. Si vero sumatur vita, secundo modo, sic non semper habet vitam actu, id est operationem vitæ, nõ enim corpus animalis semper sentit, nec semper mouetur, sed potest sentire & se mouere, sic licet in oculo semper sit potentia visua, nõ tamen semper actu videt, vt patet dum animal dormit. Sic ergo intelligatur quod anima est actus primus corporis physici organici, id est habentis operationes vitæ in potentia, licet actu habeat animam, qua actu semper viuificatur. Hæc definitio animæ sic declarata conuenit cuilibet generi animalium. Nam vegetatiua in plantis est actus primus corporis physici organici, quod est corpus plantæ, similiter anima sensitua est actus corporis organici, quod est corpus animalis, similiter intellectiua est actus &c. quod est corpus humanum. Quomodo autem distinguantur ab inuicem declarabimus in quarto capite. Hæc de primo cap. sufficiant.

CAPVT III.

IN hoc secundo capite dāda est definitio animæ per eam
n iij sam

formalem, & per hanc demonstrabitur prima diffinitio data per materiam, & ibi fient tria.

Primo, ponitur secunda diffinitio.

Secundo, per eam demonstratur diffinitio prius data.

Tertio, declaratur quod hoc conuenienter fit.

Circa primum ponitur talis diffinitio, anima est principium vegetandi & sentiendi, & mouendi secundum locum, & intelligendi. Hæc diffinitio declaratur sic. Genera viuentium sunt quatuor quædam sunt quæ solum nutriuntur & augmentantur, sed non sentiunt. Et hæc vocantur viuentia vegetabilia ut plantæ, quædam vegetantur & sentiunt, sed non mouentur secundum locum, immo semper manent in eodem loco in quo generantur, & hæc dicuntur animalia imperfecta, ut ostrea & concha quæ generantur in mari, quædam vegetantur & sentiunt & mouentur secundum locum ad querendum cibum suum. Et hæc dicuntur animalia perfecta ut leo canis &c. Quædam vegetantur & sentiunt, & mouentur secundum locum, & intelligunt & dicuntur animalia rationalia, in rebus corporeis non inueniuntur plura genera viuentium. Suppositis his gradibus probatur quod anima sit principium vegetandi .i. nutriendi & augendi in plantis. Et similiter in quolibet genere viuentium, nam principium nutriendi & augendi, aut est anima, aut natura, non natura, quoniam natura solum mouet ad unam differentiam loci, puta sursum, ut natura ignis mouet ignem solum sursum, & natura lapidis mouet lapidem solum deorsum, sed vegetabilia non solum augentur quantum ad unam differentiam loci, pura sursum, sed ad differentias oppositas. Nam quo ad ramos augentur sursum, quo ad radices augentur deorsum, profundantur .n. radices in terram. ergo natura non est principium nutritionis & augmenti in vegetabilibus, sed anima, quod sit principium quo sentiunt animalia, & mouentur secundum locum, & nos intelligimus relinquitur ut manifestum, quoniam post separationem anime a corpore, nec sentit animal, nec se mouet secundum locum, nec homo intelligit, patet ergo quod anima est principium, & causa formalis qua viuimus, sentimus mouemur secundum locum & intelligimus.

Secun

Secundo, ex hac diffinitione sic demonstratur prima diffinitio, principium quo formaliter viuimus sentimus mouemur secundum locum est actus primus corporis physici organici, sed anima est principium quo formaliter viuimus sentimus &c. vt declaratum est. ergo anima est actus primus corporis physici &c. Maior sic probatur: principium quo formaliter viuimus, aut est materia, aut forma, aut compositum, puta principium quo Socrates viuit, aut est corpus Socratis. Et hoc non, quia corpus est, ut materia in quo recipitur vita, ergo non dat vitam, aut est ipse Socr. & hoc non, quia Socr. est ille qui viuit, ergo non est principium quo ipse Socr. viuit. Relinquitur ergo à sufficienti diuisione qd principium quo aliquid viuit sit forma sua, sed forma est actus, vt declaratum est supra. ergo principium quo formaliter viuimus est actus primus corporis physici organici. Et haec maior probata est. Minor vero est diffinitio animæ inuestigata à philosopho.

Tertio declaratur, qd hoc conuenienter actum sit. scilicet demonstrare primam diffinitionem per secundam. Vnde nota secundum Philosophum in primo Poster. qd quando de vna re dantur duæ diffinitiones, puta de domo, datur vna diffinitio, quæ est per materiam sic, domus est quid compositum ex lapidibus & cemento & tecto, secunda datur per causam finalem sic, domus est quid defendens nos à frigore pluuiæ & æstu. Et illa quæ datur per causam formalem, vel finalem, est medium ad demonstrandum eam, quæ datur per causam materialem sic arguendo, omne defendens nos à frigore pluuiæ & æstu est compositum ex lapidibus cemento & tecto, sed domus est defendens nos à frigore, pluuiæ, & æstu, ergo domus est quid compositum ex lapidibus lignis & cemento &c. vnde dixit Aristot. in j. Poster. quoddam diffinitio aut est conclusio, aut est demonstratio sola positione. id est ordine disferens, quod qualiter intelligatur declarauimus in compendio: maiori super primum lib. Post. sic in proposito, Arist. dedit duas diffinitiones de anima. Prima, fuit per materiam, nam corpus phys. organicum est materia in qua recipitur anima, sicut nascus est materia in qua recipitur similitudo. Secunda fuit per causam formalem, quia anima est principium formale, quo vi-

TRACTATVS I.

uit animatum vel sentit, vel mouetur secundum locum &c. Sicut scientia est principium formale quo scimus, & albedo est principium formale quo sumus albi, conuenienter igitur philosophus demonstrauit primam diffinitionem per secundam,

Et nota, qd hæc demonstratio, non est propter quid sed quia, procedit enim ab effectu nobis magis noto, qui est vegetare, sentire &c. Similiter, secunda diffinitio data de anima, non est vera & propria diffinitio, sed potius descriptio, quando enim res notificatur, per operationem suam, tunc describitur, ut declarauimus in compendio minori in tractatu de locis, cum igitur in secunda diffinitione notificetur anima per operationes suas, quæ sunt vegetare, sentire, &c. potius dicenda est descriptio, quàm diffinitio. Hæc de secundo capite sufficiant.

CAPVT III.

IN tertio cap. discutiendum est, quomodo hæc principia diuersa viuendi, se habent ad animam & ad se inuicem, vnde hic quaeruntur duo secundum philosophum.

Primo, quaeritur utrum vegetatiuum & sensitiuum & intellectiuium, sint diuersæ animæ, an sit distinctæ potentia, quæ tamen sint in eadem anima.

Secundo, quaeritur utrum omnes istæ potentia sunt in eadem parte rei animatæ, puta in cap. vel in corde &c. vel sint in diuersis partibus rei animatæ.

Ad primum respondet Philosophus, qd quando in re animata, est tantum vnum principium viuendi, puta solum vegetatiuum, tunc tale principium est anima, vnde in plantis vegetatiuum est anima & non potentia, quando autem in re animata sunt plura principia viuendi, vt in animali in quo est vegetatiuum, & sensitiuum & motiuium secundum locum: talia principia sunt potentia & non sunt anima, sed denominamus animam talis animati à nobiliori potentia ut anima quæ est in animali dicitur anima sensitiua à potentia sensitiua, quæ est nobilior quàm vegetatiua, similiter denominatur anima, quæ est in homine, anima intellectiua à potentia

tia

tia intellectiua, quæ est nobilior alijs.

Ad secundum responderet Philosophus, duabus conclusionibus.

Prima est, in animatis vegetatiuis .i. in plantis, & in animalibus imperfectis, ut sunt vermes, & lacerta, & vespe &c. potentia vegetatiua, & potentia sensitiua, & motiua secundum locum, & appetitiua, non distinguuntur subiecto, sed sunt in eadem parte ipsius animati. Hæc probatur primo quo ad plantas. Nam in omni parte ipsius plantæ, est potentia nutritiua, patet enim quod omnis pars plantæ viuificatur & virefcit, ergo nutritur, & in omni parte ipsius plantæ est potentia augmentatiua, quia proportionaliter omnis pars plantæ crescit. ergo potentia vegetatiua non distinguuntur subiecto in plantis, sed sunt in eadem parte ipsius plantæ, secundo probatur quo ad animalia imperfecta. Nam videmus in cauda lacertæ, decisa quod mouetur secundum locum, quod si sentit aliquid conueniens delectatur, si vero sentit disconueniens tristatur, puta si sentiat ignem, aut rem pungentem, sed delectatio & tristitia sunt in appetitu, ut dicemus in tertio lib. ergo vegetatiuum, & sensitiuum, & motiuum secundum locum, & appetitiuum, non distinguuntur subiecto, sed sunt in eadem parte animalis.

Secunda conclusio, potentia intellectiua, quæ diuiditur in intellectum agentem, & possibilem, distinguitur subiecto ab omnibus prædictis potentijs. probatur sic, omnes potentie prædictæ sunt affixæ organo corporeis, ut dicemus infra,

sed potentia intellectiua, ut probatur in tertio libro non est affixa organo corporeo. ergo non est in eodem subiecto, in quo est vegetatiua, & sensitiua. Præterea prædictæ potentie, ut dicemus infra, sunt potentie totius animati, sed intelle-

ctus est potentia solius

animæ. ergo dis-

tinguuntur

subie-

cto.

TRACTATVS SECVNDVS SVPER
secundum librum de Anima.

N hoc secundo tractatu agendum est de potentijs animæ in communi, & de parte vegetatiua, vnde diuidimus eū in quatuor capita.

Primo, declarabitur quot sint genera potentiarum animæ.

Secundo, ostendetur quo ordine tractandum est de potentijs animæ.

Tertio, describetur arbor, in qua continentur suo ordine omnes potentiz animæ.

Quarto, determinabitur de potentia vegetatiua, & de speciebus suis ex consequenti de anima vegetatiua.

CAPVT PRIMVM.

Circa primum caput vt plenior habeatur cognitio dicemus quot sunt genera animarū, & quot sunt modi viuendi, & quot sunt genera potentiarū animæ.

Circa primum nota, qd genus animarum est triplex, nam quædam est vegetatiua, & hæc est in plantis, quædam est sensitua, & hæc est in omnibus animalibus, quædam est intellectiua, & hæc est in solis hominibus, quarum hæc est sufficientia. Cum anima sit principium operationum vitæ, ut patet per secundam suam definitionem supra posita, quotuplex erit opus vitæ, totuplex est anima, sed opus vitæ est triplex.

Primum est illud, qd exercetur per organum corporeum, & per qualitates corporeas, quæ sunt calor, frigiditas, humiditas, & siccitas, causatur tamen à principio intrinseco, vt nutrire exercetur per organum corporeum, puta per stomachum, & per qualitatem corpoream, puta per calorem naturalem decoquentem cibum in stomacho, tamen est causatum ipsum nutrire à principio intrinseco, id est ab anima vegetatiua, quæ est intrinseca rei animatz ut forma sua. Et in hoc distinguitur ab opere rei inanimate, nam omnis operatio

ratio rei inanimatæ est à principio extrinseco, puta operatio quæ est in graui, & leui est à generante, & operatio quæ est in cælo, est ab intelligentia mouente, secundum ergo hoc opus vitæ, sumitur primum genus animæ quod est anima vegetatiua.

Secundum opus vitæ est illud, quod exercetur per organum corporeum, & causatur à principio intrinseco, sine tamen primis qualitatibus corporeis, ut sentire puta videre exercetur per organum corporeum, ut per oculum, & à principio intrinseco, id est ab anima, & sine qualitate corporea, non enim fit sensatio per calorem, vel frigiditatem, sed solum quia recipitur intentionaliter species rei sensibilis, in organo sensus, ut declarabitur, & hoc opus vitæ est ab anima sensitiva.

Tertium opus vitæ est illud, quod exercetur sine organo corporeo, & à principio intrinseco, sine tamen omni qualitate sensibili, & sine conditionibus indiuiduantibus, ut intelligere fit ab anima sine organo corporeo, quia intellectus non est affixus alicui organo corporeo, ut probatur in tertio libro, & est à principio intrinseco, id est ab anima, & sine qualitate sensibili. Non enim intellectus intelligit rem, puta lapidem, in quantum est albus, aut calidus, aut durus. Et sine conditionibus indiuiduantibus, non enim intelligit lapidem, in quantum est hic vel hic lapis, nec in quantum habet hanc vel hanc quantitatem, sed solum intelligit in vniuersali in quantum est lapis & in quantum est substantia corporea inanimata &c. Et hoc opus est ab anima intellectiua, patet ergo quod tres sunt animæ, quarum prima est imperfecta, quia est propinqua formæ rei inanimatæ, secunda est perfectior, quia opus suum quod est sentire est immaterialius, quia non exercetur per qualitates corporeas, tertia est perfectissima quia opus suum quod est intelligere est maximè immateriale, cum non sit per organum materiale, & in hoc assimilatur substantijs separatis quæ sunt immateriales, & in nullo corpore recipiuntur.

Secundo videndum est quot sunt modi viuendi vel genera viuentium, & dico quod sunt quatuor scilicet vegetatiuum sensitiuum motiuum secundum locum, & intellectiuum.

TRACTATUS I.

lectium. Quorum sufficientia est hæc. Genera viuentiū distinguuntur secundum diuersos gradus viuentium, qui sunt tantum quatuor.

Primus, est eorum, quæ solum habent principium vegetatiuum, vt est nutrire seipsum, & augeri, & generare sibi simile. Et sic plantæ sunt primum genus viuentium.

Secundus, est eorum quæ habent in se principium vegetatiuum & sensitiuum, sed non mouentur de loco ad locum, immo semper permanent in loco vbi producta sunt, & sic animalia imperfecta, vt ostrea & conchilia sunt secundum genus viuentium.

Tertius, est eorum, quæ habent in se principium vegetatiuum sensitiuum, & motiuum secundum locum. Et sic animalia perfecta, vt canis & leo &c. Sunt tertium genus viuentium.

Quartus, est eorum, quæ habent in se principium vegetatiuum, & sensitiuum, & motiuum secundum locum, & intellectiuium. Et sic homo est quartum genus viuentium, sumendo genus largo modo, pro quolibet multitudine. Si autem quærat quare appetitiuum non facit quintum genus viuentium.

Respondetur secundum philosophum, quod hæc est, quia appetitiuum est in omni viuente, in quo est sensitiuum. Nā omne animal dum sentit & similiter homo, vel sentit aliquod conueniens. Et sic sequitur delectatio, vel sentit aliquod disconueniens & nocium, sic sequitur tristitia, sed delectatio & tristitia sunt in appetitu sensitiuo in quo sunt alix passionēs, vt dicam in tertio lib. cum ergo in omni animali imperfecto & perfecto, & in homine sit sensitiuum, ergo etiam est appetitiuum. Et sic non facit genus quintum viuentium, distinctum à quatuor prædictis.

Tertio videndum est quod sunt genera potentiarum animæ sub quibus omnes alix particulares potentie collocantur, & dico quod sunt quinque, scilicet vegetatiuum, sensitiuum, appetitiuum, motiuum secundum locum, intellectiuium, quarum sufficientia est hæc, potentia distinguitur secundum distinctionem sui obiecti, sicut scientia distinguitur secundum distinctionem sui subiecti, obiectum autem potentiarum

rum animæ quincupliciter consideratur.

Primo, in quantum est corpus vniuersum ipsi potentiz, & sic circa ipsum est potentia vegetatiua. Nam potentia hæc solum nutrit corpus in quo est, & auget.

Secundo, consideratur in quantum est corpus vniuersum ipsi potentiz non quidem secundum suum esse reale, sed per speciem sensibilem receptam in organo sensus, & sic circa ipsum est potentia sensitiua. Nam res sensibilis non vniuersum sensui secundum se, sed solum secundum suam similitudinem, verbi gratia. Ad hoc quod videam lapidem, non est necesse, quod lapis tangat oculum meum, sed solum quod similitudo lapidis recipiatur in oculo sicut recipitur in speculo.

Tercio, consideratur in quantum est ens vniuersum ipsi potentiz secundum suam speciem intelligibilem representantem rem in vniuersali & sine conditionibus indiuiduantibus, quod qualiter fiat dicemus in tertio lib. & circa ipsum versatur potentia intellectiua. De hac pertransco vsque ad tertium librum.

Quarto, consideratur in quantum trahit ad se animam, vt quoddam amatum & desideratum, & circa ipsum est potentia appetitiua. Bonum enim quod est obiectum appetitus trahit ad sui amorem animam desiderantem, immo & ipsum animal desiderans, & sic circa ipsam est potentia appetitiua.

Quinto, consideratur in quantum terminat motum localem ipsius animalis perfecti, quod mouetur de loco ad locum vt necessaria sue vitæ acquirat, & sic circa ipsum versatur potentia motiua secundum locum. Patet igitur quare sunt quinque genera potentiarum. Hæc de primo capite sufficiant.

CAPVT II.

Circa secundum caput declarandum est quo ordine sit tractandum de prædictis generibus potentiarum, propter quod ponuntur duæ conclusiones.

Prima est, prius agendum est de vegetatiua quam de sensitiua,

sitiuo, est enim magis commune, quia omnia viuientia inferiora vegetantur, sed non omnia sentiunt, vt patet in plantis, & prius agendum est de sensitiuo, quàm de motiuo secundum locum, eadem ratione, nam omne animal sentit, nō tamen mouetur secundum locum, ut patet in animalibus imperfectis, vt in ostrea &c. Et prius agendum est de motiuo secundum locum, quàm de intellectu, quia est minus commune. In omnibus. n. viuentibus corruptibilibus in quibus est intellectus, est etiam vegetatiua, & sensitua, & motiua secundum locum, ut patet in hominibus, non tamen in omnibus in quibus est vegetatiua, & sensitua, & motiua, est intellectus, vt patet in animalibus irrationabilibus. ergo intellectum est minus comune, conuenit. n. soli homini inter omnia animalia. Dixi autem in viuentibus corruptibilibus vt excludā substantias separatas in quibus est intellectus, & tamen non habent vegetatiuam potentiam, quia vt incorruptibiles non indigent nutritione, nec habent sensitium, nec motiuum secundum locum, cum sint incorporeæ, & licet dicantur angeli moueri secundum locum, ille motus non est physicus, quia omne mobile motu physico est corpus, sed mouentur motu metaphysico, vt habet declarari in sacra Theologia.

Secunda conclusio. Si volumus de ijs potentijs habere notitiam prius agendum est de earum obiectis, secundo de actibus, tertio de ipsis potentijs, & per ipsas potentias cognoscemus substantiam animæ, v. g. prius agendum est de colore quod est obiectum visus, quod de visu, postea per ipsum visum & alias potentias sensitivas cognoscemus substantiam animæ sensitivæ. Hæc conclusio probatur sic. Prius tractandum est de eo quod ponitur in diffinitione actus & potentie, quod de actu & potentia, vt prius tractandum est de animali, quod de homine, animal enim ponitur in diffinitione hominis, sed obiectum ponitur in diffinitione actus, puta si volo diffinire actum qui est videre, diffiniam per ipsum visibile, quod est obiectum visus, ergo prius tractandum est de obiecto, quàm de actu, item actus ponitur in diffinitione potentie. nam potentia, vt dicitur in 5. Metaph. est principium agendi, vel patiendi, vt visus est principium videndi, in hoc quod dico agendi inducitur actus, ergo prius agendum est de actu, quàm de potentia.

potentia. item per proprias passionēs ipsius animæ, & per eas ultimatē cognoscemus substantiam animæ, ut per potētiās vegetatiuas cognoscemus animam vegetatiuam, & per sensitiuas animam sensitiuam &c. Hoc ergo ordine seruato prius agemus de potentia vegetatiua iuxta primam conclusionem, & prius de obiecto potētiæ vegetatiuæ, iuxta secundam conclusionem. Hæc de secundo cap. sufficiant.

CAPVT III.

In tertio cap. describenda est arbor, in qua continentur omnes potētiæ animæ suo ordine, sic incipientes. Animæ tres sunt, vegetatiua, sensitiua, intellectiua. Genera viuētiū sunt quatuor, vegetatiuum, sensitiuum, motiuum, secundū locum intellectiuis. Genera potētiarum sunt quinque, vegetatiuum, sensitiuum, motiuum secundū locum, intellectiuis, appetitiuis. Potētiæ vegetatiuæ sunt tres, nutritiua, augmentatiua, generatiua. Nutritiua habet quatuor vires sibi deseruiētes, scilicet attractiuam, retentiua, digestiuam, expulsiuam. Augmentatiua nullam habet sibi deseruiētem. Generatiua habet tres vires sibi deseruiētes. sc. seminatiuam, immutatiuam, formatiuam. Potētia sensitiua est duplex. sc. exterior, & interior. Sensitiua exterior diuiditur in quinque, in visum, auditum, odoratum, gustum, & tactum. Sensitiua interior diuiditur in quatuor sc. Comm. & B. Th. sc. in sensum cōmunem, phantasiam, cogitatiua, memoratiua. Potētia motiua secundū locum est duplex. sc. progressiua, & dilatatiua, vel restrictiua. Potētia intellectiua est duplex. sc. intellectus passibilis, & intellectus agens. Potētia appetitiua est duplex. sc. appetitus intellectiuis, & appetitus sensitiuis. Appetitus intellectiuis est ipsa voluntas, & liberum arbitrium, quod est eadem potētia cum voluntate, quod declarabitur infra. Appetitus sensitiuis est duplex. sc. concupiscibilis, & irascibilis, in quibus sunt vndecim passionēs, vt declarabitur infra. Hæc est summa potētiarum animæ secundū viam Thomisticam.

IN quarto cap. tractandum est de potentia vegetatiua, & de speciebus suis. Est enim primum genus potentiarū, & magis commune, vt supra diximus. ergo ab ea, vt à priori inchoandum est. & ibi dicemus quatuor.

Primo, de obiecto.

Secundo, de actibus.

Tertio, de potentijs.

Quarto, de anima vegetatiua.

Circa primum nōra, quod obiectum potentiae vegetatiuae dicitur alimentum, vel nutrimentum, quod tripliciter consideratur.

Primo, inquantum conuertitur in substantiam nutriti. verbi gratia, consideratur panis, vt per decoctionem caloris naturalis in stomacho conuertitur in carnem, & sanguinem hominis comedentis, vt homo non deficiat, & conseruetur in esse viuo. & sic alimentum est obiectum circa quod operatur potentia nutritiua, & sic diffinitur. Alimentum est illud, quod est in potentia, vt conuertatur in substantiam rei nutritae, vt conseruetur in esse viuo.

Secundo, consideratur secundum quod est quantum, quodlibet enim alimentum est corpus, & est compositum ex quatuor elementis, quia secundum philosophum ex eisdem componitur animatum, & ex eisdem nutritur, sed animata componuntur ex quatuor elementis. ergo ex eisdem nutriuntur, secundum ergo quod alimentum est quantum, est augmentatiuum rei animatae, quia quantum additum quanto, facit magis quantum, quod est augere. vnde alimentum, vt est quantum, & corpus est causa augmenti in re animata, & hoc modo alimentum est obiectum, circa quod operatur potentia augmentatiua, & sic diffinitur. Alimentum est illud quod est augmentatiuum rei animatae, vt ad debitam quantitatem deueniat.

Tertio, consideratur, vt est superfluum, vel superabundans rei animatae post nutritionem suam, verbi gratia, si Socr. comedit duos panes, isti duo panes decocti in stomacho, & digesti

gesti per virtutem caloris naturalis dicuntur alimentum actu ipsius Socr. dico actu, quia cibus antequam sit digestus non dicitur alimentum actu, quia non sine mora potest conueri in substantiam rei nutritæ. natura igitur per potentiam nutritiuam conuertit partem huius alimenti in substantiam ipsius Socr. & per potentiam augmentatiuam apponit partem ad augmentum ipsius Socr. si debitam quantitatem nōdum adeptus est, puta vsque ad 21. annum, quod si de ipso alimento actu adhuc superest, tunc natura per potentiam generatiuam conseruat illam partem superabundantem in vasis seminalibus, quæ dicuntur membra genitalia, vt per illam partem possit animal sibi simile in specie generare. & sic circa ipsum alimentum superabundans operatur potentia generatiua. Et nota, q̃ illud elementum superabundans dicitur semen. Quod sic diffinitur, semen est superfluum alimentum. i. est pars alimenti, quod ordinatur ad generandum sibi simile in specie. Ex his patet quid sit alimentum, & quomodo circa ipsum diuersimode operantur nutritiua, augmentatiua, & generatiua.

Secundo, tractandum est de actibus harum potentiarū qui sunt nutrire, augere, & generare. Et dicemus duo.

Primo, quid sit.

Secundo, probatur q̃ sunt ab anima principaliter, & non à qualitatibus elementorum.

Circa primum nota, quod nutritio proprie dicta sic diffinitur.

Nutritio, est conuersio alimenti in substantiam rei nutritæ, & hæc diffinitio competit soli rei viuenti, quæ proprie nutritur. Nullum enim inanimatum vere nutritur, quia per calorem naturalem nihil conuertitur in substantiam rei inanimate, licet sit instantia de igne, qui videtur nutriri ex lignis, & alijs combustibilibus. Sed quomodo id contingat declarabitur in solutione argumentorum. Augmentum sic diffinitur. Augmentum proprie est per conuersionem nutrimenti deductio rei viuētis à minori ad maiore quantitatem, & hæc diffinitio etiam competit soli rei animatæ, quæ sola proprie augetur. vnde nota, q̃ augmentum sumitur dupliciter.

Epit. Lauelli.

o Primo,

TRACTATUS II.

Primo, communiter, & sic diffinitur. Augmentum est præexistenti quantitati additamentum, & secundum hunc modum dicuntur inanimata augeri, puta si lineæ bicubitæ addatur cubitus dicetur aucta augmento communiter dicto.

Secundo, sumitur propriæ, & diffinitur sic. Augmentum est maioritas facta in priori, quanto per conuersionem alimenti in substantiam aucti, & sic conuenit solis animatis, non enim quando augetur paries conuertitur lapis in substantiam parietis, sed solum per ædificatorem apponitur lapidis lapidi.

Nota tamen, quod hic est instantia de igne, qui videtur augeri ex hoc, quod ligna combusta transeant in substantiam ipsius ignis, sed hoc declarabitur in solutione argumentorum. Generatio vero sic diffinitur. Generatio est à principio intrinseco rei productio similis in specie ipsi generanti, & hæc diffinitio competit soli rei viuenti, unde nota, quod sumitur dupliciter.

Primo, pro omni mutatione, quæ est à non esse ad esse, siue sit à principio extrinseco, siue intrinseco, & hoc modo agitur de ea in quinto libro physicorum, & est communis rei inanimatæ, unde hoc modo lapis dicitur generari, quia producitur à non esse ad esse à principio extrinseco, puta à cælo.

Secundo, sumitur pro productione rei à principio intrinseco ipsi rei genitæ, puta quando generatur puer producitur à virtute, quæ est in semine ministrato à patre generante, & illud semen secundum virtutem remanet in puero genito, & per hoc dicitur generari à principio intrinseco, & hoc modo generatio competit soli rei viuenti, & sic de ea agitur in lib. de Anima. Patet igitur quid sint actus potenciarum vegetatiuarum.

Secundo, probandum est, quod isti actus sunt principaliter ab anima vegetatiua. dico principaliter quia instrumentali-ter sunt à calore naturali, qui habet actionem ignis virtualiter, quæ actio est decoctio. antequam enim alimentum conuertatur in substantiam nutriti. necesse est quod decoquatur in stomacho, & decoctio attribuitur igni formaliter.

aut igni virtualiter, qui est calor naturalis. loquendo ergo instrumentaliter nutritio, & augmentum sunt à calore naturali. principaliter vero sunt ab anima, sicut gladius principaliter fit ab arte, quæ est in mente artificis, instrumentaliter vero fit à malleo. Quod autem principaliter sint ab anima, probatur sic. Actio naturalis principaliter attribuitur formæ, quia vnumquodque operatur in quantum habet formam, ut patet etiam in artificiatu, in quibus nulla est operatio, nisi forma artificiatu sit in mente artificis, puta artifex nunquam produceret gladium, nisi in mente sua haberet formam gladii, sed anima est forma rei viuientis, ut probatum est supra ergo anima est principaliter causa operationum naturalium, quæ sunt in viuente. scilicet nutrire, augere, generare.

Præterea anima est illa, quæ requirit tantam quantitatem in re viuente, ita quod in qualibet specie datur maximum, & minimum corpus, in quo potest recipi anima intellectiua. & etiam minimum, ut dictum est in 2. tract. super primū phys. ergo anima est illa, quæ principaliter est causa augmenti. & per consequens etiam nutritionis. ad quam sequitur augmentum. Præterea actio, quæ est naturalissima omnibus, & solis viuentibus, principaliter est ab anima vegetatiua, sed generare sibi simile in specie est actio, quæ conuenit omnibus, & solis viuentibus, ut patet quod plantæ generant sibi simile in specie sua, & animalia, & homines. ergo hæc actio, quæ est generare, competit principaliter animæ vegetatiuæ. Nota tamen secundum Philosophum, quod ad hoc, ut omne viuens generet sibi simile in specie tria requiruntur.

Primo, quod sit competētis ætatis. & ideo pueri non possunt generare propter ætatem suam imperfectam.

Secundo, quod non sit orbatum, id est priuatum aliquo membro requisito ad generationem. & ideo eunuchi non possunt generare.

Tertio, quod non sit productum ex putrefactione, ut vermis. licet enim aliqua producta ex putrefactione possint generare sibi simile, puta mus productus ex putrefactione potest producere alium murem, non tamen omnia sic producta possunt producere sibi simile, puta musca non generat forte muscam, sed omnes producuntur ex aliqua materia

putrefacta. patet igitur quid sint actiones potentiarum vegetatiuarum. & quomodo principaliter sunt ab anima, instrumentali ter vero sunt à calore naturali.

Tertio, principaliter agendum est de potentijs vegetatiuis, quæ sunt nutritiua, augmentatiua, generatiua. Vnde nota, quod nutritiua data est ipsi rei viuenti, vt debito tempore, puta 10. aut 20. aut 60. annis, vel plus. sed solum quod cõperit vnique speciei conseruetur in esse viuo. nam cū resoluatur substantia rei viuentis, sicut oleum resoluitur, & consumitur in lampade ab igne, nisi per potentiam nutritiuam conuerteretur alimentum in substantiam rei nutritiuam, vt fiat restauratio de eo, quod est consumptum, cito viuens deficeret, & corrumpere tur, sicut si non fieret appositio in lampade per aliud oleum, cito lumen lampadis deficeret. & hinc est quod videmus hominem non posse plus, q̃ per tres, aut sex dies sine cibo viuere, quoniam continue cõsumitur substantia corporis sui, & cum non fiat restauratio per cibum nouum, ideo tandem moritur. Augmentatiua vero data est ipsi rei viuenti, vt ad debitam quantitatem deueniat secundum conuenientiam suæ speciei, nam cum viuentia ex paruo semine generentur, etiam cum parua quantitate nascuntur. & ideo vt ad conuenientem quantitatem deducantur data est eis potentia augmentatiua. Generatiua vero data est, vt perpetuetur species rei viuentis, quia enim omne indiuiduum rerum viuentium inferiorum est corruptibile, nisi per generationem produceret sibi simile in specie, cito species deficeret. & ideo pulchre inquit Auerr. in secundo de Anima, commen. 34. Sollicitudo diuina, cum non potuerit facere ipsum viuens permanere. i. perpetuari secundum indiuiduum misèra est, in dando ei virtutem generatiuam, qua potest permanere in specie. Hæc ille. Patet igitur ad quid potentia vegetatiua datæ sunt omnibus viuentibus corruptibilibus, vt autem potentia nutritiua possit alimentum conuertere in substantiam nutritiue date sunt ei quatuor vires ei deseruientes secundum Auicēnam.

Prima est attractiua, cuius officium est appetere, & attrahere nutrimentum ad stomachum, vel ad locum, qui sit loco stomachi, nisi enim animal appeteret cibum nunquam

come-

comederet, & sic deficeret.

Secunda, dicitur retentiuā, cuius officium est tandiu retinere cibum in stomacho, quandiu decoquatur. vnde quando hæc virtus debilitatur animal patit vomitum, vt patet in infirmo graui.

Tertia, dicitur digestiua, cuius officium est digerere, & decoquere nutrimentum retentum in stomacho, vt post conuertatur in substantiam nutriti.

Quarta, dicitur expulsiua, cuius officiū est expellere partes crassas, vel superfluas nutrimenti. Nullus est enim cibus, in quo non sit aliqua pars non conuertibilis in substantiam nutriti, & ideo ille partes expelluntur varijs modis, partim stercore, partim vrina, partim spuro, partim sudore &c.

Augmentatiua nullas habet sibi deseruientes, quoniam simul cum nutritiua, & omnibus quatuor suis viribus, potens est ad extendendum omnia membra corporis proportionabiliter, & sic causatur augmentum.

Generatiua tres virtutes habet sibi deseruientes.

Prima, dicitur seminatiua, cuius officium est ex alimento superabundanti, de quo datum est supra colligere semen, & illud reseruare in partibus genitalibus.

Secunda, dicitur immutatiua, cuius officium est permiscere semina masculi, & feminx, & contemperare, secundum quod expedit formationi cuiuslibet membri in eo quod generatur.

Tertia, dicitur formatiua, cuius officium est ex seminibus sic permixtis, membra omnia in eo quod generatur formare, & configurare. Hæc de potentijs vegetatiuis sufficiant.

Quarto, principaliter declarandum est, quid sit anima vegetatiua, & sic diffinitur ab Arist.

Anima vegetatiua est illa, quæ est generatiua alterius, quæ est eiusdem speciei cum suo generante, ut in planta, puta in pomo, Anima vegetatiua est illa, per quam pomum generat pomum, & oliua generat oliuam. Sed dubitatur, quare Philosophus non diffinit eam per hunc actum, qui est nutrire, vel augere, sicut diffinit per generare. Respondet Philosophus, quod hoc conuenienter actum est, quia nutrire

est actus imperfectior, quàm augere, & augere, quàm generare. Vnde generare est actus perfectus, & tanquam finis animæ vegetatiuæ, tunc enim aliquid perfectum est, cum sibi simile producere potest. Cum igitur res ordinata ad finem conuenienter denominetur, & notificetur per suum finem, & generare sit finis animæ vegetatiuæ, ut dictum est, merito Philosophus descripsit animam vegetatiuam per hunc actum qui est generare.

Vltimo, quædam argumenta soluenda sunt.

Primum probat, quod cognoscamus actus per potentias, & non econuerso, sic, potentia est prior actu. ergo per potentias cognoscimus actum. Antecedens patet, quia potentia est causa sui actus, ut visus est causa actus videndi, sed omnis causa est prior suo effectui. ergo potentia est prior suo actu. consequentia vero probatur sic. scientia procedit ex notioribus, & prioribus, ut probatur in primo Poster. ergo si potentia est prior suo actu, cognoscimus actum per potentiam, & non econuerso.

Ad hoc dicitur, quod aliquod est prius dupliciter.

Primo, secundum se, & secundum naturam suam, quia .s. prius habet esse, & sic omnis causa est prior suo effectui.

Secundo, aliquid est prius secundum cognitionem nostram, quia .s. prius cognoscitur à nobis, licet si posterius secundum suum esse. & hoc modo negatur, quod potentia sit prior actu, nec omnis causa sit prior suo effectui, immo in naturalibus prius cognoscimus effectum, & per effectum cognoscimus causam.

Secundum probat, quod nutriri, & augeri competat alteri, quod rei animatæ sic, ignis est res inanimata, & tamen nutritur ex oleo, & lignis combustis, per appositionem enim lignorum ignis conseruatur, & etiam exaugetur, quanto enim plura combustibilia apponuntur, tanto magis augetur ignis. ergo nutriri, & augeri competit alteri rei, quod rei animatæ.

Ad hoc respondet B. Th. quod ignis non proprie, sed similitudinarie nutritur, & augetur, quod declaratur sic. illud proprie nutritur in cuius substantiam alimentum conuertitur sine generatione alterius individui, verbi gratia, Socrates nutritur, quia in substantiam ipsiusmet. Socratis alimentum conuertitur. non enim ex hoc, quod nutritur sit alius ho-

mo,

mo, immo post nutritionem remanet ipsemet Socr. illud autem similitudinarie nutritur, in quo videtur alimentum conuer-
 ti, & tamen in rei veritate non conuertitur, sed ex tali ali-
 mento generatur de nouo aliud indiuiduum, sic accidit in
 igne, quando lignum apponitur igni, lignum dum combu-
 ritur non transit in substantiam præcedentis ignis, sed in ta-
 li ligno nouus ignis generatur, ita quod tot sunt ignes quot
 sunt combusta ligna, licet videantur esse vnus ignis, quia se-
 tangunt, similiter illud proprie augetur, quod existens idem
 numero recipit maiorem quantitatem, vt Plato, quando est
 puer vnus cubiti, & quando est duorum cubitorum est idem
 homo, qui prius erat. illud autem secundum similitudinem
 augetur. quod videtur existens idem recipere maiore quan-
 titatem, & tamen non remanet idem quod prius erat, sed fit
 aliud, sicut si tabulæ bicubitæ addatur tertius cubitus non
 remanet eadem tabula: sed fit alia, quia per additionem no-
 uæ partis fit aliud totum, sic accidit in igne, quando appo-
 nitur lignum, & comburitur fit nouus ignis, qui addi-
 tus priori igni facit aliud totum, id est ignem a-
 lium compositum ex præcedenti igne: &
 ex eo qui de nouo generatur in ligno
 appposito. Patet igitur, quod so-
 la animata proprie nutriun-
 tur, & augentur, licet
 metaphoricæ con-
 ueniat alijs
 inani-
 matis. Hæc de secundo tractatu
 super secundo libro de
 Anima dicta suf-
 ficiant.

¶

TRACTATVS III.

TRACTATVS TERTIVS, SVPER

*secundo libro de Anima, de potentia sensu
sitiua exteriori.*



IN hoc tertio tract. agendum est de potentia sensitiua exteriori, & de speciebus suis, & diuidimus eum in sex capita.

In primo, agitur de sensu in communi, non applicando ad aliquem sensum in particulari.

In secundo, agitur de visu.

In tertio, agitur de auditu.

In quarto, agitur de odoratu.

In quinto, agitur de gustu.

In sexto, agitur de tactu.

CAPVT PRIMVM.

IN primo cap. agendum est de sensu in communi quantum ad illa, quæ conueniunt cuilibet sensui. Et quia dictum est supra, quod prius agendum est de obiecto. Secundo de actu. Tertio de potentia. Seruantes hunc ordinem, primo agitur de obiecto sensus, quod est sensibile. Secundo, de actu, qui est sentire. Tertio, de potentia, quæ est ipse sensus. Et nota, quod ea quæ hic dicuntur conueniunt omni sensui, tam exteriori, quam interiori.

Circa primum, quæritur quotuplex est sensibile, quod à sensu cognoscitur.

Respondeo, secundum Philosophum est triplex.

Primo, est sensibile proprium.

Secundo, est sensibile commune.

Tertio, est sensibile per accidens.

Sensibile proprium est illud, quod solum ab vno sensu sentitur, & circa ipsum non decipitur sensus, ut sonus est proprium sensibile, quia à solo auditu percipitur, & non fallitur auditus in sentiendo sonum, utrum sit acutus, an grauis dummodo organum sit dispositum, quod dico, quia si organum sensus

sus est indispositum, tunc potest decipi sensus, v. g. quia lingua febricitantis est aspera humore cholerico, ideo dulcia videntur sibi amara, & secundum distinctionem proprii sensibilibus distinguuntur sensus, ut dicemus infra, ubi assignabimus sufficientiam quinque sensuum exteriorum.

Sensibile commune est illud, quod à pluribus sensibus potest sentiri, vel ab omnibus. & circa ipsum potest sensus errare. Hæc sensibilia communia sunt quinque secundum Aristotelem, scilicet motus, quies, numerus, figura, magnitudo. nam motus potest videri, & audiri, & tangi &c. secundum autem prospectiuos, ut patet per Alonem, & Vetulionem in prospectiuis suis sunt 20. scilicet distantia, situs, corporeitas, figura, magnitudo, continuitas, distinctio, numerus, motus, quies, asperitas, lenitas, raritas, diaphaneitas, spissitudo, soliditas, pulchritudo, turpitudine, similitudo, dissimilitudo. & circa hæc sensibilia communia potest sensus errare, v. g. si ponatur remus in aqua, dum nauigatur apparebit figura ipsius tortuosa, & brevis, si ex hac apparentia volo indicare remi figuram esse tortuosam decipitur sensus meus. Similiter vulgares qui dicunt solem non esse maiorem scuto, quia non videtur ab eis sub maiori figura decipiuntur. est. n. maior tota terra, ut probat Astrologus.

Sensibile per accidens est illud, quod non sentitur, nisi mediante alio, ut campana est sensibile per accidens, quia non sentitur, nisi mediante sono.

Sed nota, quod ad hoc, quod aliquid sit sensibile per accidens duo requiruntur.

Primo, quod non immutet sensum, nec quantum ad speciem sensibilem, nec quantum ad modum sentiendi. Nam si mutat sensum quantum ad speciem sensibilem receptam in organo sensus est sensibile per se, & proprium, v. g. quia species albedinis recepta in oculo immutat visum, & species soni recepta in aure immutat auditum. Albedo, & sonus dicuntur sensibilia per se, & propria. Si vero immutant sensum quantum ad modum sentiendi dicuntur sensibilia per se, sed communia, v. g. figura, si est in corpore paruo minus immutat visum, quam quando est in corpore magno. & similiter quando est remota à visu minus immutat. nam homo à remotis videtur paruus, quando est propinquus videtur magnus.

gnus. & tamen eadem figura *fm* se est in homine distante, & in eodemmet propinquo ipsi videnti. *fm* ergo quod figura est in alio, & alio situ diuersimode immutat sensum. & propter hoc apud B. Th. sensibilia cōmunia sunt sensibilia per se, quia licet non sentiantur, nisi mediantibus sensibilibus proprijs, puta non videtur magnitudo, nisi colorata, tamen alio & alio modo immutat sensum, *fm* quod est in maiori, vel minori corpore, & *fm* quod est in diuerso situ. illud autem quod non immutat sensum, nec *fm* speciem receptā in organo, nec *fm* modum sentiendi dicitur sensibile per accidens, vt campana sentitur per accidens ab auditu, quia remoto sono nullo modo immutat auditum, & remoto colore, ac figura &c. nullo modo immutat visum.

Secundo, requiritur quod illud, quod per accidens cognoscitur ab vno sensu sit aptum natum cognosci per se ab aliqua alia potentia cognoscitiua, siue sit potentia sensitua exterior, siue sensitua interior, siue sit intellectus. Exemplum primi, dulcedo mellis per accidens cognoscitur à visu. si .n. video mel cognosco, quod est dulce. hæc tamen dulcedo per se cognoscitur à gustu. Exemplum secundi. Plato per accidens videtur, non .n. videtur, nisi quia est coloratus, & tamen per se cognoscitur à potentia cogitatiua, de qua dicemus in tertio lib. quod cognoscit per se omnia indiuidua substantiæ propter sui nobilitatem. Exemplum tertij, homo sentitur per accidens à visu. non .n. sentitur, nisi inquantum est coloratus, vel frigidus, aut calidus &c. & tamen per se cognoscitur ab intellectu, cuius officium est cognoscere omnia vniuersalia, siue genera, siue species, vt dicemus in tertio lib. Ex his patet quod duplex est sensibile, quod à sensu cognoscibile est, de distinctione sensibilis per se, & proprii dicemus infra.

Circa secundum quæritur, vtrum sentire sit actio, an passio, & quomodo differt ab intelligere.

Respondeo secundum Philosophum, quod sentire est passio, & alteratio quædam.

Sed nota, vt inquit Philosophus, quod passio sumitur dupliciter, similiter alteratio. Primo, sumitur propriæ, & est quando patiens priuatur aliqua forma, præcipue conuenienti per actionem agentis contrarij, vt quando aqua priuatur frigori

frigiditate, & recipit calorem per actionem ignis propriam, aqua patitur, & alteratur. Secundo, sumitur communiter pro receptione cuiuslibet formæ etiam perficientis suum subiectum, vt quando intellectus recipit scientiam dicitur passio, & alteratio communiter, quæ alio termino dicitur alteratione perfectiua, & quando materia recipit formam substantialem, qua sit actu, & perficitur, dicitur pati, & alterari communiter. Quando igitur dicit Philosophus, quod sentire est pati, & alterari. intelligendum est quod sentire quando est cum lesione organi dicitur pati proprie, vt quando Socrates tangit ferrum ignitum, ipsum sentire est proprie pati, quando vero est sine lesione, immo cum delectatione dicitur pati communiter, & perfectiue, vt quando Socrates tangit conuenienter calidum, odorat suaves odores &c.

In quo vero differat ab intelligere, dico pro nunc, quod differt in duobus. Primo, omne sentire fit per aliquod organum corporeum, vt videre per pupillam oculi, tangere per neruum &c. De his .n. organis dicemus in particulari in seq. sed intelligere non fit per aliquod organum corporeum. hoc supponatur, quoniam probatur in 3. libro. Secundo, differt, quia omne sentire fit per aliquod medium corporeum, per quod deferretur species rei sensibilis, vsque ad organum sensus, vt per aërem deferretur species soni, vsque ad miringam auris, quod quomodo fiat dicemus infra, sed intelligere non fit per aliquod medium corporeum, vt deferretur speciem intelligibilem vsque ad intellectum. species .n. intelligibilis est pure spiritualis, nec est apta nata recipi in aliquo medio corporeo. Hæc de sentire in cōmuni sufficiant.

Circa tertium quærentur duo.

Primo, quomodo se habet sensus ad sensibilia, vtrum habeat ea in se actu, & potentia. puta vtrum visus habeat in se omnes colores, vel sit in potentia ad recipiendum eos.

Secundo, vtrum sensus sit causa efficiens sui actus, vel solum sit recipiens, puta vtrum visus sit causa efficiens, & actiua visionis, vel solum recipiat visionem.

Ad primum respondet Philosophus.

Primo, distinguendo, de potentia, & actu.

Secundo, declarat quomodo sensus potest dici in potētia & in

& in actu. dicit igitur Philosophus, q̄ potentia est duplex. s. remota, & propinqua. ille est in potentia remota, qui nondum habet habitum, aut formam, & est aptus natus habere talem habitum, aut formam, v. g. puer parvus non habet habitum scientiæ, & tamen est aptus natus habere, & canis modo natus non habet visum, & tamen est aptus natus habere. post nonum diem ille est in potentia propinqua, qui iam habet aliquem habitum, aut formam, sed non operatur secundum illum habitum, aut formam. & tamen potest operari. v. g. Socrates habens logicam, & non actu argumentans est in potentia propinqua. potest enim quando vult, si non est impeditus argumentari. & inter has potentias hæc est differentia, quod ille qui est in potentia remota non potest acquirere habitum, vel formam sine mutatione. v. g. homo ignorans non potest acquirere scientiam, nisi moueatur à magistro, vel suo intellectu agente ab ignorantia ad scientiam, quæ ignorantia si sit simplicis negationis, vt in puero, hæc mutatio non est proprie alteratio, quia alteratio proprie dicta est à qualitate contraria ad qualitatem contrariam, sed in puero nulla est qualitas contraria scientiæ, ideo quando aliquis purus ignorans acquirit scientiam, non propriæ alteratur. si autem sit ignorantia prauæ dispositionis. i. cum errore, tunc quando sic ignorans acquirit scientiam proprie alteratur, quia mutatur de contraria qualitate ad contrariam qualitatem. i. de errore ad scientiam. ille autem qui est in potentia propinqua. i. iam habet habitum, & formam potest exire in operationes per seipsum sine mutatione facta ab aliquo mouente extrinseco, puta Socrates habens scientiam logicæ potest sine doctore argumentari, & Plato habens visum potest quando voluerit videre, dummodo non sit impedimentum, nec in organo visus, nec in medio, puta in aëre. Nec dicendum est, quando quis exit de habitu, vel forma ad operationem, q̄ alteretur immo. perficatur, perfectior enim scientis est vti scientia sua, & sentientis vti sensibus, sicut perfectio artificis est operari secundum artem suam, sicut duplex est potentia, ita duplex est actus. s. primus, & secundus, actus primus est habitus, vel forma, quæ est principium operationis, vt scientia ædificandi est actus primus,

primus, quia est causa ædificationis . actus secundus est ipsa operatio, vt est ædificare, syllogizare &c. Inter hos actus hæc est differentia, q̄ ille qui habet actum primum .i. habitū, vel formam est in potentia, & in actu . in actu quidem, quia habet habitum . in potentia autem, quia potest secundum talem habitum operari, licet actu non operetur . vnde logicus dormiens dicitur esse in actu primo, quia habet habitum logicæ, & non actu vtitur eo. syllogizando, ille vero qui habet actum secundum .i. operationem simpliciter est in actu, & nullo modo in potentia . Habet enim habitum, & operationem causatam ab illo habito, vt patet in Socrate logico, qui actu syllogizat. Positis distin. de potentia, & actu respondetur ad dubium præpositum. scilicet quomodo se habet sensus ad sensibilia per duas conclusiones.

Prima conclusio, Sensus non semper habet in se actu obiecta sensibilia, puta visus, non semper habet in se actu colores. probatur, si sensus puta visus habet semper in seipso colores . ergo semper est in potentia propinqua ad videndum. sed hoc est falsum . probatur consequentia, si habet in se colores . ergo habet formam, puta speciem coloris, quæ est principium, & causa visionis, sed quando aliquis habet habitum, & formam quæ est principium alicuius operationis dicitur esse in potentia propinqua, vt dictum est supra . ergo si visus semper habet in seipso colores erit semper in potentia propinqua ad videndum, falsitas vero consequentis probatur sic, si visus habet in se colores . ergo videbit animal quicumque colorem voluerit, etiam remoto quolibet colore extrinseco, puta si in oculo meo semper est similitudo albedinis . videbo albedinem, etiam remoto quolibet corpore albo, & si in aure semper haberem sonum campanæ, semper sentirem hunc sonum . dato casu, q̄ nulla campana pulsaretur . patet autem quod hæc sunt absurda . ergo non omnia sensibilia semper sunt actu in sensibus.

Secunda conclusio, Sensus aliquando habet sensibile in se ipso actu, aliquando in potentia . probatur ad sensum, oculus actu videns albedinem habet in seipso actu similitudinē albedinis, Oculus vero dormientis habet solum in potentia in seipso colores, prout potest vigilans colores videre.

patet

patet igitur quomodo sensus se habet ad sua sensibilia.

Ad secundum dubium, in quo quæritur, quæ sit causa effectiua actus sentiendi, qui dicitur sensatio.

Respondeo, quod circa hoc est duplex opinio.

Prima dicit, quod causa actiua sensationis est obiectum sensibile, puta quod visio est ab obiecto, puta à colore, vñ præsentatur potentia visuæ, & potentia visuua solum recipit in se hanc visionem causatam ab obiecto, & sic secundum hanc opinionem omnes sensus sunt potentia puræ passiuæ, & receptiuæ, sensationes.

Sed hæc opinio est falsa, & probatur sic, dictum est in secunda diffinitione animæ, quod anima est principium quod viuimus, sentimus mouemur secundum locum &c. Ergo anima est principium actiuum omnium operationum quæ sunt in viventibus, sed sentire est operatio rei viventis, ergo anima est principium actiuum, & causa actiua ipsius sentire, non quidem immediate, sed mediante sua potentia sensitua, nihil enim operatur anima nisi per potentias suas, vt intelligere per intellectum, si ergo sentire causatur actiuæ ab anima principaliter & à potentia sensitua immediate velut ab instrumento. ergo non causatur actiuæ solum ab obiecto sensibili.

Secunda opinio est B. Th. qui tenet quod sensus est potentia passiuua & actiua, sed respectu diuersorum. Nam sensus recipit similitudinem sui obiecti extrinseci, puta visus recipit in se similitudinem coloris, qui est in pariete, & in quantum recipit dicitur potentia passiuua: sicut, enim omnis receptio, potest dici passio largo modo, sic omnis potentia receptiua potest dici passiuua, dicitur vero potentia actiua, pro quâto sensus actiuatus similitudinem sui obiecti, causat actiuæ sensationem suam, puta visus vt iam in se recipit similitudinem albedinis quæ est in pariete videt ipsam albedinem in pariete. Quando ergo quæritur quæ sit causa actiua sensationis.

Respondeo, quod non est obiectum sensibile solum, vt probatum est contra primam opinionem, nec sensus solus, quia sequeretur quod posset sentire etiam remoto quolibet sensibili, sed est sensus actiuatus similitudine sui obiecti à sufficiē

ti diuisione. Et si quærat in quo recipiatur sensatio causata actiue à sensu. Respondeo, quod recipitur in eodemmet sensu, quia actio immanens qualis est sentire, recipitur subiectiue in eodemmet agente à quo causatur, ut visio causatur à visu, & recipitur in visu. Et si fiat instantia, quod tunc erit idem agens & patiens, ut enim visus causat visionem est agens, ut autem in se recipit visionem est patiens. Respondeo & concedo, quod idem sensus erit agens & patiens, sed respectu diuersorum. Nam sensus ut est actuatus similitudine sui obiecti est agens & causans sensationem, secundum vero quod consideratur ut sensus est. i. per se solum, sic est patiens & recipiens sensationem. Hæc sufficiant de obiecto sensus, & de ipsa sensatione, & de ipso sensu in communi. Nunc sequitur consideratio sensuum exteriorum in particulari. Et primo de visu.

CAPVT II.

IN cap. secundo agendum est de visu, qui nobilior est inter omnes sensus & spiritualior, ut declarabitur quando dicemus sufficientiam quinque sensuum exteriorum.

Circa visum dicenda sunt quatuor.

Primo, de obiecto visus.

Secundo, de medio quo fit visio.

Tertio, de organo ipsius potentie visuæ.

Quarto, de potentia visuæ. Et hunc ordinem seruabimus in alijs sensibus.

Circa primum nota, quod obiectum visus est duplex. Primo, est obiectum principale, & hoc est color, principaliter enim videmus colores. Secundo, est obiectum adæquatum, & hoc non est color, plura enim videmus, quæ non habent colorem, ut sunt ignis, & sol, & stellæ &c. Hoc obiectum non habet nomen proprium, sed communi naturæ dicitur visibile, sub quo continentur omnia quæ videntur in lumine, ut omnes colores, & omnia corpora lucida, ut ignis & astra. Et omnia quæ videntur in obscuro, ut noctiluce & oculi cati, & quercus putrida, quæ in nocte videtur esse argentum. Hæc enim si videntur in die non apparent lucida, quia lux eorum parua est, & obumbratur maiori luce, puta

puta lumine solis, quando autem videntur in die videntur sub proprio colore, ut oculus cati in die apparet croceus, in nocte apparet splendidus, & cauda noctiluce in die apparet alba, in nocte apparet ignea flamma, & quercus putrida in die apparet alba, in nocte apparet lucida argentea. Nec hoc reputandum est impossibile, si enim sol luce sua obumbrat omnes stellas ita quod non apparent in die, cum tamen sint super nostrum hemisphaerium, multo magis potest obumbrare lucem praedictorum cum sit parua respectu lucis, quae est in astris. Si ergo quaeratur quod est obiectum visus, dicendum est, quod visibile est obiectum adaequatum, color autem est obiectum principale. Quid sit color dicemus in sequenti puncto.

Secundo, declarandum est quid sit medium, quo median-
te fit visio, unde nota, quod triplex medium requiritur ut fiat visio.

Primo, requiritur similitudo rei visibilis, puta similitudo albedinis quae causatur a corpore albo, & recipitur in aere, & per aerem defertur usque ad oculum, qua recepta in oculo videtur albedo quae est in corpore albo. Et quod sit necesse hanc similitudinem causari ab obiecto visibili & deferri usque ad oculum sicut imago Socratis fertur usque ad speculum, probatur sic. Mouens proximum & motum sunt simul, ut patet in 7. phys. sed obiectum visibile est mouens oculum ad videndum. ergo obiectum debet tangere oculum, sed non debet tangere secundum seipsum, quia, ut dicit Philosophus in secundo de anima, sensibile positum supra sensum non sentitur. Nam si ponatur lapis super pupillam oculi non videbitur, ergo obiectum debet tangere oculum per aliquod medium, sed hoc medium dicitur esse similitudo rei visibilis quae defertur usque ad oculum. ergo necesse est quod fiat visio per ipsam similitudinem obiecti visibilis. Et nota, quod haec similitudo diuersimode denominatur. Nam a physicis dicitur species rei visibilis vel intentio rei visibilis. A prospectivis autem dicitur linea visualis, vel radius visualis. Et hoc quidem medium se tenet ex parte rei visibilis. ut scilicet per ipsum uniatur obiectum visibile potentiae visive.

Secundo,

Secundo, requiritur medium, in quo recipitur ipsa species obiecti visibilis. Et quod deferret eam usque ad potentiam visiuam. Quod medium secundum philosophum est corpus diaphanum, quod sic diffinitur, diaphanum est corpus transparentes non coloratum secundum se, sed est receptivum omnium colorum, ut aqua, & aer, & vitreum, & crystallum & plura alia & corpora caelestia, omnia haec sunt transparentia. Nam si ponatur denarius in fundo aquae vel post vitrum & crystallum, videtur ab oculo, similiter videmus stellas fixas, quae sunt in octava sphaera. ergo signum est quod sphaerae planetarum sunt diaphanae. Medium igitur deferens species rerum visibilium ad oculum est corpus diaphanum.

Quod quidem non sit coloratum secundum se probatur, Nam si haberet aliquem colorem, omnia quae viderentur per ipsum apparerent eiusdem coloris, ut patet quando ponitur vitrum rubeum ante oculos, omnia quae videntur apparent rubra. Et hoc quidem medium se tenet ex parte rei visibilis, ut scilicet per ipsum deferatur species rei visibilis ad potentiam visiuam.

Tertio, requiritur medium quod sit actiuans corpus diaphanum, id est disponens diaphanum, ut sit sufficiens ad deferendum speciem rei visibilis usque ad potentiam visiuam & hoc est lumen, ut ergo sciamus quid sit hoc lumen, quinque diffinienda sunt. scilicet lux lumen, radius splendor, color, lux sic diffinitur, lux est qualitas immutativa visus, existens in corpore lucido non causata nec conservata per actionem alterius lucidi, ut in sole, cuius lux immutat visum, & est fundata in corpore solis per se lucido, nec causatur in sole ab alio lucido illuminare solem, lumen est qualitas immutativa visus existens in corpore non lucido, sed illuminato actione corporis lucidi, ut lumen quod est in camera existit in aere, qui non secundum se est lucidus, sed illuminatus actione solis, aut ignis, aut alterius stellae. Item sic diffinitur ab Aristotele in 2. de Anima, lumen est actus diaphani, ubi nota quod diaphanum est duplex. scilicet in potentia, & in actu, diaphanum in potentia est corpus quod potest transparenere, sed actu non transparenere, ut aer in nocte tenebrosa, diaphanum in actu, est corpus quod actu transparenere, ut aer illuminatus, siue lumine. ergo diaphanum

T R A C T A T V S I I I .

non est actus. ergo lumē est actus diaphani, id enim per quod aliquid est actus, dicitur actus eius, vt qui per animam viuens est actus, anima est actus viuētis, radius est ipsummet lumen vt causatur à corpore lucido secundum rectam lineam Splēdor est lumen, vt causatur à corpore lucido per lineam reflexam, puta sol causat lumen in speculo, ex speculo fit reuerberatio luminis ad parietem, lumen quod causatur ex tali reuerberatione, dicitur splendor. Color est lux obumbrata vel obscurata, per opacitatem corporis terminati, id est non transparentis, primo dicitur lux obumbrata, vnde nota qđ eadem qualitas diuersimode recepta, dicitur lux lumen, color primo dicitur lux, in quantum est in corpore lucido secundum se sic in sole & igne est proprie lux, secundo dicitur lumen, in quantum recipitur in corpore diaphano, sic dicimus quod lumen recipitur in aqua, & in aëre, tertio dicitur color, vt recipitur in corpore terminato, id est solido & non diaphano, vt in lapide, ligno, ferro &c. Et quia hæc corpora solida sunt multum terrestria, & terra est secundum se obscura & opaca, ideo huiusmodi corpora obumbrant lucem in eis receptam, & lux sic obumbrata ex opacitate terræ dicitur color, secundo dicitur ex opacitate corporis terminati, vnde nota quod ex varia proportionē lucis ad opacum diuersæ species colorum generantur. Nam vbi multum est de luce, & parum de opaco terrestri fit albedo, vbi autem est multum de opaco, & parum de luce fit nigredo.

Tertio, declarandum est, quid sit organum visus, vnde nota secundum Auicē. & Albert. quod organum visus sunt duo nerui egredientes ab anteriori parte cerebri, qui sunt concaui, & per eos defertur species rei sensibilis recepta in oculis vsque ad sensum communem. Et sunt duo oculi affixi in summitate ipsorum neruorum. Substantia autem ipsorum oculorum ex tribus componitur. Primo, in oculo ponitur humor crytallinus congelatus, in quo recipitur species rei visibilis, vt in diaphano. Secundo, ponitur humor rubeus post crytallinum, qui est terminans & fouens ipsum crytallinum, deinde ponuntur plures tunicæ, quæ sunt pelliculæ in se continentes hos duos humores, velut propria sua vasa, de ijs tunicis & earum numero considerare est officium

ficiū prospectiui, deinde ponitur humor niger vel glaucus vel ceruleus sub illis tunicis circundans humorem crystallinum, vt per eum congregatur & fortificetur species visibilis in pupilla oculi, quæ facile offenditur à nimia claritate, vt patet quando intuemur solem, dedit similiter natura palpebras, vt defendant oculum ab exterioribus nocumentis, & supercilia vt magis congregetur species rei visibilis in pupilla oculi, organum igitur visus continet hæc omnia, scilicet duos nervos, duos oculos, duas palpebras, duo supercilia, hæc tamen duo vltima non sunt necessaria, quia plura animalia habent visum, & tamen non habent palpebras nec supercilia, vt patet in locustis &c. Hęc de organo visus pro nūc sufficiant. Nam sufficienter de ijs considerare est officiū prospectiui, qui & considerat omnia mirabilia quæ contingunt in visione, Deo propitio de eis componemus tractatum.

Quarto & vltimo diffiniendum est quid sit visus, vnde nota quod sic diffinitur, visus est primus sensus, cuius organa sunt duo nerui qui progrediuntur ex cerebro, & duo oculi, & sentit secundum rationem primam coloris, dignoscit aurem cum colore, coloratum corpus, primo dicitur primus sensus, non quidem in constituendo animal, hic enim est tactus, vt dicemus infra, sed est primus in dignitate & perfectione. Secundo dicitur, cuius organa &c. hæc declarata sunt supra. Tertio dicitur, & sentit secundum primam rationem coloris, id est primo & per se & principaliter. sentit colorem, est enim obiectum principale, vt diximus supra. Et cum colore per accidens sentit corpus coloratum, vt cū colore niuis, per accidens video substantiam niuis inquantum est alba. Hęc de potentia visiva sufficiant. Vtrum autem color sit per se visibilis, & semper indigeat lumine declarabitur in solutione argumentorum.

CAPVT III.

IN tertio capite agendum est de auditu, de quo videbimus quatuor, primo de obiecto, secundo de medio, tertio de organo, quarto de potentia auditiva. Obiectum auditus, vt ab omnibus conceditur, est sonus, de quo dice-

mus tria. Primo, quomodo generatur. Secundo quomodo generatur Echo, & quid sit. Tercio quomodo generatur vox quæ est species soni, & quid sit, vt autem sciamus quomodo generatur sonus.

Notandum quòd sonus dupliciter consideraui. Primo, vt est in corpore sonante, puta in campana, & sic est in eo solum in potentia, vt in causa quæ potest ipsum producere sicut rosa est in radice. Secundo, vt recipitur in aëre, vel in aqua & defertur ad auditum & sic est sonus in actu, & est subiectiuæ in aëre, non autem in corpore sonante, sed solum vt in sua causa, vnde in hoc distinguitur sonus à colore, quia color est subiectiuæ in corpore colorato, in diaphano vero est solum secundum speciem intentionalem, vel lineam visualem, vt diximus supra, sonus autem nō est subiectiuæ in corpore sonoro, sed subiectiuæ in aëre vel aqua in quibus recipitur & potest fieri ad auditum, loquendo igitur de sono in actu dico quòd tria requiruntur ad suam generationem, primo requiritur percutiens & est corpus percussum. Nam percussio causat sonū, sed percussio requiritur percutiens & percussum, sicut motus requirit mouēs & mobile, deinde requiritur mediū in quo recipitur sonus, puta aër, vel aqua, quia ad hoc quòd generetur sonus est necesse quod percutiens tangat percussum & dum tangit percussum facit ictū, sed ictus non est sine motu locali, mouetur enim aër aut aqua, aut aliud medium quando mediat inter percutiens & percussum. Motus vero localis semper fit in aliquo medio, & nunquam in vacuo, vt patet in quarto Phys. cap. de vacuo. Igitur ad generationem soni tria requiruntur, scilicet percutiens tangens percussum, & medium medians inter percutiens & percussum quòd ex percussione expellitur. Sed nota quod percutiens & percussum si debent generare sonū, debent habere has condiciones. primo quòd sint corpora dura & ex mutua percussione & resistentia excludatur aër medians inter ea, & propter hoc lana & spongia & huiusmodi molia non sonant nisi comprimantur, & tunc faciunt sonum obtusum, secundo quòd sint conuenienter lata in superficie, videmus enim quòd maiorem sonum faciunt manus adinuicem percussæ, quàm duo digiti adinuicē percussæ, inde

inde est quòd si duæ acus adinuicem percutiantur secundùm acumen, non faciunt sonum, quia acumen acus nullius est latitudinis, tertio quòd mutua percussio sit fortis. vt àër medians forti impetu extrudatur, inde videmus quòd si manus leuiter tangit tabulam, paruus aut nullus sit sonus. Si autē cum impetu tangitur, sit manifestus sonus. Ista conditiones requiruntur Ad hoc quòd fiat sonus conueniens & clarus, requiritur quod corpus percussum sit tersum & lenæ, & sit concauum, vt in àère expulso multiplicentur ictus in corpore concauo. Et propter hoc campanæ & omnia instrumenta musicalia, vt in pluribus sunt concaua, & etiam requiritur quòd corpus percussum habeat in sui compositione aciem bene dispositum. Nam quæ sunt multum terrestria nō bene sonant, vt plumbum & lapis, quæ vero sunt multum aërea bene sonant, vt stānum & æs, & argentum, & multa ligna. Ex ijs potest elici hæc descriptio. Sonus est ille qui generatur ex mutua & forti percussione duorum corporum quæ sint aliquantulum dura & sufficientis latitudinis, ex qua percussione violenter extruditur àër mediās inter illa, sicq. recipitur sonus in ipso àère medio & defertur ad auditum. Vtrum semper requirantur duo corpora dura declarabo in solutione argumentum.

Secundo vidēdum est quomodo generatur Echo, & quid sit. vnde nota, quòd Echo quantum ad quid nominis est resonantia, vt cum quis vociferans in puteo dicit Socrat. & sentit in puteo replicari, Socrat. Quantum ad quid rei sic diffinitur. Echo est sonus ex reuerberatione aëris replicantis, quod quomodo fiat declaratur tali exemplo secundùm Philosophum, quando proijcitur lapillus in puteo videmus circa locum vbi decidit lapillus fieri paruum circulum in aqua & post illum fieri maiorem, & iterum maiorem donec deueniatur ad circumferentiam putei & statim reflectitur & quasi retrocedens tendit ad medium putei vbi inceperant fieri prædicti circuli, similiter accidit in àère, licet non ita videamus propter suam raritatem. nam quando duo corpora dura se mutuò percutiunt recipitur sonus in àère propinquo ipsi corpori percussio, deinde paulatim per girū diffunditur in àère & defertur ad remota p circulationes factas in àère,

quòd animalia non habentia pulmonē non habent vocem.

Nota ultimo, q̄ ad formandum vocem plura instrumenta assignantur, scilicet lingua, dentes, palatum &c. sed hæc non sunt necessaria nisi ad formandam vocem articulatam, quæ dicitur locutio, & competit soli homini, de qua non est præsentis negocij considerare, sed in lib. de animalibus.

Secundo, principaliter tractandum est de medio per quod fit auditio. Vnde nota quòd hoc medium est omnē corpus q̄ potest deferre sonum ad aures, principaliter vero est aër in quo per aliquam quantitatem est sonus realiter subiecti uæ, & per tantam quantitatem est species intentionalis ipsius soni quæ per ipsum aërem motum deferretur ad auditum, verbi gratia, sit campana sonans distans ab aure Socratis 20. cubitis, dico q̄ sonus causatus à campana est realiter & subiecti uæ in tanto aëre, puta in 10. cubitis in alijs vero 10. cubitis aëris producitur species intentionalis ipsius soni à sono reali existente in 10. primis cubitis, sicut causatur species coloris in corpore diaphano ex colore existente realiter in corpore colorato, & hæc species intentionalis soni deferretur per aërem vsque ad auditum. Et quod hæc species intentionalis causetur probatur sic. Sonus auditur. ergo auditur per se, ita quòd vel per se ipsum pertingit vsque ad auditum, vel per speciem suam intentionalem, & non per seipsum, quia secundum Philosophum sensibile positum supra sensum non sentitur. ergo auditur per speciem soni intentionalem, sicut videtur albedo per speciem intentionalem suam. Aër igitur principaliter est medium deferens speciem soni ad auditum, sicut in visu, medium est omne corpus actu diaphanum. dico autem principaliter, quia contingit fieri auditionem per aquam, sed cum difficultate propter sui grossitiem respectu aëris, & ut aër sit conueniens medium deferens speciem soni, debet ex se nullum habere sonum, sicut diaphanum debet ex se nullum habere colorem ut possit deferre omnes species colorum ad ipsum visum.

Tertio, principaliter tractandum est de organo auditus. Vnde nota secundum Philosophum quòd organum auditus continet duo, primo habet quandam pelliculam in interiori parte auris quæ dicitur miringa, quæ affixa est nervo

T R A C T A T V S III.

egredienti à cerebro ad aurem in interiori parte, vt per ipsum neruum deferatur species soni ad sensum communem, vt dicemus in tertio lib. secundo in hac pellicula est inclusus aer sicut in pellicula oculi est inclusus humor aqueus congelatus quietus & sine motu, & nullum habet sonum vt possit percipi per ipsum omnis species soni, sicut humor aqueus in oculo nullum habet colorem vt possimus per ipsum videre omnem colorem. Si ergo queratur quod est organum auditus. Rñdeo q̃ est tympanum constitutum in interiori parte auris cōpositum ex miringa & aere immobili ac omni sono carere. Ex ijs sequitur q̃ si miringa vel aer ille lædatur vel corrumpatur q̃ impeditur auditio, sicut si offenditur pellicula oculi vel humor aqueus impeditur visio, & pp hoc natura sagax sicut oculo dedit palpebras in defensionem oculi, ita fecit aures in intrinseco tortuosas vt defendatur tympanum auris ab exterioribus corruptentibus, vt est aqua &c.

Quarto diffiniendum est quid sit potentia auditiva, vnde sic diffinitur secundum B. Thom. in opusculo de potentijs animæ. Auditus est in potentia ordinata in neruis molli- bus procedentibus à cerebro ad concauitatem aurium vt apprehendat sonum causatum ex cōmotione vel expulsionē aeris constricti inter corpus percutiens & percussum. In hoc quod dicitur in neruis tangit organum auditus, quod organum licet non sint nerui procedentes à cerebro, tamen includit illos duos neruos in quorum summatibus sunt affixę duę miringę continentes aerem immobilem, vt diximus supra, nam quælibet auris habet in suo concauo vnum neruum egredientem à cerebro, & vnā miringā In hoc quod dicit, vt apprehendat sonum, tangit obiectum ipsius auditus. In hoc quod dicit causatum ex cōmotione aeris, tangit medium in quo recipitur sonus vt in subiecto, & etiam in quo recipitur species intentionalis soni ac deferatur ad aures. Hæc omnia supra declarata sunt, sequitur de odoratu.

C A P V T I I I I.

In hoc capitulo agendum est de odoratu, & de eo dicemus quatuor.

Primo,

Primo, de obiecto.

Secundo, de medio.

Tertio, de organo.

Quarto, de ipsa potentia.

Circa obiectum ab omnibus conceditur ϕ est odor, de quo tractandum est quomodo generatur, & quid sit, sed quia ex eadem materia, licet diuersimode se habente generatur odor & sapor, simul de utroque tractabitur ut fiat doctrina perfectior. Nota igitur secundum Philosophum in lib. de sen. & sensa. ϕ sapor & odor non sunt aliquæ de primis qualitatibus elementorum non enim sapor est sola humiditas, nec sola siccitas, nec sola frigiditas vel caliditas, sed est qualitas composita ex ijs quatuor qualitatibus, præcipue ex calido, humido, sicco, nam frigiditas valde remissa concurrit ad generationem eorum, immo si augeatur extenuat saporis & odores, ut patet in hyeme, in qua ex intensa frigiditate vix percipiuntur saporis & odores, immo si res saporosa, & odorifera congelatur destruitur illius sapor & odor. Videndum est ergo quomodo ex varia mixtione humidi aquei, & sicci terrestris, & calidi ignei generatur primo sapor, deinde odor. Vnde nota secundum Philosophum in lib. de sen. & sensa, quod in generatione saporis tria concurrunt, primo requiritur humiditas aquea, fundatur enim principaliter in humido, cuius signum est quod nunquam sentitur sapor in gustu, si non humectetur per saluam quæ est in lingua & in ore, sed hæc humiditas aquea non facit saporem, nam aqua secundum se nullum habet saporem; secundo requiritur siccitas terrestris quæ immisceatur humiditati aqueæ sicut immiscetur cinis aquæ, sed hoc non sufficit nisi accedat calor digerens & dequoquens humidum aqueum immixtum sicco terrestri. Quando igitur hæc tria coniunguntur, scilicet humiditas aquea decolata per siccum terrestrem sicut decolatur aqua per cineres, & calor digerit ac decoquit humidum aqueum immixtum sicco terrestri generatur qualitas saporosa, quæ dicitur sapor. Ex ijs qualitatibus primis nota quod in sapore prædominatur humiditas aquea, unde dicitur ϕ sapor fundatur in humido aqueo. potest ergo sic diffiniri ex prædictis ut diffinit Philosophus in libro de sen. & sensa.

Sapor

Sapor est qualitas producta ex humido aqueo immixto sicco terrestri, calore digerente & decoquente humidum immixtum sicco terrestri immutatiua sensus gustus secundum alterationem. Quare dicitur secundum alterationem declarabo in assignando sufficientiam sensuum exteriorum.

Postquam declarauimus quomodo generatur sapor in communi, nunc dicendum est quomodo generantur diuersæ species saporum quæ sunt 6. secundum Philosophum in lib. de sen. & sensa. scilicet amarus, & dulcis, ponticus, & austerus, stipticus, & acutus. Amarum & dulcis sunt saporum extremi, alij autem sunt medij, & sic generantur, si calor perfectæ digerit ac decoquit humidum aqueum, non quidem consumendo ipsum generatur sapor dulcis, ut patet in uua bene matura in qua calor solis bene decoquit humidum aqueum. si autem calor adeo decoquit humidum aqueum quod consumat & exiccet, tunc fit sapor amarus, ut patet in pane adusto in quo actione caloris clibanij exiccatur humidum & superabundat sic cum terrestri. si autem calor nondum digressit nec decoquit humidum generatur sapor ponticus, id est mordacius & austerus qui etiam dicitur acetosus, ut patet in pomis & piris non maturis quæ habent saporem austrium, qui vulgariter dicitur agrestis. Nota tamen quod in pontico est magis de sicco terrestri. in austro autem est magis de frigido. si autem calor aliquantulum decoquit humidum & ipsi humido multum admisceatur de sicco terrestri generatur sapor stipticus, ut patet in fructibus myrti, qui licet sint maturi, tamen habent saporem stipticum. similiter fructus qui vulgariter dicuntur sorbole. si autem calor non consumit humidum, sed superdigerit ipsum humidum generatur sapor acutus, ut in aleo, & sinapi &c. Hæc sufficiant pro generatione specierum saporis.

Postquam diximus quomodo generatur sapor, dicendum est quomodo generatur odor. Et sicut diximus qui generatur ex humido aqueo & sicco terrestri calore decoquente, sic etiam generatur ex his odor, sed differentia est in hoc quod in sapore dominatur humidum aqueum. in odore autem dominatur siccum æreum subtile aliquantulum contemperatum, unde ad productionem odoris, tria requiruntur. primo
requi

requiritur humidum incorporatum & imbibitum alicui sicco, cuius signum est quod nullum elementum sem se habet odorem, nam omnem elementum aut est siccum tantum, ut terra & ignis, aut est humidum tantum, ut aqua & aer, & propter hoc nullum habent odorem. illa autem quæ in se habent humidum & siccum sunt aliquo modo odorabilia, ut aqua maris habet odorem, quia humido aqueo in mari admiscetur siccum terrestræ ex quo fit salsum, ut dicitur in lib. Meteor. similiter lapis non habet odorem, quia propter sui duriciem habet siccum sine humido, ligna vero habent odorem, præcipue illa quæ gumificant, ut abies & pinus, quia sua humiditas est bene incorporata sicco terrestri & subtili aëreo, ut de claratur in pinguedine ipsius gummæ, similiter in metallis aurum non habet odorem, quia est siccum sine humido, cum sit maxime terrestre, ut declaratur ex sua maxima ponderositate, est enim grauius omni alio metallo, æs vero & ferrum & argentum sunt odorabilia, quia in se habent humidum compressum & inhibitum à sicco. patet ergo ex tot signis quod odor non est in solo humido, nec in solo sicco, sed in humido incorporato ipsi sicco, secundo requiritur aer aut aqua in qua recipiatur ipse odor, cuius signum, quod aliqua animalia, ut pisces, odorant in aqua, trahuntur enim ab odore nutrimenti & animalia terrestria odorant in aëre, ut patet in cane & in homine &c. tertio requiritur calor decoquens ipsum humidum incorporatum sicco & resoluens ipsum odorem, cuius signum est quod non sentitur odor, nisi odorabile aliquo modo calefiat, unde in hyeme propter frigiditatem constringitur in æstate propter calorem dilatur & resoluitur, & facillime sentitur, ex ijs sic potest diffiniri odor. Odor est qualitas consistens principaliter in sicco subtile & humido aliquo modo per calorem ad inuicem contrahentis, in hoc quod dicitur principaliter in sicco subtile consistens, differt à sapore qui principaliter fundatur in humido aqueo. ut diximus supra. Hæc de generatione odoris sufficiant & sunt extracta ex libro de sensu & sensato Aristot.

Postquam tractauimus de odore in communi agendum est de speciebus odoris. Vnde nota secundum Philosophum in

TRACTATVS III.

in lib. de sensu & sensato, & in secundo de anima quòd cum sapor & odor ex eadem materia diuersimode se habente generetur, & cum magis cognoscamus saporum species quàm species odorum, eo quòd homo perfectissimum habet guttum & imperfectum odoratum: vt declarabo tractando de potentia odoratus, est necesse quòd cognoscamus, & denominemus species odorum à speciebus odorum, vnde sicut dicimus saporem dulcem & amarum, ita dicimus aliquem odorem dulcem, vt in viola, aliquem amarum. vt in aloë. Item sicut dicimus saporos medios esse ponticum, vel acetosum, vel stipticum, vel acutum, sic etiam denominamus odores medios, vnde acerum habet odorem acetosum, & aleũ habet odorem acutum sicut etiam saporem. Vterius multoties accidit quòd res habet saporem & odorem consimilem, puta mel habet saporem & odorem dulcem, aleum habet saporem & odorem acutum, aliquando autem habent odorem & saporem dissimilem, vt cortex pomi. Citri habent saporem amarum & odorem suauem. huius diuersitatis hæc est causa. Sapor fundatur in humido aqueo aliqua liter per calorem decocto, odor vero fundatur in sicco subtili aliquo aliter temperato. quando ergo humidum aqueum & siccum subtile sunt in aliqua re adinuicem bene temperata & commixta, sequitur suavis sapor & suavis odor, vt patet in flore violarum. quando vero aqueum humidum non est conuenienter decoctum vel est adustum. siccum vero subtile est bene temperatum, sequitur sapor & odor dissimilis, vt patet in gariofilo qui habet saporem acutum, sed odorem suauem. Hæc de productione odoris & saporis & eorum speciebus sufficiant.

Secundo, principaliter videndum est de medio per quod odoris species defertur ad potentiam odoratus, & dicemus duo. Primo, quòd est illud medium. Secundo, vtrum in eo recipiatur odor realiter, vel solum quantum ad speciem suam intentionalem.

Circa primum, nota secundum Philosophum in secundo de anima, & in lib. de sensu & sensato, medium per quod defertur odor ad odoratum est aer & aqua. per aquam odorant animalia aquatica, vt pisces, per aerem odorant anima-

lia terrestria, inter quæ animalia respirantia, vt homo, & equus, & canis &c. odorant trahendo aërem super nares, cuius signum est quòd dum homo emittit aërem attractū non odorat, nec dum retinet aërem attractum, dum vero trahit aërem per nares odorat. animalia ergo respirantia per aërem & per attractionem aëris odorant.

Circa secundum, vtrum dum defertur odor per aërem ad odoratum sit subiectiuæ & realiter in aëre vel in aqua, an solum sit subiectiuæ in corpore odorifero, & spiritualiter, id est secundum speciem intentionalem in hoc medio.

Ad hoc dubium respondetur secundum Cōmen. & B. Th. quòd odor tripliciter consideratur. Primo, vt est in corpore odorifero, & sic semper est in eo subiectiuæ & realiter vt accidens in suo subiecto. Secundo, consideratur vt est in aëre propinquo ipsi corpori odorifero, puta per 20. cubitos in circuitu, & sic potest esse in tali aëre propinquo realiter & subiectiuæ, nam à corpore odorifero possunt eleuari fumi vaporosi & misceri ipsi aëri propinquo, in quo fumo vaporoso est odor realiter & subiectiue, vt patet quando incenduntur thura, & myrrha, & alia odorifera ligna, quæ nisi calefiant non sentitur eorum odor 3. consideratur vt est in aëre distante plurimum à corpore odorifero, puta quando sentitur malus odor cadaueris per 10. miliaria, tunc dico quòd odor non est realiter in aëre adeo distante, sed solum spiritualiter, quòd probatur. Nam vt dicit Cōment. cum odor cadaueris sentiat à vulturibus per 50. miliaria (veniunt vt inquit Cōment. in secundo de anima. cōment. 97. Per 50. miliaria ad comedendum cadauera occisorum, in quodam prælio in Græcia attracti eorum fetore) si in tanto spatio aëris fuisset odor realiter, omnia illa cadauera essent cōuersa in fumos vaporosos fetidos, & adhuc non suffecissent ad replendum tantum spatium aëris. Dicendum est ergo, quod sicut in aliqua parte aëris propinqua corpori sonoro est sonus realiter, & subiectiuæ. in parte vero remota causatur species soni intentionalis, sic in parte aëris propinqua corpori odorifero causatur odor realiter propter fumum vaporosum eleuatam ex corpore odorifero in parte vero aëris remota in circuitu causatur ab odore reali species odoris intentionalis,

tentionalis, per quam ab odoratu sentitur odor qui est in corpore odorifero, sicut per speciem coloris, quæ deferatur ad oculum per corpus actu diaphanum, sentitur, ac videtur color existens in corpore colorato. Hæc de medio sufficiat.

Tertio dicendum est de organo odoratus, Vnde nota, quod licet odoratus sit vnus sensus in omni animali odorante, in organum odoratus alio modo disponitur in animali odorante sine respiratione. nam in animali odorante cum respiratione organum odoratus continet tria. primo continet duos nervos egredientes ab anteriori parte cerebri, & descendentes ad nares in interiori parte, vt per deferatur ad cerebrum, & ad sensum communem species odoris ab eis recepta in naribus. secundo continet duas mollities carneas similes capitibus mammillarum semine lactantis, istæ duæ mollities carnez sunt affixæ prædictis nervis, sicut miringa in aure, & sunt spongiosæ, vt attrahant, & recipiant aërem exteriorem deferentem speciem odoris. tertio continet duas pelliculas cooperientes prædictas mollities, sicut palpebre cooperiunt oculos. Vnde sicut homo non videt, nisi aperiantur palpebre, ita homo, & animalia respirantia non odorant, nisi per attractionem aëris desuper nares eleuentur illæ pelliculæ, & deferatur species odoris ad illas duas mollities, inde est quod homo non odorat, nisi respiret. in animali vero odorante, & non respirante, vt est piscis, organum odoratus continet solum duo prima, scilicet nervos, & mollities carnosas, quæ quidem mollities non cooperiuntur aliqua pellicula. & ideo cum habeant organum odoratus semper discoopertum possunt odorare sine respiratione, sicut animalia habentia oculos duos carētes palpebris, vt patet in locusta, possunt videre sine aperitione palpebrarum, cum habeant oculos discoopertos. Ex his patet, quomodo disponitur organum odoratus, & quot contineas.

Et si quis querat, vtum nares in sua parte anteriori sint necessariæ ad odoratum. Respondeo quod non. nam illis abscissis adhuc homo odorat, sed sunt ad bene esse, vt, scilicet melius odoret, & ad decorem faciei, sicut etiam aures extrinsecæ non sunt necessariæ ad auditum, abscissis enim auribus adhuc est auditio, licet non ita bene.

Quarto dicendū est de potentia odoratus. & primo quid sit. secundo quare hic sensus imperfecte, & diminute est in homine. inquit enim philosophus, q̄ homo prauē odorat, id est imperfecte odorat. non enim sentimus odores, nisi sint aliquantulum vehementes vnde canis, & catus, & ceruus, & plura alia animalia longe perfectiorem habent odoratum. Odoratus igitur sic diffinit B. Thom. in opuscul. de potentijs animæ. odoratus est potentia ordinata in anteriori parte cerebri, cuius organa sunt nares, & duæ mollietates similes capitibus mammillarum, per quas remittit ad cerebrum odorem sibi oblatum à medio, cui odor permiscetur. nota q̄ ly nares non sunt pars organi, nisi sumantur pro sua interiori parte. item nota q̄ non facit mentionem de pellicula cooperiente illas mollietates, quia cum hic diffiniatur odoratus in cōmuni, & illa pellicula non inueniatur in quolibet animali odorante, vt patet in pisce non debuit poni illa diffinitione odoratus. Si aut diffiniretur odoratus, vt est in animali respirante bene illa pellicula poneretur in sua diffinitione.

Quare autem hic sensus imperfecte sit in homine, hæc est ratio secundum omnes expositores, quoniam organū odoratus in homine est valde indispotum, nam debet esse siccum, & calidum, sicut odor qui fundatur in sicco, & calido, vt dictum est, sed in homine organum odoratus est humidū, & frigidum, quia situatum est in superiori parte narium, vbi sunt illæ duæ mollietates, & sunt propinque cerebro. Cerebrum autem in homine est valde frigidum, & humidum propter sui magnitudinem. dedit enim natura homini cerebrum valde magnum, & proportionaliter plusquam alteri animali, quantumcunque magno, vt in eo conuenienter possint collocari sensus interiores, & vt phantasmata necessaria intellectiōi recte ordinarentur, de quibus omnibus dicemus in tertio lib. cum igitur in homine cerebrum sit valde humidum, & frigidum ex sui propinquitate valde infrigidat, & humectat organum odoratus, quæ sit indispotum ad percipiendum odores vehementes. Alia vero animalia, vt canis, & catus, valde paruum habent cerebrum, nec infrigidat, siue humectat in eis organum odoratus, & ideo cum habeant organum ipsum siccum, & calidum subtilissi-

me sentiunt odores. Hæc de odoratu sufficiant, sequitur de gustu.

CAPVT V.

IN cap. de gustu tria sunt consideranda.
Primo, de medio, per quod deferuntur.

Secundo, de organo.

Tertio, de potentia.

De obiecto quidem quod est sapor iam pertractauimus in cap. de odoratu. igitur circa medium considerandum est, quod sit medium, per quod gustamus. Vnde nota quod in alijs sensibus prædictis, scilicet visu, auditu, odoratu, medium est corpus extraneum: quod est extra sentientem, puta corpus diaphanum, per quod Socrates videt, & ær, per quem audit sonum, & odorat est extra ipsam Socratem. Non enim est necesse, quod color, aut sonus, aut odor immediate tangerent ad hoc, quod sentiantur, sed sufficit quod causent speciem suam intentionalem in aliquo medio extrinseco, per quod talis species deferatur ad organum sensus, vt declarauimus in singulis sensibus prædictis. Sed in gustu, & tactu medium, per quod gustamus, aut tangimus non potest esse aliquod corpus extrinsecum, nisi enim sapor realiter vnietur gustanti non gustatur, & ideo medium in gustu est aliquod intrinsecum ipsi gustanti. illud autem est intrinsecum gustanti, quod est pars eius. cum igitur omne illud ex quo componitur gustans secundum physicum sit caro: aut os, aut neruus, necesse est quod medium, per quod gustamus sit aut caro, aut neruus, aut os, sed non est neruus. ipse enim est organum in gustu, vt dicemus ergo non est medium, nec est os, nam propter sui duritiem non posset recipere species saporum, & eas deferre ad organum gustus. ergo hoc medium est caro, sed non tota caro, non enim in carne, quæ est in manu, aut in brachio recipiuntur species saporis. verum illa sola caro, quæ est in lingua, vsque ad radicem suam est medium, quo gustamus, quã recte natura fecit porosam humidam, & inspidam, porosam quidem, vt per suos poros transeat species saporis ad organum gustus humidam, vt cibos siccos humectet, sine enim humiditate saluæ non senti-

mus

mus sapores. insipidam autem, vt per eam gustemus omnes species saporis. Si enim haberet in se aliquem saporem omnia gustata viderentur esse illius saporis, vt patet in febricitante, cuius lingua est aspersa humore cholerico omnia que gustat vñr sibi amara, cholera enim est amari saporis. Patet igitur q̄ medium in gustu est corpus intrinsecum ipsi gustati, & est caro, non omnis, sed illa quæ est in tota lingua.

Secundo declaratum est quid sit organum gustus. vnde nota secundum Albert. quòd organum gustus principaliter consistit in duobus neruis, qui infiguntur in medio linguæ, & per plures ramos sparguntur in extremitatibus laterali- bus linguæ. Ad hos nervos deferuntur species saporis per carnem porosam linguæ, de quibus dicemus in lib. tertio. Quare tales species deferantur ad sensum communem, rationem adducam in cap. de sensu communi.

Tertio, dicendum est quid sit potentia gustatiua. vnde sic diffinitur à B. Thom. in opusc. de poten. animæ. Gustus est potentia ordinata in neruo expanso super corpus linguæ, ad apprehendendum varios sapores resolutos à corporibus tangentibus ipsam linguam. Hæc diffinitio ex prædictis per se clara est, ideo pertransseo, quomodo gustus sit quidā tactus, vt inquit philosophus in cap. de gustu declarabo in solutione argum.

CAP V T. VI.

IN cap. 6. agendum est de tactu, & dicemus quatuor.

Primo, de obiecto.

Secundo, de medio.

Tertio, de organo.

Quarto, de potentia.

Circa obiectum nota, quòd obiectum perceptibile à tactu principaliter sunt quatuor primæ qualitates elementorum, scilicet caliditas, frigiditas, humiditas, siccitas. vnde si manus apponeretur alicui corpori non habenti in se aliquam harum qualitarum, vt est corpus cœli, ibi non esset tactus proprie dictus, licet ex duritie talis corporis non possem manū, vltra extendere. secundario aut à tactu percipiuntur durum, & molle, asperum, & planum, sicut visus princi-

Epit. Iauella.

q

paliter

paliter percipit album, & nigrum, secundario autem medios colores.

Sed nota, quod licet alij sensus percipiant duo prima contraria, puta visus percipit album, & nigrum. auditus percipit sonum acutum, & grauem, odoratus percipit odorem dulcem, & amarum: similiter gustus saporem dulcem, & amarum, tamen quia omnia predicta contraria continentur sub vno genere, ut puta album, & nigrum sub colore, dulce, & amarum sub odore &c. quilibet predictorum sensuum est vnus, puta visus est vnus sensus, quia habet vnum obiectum, puta colorem, sic & alij sensus, sed sic non potest dici de sensu tactus. nam illæ quatuor qualitates non possunt reduci ad aliquod vnum genus, sub quo immediate contineantur, quia duæ primæ contrarietates non continentur sub aliquo vno genere, ut dicitur in 10. Metaphys. vbi declaratur, quod in vno genere est tantum vna prima contrarietas, puta in genere coloris est prima contrarietas album, & nigrum, possunt tamen esse plures secundariæ contrarietates sub vno genere, ut inter croceum, & rubeum, & inter viride, & cinericiū, sed illæ quatuor qualitates faciunt duas primas contrarietates, ut inter caliditatem, & frigiditatem, est vna prima contrarietas, & inter siccitatem, & humiditatem, est alia prima contrarietas. ergo non potest reduci, nec contineri sub vno genere, & sic sequitur quod cum sensus tactus non habeat pro obiecto vnum genus, sub quo contineantur quatuor qualitates tangibiles, quod non sit vnus sensus, sed duo, ita quod vno tactu sentimus calidum, & frigidum, & alio tactu sentimus humidum, & siccum. Hæc dicta sunt de mente philosophi in cap. de tactu, verum si tactus sunt duo sensus. ergo sensus exteriores sunt sex. Ad hanc instantiam respondebo in solutione argumentorum.

Secundo, videndum est, quod sit medium, per quod tangimus, & hic pono duas conclusiones, secundum Philosophum.

Prima est, Caro, quæ est in toto corpore est medium per se in tactu. probatur, medium in tactu est corpus intrinsecum animal tangenti. i. corpus, quod est pars animalis tangētis. nam necesse est tangibile realiter vniri ipsi tangenti, quando enim distat à tangente non sentitur. ergo vnitur per medium

dium intrinsecum, sed hoc medium est caro, quæ est in toto corpore. ergo caro est medium per se in tactu. Quod hoc medium sit caro, probat sic Philosophus. Caro, vel est medium, vel est organum in tactu, non est organum, quia sequeretur quod si ponatur corpus calidum super carnem non sentiretur illius calor. Commune est enim cuilibet sensui, quod si ponatur obiectum sensibile super organum sensus non sentitur, sicut diximus in cap. de visu quod si ponatur corpus coloratum super pupillam oculi non videbitur. & tamen si ponitur corpus calidum super carnem sentitur illius calor. ergo signum est, quod caro non est organum in tactu, sed medium. dixi autem medium per se. i. connaturale ipsi animali tangenti. dixi caro, quæ est in toto corpore ad differentiam gustus. dixi enim in cap. de gustu, quod caro est medium, quo gustamus, non omnis, sed ea tantum quæ est in lingua, in tactu vero secundum omnes partes corporis sentimus qualitates tangibiles si vniantur ipsi carni.

Secunda conclusio. Medium per accidens in tactu est corpus extrinsecum, puta aqua, vel aër, vel aliud corpus humidum. probatur sic, quæcunque tangimus, vel sunt in aqua, vel in aëre, vel in alio corpore humido, puta oleo, aut vino, si sunt in aqua, vel in alio corpore humido. ergo saltem in superficie sunt humefacta, si sunt humefacta. ergo aqua, vel aliud corpus humidum eis adhæret in superficie, si eis adhæret in superficie. ergo manus non potest tangere tale corpus humefactum, quin inter corpus humefactum, & manum tangentem mediet aqua, vel aliud corpus humidum. idem sequitur in his, quæ tanguntur in aëre. aër enim naturaliter est humidus. & ideo humefactat saltem secundum superficiem corpus in eo exillens. Ex his igitur patet, quod medium in tactu etiam est corpus extraneum humidum, quod quidem dicitur medium per accidens, quia accidit, quod obiectum tangibile sit tali corpore humido. nam si extra cælum esset lapis, & Socrat. tangeret lapidem sine medio extraneo. Quomodo autem sit verum, quod duo corpora existentia in aliquo elemento non se possunt tangere immediate declarabo in solutione argumentorum.

TRACTATUS III.

Tertio videndum est quid est organum tactus, ad quod per carnem deferuntur species qualitatum sensibilium, & dicemus duo. primo assignabimus ipsum organum. secundo declarabimus quale debeat esse tale organum, & similiter quale debeat esse medium, id est caro.

Circa primum nota, quod ibi est triplex opinio. prima est Auicennae, qui dicit, quod organum tactus non est caro simpliciter sed caro nervosa, id est immixta nervis, cuius signum est, quod sentimus qualitates tangibiles, secundum omnem partem corporis. & cum vnitur tangibile carni sentitur ipsum tangibile. ergo signum est, quod caro extensa per totum corpus, & immixta nervis est organum in tactu. Secunda opinio est Aristotelis in libro de animalibus, qui dicit, quod caro simpliciter est organum tactus. Tertia est opinio ipsius Aristotelis hic in libro de Anima & Comment. & Alber. & B. Thom. quod nervus proprie est organum tactus. & si fiat instantia quod Aristoteles sibi ipsi est contrarius. respondet Comment. in libro 2. de Anima in comment. 18. quod Aristoteles cum loquebatur in libro de animalibus. adhuc nesciebat nervos. cum vero hic dicit, quod nervus est organum. id postea cognovit per anathomiam. & cognovit quod nervi habent introitum ad tactum, & motum, id est per nervos est tactus, & motus in animalibus. Qualiter vero disponatur nervus, qui est organum tactus sic accipe. duo nervi, ut duae radices à cerebro egrediuntur, & per varios ramos in toto corpore diffunduntur carne inuoluti, per omnes nervos quidquid frigidum, aut calidum, aut humidum in toto corpore sentitur, deferuntur ad sensum communem, ut etiam diximus de alijs sensibilibus per alios sensus. Quare vero deferantur ad sensum communem. dicam in tertio libro in capitulo de sensu communi. ex his corollarie sequitur, quod ea quae sunt in corpore, & in eis non est caro, & nervus non sentiuntur, & ideo ossa nuda, nec ungues, nec capilli habent sensum tactus. unde si esset possibile pungere purum os, aut unguem, non sentiretur aliquis dolor, sicut nec cum inciditur capillus, sed quia adherent carni mixtae cum nervis, ideo non punguntur sine dolore. Ex his patet, quod sit organum tactus. Quale vero debeat esse similiter, & medium dico secundum Philosophum, quod nervus, & caro debent esse denudati, id est non habere in se
quali

qualitates tangibiles, quia medium, & organum, si est receptiuum alicuius qualitatis debet esse priuatum ea, sicut diximus in visu, quòd diaphanum, & pupilla debent esse priuata omni colore, vt recipiant omnem speciem coloris, sic & caro, & neruus, vt recipiant calidum, frigidum, humidum, siccum debent esse priuati his qualitatibus.

Sed nota, q non eodem modo id accidit in alijs sensibus, & in tactu. nam in alijs sensibus medium, & organum sunt omnino priuata specie sui obiecti, vt diaphanum nullo modo debet esse coloratum, nec aer nec miringa vllum habere sonum &c. in sensu vero tactus id non potest fieri. nam caro, & nerui sunt composita ex elementis. & per consequens habent in sua compositione calidum, & frigidum, humidum, & siccum, sed sunt reducta ad medium, id est sunt temperata. & propterea non sentit manus aliquod corpus quod habeat in se tantam caliditatem, vel frigiditatem, vel humiditatem, quanta est in complexione manus. sentit vero calidum, vel frigidum excedens compositionem ipsius manus.

Si ergo queratur quale debeat esse medium, & organum in tactu. respondeo quòd non est necesse, vt careant omnino qualitatibus tangibilibus, quia cum sint elementata tales qualitates adinuicem temperate ingrediuntur complexionem eorù, sed sufficit quòd careant his qualitatibus, prout sunt tangibiles, id est in aliquo gradu plusquam ingrediantur complexionem eorum.

Et si queratur cum in toto sit diffusus sensus tactus, in qua parte magis viget. respondeo, quòd in palma manus, & in palma pedis, præcipue vero in digito indice, ac medio. ibi enim est caro neruosa, & temperatissima inter calidum, & frigidum, humidum, & siccum, durum, & molle, secùdum Albert. & Auicem.

Quarto videndum est quid sit tactus. vnde ex prædictis sic diffinitur. tactus est potentia ordinata in neruo per totum corpus expando ad apprehendendum calidum, & frigidum, humidum, & siccum principaliter. hæc diffinitio patet ex prædictis. hæc de tactu sufficiant, qui quidem præcipue viget in homine, quia in eo sunt elementa magis temperata, & complexio nobilior, vt corpus humanum esse

conueniens receptiuum excellentissimæ formæ, quæ est anima intellectiua. vnde licet quædam animalia habeant visum perfectiorem, quàm homo, vt aquila, & odoratum, vt canis. nulla tamen habent nobiliorem gustum, & tactum, quia caro, & neruus, per quæ fit tactus sunt nobilioris excellentiæ in homine, quàm in alijs animalibus. Hic terminatur tractatus de sensu exteriori, cui apponimus quædam argumenta pro declaratione quorundam prædictorum.

Primum probat, quod sensibile positum super organum sensus sentitur, sic si acu pungatur neruus fit dolor, sed neruus est organum sensus. scilicet tactus. ergo sensibile tangens organum sensus sentitur.

Ad hoc dicitur, quod neruus dupliciter consideratur.

Primo, vt circunuolutus est carne. & sic si pungitur dolet non ratione sui, sed ratione carnis circûdantis ipsum neruû.

Secundo consideratur, vt totus discoopertus carne. & sic nego quod si pungitur doleat, immo secundum se est insensibilis, sicut os, & pilus, & vnguis separate à carne.

Secundum probat, quod medium, & organum non est necesse quod careant specie sui obiecti, vt sentiant suum obiectum sic, oculus cati est lucidus. & tamen videt lucida, puta ignem.

Item manus aliquando est frigida, & tamē sentit corpus frigidum, vt patet in hyeme &c. ergo non est necesse organum esse denudatum à specie sui obiecti.

Ad hoc dicitur, quod hæc propositio omne recipiens debet esse denudatum à specie sui obiecti receptibilis, sic habet intelligi, quod vel omnino sit denudatum, vel sit denudatum pro tanto gradu, pro quanto debet recipere, & sentire suum obiectum. & hæc secunda pars vera est. nam oculus cati non posset videre corpus lucidum, si non esset magis, vel minus lucidum, quàm sit oculus cati. similiter manus frigida non posset sentire aliquod aliud corpus frigidum, nisi in eo esset maior, vel minor frigiditas, quàm sit in manu. Hæc expositio pro nunc sufficiat: nam in tractatu de intellectu perfecte exponetur.

Tertium probat, quod gustus non sit quidam tactus quasi species sua, vt dicit Philosophus hic. Si gustus est quidā tactus. ergo gustus non est sensus distinctus à tactu. non enim distinguitur

guitur species contra genus, sed contrinetur sub genere, ut minus vniuersale sub magis vniuersali, si gustus non distinguitur à tactu. ergo sunt tantum quatuor sensus exteriores, quod est contra Philosophum.

Ad hoc dicitur, quod gustus consideratur dupliciter. Primo, in quantum est cognoscitiuus saporum, & sic non est quidam tactus, immo distinguitur contra tactum. nam obiectum gustus est sapor. obiectum autem tactus sunt primæ qualitates tangibiles, cum ergo habeant obiecta distincta sunt sensus distincti. Secundo, consideratur in quantum est cognoscitiuus primarum qualitatum, quæ sunt in nutrimento. nam omne nutrimentum vltra hoc, quod habet aliquem saporē est humidum, vel siccum, calidum, vel frigidum, durum, vel molle. & has qualitates cognoscit, gustus. In quantum igitur eas cognoscit gustus dicitur esse quidam tactus, & non distinguitur à tactu, sicut non distinguitur homo ab animali. dico igitur ad arg. quod Philosophus intelligit gustum esse quendam tactum: secundo modo, & non primo modo. & nota, quod gustus primo modo, & secundo modo est in omnibus animalibus perfectis, sed in animalibus imperfectis, ut in verme est gustus solum secundo modo. & ideo in eis gustus non distinguitur contra tactum, ut dicemus in tertio libro, cap. ult.

Quartum probat, quod tactus non sit plures sensus, ut dicit Philosophus sic, Si tactus sit plures sensus. ergo sensus exteriores sunt plures, quàm 5. puta 6. si tactus sit duo sensus. hoc autem est contra Philosophum, qui solum assignat 5. sensus exteriores.

Ad hoc dicitur, quod conceditur tactum esse plures sensus, ut probatum est in cap. de tactu. & quando dicitur, quod erunt plures sensus, quàm 5. Concedo. Et quando dicitur hoc est contra Philosophum. dico, quod sensus exteriores considerantur dupliciter. Primo, quo ad obiecta formalia, & sic sunt plures, quàm 5. quoniam in tactu sunt duo obiecta formalia. primum, est caliditas, & frigiditas. secundum, est humiditas, & siccitas. Secundo, considerantur quantum ad sua organa, & sic dico, quod sunt tantum 5. nam quilibet sensus habet vnum organum, quod in tactu est neruus per totum corpus
q iiiij diffusus.

diffusus. Philosophus igitur dixit sensus esse 5. non quidem formaliter, id est quo ad sua obiecta, sed materialiter, id est quo ad organa, quibus ipsæ potentie sensitivæ sunt affixæ. & nota quod licet sint duo oculi. non tamen sunt duo organa visus, sed vnum perfectum ex his duobus aggregatum. unde & uniuntur & in superiori parte ipsius nervi egredientis à cerebro. idem dico de duabus auribus, & naribus.

Quintum probat, quod duo corpora existentia in aëre immediate se tangunt sic. sumatur cyathus plenus aqua tunc quæro: aut aqua, & cyathus secundum superficiem intrinsecam se tangunt immediate, aut non, si immediate habent intentum, si non immediate. ergo superficies interior cyathi non est locus proprius aquæ, quod est falsum. & probatur consequentia, quia locus proprius immediate continet locatum. ergo immediate tangit locatum. si ergo superficies interior cyathi non immediate tangit aquam, sequitur quod non sit locus proprius aquæ.

Ad hoc dicitur, quod hæc propositio Philosophi duo corpora non se tangunt immediate duas condiciones requirit. Primo, quod duo sint corpora dura. nam si sunt mollia se tangunt immediate, ut aqua & oleum superinfusum ipsi aquæ. vel si vnum sit durum, & alterum molle, ut lapis positus in aqua, vel aqua posita in vase immediate se tangunt. & sic argumentum non procedit. Secundo, quod sint discontinua. nam si duo corpora dura sint continua immediate se tangunt, ut duæ medietates vnius baculi, cuius prima medietas sit sicca, & secunda sit viridis, antequam diuidantur abinvicem immediate se tangunt. Si autem sint duo corpora dura, & abinvicem diuisa, ut duo lapides, & duæ manus non se tangunt immediate, quia semper inter ea mediat aliquis aër, ut aqua, ut probatum est in cap. de tactu.

Verum quia huiusmodi aër medians valde parvus est, & quasi insensibilis quantitatis, ideo sensus iudicat ea quasi immediate se tangere. parum. n. pro nihilo reputatur. Hæc de sensu exteriori.

SVPER TERTIO LIBRO DE ANIMA,

*Tractatus primus, & est de sensibus
interioribus.*



VPER tertio lib. de anima formamus tres tractatus.

Primus, est de sensibus interioribus.

Secundus, est de potentia intellectiua.

Tertio, est de potentia appetitiua, & motiua.

Primus tractatus distinguitur in sex capita.

In primo, inuestigatur quid sit sensus in communi, & organum sensus. & nota, quod hæc declaratio cōpetit cuilibet sensui exteriori, & interiori.

In secundo, assignatur sufficientia sensuum exteriorum, quare sunt quinque, & non plures.

In tertio, agitur de sensu communi.

In quarto, agitur de phantasia.

In quinto, agitur de cogitatiua, & existimatiua.

In sexto, agitur de memoria, & reminiscencia.

CAPVT PRIMVM.

IN primo cap. sequendo ordinem Arist. declarandum est quid sit sensus in communi. & ibi agemus tria.

Primo, quid sit sensus.

Secundo, quid sit organum sensus.

Tertio, soluetur duplex dubium.

Sensus sic diffinitur à Philosopho in 2. de anima. Sensus est receptiuus specierum sine materia, id est sensus est potentia, quæ recipit speciem, vel formam sui obiecti sine materia, id est spiritualiter, vt visus recipit formam coloris spiritualiter, vel intentionaliter, quod idem est. Vnde nota, quod obiectum sensibile potest habere duplex esse. primo potest habere esse materiale, & naturale. & sic recipitur in aliquo corpore, quod denominat esse tale, vt albedo recipitur in charta, secundum suum esse materiale, quam denominat esse albam,

albam, hoc modo sensibile obiectum non habet esse in sensu. Secundo, habet esse spirituale, & intentionale, & in quocunque recipitur secundum tale esse, non denominat ipsum tale esse, sic recipitur obiectum sensibile in sensu, quem tamen non denominat esse talem, puta recipitur species rube dinis in oculo, quando videt corpus rubeum. non tamen facit oculum rubeum. similiter quando recipitur species albe dinis in speculo non facit speculum album, & quando recipitur figura sigilli argentei in cera non facit ceram argenteam. sic ergo intelligatur diffinitio. Sensus est potentia, quæ recipit formam sui obiecti sine materia. i. non secundum esse materiale, sed secundum esse spirituale, & intentionale, ita quod non denominatur talis ex huius receptione.

Secundo, declarandum est quid sit organum sensus. nam licet sensus recipiat formam sui obiecti spiritualiter sicut & intellectus, tamen in hoc distinguitur, quod sensus est potentia affixa organo corporeo, ut auditus situatus est in timpano auris. intellectus vero non est affixus alicui organo, ut in tract. de intellectu, sic igitur diffinitur. Organum est corpus recipiens sensum, sicut materia formam, puta oculus est corpus recipiens visum, sicut formam suam. unde ex organo, & sensu fit vnum compositum, sicut ex materia, & forma, vel sicut ex subiecto, & accidente. ex quo sequitur corollarie, quod quando separatur anima à corpore in morte omnes sensus corrumpuntur. corrumpuntur enim organa sensuum. ergo corrumpuntur sensus, cum sint affixi organis suis, nec habeant esse, nisi in suis organis.

Tertio, Philosophus ex diffinitione sensus, & organi soluit duo dubia.

Primum est, propter quid excellens sensibile corrumpit sensum, nam si quis per longum tempus, puta per vnam diem continue defigere oculum in luce solis efficeretur cæcus. corrumpitur. n. visus à tam vehementi luce, & si quis continue audiret vehemens sonus efficeretur surdus, unde & molendinarii partim surdesunt.

Ad hoc respondet Philosophus, quod excellens sensibile destruit contemperantiam, quæ est in organo sensus, puta lux solis dissoluit humorem aqueum congelatum, qui est in pupilla oculi, destructa vero contemperantia organi corrumpitur

pitur organum. corrupto organo corrumpitur sensus, quia est affixus ipsi organo, ut patet ex diffinitione organi. igitur à primo ad vltimum excellens sensibile corrumpit sensum, quia corrumpit organum sensus, sicut quando quis forti impetu percutit chordas citharæ destruitur consonantia, quia ex forti percussione destruitur proportio situata in varia protractione chordarum.

Secundum dubium est, pp quid plantæ non sentiunt cum sint animatæ, & recipiant qualitates sensibiles, recipiunt. n. calidum, & frigidum: humidum, & siccum, quæ sunt obiecta in tactu. ergo saltem debent habere sensum tactus.

Ad hoc respondet Philosophus, qd plantæ non recipiunt qualitates sensibiles, nisi secundum esse materiale, & naturale, & non secundum esse spirituale .i. sine materia, cuius signum est, qd quando recipiuntur huiusmodi qualitates in planta semper denominant eam esse talem, puta quando recipitur humiditas in planta. verum est dicere, qd est humida. talis autem denominatio non fit, quando recipitur in aliquo qualitas sensibilis secundum esse spirituale, ut diximus in diffinitione sensus. Dicendum est ergo, qd plantæ non sentiunt, quia non habent sensum. ideo non habent sensum, quia non recipiunt qualitates sensibiles sine materia .i. fm esse spirituale, & intentionale, ut recipit sensus. Et de hoc satis diximus.

CAPVT II.

IN secundo cap. assignanda est sufficientia sensuum exteriorum, quare sunt 5. & non plures. Huius autem duplex est ratio.

Prima, est Arist. in principio tertij de anima, quæ est hæc. nos habemus omnes sensus exteriores. & non habemus, nisi 5. sensus .i. visum, audiunt &c. ergo sensus exteriores non sunt, nisi 5. sensus .i. visum, auditum &c. ergo sensus exteriores non sunt, nisi 5. Quod nos habeamus omnes sensus exteriores probatur tripliciter. Primo sic, nos sentimus omnia obiecta sensibilia, scilicet dolores, odores, sonos &c. ergo habemus omnes sensus exteriores, quibus sentimus omnia sensibilia obiecta. Secundo sic, nos habemus organa

TRACTATUS I.

organa sensuum exteriorum, scilicet organum visus, quod est oculus, & nervi egredientes si cerebro similiter alia organa, sicut declaravi in tractatu 3. super lib. 2. ergo habemus omnes sensus exteriores. tertio sic, omnis sensus, vel sentit per medium extrinsecum, ut est aer, & aqua, vel per medium intrinsecum, ut est caro. Si per medium extrinsecum, sic sentit visus, auditus, & odoratus, & hos sensus habemus. Si per medium intrinsecum sic sentit gustus, & tactus. cum ergo habeamus omnes sensus, qui sentiunt per media extrinseca, & intrinseca. sequitur quod nos habeamus omnes sensus exteriores.

Secunda ratio est B. Thom. in prima partem q. 78. art. 3. & est talis. obiectum sensibile immutat sensum, & recipitur in sensu, ut patet ex diffinitione sensus superius data. ergo secundum quod diuersimode sensibile recipitur in sensu, sic distinguuntur sensus exteriores. sensibile vero potest recipi in sensu quatuor modis. primo pure spiritualiter, sine aliqua mutatione physica facta in obiecto, nec in organo, & quantum ad hanc receptionem pure spiritualement assignatur visus, quando enim color videtur non fit aliqua mutatio physica, puta non est necesse colorem moueri localiter, nec oculum alterari. secundo sensibile potest recipi in sensu per mutationem physicam, id est per motum localem factum ex parte obiecti. nulla tamen mutatione facta in organo sensus, & quantum ad talem receptionem assignatur auditus, quando enim sonus auditur, necesse est sonum generari ex percussione percutientis ad percussum, & aerem qui mediat inter percutiens, & percussum expelli, ac moueri, & dum commouetur localiter defert sonum ad auditum. patet ergo quod in auditu ex parte soni, qui est obiectum requiritur motus localis, qui est mutatio naturalis, & non spiritualis. tertio potest recipi sensibile in sensu per mutationem physicam, id est alterationem factam ex parte obiecti non ex parte organi, & quantum ad talem receptionem assignatur odoratus, quando enim odor sentitur, necesse per calorem corpus odoriferum alterari, ut per talem alterationem spiret odorem, fundatur enim in calido, & sicco odor, & ideo sine calore resolvente non sentitur odor, ut declaravi in tract. tertio super

per secundo lib. quarto potest recipi sensibile in sensu per alterationem physicam factam, non quidem ex parte obiecti, sed ex parte organi. & quantum ad hanc receptionem assignatur gustus, & tactus. quando enim corpus calidum tangitur à manu, realiter manus fit calida. ergo alteratur caro, quæ est medium, & nervus qui est organum. similiter quando corpus saporosum humidum tangitur à lingua, fit humida realiter. ergo caro, lingua, & nervus expansus per linguam, qui est organum in gustu, alteratur. Ex his igitur patet, quomodo sunt quinque sensus exteriores, & quomodo distinguuntur, secundum diuersum modum, quo recipitur obiectum sensibile in ipso sensu, quomodo distinguantur gustus, & tactus declaravi in 3. tract. super 2. lib. similiter quomodo sensus tactus sit vel plures sensus, patet ibidem.

C A P V T I I I.

Post assignationem sensuum exteriorum transeundum est ad sensus interiores, & primo in communi, secundo in particulari. De is in communi dicemus duo. primo quare dicuntur sensus interiores, cum etiam sensus exteriores possunt dici interiores pro quanto sunt intrinseci ipsi animali, & recepti in suis organis, ut visus in oculo &c. secundo, dicemus quæ fuit necessitas ponendi hos sensus interiores.

Circa primum nota quod visus & auditus &c. dicuntur sensus exteriores, quia immediate sine alio sensu priori suscipiunt species causatas à sensibilibus exterioribus, puta visus immediate recipit speciem coloris causatam à colore qui est in pariete, & auditus recipit sonum immediate causatum à corpore sonoro. isti vero ut sensus communis & phantasia &c. dicuntur sensus interiores, quia non immediate recipiunt species sensibilibus exteriorum, sed mediantibus sensibus exterioribus, puta si species coloris debet recipi in sensu communi & ab ipso transmitti ad phantasiam, est necesse quod prius recipiatur in visu, deinde per nervos, quibus affixi sunt oculi, transmittitur ad sensum communem, & ab ipso ad phantasiam, ut diximus. dicuntur ergo sensus interiores,

riores, quia non mutantur immediate à specie obiecti sensibilis exterioris, sed à specie prius recepta in sensu exteriori & ad eos transmissa.

Circa secundum nota s^m B. Th. in j. parte, q. 78. art. 4. q^d necessitas ponendi hos sensus in animali perfecto fuit, ut animal perfectum haberet omnes actiones opportunas regi mini vitæ suæ. Quæ autem sint hæ actiones declarabimus pertractando in particulari de singulis, sensibus interioribus, & ponendo necessitates suas.

Primus sensus interiorum est sensus communis, de quo dicemus quatuor. Primo, in quo organo situatur. Secundo, quæ sit necessitas sua, ex qua declarabitur, qui sint actus ipsius. Tertio, quare dicitur sensus communis, & hoc declarabitur in solut. arg. Quarto, quæ sit diffinitio sua.

Circa primum, nota s^m Auic. in 6. lib. nat. & omnes phisici concordant cum eo q^d organum sensus cōmunis est prima cellula cerebri, quæ est super frontem, in qua radican- tur omnes nerui descendentes ad organa sensuum exteriorum, ut à sensu communi deriuetur virtus sentiendi ad omnes sensus exteriores, sicut à fonte deriuantur varij riuuli & ad sensum communem transmittuntur omnes species obiecto- rum quæ apprehenduntur à sensibus exterioribus, omnes enim sensus exteriores vniuntur in sensu communi, sicut multæ lineæ egredientes à circumferentia vniuntur in centro circuli, & s^m Auic. se habent sensus exteriores ad sensum communem, sicut setui ad regem ad quem reuertuntur cum lucris. Quidquid enim oculus videt eius speciem transmittit per neruos quibus affixi sunt oculi ad sensum communem. Idem intellige de auditu, odoratu, &c.

Circa secundum nota, q^d necessitas ponendi sensum communem in animali perfecto est propter duas actiones quæ sunt in animalibus, & non possunt causari ab aliquo sensu exteriori, probatur. ergo fuit necesse ponere alium sensum præter sensus exteriores qui producerent has actiones, & hunc sensum dicimus esse sensum communem, prima actio sensus communis est cognoscere diuersitatem inter obiecta sensuum exteriorum, puta cognoscere q^d album non est dulce, & sonus non est odor, hanc diuersitatem nos cognosci-
mus

mus, & non per aliquem sensum exteriorem, licet enim per visum cognoscamus diuersitatem specierum coloris, puta cognoscimus per visum quod album non est nigrum, quia per visum vtrunque per se sentimus, tamen per visum non possumus cognoscere quod album distinguatur à dulci, nec per auditum cognoscimus quod sonus distinguatur ab odore, quia per visum non sentimus album & dulce per se, nec per auditum cognoscimus sonum & odorem. cum ergo per nullum sensum exteriorem cognoscamus diuersa obiecta distinctorum sensuum sequitur quod per nullum sensum exteriorem cognoscimus diuersitatem inter obiecta sensuum exteriorum. igitur necesse est ponere aliquem sensum interiorem ad quem transmittitur species obiectorum sensibilibus apprehensorum per sensus exteriores: & tunc per talem transmissionem cognoscimus diuersa obiecta sensuum exteriorum, cognoscimus etiam diuersitatem inter ipsa obiecta, & hic est sensus communis, nam per nervos egredientes à cerebro ad oculos cognoscit colorem, & per nervos egredientes à cerebro ad nares cognoscit odorem. cognitis autem ab eodem colore & odore. Aduerte, quod color distinguitur ab odore, quia alio modo color immutat visum, & alio modo odor immutat odoratum, & sic cognoscit diuersitatem inter obiecta sensuum exteriorum, secunda actio sensus communis est cognoscere actum sensus exterioris, puta cognoscit quod visus videt, & auditus audit. Et quod hæc actio causetur à sensu communi probatur sic. Hæc actio non potest esse à sensu exteriori. ergo est ab aliquo sensu interiori, ad quem terminatur actus sensuum exteriorum, & hic est sensus communis, probatur antecedens. scilicet quod nullus sensus exterior cognoscat actum suum, & probo de visu, & simile erat in alijs sensibus, quidquid per se videtur à visu est aliquo modo coloratum, vel lucidum, sed videre non est coloratum, nec lucidum, ut patet. ergo visus non videt se videre, similiter quidquid per se cognoscitur ab odoratu est aliquo modo odoriferum, odor enim est obiectum, sed odorare non est odoriferum. ergo odoratus non cognoscit se odorare. Præterea, sola potentia non organica, ut est intellectus cognoscit actum suum. ergo nullus sensus exterior cognoscit actum suum, quia

TRACTATVS I.

quia omnis sensus est potentia affixa organo, vt dictum est supra. Hęc ratio magis declarabitur in tractatu de intellectu. Cum igitur cognoscamus nos videre & audire, & non per aliquem sensuum exteriorem, sequitur quòd hęc actio sit à sensu communi: ex quo enim ad ipsum transmittuntur omnes species obiectorum sensibilibum quę recipiuntur in sensibus exterioribus, & cognoscit diuersa obiecta sensuum exteriorum, per primam actionem potest etiam cognoscere diuersos actus ipsorum sensuum, puta quòd visus videt, quòd auditus audit, & quod videre non est audire. Ex ijs patet quę sit necessitas ponendi sensum communem.

Circa tertium quare dicatur sensus communis declarabo in solutione argumenti.

Circa quartum, scilicet quid sit sensus communis, nota quòd sic diffinitur, vt elicitur ab Auicen, in sexto naturalium in cap. de sen. inter. Sensus communis est potentia situata in prima parte cerebri à qua omnes sensus exteriores deriuantur, id est accipiunt virtutem sentiendi, ad quam transmittuntur omnes species sensatę apprehensę per sensus exteriores, in qua omnes sensus exteriores yniuntur, sicut plures, lineę in centro. Hęc diffinitio patet ex prius declaratis. Hęc de sensu communi sufficiant. Quomodo vero per hanc potentiam compleantur somnia & causetur dormitio, iam declarauimus in tractatu quem ordinaui de somno & vigilia, & de prophetia quę sit in somnijs.

CAPVT IIII.

IN quarto capite agendum est de secundo sensu interiori, qui dicitur phantasia secundum Aristot. & dicitur formalis secundum Auicen. id est 6. naturalium de quo dicemus quatuor.

Primo, in quo organo situatur.

Secundo, quę sunt operationes suę.

Tertio, quę fuit necessitas ponendi hunc sensum.

Quarto, quare vocatur phantasia, & quomodo diffinitur.


Circa

Circa primum, nota quòd secundum Auicem. & Auer. & B. Th. in opusculis de potentijs animæ. phantasia situatur in secunda parte cerebri in parte anteriori capitis post sensum communem, & id congruenter à natura actum est, nam phantasia habet retinere & conseruare species apprehensas à sensibus exterioribus & transmissas ad sensum communem, puta visus in se recipit colorem pomi & figuram, hanc speciem transmittit per neruos ad sensum communem: & sensus communis transmittit eam ad phantasiam, in qua ut in quodam thesauro conseruatur. Idem intellige de omnibus speciebus apprehensis per alios sensus. Et si quæras quare sensus communis recipiens tales species non retinet eas neque conseruat, sine hoc quod transmittat eas ad phantasiam? Respondeo quòd sensus communis non potest eas retinere. nam situatur in prima parte cerebri super frontem vbi est multa humiditas, & mollities, proprium est autem rei mollis bene & faciliter recipere, molle autem retinere, sicut cera mollis facile recipit figuram sigilli & male retinet, facile enim est talem figuram delere. Hæc igitur est ratio quare sensus communis cum facilitate species sensatas recipit à sensibus exterioribus, sed eas non potest retinere, & ideo est necesse ut transmittantur ad aliam potentiam quæ sit situata in parte sicca ipsius capitis, & hæc est phantasia, nam in secunda parte anteriori capitis, non est tanta humiditas & est maior dūrities, & ideo phantasia quæ ibi situatur bene retinet & conseruat ipsas species, & ideo vocatur ab Auicem. thesaurus specierum sensatarum. Figura declarans quomodo situatur phantasia in capite, & quomodo quasi per neruum transmittantur ad ipsam sensate species patet hic.

Epit. Iauelli.

r Circa

Circa secundum
nota quod due sunt
operationes phan-
tasie. prima est, q̄
habet retinere spe-
cies sensatas & trāf-
missas à sensu com-
muni tanquā tha-
lamus & thesaurus
sensus communis:
vt inquit Algazel,
nam dictum est su-
pra quòd sensus cō-
munis est sicut rex
in solio ad quem re-
deunt sensus exte-
riores. cum specie-
bus apprehensis, sic-
ut serui cum lucris,
& has species velut



lucra recondit conseruanda in phantasia & in suo thesau-
ro, secunda est secundum Auer. & B. Th. quòd habet com-
ponere species sensatas adinuicem, puta in phantasia est con-
seruata similitudo montis quem aliquando vidi, & similitu-
do auri quod aliquando vidi. potest autem phantasia has
duas species adinuicem componere & fingere montem au-
reum, licet non inueniatur in natura, ex quo sequitur, quòd
omnia entia fictitia, vt sunt figmenta poetarum, vt sunt pa-
rabole, vt sunt entia chimerica, puta fingere animal cuius
caput sit leonis, & pedes auis, & cauda serpentis, & alæ vul-
turis, omnia huiusmodi sunt per operationem phantasie cō-
ponentis varias species rerum sensibilibum adinuicem, & si
phantasia potest hæc chimerica componere, dum homo vi-
gilat, potest multo magis dum homo dormit vnde à phanta-
sia plerunque causantur visiones quæ fiunt in somnijs, & ni-
si hæc potentia existeret in animali perfecto nunquam ani-
mal nec homo somniarent. quomodo vero phantasie cau-
sentur somnia vera, siue falsa, siue prænuncia rerum futura-

rum

rum declarauit in tractatu quem ordinaui de somno & vigilia. Notanter vero dixi, quòd secundum Auer.& B.Tho. phantasia habet componere species sensatas, quoniam Auicenna in 6. natural. opinatur, quòd phantasia solum habeat cōseruare species sensatas, alia vero potentia quæ apud Auic. dicitur imaginatiua, & situatur secundum eo in cerebro post phantasiam habet componere species sensatas adinuicem, vnde etiam fictitia secundum ipsum sunt ab imaginatiua, & non à phantasia.

Circa tertium nota, quòd necessitas ponendi phantasiam est vt animal perfectum cui non semper coniuncta sunt ea quæ sunt opportuna regimini vitæ suæ ex recordatione rerum quæ sunt necessaria vitæ suæ moueretur localiter ad querendum ea. Verbi gratia, homo non semper habet cibum sibi præsentem quando famescit incitatur ad querendum cibum. non posset autem incitari nisi haberet in phantasia sua species panis & vini & pomi cōseruatas, ex ijs enim speciebus cōseruatis recordatur, quòd panis & vinum & pomum quæ aliquando gustauit sunt cibus sibi conueniens, & ideo quando famescit mouetur localiter ad querendum cibum sic incitatur canis, sic leo ad venationem quando famescit ex recordatione ciborum sibi cōuenientium, vnde inquit Arist. in tertio de anima, quòd animalia patiuntur & operantur per phantasiam, animalia vero imperfecta quæ non mouentur secundum locum, vt ostrea, non habent phantasiam determinatam, quoniam habent suum cibum quicumque sit semper sibi præsentem, & ideo non est eis opus recordari nec moueri ad aliquem locum distantem ad querendum cibum, propter quod huiusmodi animalia propter suam imperfectionem habent solum sensum tactus, vt dicemus in tract. de potentia motiua.

Circa quartum nota, quòd phantasia sic nominatur ab effectu suo. nam vt diximus in secunda sua operatione, hæc potentia causat, maxime dum dormit animal visiones & apparitiones in somni, quando enim aliquid somniamus apparet nobis quòd sic fit in re sicut somniamus, dicitur igitur phantasia ab ijs operationibus, & visionibus quas causat. nam phanos græce idem est quod apparitio inde deri-
100
r ij uatur

TRACTATUS I.

uatur phantasia quasi aperitiua, id est causans apparitiones. Quomodo vero diffiniatur, nota quod duplex de ea datur diffinitio, prima est Arist. in secundo de anima, quæ est hæc, phantasia est motus factus à sensu secundum actum, id est phantasia est potentia quæ sit in actu per sensum exteriorē & per sensum communem, nam ut diximus, phantasia actu respicit speciem sensatam apprehensam à sensu communi transmissam ad phantasiam secunda diffinitio elicitur ex Auicenn. in 6. naturalium, quæ est hæc. phantasia est potentia situata in secunda parte cerebri post sensum communem cōseruatiua specierum sensatarum quæ à sensu communi ad ipsam transmissa sunt. Hæc de phantasia sufficiant.

CAP. V. T. V.

IN quinto cap. agendum est de tertio sensu interiori, qui in brutis dicitur existimatiua, in homine dicitur cogitatiua, de qua dicemus quatuor.

Primo, in qua parte cerebri ut in suo organo situatur.

Secundo, quæ sunt eius actiones, ex quo etiam declarabitur necessitas sua.

Tertio, in quo differt existimatiua in bruto ac cogitatiua in homine.

Quarto, quid sit utraque.

Circa primum, nota secundum Auicenn. id est 6. naturalium & Auer. in lib. de sensu & sensatu, quod cogitatiua in homine situatur in medio capitis, ubi est media cellula cerebri, & est

post phantasiam, ita quod supereminet illi, in bruto vero existimatiua ponitur

in posteriori parte medice cel-

lule cerebri, ita quod

declinet à summate capitis ad partem po-

sterior. Figura patet infra.

Circa

Circa secundū
nota quòd secun-
dum Auicē. ubi su-
pra & Algazel. in
lib. suo de anima. **S. cōls**
Actio huius poten-
tiæ est elicere ali-
quas species quæ
dicuntur intentio-
nes non sensatæ,
id est quæ non pos-
sunt cognosci per
sensum exteriorē,
nec per sensum cō-
munem. Istæ au-
tem intentiones
sunt amicitia, ini-
micitia, bonum,
malum, paterni-
tas, filiatio &c.
Quomodo vero
id fiat, nota quòd



cogitativa superueniens phantasiæ inspicit species sensatas
quæ sunt seruata in phantasia, puta existimatiua quæ est in
oue inspicitur figuram lupi conseruatam in sua phantasia,
ex tali figura quali correspondentia elicit inimicitiam natu-
ralem inter ipsam & lupum, & ideo cum sibi præsentatur fi-
gura lupi fugit, non quia sit talis figuræ, sed ut inimicum, si-
militer in homine id accidit, nam si Plato videatur homi-
nem respicientem se toruo aspectu & loquentem iracundæ
talis hominis figura & locutio defertur per sensus exterior-
es ad sensum communem, inde transmittitur ad phantasiā
& ibi conseruatur, tunc cogitativa superueniens conside-
rat talem figuram talemque locutionem, & ex eis elicit ini-
micitiam quasi concludens, hoc est inimicus meus eo quòd
toruo aspectu me inspexit, & irate allocutus est, ex opposi-
to autem, id est ex benigno aspectu, & miti colloquio elicit
amicitiam. hæc est actio existimatiuæ & cogitatiuæ ex qua

cognoscitur sua necessitas, nisi enim hæc potentia esset in animali perfecto non posset fugere nociua, & prosequi vtilia. nam ouis non fugeret lupum & sic occideretur, & non lactaret agnum vt filium, & sic agnus fame deficeret, & homo in manu suorum inimicorum incideret, nunquam amicitiam contraheret, & tunc deperiret societas ciuilis & humana.

Circa tertium nota q̄ secundum Auer. in lib. de sensu & sensato & B. Thom. in prima parte quæst. 78. art. 4. existimatiua in hoc differt à cogitatiua, quoniā existimatiua in brutis cognoscit illas intentiones non sensatas sine aliquo discursu, sed solo instinctu naturali sibi indito à primo conditore, vt existimatiua ouis naturali instinctu cognoscit inimicitiam lupi, & hos cibos sibi esse conuenientes, illos autem sibi nociuos, & auis naturali instinctu cognoscit hanc paleā conuenientem sibi ad nidificandum, & breuiter omnia operantur, vel abhorrent bruta operantur vel defugiunt inquā tum mouentur ab existimatiua & instinctu naturali. Cogitatiua vero in homine cognoscit has intentiones non sensatas cum aliquo discursu & syllogismo, potest enim cogitatiua formare syllogismum expositorium qui constant ex duabus propositionibus singularibus sic. Hic est mihi inimicus, & hic est lupus: ergo lupus est mihi inimicus. Item idē aliquando apprehendit arguendo ab exemplo sic. Patet Platonis est mihi inimicus. ergo & Plato est mihi inimicus, quia filius assimilatur patri, & quia cogitatiua est syllogistica, ideo est nobilior inter potentias sensitiuas, propinqua enim est intellectui, cuius est discurrere & syllogizare, & propter suam nobilitatem dicitur ratio particularis, sicut intellectus dicitur ratio vniuersalis, vt declarabimus in tractatu de intellectu.

Notandum postremo, q̄ cogitatiua in homine est illa quæ causat iudicia temeraria, quando enim ex leui indignatione vel negatione obsequij concludit inimicitiam inter duos potest esse conclusio & iudicium falsum, & ideo nisi regulatur imperio rationis maxime incitat appetitum sensitiuum concupiscibilem & irascibilem, præcipue in malum, vt dicemus in tractatu de potentia motiua, patet ergo quomodo differunt

differunt existimatiua in bruto, & cogitatiua in homine.

Circa quartum nota quòd sic diffinitur existimatiua, vt elicitur ab Algaz. in suo lib. de Anima. Existi. est potentia apprehendens ex sensato non sensatum, id est est potentia cognoscens ex specie sensibili reseruata in phantasia speciem non sensibilem, vt inimicitiam, amicitiam &c. Cogitatiua est potentia apprehendens ex specie sensibili intentionem non sensatam cum aliquo discursu syllogistico, vt declaratum est.

CAPVT VI.

IN sexto cap. agendum est de quarto sensu interiori, quia dicitur in bruto memoria, in homine vero dicitur reminiscencia, & dicemus quatuor.

Primo, de organo suo.

Secundo, de actione, vbi etiam declarabitur necessitas sua.

Tertio, in quo differt memoria à reminiscencia.

Quarto, quid sit vtraque.

Circa primum, nota secundum Auicem. in 6. natur. & omnes alios Physicos quòd hæc potentia situatur in vltima parte cerebri, quæ est in posteriori parte capitis post existimatiuam vel cogitatiuam, illa enim pars capitis est multum sicca, & ideo est bene retentiua, vnde rationabiliter collocatur ibi.

Circa secundum, nota secundum omnes physicos, præcipue Auicem. in 6. nat. quòd officium memoriæ est retinere & conseruare intentiones non sensatas quas existimatiua & cogitatiua apprehendit ex speciebus sensatis conseruari in phantasia vnde sicut phantasia est thesaurus & arca specierum sensatarum quas ad eam transmittit sensus communis, ita memoria est arca intentionum non sensatarum vt est intentio amicitie, inimicitie, paternitatis, nociui, & commodi &c. quas, postquam cogitatiua apprehendit transmittit ad memoriam ibi conseruandas, ex hoc patet necessitas sua, nisi enim memoria conseruaret has intentiones animal non fugeret nociua nec quæreret sibi vtilia, ea enim quorum obliuiscimur non quærimus nec diligimus;

verbi gratia, si in memoria ouis non conseruaretur intentio inimicitiae lupi quando videret lupum non fugeret, & si in memoria canis non seruaretur intentio beniuolentiae, vel beneficii accepti à domino suo quando videret dominum non applauderet cauda, nec custodiret domū, vt ergo animalia fugiant nociua & quærant vtilia data est eis memoria.

Circa tertium nota secundum Auicen. in 6. naturalium & Algaz. in lib. suo de Anima, qd memoria ita differt à reminiscetia, sicut differt existentiua cogita, sicut enim bruta per existimatiuam solo instinctu naturali & sine aliquo discursu apprehendunt intentionem non sensatam, ita per memoriā solo instinctu sine syllogistico discursu ex intētionē nō sensata quæ est in memoria, & specie sensata quæ est conseruata in phantasia recordantur rei præteritæ quam fugiunt vel quærunt, verbi gratia canis, videns baculum in manu Socratis, ex apprehensione nociui & forma baculi recordatur qd baculus est sibi nociuus, & ideo cum videt baculum fugit, vel non propinquat homini tenenti baculum, homo per cogi. cum aliquo discursu syllogistico cognoscit intentiones non sensatas ita quod per memoriam cum aliquo discursu reconditur rei præteritæ, & talis memoria cum discursu dicitur reminiscetia, verbi gratia, volo recordari quid mihi dixerit Socrates heri in horto, sic fiet. primo præsentabitur à memoria intentio amicitiae vel inimicitiae si præsentabitur intentio inimicitiae sic discurrem, Socrates est mihi inimicus. ergo dixit mihi odiosa, deinde inuestigo discurrendo quod & quale verbum odiosum dixerit, & hunc quidem discursum maxime experimur in nobis quando recordari laboramus de aliqua re iam diu præterita.

Circa quartum nota, qd diffinitur memoria ab Auicen. in 6. nat. Memoria est potentia ordinata in posteriori concavitate cerebri conseruans id quod apprehendit virtus existimatiua de intentionibus non sensatis, eodem modo diffinienda est reminiscetia, sed addatur hæc particula cum aliquo discursu, per hanc enim differt à memoria quæ est in brutis. Hæc sufficiant de numero sensuum interiorum, in quo secutus sum Auer. & B. Thom. si vis autem habere opinionem Auicen. & Algaz. & Alber. qui dicunt eos esse
quinque

quinque, & quomodo conueniunt vel differant quære tractatu, quem ordinaui de omnibus ijs opinionibus cum figuris singularum opinionum.

Vltimo soluentur tantum duo argum. primum probat quod diffinitio sensus non sit conueniens. nam in sensu tactus recipitur species sui obiecti cum materia, id est naturaliter, quando enim manus tangit calidum sit realiter & physice calida. ergo non omnis sensus recipit speciem sui obiecti sine materia, & sic diffinitio sensus est falsa, cum non conueniat cuilibet sensui.

Ad hoc dicitur, quod in sensu tactus recipitur species sui obiecti, & naturaliter, ut probat argumentum, & spiritualiter, licet non ita sit manifestum. si enim sola receptio naturalis sufficeret in sensu tactus etiam lapides & terra haberent sensum tactus. recipiunt enim qualitates tangibiles naturaliter, ut lapis recipit calorem & frigiditatem. dicendum est ergo quod causa sentiendi per se in sensu tactus est receptio specierum intentionaliter, licet propter suam materialitatem recipiantur etiam species sui obiecti materialiter, sed hoc est per accidens.

Secundum probat, quod primus sensus interior non debet dici sensus communis. Sensus communis est ille qui prædicatur de pluribus sensibus, sicut homo communis est ille qui prædicatur de pluribus hominibus, sed primus sensus interior non prædicatur de pluribus sensibus, cum sit vnus sensus singularis. ergo non debet dici sensus communis.

Ad hoc dicitur quod non dicitur sensus communis secundum prædicationem quasi prædicetur de pluribus sensibus, sed dicitur sensus communis quasi terminus communis, ad quem sensus exteriores transmittunt species obiectorum

ab eis apprehensas, ut declarauimus supra, sicut etiam centrum in sphaera dicitur terminus communis ad

quem plures lineæ à circumferentia termi-

nantur. Hic finit tractatus de

sensibus interio-

ribus.



Tractatus

TRACTATVS II.

TRACTATVS SECVNDVS SVPER tertium librum de Anima, de intellectu possibili & agente.



IN hoc secundo tractatu super tertium de Anima agendum est de potentia intellectiua, quæ diuiditur in intellectum possibilem, & agentem. Et primo, agendum est de intellectu possibili, de quo sunt quatuor capita.

Primo, quid sit.

Secundo, quod est suum obiectum.

Tertio, quod sunt operationes suæ.

Quarto, quot modis denominatur, licet tantum sit vna potentia realiter.

CAPVT PRIMVM.

CIrca primum caput ponenda est diffinitio intellectus possibilis & declaranda. Vt igitur elicitur ab Arist. in tertio de anima sic diffinitur. Intellectus possibilis est potentia animæ apta nata intelligere omnes naturas corporeas & sensibiles carens omni natura sensibili, nec est affixa alicui organo corporeo. Hæc diffinitio declaratur quo ad singulas partes, & insertur vnum corollarium, secundum mentem Philosophi primo dicitur apta nata intelligere, id est est in potentia ut intelligat, non enim actu semper intelligit, nec actu semper habet species intelligibiles in se ut per eas intelligat, & probatur ex tali similitudine secundum Arist. sicut se habet sensus ad sensibilia, ita intellectus ad intelligibilia, sed sensus est in potentia ut sentiat sua sensibilia, & nullum eorum ex natura sua habet in se actu, ut auditus est in potentia ut sentiat sonos, & nullum sonum ex natura sua in se habet, ut declarauimus agens de organo auditus. ergo & intellectus est in potentia ut intelligat res sensibiles, & corporeas, & nullam speciem intelligibilem ex natura sua se habet actu. dicitur, secundo carens omni natura

tura sensibili & corporea, id est insensibilis & incorporeus & sic est ens spirituale, & probat sic philosophus. Omne receptiuum alicuius est denudatum & priuatum illo, ut oculus est receptiuus coloris. ergo oportet esse priuatum colore, & auditus est receptiuus soni. ergo oportet esse priuatum omni sono, si enim aliquem sonum in se haberet priuaretur ne reciperet alios sonos. nam intus apparens prohibet extraneum, ut inquit philosophus, sed intellectus possibilis est receptiuus omnis naturæ sensibilis & corporeæ, potest enim intelligere omnem rem sensibilem & corpoream, ut declarabitur quando dicemus de obiecto eius in 2. cap. ergo intellectus possibilis est nudatus & priuatus omni natura sensibili & corporea, ex quo sequitur corollarie quod intellectus nec est elementum, nec quid compositum ex elementis, nec aliqua qualitas sensibilis, ut sunt frigus, calor, sapor & c. sed ens purum spirituale aptum natum cognoscere omnia sensibilia & materialia & corporea. dicitur 3. non affixa alicui organo corporeo, & in hoc distinguitur à sensibus, qui omnes sunt affixi suis determinatis organis, ut diximus supra. Quod autem intellectus non sit affixus alicui organo. probatur sic. omnis potentia affixa organo corporeo cognoscit solum vnum genus entium, ut quia visus est affixus organo. cognoscit solum visibile, & auditus, sonos, & gustus, sapores, sed intellectus non cognoscit solum vnum genus entium, immo omnia genera entium, ut dicemus in secundo cap. ergo non est affixus, immo separatus est ab omni organo corporeo. Si autem quæras ubi sit hic intellectus, vel in qua parte corporis, an sit extra corpus ut substantia separata, sicut fingit Auer. Respondeo quod est in anima intellectiua sicut accidens in suo proprio subiecto. nam intellectus sunt aliæ potentiæ animæ est in secunda specie qualitatis. anima autem intellectiua secundum essentiam suam est in toto corpore sicut forma in sua propria materia & sic patet quod intellectus est potentia solius animæ. aliæ vero potentiæ vegetatiuæ & sensitiuæ non sunt solius animæ, sed totius animati, quia cum sint affixe organis sunt subiectiuæ in organis corporeis, ut visus in pupilla & c. De opinione Auer. qui arbitratur intellectum, possibilem esse

TRACTATUS III.

esse extra hominem, vt substantia separata, & animam intellectiuam non esse formā hominis disputabitur in fine tract. patet igitur diffinitio intellectus possibilis & declarata secū dū omnes partes suas. Ex hac diffin. infert Philosophus hoc corollarium, licet excellens sensibile corrumpat sensum, vt lux solis si per aliquod tempus directo intuitu aspi ciatur execat hominem & corrumpit pupillam, non tamē excellens intelligibile, vt cōlum, vel intelligentia si intelligantur non corrumpunt intellectum, & huius ratio est, quia sensus est affixus organo, & excellens sensibile alterat organum, quo alterato vel debilitatur vel destruitur sensus, vt de claraui in primo tract. huius tertio lib. vbi actum est de sensu & organo sensus in cōmuni. intellectus vero non est affixus organo, & ideo excellens intelligibile non potest alterare, nec debilitare, nec corrumpere intellectum, immo perficit ipsum & reddit potentiorē ad intelligendum, si enim intelligo magis difficile postea sum magis dispositus ad intelligendum minus difficile. Hæc de primo cap.

CAPVT II.

IN secundo cap. declarandum est quid sit obiectum intellectus possibilis, & ibi sunt duo.

Primo, ponitur distinctio de obiecto.

Secundo, ex hac dist. ponuntur quædam conclusiones. Distinctio est hæc. Obiectum intellectus est duplex, scilicet obiectum primum & obiectum secundarium. Item primum potest esse triplex, scilicet obiectum primum, id est communissimum & adæquatum & est illud quod sub se continet omne ens intelligibile, & obiectum primum, id est primo motiuum, & est illud quod mouet primo intellectum ad intelligendum, & obiectum primum, id est perfectissimum, & est illud quod est nobilissimum inter omnia entia intelligibilia.

Secundo, ex hac distinctione pono quatuor cōclusiones.

Prima. Ens vt est transcendens, id est vt prædicatur de quo libet ente, siue de ente reali, siue de ente rationis est primū obiectum, id est communissimum & adæquatum obiectum intellectus possibilis, probatur. Intellectus possibilis ex natura

tura sua inquantum est immaterialis potest intelligere omne ens. ergo ens quod prædicatur de omni ente est obiectum primum, id est adæquatum ipsius intellectus. probatur antecedens. Potentia non organica non determinatur ad aliquod genus entis sicut determinatur sensus, quia est potentia organica. ergo ex sua natura immateriali potest intelligere omne ens. Et nota quod hæc conclusio intelligit de intellectu possibili absolute considerato.

Secunda conclusio. Quidditas, id est natura rei materialis sensibilis & corporeæ est obiectum primum, id est primo motuum intellectus possibilis pro ista vita mortali. probatur. Illud quod mouet intellectum ad intelligendum est ens materiale & sensibile, quia omnis nostra cognitio pro ista vita ortum habet à sensu. ergo natura rei materialis & sensibilis est obiectum primum, id est primo motuum intellectus nostri. Ex hac conclusione sequitur, quod donec anima vnitur corpori primo & per se non intelligit nisi vniuersale materiale sensibile, puta hominem vt homo, lapidem vt lapis &c. entia vero incorporea non intelligit nisi pro quanto manu ducitur ad illa per hæc sensibilia, puta cognosco intelligentias per corpus cœleste, & motum eius quæ sunt quædam sensibilia. Et nota quod secundum cognitionem hanc quam habet intellectus pro hac vita mortali formata est supra diffinitio intellectus possibilis.

Tertia conclusio. Deus est obiectum primum, id est perfectissimum intellectus nostri probatur. Deus est perfectissimum ens. ergo est perfectissimum obiectum intellectus. Præterea cognitio habita de deo maxime perficit intellectum nostrum ita quod in diuina speculatione consistit felicitas. ergo deus est perfectissimum obiectum intellectus nostri.

Quarta conclusio. Singularia sensibilia actus intelligenti & ipse intellectus & ipsa anima intellectiua sunt secundaria obiecta intellectus nostri pro hac vita. probatur. Ea sunt secundaria obiecta intellectus quæ necessario requirunt aliqua prius cognita, sed singularia sensibilia si debent intelligi requirunt aliqua prius cognita, id est sua vniuersalia. nõ enim potest intelligi Socrates vel Plato nisi prius intelligatur homo in communi, similiter non potest intelligi intelli-
gendi

TRACTATUS II.

gēdi actus nisi prius intelligatur obiectum intellectus. nam
 ut diximus in secundo lib. actus intelliguntur per obiecta &
 non potest intelligi ipse intellectus nisi prius intelligatur
 actus intelligendi, quia potentia intelliguntur per suos a-
 ctus, & non potest intelligi ipsa anima intellectiva nisi prius
 intelligatur ipse intellectus, quia ut diximus in secundo lib.
 substantia animæ non cognoscitur nisi per potentias suas.
 ergo singularia sensibilia, actus intelligendi, ipse intellectus,
 ipsa anima intellectiva, sunt secundaria obiecta intellectus
 possibilis. patet ergo quid sit obiectum suum &c.

CAPUT III.

IN tertio cap. agendum est de operationibus intellectus
 possibilis. & nota quod sunt tria, scilicet simplicium ter-
 minorum, vel incomplexorum intelligentia, composi-
 tio, & diuisio, discursus à noto ad ignotum, duæ primæ ponū-
 tur à Philosopho in tertio lib. de Anima tertia ponitur à
 philosopho in logica in tota arte noua.

Prima, dicitur simplicium, id est incomplexorum termi-
 norum intelligentia. & est quando intellectus simplici in-
 tuitu cognoscit naturam rei, ut diffinibilem, puta quando
 cognoscit hominem, aut lapidem, ut diffinibilia. & hæc est
 prima operatio intellectus non enim posset formare propo-
 sitionem nisi prius aliquo modo cognoscerentur subiecta,
 & prædicatum qui sunt termini incomplexi.

Secunda, operatio est compositio, & diuisio, & est quando
 intellectus postquam cognouit terminos incomplexos eos
 adinuicem componit per propositionem affirmatiuam, vel
 diuidit per propositionem negatiuam.

Tertia operatio est discursus, & est quando ex vna propo-
 sitione nota procedimus ad venandam aliam incognitam,
 ut ex hac cognita, homo est rationalis, procedimus ad co-
 gnitionem huius, homo est admiratiuus, & hæc operatio a-
 pud logicum dicitur ratiocinatio, vel argumentatio, de qua
 in logicalibus satis actum est.

Inter has operationes hæc præcipue est differentia, quod
 in prima operatione non est veritas, & falsitas per se, sed so-
 lum

lum per accidens. & probatur sic, sicut se habet sensus ad simplicem apprehensionem sui proprii obiecti, ita se habet intellectus ad simplicem apprehensionem rei incomplexæ diffinibilis, sed in apprehensione proprii obiecti in sensu non est veritas, & falsitas immo non decipitur in cognitione sui proprii obiecti, ut non decipitur visus in cognitione coloris, ut diximus in tractatu de sensibus exter. dummodo organum sit dispositum, & sit debita distantia inter sensum, & suum obiectum. ergo nec est veritas, & falsitas in intellectu in apprehensione rei incomplexæ diffinibilis, immo non decipitur per se in diffinitione rei. Dixi autem non per se, quoniam sicut in sensu potest esse deceptio respectu sensibilis per accidens, ut si ex eo quod video à longinquo corpus coloratum, velim ipsum iudicare esse hominem, vel arborem forte deciperer. similiter in prima operatione intellectus contingit deceptio dupliciter. primo quando diffinitio huius rei attribuitur alteri, ut si vellem attribuere symiæ, quod sit animal rationalis. secundo quando diffinitio formatur ex partibus repugnantibus, ut si vellem adinuicem componere animal, & insensibile. & hæc quidem deceptio provenit ex eo, quod via diffiniendi est per diuisionem, & compositionem, ut declaravi in j. tractatu super j. de Anima in secunda vero operatione formatur propositio, quæ semper est vera, vel falsa, quia aut prædicatum conuenit subiecto, aut non, si sic, est vera, si non est falsa. similiter est veritas & falsitas in tertia operatione, quoniam cum argumentatio constet ex propositionibus, sicut est veritas, & falsitas in propositione, ita est in ratiocinatione, de veritate, & falsitate quid sit, & quomodo proprie sunt in secunda operatione. vide compendium maius, super lib. Periher. istæ tres tres operationes non conueniunt nisi intellectui humano, qui ex sensibilibus venatur scientiam, intellectus enim angelicus simplici intuitu sine compositione, & diuisione, & sine discursu omnia intelligit. & ideo non potest esse error, vel deceptio, aut falsitas in eorum intellectu multo minus in intellectu diuino, verum hæc, perscrutare. est officium sacri theologi. hic enim in libro de Anima. tantum habemus, considerare de operatione intellectus humani,

ni, quæ sibi conuenit dum vnitur corpori . Quomodo vero anima postquam est separata à corpore intelligat non est officium phylici, sed theologi .

CAPVT IIII.

IN quarto cap. perscrutandum est quot modis denominatur intellectus possibilis, secundum diuersam considerationem, licet sit tantum vna potentia realiter, vnde notandum est secundum viam B. Thom. in prima parte q. 79. & magis resolute in opusculo de potentijs animæ. quod intellectus possibilis solet denominari apud philosophos, & grecos, & latinos, ac theologos vndecim modis, qui sunt isti, videlicet . Primus, intellectus potentialis, vel materialis, vel possibilis . Secundus, intellectus dispositus . Tertius, intellectus in habitu, vel memoria . Quartus, intellectus adeptus . Quintus, intelligentia . Sexta, meus . Septimus, ratio . Octauus, ratio superior . Nonus, ratio inferior . Decimus, intellectus practicus . Vndecimus, intellectus speculatiuus .

Primo, consideratur in quantum ex natura sua est in potentia ad acquirendam scientiam, & alios habitus intellectuales. creatur enim sicut tabula rasa, in qua nihil est descriptum, & sic dicitur potentialis, id est potens acquirere scientiam . item dicitur materialis, quia sicut materia ex se nullam habet formam, sed est in potentia ad recipiendum formam, ita intellectus ex se nullam habet scientiam, sed est in potentia ad acquirendam scientiam . & ideo merito dicitur materialis, potentialis, vel possibilis, id est potens acquirere scientiam .

Secundo, consideratur in quantum iam habet principia alicuius scientia, sed nondum illam scientiam acquisiuit, ut quando quis iam nouit principia geometriæ, sed nondum scit ex eis deducere conclusiones. & sicut dicitur intellectus dispositus, scilicet ad scientiam acquirendam .

Tertio, consideratur in quantum iam acquisiuit scientiam, sed non actu considerat circa illam, sicut ille qui acquisiuit logicæ habitum, sed non actu syllogizat . & sic dicitur intellectus in habitu . si vero actu consideret circa scientiam acquisitam

Sciam dicitur intellectus in actu . similiter dicitur memoria in quantum acquisiuit scientiam , & eam retinet , ac conseruat . vnde nota, q̃ memoria est duplex . sc. sensitua, & intellectiua . sensitua est vltimus sensus interior , & distinguitur realiter à cogit. quia situatur in posteriori parte cerebri . cogitatiua vero est in medio capitis . intellectiua autem non distinguitur realiter ab intellectu , sed solum secundū rationem . nam prout acquirit scientiam dicitur intellectus . prout vero scientiam retinet , dicitur memoria . & sic paret , q̃ memoria intellectiua nō est affixa alicui organo corporeo , sicut nec intellectus .

Quarto , consideratur ēm quod acquisiuit omnes scientias humanas , & diuinas . & sic dicitur intellectus adeptus , & tunc apud Philosophos , si quis hominum talem intellectum haberet diceretur felix , ac diuinus similis deo , & eius amicus . & de tali loquitur Philosophus in 10. Eth. dicens : Sapiens videtur esse maxime felix , & deorum amicus .

Quinto , consideratur in quantum simplici intuitu non componendo , vel diuidendo rem incomplexam cognoscit . & sic dicitur intelligentia , & inde est , quod apud Philosophos substantiæ separatæ dicuntur intelligentiæ , quia , vt diximus supra , sine compositione , ac diuisione , & sine discursu omnia simplici intuitu cognoscunt .

Sexto , consideratur in quantum per intellectionem suam metitur singulas res , scrutando , quæ prædicata eis conueniant , & quæ non . & sic dicitur mens , vt deriuatur à metior metiris . Sed nota , q̃ hæc expositio est impropria . quoniam apud philosophos , & doctores græcos , præcipue Dionys. in lib. de cœlesti Hierarc. mens proprie dicitur natura , quæ est pure intellectualis nullo modo corporea . & sic substantiæ separatæ proprie dicuntur mentes , & deus dicitur apud græcos prima mens . igitur cum intellectus humanus sit in anima intellectiua , & ipsa sit vnita corpori improprie dicitur mens .

Septimo , consideratur in quantum per argumentationē , & discursum venatur scientiam , & sic dicitur ratio . i. potentia ratiocinatiua , & discursiua . & hoc solum competit animi . vnde solus homo pprie est rationalis , angelos vero , ac deus

221 T R A C T A T V S II. M
non sunt rationales, sed proprie dicuntur intellectuales.

Octauo, caret.

Nono, consideratur in quantum intendit cognoscere hæc inferiora, aut per causas suas, vt patet in mathematicis, aut per effectus magis notos, vt patet in physicis, vt quando venatur scientiam ex elementis, & elementatis, & sic dicitur ratio inferior quasi rebus inferioribus, ac corruptibilibus intendens.

Decimo, consideratur in quantum quiescit in cognitione veritas, nec eam ordinat ad opus, vt quando acquisiuit cognitionem de anima quiescit in ea. & sic dicitur intellectus speculatiuus.

Vndecimo, consideratur in quantum non quiescit in cognitione veritatis, sed eam ordinat ad opus, vt quãdo acquisiuit artem ædificandi non quiescit, nisi ædificet gratia lucri, vel alterius commodi, & sic dicitur intellectus practicus. Quomodo vero idem intellectus dicatur conscientia, & si derelictis non est officium physici, sed theologi. Hæc de intellectu possibili sufficiant.

DE INTELLECTV AGENTE.



IN secunda parte huius tract. agendum est de intellectu agente, & diuidimus eum in tria capita.

In primo, declaratur, quæ fuit necessitas ponendi intellectum agentem, vt potentiã distinctam realiter ab intellectu possibili, in quo simul declarabitur, quæ sint operationes sue.

In secundo, diffinietur quid sit intellectus agens.

In tercio, concludetur de mente philosophi, q̃ tota anima intellectiua est immortalis, & incorruptibilis.

CAPV T. PRIMVM.

IN primo cap. declaratur necessitas intellectus agentis.

Vñ nota, q̃ res sensibiles materiales, vt lapis, & homo &c.

non

non eodem modo possunt à sensu sentiri, & ab intellectu possibili intelligi. nam cum sensus sit potentia organica, & materialis. hæc sensibilia singularia, puta hoc album potest imprimere speciem, & similitudinem suam in visu. & sic per se videtur. & sic non oportet, q̃ ponatur aliquis sensus agens, causans speciem sensibilem in sensu, sed ad causandam hanc speciem sufficiunt singularia sensibilia corporea, vnde dicuntur sensibilia in actu, quia per seipsam possunt causare speciem, & similitudinem in sensu. non sic autem possunt ab intellectu intelligi, quoniam cum intellectus possibilis sit potentia pure spiritualis non affixa organo. hæc sensibilia singularia puta Socrates hæc rosa, hic alinus, non possunt causare speciem suam in intellectu, per quam intelligantur, quia nullum materiale, & corporeum causat aliquid in re spirituali. & ideo vt hæc sensibilia intelligantur ponitur in intellectu agens. cuius operatio est causare speciem intelligibilem in intellectu possibili, per quam hæc sensibilia materialia intelliguntur. Quomodo autem hanc speciem causet sic accipe, res sensibilis singularis, puta hæc rosa causat suam speciem in visu in quantum est colorata, & sic figurata, hæc species transmittitur à visu ad sensum communem, & à sensu communi ad phantasiam & ibi conservatur, & quando est in phantasia dicitur phantasma. hoc igitur phantasma rosæ repræsentat rosam, quo ad suas conditiones individuales, puta in quantum est sic colorata, & talis figuræ, & talis odoris, & in tali situ &c. intellectus vero agens est quoddam lumen, & illustrat hoc phantasma, & denudat illud ab omnibus conditionibus materialibus, & indiuiduantibus, & ex phantasmate rosæ sic illustrato causatur ab intellectu agente species intelligibilis rosæ puræ spiritualis, non amplius repræsentans rosam, quo ad sua accidentia, sed quo ad suam substantiam, non in quantum est hæc, vel hæc rosa, sed in quantum rosa in vniuersali, & sic de rosa vniuersali, & non singulari habetur scientia. hæc igitur species, quæ non potest causari à re sensibili materiali, sed ab intellectu agente. illustrante phantasmata reponitur in intellectu possibili. & per eam fiunt res intelligibiles actu, quæ per seipsas erant intelligibiles in potentia. patet ergo, q̃ necessitas ponendi.

intellectum agentem fuit, ut ipse res sensibiles materiales fierent intelligibiles actu, quæ secundum se sunt intelligibiles solum in potentia, & eius operatio est per illustrationem phantasmatum causare speciem intelligibilem in intellectu possibili, quæ tanquam per medium res sensibilis intelligitur, sicut per speciem coloris causatam in oculo color videtur, & nota, quod hic intellectus agens non est in substantiis separatis. non enim veniuntur scientiam ex sensibus, nec ex phant. sed in suo intellectu concretas habent omnium rerum species intelligibiles, per quas limpide, & sine errore, ac discursu singula intelligunt, sed hæc subtilius considerare est officium theologi.

CAPVT II.

IN secundo cap. ponenda est definitio intellectus agentis, quæ est hæc, ut elicitur ex lib. 3. de anima. intellectus agens est potentia animæ immixta. non composita ex naturis corporeis separata ab omni organo corporeo existens actu, secundum substantiam suam. primo dicitur immixta, & separata ab organo corporeo, quod probatur sic. intellectus possibilis non est compositus ex rebus corporeis, nec affixus organo, ut declaratum est ex sua definitio. ergo nec intellectus agens. probatur consequentia, quia intellectus agens est nobilior intellectu possibili. cum omne agens sit nobilius patiente. ergo si intellectus possibilis est non compositus ex rebus corporeis, nec affixus organo. multo minus intellectus agens. dicitur secundo existens actu secundum substantiam suam. & per hanc particulam distinguitur ab intellectu possibili, qui est in potentia secundum substantiam, quod quidem potest intelligi dupliciter. primo, quod sit ens in pura potentia, sicut materia prima. & hoc est falsum, quia intellectus possibilis est potentia animæ, & est in secunda specie qualitatis. ergo habet esse actu, & non solum in potentia. secundo, quod sit ens in potentia in genere intelligibilium, quia. s. per se nihil potest intelligere, nisi in quantum recipit species intelligibiles ab intellectu agente. & sic verum est, quod est in potentia secundum substantiam

riam .i. secundum naturam suam, & per oppositum intellectus agens est in actu secundum naturam suam, non quidem quod habeat in seipso res intelligibiles actu, sed quia est potentia immaterialis actiua potens per illustrationem phantasmatum res sensibiles materiales facere intelligibiles actu, cum secundum se sint intelligibiles solum in potentia, unde sicut lumen facit colores visibiles actu illustrando aërem tenebrosum, ita intellectus agens facit res materiales intelligibiles actu illustrando phantasmata conseruata in phantasia.

CAPVT III.

IN tertio capite probandum est, secundum Philosophum quod anima intellectiua est incorruptibilis. & primo, ratione. 2. auctoritate. ratio est hæc. dictum est in pr. lib. de anima, quod si animæ sit aliqua propria potentia, quæ sit solius animæ non affixa organo. & sit aliqua propria operatio ipsius animæ, quæ non expleatur per organum. tunc contingit ipsam separari à corpore, sicut res perpetua à corruptibili. sed conclusum est in præsentī tract. quod intellectus possibilis, & agens sunt potentie solius animæ, & non sunt affixæ organis, & intelligere est operatio propria ipsius animæ, quia expletur sine organo. causatur enim intelligere ab ipso intellectu non organico. ergo contingit animam intellectiuam separari à corpore, sicut res perpetua à corruptibili corpore. secundo, probatur auctoritate philosophi in tertio de anima. ubi postquam determinauit de intellectu possibili, & agente, quæ sunt potentie solius animæ intellectiue, sic inquit. Separatus est autem .i. intellectus, & perpetuus, & immortalis, & incorruptibilis, & illic accipit intellectum pro tota anima intellectiua, sicut expositionem B. Th. idem habetur à Philosopho 12. Met. ubi comparans formam ad materiam inquit. nulla forma præcedit materiam suam, utrum sequatur nihil prohibet, non omnis quidem, sed intellectus, tunc sic, intellectus .i. anima intellectiua sequitur .i. remanet post materiam suam, sed materia animæ est corpus, in quo recipitur anima. ergo anima post corpus remanet. & sic est incorruptibilis. patet er-

go secundum veram philosophiam, quod anima intellectiua est immortalis. Hæc de intellectu agente sufficiant.

Postremo soluenda sunt 3. dubia quæ accidunt circa prædictam. primum est, quomodo sit intelligendum, quod intellectus possibilis sit separatus ab omni organo corporeo, & immixtus. 2m est verum intellectus agens sit potentia animæ, an sit substantia separata. tertium est verum sit verum, quod actio intellectus, quæ est intelligere expleatur sine organo corporeo.

Circa primum est duplex opinio. prima est maledicti Auer. qui in 3. de Anima comment. 5. tenet quod intellectus solummodo intellectum pro tota anima intellectiua sit separatus ab organo corporeo, id est extra omne corpus humanum, sicut substantia separata penitus incorporea. vnitur tamen cuilibet hominum, sicut principium, & causa intelligendi in ipso homine, sicut intelligentia copulatur cælo in 8. Phys. sicut principium, & causa mouendi ipsum cælum. ad hanc suam opinionem tria corollaria sequebantur. primum est, quod anima intellectiua non est forma substantialis hominis, sicut nec intelligentia est forma cæli, sed solum est principium operandi in homine, non respectu cuiuscunque operationis, sed solum respectu actus intelligendi, & secundum eum definitio data de anima in 2. lib. qua dicitur quod est actus corporis physici non conuenit animæ intellectiue, nisi quasi æquiuocæ. & quando quærebatur ab Auer. per quid differt homo ab asino, si anima intellectiua non est forma hominis. tamen debat, quod differt ab animalibus brutis per sensitivam animam, & cogitativam potentiam, quæ est in solo homine. vnde concedebat quod totus homo est corruptibilis, & secundum corpus, & secundum formam, quæ secundum ipsam est anima sensitiva. secundum corollarium est, quod tantum una anima intellectiua & per quod est tantum unus intellectus, per quem omnes homines intelligunt, & hoc sic se qui arbitrabatur. Anima intellectiua 2m cum est substantia separata, sed in substantijs separatis sub una specie est tantum unum individuum, quia cum substantiæ separatae sint incorruptibiles species sua potest conservari, & perpetuari in uno individuo: ergo cum anima intellectiua sit substantia separata 2m cum est tantum una omnium hominum. tertium corollarium est, quod anima intellectiua est im-

mor-

mortalis. nā bene sequitur, anima intellectiua secundum ipsum est substantia separata. ergo est immortalis. omnis. n. substantia separata est immaterialis, & incorruptibilis, causa enim corruptionis est materia, ut patet in 8. Metaph.

Secunda op. est B. Th. & oīum philosophorū recte sententium, q̄ anima intellectiua non esse substantia separata, sed est forma substantialis hominis & multipliciter, s̄m quod multiplicantur hoīes, & tñ est incorruptibilis, & primo, q̄ sit forma hominis, probatur sic, s̄m philosophum, principiu quo homo intelligit est forma, & actus substantialis hominis sicut principium quo vegetatur, & sentit, & mouetur secundum locum. hanc propositionem posuit philosophus in 2. lib. de Anima. quando assignauit secundam definitionem de anima. sed anima intellectiua est principium, quo homo intelligit, ut patet ergo anima intellectiua est forma substantialis hominis. & sic sequitur, q̄ non est substantia separata, quia nulla substantia separata est forma recepta in materia. Præterea secundum philosophum in 8. Metaph. dīa specifica sumitur à forma substantialis, sed rationale est dīa specifica hominis. ergo sumitur à forma hominis. sed rationale sumitur ab anima intellectiua. est. n. homo rationalis inquantū est intellectiuius. ergo anima intellectiua est forma hominis, ex quo sequitur s̄m eos, quod non si tantum vna anima intellectiua, sic nulla forma p̄tēst simul informare plures materias, quia quælibet forma est in sua determinata materia, sed anima intellectiua est forma, ut probatum est. ergo non potest vna existēs informare plures materias, id est plura corpora humana, sed necesse est, quod sicut multiplicantur corpora hominum per generationem, ita multiplicentur animæ per creationem. tenendum est ergo secundum rectam philosophiam, quod anima intellectiua est forma cuiuslibet hominis. & quot sunt animæ tot sunt homines vel fuerūt homines. & qñ dicit philosophus, quot intellectus est separatus ab omni organo corporeo, non est intelligendum quot sit extra corpus humanū, ut chimerizat Auer. sed q̄a non est affixus organo corporeo ad differentiam sensuū.

Circa secundum dubium, utrum intellectus agens sit potentia. animæ, ibi est duplex opinio.

Prima, est Auic. in 6. nat. & in lib. 9. suæ Met. qui imagi-
natur, quòd sit substantia separata, & tantum vna, quam vo-
cat intelligentiam agentem, cuius tria sunt officia, secundũ
ipsum, primum est, q̃ hæc intelligentia præsidet elementis,
& elementatis mouendo, & alterando ea, sicut intelligentiæ
superiores mouent corpora cœlestia. & propter hoc Auic.
vocat eam dominam orbis inferioris, vel terreni. secundum
officium est, q̃ ipsa creat omnes formas introducẽdas in ma-
teria. dicit enim q̃ agentia particularia solum disponũt ma-
teriam. illa vero intelligentia creat formas, puta asinus ge-
nerans disponit materiam. i. corpus, & illa creat animam as-
ni, sic ignis disponit solum ligna, & illa creat formam ignis
introducendum. & propter hoc vocatur ab Auic. dator for-
marum. tertium officium est, q̃ ipsa vna existens habet illu-
minare phantasmata, quæ sunt in phantasia omnium homi-
num, & formare species intelligibiles in intellectu possibi-
li, per quas intelligit, sicut vnus sol habet illuminare totum
vniuersum, cuius illuminatione omnes oculi videre possunt
& sentire colores, & propter hoc officium vocatur ab Auic.
intellectus agens.

Secunda, est opinio B. Th. & omnium comment. Arist. re-
de sentientium, qui tenent secundum Philosophum, q̃ non
est substantia separata, sed est potentia, quæ est subiectiua in
essentia animæ intellectiua. & probatur sic, ex dicto philo-
sophi in tertio de anima, vbi inquit, in anima necesse est po-
nere has duas differentias. scilicet hos duos intellectus possibilem
& agentem. ergo si est in anima non est substantia separata.
præterea natura sufficienter instituit hominem, vt habeat
omnia principia in se, quibus possit actionem suam, quæ est
intelligere exercere, sed principia intelligendi sunt intelle-
ctus possibilis, & intellectus agens. ergo isti duo intellectus
sunt in homine. & sic falsum est, q̃ sint substantiæ separatae.
vnde opin. Auic. non sustinetur, nec illa tria officia sunt ve-
ra, nec ea probat, sed ea in sua metaphysica adducit quasi plu-
res loquens extra philosophiam.

Circa tertium dubium, vtrum actus intelligendi exercea-
tur sine organo. arguitur q̃ non, sic, non exercetur sine phā-
tasia. ergo non exercetur sine organo. probatur consequen-

tia,

tia, quia phantasia est affixa organo, vt diximus in tract. de sens. inter. Antecedens vero probatur secundū philosophum in tertio de anima. intelligentem necesse est, phantasmata speculari, sed phantasma est in phantasia. ergo actus intelligendi non exercetur sine phantasia. item inquit Arist. quod intelligere corrumpitur quodam principio interiori. i. phantasia corrupta, vt patet in stultis, qui quoniam habent lesū organum phantasiæ non habent actum intellectus, sed viuunt, & operantur, vt bestię. ergo si intelligere impeditur per corruptionem phantasiæ non exercetur sine phantasia.

Ad hoc dubium respondetur secundū viam B. Th. q̄ licet non exerceatur sine phantasia. non tamen requiritur phantasia, vt quoddam organum, per quod intellectus expleat actum intelligendi, sed solum vt potentia præparans obiectum ipsi intellectui. vnde nota, quod sentire in hoc differt ab actu intelligendi, quoniam in sentire requiritur obiectum materiale, puta odor, sapor, &c. & requiritur organum cui est affixus sensus. & per quod expletur ipsum sentire. in actu vero intelligendi, donec anima est vnita corpori requiritur solum obiectum materiale, quæ sunt ipsa phantasmata recepta in phantasia, ex quibus intellectus agens elicet speciem intelligibilem per illustrationem, vt dictum est supra. non autem est necesse, quod sit aliquod organum, cui sit affixus intellectus, sed potest per seipsum præsuppositis phantasmatibus in phantasia explere actum intelligendi.

Dicitur ergo ad dubium, q̄ actus intelligendi exercetur sine organo, & quando sit instantia de phantasia. dico, q̄ nõ requiritur phantasia tanquam organum, sed tanquam potentia præuia præparans materiam intellectui. i. ipsa phantasmata, ex quibus extrahitur species intelligibilis. hic est modus intelligendi animæ intellectiue pro hac mortali vita. quomodo vero separata intelligat, cum in morte corrumpantur phantasia, & phantasmata est officium theologi. Hæc de intellectu sufficiant.

TRACTATVS III.

TRACTATVS TERTIVS, SVPER tertio libro de Anima, de potentia appetitiua, ac secundum locum motiua.



In hoc tertio tract. agendum est de potentia appetitiua, & de motiua secundum locum, & diuidemus ipsum in duas partes principales.

In prima, agitur de potentia appetitiua, & diuidimus eam in tria capita.

In primo, declarandum est quod duplex est appetitus.

In secundo, agitur de appetitu intellectiui, qui dicitur voluntas, & liberum arbitrium.

In tertio, agitur de appetitu sensitiui, qui dicitur irascibilis, & concupiscibilis.

CAPVT PRIMVM.

In primo cap. declarandum est quod duplex est appetitus. præcipue in homine. vnde nota, quod est duplex secundum Philosophum in 3. de anima, & in 1. eth. scilicet appetitus intellectiui, qui dicitur voluntas, & appetitus sensitiui, qui diuiditur in irascibilem, & concupiscibilem, cuius diuisionis est hæc sufficientia. omnis appetitus prosequitur aliquod bonum cognitum, vel fugit malum cognitum, sed bonum & malum cognoscitur, aut per intellectum, aut per sensum. si cognoscitur per intellectum, sic ipsum prosequitur, vel fugit appetitus intellectiui. id est voluntas, puta cognosco iniustitiam per intellectum, ut bonam. & tunc prosequor eam voluntate affectans eam habere, & cognosco iniustitiam per intellectum, ut malam, & tunc fugio eam voluntate respuens eam habere, si cognoscitur per sensum, sic ipsum prosequitur, vel fugit appetitus sensitiui, puta cogitativa cognoscit, quod Socrates est amicus meus, & tunc appetitus sensitiui prosequitur eum, ac diligit, & cognoscit quod Plato est inimicus meus, & tunc appetitus sensitiui odit eum, & fugit.

Sed

Sed nota, quòd appetitus intellectiuus inter omnia animalia est in solo homine. cum enim sequatur cognitionem intellectus & in solo homine inter omnia animalia sit intellectus, etiam in ipso solo est appetitus intellectiuus, in alijs vero animalibus perfectis est solum appetitus sensitiuus. in animalibus vero imperfectis, vt in conchilia non est appetitus sensitiuus, nisi indeterminate, & valde imperfecte. carent enim omni sensu interiori, cuius apprehensionem prosequitur, vel fugit appetitus sensitiuus; præcipue autem prosequitur apprehensionem phantasie, & extimatiue, vt dicemus infra. cum igitur animalia imperfecta non habeant phantasiam, nec extimatiuam. ergo nec habent sensitiuum appetitum, nisi improprie, vt dicam in solutione argumentorum. Hæc de primo cap. sufficiant.

CAPVT II.

IN secundo cap. agendum est de appetitu intellectiuo, qui dicitur voluntas, de quo dicentur quinque.

Primo, de obiecto suo.

Secundo, à quo mouetur ad appetendum.

Tertio, si est affixus organo corporeo.

Quarto, quomodo differt à libero arbitrio. & ibi ponetur vtriusque diffinitio.

Quinto, in quor entibus inuenitur hic appetitus.

Circa primum dico, quòd bonum sumptum transcender, & in vniuersali, est obiectum voluntatis, sub quo continetur bonum increatum, vt deus, & bonum creatum, vt perfectiones; quæ sunt in creaturis. hæc enim bona apta nata sunt prosequi, & desiderari à voluntate, & probatur sic, illud bonum est obiectum voluntatis, quod cognoscitur per intellectum. dictum est enim in primo cap. quòd appetitus intellectiuus prosequitur bonum cognitum per intellectum, sed bonum transcendens, & in vniuersali cognoscitur ab intelligibili. in hoc enim distinguitur à sensu, qui cognoscit hoc, vel hoc bonum in particulari. ergo bonum transcendenter, & in vniuersali est obiectum voluntatis.

Circa

Circa secundum dico, quod voluntas est ex se, vt cęca, nec ex se aliquod bonum cognoscit, cum non sit potentia cognoscitiua, sed desideratiua & ideo est necesse quod moueatur, & prouocetur ad appetendum ab aliqua potentia cognoscente bonum. potentia autem cognoscens bonum est duplex, scilicet intellectus, & phantasia simul cum cogitatiua in homine; in brutis vero est solum phantasia cum estimatiua. dico igitur quod secundum ordinem naturę voluntas mouetur ab intellectu cognoscente bonum, & pręsentat ipsum voluntati, verbi gratia intellectus cognoscit qđ philosophia est bona, & tunc ipsam philosophiam sic cognitā in intellectu pntat voluntati, & voluntas eligit eam, & affectat eam, ideo pręcipit homini, vt studeat in philosophia, aliquādo tamen voluntas mouetur ā phantasia, & cogitatiua, sed non secundum rectum ordinem vt declarabo quando loquēmur de potentia motiua, sufficit pro nunc, quod per se, & secundum rectum ordinem mouetur ab intellectu, vel ā bono cognito in vniuersali pręsentato voluntati per intellectum.

Circa tertium dico, qđ voluntas non est affixa alicui organo corporeo, sicut nec intellectus, & probatur sic, omnis potentia organica est determinata ad vnum genus entiu sicut potentia visiva cognoscit solam visibile, & auditus solos tonos, sed voluntas non est determinata ad prosequēdum, vel volendum solum vnum genus boni, immo quodcunque bonum potest velle, siue increatum, siue creatum. cum omnia hęc contineantur sub bono vniuersali, quod est eius obiectum. ergo voluntas non est potentia org. est tamen subiectiua in essentia animę intellectiua, sicut sua propria potentia. vnde solet dici qđ tres sunt potentię proprię animę intellectiua, scilicet intellectus, memoria, & voluntas, sumendo memoriam pro memoria intellectiua, licet vt diximus in trac. de intellectu secundum B. Thom. non distinguatur realiter ab intellectu, sed solum secundum rationem.

Circa quartum dico secundum B. Thom. in 1. par. q. 83. art. 4. quod sicut distinguuntur intellectus & ratio, ita distinguuntur voluntas, & liberum arbitrium, sed vt dictum est in trac. de intellectu. intellectus & ratio non distinguuntur realiter, sed solum secundum rationem. nam eadem poten-

tia intellectiua secundum quod intelligit incomplexæ simpliciter intuitu dicitur intellectus, secundum vero quod ex vno cognito inuestigat aliud incognitum, discursu, & argumentatione dicitur ratio sic in proposito per appetitum intellectiui possumus velle finem, & media, per quæ acquirimus talem finem, puta Socrates infirmus per appetitum intellectiui potest velle sanitatem, & media per quæ acquireret sanitatem in quantum vult sanitatem vt finem, appetitus eius intellectiuius dicitur voluntas, vnde sic diffinitur. voluntas est potentia non affixa organo, quia volumus finem creaturæ, vel increatum cognitum per intellectum, in quantum vero vult media, per quam acquiritur sanitas dicitur liberum arbitrium. est enim in potestate infirmi libere eligere dictam, per quæ acquirat sanitatem, vel exercitium, & non eligere dictam, vel medicinam, vt exercitium. in quantum ergo est in libertate nostra tale, vel tale medium eligere, dicitur voluntas liberum arbitrium. vnde sic diffinitur ab Herueo. in j. Quoli. q. j. Liberum arbitrium est principium. i. potentia, quam possumus velle aliquod bonum, & eius oppositum contrariæ, vel cōtradiCTORIÆ, puta per liberum arbitrium Socrates infirmus potest velle medicinam amaram, potest etiam velle medicinam dulcem. quæ est contrariæ amaræ. & potest etiam nolle medicinam, & velle medicinam, quæ sunt cōtradiCTORIA. non quidē simul potest velle cōtradiCTORIA, sed diuisim hoc, vel illud cōtradiCTORIUM, & in hoc stat libertas nostra, quæ nō reperitur in brutis. necessario enim bruta operantur ducta naturali instinctu, & non possunt in oppositum. quō vero liberum arbitrium non subijciatur corporibus cœlestibus, nec alicui creaturæ, sed soli conditori deo est officium theologi.

Circa quintum dico, quod inuenitur in deo, in angelis, in demone, in homine. non autem in brutis. & probatur sic, in deo, in angelis, & demone, & homine est intellectus. ergo est voluntas. probatur consequentia, vbi est intellectus ibi est bonum cognitum per intellectum, vbi est bonum cognitum per intellectum, ibi est inclinatio ad ipsum bonum consequendum; si nō habetur. si autē possidetur à cognoscēte ipsum, ibi est quies, qui dē delectatio in bono possessio, sed inclinari ad cōsequendum bonum cognitum per intellectum, vel delectari in ipso habito

habito est officium voluntatis. ergo cum in deo, angelis dæmone, & homine sit intellectus, etiam est voluntas. præterea inquit Auic. in 9. suæ Met. deus cognoscens, ac intellectu cōprehendens bonitatem suam est maximus sui amator, & semper summe delectatur. nota tamen, q̃ amor quo voluntas amat, & desiderium quo affectat, & delectatio qua quiescit in bono possessio, non sunt passionēs proprie dicte, quia ut dicemus in cap. seq. omnes passionēs sunt in potentia organica, sed voluntas nō est org. ergo in ea non sunt veræ passionēs. amat igitur voluntas amore pure spiritali, qui non est passio, sic desiderat, sic sperat &c. Hæc de voluntate sufficiant. Altiora autem quærere est officium Theologi.

C A P V T I I I.

IN tertio cap. agendum est de app. sensit. diuiditur autē in irascibilem, & concupiscibilem. de quo dicemus tria. Primo, quodd sit obiectum vtriusque, & ex hoc declarabitur, quomodo abinuicem distinguuntur irascibilis, & concupiscibilis.

Secundo, quæ passionēs ponantur in eis.

Tertio, quodd est organum, cui appetitus sensitivus est affixus.

Circa primum nota, quodd bonum cognitum particulare; puta hic liber, hic thesaurus per phant. & cog. in homine, vel cognitu per phant. ac ext. in bruto est obiectum appetitus sensitivi, unde sicut intellectus cognoscens bonū in vniuersali, & præsentans ipsum voluntati mouet, & incitat voluntatem ad appetendum tale bonum, sic phant. ac cog. cognoscens bonum particulare, & præsentans ipsum appet. sensit. mouet, & incitat eum ad appetendum tale bonum, quod qualiter fiat; dicam in cap. de potentia mot. sed quomodo bonum cognitum per sensum sit obiectum irascib. & concup. secundum diuersam rationem. hic aduerte, bonum cognitum per sensum dupliciter consideratur. Primo, inquantum est delectabile conueniens ipsi animali. & sic est obiectum concup. Secundo, inquantum est arduum, & cum difficultate acquiritur propter aliqua nocua, & impediē-

ria ipsum acquiri, & sic est obiectum irascibilis, & qm̄ potē-
tiae distinguuntur secundū obiecta, hinc manifeste apparet
q̄ concupiscibilis distinguitur realiter ab irascibili. cōcupi-
scibilis enim versatur circa bonū, delectabile secundū
sensum. irascibilis vero versatur circa bonum arduum, &
cum difficultate acquisibile, vnde dicitur quod concupi-
scibilis defensatur ab irascibili. & hoc declaratur tali exem-
plo. Canis errans per domum inuenit panem, panis inuen-
tus præsenteratur statim à phantasia, & extimatiua ipsi concu-
piscibili, vt cibus delectabilis, & conueniens naturæ suæ. &
tunc statim rapit panem, & incipit comedere, si dum com-
edit aliquis homo, aut alius canis velit ab eo eripere panem,
tunc irascibilis insurgit, & incipit se defendere, ne ab eo au-
feratur panis, aut fugiendo, aut latrando, aut morsu. ecce qd̄
irascibilis habet expellere nocumenta, vt cōcupiscibilis sine
difficultate possideat bonū delectabile, & vtile ipsi animali.

Circa secundum nota, quod natura prouida quasdam pas-
siones inseruit in cōcupiscibili, & irascibili, per quas tanquā
per famulas operantur circa bonum, & malum cognitum
per sensum, & sunt vndecim 6 in concupiscibili, & 5 in irasci-
bili. & sic ordinatur, vt patet in figura ibi.

| | | | |
|--------------|---------------|---------------|---------------|
| [In concu-] | [Amor.] | [Desiderium.] | [Delectatio.] |
| [piscibili.] | [Odium.] | [Fuga.] | [Tristitia.] |
| [In irasci-] | [Spes.] | [Timor.] | |
| [bili.] | [Desperatio.] | [Audacia.] | [Ira.] |

Sufficiētiā harum passionum perstrinxi in compen-
dio, quot ordinavi super duos libr. Ethic. verum scio, quot
per pauci illud habent. Ne igitur tract. præsens diminutus,
remaneat. hic eam repeto secundū scientiam B. Thom.
in prima secundæ, q. 23. art. 4.

In concupiscibili sunt 6. cuius ratio est, bonum sensibi-
le cognitum per sensum, cum præsenteratur cōcupiscibili tria
causat. similiter malum præsens tria causat.

Primo, cum bonū præsenteratur concupiscibili causat in ea
quandam

TRACTATUS III.

quandam complacentiam. & hæc complacentia dicitur amor, per oppositum, quando malum præsentatur concupiscibili causat in ea displicentiam, quæ dicitur odium surmen-
do odium non pro ira inueterata, sed pro displicentia mali.

Secundo, si bonum complacens, etiam amatum non est ac-
quisitum ab ipso appetente excitat, & mouet ipsum concu-
piscibilem ad consequendum illud, & hic motus vel excita-
tio dicitur desiderium, malum vero iam displicens mouet
concupiscibilem ut fugiat, vel renuat ipsum, & hic motus di-
citur fuga.

Tertio, bonum iam amatum & desideratum si acquiritur
ab appetente causat in concupiscibili quietem, & hæc quies
est delectatio, sic enim diffinitur. Delectatio est quies in
bono iam adepto & possessio, malum vero displicens & quod
renuitur ab appetente, si ei eueniat causat in concupiscibili
tristitiam quæ est quædam inquietudo appetitus causata ex
malo quod iam euenit. patet igitur quomodo sunt sex pas-
siones, in concupiscibili. 3. respectu mali, odiū, fuga, tristitia.

In irascibili sunt 5. quarum ratio est, si bonum desidera-
tum est difficile ad acquirendum, & tamen aliquod medium
nobis occurrat per quod cognoscamus ipsum bonum posse
acquiri speratur ipsum posse acquiri, & sic in irascibili causa-
tur spes. si autem nullum medium nobis occurrat per quod
cognoscamus ipsum bonum posse acquiri, desperamus illud
posse acquiri, & sic in irascibili causatur desperatio: istæ duæ
passiones iam dictæ correspondent desiderio, similiter ex
parte mali quod affectamus fugere & vitare, si medium ali-
quod non statim nobis occurrat quo cognoscamus ipsum
posse vitare timemus, & sic in irascibili causatur timor. si au-
tem medium statim occurrat audemus, & sic causatur in ira-
scibili audacia: istæ duæ passiones correspondent fugæ. quin-
ta passio est ira quæ correspondet tristitiæ. nam illæ cui ma-
lum accidit. puta vulneratio, tristatur, & quærit quomodo
potest illud a se depellere saltem reddendo malum ipsi inse-
renti malum per vindictam, & sic ex malo illato causatur ibi
irascibili appetitus vindictæ qui dicitur ira, istæ sunt 5. pas-
siones irascibilis. Si autem quæras quare nulla est passio
in irascibili correspondens amoris, & odio, & delectationi.

Respondeo,

Respondeo, quòd in irascibili nulla ponitur passio nisi ubi est difficultas acquirendi bonum vel virandi & repellendi malum. in amore autem & odio nulla est difficultas, præsentato enim bono concupiscibili & præsentato malo possumus libere amare bonum & odire malum. difficultas autem est in consequendo rem amatam & fugiendo odiosam ne eueniat, similiter nulla est difficultas quiescere in bono acquisito & iam possesso & sic delectari in eo. difficultas autem est in liberari à malo iam illato, & ideo circa delectationem nulla ponitur passio in irascibili sicut nec circa amorem, nec circa odium & pono hic figuram, quæ patet quæ passiones irascibilis cor respondeant passionibus concupiscibilis.

| | | | |
|--------------------------------|-----------------------|-----------------------------------|---------------------------|
| [Eis nulla correspon det | (amor) (odium) | (Spes despera- tio desiderium | [Ei nulla dele- ctatio |
| | | Figura | Tristitia |
| | | timor audacia | Ira |

Circa tertium dico, quòd organum suum est cor, quod declaratur ex effectibus varijs quos prædictæ passiones causant in corde. nam ex delectatione cor delectatur, ex tristitia cōstringitur, ex ira feruet, ex prolongata spe languet. Hos effectus clare cognoscimus. Aliæ vero passiones licet non ita manifestæ, tamen cor transmutant. vnde sic diffinitur passio quæ est in appetitu sensitivo. Passio est motus potentie appetitiue sensitivæ secundum præsentationem boni vel mali cogniti per sensum contranmutatione cordis, est ergo hic appetitus potentia organica, & quia organica ideo corruptibilis in morte sicut omnes alij sensus &c.

✱

INCIPIT SECUNDA PARS

Tractatus de potentia appetitiua & motiua secundum locum.



OCVTURI de potentia motiua secundum locum distinguimus eam in quatuor cap.

In primo, ponitur distinctio de potentia motiua.

In secundo, agitur de potentia motiua directiua.

In tertio, agitur de potentia imperatiua motiua.

In quarto, agitur de potentia executiua motiua, & ibi declarabitur cui organo est affixa.

CAPVT PRIMVM.

IN primo cap. ponitur hæc distinctio. Potentia motiua in animali est duplex.

Prima, est dilatoriua & restrictiua, & hæc est in animalibus imperfectis, ut in ostrea & conchilia quæ licet non moueantur nec discedant à loco in quo generata sunt, nisi forte ferantur impetu aquæ sicut etiam defertur lapis in fundo fluminis decurrentis, tamen in loco suæ generationis aliquando dilatant se, ut cum suscipiunt nutrimentum suum, & tunc occupant maiorem locum, & aliquando constringunt se, ut cum sentiunt aliquod nociuum, & tunc occupant minorem locum. Idem patet in capda lacerte decisa, ut declaravi supra in 2 lib. sed de hac potentia sic motiua non plura loquor. est enim propositum philosophi loqui de potentia motiua quæ est in animalibus perfectis, quæ mouentur ad locum distantem aut propter necessaria vitæ, ut, scilicet quæ rant sibi cibum, aut propter delectabilia siue moueantur progrediendo, ut animalia terrestria habentia pedes, siue natando, ut aquatica, siue reptando, ut vermes, & serpentes, siue volando, ut volatilia.

Secunda est, quæ est in animalibus perfectis. hæc igitur potentia

potentia motiua in animalibus perfectis est triplex.

Prima, dicitur potentia motiua directiua.

Secunda, dicitur potentia motiua imperatiua.

Tertia, dicitur potentia motiua executiua.

CAPVT II.

IN secundo cap. agendum est de potentia motiua directiua. Vnde nota, q̄ omnis potentia animæ quæ præsentat bonum cognitum, vel malum appetitur, siue intellectiui, siue sensitiui dicitur potentia motiua directiua, vel incitativa ipsius appetitus, & hoc quidem alio modo est in homine, & alio modo est in bruto. nam in homine tres sunt potentie motiue directiue, vel incitatiue appetitus. Prima, est intellectus inquantum practicus, nam intellectus practicus cognoscens quod omne bonum est operandum, & quod nunc orare Deum est bonum præsentat hoc bonum cognitum voluntati, ex qua præsentatione dirigitur & incitatur voluntas ad acceptandum conclusionem: quæ est hæc. nunc orandus est deus, & sic volo ipsum orare. Dixi autem intellectus practicus, quia intellectus inquantum speculatiuus cum contentetur in speculatione veritatis non dirigit voluntatem ad aliquid operandum: licet enim speculor solem moueri sub zodiaco: ex hoc non excitatur voluntas mea, velim circa ipsum solem aliquid operari. Secunda potentia motiua directa est phantasia: & tertia est cogitativa: nā phantasia recipiens speciem sensatam à sensu communi, si hæc species apparet decora præsentat eam concupiscibili, & tunc excitat concupiscibilem in amorem rei cuius est decora species, si autem species sensata deformis apparet: concupiscibilis respuit rem cuius est species deformis. similiter si gustus transmittit speciem delicati cibi ad sensum communem & inde ad phantasiam, phantasia præsentat eam concupiscibili, & tunc amat talem cibum, affectatq̄. habere illum. Tertia, est cogitativa. nam cogitativa eliciens intentionem amicitie vel inimicitie ex specie conseruata in phantasia, & præsentans tales intentiones ipsi concupiscibili, excitat eam ad amandum vel odiendum. verbi gratia, video Socratem com

TRACTATUS III.

patientem mihi in tribulatione mea, & auxiliantem, species huius actus conseruatur in phantasia mea, & ex tali specie cog. comprehenditur q̄ Socrates est mihi beniuolus, quam beniuolentiam præsentat concupiscibili, & tunc mouetur ad reamandum Socratem. si autem ex alio actu comprehendat inimicitiam & p̄ntet concupiscibili mouetur ad odiũ. patet ergo quõ in homine potentia motiua directiua siue respectu boni, siue respectu mali sunt intellectus practicus, phantasia, & cogitativa. Sed nota q̄ intellectus secundum se semper mouet recto ordine præsentado volũtati id quod est vere bonum & vere malum. phantasia aut cogitatiue pluries mouet appetitum sensitium cũ errore præsentantes id quod non est vere bonum, sed apparens bonũ, & id quod nõ est vere malum, sed apparens malũ, & hæc est radix peccati, verbi gratia phantasia præsentat febricitanti potũ aquæ frigidaẽ vt bonũ, eo quia sitit, & tamen non est vere bonũ, si n. biberet febris magis inualefcit, & cogitativa p̄ntat speciem inimicitiaẽ, quam elicit ex leuissimo actu alicuius amici, qui forte in aliquo leui, offendit, præsentat dico sub ratione mali, & tamen non est vere malum. Omitto q̄ phantasia. & cogit. augent species boni & mali & diminuunt magis quàm sint in veritate, puta id quod remisse est pulchrum phantasia iudicat summe pulchrum, & ecõuerso, & sicut iudicat sic præsentat concupiscibili, & cogitativa aliquando iudicat eum qui me parum diligit esse magnum mei amicum, & ecõuerso, & hæc est causa quod concupiscibilis & irascibilis plerũque illuduntur & excitantur ad amandum id quod non est amandum, & excitatur ad timendum quod non est timendum. in brutis autem potentia motiua directiua est phantasia & extimatiua, quæ eodem modo mouent & dirigunt sicut in homine exemplificatum est, sed differentia est in hoc quod cogitativa mouet cum aliquo discursu, sed extimatiua solo instinctu naturæ, vt declarauĩ in tract. de sens. interior. Hæc sufficiant de potentia motiua directiua tam in homine quàm in bruto.

CAPVT III.

IN tertio cap. agendum est de potentia motiua imperatiua.

ua. & primo in homine. secundo in bruto. In homine dico secundum Philosophum quod hæc potentia est triplex. prima est voluntas, quæ postquam assensit intellectui præsentanti sibi tale bonum esse agendum vel tale malum esse fugiendum imperat potentijs executiuis de quibus dicemus infra, ut exequantur imperium suum. Vnde nota quod in toto regno animæ voluntas se habet sicut rex, cui assistit aliquis fidelissimus ciuis, cuius consilio rex omnia operatur, assistunt etiam famuli qui expectant imperium regis, ut exequantur, assistunt & adulescentes non veri consules, qui suadent regi id quod apparet bonum & non est vere bonum, fidelissimus consul est intellectus practicus qui præsentat ea que sunt agenda secundum rectam rationem, puta quod deus super omnia est diligendus & reuerendus, quod pater est honorandus, patria est defensanda &c. assistentes famuli sunt vires executiue eius quod voluntas imperat, de quibus dicam in cap. seq. Adulescentes sunt irascibilis & concupiscibilis, quæ ut dicemus inclinat voluntatem ut eligat bonum sensibile delectabile, quod non est secundum rectam rationem. Quod qualiter fiat declarabo. secunda & tertia potentia motiua imperatiua in homine est concupiscibilis, & irascibilis, quæ postquam assentiunt bono præsentato per phantasiam & cogitativam, imperant, & ipse potentijs executiuis ut prosequantur tale bonum, vel fugiant tale malum, verbi gratia concupiscibilis assentiens phantasie & fabricanti aqua frigida est conueniens ad extinguendam sitim, præcipit manui ut accipiat ciatum aquæ & apponatur ori, præcipit & faucibus ut deglutiant. Sed nota quod imperium concupiscibilis aliquando est rationale, & aliquando irrationale. Rationale quidem est quando imperat aliquod bonum esse agendum secundum debitas circumstantias, puta quando imperat ori ut comedat hac hora, scilicet hora prandij, & talem cibum concessum, & in tanta quantitate, nec plus, & tale imperium concupiscibilis est in virtuoso, qui per frenum virtutem moralium iam edomuit passionem suam, & hoc imperium Philosophus in 3. de Anima assimilât motui spheræ planetarum, prout mouentur à primo mobili motu diurno ab oriente ad occidentem, iterum in orientem.

T R A C T A T V S I I I .

Rationale est enim & decens sphæram inferiorem assimilari motui sphære superioris, sic decens est appetitum sensitivum in homine regulari à recta ratione & à voluntate ut à potentia nobiliori. Irrationale vero est hoc imperium quādo vult prosequi quodcunque apparens bonum vel malum præsentatum à phantasia vel cogitativa non servando iudicium rationis, sed solo impetu sicut bestia, puta concupiscibilis præsentato sibi auro affectat ipsum, & præcipit manus ut diripiat non considerans furtum malum esse, vel depredationem esse damnabilem, & hoc imperium est in homine pravo incōtinnente, qui vivit solo impetu passionum in quo tantum prævalent concupiscibilis & irascibilis, quod pene excecant iudicium rationis, & voluntas ut captiva dimittit regimen animæ, in manu concupiscibilis & irascibilis quæ sunt velut adulatores regis. Hoc imperium assimilatur Philosophus in tertio de Anima motui planetarum qui contranitentes primo mobili moventur ab occidente in orientem motu proprio. Irrationale est enim ut sphæra inferior resistat sphære superiori, sic irrationale est appetitum sensitivum resistere & imparare contra imperium appetitus intellectivi. de hac repugnantia plura non loquor. pertractatur enim sufficienter in tertio Eth. ubi agitur de voluntario. & inuoluntario, brutis autem potentia motiva imperativa est solum concupiscibilis & irascibilis, quæ imperant secundum præsentationem boni factam à phantasia & estimativa, ibi non est imperium rationale & irrationale, quia carent ratione & voluntate, sed dicitur imperium naturale factum secundum instinctum naturæ, ideo in brutis nulla virtus est nullumque vitium.

C A P V T I I I I .

IN quarto cap. agendum est de potentia motiva executiva, & cui organo sit affixa.

Circa primū nota, quod potentia motiva executiva eius quod voluntas vel appetitus sensitivus imperant est secundum Avicem. in 6. naturalium. virtus diffusa in lacertis, musculis, & nervis per spiritus vitales egredientes & emanantes à corde

à corde ut primo fonte, & hæc quidem potentia duplex habet organum, vñum quidem primum & principale, & hoc est cor, cuius motus secundum Philosophum in 3. de Anima componitur ex pulsu & tactu. nam eleuatur & deprimitur, ut patet etiam in pulsu brachij nam dum eleuatur habet motum pulsus, dum deprimitur habet motum tractus, quid sit motus localis pulsus & tractus declarauimus in 7. Phys. tract. 2. Ex quo sequitur secundum Philosophum in 3. de Anima. quod motus cordis assimilatur motui circulari, sed imperfectæ, nam in motu circulari per semicirculum superiorem est motus pulsus, & per semicirculum inferiorem est motus tractus, ut declaratur in 7. Phys. in eodem tract. dixi autem imperfectæ quoniam motus pulsus & tractus in corde non est per duos semicir. sed per eandem lineam rectam imaginatam. hoc quidem non potest figurari, sed per anathomiam decernitur. cor igitur est primum organum in quo radicitur potentia motiua executiua ut in suo fonte. secundo est subiectum & organum secundarium, & isti sunt nervi & muscoli, ad quos à corde ut à fonte transmittuntur quidam spiritus vitales dantes virtutem se mouendi nervis & musculis, & tales nervi ac muscoli exequuntur imperium voluntatis & irascibilis & concupiscibilis. verbi gratia concupiscibilis imperat pedibus ut tendant ad querendum cibum cum famescit animal. & sic pedes per spiritus vitales transmissos à corde mouent se localiter sic manus, sic caput mouet se per tales spiritus vitales, cuius signum est quod si tales spiritus non transmittantur ad aliquam partem corporis propter oppilationem pars illa sit immobilis, ut patet in his qui laborant paralysi, sed hæc plenius considerare est officium medici. Ex ijs igitur patet quæ sit potentia motiua directiua & imperatiua & executiua motus. Et nota quod semper locuti sumus de huiusmodi potentijs prout sunt in animalibus, siue in homine, siue in bruto. Quomodo autem sint in substantijs separatis est officium Theologi.

Postremo contra prædicta fiunt quædam argumenta primum probat quod appetitus sensibus sit in quolibet animali etiam imperfecto sic. Dixit Arist. in 2. de Anima. quod appetituum non facit particularem gradum viuendi, quoniam

vbicunque est sensus ibi est appetitus, sed in animali imperfecto est sensus saltem tactus. ergo in eo est appetitus & nō intellectiuus, vt patet. ergo in eo est appetitus sensitiuus, præterea in eo est phantasia vt dixit philosophus in secundo de anima. Cognoscunt enim conueniens & disconueniens, cuius signum est quòd si dilatant se sentiunt conueniens & delectabile, si constringuntur se sentiunt nocium. ergo si habent phantasia, habent appetitus sensitiuus, phantasia enim vt diximus est motiua ipsius appetitus.

Ad hoc respondeo, quòd Philosophus in secundo de anima intelligit in animali imperfecto esse appetitum imperfecte & quasi equiuoce, in animali perfecto esse appetitum perfecte, similiter quando dicit quòd in animali imperfecto est phantasia, intelligit de phantasia imperfecta & indeterminata. in animali autem perfecto est phantasia perfecta & determinata. quomodo autem differant sic accipe, phantasia. determinata est illa quæ est in determinata parte corporis, id est in cerebro, & retinet species, sensibiles etiam absente re sensibili, vt dixi in tract. de sens. interior. Phantasia indeterminata est illa quæ non est in certa parte corporis, immo est in toto corpore & est eadem cum sensu tactus, nec retinet species in absentia rei sensibilis, sed solum mouetur à sensibili præsentia, hæc est in animali imperfecto, vt in conchilia & verme. dico igitur ad argumentum quòd non loquimur de appetitu sensitiuo indeterminato. hic enim est in quolibet animali imperfecto, sed de appetitu sensitiuo perfecto qui habet certum organum, & hic est solum in animali perfecto.

Secundum probat, quòd concupiscibilis & irascibilis sine solum vna potentia sic, sicut eadem est potentia cognoscitiua contrariorum, vt visus est cognoscitiuus albi & nigri, ita eadem est potentia appetitiua contrariorum, sed concupiscibilis est appetitiua boni conuenientis & irascibilis est repulsua nociui & impediens. cum ergo conueniens & nocium sint contraria, sequitur, quòd concupiscibilis & irascibilis sunt vna potentia.

Ad hoc dico, quòd concupiscibilis est per se circa contraria. nam appetit bonum in quantum sibi placet, & fugit malum

lum inquantum displicet, & ideo ponitur potentia distincta
 ab irascibili, cuius proprium officium est resistere nociuo &
 impediendi ut concupiscibilis consequatur bonum conue-
 niens secundum sensum. De potentia motiua imperfecta
 secundum dilatationem & constrictionem non est laboran-
 dum. nam phantasia indeterminata quæ est in eis potest di-
 ci aliquo modo potentia motiua directiua, & appeti-
 tus sensitiuus imperfectus qui est in eis potest di-
 ci motiua imperatiua, virtus vero diffusa per
 corpus eorum cum aliquibus spiriti-
 bus vitalibus, licet pauci sint, po-
 test dici potentia motiua
 executiua. Hic ter-
 minatur tractatus
 tertius de

po-
 tentia appetitiua & motiua, & est vl-
 timus super tertium librum de
 Anima. Laus Deo viuen-
 ti primo, qui cuiuslibet
 esse, omnisq. vitæ
 fons est, &
 origo.

❧

3

CHRYSOStOMI IAVELLI
CANAPITII
TRACTATVS

DE TRANSCENDENTIBVS,
PRAEVIVS METAPHYSICES.



NOTITIAM de transcendentibus, quam veluti ianuam in negotio metaphysico arbitramur complectemur in vno tractatu, quem diuidimus in sex capita.

In primo, agendum est de ente.

In secundo, de vno.

In tertio, de aliquid.

In quarto, de re.

In quinto, de vero.

In sexto, de bono.

CAPVT PRIMVM.



CONSIDERATIONEM de ente diuidimus in duo.

Primo, videndum est, si est primo cognitū.

Secundo, agendum est de distinctionibus eius. pro euidencia primi tria agenda sunt.

Primo, ponitur distinctio de cognitione.

Secundo, ponitur conclusio, quam existimamus esse ad mentem D. Thomæ, & probabitur.

Tertio, adducitur opinio Scoti cum rationibus suis, & soluentur.

Aduerte

Aduerte igitur quadruplicem cognitionem rei vniuersalis apud intellectum nostrum.

Prima, dicitur cognitio confusa actualis habita de re vniuersali, vt est quoddam totum diffinibile, & sic diffinitur. Cognitio confusa actualis est, qua cognoscitur res diffinibilis non penetrando, nec claro intellectu resoluendo diffinibile in partes diffinientes, sed confuse eas apprehendendo, vel obscuro intuitu conceptum rei diffinibilis attingendo, vt quando cognoscitur substantia vel corpus, absque hoc quod de eis habeatur ratio vel conceptus, vel diffinitio clara, & resoluta.

Secunda, dicitur cognitio distincta actualis habita de re vniuersali, vt est quoddam totum diffinibile, quæ opponitur cognitioni prædictæ sicut opponitur distinctum confuso, & sic diffinitur. Cognitio distincta actualis est qua cognoscitur res diffinibilis penetrando diffinitionem per resolutionem in partes diffinitiuas, sic conceptus est res solubilis in ali qua priora, vel per clarum & simplicem intellectum, si conceptus est omnino simplex non res solubilis in aliqua priora, qualis est conceptus entis, vt declarabitur infra.

Tertia, dicitur cognitio confusa virtualis habita de re, vt est quoddam totum vniuersale contentiuum suorum inferiorum, & sic diffinitur. Cognitio confusa virtualis est qua cognoscitur res vniuersalis, vt contentiuum multorum, non tamen penetrando quomodo illa multa contineat, & quomodo ab inuicem distinguantur, sed sinitur in intuitu confuso, vt dum considero animal, prout sub se continet multas species, non tamen clare intueor differentias distinguentes & constituentes huiusmodi species contentas sub genere.

Quarta, dicitur cognitio distincta virtualis, & est opposita præcedenti, & sic diffinitur. Cognitio distincta virtualis est qua cognoscitur res vniuersalis, vt contentiuum multorum penetrando quibus modis continet, & quibus differentijs contenta distinguuntur.

Huiusmodi cognitiones sic ordinantur, q̃ prius habetur de obiecto, vt est diffinibile cognitio confusa actualis, quam cognitio distincta actualis. Intellectus. n. noster qui tendit à potentia ad actum, & ex imperfecto ad perfectum, prius apprehendit

prehendit obiectum, vt quoddam diffinibile in confuso, q̄ penetret distincte diffinitionem & partes eius, vt diffinientes, vt habetur ex primo Phys. tex. 5. secundo loco succedit cognitio distincta actualis de obiecto, vt est quoddam diffinibile: postquam enim intellectus aduertit naturam animalis esse diffinibilem, venatur distincte eius diffinitionem. tertio loco habetur de obiecto vniuersali confusa virtualis prout est contentium multorum: quarto loco habetur de obiecto vniuersali cognitio distincta virtualis, vt continet multa, nam antequam distincte apprehendam quomodo animal continet species & quibus differentiis constituntur, prius apprehendo in confuso ipsum dici de multis, & esse in multis, alioquin in intellectu nostro cognitio perfecta præcederet imperfectam, quod tamen est falsum. Quoniam ex 9. Metaph. via generationis imperfectiora præcedunt perfectiora, sicut pueritia præcedit iuuentutem, patet ergo quomodo cognitio confusa actualis præcedit omnes, & ideo illud erit primo cognitum simpliciter, de quo primo habetur huiusmodi cognitio.

Quando ergo quæritur, si ens est primo cognitum, quæritur de cognitione confusa actuali, prout ens est quoddam conceptibile, vt sit sensus vtrum antequam apprehendatur conceptus entis in confuso, prius apprehendatur aliquod in ferius ente, vt substantia vel corpus.

Pro responsione igitur pono hanc conclusionem: ens est primo cognitum ab intellectu coniuncto cognitione confusa actuali, quam dupliciter probo, primo: apud intellectum procedentem de imperfecto ad perfectum, conceptus imperfectissimus prior est omni alio conceptu via generationis. Nam ex 9. Metaph. tex. 15. imperfecta perfectis priora sunt ex generatione, sed intellectus coniunctus cum sic potentialis ex tertio de Anima. tex. 5. procedit ab imperfecto ad perfectum. Et conceptus entis est imperfectissimus inter omnes alios conceptus, quoniam omnes addunt super ipsum, vt patet, ergo comparantur ad ipsum sicut totum ad partem. Totum autem semper est perfectius parte, includit enim partem & aliquid plus, ergo omnes alij conceptus perfectiores sunt conceptu entis, & sic sequitur conceptum

ptum entis esse priorem in intellectu coniuncto omni alio conceptu, quare manifestum est, quòd antequam habeam conceptum de aliquo inferiori ab ente prius in confuso apprehendo ens dicens, ens est cui debetur esse, sumendo ly *esse* in confuso.

Sed forte dices, licet conceptus entis in quantum obiectiualis sit imperfectissimus, non tamen quo ad euidentiā, immo ex se est euidens & clarus, cum non possit notificari per aliqua superiora, quoniā patet nihil esse superius ente.

Sed contra, & probo quòd etiam quantum ad euidentiā imperfectissimus est. Nam per ipsum præcise minimam acquirimus notitiā de eius inferioribus. Constat enim q̄ si cognosco hominem solum quia ei debetur esse, minimam est hæc cognitio & confusissima, per alios autem conceptus, maiorem acquirimus notitiā, nam maius est cognoscere hominem per hoc quòd debetur ei esse per se & esse animatum, & sensitivum, & esse rationale, quam per hoc tantum, quòd ei debetur esse, patet igitur cōceptum entis etiam quo ad euidentiā esse imperfectissimum.

Secundo probatur eadem conclusio sic, qualis est ordo, inter prima principia complexa, & propositiones proprias, ut inter hæc, Nam sunt opposita in eodem, & Homo est animal, talis est inter ens & alios terminos minus vniuersales incomplexos, quoniam prima principia complexa componuntur ex ente, nam sensus allegati principij est. Non sunt opposita entia in eodem ente, principia autem propria componuntur ex terminis minus vniuersalibus, ut patet in exēplo adducto, sed prima principia complexa sunt primo cognita quia ab eis omnis alia cognitio complexa pendet, ex primo posteriorio. & sunt sicut ianua in domo ex secundo Metaph. tex. primo ergo, & ens ex quo componuntur prima principia est primo cognitum.

Confirmatur per Auicennam in primo suæ Metaph. cap. sexto ubi inquit, dicemus igitur quòd ens & res talia sunt, quòd statim imprimuntur in anima prima impressione, quæ non acquiritur ex alijs notioribus, patet ergo, quòd ens est, primo cognitum, modo exposito in propositione dubij.

Posita

Posita & manifestata via, quam tenemus ad mentem B. Thom. adducenda est opinio Scoti, quæ habetur in primo sent. dist. 3. q. 2. Aduerte igitur quod Scotus discordat à B. Thom. in duobus, quantum ad cognitionem actuale[m] confusam. Primo negat ens posse cognosci conceptu confuso, tunc enim conceptum entis esse conceptum distinctum & clarum, & sic secundum Scotum de ente habetur solum distincta actualis cognitio, & probat sic. Quod habet conceptum omnino simplicem, & non resolvablem in partes, est cognoscibile solum cognitione distincta, & non confusa. Hæc patet ex conditione cognitionis confusæ, de cuius ratione est, quod intellectus feratur in conceptum resolvablem in partes, ita quod aliquid cognoscat de re, & aliquid ignoret, puta quod cognoscat genus, & ignoret differentiam, sed ens habet conceptum omnino simplicem, non resolvablem in aliqua priora, nihil enim est prius ente, ergo est cognoscibile solum cognitione distincta & non confusa.

Ad hoc negatur maior, non enim est necesse ad cognitionem confusam, quod habeatur conceptus resolvables in partes, sed sufficit hanc disiunctiuam esse veram, de cognoscibili cognitione confusa, necesse est haberi conceptum resolvablem in partes, vel conceptum simplicem super quem possit fieri intellectus diuerso quidem intuitu, puta quod prius feratur super ipsum obscuro intuitu & confuso, sicut fertur visus super obiectum in crepusculo, deinde feratur clarò & certo intuitu, sicut fertur visus super idem obiectum in clara luce, & sicut fertur intellectus super prima principia complexa, & feruntur intelligentiæ super obiectum naturale sui intellectus. Dico igitur quod licet ens non habeat conceptum resolvablem in partes priores, cum nihil sit prius ente, tamen habet conceptum simplicem, super quem intellectus primo fertur intuitu debili & obscuro, & ut sic cognoscit ens cognitione confusa, deinde fertur super eundem clarò intuitu, & tunc cognoscit ens cognitione distincta. Deceptus igitur fuit Scotus, quia non considerauit sufficienter omnia requisita ad cognitionem confusam. Nam habere conceptum resolvablem in partes priores, est necesse tantum in contentis sub ente & habentibus aliqua priora, in quæ resolutione

Iurio fiat, qualia sunt genera & species specialissimæ. unde conceditur, quod de specie huiusmodi, non potest haberi primo cognitio confusa, deinde distincta, nisi de ea habeatur conceptus compositus ex genere & differentia, non penetrando propriam rationem generis, & propriam rationem differentie, & hæc erit cognitio confusa, deinde penetrando ipsum conceptum, & reducendo distincte in genus & differentiam, considerata propria ratione utriusque, & hæc erit cognitio distincta actualis, habita de specie specialissima.

Secundo tenet Scotus, quod primum cognitum cognitione confusa, sit species specialissima, & non ipsum ens, nos autem tenemus oppositum, ut supra probauimus. Conatur autem Scotus in primo sent. dist. 3. q. 2. probare intentum suum tribus rationibus.

Prima ratio Scoti supponit causas concurrentes ad intellectionem esse phantasma, & speciem intelligibilem, & intellectum possibilem, quæ omnes sunt causæ naturales quæ præcedunt actum voluntatis, voluntas enim sequitur cognitionem, cum non feratur nisi in bonum præcognitum. His suppositis sic arguit, causæ naturales quando non sunt impedite produciunt effectum perfectissimum, quem primo possunt producere, quoniam agunt secundum totum suum posse, sed concurrentes ad intellectionem sunt causæ naturales ex suppositis factis, ergo produciunt effectum perfectissimum, quem primo possunt producere, sed ille effectus est conceptus confusus speciei specialissimæ. ergo primum cognitum cognitione confusa est species specialissima. Quod autem ille effectus, perfectissimus sit conceptus confusus speciei specialissimæ: sic probat. Si est alius, puta si est conceptus alicuius magis vniuersalis, ut entis, vel substantiæ, vel corporis, talis esset perfectissimus, ut ratio prædicta, & cum conceptus speciei specialissimæ sit perfectior quam conceptus cuiuscunque magis vniuersalis (quoniam continet illum, & addit supra ipsum, ut conceptus hominis continet conceptum animalis, & addit rationale) sequitur, quod agentia concurrentia ad intellectionem nunquam poterunt producere conceptum speciei specialissimæ, quod est manifeste falsum.

confe-

consequentia quidem sic probatur. Causæ naturales postquam produxerunt effectum perfectissimum non possunt producere perfectiorem, aliter daretur quid perfectius perfectissimo, sed causæ naturales concurrentes ad intellectiōnem produciunt effectum perfectissimum, ut probatum est, qui secundum te est conceptus alicuius magis communis. ergo postquam produxerunt eum non poterunt producere conceptum speciei specialissimæ, cum sit perfectior, ut probatum est. ergo &c. ✓

Ad hoc conceditur totum usque ibi, sed ille effectus perfectissimus est conceptus speciei specialissimæ, id quidem est falsum, immo est conceptus entis. Nam per speciem intelligibilem repræsentatiuam obiecti intellectus primo intelligit, quod talis res est ens, id est cui debetur esse in confuso, tamen nundum penetrando quale sit illud esse. Et talis conceptus entis est perfectissimus effectus qui possit pro tunc produci ab intellectu, non tamen est perfectissimus absolute, sicut forma embryonis est perfectissimus effectus, quem primo potest producere forma generantis, non enim dum incipit agere, potest perfectiorem formam producere, non tamen est eius perfectissimus effectus absolute, potest enim in processu generationis producere nobiliorem formam, puta animam sensitiuam. Et quando Scotus probat. quod si ille conceptus non est speciei specialissimæ, nunquam produceretur ab illis agentibus naturalibus, negatur consequentia. Et ad probationem eius dicitur, quod licet agentia naturalia non possint producere effectum perfectiorem perfectissimo absolute, puta leo non potest producere effectum perfectiorem quam sit anima leonis, quoniam illa est eius effectus perfectissimus, quem possit absolute producere, tamen possunt producere effectum perfectiorem effectum perfectissimo secundum quid, ut dictum est de forma embryonis, quæ quidem perfectissima est pro tunc, quia in principio generationis, virtus generantis non potest perfectionem producere, cum hoc tamen fiat, quod postea producat formam specificam longe perfectiorem. sic dico in proposito, quod conceptus entis qui primo producitur ab intellectu, est perfectissimus secundum quid, quia pro tunc non potest perfectiorem

ctiorem producere, cum hoc tamen fiat, quòd postea producat effectum perfectiorem. qualis est conceptus speciei specialissimæ: nihil enim prohibet produci aliquid perfectius perfectissimo secundum quid, non tamen perfectissimo absolute. videtur ergo Scotus fuisse deceptus, quia non aduertit conceptum magis vniuersalem esse perfectissimum secundum quid, & non absolute. Conceptum autem speciei specialissimæ esse perfectissimum absolute, ideo non potest produci ab intellectu aliquis perfectior illo &c.

Secunda ratio Scoti est hæc, secundum Auic. cap. 3. in primo suæ Metaph. Metaphysica est vltima ordine doctrinæ. ergo termini metaphysicales, vt ens, vnum, verum, &c. Qui sunt vniuersalissimi, sunt vltimi in cognitione nostra. Et sic sequitur, q̃ prius habemus conceptus de minus vniuersalibus, sicut sunt species specialissimæ, quam de magis vniuersalibus, & de transcendentibus, aliter si primo cognosceremus magis vniuersalia, Metaphysica esset prima in ordine doctrinæ, q̃ est contra Auicennam, & veritatem.

Ad hoc dicitur, q̃ Metaphysica non est inuenta, vt cognoscamus terminos vniuersalissimos, quo ad conceptus confusos, hæc enim est cognitio diminutissima & imperfectissima, sed vt cognoscamus quo ad conceptus distinctos & claros & resolutos, & cognoscamus eorum amplitudinem, quo ad continentiam suorum inferiorum, puta omnes modos essendi. Omnia generalissima, & quæ sub eis. Et hæc quidem cognitio est difficillima, ideo metaphysica est vltima ordine doctrinæ, & in hoc sensu locutus est Arist. in pr. suæ Metaph. cum dixit: Difficilia sunt homini ad discendum quæ sunt maxime vniuersalia. Nam à sensibus sunt remotissima.

Stat ergo, quòd primo cognoscamus terminos vniuersalissimos, quo ad conceptus confusos, & quòd metaphysica sit vltima ordine doctrinæ, quoniam in ea non querimus eorū cognitionem confusam, sed distinctam in ratione diffinitiuæ & contentiuæ suorum inferiorum. Et sic patet quòd ratio Scoti non concludit.

Tertia ratio Scoti est hæc. Si oportet præconcipere magis vniuersalia, vt ens & alia genera, antequam cōcipiamus speciem specialissimam, sequitur q̃ supposito singulari mo-

uente sensum & stante intellectu soluto interponatur multum tempus antequam concipiatur species specialissima illius singularis sensati. Nam cum inter ens & speciem specialissimam sint multa intermedia, erit necesse præcognoscere omnia intermedia, cum sint vniuersaliora specie specialissima. Et id non fiet nisi longo tempore, quod videtur esse inconueniens.

Ad hoc dicitur, quod non inconuenit interponi multum temporis, quoties descendimus ab vniuersalissimis ad specialissima in ratione distinctiua, quoniam species intelligibilis representat obiectum intellectui nostro, primo sub prædicato vniuersalissimo, ut quod est ens, secundo sub prædicato minus vniuersali, ut quod est substantia, & sic procedendo usque ad specialissima. Et propter has distinctas representationes multum temporis labitur. Quod si species intelligibilis representaret omnia prædicta quiditatiua statim & æqualiter, sicut contingit in intellectu intelligentiæ, tunc sine mora intellectus noster conciperet speciem specialissimam, quo ad omnia prædicata quiditatiua. Non ergo est inconueniens illud, quod Scotus reputat inconueniens & sic ratio sua nihil concludit contra nos. Hæc de primo principali dicta sint. nunc agendum est de diuisionibus entis &c.

De diuisionibus entis secundum quod ordinantur ex sui natura.

Nunc assignandæ sunt diuisiones entis, ut ens est, & videndum quæ prioritas sit inter eas, & agemus tria.

Primo, assignabuntur diuisiones entis ordinate secundum viam B. Thom.

Secundo, assignabuntur secundum viam Scoti.

Tertio, adducentur rationes Scoti, & soluentur. Quid de his & earum ordine senserit Auerroës, nihil terminatum inuenio.

Prima diuisio. Ens primo diuiditur in ens reale, & ens rationis, quid sit utrumque declarabo, sed nota in primis quod hæc diuisio non est propriæ Metaph. querimus enim hic diuisiones entis subiecti Metaph. quod ut probauimus in questionibus nostris metaphysicalibus est solum ens reale, cum sit scientia realis. Item non est diuisio entis vniuoce vel analoge,

loge, sed æquiuoce sumpti. Ens enim prædicatur æquiuoce de ente reali & de ente rationis, vnde potius est diuisio vocis in sua significata. Tamen vt habeatur plena cognitio de diuisiõibus entis vniuersalissime sumpti, vtrunque membrũ huius diuisiõis pertractabimus, declarantes in quibus proprie differunt ens reale, & ens rationis.

Aduerte igitur, q̃ ens reale vniuersalissime sumptum, vt distinguitur contra ens rationis propriissime dictum (de mēte Heruei in 3. quol. q. prima, quem in hac materia, vt tutissimum doctorem sequor) est omne quod habet esse extra intellectum, vel produciatur à causa effectiua reali, & est in aliquo subiectiue.

Dico primo, q̃ habet esse extra intellectum, sicut prima causa, & intelligentiæ, & cœlum, & elementa, & elementata, & accidentia naturalia, quæ ab omnibus confessa sunt esse entia realia, eo q̃ habent esse in rerum natura remoto omni opere intellectus.

Dico secundo vel produciatur à causa effectiua, & est in aliquo subiectiue. Id quidem dico, propter species intelligibiles & actus intelligendi conceptus formatos ab intellectu, & habitus scientificos, & volitiones, de quibus omnibus constat, quòd non habent esse extra animam, ideo videtur primo aspectu, quòd sit ens rationis de mente Philosophi in 6. Metaph. tex. 8. vbi ponit ens rationis quod habet esse in anima, & intendit illic, vt inquit Commentator, declarare diuersitatem duorum entium, scilicet entis quod est in intellectu, & entis quod est extra intellectum & c. Et tamen in rei veritate sunt entia realia.

Primo, quia locantur in prædicamento qualitatis, in quo non locatur nisi ens reale, quia in 6. Metaph. tex. 8. ens diuisum in decem prædicamenta, est tantum ens reale.

Secundo, quia considerantur à scientia reali, vt in libro 3. de Anima, vbi agitur de specie, & actu intelligendi & c. In scientia autem reali non consideratur nisi ens reale, denominatur enim realis à subiecto reali, sicut logica dicitur scientia rationalis à subiecto, quod est ens rationis.

Tertio, quia accidentia animæ habent nobiliorem entitatem cum sint in subiecto nobiliori, quàm accidentia corporea,

porea, sed ista, puta caliditas, frigiditas &c. sunt entia realia, vt ab omnibus conceditur. ergo & accidentia animæ, qualia sunt species, actus intelligendi, diffinitio, habitus scientificus, sunt entia realia.

Sed forte dices, non habent esse extra animam, ergo non sunt ens reale, præcipue quia Philosophus in 6. Metaph. tex. 8. distinguit ens rationis ab ente reali per hoc, quod est habere esse in anima.

Responsio, vt dicemus infra, ly habere esse in anima, non est totalis ratio entis rationis conditincti contra ens reale, sed est hæc, habere esse in anima, solum obiectiue, & non subiectiue, nec esse ab aliquo effectiue, & quoniam prædicta efficiuntur ab intellectu, & in eodem sunt subiectiue, ideo licet sint in intellectu, tamen sunt entia realia. Dictum autem Philosophi adductum, intelligendum est non de omni quod quocunque modo est in intellectu, sed de vero & falso quod consistit in compositione & diuisione intellectus. Quod propriissime ens rationis dicitur, vt dicemus infra. patet igitur quid sit ens reale communissime sumptum.

Ens autem rationis sumptum propriissime, & vt distinguitur contra ens reale, est illud quod in nullo est subiectiue, sed consequitur rem, vt est obiectiue in intellectu, pro cuius euidencia aduerte triplicem modum existendi in intellectu.

Primo, vt in subiecto, sic species & actus intelligendi & scientia sunt in intellectu, vt in subiecto, & ideo sunt entia realia, vt declarauimus in præcedentibus.

Secundo obiectiue, & est illud quod offertur intellectui, vt obiectum intelligibile, non tamen est subiectiue in eo, nā sicut visui offertur color, qui non in visu, sed in corpore colorato est subiectiue, & tamen dicitur esse obiectiue in visu, quia obijcitur visui, vt est in suo prospectu, ita intellectui offertur res intelligibilis, vt obiectum potentie, non tamen est subiectiue in intellectu, sed habet esse ad extra, non enim lapis est in anima, sed species ex 3. de anima, tex. 38. Dicitur tamen esse obiectiue in intellectu, prout ei obijcitur, & est in suo prospectu, sicut obiectum propriæ potentie obijcitur. Et hoc modo tam ens reale, quam ens rationis, tam priuationes, quam negationes possunt esse obiectiue in intellectu,

telleſtu, prout ſunt intelligibilia ab eo. Et uſque huc nundum inuenimus propriiſſimum ens rationis. quoniam eſſe obiectiue, hoc modo in intellectu poteſt conuenire tam enti reali, quàm enti rationis, cum utrunque ſit intelligibile.

Tertio, aliquid eſt in intellectu, ſicut quidam modus conſequens naturam rei, ut obijcitur intellectui, uerbi gratia, natura hominis, ſi debet intelligi, oportet ut obijciatur ſine conditionibus indiuiduantibus, non in quantum habet eſſe in Sorte, aut Platone, ſed ut quoddam commune & indiſtinctum. communitas ergo & indiſtinctio conſequuntur naturam intelligibilem non in quantum habet eſſe in ſingularibus, ſic enim eſt indiuidua & diſtincta, ſed in quantum obijcitur intellectui per ſpeciem depuratam à conditionibus indiuidualibus, & repræſentantem naturam rei in vniuerſali. Et talem modum. i. talem communitem & indiſtinctionem, quæ conſequuntur naturam rei obiectam intellectui appellamus propriiſſime ens rationis, ut diſtinguitur contra ens reale. Quod quidem dicitur. Secunda intentio obiectiue, ſuper quam fundat intellectus conceptum generis, vel ſpeciei, nam ex hoc quod natura rei obijcitur intellectui, ut communis & indiſtincta, intellectus apprehendit eam, ut prædicabilem de multis differentibus ſpecie, vel numero. Et quod tales modi ſint vere ens rationis, probatur ſic. Illa communitas & indiſtinctio, non conueniunt rei, ut habet eſſe in ſingularibus, nec cauſantur ab intellectu poſſibili, immo præcedunt actum intelligendi, prius. n. natura rei in communi, & nõ, ut hæc obijcitur intellectui per receptionem ſpeciei intelligibilis, quæ intelligatur. ergo illi modo non ſunt ſubiectiue in intellectu. Quod. n. ſubiectiue eſt in eo cauſatum eſt à parte intellectiua, ſi non ſunt ſubiectiue ſunt obiectiue, quia non datur medium, ſi ſunt obiectiue in intellectu, & nullo modo habent eſſe in ſingularibus, ergo ſunt vere ens rationis, ut diſtinguitur contra ens reale, hæc enim eſt diffinitio data de ente rationis. ſ. Et illud quod in nullo eſt ſubiectiue, ſed conſequitur res rem, ut eſt obiecta intellectui. Sicut cognoscibile obijcitur potentiæ cognſcitiuæ.

Sed aduerte, quod talis conſecutio poteſt fieri ad primam & ſecundam, & tertiam operationem, & diuerſificatur non
u iij minatio,

minatio, nam si fit consecutio per primam operationem, nominatur ens rationis, his terminis, genus, species, singulare &c.

Si per secundam operationem, nominatur his terminis, subiectum, prædicatum &c.

Si per tertiam operationem, nominatur his terminis, consequentia, antecedens, consequens, maior, minor &c. Et huiusmodi considerantur in logica, cuius aliqua pars pertractat de ente rationis iuxta primam operationem, ut in vniuersalibus aliqua de ente rationis iuxta secundam, ut in libro per hermenias, aliqua de ente rationis iuxta tertiam operationem, ut in arte noua. Hæc de prima diuisione entis communissime sumpti dicta sint.

Prætermisso ente rationis quod est de consideratione logici, immorandum est in diuisionibus entis realis, cuius prima diuisio erit hæc. Ens reale aliud per se, aliud per accidens, & quidem quoddam hæc sit prima diuisio eius, patet per Comment. in 6. Metaph. comment. j. ubi inquit. Ens primo in hæc duo diuiditur .s. in ens quod est per se, & in ens quod est per accidens.

Ens autem per se est duplex .s. secundum naturam suam, & secundum causalitatem.

Ens per se secundum naturam suam est illud cuius natura est simplex, vel si est composita componētia sunt eiusdem prædicamenti, quorum vnum est, ut potentia: alterum ut actus. Ratione primi, Deus & intelligentiæ, secundum vnam opinionem non distinguentem inter esse & essentiam, & omnes formæ substantiales & accidentales, dicuntur ens per se, quia non componuntur intrinsece ex partibus essentialibus, sed sunt entia simplicia.

Ratione secundi, omnes substantiæ corporeæ superiores incorruptibiles, & inferiores corruptibiles, tam elementa, quam elementata, sunt entia per se, quia licet sint entia composita, tamen partes componentes, sunt in eodem prædicamento, tam enim forma eorum, quam materia sunt reductiue in prædicamento substantiæ, ex quibus materia est potentia, forma est actus, & ideo ex eis fit vnum per se, secundum Philosophum in 2. de anima, tex. 7. & in 8. Metaphys. tex. 16.

simili-

similiter quia secundum viam D. Th. omnes intelligentiæ sunt compositæ ex esse & essentia, dicuntur entia per se, quia & esse & essentia earum sunt in eodem prædicamento, & esse comparatur ad essentiam, sicut actus ad potentiam. Quoniam esse est prima actualitas, qua res existit, ut dicemus in cap. ult. huius tractatus.

Ens per se secundum causalitatem, est omnis effectus dependens à causa per se influente in effectum secundum quod est talis, puta ædificium comparatum ædificatori est ens per se secundum causalitatem, dependet enim ab ædificatore inquantum ædificator est, & animatum est effectus per se animæ, quæ est causa formalis eiusdem, & elementatum est effectus per se elementorum, cum sint illius causæ materiales, sic medicina est effectus per se sanitatis in genere causæ finalis: ordinatur enim ad sanitatem, ut ad finem per se intentum.

Ens per accidens diuiditur, sicut ens per se: nam quoddam est ens per accidens secundum naturam suam, quoddam autem secundum causalitatem.

Ens per accidens secundum naturam suam est res composita, ex entibus diuersorum generum, vel quorum vnum accedit alteri, vel duo accidunt tertio, propter primum homo risibilis est ens per accidens apud metaphysicum, quoniam secundum viam nostram, cum sit homo substantia, risibilitas est qualitas, propter secundum, homo albus est ens per accidens, quoniam potest inueniri homo sine albedine, propter tertium musicum album est ens per accidens, quoniam album accedit musico, & vtrunque accedit tertio, puta homini: potest enim inueniri homo qui non est albus, neque musicus, & dato, quod in aliqua specie vnum non posset inueniri sine altero, adhuc constitueretur ens per accidens, dum modo sint diuersorum generum, propter quod nix alba est ens per accidens ratione dicta.

Ens per accidens secundum causalitatem, est omnis effectus dependens à causa non causante ipsum, inquantum est talis, & ut sic, domus est effectus per accidens musici, non enim musicum inquantum musicum ædificat, sed inquantum ædificator, & sic omnis effectus fortuitus, & causalis est.

ens per accidens, quia est à causa non intendente talem esse
 etū, vt inuentio thesauri, non enim est à fodiente sepulchrū
 in quantum fodiens sepulchrum, sed est præter eius intentio
 nem, & de hoc ente per accidens habetur in 2. Phys. tex. 43.
 & in 6. Metaph. tex. 4. vbi determinat Philosophus, quod de
 eo non est scientia. Quod quomodo verum sit, declarabi
 mus in quæstionibus Metaph. super librum sextum. Hæc
 pro præsentī diuisione entis realis dicta sint.

Secunda diuisiō entis realis sit hæc. Aliud absolutum,
 aliud respectiuum, & quidem quod hæc diuisiō non possit ef
 se entis diuisi in ens reale & ens rationis, declaratur sic, Om
 ne ens rationis propriissime sumptum, vt de eo supra locuti
 sumus ad mentem Heruei, est formaliter respectus rationis
 dicit enim modum consequentem rem, vt obiectiue in intel
 lectū, qui modus est indistinctio & communicabilitas natu
 ræ intelligibilis, vt offertur intellectui, constat autem huius
 modi indistinctionem, & incommunicabilitatem esse respec
 tus rationis, quia non conueniunt rei, vt habet esse ad ex
 tra, sed vt obijcitur intellectui, erit ergo hæc diuisiō solius
 entis realis. Et vtræque pars sic declaratur.

Ens absolutum est illud quod dicitur ad seipsum, vel cu
 ius esse non consistit in sola habitudine ad alterum, & sic om
 nes substantiæ sunt entia absoluta, non enim esse animalis
 aut hominis, aut lapidis, consistit in habitudine, de acciden
 tibus autem non videtur ita clarum, quoniam cum eorum
 esse sit in esse, videtur cōsistere in habitudine ad subiectum,
 quod tamen non est verum, nam aliud est esse ens respecti
 uum, & aliud est concipi conceptu relatiuo, stat enim esse
 ens absolutum, quod tamen concipitur conceptu relatiuo,
 nam scientia est qualitas absoluta, & tamen concipitur in
 ordine ad scibile, sic in proposito, licet accidens in sua ratio
 ne respiciatur subiectum, non tamen sequitur omne accidēs
 esse essentialiter ens respectiuum, aliter nullum accidens di
 ceret perfectionem.

Et si fiat obiectio, quod omnis substantia præter primam
 est effectus, sustinendo Deum esse causam effectiuam om
 nium entium, sed effectus dicit ordinem ad causam, ergo vi
 detur oīs substantia esse ens respectiuum & non absolutum.

Respondeo

Respondeo & dico, quòd ad omnem substantiam præter primam sequitur quidam respectus causalitatis, vt proprietates sua, non tamen est de quiditatiua ratione formali ipsius. Potest enim intelligi substantia sine tali respectu, licet non possit esse sine eo. Sicut potest intelligi homo sine risibili, licet non possit esse sine eo, illud autem quod essentialiter est ens respectuum, nō potest intelligi, nec diffiniri sine eo, ad quod habet respectum, vnde nihil prohibet substantiam creatam esse ens absolutum, & tamen ad eam consequi respectum causalitatis.

Ens respectuum est illud quod ad alterum, secundum suū esse dicitur, vel est ilind, quod in sua quiditatiua ratione dicit respectum, vel ordinē, ad alterum, vt pater, filius, seruus, dominus &c. Sed aduerte, quòd ille respectus aliquando est rationis tantum, aliquando est realis. Tunc est rationis tantum, quando non habet fundamentum reale, vt dextrum & sinistrum in columna, quoniam nihil reale est in ea, super quod fundetur dexteritas. Huiusmodi enim fundamentum est potentia motiua, secundum locum, quæ in solis animatis recipitur. Propterea Arist. in 2. cœli tex. 13. vt seruaret differentias reales locales in cœlo, posuit cœlum esse animatū, inquit enim: Est autem cœlum animatum, & habet motus principium manifestum, quoniam habet sursum & deorsum, dextrum & sinistrum. Quoniam igitur potentia motiua non est in columna, non dicitur realiter dextra, sed quia intellectus apprehendit eam, vt terminantem respectum ratione cuius dicitur columna dextra, vel sinistra, ipsi animali. Est igitur dexteritas huiusmodi relatio rationis, vt pote nō confurgens ex natura rei, sed consequens solam apprehensionem intellectus. Tunc vero est realis quando fundamentum est reale. Pro cuius notitia dicemus tria.

Primo, quòd aliqua relatio est realis.

Secundo, quòd aliqua est realis non mutua.

Tertio, quòd aliqua est realis mutua.

Ad euidentiā primi, aduerte opinionem quorundā fuisse, ut testatur Auerroes in 12. Metaph. cōment. 19. relationem non esse ens reale, sed esse ex secundis intellectis .i. consequentem apprehensionem intellectus intelligentis plura, &
compa

comparantis ea adinuicem, ita q̄ remota comparatione intellectus nulla esset relatio, sed contra eam arguitur sic. Relatio constituit vnum prædicamentum, ergo est aliqua relatio realis, quoniam ex sexto Metaphys. tex. 8. ens diuisum in decem prædicamenta, est ens extra animam, præterea aliqua relatio est de perfectione vniuersi, quoniam apud Arist. in 12. Metaphys. tex. 52. sicut ordo in exercitu, est de perfectione eius, ita ordo qui est in rebus, prout vna ordinatur ad aliam & omnes ad primum, est bonum, & perfectio vniuersi, hic ordo autem est relatio, vt patet, & est ens reale, aliter perfectio entis realis dependeret ab ente rationis, ex consequenti prius dependeret à posteriori, & effectus esset nobilior causa, ergo manifestum est dari relationem realem.

Ad euidentiā secundi aduerte, q̄ aliqua relatio realis est, in qua vnum extremum dependet ab altero, sed non eō uerso, vt patet in 5. Metaph. cap. ad aliquid, vt inquit Arist. Mensurabile vero, & scibile, & intellectuale, eo quòd aliud dicitur ad ipsum ad aliquid dicuntur, sed non quòd illa ad aliud &c.

Et intendit, quòd inter scientiam, & scibile, est relatio realis ex parte scientiæ, dependet enim scientia à scibili realiter, sed non econuerso, potest enim esse scibile, & tamen de eo non habeatur scientia. Non autem potest esse scientia sine scibili, sicut non potest esse visio sine visibili, similiter inter mensuram & mensuratum, est relatio realis, ex parte mēsurati, quoniam in ratione mensurandi passiue pendet à mēsurā, non autem econuerso.

Et quidem, quòd hæc relatio sit realis, manifestatur quoniam ubi est realis dependentia, & ordo, ibi est relatio realis, vt ex se patet, sed inter scientiam & scibile, ex parte scientiæ, & inter mensuram & mensuratum, ex parte mensurati, est dependentia realis, vt declarauimus. Ergo talis relatio est realis, licet non mutua.

Ad euidentiā tertij, aduerte, quòd illa est realis mutua, quæ in utroque extremo est realis, & in utroque habet fundamentum reale. Et hæc secundū Arist. in 5. Metaph. cap. ad aliquid fundatur, uel super quantitatem, ut æqualitas, uel inæqualitas, & omnes proportionēs numerales, uel super qualita

qualitatem, ut similitudo & dissimilitudo, uel super actionē,
& passionem, ut paternitas, & filiatio, dominium, & seruitus.
Quæ quidem relatio, tres condiciones requirit.

Primo, quòd utrumque extremum sint ens reale, & unum
realiter, ab alio distinctum propter quod inter ens, & non
ens, non est relatio realis, quia non ens, non est ens reale, li-
cet dici possit ens rationis, prout ab intellectu apprehendi-
tur. Nam ex 4. Metaph. tex. 2. non ens esse, non ens dicemus.

Secundo, quòd utrumque extremum sit ens actu, & sint a-
ctu abinuiem distincta, propter hoc inter duo alba actu exi-
stentia, & actu ab inuicem distincta est mutua relatio simili-
tudinis, defectum autem huius, inter totum, & partes, & in-
ter partes ipsas non est mutua relatio, quia partes non ha-
bent esse actu distinctum ab esse totius, sed per esse totius
existunt. Nec una habet esse distinctum ab alia, cum nō sint
in actu, dum componunt totum, licet actu componant.

Tertio, quod sint eiusdem ordinis, quod non sic intelligas,
quali sit necesse, quod sint eiusdem generis prædicamentalis,
nam inter solem generantem & ranam genitam est mutua
relatio realis in secundo modo relatiuorum ex 5. Metaph.
& tamen constat, quod non sunt eiusdem generis, intelligas er-
go, quòd sint eiusdem ordinis, id est ex natura sua sint adinu-
icem ordinata, ita quòd sicut A, ex se ordinatur ad B, ita B, ex
se ordinatur ad A, & talis ordo seruetur inter omnes nume-
ros, & quantitates continuas finitas, adinuicem compara-
tas, uel quòd mutuam habeant dependentiam, in ratione
perfectiua, quæ conditio seruetur inter omne agens secun-
dum & suum passum, nam sicut agens perficit passum actuā-
do ipsum sic ex eo quòd agens agit in passum reducitur a-
gens, de potentia agens ad actu agens, ex consequenti etiā
propter passum perficitur agens, perfectius est enim agens
actu, quam agens in potentia. Ex quo sequitur, quod inter pri-
mam causam, & effectum suum non est relatio mutua, quo-
niam agens primum non perficitur actione sua, cum sit ex
se perfectum, & actio sua, sit tua substantia, ex 12. Metaphyl.
tex. 5. propter quod secundum uiam B. Thom. prima cau-
sa & omne eius productum, non sunt eiusdem ordinis, cum
perfectio primæ causæ nullo modo pendeat ex suo pducto.

Hæc

T R A C T A T V S

Hæc de secunda diuisione entis realis sit dicta.

Tertia diuioio entis realis est hæc. Quodlibet ens reale est vnum vel multa. Ad euentiam huius dico duo.

Primo, quomodo est sufficiens.

Secundo, quomodo datur per opposita.

Quantum ad primum aduerte, q̄ quodlibet ens, vel est in diuifum in fe, & diuifum à quolibet alio, & fic est vnum, hæc enim est propria ratio vnus intrinfecca fecundū Commenc. in 5. Metaph. cap. de vno, & in 10. lib. comm. 3. vbi inquit, hoc nomen vnum fecundū q̄ est vnum, est illud quod non diuiditur aliquo modo, & notanter dicit, fecundū quòd est vnum: non enim est neceffe, q̄ est vnum effe omnibus modis. vnum, dantur enim gradus, nam est quoddam ens, quod in fe nullam penitus continet pluralitatem abfolutā, & hoc est maxime & omnino vnum, & est conditio primi principij, ex 12. Metaph. tex. 51. Quoddam autem est, quod licet actu non habeat diuifionem, poteft tamen diuidi in plura, ficut omne ens corporeum, vel poteft habere compofitionem, faltem fubftantiæ & accidentis, vt omne ens citra primam caufam, cuius actio & proprietates non funt fubftantia, fed accidens, & ideo nullum præter primum ens est maxime vnum. Poteft ergo dici vnum & multa, vnum quidem in quantum est actu indiuifum & indiftinctum. Multa vero in quantum diuerfitatem aliquam, vel compofitionem fubftantialem, fivæ accidentalem fecum compatitur, vel est diuifum in feipfo, ita q̄ plura continet, quorum vnum non est alterum realiter, & fic est multa. Dico autem realiter, quoniā fi illa plura diftinguantur folum ratione non poteft dici multa, nifi fecundū quid. i. fecundū rationem vnde quoniam in centro finis & principium diftinguuntur folum ratione, non dicitur centrum effe multa, fed vnum. Et quoniam genus, ac differentia diftinguuntur folum ratione, fpecies conftituta non dicitur effe multa, fed vnum. Oppofito autē modo fi diftinguantur realiter, & habeant effe actu diftinctum dicuntur effe actu multa, ficut duo lapides, duæ albedines &c. Si autem non habent effe actu diftinctum, fed folum in potentia, dicuntur effe multa in potentia, ficut partes dum cōponunt totum, patet ergo hanc diuifionem effe fufficientem.

Quantum

Quantum ad secundum, vt scias quomodo membra huius diuisionis sunt opposita, aduerte, q̃ cum sit duplex vnũ, scilicet vnum quod est principium numeri, & vnum transcendens, alio modo opponitur vnum numerale multitudini numerali, & alio modo vnum transcendens multitudini transcendenti. Nam vnum numerale dupliciter consideratur.

Primo, in quantum ad ipsum consequitur ratio mensuræ, vni enim primo competit ratio mensuræ, ex 10. Met. tex. 2. & vt sic opponitur multitudini numerali oppositione relatiua, sicut principium ad principiatum, sicut pars ad totum, & magis proprie, sicut mensura ad mensuratum. Omnis enim numerus mensuratur vnitatem, ex decimo Metaphysicæ, tex. 2.

Secundo, consideratur secundum id, quod est vnum, vt vnum: & hoc iterum dupliciter.

Primo, cum præcisione. i. in quantum est species distincta à qualibet specie numeri, sicut etiam consideramus dualitatem, ut speciem distinctam à quaternario, & vt sic opponitur multitudini numerali consideratæ secundam quamlibet speciem: oppositione disparata, quæ seruatur inter quascunque duas species eiusdem generis, quæ reducitur ad oppositionem contrariam, quia ex 10. Metaph. tex. 24. duæ species constituuntur ex contrarijs differentijs diuisiuis eiusdem generis, propter quas species constituatæ dicuntur opponi contrarie.

Secundo, consideratur sine præcisione. i. non in quantum species distincta ab omni specie numeri, sed in quantum est constitutiuum numeri aliquoties sumptum, sicut etiam possumus considerare duo, & tria, non in quantum sunt species distinctæ contra sex, sed in quantum constituunt sex, & vt sic nulla oppositione contraria opponitur multitudini numerali, nullum enim constitutiuum contrariatur constituto, aliter non contingeret constitutum. Et in hac consideratione, vnum est materia numeri: materia autem non habet oppositionem ad id cuius est materia, nisi forte oppositionem relatiuam, qualis est inter principium & principiatum. Patet igitur, quomodo vnum & multa numeraliter opponuntur.

Vnum vero sumptum transcendenter opponitur multitudi-
dini transcendenti priuatiue, quoniam cum vnum sit ens in-
diuisum, importat formaliter indiuisiōem, multitudo vero
importat diuisionem, quoniam multa sunt, quorum vnum
non est aliud, indiuisio autem & diuisio se habent, vt priua-
tio & habitus, ergo vnum & multa transcendenter sumpta,
opponuntur priuatiue, & confirmatur per Arist. in 10. me-
taph. tex. 9. vbi & Cōment. inquit. Manifestum est, qd vnum
opponitur pluri, secundum hunc modum. scilicet habitum & pri-
uationem, indiuisibilitas enim est priuatio diuisibilitatis.

Tu tamen aduerte, quod vnum nō est priuatio illius mul-
titudinis, quam constituit, quia respectu illius est pars con-
stitutiuā, vt diximus, sed multitudinis, quæ negatur esse, in
eo quod est vnum: non enim de ratione sua, vnum negat
omnem diuisionem, sed tantum eam, quæ esset in ipso, si nō
esset vnum. Pari ratione negat omnem multitudinem sibi
intrinsecam in quantum vnum: extrinsecam autem non, im-
mo vt diximus, eam constituit: omnis enim pluralitas ab
vnitate descendit, patet igitur, quomodo præsens diuisio da-
tur per opposita, siue sumantur vnum & multa numeraliter,
siue transcendenter.

Quarta diuisio entis realis est in quinque transcendētia,
de quibus considerabimus tria.

Primo, quomodo distinguantur ab ente, cum non sint sy-
nonyma.

Secundo, quid addant super ens.

Tertio, quem ordinem habeant inter se.

Pro euidentia primi, pono tres conclusiones. Prima con-
clusio, Transcendentia non distinguuntur realiter ab ente.
In hac conclusione omnes metaphysici conueniunt, quæ ta-
men probatur duplici ratione.

Primo, quia de eis non prædicaretur ens tam in abstra-
cto, quam in concreto, quod ideo dico, quoniam & si acci-
dens distinctum realiter à subiecto prædicetur de subiecto
in concreto, non tamen in abstracto (falsum est enim quod
Plato sit albedo) constat autem quod ens in abstracto, & in
concreto prædicatur de transcendentibus, nam bonum est
ens, & est entitas, ergo &c.

Secundo,

Secundo, si distinguuntur realiter ab ente addunt super ens aliquod reale. Quæ enim distinguuntur realiter, aut sunt duo entia realia penitus distincta, ut duo supposita, aut vnum includit aliquod reale, quod non concludit alterum, ut homo & homo albus, sed transcendentia non addunt aliquod reale super ens, quoniam tale additum, aut esset differentia, sicut homo addit rationale super animal, aut esset accidens, aut substantia, non addit differentiam, quia ens esset genus contra Arist. in 3. Metaph. tex. 10. non addunt accides, nec substantiam, quia transcendentia non prædicarentur de quolibet ente. Quod enim addit super ens, aliquid determinati generis, non conuertitur cum ente, ut patet. Constat autem transcendentia prædicari de quolibet ente, unde & Comment. inquit in 4. metaph. cõm. 3. omne ens est vnum, & econuerso. Et quod dico de vno, intelligendum est de alijs transcendentibus. Cum igitur substantia, & quolibet accidens sint determinati generis, sequitur quod non conuerterentur cum ente, cuius tamen oppositum est concessum ab omnibus: cum sint passionibus conuertibiles cum ente.

Secunda conclusio: transcendentia non distinguuntur ab ente ex natura rei, quoniam distinctio ex natura rei est distinctio realis, nam per auctorem huius distinctionis, qui est Scotus in primo sent. dist. 8. est distinctio in re ante opus intellectus, ergo est realis, sed ex conclusione præcedenti nõ distinguuntur realiter ab ente, ergo nec ex natura rei. Nec valet ratio Scoti, quæ est hæc. Secluso omni opere intellectus, voluntas, & intellectus distinguuntur plus quam ratione, cum habeant distinctas operationes, ergo eorum obiecta distinguuntur, plus quam ratione, quæ sunt ens, & bonum, ergo distinguuntur ex natura rei. consequentia vero sic probatur, qm̃ ex secundo de anima. tex. 33. potentia distinguuntur per obiecta, ergo qualis est distinctio inter voluntatem & intellectum, talis erit inter ens, & bonum: cum ergo intellectus, & voluntas distinguantur, ex natura rei distinguuntur. similiter ens & bonum. Hæc ratio in via B. Th. non valet, quoniam intellectus & voluntas, secundum nos distinguuntur, non solum ex natura rei, sed etiam realiter, negamus

TRACTATVS

mus autem esse necessariam tantam distinctionem in obiectis, quantam ponimus in potentijs. Nec hoc dixit Aristot. Nam ad causandam distinctionem realem in potentijs, sufficit distinctio formalis vel rationis in obiectis, sicut ad causandam distinctionem specificam & realem in duabus scientijs, sufficit distinctio formalis in obiecto, eadem enim res sub diuersa ratione formali, à distinctis scientijs consideratur, sicut terra ab Astrologo & à Physico.

Et si quæras, quomodo eadem res potest sub diuersa ratione esse obiectum, intellectus & voluntatis, dico id esse, quoniam eadem res apta nata est diuersimode mouere utrūque, mouet enim intellectum sub ratione entis, quæ est ratio absoluta, & mouet voluntatem sub ratione appetibilis, quæ est ratio boni, quæ est ratio respectiua, vt dicemus infra.

Tertia conclusio: Transcendentia distinguuntur ratione ab ente. Quoniam non est nugatio dicere ens vnum, ens bonum, ens verum, vt omnes concedunt. ergo aliqua distinctione distinguuntur, non reali, nec ex natura rei: per conclusiones præcedentes, ergo à sufficienti diuisione, distinguuntur ratione, licet significant eandem naturam. Quod confirmatur per Arist. in 4. metaph. tex. 3. vbi inquit. Si igitur ens, & vnum idem & vna natura, eo quod se adinuicem consequuntur, sicut principium & causa, sed non & vna ratione ostensa. Et Cōment. declarans illic dictum Arist. inquit: significant eandem naturam subiecto, & duas definitiones, sicut principium & causa, manifestum est ergo, quod secundum viam Peripateticam distinguuntur ab ente solum secundum rationem, quoniam alio modo concipitur res, vt ens, & vt vna, vel bona &c.

Pro euidencia secundi aduerte, quod quinque transcendentia addunt quinque modos essendi generales, conuenientes cuiuslibet rei, & non sunt expressi per conceptum entis, vnde nota quod modus essendi additus enti est duplex, nam quidam est specialis, qui, scilicet non conuenit omni enti, sed determinato, vt hic modus, qui est esse per se, conuenit soli substantiæ. Et secundum hos modos speciales distinguitur ens in decem prædicamenta. De quibus inquit B. Thom. in 1. metaphysicæ, cap. de substantia, quod distinguuntur per diuersos modos

modos prædicandi, sumptos à diuersis modis essendi, scilicet specialibus, de quibus pertractabimus in quæstionibus metaph. Quidam autem sunt modi essendi generales additi enti consequentes omne ens, & isti constituunt quinque transcendentia. Quorum sufficientia est hæc, omnis talis modus consequitur omne ens vel in se, vel in ordine ad alterum. Si in se, vel affirmatiue, vel negatiue, si negatiue hic modus est indiuisio, quàm addit vnum super ens, est enim vnum & vnũ ens indiuisum, si affirmatiue, hic modus est essentia, quæ constituit rem. Distinguitur enim res ab ente in hoc, quod ens imponitur ab esse. Res autem ab essentia, vel à quiditate, propterea licet ens dicatur, de ente reali, & de ente rationis, non tamen res. nam sola entia realia proprie dicuntur res, quia sola habent essentiam, vel quiditatem. entia vero rationis per apprehensionem, rationis dicuntur entia, non quòd ex se habeant aliquam essentiam, vel quiditatem, si in ordine ad alterum hoc dupliciter.

Primo, secundum diuisionem vnus ab altero, & hic modus constituit ly aliquid, dicitur enim aliquid quasi aliud quid, propter quòd, sicut ens dicitur vnum, quia est indiuisum, sic dicitur aliquid in quantum est diuisum ab alio. Ex quo sequitur, quòd si aliqua duo sint realiter idem, vnũ per respectum ad alterum non potest dici aliquid, vnde hæc est falsa, homo comparatus rationali est aliquid.

Secundo, quantum ad conuenientiam vnus entis cū alio, & hoc non potest esse, nisi sumatur aliqua natura, quæ nata sit conuenire cum omni ente. Id autem est, anima, quoniã est quodam modo omnia, ex 3. de anima. tex. 37. In anima autem est potentia intellectiua, & est appetitiua intellectiua dicta voluntas. Conuenientia autem entis ad intellectũ, quæ dicitur conformitas, vel assimilatio constituit ly verum de quo dicemus in cap. de Vero. Conuenientia vero entis ad appetitum constituit ly bonum, de quo dicemus in cap. de Bono. Ex prædictis igitur patet, quales modos addant transcendentia supra ens.

Pro euidencia tertij, præpono distinctionem, deinde subiungam aliquas conclusiones. Distinctio est hæc: Ordo transcendendum dupliciter assignari potest.

Epit. Iauelli.

x

Primo,

Primo, quantum ad res significatas, & sic nullum habent ordinem adinuicem, nec vnum est prius altero. Quoniam huiusmodi ordo supponit distinctionem realem inter ordinabilia, cum ordo iste sit relatio realis, quæ requirit extrema distincta realiter, ut diximus supra, sed transcendentia, ut dictum est supra, non distinguuntur realiter ab ente, nec à se invicem, ergo quantum ad res significatas, nullum habent ordinem adinuicem.

Secundo, considerantur quantum ad rationes suas formales, ad hunc sensum, cuius transcendentis ratio prius apprehendatur, ab intellectu procedente ordinate à conceptu entis ad alios conceptus, puta an prius ei occurrat conceptus vnius, post conceptum entis, an conceptus veri, an conceptus boni &c. & in hoc sensu ibi quaeritur, quem ordinem habeant inter se.

Praemissas hac distinctione, subiungo aliquas conclusiones decisivas quaeriti.

Prima conclusio, Vnum secundum rationem formalem praecedit omnia alia transcendentia.

Quoniam primum, quod concipitur ab intellectu nostro est ens, ut etiam testatur Avicenna, in primo suæ Metaphys. cap. sexto.

Secundum, est non ens, quia ex opposito cognoscitur oppositum.

Tertium, est diuisio. Cognitio enim quid ens, & quid non ens, statim apprehendimus distinctionem vnius ab altero, cum sint opposita.

Quartum, est indiuisio, quoniam omne ens in seipso indiuisum est, cum enim secundum Arist. in 10. Metaph. tex. 7. dicantur æqualiter ens & vnum, quod non est vnum non est ens, sicut quod non est risibile, non est homo, vnum autem dicit indiuisiōem, ut supra declarauimus, ergo omne ens est in seipso indiuisum. Cum igitur ens vnum dicat ens indiuisum, & in quarto loco apprehendamus in diuisiōem, quæ complet rationem vnius, sequitur quod post ens primum quod concipitur, ex transcendentibus est vnum.

Sed dicet aliquis, in secundo gradu concipitur non ens, & in tertio concipitur diuisio. ergo ante conceptum vnius concipi-

concipitur non ens, & diuisio, ex consequenti primum, quod concipitur post ens, non est ipsum vnum.

Respondeo, id non impedit intentum nostrum, quoniam loquimur de eo quod dicit aliquod positiuum, saltem quoad suum materiale. Constat autem, quod non ens & diuisio, non dicant positiuum, de non ente patet, de diuisione manifestatur ex sua ratione formali, est enim diuisio negatio vnius de altero. Diuisa enim sunt, quorum vnum non est alterum, & sic instantia non valet.

Secunda conclusio, intellectus ordinate concipiens transcendentiā, postquam apprehendit rem, vt vnam, statim apprehendit eam, vt aliquid, & eius conceptum format. nam declaratum est in conclusione præcedenti, quod in quarto gradu apprehendimus ens, vt indiuisum in seipso, ergo consequenter, vt diuisum à quolibet alio. sed in hoc stat ratio ipsius aliquid, vt dictum est supra, ergo post conceptum vnius, immediate sequitur conceptus ipsius aliquid. Quod autem ad apprehensionem entis, vt indiuisi in seipso consequenter succedat apprehensio, vt est diuisum à quolibet alio, patet ex hoc, quod vnumquodque ex propria entitate distinguitur à quolibet alio.

Tertia conclusio, Post conceptum ipsius aliquid statim sequitur conceptus rei. Quoniam dicitur res à sua proprietate, vel essentia, propriam autem quiditatem, vel essentiam vnumquodque habet, in quantum est indiuisum in se, & diuisum à quolibet alio, alioquin sua essentia non esset sibi propria. ergo post conceptum vnius & aliquid, intellectus ordinate procedens immediate format conceptum rei.

Quarta conclusio, Conceptus veri est prior conceptu boni. Quoniam qualis est ordo inter intellectum & voluntatem, talis est inter eorum obiecta, prioris enim & vniuersalioris potentie obiectum prius & vniuersalius est, sed intellectus est prior & vniuersalior voluntate, quoniam non fertur voluntas nisi in præcognitum. Ergo verum quod est obiectum intellectus, prius est in apprehensione quam bonum, quod est obiectum voluntatis.

Præterea, vniuersaliora sunt priora in apprehensione, ex primo physicorum, tex. 3. sed verum in tota sua latitudine

habet esse ex se, penitus independens à quocunque extrinseco, habet esse interminatum, si interminatum & infinitum, quoniam conuertuntur, si esse infinitum, ergo essentiam infinitam. Cum enim apprehendamus esse, vt fluens ab essentia, quantum erit esse secundum perfectionem, tanta erit essentia, vt radix, si habet esse ab alio, ergo est finitum in essentia. Quoniam si habet esse ab alio, est esse productum, si productum ergo terminatū ad aliquem gradum essendi vel ex differentia specifica, si est substantia, vel ex subiecto, si est accidens, Ergo quod habet esse ab alio est finitum in essentia. Sed aduerte, quòd in via Còment. ex 8. phys. còm. 79. hæc diuisio nulla est. Quoniam negat posse dari infinitum in essentia, quod dicitur infinitum in vigore, vnde apud ipsum, primum mouens non est infiniti vigoris, verum quia non sustinetur à B. Thom. nec à Scoto, ideo sua opinio reseruatur reprobanda in q. nostris metaphysicis, & nunc non est præsentis negocii.

Quantum ad tertium declarandum est, quem ordinem habeat, hæc diuisio inter diuisiones entis. Et hic est duplex via famosa, vna apud Thomistas, alia apud Scotistas.

Thomistæ tenent, q. quemcunque ordinem contineat hæc diuisio, non tamen est prior diuisione entis, quæ sit per vnum & multa. Immo sequitur transcendens, quod est bonum, & cum bonum sit posterius vno, vt declaratum est, ponendo ordinem inter rationes formales transcendentium, sequitur hanc diuisionem esse posteriorem illa. Quòd autem hæc diuisio sequatur bonum, probatur sic. Vnūquodque intantum est finitum, vel infinitum in essentia, in quantum habet esse, in quantum est perfectum, quoniam esse rei est prima rei perfectio, cum sit prima actualitas, qua res existit. Intantum autem est perfectum in quantum est bonum, quia vt dicemus in cap. de Bono, ratio boni est ratio perfectiui, ergo vnumquodque intantum est finitum, vel infinitum in essentia, in quantum est bonum. patet ergo, quòd hæc diuisio sequitur bonum.

Scotistæ autem fundantes se super doctrinam Scoti in primo distinct. 8. q. 3. & in quolibet q. 5. tenent hanc diuisionem priorem illa, qua diuiditur ens per vnum & multa, & argui-

tur sic, ens prius diuiditur in ea, quæ sunt enti magis intima, quam in ea quæ sunt potterius enti conuenientia, sed finitas & infinitas in essentia conueniunt enti magis intime, quàm vnitas & multitudo, ergo &c. Maior patet. Minor autem ad mentem Scoti, sic probatur, finitas & infinitas conueniunt enti in esse quiditatio. i. in primo modo per se, dicunt. n. p. perfectionem in essentia rei, perfectio autem in essentia conuenit enti in primo modo per se. Nam quælibet essentia comparata alteri est perfectior, vel imperfectior, sicut humanitas perfectior est equinitate, & sic de alijs essentijs specificis, vnitas autem & multitudo conueniunt enti, in secundo modo per se, quoniam apud metaphysicum sunt passionēs entis, ergo &c.

Ad hoc secundū doctrinam B. Th. negatur minor. ad probationem, quando dicitur, finitas & infinitas conueniunt enti in esse quiditatio, id potest dupliciter intelligi.

Primo, prout abstrahit à quolibet esse actuali, puta sumēdo humanitatem, vt humanitas præcise & abstracte præscindendo à quolibet esse actuali, & sic negamus finitum & infinitum in essentia conuenire enti, quia essentia sic præcise sumpta, nullam perfectionem dicit: cum prima rei perfectio sit esse actuale, & vt sic comparata alteri essentia præcise abesse, non potest dici hæc perfectior, & illa imperfectior, nisi forte fundamentaliter, prout humanitas est apta recipere nobilius esse, equinitas autem vilius.

Secundo, consideratur prout stat sub esse, puta equinitas actu existens, & vt sic conceditur, quodlibet ens absolutum esse finitum, vel infinitum in essentia, & dicit aliquam perfectionem, sed quoniam hæc perfectio fundatur in esse, & ipsum esse est quoddam bonum (cuilibet enim esse suum est appetibile) ideo dicimus, quod finitum & infinitum sequuntur bonum. Et quoniam ens prius diuiditur per vnum & multa, quod per bonum & malum, ideo sustinemus diuisionem entis, per vnum & multa esse priorem diuisione, quæ est per finitum & infinitum. Et hic terminamus considerationem de ente eum omnibus diuisionibus suis.

Et aduerte, quod ex proposito relinquimus diuisionem entis in decem prædicamenta, quoniam illa non conuenit enti reali absolute sumpto, sed enti reali finito in essentia. De

hoc igitur considerabimus in quaestionibus nostris *Meta-*
physicalibus . Sequitur consideratio de Vno .

De Vno .

Cap. I I .

Secundum ordinem assignatum in transcendentibus, post
 considerationem entis sequitur consideratio de Vno ,
 de quo dicemus tria .

Primo , quomodo distinguuntur vnum transcendens , &
 vnum numerale .

Secundo , quid addit vnum numerale super vnum trans-
 cendens .

Tertio, si ratio mensuræ primo conuenit vni .

Quantum ad primum aduerte, q̄ non est immorandum ;
 vt declaretur, vtrum distinguantur, nam opinio *Auicēnz* de
 eorum identitate recitata à *Comment. in 4. Met. comm. 3. &*
sufficienter reprobata à *B. Th. in 4. Metaph. exponēte* tex. 3.
 iam cassata est . Supposito ergo, q̄ distinguantur, inuesti-
 gandum est quomodo .

Ad cuius euidentiam nota, q̄ aliqua possunt esse distincta
 dupliciter .

Primo , sicut duæ res , quarum vna non est alia , nec de ea
 prædicatur, sic *Plato & Sortes* distinguuntur, & quælibet a-
 lia species . Et hoc modo clarum est, q̄ ens transcendens, &
 ens numerale non distinguuntur, quia licet vnum numerale
 non prædicetur de vno transcendente, cum sit eo inferius, ta-
 men vnum transcendens prædicatur de vno numerali, qm̄ de
 quocūque prædicatur ens, prædicatur & vnum transcendēs;
 cum sint conuertibilia, ex 4. *Metaph. tex 3* . Constat autem,
 quòd de eo prædicatur ens, ergo &c .

Secundo, dicuntur aliqua distincta, quia vnum est sicut su-
 perius, & alterum sicut inferius, addens tamen aliquid supra
 rationem superioris . Hoc modo distinguuntur animal, &
 homo, quoniam supra rationem animalis addit rationale,
 & sic distinguuntur vnum transcendens, & vnum numerale,
 quoniam vnum numerale est in genere determinato, id est
 in prædicamento quantitatis, vnum autem transcendens est

super omne genus sicut, & alia transcendentia, & ideo est magis vniuersale, & propterea sicut homo addit aliquid super conceptum animalis, necesse est, ut vnum numerale addat aliquid super vnum transcendens. Quid vero sit illud dicemus in sequentibus.

Quantum ad secundum, declarandum est quid addat vnum transcendens super ens, & quid vnum numerale & per consequens super vnum transcendens.

Respectu primi, dico quod vnum transcendens nihil reale positium addit, declaratum est enim supra, quod transcendentia nullum reale addunt supra ens ergo nec vnum. Declaratum est etiam, quod vnum est addens indiuisiōe super ens. Indiuisio autem non est quid reale positium cum sit priuatio, quæ est negatio. Dicendum est ergo, quod solam indiuisiōem super ens addit, ut patet ex sua ratione formali, quæ est hæc, vnum transcendens est, cui debetur esse indiuisum.

Respectu autem vnus numeralis varia est opinio, licet enim omnes concordent, quod est accidens secundum Auicennam in 3. sue Metaph. cap. 3. & secundum Comment. in 4. Metaph. comment. 1. & clarius in 10. lib. comment. 5. Quid autem sit illud accidens est diuersa opinio. Nam Auicenna in eodem loco videtur sentire, quod sit esse, quod dat quantitatem continuam rei quantæ. Pura si quæretur quare lapis iste est vnus numeraliter, responderetur, quia habet esse quantitatum indiuisum fluens à quantitate continua lapidis, ita quod tandiu lapis est vnus numeraliter, quandiu non est diuisus secundum quantitatem. Si enim quantitas lapidis diuidatur, fiet alterum & alterum esse quantitatum, & sic fient duo lapides, & hanc sententiam videtur sequi B. Thom. in primo sent. distin. 24. vbi recitans mentem Auicennæ, licet improbet ipsum quo ad identitatem vnus numeralis cum vno transcendentem, non tamen quantum ad hoc quod vnitas numeralis ponitur esse quantitatis continuæ.

Quidam autem dicunt, quod addit super ens rationem mensuræ, quoniam prima ratio mensuræ attribuitur vni ex 10. Metaph. tex. 3. Quod quidem quomodo sit verum dicemus infra. Et hanc opinionem videtur tenere B. Thom. in 4. Metaphys.

taphys. exponens textum tertium, vbi arguens contra Aui-
cennam inquit, vnum quod est principium numeri addit su-
per substantiam rationem mensuræ, quæ est propria passio
quantitatis, quæ primo inuenitur in vnitate, & dicitur per
priuationem & negationem diuisionis, quæ est secundum
quantitatem continuam.

Sed dicet aliquis, si secundum B. Thom. vnum numerale
dicit esse indiuisum quantitatis continuæ, ergo non dicit rō-
nem mensuræ, qm̄ vnus est tantum vna ratio quiditatiua.

Respondeo, non est inconueniens, qd̄ dicat vnum tanquā
essentiale prædicatum, sicut homo dicit formaliter rationa-
le, & alterum tanquam proprietatem suam, sicut homo dicit
risibile, eodem modo vnum numerale dicit esse indiuisum
quantitatis continuæ, vt prædicatum essentiale. Dicit autem
rationem mensuræ, vt proprietatem suam, quæ fuit à prædi-
cato essentiali, ex hoc enim quod dicit esse indiuisum, sequi-
tur ratio mensuræ ex 10. Metaphys. tex. 3. vbi manifestatur
quamlibet mensuram esse indiuisibilem aut à natura, aut à
proposito.

Quidam autem, sicut placuit Paulo Soncinati in 10. Me-
taph. q. 3. dicunt vnum numerale esse accidens, & quod il-
lud accidens est quantitas continua rei quantæ, puta vnitas
huius lapidis est quantitas continua eius, & probat propo-
situm dupliciter.

Primo, Res ex sua quantitate continua, est indiuisa in se
& diuisa à quolibet alio, ergo quantitas continua est vnitas
rei quantæ, consequentia patet à diffinitione ad diffinitum,
antecedens autem sic probatur. Diuisibilitas primo conue-
nit quantitati continuæ, vt alias probatum est, ergo per quā
tatem continuam res est indiuisa in se, & diuisa à quoli-
bet alio.

Secundo, per solam quantitatem continuam res illa fa-
cit numerum cum alia, posito enim lapide A, cum sua quan-
titate continua, similiter posito B, omni alio circumscrip-
to constituunt binarium, ergo vterque est vnus sua quantitate
continua, patet ergo vnitatem numeralem esse quantitatem
continuum.

Sed contra hanc opinionem sic arguitur, diuisibile non
habet

habet rationem vnitatis, ex diffinitione vnitatis, quæ dicit in diuisionem ex 10. Metaph. tex. 3. sed quantitas continua est diuisibilis etiam in infinitum, ex 3. phys. tex. 34. ergo quantitas continua, non habet rationem vnitatis.

Sed forte dices, quantitas cōtinua dupliciter cōsideratur.

Primo, vt habet partem extra partem, & sic non habet rationem vnitatis, quia ut sic est diuisibilis, sicut etiam argumentum probat.

Secundo, in quantum est indiuisa in se, & diuisa à quolibet alio, & vt sic habet rationem vnitatis.

Contra, & probo q̄ etiam secundo modo accepta non habet rationem vnitatis, quod enim conuenit alicui ex sua ratione formali, & in suo esse quiditativo, quocunque modo consideratur, semper conuenit ei, quoniam prædicata quiditativa sunt inseparabilia, sed esse diuisibile, & habere partē, extra partem conuenit quantitati continuæ, ex sua ratione formali & quiditativæ, ut patet in 6. phys. tex. 3 vbi Philosophus diffiniens continuum inquit. Continuum est diuisibile in semper diuisibilia & nullum continuorum diuisibile in impartibilia: patet ergo, quòd quantitas continua etiam considerata, vt indiuisa in se, & diuisa à quolibet alio, non habet rationem vnitatis.

Ad primum igitur argumentum, negatur antecedens, & probatio nihil valet, immo magis sequitur oppositum. Nā ex hoc q̄ diuisibilitas conuenit quantitati continuæ, primo sequitur, q̄ indiuisibilitas constituens vnitatem; non primo conuenit eidem, cum sint opposita.

Ad secundum negatur similiter antecedens, & sua probatio nihil valet, nam secluso esse indiuiso dato rei quantæ à sua quantitate continua duo lapides non constituunt binarium, quia neuter eorum erit vnus.

Tenendum est ergo, quod vnum numerale addit super ens esse in diuisum fluens à quantitate continua, ad quod sequitur ratio mensuræ.

Quantum ad tertium agenda sunt duo.

Primo, videbitur, quæ sit ratio mensuræ.

Secundo, proponetur conclusio ad principale propositum, & probabitur.

Ad

Aduerte igitur, quod ratio mensuræ est hæc. Mensura est id quod ducit in cognitionem quantitatis rei quantæ, unde inquit Arist. in 10. Metaph. tex. 2. Mensura est id per quod cognoscitur rei quantitas, ubi & Comment. inquit. Ratio mensuræ est ducere in cognitionem mensurati.

Sed aduerte duplicem rei quantitatem .s. dimensionem, & virtualem, quæ idem est quod rei perfectio & bonitas. Quod cumque ergo ducit nos in cognitionem quantitatis dimensionem, dicitur mensura dimensionalis. Sicut per cubitum cognoscimus quantitatem ligni. Illud vero per quod cognoscimus quantitatem virtualem, dicitur mensura virtualis, & hoc secundum Philosophum in 10. Metaph. tex. 2. est illud quod est simplicissimum, & primum, & perfectissimum in quolibet genere, unde & albedo dicitur mensura omnium colorum, quoniam per ipsam cognoscimus quanta perfectio sit in alijs coloribus, quanto enim magis propinquant ei, tanto perfectiores sunt, & quanto magis distant, tanto imperfectiores, & in genere substantiarum, prima substantia separata est mensura omnis substantiæ, cum enim illa sit prima & perfectissima in tali genere, tanto aliæ substantiæ sunt perfectiores, quanto magis illi propinquant.

Declarata ratione mensuræ, ponitur conclusio ad principale propositum. Ratio mensuræ prius reperitur in unitate, quam in omnibus alijs. Ad cuius probationem suppono quod de ratione mensuræ est indiuisibilitas secundum Arist. in 10. Met. tex. 3, ubi inquit. In omnibus autem his metrum & principium aliquid, & indiuisibile, quoniam & in lineis utimur, quasi indiuisibili pedali &c. Et illic declarat Arist. quod necessario mensura est aliquod indiuisibile, aut simpliciter, aut humano decreto, ita quod nec ei fiat additio, nec diminutio. Si enim quid diuisibile & variabile esset, non certificaret quantitatem mensurati. Hoc supposito arguo sic. Unitati primo conuenit indiuisibilitas, ex definitione sua, unde inquit Arist. in 10. Metaph. tex. 2. vni esse indiuisibile est esse, ergo unitati primo conuenit ratio mensuræ, consequentia patet ex supposito, nam bene sequitur, si indiuisibilitas est de ratione mensuræ, ergo cui primo competit ratio indiuisibilitatis, eidem primo competit ratio mensuræ.

Præter

Præterea, omnem quantiratem continuam mensuramus numero per replicationem, vel vnitate, si non replicatur mē-
sura. Numerum autem mensuramus vnitate, cum sit mul-
titudine constituta ex vnitatibus, vnitatem vero per nullum
prius mensuramus, ergo est primum mēsurans, & hullo mo-
do mensuratum. Patet igitur, q̄ ratio mensuræ primo con-
uenit vni. Hæc de Vno dicta sint.

De Aliquid.

Cap. I I I.

Nunc agendum est de Aliquid iuxta ordinem transcē-
dentium assignatum supra. Aduerte igitur, quòd
cognitio de Aliquid pendet ex cognitione Vnius.
Dictum est enim in sufficientia transcendentium, quòd ly
aliquid significat distinctionem vnius entis ab alio, propter
quod nota, quòd de ratione vnius non est nisi esse indiuisum
in seipso, quòd autem sit diuisum ab alio, accidit, quoniam
accidit aliud esse, vnde dato, quòd solus Deus esset, adhuc es-
set vnus, quia omnino indiuisus in se: non tamen propriè
esset aliquid, quia non esset distinctus ab alio, si nihil aliud
esset. Nisi forte diceretur aliquid quia ex natura sua es-
set aptus distingui ab alio si daretur, vnde diceretur aliquid
fundamentaliter, & non formaliter. Hæc de Aliquid di-
cta sint.

De Re.

Cap. I I I I.

Circa hoc transcēdens quod est Res, iam patet ex suf-
ficientia transcendentium supra assignata, quòd dis-
tinguitur ab ente propter hoc, quòd ens sumitur ab
esse, Res autem ab essentia, & quoniam entia rationis, vt di-
ctum est supra, non habent essentiam. ideo comperit solis
entibus realibus. Inuestigandum est ergo qualiter se ha-
beat essentia, à qua sumitur res, ad esse à quo sumitur ens.
Et queritur vtrum distinguantur realiter, vel sint idem re,
sed distincta tantum ratione, & circa hoc sic proceden-
dum est.

Primo, proponentur aliquę opiniones, & improbabūtur.

Secun

Secundo, proponetur via B. Th. & defensabitur.

Prima opinio, est Henrici de Gandauo in primo quolib. q. 8. hic tenet eandem rem penitus esse essentiam & esse, sed per duplicem respectum, quem potest habere cōparata primæ causæ denominatur essentia & esse, nam imaginatur quòd res antequam producatu est ab æterno in intellectu primæ causæ, sicut exemplatum in exemplari, & ideatum in idea, & sic considerata dicit respectum exemplari ad exemplar, dato etiam casu quòd non produceretur, & ut sic dicitur essentia, puta res quæ est homo, vt est in intellectu primæ causæ, vt ideata, dicitur essentia hominis. Si autem consideratur comparata ad primam causam, sicut effectus ad causam productiuam, prout in actu producit, sic vocatur esse, vnde res quæ est homo actu productus dicitur esse per talem respectum, sicut per primum respectum dicitur essentia.

Sed contra hanc opinionem dupliciter arguitur.

Primo, nulla relatio est de formali ratione entis absoluti: dicitur enim absolutum ad se, & non ad alterum, sed essentia puta hominis & lapidis est ens absolutum, vt patet, ergo per relationem res non potest dici essentia, cum essentia sit signficatum distinctionis, vt dicemus infra.

Præterea, nulla relatio est inclusa in ratione sui fundamenti, quoniam fundamentum est prius relatione fundata, essentia est fundamentum huius relationis, quæ est inter rem exemplatam, & primam causam vt exemplar. nam essentia est id, quod est producibile per diuinum exemplar. ergo in sua ratione formali non includitur respectus, cum sit respectus posterior fundamento.

Secunda opinio, est Scoti in 3. sentent. dist. 6. & consistit in duobus.

Primo, quòd sunt idem realiter, & sic probat. Duo abinui cem inseparabilia sunt idem realiter. Hoc est velut principiū in doctrina sua: sed esse non separatur ab essentia. Tunc. n. existeret essentia sine esse, quod est impossibile & implicans contradictionem: ergo sunt idem realiter.

Secundo, q̄ distinguuntur ex natura rei, & probat sic.
De quibuscunq̄ prædicantur & verificantur prædicata cō-
tradi-

tradictoria, distinguuntur ex natura rei, hæc patet secundum ipsum ex diffinitione distinctionis ex natura rei, sed de esse & essentia verificantur prædicata contradictoria, nam hæc duo sunt vera, esse accidit essentia, non accidit essentia, similiter hæc duo. Essentia potest esse in potentia obiectiua, esse non potest esse in potentia obiectiua, ergo esse & essentia distinguuntur ex natura rei.

Sed istæ rationes in via nostra nihil concludunt Et ad primam negatur maior, quoniam non est vniuersaliter vera, nam materia & forma distinguuntur realiter, & tamen materia non potest separari à forma, saltem in esse formali. vt pro nunc dimittamus esse obiectiuum, & secundum viam nostram distinguuntur potentia animæ ab anima realiter, & proprietas à subiecto, & tamen sunt inseparabiles, ergo maior sua non est vera vniuersaliter.

Ad secundam negatur maior, quoniam ad verificandum de eodem prædicata contradictoria, sufficit distinctio rationis sumpta ex parte rei, & non solum ex parte intellectus ratiocinantis vnde de puncto signato in medio lineæ, verum est dicere, punctus est principium & non est principium, scilicet partis præcedentis. Et tamen idem punctus, vt principium distinguitur solum ratione à seipso, prout non est principium, & sic patet quòd maior in via nostra non concludit, licet apud Scotistas teneatur vt maxima.

Tertia opinio, quam intendimus sustentare est B. Th. in secundo contra Gentes. cap. 52. Ad cuius euidentiam agemus tria.

Primo, quid sit essentia & esse.

Secundo, in quo genere sint.

Tertio, ponam duas conclusiones responsiuas proposito.

Quantum ad primum aduerte, quòd essentia dicit significatum diffinitionis sumptum in concreto, vt significatum huius diffinitionis, animal rationale est essentia hominis, quæ apud Philosophum in 7. metaph. dicitur quodquid est, vnde id quod est res, est essentia rei. Dico autem in concreto, quia aliquando sumitur essentia in abstracto dicendo, humanitas, equinitas &c. Sed in hoc sensu, non sumus locu-

ruri hic . non enim esse competit rei in abstracto, sed in concreto, quoniam abstracta habent rationem quo, & nō quod est . Esse autem dicit primam actualitatem impressam cui-libet enti creato à prima causa, qua formaliter existit, cum ex se & sibi derelictum quocunque alio circumscripto existere non possit, primo dicitur primam actualitatem, quoniam est primum quo res est actu, & supponitur vt fundamentum primum cui-libet alteri prædicato perfectiuo . Non enim potest res habere esse per se neque corporeum, neque viuū: nisi supposito esse . merito ergo dicit primam actualitatem, quoniam est primum actuans formaliter . Dicitur secundo, cum ex se existere non possit . Omne enim ab alio dependens, non habet esse ex seipso, quia tunc non dependeret ab alio . ergo indiget aliquo: quo possit existere, & id est esse, vnde sequitur corollarie . Primam causam solam posse existere ex seipsa, quoniam cum sit omnino independēs, non indiget aliquo influente sibi esse . Reliquæ partes dictæ descriptionis manifestæ sunt, patet igitur quid sit essentia, & quid sit esse .

Quantum ad secundum dico, quòd esse est in eodem genere reductiue, in quo est sua essentia . Quod probò dupliciter .

Primo, actus & potentia sunt in eodem genere, ex 9. metaph. tex. 12. sed esse comparatur ad essentiam, sicut actus ad potentiā . Est enim essentia susceptiua esse, & esse est actuans essentiam, cum ex supradictis sit prima actualitas . ergo sunt in eodem genere,

Præterea sumo esse substantiæ, puta hominis, & quæro aut est substantia, aut accidens, si est substantia, habeo intentum, si est accidens, contra . Accidens est posterius substantia ex 7. Metaph. tex. 4. ergo substantia haberet esse per ali quod posterius ipsa, & cum non sit susceptiua accidentis, nisi prius actu existat, ergo prius existeret quàm reciperet esse, quod secundum te est accidens, quod patet esse absurdum . Necessè est ergo dicere esse substantiæ, esse in genere substantiæ, & esse accidentis in genere accidentis, & esse quantitatis in genere quantitatis, & esse qualitatis in genere qualitatis &c.

Quantum

Quantum ad tertium, vt pateat propositum in via Thomistica, pono duas conclusiones.

Prima conclusio: In quolibet ente citra primum, distinguuntur realiter esse & essentia sumpta in concreto, puta esse hominis, & id, quod est homo, probatur dupliciter.

Primo sic, suppono quòd essentia in concreto in nullo recipitur, cum sit id, quod est, & sit ens per se, tunc arguo sic. Si esse hominis est idem quòd homo, ergo sicut homo non recipitur in alio, sic nec esse hominis, tunc ultra. Si esse non recipitur in alio, ergo est esse illimitatum, quoniam omne limitatum & contractum, ideo limitatur & contrahitur, quia recipitur ab alio, sicut accidens in subiecto, vel forma in materia, vel limitatur per aliquam differentiam contrahentem, sicut animal limitatur ad hominem per rationale. sed secundum te esse non recipitur in aliquo, cum sit idem per te cum essentia, quæ non recipitur in aliquo, nec habet differentiam contrahentem. Est enim eadem ratio ens & esse habere differentias, cum sumatur ens ab esse, sed ens non habet differentias contrahentes, ex 3. Metaph. tex. 10. ergo esse remanet illimitatum. Si illimitatum ergo infinitum, si infinitum, ergo dabuntur plura esse infinita. scilicet esse primi & esse rei productæ, quod cum sit manifeste falsum, vt etiam probabitur in 12. Metaph. sequitur quod non sunt idem esse & essentia rei productæ.

Secundo sic, esse habet causam productiuam, quoniam est effectus agentis, quod dat esse suo productiuo. Essentia autem non habet causam productiuam, ergo non sunt idem realiter. consequentia patet. Secunda pars antecedentis multipliciter probatur, nam si habet causam productiuam: ergo prædicata quiditatiua & essentialia habent causam productiuam, sed hæc prædicata conueniunt rei absque omni causa productiuâ. Remota enim omni causalitate productiuâ respectu rosæ, quæro an hæc sit vera. Rosa est substantia corporea, si sic, habeo intentum, si non, ergo de rosa absolute sumpta: non potest haberi scientia, sed tantum de rosa vt existit, quod tamen est falsum, quoniam ex primo Poster. Scientia est de incorruptibilibus, & necessarijs. Rosa autem vt existit, corruptibilis & contingens est, vt ergo de ro-
sa

sa habeatur scientia necesse est hanc esse sempiternæ veritatis, Rosa est substantia corporea, etiam remota omni causalitate productiua.

Præterea, si prædicata quiditatiua non conueniunt subiecto, seclufa omni causa effectiua, ergo diffinitio non semper conueniret suo diffinito, quod est absurdum. Præterea huius propositionis, homo est homo, nulla est causa. ergo nec huius, homo est animal rationale, & hæc est sententia Arist. in 7. Metaph. tex. 59. vbi tenet q̄ huius propositionis, homo est homo, nulla est causa, nisi forte, vt inquit illic Commēt. aliquis dicat, quoniam quodlibet eorum est vnum per se, & vnum diuiditur in prædicatum & subiectum. Et intendit Comment. quòd non potest assignari alia causa, nisi identitatis prædicati cum subiecto. manifestum est ergo, quòd si prædicata quiditatiua non habent causam effectiuam, nec essentia sumpta in concreto includens huiusmodi prædicata, habet causam effectiuam. Ex his ergo patet, q̄ essentia & esse in quolibet creato distinguuntur realiter. & huic sententiæ videtur assentire Arist. in secundo post. vbi tenet quòd quid est hominis & esse hominis non sunt idem. Et secundum doctrinam Auicē. esse in omnibus excepta prima causa omnibus accidit, essentia autem nulli accidit. ergo non sunt idem.

Secunda conclusio, esse rei creatæ, est effectiue ab agente, formaliter autem à forma, prima pars probatur sic, ex supra dictis esse habet causam productiuam. ergo est effectiue ab agente siue producente, vel à forma, non à forma, quia omnis causa efficiens prior est suo effectū, ex 12. Metaph. tex. 16. sed forma non est prior suo esse, tunc enim prius esset, ergo &c. Præterea ex 2. Phys. forma & efficiens non coincidunt in idem numero, ergo forma non dat esse effectiue. Secunda autem pars probatur ex diffinitione formæ, nam forma est quæ dat esse rei, non effectiue, vt probatum est, ergo formaliter, præterea, proprium est formæ ex seipsa constitue re suppositum, ergo dare sibi esse formaliter. Hæc de Re vt est transcendens dicta sint.

Sed dicet aliquis, si esse & essentia in quolibet creato distinguuntur realiter, ergo ens quod sumitur ab esse, & res

quæ sumitur ab essentia, distinguuntur realiter, quod est contra determinata supra, ubi probatum est transcendentia non distinguui realiter ab ente.

Ad hoc respondeo dupliciter.

Primo, potest negari hæc consequentia. Concesso quod ens & res in creatis distinguantur realiter, quantum ad id, a quo nomen imponitur. ergo transcendentem sumpta distinguuntur realiter, nam in latitudine entis & rei, inuenitur gradus. id est ens diuinum, in quo non distinguuntur realiter esse & essentia.

Secundo dico, quod licet ens imponatur ab esse, siue ab actu essendi, & res ab essentia siue à quiditate, tamen utrunque quantum ad id cui nomen imponitur significat, id quod est. ex consequenti tam ens nominaliter sumptum, quam res, idem significant, diuersa tamen ratione sumpta à diuersis à quibus nomen imponitur, quæ sunt esse & essentia.

De Veris.

Cap. V.

Circa transcendens Verum duo consideranda sunt.

Primo quid sit verum, vel veritas formaliter.

Secundo, quia dictum est supra in assignando sufficientiam transcendentium, quod verum est addens respectum supra ens, declarandum est si huiusmodi respectus est realis, vel rationis.

Quantum ad primum, aduerte duas famosas opiniones, scilicet Heruei, & B. Thom. & volo utranque petraâre, quoniam utraque in sensu ab eis intento sustineri potest. Aduerte igitur opinionem Heruei in 3. quolibet q. prima consistere in tribus conclusionibus.

Prima conclusio, Entitas rei, ut habet esse extra intellectum, non est veritas formaliter, & probatur. Si entitas rei, ut sic, est veritas formaliter, ergo veritas non est formaliter in intellectu. Quod est contra Philosophum in lib. 6. Metaph. tex. 8. Inquit enim, non enim verum & falsum in rebus, sed in mente. Præterea si entitas, ut sic est veritas formaliter, ergo hic terminus homo, significat verum formaliter, quoniam significat hominis entitatem ad extra, sed hoc est contra Philosophum, primo Peri her. qui tenet nullum incomple-

xum

xum dicere verum vel falsum, ergo &c.

Secunda conclusio, Nulla propositio inquantum propositio, nec in mente, nec in voce, nec in scripto est formaliter veritas, sed est tantum repræsentatiue vera vel falsa, probatur. Quod significat verum vel falsum est repræsentatiuum veri vel falsi, sed omnis propositio, ex primo per her. significat verum vel falsum ergo &c. Præterea quod significat verum vel falsum non ex seipso, sed inquantum aliud ponitur vel remouetur, est repræsentatiuum veri vel falsi. Talis est propositio, significat enim vel falsum, ex eo quod res ponitur sic esse, vel non sic esse, sicut est vel non est, unde & Philosophus in prædicamentis dixit, Ab eo quod res est vel non est, oratio est vera vel falsa.

Tertia conclusio, veritas formaliter est conformitas rei, quæ est ad extra ad seipsam, ut est in intellectu enūciatiuo secundum esse cognitum. hanc quidem conclusionem prius declaro deinde probabitur.

Aduerte igitur, quod entitas siue natura rei dupliciter considerari potest.

Primo, ut habet esse extra intellectum in suis singularibus.

Secundo, ut apprehenditur ab intellectu, vel intellectui obijcitur per speciem intelligibilem. quando igitur, intellectus per speciem intelligibilem repræsentantem prædicata naturæ obiectæ, inuestigat aliquod eius prædicatum formans conceptum de natura illa, & enunciat talem conceptum vel prædicatum de re dicendo, cælum est corpus incorruptibile, homo est animal, inter rem ad extra & ipsammet, ut est sic apprehensa, vel concepta ab intellectu conlurgit quædam conformitas, quæ repræsentatur per hanc copulam, est, opposita autem modo consurgit difformitas, si aliter apprehendatur vel concipiatur, quam sit conueniens rei. Hanc igitur conformitatem Herueus vocat veritatem formaliter, difformitatem vero falsitatem. Quæ quidem sunt respectus non reales, sed rationis consequentes operationem intellectus. Nam remoto omni intellectu, res non conciperetur conformiter, nec difformiter, ex consequenti tales respectus non consurgerent. Præterea, eiusdem ad seipsum est respectus rationis, cum non sint extrema realia realiter distincta, cum

igitur hic respectus sit eiusdē rei, vt habet esse ad extra, ad se ipsam, vt est apprehensa ab intellectu erit respectus rationis.

Posita declaratione, sic probo conclusionem.

Quod distinguitur contra ens reale est ens rationis, quia non datur medium inter ens reale, & ens rationis, sed verū distinguitur contra ens reale, ex 6. Metaph. tex. 8. ergo veritas siue verum est ens rationis. tunc ultra. Omne ens rationis est respectus vel negatio, vt potest elici ex primo cap. huius tract. vbi consideratum est de ente reali, & ente rationis. Constat autem veritatem non esse negationem. ergo est respectus, & ab omnibus communiter conceditur, quod est cōformitas, siue adæquatio, siue conuenientia, iuxta famosam diffinitionem qua dicitur, Veritas est adæquatio rei & intellectus, ergo veritas est conformitas, quæ est relatio rationis inter rem, vt habet esse ad extra, & ipsammet, vt habet esse cognitum in intellectu enunciante.

Sed aduerte, q̄ Herueus non loquitur de veritate vniuersaliter, sed solum de veritate complexa, quæ significatur per propositionem, de qua sola pertractat Philosophus in primo per her. & in 6. Metaph. tex. 8. Nunc autem quia consideramus de vero, vt est transcendens, conueniens est, vt per scrutemur de omnibus modis veritatis. Quod & agemus pertractantes opinionem B. Thom.

Secunda opinio est B. Thom. præcipue in prima parte q. 16. pro cuius resolutione dico duo principaliter.

Primo, quōt sint de ratione veritatis.

Secundo, quid sit veritas tam in re, quàm in intellectu.

Quantum ad primum aduerte, vt elicitur ex doctrina B. Thom. præcipue in q. de veritate, q. prima art. 8. quod duo includuntur in ratione formali veritatis, scilicet absolutum & respectus, quod, quidem absolutum, aliquando est natura rei intelligibilis, aliquando est species intelligibilis, aliquando est conceptus formatus vt plenius dicemus infra. & respectus aliquando est rei ad intellectum, aliquando est intellectus ad rem, qui aliquando est realis, aliquando est rationis, vt declarabitur infra. Iterum aduerte, quod absolutum inclusum in ratione veritatis, est veritas fundamentaliter, sed non formaliter, fundatur enim veritas in entitate

tate rei. Respectus autem inclusus dicitur veritas formaliter, & quoniam vnumquodque solet diffiniri per suum formale, inde est, quod solet allegari hæc diffinitio, vt famosissima, Veritas est adæquatio rei & intellectus, pro eodem autem sumuntur, æquatio, conformitas, & similitudo. verum ut habeatur plena notitia diffiniemus ipsam per absolutum, & respectum, & vt est in re, & vt est in intellectu.

Tu igitur aduerte, qd veritas in re sic diffinienda est, Veritas est entitas rei, vt conformis intellectui, siue speculatiuo siue pratico. dico autē speculatiuo siue pratico, quia alio modo conformatur entitas rei intellectui pratico, & aliter speculatiuo. Nam conformatur pratico, vt causæ suæ productiue, vnde dicitur verus gladius, quia conformatur ideæ gladij existenti in intellectu artificis, quæ est causa producendi gladium ad extra. e contra dicitur falsus gladius quia difformis est eidem ideæ, & in naturalibus dicitur verus lapis, verum aurum, quia conformantur ideis existentibus in mente primæ causæ agentis ad instar artificis. Conformatur autem intellectui speculatiuo, quia ab eo cognoscitur sicut est, & difformatur, quando aliter cognoscitur quam sit. Hęc autem conformitas vel difformitas fit mediante specie representatiua, & conceptu incomplexo vel complexo, de entitate rei formatis ab intellectu, quibus res ad extra apprehensa per intellectum habet correspondere. Et idcirco, si vis recte diffinire veritatem in artificiatu vel in naturalibus respectu intellectus practici, sic diffinies, Veritas artificiatu est conformitas eius ad ideam à qua pendet. Veritas rei naturalis est conformitas eius ad ideam primi agentis à qua pendet, falsitas autem diffinienda est per difformitatem. si vero diffinire eam volueris respectu intellectus speculatiui, sic diffinies, Veritas in re, est entitas rei, vt conformatur speciei intelligibili tanquam suo representatiuo, vel cōceptui incomplexo aut complexo, qui per actum intellectus, de re prædicantur, sicut est vel non est, vt cum prædicatur vera diffinitio de diffinito.

Facta consideratione de veritate, vt est in re, si vis eam diffinire, vt est in intellectu, distingues vt supra de intellectu

speculatiuo & practico, si respectu practici, dicit duo scilicet ideam, & correspondentiam siue conformitatem ad ideatū, quoniam exemplar & exemplatum debent correspondere, & sic diffinit eam, Veritas in intellectu practico est idea ut causa productiua, conformis ideato ut proprio effectui. Si respectu intellectus speculatiui, dicit duo, scilicet absolutū quod erit aut species intelligibilis, aut conceptus incomplexus. puta animal rationale, aut conceptus complexus, ut hominem esse animal rationale, & dicit respectum conformitatis huiusmodi speciei vel conceptus ad rem cognoscibilem, & tunc sic diffinit eam, Veritas in intellectu speculatiuo est species intelligibilis, vel conceptus incomplexus aut complexus, ut conformes & adæquati rei adextra, secundū quod per intellectum apprehenditur. Ex his ergo patet quid sit veritas secundū doctrinam B. Th. tam in re quā in intellectu, siue practico siue speculatiuo.

Quantum ad secundum principale propositum in principio huius capituli, scilicet an respectus inclusus in ratione veritatis sit realis vel rationis, aduerte, quod aliter dicendū est ad mentem Heruei, & aliter ad mentem B. Th. Nam secundū Herueum, ut declaratum est supra in tertia conclusionem suā, semper est respectus rationis, quoniam sequitur apprehensionem rei ab intellectu in comparatione rei adextra, ad seipsam, ut est apprehensa.

Secundū doctrinam vero B. Th. ab utroque abstrahit, quoniam aliquando est realis, aliquando est rationis. ad cuius euidētiam aduerte, quod res alio modo comparatur ad intellectum diuinum, alio modo ad intellectum creatum.

Quantum ad intellectum diuinum, vel comparatur essentia suā ad ipsum, quam mere speculatiue intelligit, vel comparatur creata, quā practice intelligit. Si respectu essentiarum, sic dico quod respectus ille est mere rationis ex parte utriusque, quoniam intellectus diuinus & essentia suā, cum non habeant adinuicem oppositionem relatiuā, non distinguuntur realiter, sed relatio realis, ut diximus supra in secunda diuisione entis realis, requirit extrema realia & distincta realiter, erit ergo inter diuinā essentiam intellectā, & diuinum intellectum intelligentem talis respectus, qualis est eiusdem

eiusdem ad seipsum. Si respectu creaturæ, dico quòd ex parte diuini intellectus, tam practico quàm speculatiuo, est relatio rationis, quoniam diuina intellectio non pendet à creatura, omnia enim intelligit in essentia sua.

Et propterea, vt diximus in secunda diuisione entis realis, Deus vt causa creaturæ per intellectum, non est eiusdem ordinis cum creatura, vt illic declaratum est, ergo inter intellectum diuinum practicum & creaturam, ex parte diuini intellectus non est relatio nisi rationis, ex parte vero creaturæ, dico quòd toto tempore quo existit, talis respectus ad diuinum intellectum practicum est realis. Est enim sicut respectus effectus ad causam productiuam, qui est realis ex 5. metaph. cap. ad aliquid, pro illo vero tempore quo creatura non existit, est respectus rationis, est enim sicut respectus non entis ad ens, qui non potest esse realis, quoniam relatio realis requirit extrema realia, & realiter existentia, si debet esse relatio realis & actualis.

Quantum ad intellectum creatum, distinguendum est, ut supra, de speculatiuo vel practico. De intellectu speculatiuo dico, quòd aliquando est inter intellectum & rem intellectam relatio realis mutua, aliquando realis non mutua, aliquando rationis tantum, nam res intellecta tripliciter potest ad intellectum comparari.

Primo, vt existens actu & mouens intellectum ad sui intellectionem, & sic inter ea est talis relatio, qualis est inter mouens & motum. Constat autem in 5. metaph. cap. ad aliquid illam esse relationem mutuam realem; nam mouens est agens, & motum patiens, sed apud Aristot. ibidem vniuersaliter inter agens & patiens est relatio realis secundi modi, quæ est mutua.

Secundo, comparatur res intellecta ad intellectum speculatiuum sicut mensura ad mensuratum, pendet enim scientia nostra speculatiua ab obiecto, sicut mensuratum à mensura, sed ex 5. metaph. cap. ad aliquid, inter mensuram & mensuratum datur relatio realis, ex parte mensurati, quoniam pendet a mensura, sed non ex parte mensuræ, quoniam est independens à mensurato, & huiusmodi relatio est tertio modo relatiuorum, vt patet ibidem.

Tertio, comparatur res intellecta ad intellectum, eo tempore quo non existit, & tamen de ea intellectus enunciat aliquid sibi competens ex rei natura, ut dum hyemali tempore enunciat de rosa esse florem odoriferum, & tunc ly esse dicit respectum conformitatis inter prædicatum & subiectum, quem constat esse respectum rationis, quoniam consurgit ex apprehensione intellectus, & quoniam obiectum non existens non potest fundare respectum realem, diximus enim supra in secunda diuisione entis, quod relatio realis requirit extrema realia existencia actu.

De intellectu autem practico, in quantum per habitum scientiæ practicæ est causa productiua rei, sicut artifex per scientiam vel artem est causa sui artificii, dico, quod semper est realis mutua, sed aliquando potentialis, aliquando actualis, nam obiectum scientiæ practicæ, vel est actu productum vel producibile, si primo modo, sic inter ipsum & intellectum practicum est talis relatio, qualis est inter causam & effectum, quam constat esse realem mutuam, ex 5. Metaph. cap. ad aliquid, si secundo modo, sic non erit realis actualis mutua, quoniam extremum alterum non est actu, erit autem talis relatio, qualis ponitur inter calefactuum & calefactibile & generatum & generabile, quam possumus appellare mutuam potentialem, quoniam & si alterum extremum non sit actu, est tamen in potentia passiuum. Ex omnibus ergo dictis patet, quod secundum viam Thomisticam respectus conformitatis inclusus in ratione veritatis aliquando est realis mutuus, aliquando realis non mutuus, aliquando est rationis tantum, & ideo ab omnibus abstrahit.

Repugnantia vero, quæ videtur esse inter Herueum qui tenet, huiusmodi respectum esse tantum ens rationis, & B. Thom. tenentem esse aliquando realem, aliquando rationis, sic concordari potest. Loquitur enim B. Thom. de omnibus modis quibus sumitur veritas siue in re, siue in intellectu diffiniendo, enunciante, practico, speculatiuo, diuino, & creato. Herueus autem loquitur solum de veritate, ut est in intellectu enunciatiuo. Loquendo ergo de hoc, non negaret B. Thom. quin huiusmodi respectus conformitatis sit ens rationis, ut diuiditur contra ens reale, quod dicitur ens ex-

tra animam . Dicit enim talis respectus ordinem prædicari ad subiectum, qui ordo confurgit ex apprehensione intellectus comparantis id quod intellexit de re ad rem ipsam, intellexit enim animal rationale de homine, & aduertit id cōuenire sibi, & hanc conuenientiam, siue adæquationem explicat per enunciationem dicens, homo est animal rationale . Et quidem quòd B. Thom. sic sentiat patet in 6. Metaph. in expositione rex. 8. vbi inquit, Ex quo patet, quòd talis cōpositio est solum in intellectu, non in rebus . Et ideo illud quod est ita ens, sicut in tali comparatione consistens, est alterum ab his, quæ proprie sunt entia, quæ sunt res extra animam, quarum vnaquæque est, aut substantia, aut quale, aut quantum &c. Patet ergo inter Herueum & B. Thom. nullam esse repugnantiam, sumendo præcise veritatem, vt est in intellectu enunciativo . Hæc de Vero dicta sint .

De Bono.

Cap. V I.

Circa Transcendens Bonum considerabimus tria .
 Primo, quot sint de ratione eius, vt bonum est .
 Secundo, duplicem eius diuisionem .

Tertio, quia determinabitur bonum includere respectū, declarandum est quomodo est nomen respectiuum . Reliquas eius condiciones, quomodo habeat rationem finis, & primi causantis, & felicitantis, dimittimus pro nunc, quas tamen considerabimus in Theologia. Nunc autem non egrediemur limites metaphysicales, secundum quos præsentem tractatum disponimus .

Quātum ad primum aduerte, q̃ duo sunt de ratione Boni, vnum vt materiale, alterum vt formale, materiale quidē est esse rei, quod est primum fundamentum bonitatis . nam bonum vt bonum habet rationem perfecti, est enim natura boni, perficere id cuius est bonum, vnumquodque autem in tantum est perfectum, inquantum est actū, inquantum est actū inquantum habet esse, quoniam esse est prima actualitas trahens rem à potentia ad actum . Ergo esse rei actuale est materiale & fundamentum in ratione boni . Ex quo sequitur, quòd entia rationis non sunt bona, vt sic, quoniam neque

neque habet esse per se, neque subiectiue in alio, vt declaratum est supra in prima diuisione entis, nec entia chimerica, quæ non ponunt in rerum natura, nec mathematica, vt considerantur à mathematico, id est vt abstrahunt à materia sensibili, vnde inquit Arist. in 3. Metaph. tex. 3. Non potest esse principium motus, nec ratio boni in rebus immobilibus .i. in mathematicis, similiter materia prima secundum se non potest dici bona, cum sit ens in pura potentia, & omnem suam perfectionem trahit à forma, per quam fit actu, vnde & Philosophus inquit, in primo Phys. tex. 81. Existente forma quodam diuino, & optimo appetibili, aliud quidem contrarium ipsi dicimus, id est priuationem, cum igitur materia ex se sit adiuncta priuationi, & priuatio habeat rationem mali, iuxta Philosophum ibidem, sequitur quod nec ex se in quantum est ens in pura potentia, nec ratione priuationis, sed tantum ratione formæ per quam fit actu, & est cognoscibilis, potest dici bona. Item nec entia, quæ sunt in pura potentia agentis & non in potentia passiuæ, vt alter mundus producibilis, sunt aliquo modo bona, extra causam agentem, quia nullum esse habent extra agens, neque actuale, neque potentiale.

Formale autem indiuisum in ratione boni est respectus & ordo ad appetitum, sicut enim verum respicit intellectum, sic bonum est perfectiui appetitus. In ratione autem perfectiui includitur respectus, est enim perfectiuius alicuius perfectibilis perfectiuius, sicut calefactiuus alicuius calefactibilis calefactiuus, patet ergo, quod in ratione boni includitur respectus perfectiui, per quem distinguitur à quolibet alio Transcendente, & ideo per ipsum, vt per suum formale diffinitur, & se habet vt differentia complens rationem eius.

Quantum ad secundum aduerte duplicem diuisionem boni.

Prima est, Bonum est duplex, scilicet bonum secundum quid, & bonum simpliciter. bonum secundum quid est res existens sub esse substantiali, præscindendo ab omni esse accidentali perfectiuo: Bonum simpliciter est res existens sub suo esse substantiali, & omnibus accidentibus conferentibus ad perfectionem suam, verbi gratia, Homo statim genitus di-

citur

citur bonus secundum quid, pro quanto habet esse substantiale actu, & hæc quidem bonitas, solet nominari bonitas entis. Cum autem ad perfectionem sibi conuenientem deuenit siue naturalis siue moralis, tunc dicitur Bonus simpliciter, propter quod aduerte, q̃ opposito modo se habent bonum secundum quid, & ens secundum quid: Bonum simpliciter & ens simpliciter, nam dicitur ens secundum quid, quo ad prædicata accidentalialia, secundum que res non fit simpliciter actu, sed actu talis, & secundum hoc sumitur generatio secundum quid ex 5. Phys. tex. 7. Ens vero simpliciter sumitur ab esse substantiali, quod est à forma substantiali, nam per eam fit res simpliciter actu, quæ prius erat in pura potestate, & secundum hoc sumitur generatio simpliciter ex 5. Phys. tex. 7. patet ergo quod se habent opposito modo.

Secunda diuisio est: Bonum triplex inuenitur, vtile, honestum & delectabile, verum quia hæc distinctio non est metaphysicalis, sed potius moralis, vt patet in 8. Eth. vbi super hoc triplici bono assignatur triplex amor, ideo breuiter me expedio. Dicitur bonum vtile, quod propter alterum, & nõ gratia sui est appetibile, sicut cibus & potus, & reliquam exteriora nobis deseruiencia. Bonum honestum est, quod gratia sui est appetibile, vt scientiæ speculatiuæ, & virtutes. Bonum delectabile est, prout quietat appetitum vere aut apparēter, etiam quod nullam contineat vtilitatem nec honestatem. Nam delectatio formaliter est quies in bono adepto.

Quātum ad tertium, quia determinatum est supra quod respectus est de ratione boni, declarandum est quomodo ly bonum est nomen respectiuum, vnde aduerte, quod nomen respectiuum est duplex. Quoddam est cuius significatum est respectus, ita q̃ totum suum esse est ad aliud se habere, sicut pater, filius, seruus &c. Quæ solent dici relatiua secundum esse, & sunt entia mere respectiua, quæ, vt sic, nullam dicunt perfectionem, quia dicunt tantum ordinem ad alterum. Quoddam autem est, cuius significatum est quid absolutum, & tñ non possunt concipi nisi conceptu relatiuo, & cum ordine ad alterum. Et huiusmodi solent appellari relatiua secundum dici, verbi gratia. principiū effectiuū est quid absolutū, vnumquodque .n. efficit per virtutem actiuam, quæ est aut substantia,

TRACT. DE TRANSCEND.

substantia, aut qualitas, & tamen non concipitur in ratione principij, nisi in ordine ad principiatum, quoniam principiū est principiatum principium, & causa causati causa, & scientia scibilis scientia, & sensus sensibilis sensus. Ad propositum dico, quòd bonum, sicut & verum, ex parte rei sunt nomina respectiua.

Secundo modo, licet enim dicant absolutum, tamen non sunt conceptibilia nisi in ordine ad alterum ex consequenti connotant respectum. Nam verum in re est natura rei, vt diximus supra, quæ tamen non apprehenditur, vt vera nisi per respectum conformatis ad intellectum. Et bonum est esse rei, siue alia perfectio, quæ tamen non potest concipi vt bonum, nisi per respectum appetibilis ad appetitum.

Hæc de Bono transcendenti dicta sufficiant.

175

CHRYSOStOMI IAVELLI
CANAPITII

EPI TOME
IN METAPHYSICEM
ARISTOTELIS.

TRACTATVS PRIMVS.



NTEQVAM descendamus
ad considerationem eorum,
quæ tractantur ab Aristotele
in libris suæ Metaphysices,
præconsiderabimus aliqua de-
seruiencia toti negotio meta-
physico, in quibus complecte-
mur intentionem Aristotelis
in proæmio suo. Huiusmo-
di autem considerata sunt
quinque.

Primo, quæ sit necessitas inueniendi Metaphysicem.
Secundo, quæ sunt considerata à Metaphysico.
Tertio, quæ, & quanta sit dignitas Metaphysices.
Quarto, quis finis Metaphysices.
Quinto, quæ ordinate processit Aristoteles in Metaphysice.

CAPVT PRIMVM.



IRCA necessitatem Metaphysices, aduer-
te, quòd ex tribus sumitur.

Primo, ex parte intellectus nostri.

Secundo, ex parte rerum scibilium.

Tertio, ex parte scientiarum particulariũ.

Quantum ad primũ aduerte, quòd intellectus nost er est
humanus,

humanus, in quantum coniungitur sensui in eadem substantia animæ, neque enim datur intellectuum in his generalibus sine sensitivo, vt docet Arist. in 3. de anima, tex. 61. & habet quid diuinum in se, in quantum est immaterialis, simplex, incorruptibilis, & apprehensiuus entis, vt ens est, & non solum huius vel illius entis, & propter hanc intellectus celsitudinem dictus est homo ab antiquis sapientibus, Nexus Dei, & mundi, ab alijs autem dictus est Orizon inter corporea & incorporea, quoniam vtranque in se complectitur naturam, quoniam igitur & humanus & diuinus est, necesse fuit, vt perficeretur in quantum humanus per scientias naturales, & metaphysicas, quæ de sensibilibus pertractant, neque enim abstrahit physicus à materia sensibili, nec mathematicus à materia intelligibili. i. subiecta quantitati, ex 2. physic. tex. 18. ut autem perhceretur in quantum diuinus, necesse fuit vt intelligeret entia diuina separata à materia, à quantitate, à loco, à tempore, à motu, hæc autem non possunt sciri per scientias naturales, quarum subiectum est ens sub motu, ut declarauimus in phycis, nec per scientias mathematicas, quarum subiectum est ens sub quantitate continua, vel discreta, ergo necesse fuit inuenire scientiam superphysicalem, in qua de huiusmodi fieret consideratio, & hæc est Metaphysica, quæ transphysica, & diuina, & sapientia nominatur, vt dicemus in 3. cap. & quidem q̃ de huiusmodi illic fiat consideratio, patet ex Auic. in primo libro suæ Metaph. cap. 1. inquit enim, iam audisti, quòd in diuina scientia quæritur de primis causis naturalis esse, & doctrinalis esse. i. esse quanti, & de eo quod pendet ex eis, & de causa causarum, & principio principiorum, quod est Deus excelsus. vt igitur perficeretur intellectus noster, ea ratione qua diuinus, necesse fuit inuenire Metaphysicem.

Quantum ad secundum aduerte, quòd vt habeatur scientia de re scibili, non solum oportet cognoscere prædicata sua propria & specifica & generica, sed & prædicata vniuersalissima, quæ sunt ens, vnum multa, actus, potentia, necessarium possibile, finitum, infinitum, dependens, independens, perfectum, imperfectum, idem diuersum, oppositum conueniens, & cetera multa. vnde Arist. quoties venatur diffinitionem

tionem alicuius, incipit ab his prædicatis vniuersalissimis, vt patet in 3. phys. tex. 6. vbi venatur diffinitionem motus, & in 2. de anima, tex. 2. vbi venatur diffinitionem de anima. Huiusmodi autem termini in nulla particulari scientia potuerunt considerari, quoniam cum omnes, indigeant cognitione talium terminorum, & vtantur eis, non esset maior ratio, quare considerentur in vna quàm in alia. & ideo fuit necesse inuenire vnã primam vniuersalem sciẽtiã, in qua talia considerentur, & à qua particulares scientiæ de huiusmodi cognitionem accipiant, tanquam sibi traditam à Philosopho. Hæc autem est Metaphysica, in qua, vt videbitur locis suis, de omnibus prædictis fit consideratio. vnde non est officium Physici considerare de forma, actu, & potentia absolute, sed in quantum respiciunt materiam, vt docet Arist. in 2. phys. tex. 26. Idem intellige de alijs terminis vniuersalissimis. vt igitur haberetur perfecta cognitio de huiusmodi terminis absolute sumptis, à quibus pendet omnium rerum scibilum perfecta cognitio (quoniam ignoratis vniuersalissimis & primis prædicatis, necesse est nescire sequentia) ideo necessario inuenta est Metaphysica. propter quod inquit recte Albert. in lib. j. Metaph. tract. j. & cap. j. sicut causa tertia in ordine fundatur super secundariam, & secundaria in primaria, & primaria non fundatur in aliquo, sed est fundamentum omnium consequentium, ita naturalia & doctrinalia. i. Mathematica fundantur in diuinis. i. in consideratis à metaphysico, & diuina non fundantur, sed fundant tam mathematica, quàm physica.

Quantum ad tertium aduerte, q̃ cum scientia habeatur per demonstrationem (est enim habitus conclusionis, per demonstrationem acquisitus) & demonstratio ex primo Principio. procedat ex principijs, duplicia sunt principia, quibus procedit demonstratio. scilicet propria vnicuique conclusioni, & communia sunt vniuersalia, in quibus fundatur veritas priorum principiorum. Principia propria quidem considerantur in ea scientia, in qua sunt principia, vt Geometra considerat quid punctus, quid linea, quid angulus &c. & ex his deducit conclusiones suas. Principia autem communia non possunt considerari in aliqua scientia particulari, sed

sed omnes vtuntur eis, vt sibi conuenit, sicut declarat Arist. in primo poster. & in 4. metaph. tex. 7. vbi inquit, intantum vtuntur eis inquantum sibi sufficit, cum enim omnes vtantur eis, non magis pertineret ad vnā, quā ad omnes considerare de eis. Verum quia ignoratis principijs impossibile est ad noticiā conclusionis pertingere, ideo necesse est, quod in aliqua scientia certificentur & stabiliantur. hæc autem est sola Metaphysica, quoniam vt probat Arist. in 4. metaph. cum huiusmodi principia componantur ex terminis vniuersalissimis, vt ens, vnum, verum, oppositum, idem, diuersum &c. vt in hoc principio, Non sunt opposita, scilicet entia in eodem, & in hoc, De quolibet est affirmatio vel negatio vera, necesse est vt in eadem scientia considerentur, quæ & de huiusmodi terminis considerat. hæc autem est sola Metaph. vt dictum est supra, & probabitur de mente Arist. in 4. lib. tex. 7. & 8 vbi inquit. Philosophi igitur est de omni substantia speculantis inquantum congruit, & de omnibus principijs syllogisticis persequi. Vt igitur scientiæ particulares in demonstrationibus suis firmissime procedant, quæ vt in primis radicibus fundantur in primis principijs, necesse fuit inuenire Metaphysicā, quæ de huiusmodi principiorum veritate consideraret, & defensaret ea. Hæc de necessitate Metaphysicæ dicta sint.

C A P V T I I.

IN secundo cap. inuestigandum est, quænam sint consideranda à metaphysico. Pro cuius noticiā aduerte, q̃ tria cadunt sub consideratione cuiuslibet scientiæ. s. subiectum: Partes & proprietates subiecti, & principia siue causæ subiecti. Et hanc doctrinam docuit Arist. in j. Poster. quā seruauit in scientia naturali, in qua de ente, siue de corpore mobili, vt de subiecto consideratur, & de partibus subiectiuis eius, quæ sunt ens mobile ad vbi, ens mobile ad formā, ens mobile simplex: ens mobile mixtum &c. Et de proprietatibus eius, vt de motu finito, & infinito, de loco, & tempore, & de principijs siue causis eius intrinsecis, vt de materia & forma, & de extrinsecis, quæ sunt efficiens & finis.

finis. Cum igitur hæc tria considerari debeant in omni scientia, inuestigandum est quid sit subiectum in Metaphysice, deinde quæ sint partes & proprietates eius, quæ considerandæ sunt à Metaphysico, deinde quæ sint principia & causæ considerandæ à Metaphysico.

Quantum ad primum aduerte, quòd de subiecto Metaphysices triplex est opinio.

Quidam dicunt, vt refert Auic. in 1. suæ Metaph. cap. 2. quod vltimæ & vniuersales causæ ad quas reducuntur aliæ causæ, sunt subiectum in hac scientia, & ratio eorum est hæc. Cum scire sit rem per causam cognoscere, necesse est vt in omni scientia considerentur propriæ causæ, puta in scientia naturali consideremus causas naturales, in mathematica causas mathematicas, & maxime causas formales, non enim mathematicus demonstrat per causam materialem, efficientem, & finalem, vt dicemus in 3. Metaphys. sed propriæ causæ metaphysicales sunt causæ vltimæ, & vniuersales, vt prima materia, prima forma, primum efficiens, primus finis. ergo hæc sunt subiectum, circa quod debet versari Metaphysicus.

Quòd autem huiusmodi causæ sint metaphysicales, patet, quoniam sicut causæ particulares sunt propriæ scientiæ particulares sic causæ vniuersales debent esse propriæ scientiæ vniuersales, quæ est Metaphysice, vt declarabitur infra.

Sed hæc opinio est falsa, quoniam, vt inquit Auic. vbi supra, & in hoc eum imitatur D. Alber. 1. Metaph. tract. 1. cap. 2. proprietates, siue intentiones considerate in Metaphys. non attribuuntur causis vltimis & vniuersalibus, neque causis absolute sumptis. ergo non sunt subiectum in hac scientia. consequentia quidem patet, quoniam de eo quod est subiectum in scientia veniamur proprietates considerandas in scientia. ergo si non conueniunt causis, manifestum est eas non esse subiectum in hac scientia. Antecedens autem sic declaratur. Proprietates considerate in hac scientia sunt vnitas, multitudo, identitas, diuersitas, actus, potentia, necessitas, possibilitas, finitas, infinitas, & alia multa, vt dicitur in ferius. Constat autem, quod hæc communia non verificantur, nec demonstrantur in Metaph. de causis vltimis & vniuersalibus, sed de ente, vt ens est, vt declarabitur. ergo &c.

Epic. Lauelli.

z Aliqui

Aliqui dicunt Deum, & entia diuina esse hic subiectum, quoniam Metaph. est de abstractis à materia secundum esse, & secundum rationem. in hoc .n. distinguitur à physica & mathematica. huiusmodi autem sunt Deus & entia diuina, ut patet in 12. Metaph. ergo &c. confirmatur, quoniam de nominatio scientiæ fit à subiecto, dicitur autem scientia diuina. ergo Deus, & diuina entia sunt subiectum.

Sed hæc opinio non est vera, quoniam nullum quæsitum in scientia est subiectum eius. nam ex 1. Poster. de subiecto supponitur quia est, & quid est, sed ut declarabitur in lib. 12. hic quæritur de Deo, & de entibus diuinis, an sint, & quid sint, tunc .n. manifestabitur, & præcipue in quæst. nostris super duodecesimum, utrum sit officium physici, & metaphysici, probare entia separata à materia.

Alia est opinio, quæ est ad mentem Aristot. & manifestior fiet in 4. lib. quam sequuntur Auicem. in primo suæ Metaph. cap. 2. & D. Albert. 1. Metaphys. tract. 1. cap. 2. & Auerr. in 4. lib. comm. 1. & B. Thom. in pr. Metaphys. Isti dicunt, quod ens inquantum ens, & non hæc, vel illa pars entis est subiectum in hac scientia, & in hoc distinguitur ab alijs scientijs particularibus. & hanc conclusionem probant sic, Nulli attribuuntur, nec vniuersaliter verificantur proprietates considerate à metaphysico, ut vnum, multa, potentia, actus, idem, diuersum, &c. nisi de ente inquantum ens, quoniam omne ens est vnum, aut multa, idem, aut diuersum, actu: vel potentia, finitum, vel infinitum: possibile, vel necessarium, ergo ens inquantum ens est in metaphys. subiectum. & consequentia quidem patet, quoniam illud est subiectum in scientia, cui attribuuntur proprietates consideratæ in scientia.

Præterea, omnis scientia est de ente, quoniam ex primo Poster. quod non est, non contingit scire. cum igitur omnis scientia sit particularis, vel vniuersalis, necesse est sicut scientiæ particulares sunt de ente particulari, ut physica de ente mobili, & mathem. de ente quanto, sic scientia vniuersalis, quæ est metaph. sit de ente vniuersali, quod est ens inquantum ens, & hæc ratio fundatur in 4. Metaph. tex. j. vbi inquit Philosophus, est autem scientia quædam, quæ specula-

tur ens inquantum ens, & quæ huic insunt secundum se. Hæc autem scientia non est vna earum quæ dicuntur particulares, quoniam non est alicuius scientiæ particularis consideratio de ente vniuersali &c.

Sustinendo igitur, quod ens inquantum ens sit hic subiectum, soluenda est ratio adducta pro prima opinione, & adducta pro secunda.

Ad rationem igitur primæ opinionis, negatur hæc consequentia. In Metaph. considerantur ultimæ causæ & vniuersales, sicut in omni sciētia causæ particulares. ergo sunt subiectum in ea. non .n. omne consideratum in scientia est subiectum in ea, sed illud tantum cuius causas quærimus, & de quo proprias passiones demonstramus. Hæc autem est ens inquantum ens, cuius causas ultimas, & vniuersales metaphysicus considerat, tanquam finem, ad quem conatur peruenire. nam vt dicemus infra, sicut ignorantia causarum fuit occasio philosophandi, sic earum cognitio erit finis. vnde metaphysicus quiescet, cum causas vniuersales entis vniuersalis inuenerit: nam geometra quiescit, cum causam scit propter quam triangulus habet tres æquales duobus rectis, & phycus quiescit, cum causam scit propter quam terra est figuræ rotundæ, & stat in medio mundi.

Ad rationem secundæ opinionis, dico q̄ non concludit aliud, nisi q̄ Deus, & entia diuina sunt principalia, & vltima considerata, ad quæ pertingere possit metaphysicus. ex hoc tamen non sequitur, q̄ sint subiectum, & præcipue subiectū adæquatum, vt intendimus, quoniam huiusmodi subiectum debet esse vniuersale consideratum .i. q̄ omnia considerata in scientia habeant ordinem ad ipsum, & sit illud cui attribuantur omnes proprietates, & passiones considerate in scientia, constat autem quod Deus, & diuina entia, non sunt vniuersale consideratum in hac scientia, nec eis conueniunt omnes passiones metaphysicales, non enim Deus est vnum, & multa: idem & diuersum, actus & potentia: possibile & necesse. Optime autem verificantur, de ente vniuersali, quoniam in se comprehendit omnes modos essendi, vnde aliquod est vnum, aliquod est multa, aliquod est in potentia, aliquod in actu &c. Nec obstat, q̄ dicitur Metaphysica esse

de abstractis à materia, secundum esse, & secundum rationē, quoniam id non solum conuenit Deo & substantijs diuinis, de quorum ratione est, quod non sunt in materia, sed & enti vniuersali & passionibus eius, quoniam non est de eorum ratione, quod sint in materia, aliter omne ens, omne vnum, omne verum, omnis actus, omnis substantia &c. essent in materia, dicuntur ergo abstrahere à materia, quoniam in sua latitudine est inuenire aliquod quod non est in materia, & ali quod quod est in materia. hoc autem non contingit in latitudine entis mobilis, quoniam omne mobile, vt dicitur in lib. 3. de necessitate, habet materiam, nec in ente quanto, quoniam omnis quantitas consequitur substantiam ratione materiæ, propterea de ratione entium naturalium est materia, & habent esse in materia. Metaphysica autem licet abstrahant à materia secundum diffinitionem, non tamen secundum esse. Hæc de subiecto metaphysicæ dicta sint. vtrum autem sub subiecto metaphysicæ contineantur ens rationis, & ens per accidens, discutiemus in quæstionibus Metaphysicalibus.

Quantum ad secundum aduerte, quod proprie passionēs entis, in quantum ens, sunt prædicata conuertibilia cum ente, vt sunt transcendentia, de quibus ordinauimus particularem tractat. & hæc considerantur à metaphysico, quoniam vt dicemus in 4. lib. eiusdem scientiæ, est considerare subiectū, & ea quæ per se conueniunt ei. partes autem entis sunt illa in quibus diuiditur ens vniuersale. hæc autem sunt substantia, accidens, vt quantitas, qualitas, ad aliquid, & reliqua prædicamenta, potentia vt materia, actus, vt forma, necessarium, contingens, dependens, independens, finitum in esse, infinitum in esse, & de his omnibus pertractabit Philosophus in libris seq. nam vt dicit Philosophus in lib. 1. sicut scientia medicatiua habet considerare omnes modos salubris, sic prima philosophia omnes modos entis. reducuntur enim ad vnum, sicut & modi salubris, quod quomodo sit verum, declarabitur loco suo.

Quantum ad tertium, dico cum Philosopho, quod habet considerare principia prima, & primas ac maxime vniuersales causas entis in quantum ens. Et aduerte, quod per prima principia intelligo primas propositiones veras, in quibus

bus fundantur omnes particulares scientiæ . nam secundū doctrinam Auic. in 1. suæ Metaph. cap. 2. sicut ad primum regentem pertinet constituere & stabilire principia, ac leges secundū quas habent agere secundi regētes, sic primi Philosophi est considerare & firmare principia prima, à quibus habent procedere scientiæ particulares . Omnis enim demonstratio procedit ex principijs proprijs & communibus, licet non in sua vniuersalitate sumptis, sed vt applicantur . & de his primis principijs considerabit Arist. in 4. lib. firmando ea contra negantes . Per primas & maxime vniuersales causas intelligo causas actiuas totius entis causati, iter quas sunt causæ causatæ, vt intelligentiæ motrices, à quibus pendet omne ens mobile, & ens quantum . nam & cœlum vt est sub motu, pēdet ab eis, & est causa incausata omnino, à qua & intelligentiæ, & cœlum, & naturalia pendent, & dicitur esse causa totius entis extra ipsum, & de his consideratio fiet in lib. 12. tantum quantum attingere potest naturalis virtus intellectus humani . Quod autem habeat considerare prima principia, & primas ac vniuersales causas, probat Arist. in proœmio tali ratione . scientia quæ absolute dicitur sapientia, versatur circa prima principia, & primas ac vniuersales causas, sed Metaph. dicitur sapientia absolute . ergo &c. Minorem quidem huius rationis declarabimus in 3. cap. cū agemus de dignitate eius . Maiorem autem intendit Arist. declarare duplici via .

Primo, ex comparatione sapientiæ in genere .

Secundo, ex conditionibus solitis attribui sapientia .

Pro prima via vtitur tali ratione : Nulla scientia, nullaq. ars dicitur sapientia in genere, nec aliquis sciens, aut artifex dicitur sapiens, nisi sciat causam eius circa quod versatur . ergo nulla scientia meretur dici sapientia absolute, nisi prima principia, & primas causas consideret . consequentia patet, quoniam si nulla scientia, vel ars dicitur sapientia in tali genere, nisi proprias & particulares causas in illo genere cōsideret, proportionaliter nulla scientia dicetur sapientia simpliciter & absolute nisi prima principia, & primas causas, quæ sunt absolute principia, & causæ, consideret . Antecedens autem manifestat Aristot. longo processu, in quo sum-

matim intendit quatuor.

Primo, declarat scientiæ excellentiam.

Secundo, vt possit graduare cognitiones cōuenientes homini, prius graduat cognitiones in brutis.

Tertio, graduat cognitiones in homine, & cōparat eas adinuicem, vt sciamus, quæ sit melior.

Quarto, ex omnibus his declaratis probat antecedens propositæ rationis.

Propter primum proponit hoc principium.

Omnes homines natura scire desiderant, i. naturali desiderio, itaque sicut graue ex sui natura desiderat locū deorsum, sic homo ex natura sua, quæ est intellectualis, desiderat scientiam. Et hoc quidem principium manifestat B. Thom. triplici ratione, sed eas hic non adduco, quoniam videbis eas in q. nostris, defensatas contra Ant. And. Arist. vero declarat illud per signum sumptum dilectione sensuum, pro quo aduerte, q̄ bruta diligunt cognitionem sensuum solum propter cōmodum vitæ, vt. s. acquirant conferentia sibi, & fugiāt nociua vitæ sicut declarauimus in Epit. de Anima agentes de sensu. interio. non autem curant sentire propter solam delectationē, remoto omni comodo vitæ, vnde non delectantur suauibus saporibus. nec varijs odoribus, nec pulchris coloribus, nec melodijs sonorum, nisi in ordine ad cōmodum vitæ homo vero diligit sensus, non solum quia vtilēs sunt vitæ conseruandæ, sed quoniam cognoscitui sunt, & delectatur eorum cognitione, etiā remota omni vtilitate, vnde delectatur varijs saporibus & suauī odore, etiā non habito respectu ad nutrimentum, vt declarauimus super lib. de sen. & sen. Inter omnes autem sensus magis diligimus visum, quoniam ex sua spiritualitate est perfectius cognoscituius, & ex amplitudine sui obiecti plura per ipsum cognoscimus, nam per alios sensus solum inferiora, per visum autem & inferiora, & superiora cognoscimus, cōmunicant enim in lumine, vnde magis deseruit intellectui in acquisitione scientiæ per inuentionem, q̄ ceteri sensus, nec obstat, q̄ dixit Arist. in lib. de sen. & sens. auditum esse sensum disciplinæ, quoniam illic intendit de acquisitione scientiæ per doctrinam, quæ est operatio docentis, hic autem per inuentionem, quæ sit admini

admiriculo sensuum, & præcipue visus, quoniam igitur experimur nos diligere sensus, non solum quia utiles, sed quoniam cognoscitui, palam est, quod naturaliter diligimus eos, quoniam deferuiunt intellectui, & operationi intellectuali, qua acquirimus scientiam, & naturaliter desideramus scire, nam si medium ad finem est naturaliter dilectum & desideratum, multo magis est dilectus & desideratus finis, ut si naturaliter desidero nutrimentum, naturaliter desidero vitam, sed ut diximus, homo naturaliter amat, & desiderat, sensus etiam remota utilitate vitæ, prout deferuiunt intellectui, ergo multo magis amat, & desiderat scire, nec obstat quod non omnes homines incumbunt studio sciendi, nec assequuntur scientiam, quoniam hoc naturale desiderium inest homini ea parte, qua intellectualis est, & quidem si homo esset tantum naturæ intellectualis, vel si omnis homo viueret secundum dictamen rationis, profecto hoc desiderium in omnibus ratione utentibus (ut excipiam amentes, & alios aliquo accidente non compotes rationis) transiret in actum, verum quia homo, & sensualis, & intellectualis est, & in pluribus passiones dominantur abducentes hominem à vera natura sua, & inclinantes ad vitam brutalem, ideo in illis tantum, in quibus ratio præualet, & male consuetudines non deprimunt, desiderium sciendi transit à potentia ad actum, in alijs autem remanet in virtute, sicut inclinatio ad locum deorsum remanet in virtute in graui detento sursum, donec remoueat impediens, & si nunquam remoueretur, illa inclinatio nunquam transiret ad actum.

Tu tamen aduerte, quod licet desiderium sciendi inest omni homini, in quantum est homo, non tamen omnes incumbentes studio inclinatur ad eandem scientiam in specie, sed diuersificantur secundum quod diuersæ sunt in eis dispositiones naturales, nam ut testatur D. Alber. in primo Metaph. tract. 1. cap. 5. quorum intellectus est immixtus, & purus, & complexio est subtilis spiritus in calido, & humido, ita quod humidum est luminosum, non constans per frigidum congelans, nec turbatur per calidum excessiuum, ij delectantur subtilibus studijs, ut in metaphysicis, & diuinis theologalibus, & hæc complexio sanguinea est, & aptissima studijs subtilibus.

libus. Quorum autem organum imaginationis est temperate siccum, aptum ad bene sigillandum figuras, & siccum cōplexionale non pigritatur per frigidum congelans, ij bene proficiunt in mathematicis, & horum complexio est cholerica declinans aliquantulum ad melancholicam. Quorum vero organum imaginationis est medullosum, & purum, & spiritus sunt lucidi, non incrassati, nec inertes per frigidum congelans, ij delectantur studio rerum naturalium, & hæc cōplexio est phlegmatica, declinans tamen ad sanguineam aliquantulum, vel cholicam. Quorum autem congelati sunt spiritus, & non bene clari propter frigus condensans, ij in nullo studio subtili proficiunt, & contentantur historijs, exemplis, rhetoricis, & quibusdam sensibus superficialibus, & hæc complexio est mere phlegmatica, quæ ex humido in nulla re subtili firmatur. Complexio autem mere melancholica, ex frigido, crasso, & terrestri, nulli studio per inquisitionem apta est, sed magis est receptiua reuelationum, & superiorum impetuum, vt diximus in tract. de bona fortuna. vnde efficiuntur poëtæ naturales patientes diuinum furore, & vaticinatores naturales, nec obstat, quòd dicit Aristot. in Probl. viros sapientes pro maiori parte fuisse melancholicos. non enim intendit mere melancholicos, sed à prædominio, nam tunc melancholia confert, quoniam ex sui fixione reddit studiosum meditatum, & bene consideratum, bene ordinantem conceptus suos, & bene patientem in labore studendi: cuius oppositum experimur in cholicis, qui in omni opere ex calido igneo sunt concitati, & impatientes moræ. Hæc de naturali desiderio sciendi dicta sint, ex quo possumus sic probare excellentiam scientiæ in communi, scientia desideratur naturaliter ab omni homine, ergo est bonum valde excellens. probatur consequentia, quia quod vniuersaliter desideratur est valde perfectiū desiderantis: omne enim desiderium est imperfecti ad perfectiū. quod autem est valde perfectiū, est excellens bonum, ergo &c. & hæc ratio fundatur in primo Physicorum, tex: 81. vbi ex desiderio naturali materiæ appetentis formam, concludit Aristot. formam esse quid diuinum, & optimum.

Quan-

Quantum ad secundum, aduerte vnum in quo omnia animalia, vt animalia conueniunt, deinde multiplices gradus cognitionis, in quibus distinguuntur, inter quos secundus est perfectior primo, & tertius perfectior secundo. Conueniunt autem in hoc, quòd est habere sensum, nam differt animal à vegetatiuo per animam sensitiuam, vnde sensitium est de formali ratione animalis. Sensitium autem est, quod habet potentiam sentiendi, commune est ergo omni animali habere sensum, non tamen omnem sensum, sed saltem tactum, eo quòd est fundamentum omnium sensuum, & simpliciter necessarius omni animali, vt cognoscat conuenientia, & disconuenientia vitæ, similiter & gustum in quantum est quidam tactus, vnde inquit Arist. in 3. de anima, tex. 64. ij quidem igitur necessarij sunt animali, quod & manifestum est, non posse sine tactu animal esse, & de his quidem satis diximus in Epitome de anima. Posito eo in quo omnia animalia conueniunt, aduerte tres gradus cognitionis sensitiuæ, in quibus distinguuntur.

Primus gradus est, quædam animalia sunt memoratiua, quædam non. Illa sunt memoratiua, quæ retinent in phantasia speciem sensatam, & intentionem non sensatam in ultimo sensuum interiorum, in absentia obiecti prius apprehensi, & hæc sunt animalia perfecta, quæ mouentur ad locum distantem, vt quærant conuenientia vitæ, eo quod non habent nutrimentum semper sibi præsens. Non mouerentur autem ad quærendum nutrimentum distans, nisi reseruata fuisset species sensata, & intentio non sensata, quæ sunt necessariae ad memoratiuam, vt diximus in tract. de mem. & remin. Quæ autem non retinent speciem & intentionem in absentia obiecti, non sunt memoratiua, est enim memoratio reuersio in prius apprehensum, per aliquod principium in memorante retentum, & hæc sunt animalia imperfecta, quæ ex frigidityte aquea, vel terrestri immobilitante spiritum animale deferentem species sensatas, prohibentur sigillare, & retinere species, nam superflua humiditas aquea prohibet sigillationem, ex excessiua frigidityte terrestri. Propterea, vt declarauimus in tract. de mem. & rem. pueri & senes non bene memorantur. inter hæc animalia D. Alber. in 1. Metaph. tract.

tract. i. cap. 6. computat muscas, quæ repulsæ stabello statim se ingerunt, immemores receptæ læsionis, nec ad certa loca habitationis suæ se conferunt, nec vllum ostendunt memoriæ signum, sed ex sola apprehensione sensus in præsentī prosequuntur conuenientia & fugiunt nociua.

Secundus gradus est, quædam animalia sunt prudentia, quædam uero aduerte & prudentia proprie, ut patet in 6. Eth. non est sine ratione, cum sit recta ratio agibilibus, & ut sic in sola natura intellectuali, ut in homine inuenitur. Improprie autem & secundum aliquam similitudinem inuenitur in aliquibus brutis, nam sicut homo per rationem practicā disponit & ordinat media, quibus se regat & prosequatur conuenientia, & vitet nociua, sic quædam bruta per naturalem existimatiua ordinant vitæ suæ cōmoda. Id autem non possunt sine memoria, quoniam prudens est, qui ex memoria præteriti & notitia rei præsentis providet sibi de necessarijs in futuro, & conatur vitare nociua, quæ igitur sunt memoratiua possunt esse prudentia, sicut formicæ, & apes, & oues & canis &c. Quæ autem sunt immemoratiua non possunt esse prudentia, ideo non provident sibi in futuro, sed deficiente sibi præsentī nutrimento deficiunt, ut musca, quæ carens memoria non congregat sibi pro hyeme, ideo in hyeme deficiunt muscæ, & araneæ, & vespæ, & multa alia.

Tertius gradus est, quædam animalia sunt disciplinabilia, vel docibilia, quædam non. Aduerte, quod disciplina & doctrina proprie, sicut prudentia est in sola natura intellectuali: Improprie autem & per quandam similitudinem inuenitur in quibusdam animalibus, nam sicut homo ab homine eruditur per terminos, & propositiones, & nutus exprimentes conceptū erudentis, sic quædam animalia audientia sonos & nomina, conseruant ea in memoria, & agunt multa veluti erudita, ut patet in cane, in equo, in elephante, in auibus, in simia. Et aduerte, quod plura quidem animalia erudiuntur in gestis artium liberalium, ut saltare, pugillare, tripudiare, canere, voces syllabicatas formare: præcipue psittacus: paucissima autem erudiri possunt in gestis artium mechanicarum, sicut est texere, fabricare, suere &c. & propter distantiam ab homine: sola autem simia propter propinquitatem, quam habet

ad naturam hominis, ex qua etiam participat figuram eius, imitatie multa agit similia artibus mechanicis, ut nec, fuit, vestit se &c. Ratio autem huius tertij gradus est, qm̄ animalium memorantium, quædam hñt auditum, & hæc possunt disciplinari, qm̄ ex lib. de sen. & sens. audicus est sensus disciplinæ, cuius signū est, quod si quis nascatur surdus, de necessitate erit mutus. Quæ autem memorantur, & non hñs auditum, licet possint esse prudentia, non tñ disciplinabilia, ut exemplificat Arist. de apib. quod exemplum B. Thom. exponit ac si omnino careant auditu, & licet cōgregentur ad strepitum vel sonum factum, non est quia audiant sonum, sed quia tactu sentiunt commotionem aëris, ideo velut timētes simul congregātur. D. Alber. aut in 1. Met. tract. 1. cap. 6. distinguit de auditu, nam est auditus perceptivus sonorum, & vocum inquantum utiles sunt ad prosequendum conferentia, & vitandum nociua, sicut videmus aves aduocari blandis vocibus, & terreri asperis, sicut canes & equi &c. & est auditus perceptivus sonorum & vocum, inquantum sunt signa rerū, per modum nominum significantium cōceptus.

Ad hoc autem q̄ animalia sint disciplinabilia, necesse est q̄ habeant auditum, primo & secundo modo. Quæ autem habeant tantum primo modo, non sunt disciplinabilia, licet ad auditum varij soni congregentur, & diffugiant, & quoniam in apibus inquit Alber. est auditus tantum primo modo, ideo non disciplinantur. Patet igitur triplex gradus cognitionis in brutis, inter quos tertius gradus propinquat cognitioni humanæ, ex elevatione existimatiuæ.

Quantum ad tertium aduerte, quòd Arist. antequam manifestet gradus cognitionis humanæ, prius declarat, in quo humana cognitio excedit animalium cognitionem, & intendit q̄ animalia, aut viuunt. i. operantur imaginationē. l. confusa ad solam præsentiam obiecti. & hæc sunt animalia imperfecta, quæ non retinent speciem sensatam in absentia obiecti, aut operantur memoria. i. ex eo quod memorantur, prius sensatorum, & hæc sunt animalia perfecta, quæ mouētur ad distans, propter prosecutionem conuenientis & fugam disconuenientis. Quædam autem operantur aliquali experimento, non tamē proprie dicto. nam sicut prudentia

& disciplina proprie dicta sunt tantum, in natura rationali, sic experimentum . nam de ratione experimenti duo sunt , retentio plurium memoriarum eiusdem speciei, vt dicemus infra, & collatio siue conferentia plurium memoriarum adinuicem, ex qua conferentia sumitur similis acceptio de multis, & hanc conferentiam facit virtus cogitativa, quæ dicitur ratio particularis, vt declarauimus in Epit. de anima : agentes de sensu. inter. & quæ est propria huiusmodi, cum sit maxime vicina intellectui . Ex his duobus tantum primū, quod est, vt materiale inest bruto, eo quod potest retinere plures, & similes memorias, ex quibus sicut in homine per collationem cogitativæ causatur verum experimentum, sic in bruto ex opere existimativæ causatur, quædam assuefactio, siue consuetudo, secundum quam operatur, vt patet in equo assuefacto ad sic vel sic ambulandum, & huiusmodi assuefactio dicitur in bruto experimentum improprie . Causatur enim ex multis, & consimilibus memorijs, sicut verum experimentum, vt dicemus, omnia igitur animalia operantur, aut imaginatione, aut memoria, aut assuefactionibus, quæ sunt experimentum improprie dictum . ideo dixit Arist. quod experimenti parum participant .

Homo autem quoniam rationalis est, ideo excedit bruta in tribus, quoniam viuunt. i. operatur experimento proprie dicto, & arte, & ratione, quod si qui homines viuunt sola imaginatione & memoria, non vt homines, sed vt bruta viuunt. Hæc autem sic graduantur, q̃ ars nobilior est experimento, & ratio arte, nam experimentum ad rationem particularem spectat. i. ad cogitativam, quæ tñ est in latitudine virium sensitiuarum, & ars ad rationem vniuersalem practicā spectat, quam dicimus intellectum practicū, & ratio ad rationē vniuersalem speculatiuam spectat, quam dicimus intellectum speculatiuum. Constat autem intellectum practicū esse nobiliorem cogitativa qm̃ est extra latitudinem virium sensitiuarum, & intellectum speculatiuum esse nobiliorem practico, sicut & habitus speculatiuus est nobilior practico, vt declarabitur infra in ratione sciendi, licet non efficacia operandi, vt dicemus, sed hæc manifesta sient assignando modum generationis eorum, & comparando ea adinuicem .

Quan-

Quantum ad generationem experimenti dicit Arist. q̄ multæ memoriæ vnus rei faciunt potentiam experientiæ. i. habitum experimentalem, quo habilitatur & facilitatur homo ad operandum. pro quo aduerte, q̄ multæ sensationes eorundem effectuum in specie & retente in memoria sunt generatiue experimenti, verbi gratia, vidi pluribus annis pluvia abundante in mense Maij segetes male fructificare, & sequi penuriam, ex quo causatum est in me experimentum, quod quoties videbo Maium pluuiosum, præsumam penuriam subsequituram, & Chirurgus vidit multoties appposito solatro super humorem calidum mortificari, & ex multis his vicibus generatur experimentum, quod humorem calidum mortificat solatrum. Patet igitur, q̄ multæ memoriæ in effectibus similibus acceptæ causant in nobis potentiam experimenti, & assimilatur arti, & scientiæ, non tamen est tantæ perfectionis, vt dicemus infra in comparatione eorum adinuicem.

Quantum ad generationem artis & scientiæ, dicit Arist. q̄ generantur ex multis experimentis, vnde aduerte, quod sicut ex multis similibus memorijs fit experimentum, sic ex multis similibus experimentis fit scientia & ars, verbi gratia, quia vidi, q̄ reubarbarum purgauit à cholera Socratem Calliam, & alios plures, causatum est in me experimentum, q̄ reubarbarum proficit multis cholericis. Si autem ex singularibus concludatur hæc vniuersalis, Omni cholerico proficit reubarbarum, generatur ars & scientia medicinalis.

Differt enim in hoc experimentum ab arte, q̄ experimentum versatur circa singularia tantum, ars autem & circa vniuersalia, quoniam causatur experimentum à cogitatiua, quæ etiã dicitur ratio particularis, ars autem & scientia à ratione vniuersali, quæ est intellectus, qui est vniuersalium, sicut sensus est singularium. Posita generatione eorum nunc comparemus adinuicem, & aduerte huiusmodi comparationem posse fieri quo ad perfectionem operationis, vel quo ad perfectionem cognitionis. Et quidem respectu primi modi, dico, quod expertus non habens artem perfectius & efficacius operatur artifice non experto, quoniam actiones sunt per se circa singularia, & experientia est tantum circa singularia,

per

per accidens autem sunt circa vniuersale, & ars est circa vniuersale, vt dictum est. nec operatur, nisi applicet se ad singularem, quia igitur proprium obiectum experti est singulare, & artificis est vniuersale, ideo efficacior est in operando expertus, quàm artifex sine experimento. Propterea difficile est bene confidere in medico iuvene non experto. Experimentum enim perficit artem in operando: ideo artifex expertus regulariter & sine errore operatur, inexpertus autem quoniam ignorat singulare, quod est per se curabile, multoties peccabit. Respectu autem secundi modi dico artem & scientiam perfectiores esse, quàm purum experimentum in ratione cognoscendi, nisi adiungatur arti, & scientiæ, sicut non perficitur ars in operando nisi adiungatur experimento, vnde in ratione secundi, se habet experimentum, & ars, sicut in naturalibus motus & terminus motus. nam sicut motus est ipsa forma imperfecta, vt est in acquiri, & terminus motus est ipsa forma perfecta, vt est in acquisito esse, sic experimentum est scire imperfectum, quoniam est scire perfectum nisi sciatur vniuersale, per experientiam autem nascitur vniuersale, nisi in confuso & potentialiter, cum versetur circa merum singulare. ars autem facit scire perfecte, quoniam per ipsam cognoscitur. expresse & formaliter vniuersale, & quidem eminentiam in ratione cognoscendi artis super experimentum, manifestat Arist. tripliciter.

Primo, quia artifex est magis sciens, cum enim cognoscat conclusionem vniuersalem cognoscit causam, per quam deducit conclusionem. Scire enim est rem per causam cognoscere, expertus autem cum versetur circa singulare scit tantum quia, sed ignorat propter quid &c.

Secundo, habens artem potest disputando defensare & probare conclusionem suam. expertus autem non potest, quoniam causam ignorat. ergo &c.

Tertio, habens artem reputatur sapientior mero experto, quoniam dicit causam, vnde se habet ars ad experientiam, sicut se habet ars architectonica. i. principalis, ad subseruientes, quod quidem dicitur sapientia, quoniam primas causas totius artificij considerat, & det modum ac formam operandi subseruientibus, & confirmatur quod habens artem sit magis sciens, quàm

quàm merus expertus hoc signo, quoniam habens artem potest vere docere alterum, & causare in eo scientiam. cum. n. cognoscat causam, sciet demonstrationes facere. Demonstratio autem ex primo Poster. facit scire, sed expertis non potest docere alterum, ita quod faciat ipsum scire, quoniam ignorat causam, ex consequenti non potest demonstrare, quod si alterum instruet non causabit in eo, nisi opinionem & leuem credulitatem. ergo &c.

Sed dicit aliquis, cum inter scientias quædam sit speculatiua, quædam practica, & inter artifices aliquis sit inuentor artis, aliquis addiscens, & vtens arte inuenta quæritur, quæ inter scientias sit nobilior, & quis artifex nobilior.

Respondet Arist. quod inuentor artis est dignior, quoniam sapiëntior reputatur, & est apud homines magis admirabilis, quasi inueniens, quæ excedunt communem hominum sensum, & hoc ideo quia causas & principia, & regulas artis considerat. vtentes autem operantur secundum principia & regulas datas ab inuentore, & non quæunt ultra. vnde interrogati quare sic operantur, respondent, quia sic acceperunt ab inuentore. merito ergo inuentor est sapiens, & dignior.

Item scientia speculatiua dignior est practica, quoniam hæc est gratia sui. Inuenta est enim remota omni vtilitate temporali sperata, nam & primi Philosophi speculatiui, vt Sacerdotes in Aegypto, abundantes omni bono temporali, inceperunt speculari in metaphysicis & diuinis. practica autem est propter alterum. i. propter opus utile, & magis propinquat sensui, ideoque minus est intellectualis, sed speculatiua versatur circa minus sensibilia, quoniam circa vniuersalia, quæ sunt minus sensibilia, præcipue scientia speculatiua diuina ergo dignior, & si oportet alteram earum vocari sapiëntiam, conuenientius est, vt id attribuaturs speculatiue, quia occupatur circa magis intelligibilia, & magis perficit intellectum. Hæc de tertio dicta sint.

Quantum ad quartum, aduerte quomodo Arist. ex declarationis in præcedenti processu probat antecedens propositæ rationis, quod erat tale, Nulla scientia, nullaque ars dicitur sapientia in genere, nec aliquis sciens, aut artifex dicitur sapiens, nisi consideret causam eius circa quod versatur, ipsum in-

inquam sic probat. Dictum est expertum esse sapientiores eo, qui habet tantum sensum, id est eo qui operatur sola imaginatione & memoria. magis enim accedit ad naturam intellectualem, cui soli conuenit sapientia proprie dicta. Et dictum est artificem esse sapientiores experto, quoniam dicit causam, de eo de quo expertus dicit tantum quia, & potest docere alterum demonstrando. & dictum est inter artifices architectum esse sapientiores, quoniam dicit causam totius negocij, & dat regulam subseruientibus, & dictum est artem ac scientiam speculatiuam nobiliorem, ac digniorem nomine sapientie quam practica, quoniam est circa magis intelligibilia, ac scribilia, vnumquodque autem vere scitur per causas suas. patet ergo inductiue, quod vnumquodque cognoscens in quantum est sapiens in quantum causas considerat, vnde sapiens absolute est ille, qui primas vniuersales causas considerat sicut magis declarabitur in sequentibus.

Secunda via qua intendit Arist. declarare, quod ad Metaphysicam spectat considerare prima principia, & primas ac vniuersales rerum causas, sumitur à conditionibus solitis attribui sapienti, & intendit sic arguere, sapiens est qui scit omnia, & præcipue difficilia, & per certitudinem, & per causam, & querit scire gratia sui, ordinat & persuadet alijs, id est in inferioribus, & non ordinatur nec persuadetur ab eis, sed metaphysicus reputatur absolute sapiens. ergo debet habere has condiciones, sed eas non potest habere nisi consideret prima principia, & primas ac vniuersales causas. ergo &c. Quod autem non possit has condiciones habere, nisi prima principia, & primas causas consideret, declarat sic Arist. cum omnia inferiora contineantur in primis vniuersalibus, & in primis causis, necesse est, vt sciat omnia, quod consideret prima vniuersalia, & primas causas. Item cum primæ & vniuersales causæ entium sint remotissimæ à sensu, sequitur quod sint difficillimæ ad cognoscendum. cum enim nostra cognitio incipiat à sensu, facilitas & difficultas cognitionis graduabitur secundum propinquitatem & remotiorem à sensu.

Ad hoc ergo, quod sapiens sciat difficilia, oportet ut sciat maxime vniuersalia, cognitione, scilicet distincta, de qua locuti

cuti sumus in tract. de Trascen. & primas entium causas, quę sunt à materia, & quantitate separatę, vt manifestum erit in lib. 12. Item cognitio de primis vniuersalibus est certior, qm̃ cum sequentia se habeant ex additione ad ipsa, plura requirunt in sui cognitione, ex consequenti non causant in nobis adeo claram euidenciam. Inde est qđ certius est mihi ali- quod esse ens quam esse substantiam, quoniam constat mihi, qđ sibi debetur esse, non tamen constat, si ei debetur esse per se, vel esse in alio. vt ergo sapiens habeat certitudinem cognitionis, oportet vt sciat prima vniuersalia. Item sapiens debet esse doctrinalis, id est sciens docere, sed id perfecte nō poterit, nisi sciat de singulis dicere causas, & resolueret quęstum in vltima principia & vltimas causas, quoniam in illis est status inuestigationis intellectualis, ergo &c. Item sapiens debet scire maxime scibilia, hæc autem quæruntur sciri gratia sui, quoniam dignissima sunt & omnino perficiunt intellectum sui cognitione, & non aliqua vtilitate separata. vnde Arist. in eorum contemplatione statuit felicitatem. ergo &c. Item ordinans & persuadens alijs, necesse est vt consideret causam finalem totius negotij, neque enim nauis factor ordinaret, & suaderet subseruientibus, nisi formam & finem consideraret, ad quem fabricatur nauis.

Ad hoc ergo, qđ sapiens metaphysicus ordinet, & dirigat inferiores scientes, oportet qđ consideret totius entis vniuersalem causam & efficientem, & finalem, in qua consideratione terminabit Arist. metaphysicam suam, vt manifestum erit in 12. lib. vbi vltimo inuestigabit de totius naturę bono. nam & bonum habet rōnem causę finalis, ex 2. Phys. tex. 31. & sicut Bonum particulare est causa finalis particularis, sic Bonum vniuersale. i. contentiuū omnis boni est causa finalis vniuersalis, & prima in causando. Manifestū est igitur, qđ metaphysica, quę est sapientia absolute, habet considerare prima principia, primas & vniuersales causas entis. quę autem sine declarabitur infra. Hęc de 2. cap. dicta sint.

C A P V T I I I.

IN tertio cap. inuestigandum est, quę & quanta sit dignitas
Epit. Iauelli. A gnitas

gnitas metaphysicæ. Aduerte igitur q̄ Arist. quatuor digni-
gnitates ei attribuit.

Primo, quòd est scientia speculatiua.
Secundo, quòd est maxime libera.
Tertio, quòd non est humana possessio.
Quarto, q̄ est honorabilissima, utpote dea scientiarum.
Primum sic probat, metaphys. inuenta est propter ipsum
scire, & non propter utilitatem temporalem, nec propter o-
pus. ergo &c. consequentia patet. Antecedens probatur.
Inuenta est ad fugandam ignorantiam: nam primi Philoso-
phi videntes manifestos effectus, puta continuatam genera-
tionem in his inferioribus, eclipsim solis & lune, prolixita-
tem dierum in ætate, & breuitatem in hyeme, motum cœli
circularem continuum & regularem, varios planetarum mo-
tus, constituti in admiratione propter ignorantiam causarū
incepterunt philosophari, & cognitis causis cessauit ignoran-
tia, & admiratio, ad remotionem ignorantie sequitur scire,
sicut ad remotionem tenebrarum sequitur lux. si igitur li-
nis metaphysicæ est remotio ignorantie ad quam sequitur
scire, patet quòd inuenta est propter ipsum scire. ergo est spe-
culatiua, & quòd non sit inuenta propter utilitatem, & neces-
sitatem vitæ, signum est inquit Arist. ut etiam diximus supra,
quòd cum primis philosophantibus suppetere omnia ad
necessitatem vitæ, ad pigritiam, siue otium, ad delectationē
corporis, & cum iam essent inuentæ scientie necessariæ ad
eruditionem, ut grammatica, & logica, non intenta aliqua
utilitate, sed tantum gratia sciendi incepterunt philosopha-
ri, & inuenerunt hanc sapientiam. patet ergo eam esse spe-
culatiuam.

Secundum declaratur sic, sicut homo dicitur liber, quia
non est alterius, sed gratia sui, id est quia non ordinatur ad
alterum, sicut seruus ad dominum, nec indiget altero, sed si-
bi ipsi sufficit, & non accipit ex necessitate ab altero, immo
dat & auxiliatur alteri, sic hæc scientia est libera & maxime
libera, quoniam non ordinatur, nec respicit aliam, cum sit
suprema, nec indiget aliâ, quoniam ipsa in seipsa, ut declara-
bitur in 4. lib. stabilis principia sua, & ab ea accipiunt aliæ
scientiæ principia sua. stabilita, ex consequenti auxiliatur
omni

omni alteri, & omnes deferuiunt huic tanquam domine, vt optime declarat Auic. in 1. suæ Metaph. cap. 3. ideo est vltima in addiscendo. Disponitur enim intellectus ad cognitionem substantiarum diuinarum, quæ sunt de consideratione metaphysici per scientias naturales & mathematicas, præcipue per astrologiam, quæ tamen non potest haberi sine geometria, & arithmetica. ergo est libera & maxime libera. & licet multæ scientiæ possint dici liberales, quia acquiruntur ab animo libero, & expedito à curis, & necessitatibus temporalibus, tamen non proprie sunt liberæ, quia non sibi ipsi sufficiunt, vnde sola Metaph. est proprie liberæ, & cum multis alijs est liberalis.

Sed dices, si metaph. firmat principia scientiarum particularium, est ergo utilis eis, & deferuit, quomodo ergo est maxime libera?

Respondeo, vt inquit Auic. in 1. suæ Metaph. cap. 3. est quædam utilitas per modum seruitutis, & hæc exhibetur ab inferiori erga superiorem, & est quædam utilitas per modum influxus & conseruantis, & hæc exhibetur à superiori erga inferiorem, vnde Princeps est utilis subditis, & econuerso, sed subditi primo modo, & Princeps secundo modo. primus modus repugnat libertati, sed non secundus, & primus exhibetur à scientijs particularibus ipsi metaphysico, secundus autem econuerso, ideo non impeditur quin sit maxime libera.

Tertium sic probat, Natura hominum est multipliciter serua propter ægritudines, propter indigentiam exteriorum, propter nocumenta illata ab extrinseco, propter repugnantiam passionum, quibus omnibus impeditur, & distrahitur à speculatione, præcipue rerum diuinarum. ergo dato quòd aliquo modo attingat metaphysicam, non tamen potest eam possidere. Illud enim propriæ possidemus cuius sumus domini, & quo ad libitum vti possumus. vnde vt refert D. Alber. in primo Metaph. tract. 2. cap. 8. dixit Hermes Trismegistus possessionem esse id in quo per naturam sedet possidens quieto iure vtens, homo sedet in cognitione sensibiliu, & non diuinissimorum, sed intellectus simplex existens causa rerum per scientiam suam proprie est diuinorum.

simplicium. Propterea inquit Simonides, solum Deum gaudere hoc honore non tamen est verum quod dicunt alij poetæ, scilicet Deum invidere hominibus, & ideo non possunt ascendere ad perfectam diuinorum cognitionem. Hoc inquam falsum est, quoniam cum in Deo sit omne bonum, sicut omnis potentia ex bono extrinseco, nulla potest fieri sibi additio neque diminutio. ergo nulla sibi inest inuidia. Quod igitur homo non ascendat ad claram diuinorum cognitionem, non est quia Deus homini inuideat, sed quoniam ymbrosus est humanus intellectus, tendens in actum suum per phantasmata, à quibus penitus elongata sunt diuina.

Quartum sic probat, metaphysica est scientia maxime diuina, quia est de diuinis. Dictum est enim quod considerat primas & vniuersales causas, inter quas Deus est præcipua. deinde aliæ substantiæ separatæ, & quoniam Deus solus eam maxime habet: nam vt inquit D. Alber. in primo Metaph. tract. 2. cap. 8. diuina natura in nulla parte ancillans cognitionem à posterioribus non accipit, sed ex fonte, & cardine causarum omnium rerum, quæ est ipsamet præhabet composita simpliciter, temporalia in temporaliter materialia in materialiter intelligens. Et propterea merito dicitur dea scientiarum, diuina possessio prudentia & sapientia absolute, quoniam maxime perficit, clarificat, & firmat intellectum. vere ergo honorabilissima est, & licet aliæ sint necessariores homini, nulla tamen est dignior ista ex prædictis rationibus.

Et aduerte, quod Arist. hac de causa adeo magnificauit hanc scientiam, vt excitaret desiderium nostrum ad eam, quoniam licet non possimus eam habere per modum possessionis, sed tantum inquisitiue & discursiue, & valde obumbrate, tamen illud parum dignius est quacunque alia cognitione. siquidem efficitur homo diuinus, & per hanc assimilatur Deo, & efficitur felix, qualicunque vera felicitate possit homo pro hac vita felicitari. Propterea inquit Arist. in 10. Eth. sapiens Deo amicitissimus est, eundem autem verisimile & felicissimum: quare & si sic, erit sapiens maxime felix. Hæc de tertio cap. dicta sint.

CAPVT IIII.

IN quarto cap. inuestigandum est, quis sit vltimus terminus intentus in hac scientia. Aduerte igitur, & cum hac scientia non acquiratur ab homine simplici intelligentia, sic enim est diuina possessio, sed acquiritur inquisitione, & discursu, qui est motus intellectus, & cum in omni motu terminus à quo sit oppositus termino ad quem, ex 1. Phys. tex. 47. terminus intentus in consideratione metaphysica est illud quod opponitur ei à quo inceperunt homines venari metaphysicali, illud autem diximus esse ignorantiam causarum, & principiorum vniuersi entis, ex qua ignorantia causabatur admiratio. ergo terminus, & finis, huius negotij est cognitio causarum & principiorum totius entis, & cessatio admirationis, & ad id conatur totum studium metaphysicum, quo adepto erimus in termino huius inquisitionis, sicut Astrologus admirans, & nesciens causas duorum tropicorum solis, & causas eclipsium, incipit inquirere de huiusmodi causis, & cum inuenerit quiescit, nec amplius admiratur. Idem contingit geometræ super incommensuratione costæ & diametri. Idem accidit physico super admirabilibus impressionis meteoricis, quarum causis inuentis quiescit. Patet igitur, quòd cum peruenerit metaphysicus in cognitionem principiorum, & causarum entis, præcipue autem primi principij, qui est Deus gloriosus, tunc erit in quiete, & termino totius inquisitionis suæ. nam hæc est vltima intentio sua vnde & Auicenna. inquit in primo suæ Metaphys. cap. 3. Intentio vltima in hac scientia est cognitio gubernatoris Dei altissimi, & cognitio Angelorum spiritualium, & ordinum eorum, & cognitio ordinationis in comparatione ad circulos, id est ad sphaeras cœlestes &c. Hæc de quarto capite dicta sint.

CAPVT V.

IN quinto cap. declarandum est quàm ordinate processit Arist. in metaphysica sua. Aduerte igitur, & tota intentio Arist. fuit immorari in consideratione entis vniuersalis,

salis, & in primis causis eius, præcipue in prima causa efficiēte & finali, quod est totius naturæ bonum, & hoc secundum exoluet in lib. 12. tantum quantum ascendere potest intellectus noster ad diuina ex naturali inquisitione, ad quem librum omnes præcedentes sunt præparatorij. vt autem tradere possit notitiam de primis causis entis, necesse est, vt prius consideret de partibus entis, scilicet de substantia & accidente & de substantia quidem composita & simplici, & de partibus substantiæ compositæ, vt de materia & forma, & id facile in 6. lib. & 7. & 8. deinde de passionibus entis, vt de actu, & potentia, & vno, & multis, & de his, quæ consequuntur vnū, vt idem, simile, æquale, & sua opposita, cum sit eadem disciplina oppositorum, & de his quæ consequuntur multa, vt oppositio, contrarietas &c. & id peraget in lib. 9. & 10. sed de ente, & partibus, & passionibus suis determinare non potest, nisi prius stabiliat subiectum huius scientiæ, & principia sua, & declaret multipliciter terminorum metaphysicalium, ne laboret determinans in æquiuioco, & id faciet in 4. & 5. lib. verū quia circa vnumquodque scibile prius expedit mouere dubia, vt veritas magis elucescat, ideo antequam determinet de considerandis in hac scientia, prius mouet dubia, arguendo ad partes, & id faciet in 3. lib. & quoniam signum inuentæ veritatis est solutio dubitatorum. ideo antequam determinet dubia mota in 3. lib. prius pertractat de veritate vniuersali, & de modo inquirendi eam, nam huius scientiæ est considerare ens vniuersale, & verum vniuersale, sicut particulares scientiæ considerant de aliqua parte entis, vt de ente mobili, vel quanto, & de veritate particulari, circa tale obiectum, & id faciet in lib. 2. & quoniam, vt diximus, præcipua intentio Arist. est determinare de primis causis entis, ideo adducit sententias antiquorum de principijs rerum, tam intrinsecis quam extrinsecis, vt sciamus quid vere & non vere enunciatum sit ab illis, & id facit in libro primo. Et tu aduerte, quod hic non cōnumerauimus lib. vndecimum, quoniam est repetitio eorum, quæ iam determinata sunt, partim in libris naturalibus, partim in præcedentibus lib. Metaph. deseruiūt enim hæc per modum rememorationis & compendij, ad inuestigationem primarum causarum entis, de quibus ager

Arist.

Arist. in lib. 12. hunc quidem lib. vndecimum . relinquemus
veluti non necessarium præsentī proposito nostro . Potest
enim diligens lector exercere seipsum in repetendis iam au-
ditis, & determinatis, sed nec Comæ ent. Auer. nec D. Alber.
mentionem, nec expositionem fecerunt de hoc lib. vnde li-
ber duodecimus, apud eos nominatur vndecimus. Posito igitur
ordine obseruato ab Arist. in quo primum intentum est
vltimum in executione, & primum in executione est vltimū
in intentione .

Ideo primo loco, compendiose perstringemus sententias
antiquorum, de principijs rerum .

Secundo loco, agemus de veritate vniuersali, & modo in-
quirendi eam .

Tertio loco, formabimus dubia omnium consideratorū
in hac scientia .

Quarto loco, firmabimus subiectum eius, & passiones
suas, & sua prima principia complexa, quibus etiam innitū-
tur omnes scientiæ particulares .

Quinto loco, assignabimus multiplices modos, quibus
dicitur vnusquisque terminus metaphysicālis .

Sexto loco, agemus de Ente, vt diuiditur in ens per se, &
ens per accidens, & in ens in anima & extra animam, abijciē-
tes à cōsideratione metaphysici, ens in aīa, & ens per accñs .

Septimo loco, agemus de ente, vt diuiditur in substantiā,
& accidens, siue in decem prædicamenta, & prius quidem;
quo ad diffinitionem, & partes diffinitionis, hoc in 7. lib. 7.
lib. deinde quo ad principia realia, & hoc in 8. lib.

Octauo loco, consideratio fiet de ente, vt diuiditur per a-
ctum & potentiam .

Nono loco, agemus de ente, vt diuiditur per vnū & multa .

Decimo loco, agemus de primis causis entis, vt liber vlti-
mus correspondeat primo . Et hic erit finis cōsi-

derationis præsentis, nam in quacunque

scientia constituitur, finis in co-

gnitione causarum sui pro-

prij generis subiecti.

Hæc de 5. cap. dicta sint, & hic termi-
natur tractatus primus.

T R A C T A T V S S E C V N D V S, I N S E
complectens totum librum primum Metaphysica.

IN tract. præsentī perstringemus sententias antiquorum, de primis rerum causis. Et aduerte, q̄ summa omnium opin. stat in hoc.

Quidam ex antiquis nullam causam entium assignarunt.

Quidam posuerūt solam causam materiale.

Quidam materiale, & efficientem.

Quidam addiderunt formalem.

Quidam obscure, & per accidens tetigerunt causam finalem, sed nullus perfecte attigit eam & quoniam, ut determinatum est in 2. Phys. tantum quatuor sunt genera causarum, nec plura possunt dari: ideo omnes antiqui in hoc conueniunt, q̄ quamcunque causam inuenerunt eam ad aliquam diatarum quatuor reduxerunt, ita q̄ super quatuor nullam addiderunt. Distinguemus igitur præsentem tract. in 5. capita.

Primo, ponitur opinio eorum qui nullam causam posuerunt, & reprobat.

Secundo, opinio eorū qui solam causam materiale posuerunt, & reprobat.

Tertio, opinio eorum quia causam materiale, & efficientem posuerunt, & reprobat.

Quarto, opinio eorum qui causam formalem ultra materiale & efficientem tetigerunt, & improbat.

Quinto, opinio eorum qui visi sunt aliquo modo & balbutiendo causam finalem ponere, & reprobat.

C A P V T P R I M V M.

IN primo cap. adducenda est opinio eorum qui omnino causas rerum subtraxerunt. Vnde aduerte, q̄ isti fuerunt Parmenides & Melissus & Xenophanes, cuius discipulus dicitur fuisse Parmenides, & fuit clarioris ingenij, quàm magister eius. Isti igitur in rei veritate negauerunt omnem causam, nam dixerunt, quod est tantum vnum ens,

ita

ita q̄ omnia sunt vnum, non solum secundum materiam, vt aliqui antiqui posuerunt, vt dicemus infra de Thalete, & Diogene, & Heraclito, sed etiam secundum substantiam, & quoniam ponebant tantum vnum ens & immobile, ideo ne gabant omnem motum, & mutationem, ex consequenti omnem generationem, & corruptionem tam substantialem, quam accidentalem, ex quibus omnibus sequitur negatio cuiuscunque causalitatis, nam cum nihil sit sibi ipsi causa, quoniam causa & causatum opponuntur, necessario causalitas requirit diuersitatem & pluralitatem in rerum natura. Cum igitur isti auferant multitudinem ab ente & motum, subtrahunt omnino causam & causatum, propter quod relinquenti sunt à metaphysico, pro quanto scrutatur de causis: Supponit enim metaphysicus multa fundamenta naturalia, vt motum, & generationem, & corruptionem, ex consequenti supponit causalitatem aliquam in entibus. Tu tamen aduerte, vt inquit Arist. q̄ licet relinquenti sint ratione, qua negant causalitatem, tamen eorum opinio spectat ad metaphysicum, pro quanto videntur tangere formam, & materiam, quæ se habent vt actus & potentia, & vt sic ad metaphysicum spectant. Et quidem q̄ tangant formam & materiam, patet ex hoc, quoniam Parmenides dixit illud ens vnum immobile esse finitum, finitas autem & determinatio spectat ad formam. Melissus autem dixit esse infinitum, & infinitas spectat ad materiam ratione suæ potentialitatis. Xenophanes vero, vt rudior, neutrum tangit, sed, vt inquit Aristot. ad totum cælum respiciens ipsum vnum dicit esse Deum. Item aduerte sententiam Melissi & Xenophanis fuisse rudiores, vt patet ex ratione sua, quam Aristot. in primo Phys. tex. 23. adducit, & dicit eam magis onerosam, id est stultam. Parmenides autem visus est magis intelligens, quoniam licet teneret esse tantum vnum eas immobile secundum rationem, tamen ne sensum negaret, dicebat esse plura entia secundum sensum, & iuxta sensum ponebat duo principia, calidum & frigidum, attribuens primum igni, & secundum terræ. Horum reprobatio & solutio rationum suarum posita est diffuse in primo Physicorum. ideo noluit immorari hic ad reprobandum, & tu recurre ad primum Physicorum,

ne prolixiores simus sine utilitate. Hæc de primo capite dicta sint.

C A P V T I I.

IN secundo cap. adducenda est, & reprobanda opinio eorum, qui solam causam materialem posuerunt, & illi quidem in vno conueniunt, in alio differunt. Conueniunt quidem in hoc, q̄ causam rerum materialem dicunt illud cui conueniunt quatuor conditiones, quæ principio materiali conuenire videntur.

Primo, quòd sit illud ex quo res est.

Secundo, ex quo res per se generatur, dico per se, ad differentiam priuationis, vt declarauimus in 1. Phys. in tract. de principijs rerum naturalium.

Tertio, in quod vltimum omnia resoluuntur.

Quarto, q̄ tam in generatione, q̄ in corruptione manet s̄m substantiam, licet formæ & passionēs, & qualitates varientur. Oportet .n. contraria fieri circa idem, quod successive vtrique contrario subiicitur. Differunt autem, quoniam in positione huius principij aliqui assignant tantum vnum elementum, cui attribuunt quatuor prædictas conditiones, aliqui plura, sed finita, aliqui plura & infinita.

Qui ponunt tantum vnum, distincti sunt in tres actus.

Aliqui posuerunt aquam quorum princeps fuit Thales Milesius, qui solus inter septem Græciæ sapientes se occupauit in scientia speculatiua in considerandis rerum principijs, alij autem incumbabant moralibus. Hic existimauit omnium rerum corporalium, ex consequenti omnium entium, quoniam non apprehendit nisi ens corporeum, principium materiale esse aquam, ita q̄ quæcunque generantur, generantur ex aqua. Sumpsit autem suæ opinionis fundamentum ex eo, q̄ nutrimentum omnium se nutrientium est humidum, & pro manifesto habebat, q̄ ex eodem res nutritur, & generatur. ergo &c. Item ex eo q̄ spermata omnium animalium sunt humida, primum autem principium humidi est aqua. Item ex eo q̄ antiquissimi Poëtæ Theologi, qui per multa tempora præcesserunt Thaletem & alios Græciæ

ciz sapientes, posuerunt Oceanum & Thetyn deam aquarū
 parentes generationis, & Stygiam paludem, per quam, vt p
 quoddam sacrum, & honorabilius dii iurabant, nil aliud in-
 tendentes sub his velaminibus, nisi aquam esse principium,
 ex quo generantur omnia, sed & Hippon Philosophus eius-
 dem fuit sententiæ cum Thalete, nec sciuit aliud addere, im-
 mo nec forte ita manifeste locutus est propter sui intelle-
 ctus paruitatem. Eandem opin. Arist. tetigit in 1. Physic. tex.
 6. sed perfunctorie, nec Thaletem, nec Hipponem nomina-
 uit, nec eos dignatus est improbare. Hic autem improbabat,
 vt patebit infra.

Alij autem posuerunt aërem esse principium aliorum cor-
 porum simplicium, ex consequenti omnium compositorū,
 quoniam omnia composita sunt, ex primis simplicibus, ho-
 rum princeps fuit Anaximenes, & Diogenes discipulus Ana-
 ximenis. Accipere autem potuerunt fundamentum opinio-
 nis suæ ex eo, quod viderunt humidum frigidum esse prohi-
 bitium motus. Humidum autem calidum & nutritium
 & conseruatiuum esse viuificatiuum vitæ, vt plene declara-
 tum est in tract. de causa morte & vitæ. Idem autem apparet
 esse viuificatiuum & generatiuum. Est enim generatio via
 ad vitam, ergo humidum calidum est principium generatio-
 nis, hoc autem competit aëri, & humidum frigidum compe-
 tit aquæ. hac ergo ratione dissentiunt Anaxim. & Dio-
 genes à Thalete, qui fuit magister Anaximandri, & Anaxi-
 mander fuit magister Anaximenis. Anaximenes autem ma-
 gister fuit Diogenis. Eandem opinionem tetigit in primo
 Physic. tex. 6. sed eam non improbabat. hic autem impro-
 bavit, ut patebit infra.

Alij posuerunt ignem, vt Hyppasus Methapontinus, &
 Heraclitus Ephesius, & fundamentum eorum fuit, quoniam
 principium debet esse magnæ virtutis. videbant autem inter
 omnia elementa ignem esse virtuosiorē, vt patet ex sua a-
 ctuitate. Item debet esse simplex. nam si esset compositum,
 non esset primum rerum principium: posterius enim esset
 suis componentibus, inter omnia autem elementa ignis est
 simplicior, ut patet ex sua raritate. his igitur rationibus mo-
 ti dixerunt ignem esse primū rerum principium. argumen-
 tum

tum etiam sumebant à corporibus cœlestibus, & astris, & à lumine. nam apud antiquos, famosum erat cœlum, & alia esse naturæ igneæ, cum igitur ignis sit principium entium nobiliorum, quæ sunt principia entium inferiorum (pendet enim mundus inferior à mundo superiori) sequitur ipsum esse principium omnium entium corporalium, quæ sola credebant esse entia. Item videbant omnia generari luce cœlesti. lucem autem dicebant esse proprietatem ignis, quare &c. Eandem opin. tangit in primo Phys. tex. 6. sed eam non reprobavit sicut nec præcedentes, nisi in hoc, quòd in tex. 50. probavit in productione, & in omni fieri naturali non sufficere vnum principium, quoniam necesse est principia esse contraria: vnum autem non est contrarium sibi ipsi.

Antequam pertractemus opiniones eorum qui plura posuerunt principia, reprobandæ sunt præpositæ sectæ de unitate principij materialis. Et adverte, quòd Arist. duplici via improbat. Primo, quòd diminute locuti sunt. Secundo, quòd rationes eorum vanæ & friuolæ sunt. Diminute quidem locuti sunt, quoniam assignat solum causam, & principium substantiæ corporeæ, ultra quàm etiam datur substantia corporea, ut probabitur in lib. 12. cuius non potest esse principium aliquod elementorum, quoniam sicut non ens non est principium entis, sic corporeum nō potest esse principium incorporei. Præterea, ponentes tantum principium materiale nō servant motum, nec generationem, quoniam motus requirit principium mouens, siue causam efficientē, quam tamen non ponunt. ergo &c. Præterea, vnaquæque res corporea habet formam, per quàm constituitur actu. ergo forma est principium, de qua tamen nullam mentionem faciunt, patet ergo quod multipliciter diminute de principijs entium locuti sunt.

Quòd autem eorum rationes vanæ sint manifestatur, ex modo generationis ab eis assignato, nam dicunt omnia generari, ex illo elemento, quòd ponunt principium materiale, per rarefactionem, & condensationem, verbi gratia, ut dicit Comment. in 1. metaph. cōm. 12. qui ponunt ignem fingunt, quòd quando inspissatur fit aër, & cum aër inspissatur fit aqua, & cum aqua inspissatur fit terra. qui autem ponunt aërem,

aërem, fingunt quòd cum rarefit, fit ignis, cum inspissatur lic àqua. Qui ponunt aquam fingunt, quòd cum rarefit fit aër, cum inspissatur fit terra, sed quòd hoc vana sint, patet ex eo, quòd licet huiusmodi modus generationis, habeat aliquam apparentiam in quatuor elementis, quæ sunt prima corpora simplicia, vt declaratum est in lib. de generatione. tamen hic modus non potest seruari in compositis inanimatis & animatis: neque enim vt inquit illic Cōment. partes compositi, vt caro, & os, & neruus differunt sola raritate & densitate, sed quiditate & diffinitione, quæ sumuntur à proprijs formis. isti igitur vt diminute loquentes, & vane, relinquendi sunt.

Et ratio quidem assignata à Thalete nulla est, nam licet concedamus humidum esse principium materiale proximum, vt sperma in animalibus, non tamen est principium primū, illud enim nullam formam ex se habet, sed est in potentia ad omnem, vt declaratum est in primo Phys. tex. 69. Præterea concesso, quòd humidum esset principium materiale in animatis, sicut etiam est nutritium, ex hoc non sequitur, quòd sit assignatum vniuersale principium entium, vt in corporibus cœlestibus, & in igneis &c. Quòd autem dicit de Oceano, & Thety, & Stryge, poëtica figmenta sunt, & paruipendenda à Metaphysico.

Similiter ratio assignata à Diogene nulla est, quoniam humidum calidum cum habeat formam in actu non potest esse primum principium materiale, & dato quòd sit materia generationis, & nutritionis in rebus animatis, non tamen vniuersaliter in omnibus entibus, vt patet in aqua, & in terra, & in congelatis &c.

Similiter ratio assignata ab Hippaso, & Heraclito nulla est, nam perfectio non est de ratione principij materialis, immo imperfectio, vt dicitur in 12. metaph. tex. 54. cum sit potentiale. Est autem conditio efficientis & formæ, & finis, quoniam habet rationem boni, conceditur autem simplicitatem esse de ratione primi principij materialis, quoniam est primum in compositione, & vltimum ad quod fiat resolutio, ex consequenti necesse est ipsum carere omni compositione. id autem non competit igni, quoniam licet sit simplicior

plícior alijs elementis, non tamen caret omni compositione, cum enim sit corpus naturale, necesse est ipsum constare ex materia, & propria forma, ergo non potest esse primum principium materiale. Hæc de opinionibus dicentium dari tantum vnum principium materiale, & non assignantium quodcunque aliud principium, dicta sint.

Princeps autem eorum, qui ponunt plura principia materialia, fuit Empedocles, qui in sententia dixit tria.

Primo, quod terra sola non potest esse materia omnium, & præcipue in rebus animatis propter frigiditatem, & siccitatem, quæ sunt contrariæ vitæ. vita enim sistit in calido, & humido, bene adinuicem proportionatis, ex consequenti frigidum siccum destructiuum est vitæ, ut etiam declaratum est in tract. de causa morte, & vitæ.

Secundo dixit, quod materiale principium sunt ignis, ær, & aqua, quibus necesse est addere terram. Aduertebat enim composita, ut lapis, homo, planta, & alia multa esse solida, propriasque obtinere figuras, tria autem elementa, ex sua raritate non figurantur proprijs terminis, sed terminis alienis, ut igitur ex eis generarentur non solum fluida, sicut gummatica, oleum, vinum, mel, &c. sed etiam solida & dura, necesse est eis commiscere terram, quæ ex sua crassitie solida est, & præstat soliditatem his quibus admiscetur, sicut appositione farinæ aqua solidatur in pane.

Tertio dixit, quod hæc quatuor elementa in omni generatione & corruptione permanent secundum substantiam, & quæ res non generatur, nec corrumpitur, nisi secundum qualitates & figuras, quæ quidem generatio & corruptio erat per congregationem, & separationem quatuor elementorum, ita quod concordabat in hoc cum antiquis, qui negabant generationem & corruptionem substantialem, ut declaratum, & improbatum fuit in primo libro de generatione. Hæc fuit opinio Empedoclis, & sequentium eum, cuius etiam meminit Arist. in 1. Phys. tex. 32. & quoniam posuit finita, dicit Arist. in tex. 50. quod minus male sensit, quam Anaxagoras ponens infinita. Sed contra Emped. arguit multipliciter Arist. & nobis sufficiat duas ex rationibus suis adducere.

Primo sic: Necesse est prima principia semper manere: alio

alioquin non essent prima, si ex alijs prioribus, vel ex alterutris fierent, vt declaratum est in primo Physic. tex. 42. sed quatuor elementa non semper manent. patet enim ad sensum, qd ex aëre fit ignis, & ex aqua aër, vt declaratum est in libro de generatione, ergo non possunt esse primo prima principia materialia, licet sint prima corpora actiua & passiua adinuicem; quæ veniunt in mixtionem compositorum.

Secundo sic: Si quatuor elementa sunt prima materia, ergo non potest saluari alteratio. nam cum alteratio sit ex contrario in contrarium, impossibile est ex calido fieri frigidum, & econuerso, nec ex humido siccum, nisi sit vnum idem subiectum, à quo expellitur vnum contrarium, & in quo recipitur aliud, cogitur igitur Empedocles, vel negare alterationem, vel ultra quatuor, elementa contraria ponere aliquod vnum commune subiectum receptiuum successiue diuersarum formarum, & contrariarum qualitatum, quod sit semper manens, & hoc erit primo primū principium materiale, & hac via processit Arist. in 1. physic. tex. 60. ad inuestigationem materię primæ, & per quā soluat contra antiquos generationem, & corruptionem substantialem, quas nescierunt saluare antiqui, quia non posuerunt primum principium materiale, nisi aliquod corpus naturale actu, vt ignē, aquam, &c. Hęc de opinione ponentium plura principia materialia, sed finita, dicta sint. Nunc appositionem opinantium ea esse infinita transeamus.

Qui posuerunt principia materialia rerum infinita, diuisi sunt in duas partes.

Prima, posuit ea esse infinita minima & diuersarum naturarum, vt infinite partes minime carnis, nerui, ossis, & medullæ.

Secunda, posuit ea infinita indiuisibilia, siue atoma, & omnia eiusdem naturæ, quo ad substantiam, sed differentia in figura, positione, & ordine.

Primæ sectæ auctor fuit Anaxagoras, auditor Anaximenes, condiscipulus Diogenis, ætate prior Empedocle, sed doctrina inferior, quoniam petus sensit de principijs rerum ponens ea infinita, quam Empedocles, vt testatur etiam Arist. in 1. physic. tex. 41. dicens. Melius autem est minora & fi-

nita

nita suscipere, quod vere facit Empedocles . Anaxagoræ autem opinio stat in tribus .

Primo, dixit non solum quatuor elementa esse materiam omnium rerum corporearum, sed quodcunque corpus consimilium partium , quorum infinitas partes posuit adinuicē commisceri .

Secundo , dixit in quolibet esse infinitas partes singulorum, ut infinitæ partes ignis in aëre, carnis in ossē, & hoc idē, quia videbat vnum, ex alio generari . Propterea, dixit quodlibet in quolibet, & quodlibet fieri ex quolibet .

Tertio, dixit generationem rerum fieri per segregationē consimilium partium, & congregationem earum adinuicē , & non aliter , ita quod sicut etiam dicebant antiqui, huiusmodi principia materialia semper manebant, & nihil secundum substantiam generatur, aut corrumpitur . Quæ autem esset causa segregans à mixtura huiusmodi partes & congregans adinuicem, dicemus infra . Eandem opinionem recipit, & diffuse reprobauit in primo Phys. à tex. 3. vsque ad tex. 41.

Hic autē compendiosius eum improbat ; & intendit tria .

Primo, quantum ad ea, quæ in verbis suis sonant, pessime & absurde dixit, & primo cum videamus nunc partes vniuersi esse abinuicem distinctas, in qua distinctione stat perfectio vniuersi, non est maior ratio dicere , quod nunc sint distinctæ quàm in principio mundi . Absurdum ergo fuit dicere, ab initio omnia fuisse confusa in vno chao & indistincta , & præcipue, quoniam ut probatum est in 8. Phys. mundus , & motus cœli est æternus . ergo distinctio partium mundi est æterna .

Secundo, quia impermixtum & permixtum sunt , ut simplex & compositum . Simplex autem prius est, quàm compositum . ergo entia prius fuerunt impermixta quam permixta, cuius contrarium posuit Anaxagoras .

Tertio , non quodlibet aptum natum est permisceri cui-libet , sed ea quæ adinuicem alterabilia sunt donec fiat ex eis forma media, ut patet de luto, de pane, de melicrate , de oxymeli . ergo absurdum est ponere omnia indistinctæ esse permixta .

Quarto .

Quarto, si omnia per mixta sunt separabilia abinuicem, cum qualitates, & quantitates, & cetera accidentia sint mixta siue vnita substantijs, poterunt separari à substantijs, & esse per se, ex consequenti accidentia fient substantiæ, quod est impossibile. Cum igitur tot absurda contineat opinio Anaxagoræ, secundum verba sonant, relinquenda est.

Secundo dicit Arist. q̄ si quis consideret intellectum Anaxagoræ, quem tamen nesciunt exprimere, forte apparebit dicere, quid profundius, & mirabilius quam alij. Nam forte per illud mixtum somniabat materiam primam, licet nesciret eam exprimere. Certum est enim quod illud mixtū siue chaos, non erat aliquod determinatum nec distinctum, nec in eo continebantur aliqua distincte, aliter non fuissent omnia in simul confusa. non ergo album, non nigrum, nec rubeum, nec alicuius distincti saporis, nec aliquod determinate quantum, nec certa substantia, puta vel homo, vel lapis si. n. fuissent aliquæ distinctæ species in eo, non fuisse chaos & cum per separationem fierent omnia corpora distincta actione primi intellectus separantis, sequitur quod omnia erant in potentia in illo mixto. hæc autem est conditio materiæ primæ, vt, scilicet sit in potentia ad omnem formam & nullam habeat ex se actū, sed reducatur ad actum actione agentis naturalis. si ergo Anaxagoras hoc intendebat, licet nesciret explicare, mirabiliter locutus est. Si autem per mixtum intendebat latentiam omnium formarum acta, tunc vt inquit Cōment. primo Metaph. comment. 16. intendebat Anaxagoras, per istos sermones facere sibi fimbrias, & propter laudem, & non propter aliquam opinionem famosam defendendam, quia suo tempore non erat lex, quam defenderet.

Tertio, dicit Arist. quod quoniam sermones Anaxagoræ versantur circa generationem & corruptionem rerum mobilium, & huius consideratio est propria physici, ideo sufficit, sic reprobasse eum, quasi dicat si perfecta, & propriareprobatio quæritur. recurrendum est ad philosophiam naturalem, & tu vide in primo Physicorum à tex. 33. vsque ad 41. Hæc de secta Anaxagoræ dicta sint.

Secundæ sectæ auctor fuit Leucippus, & eius collega De
Epit. Iauelli. B democritus.

moeritus . Horum quidem sententiam Arist. in j. Metaph. pertrinxit dicens , q̄ posuerunt rerum principia plenum & vacuum , vt possent seruare motum . Arbitrabantur enim nihil posse moueri in pleno , ne plura corpora essent simul . motus ergo erit in vacuo , & plenum quidem attribuebant enti , vacuum autem non enti , quoniam est priuatio , ex consequenti autem dicebant principia rerum esse ens & non ens . Dicebant insuper entia genita non distingui secundum substantiam , sed tantum figura & situ & ordine partiu , sicut syllabæ non distinguuntur essentialiter à literis , sed tantum figura & situ & ordine literarum . aliam enim figuram continet mo , quam ma , & aliam situm , & ordinem continet na , quam an . Dicebant vltius rem generari ex congregatione corporum infinitorum indiuisibilium , quæ quidem omnia sunt eiusdem naturæ , sed distinguuntur figura , quoniã alia triangularia , alia quadrangularia &c. & distinguuntur situ dum congregantur , quoniam alia à dextris , alia sursum &c. situantur , & distinguuntur ordinæ , quoniam alia prius , alia posterius congregantur . Et motuum quidem eorum fuit , vt refert Arist. in primo libro de generatione tex. 9. quia crediderunt sicut corpus est omnino diuisibile in potentia , sit ponere actu omnino diuisum non sit inconueniens . si autem sit omnino diuisum , ergo partes nō sunt amplius diuisibiles , ergo stat diuisio ad indiuisibilia , & quoniã compositio opponitur diuisioni , igitur compositio erit ex indiuisibilibus .

Sed vt arguit Arist. contra eos in primo libro de generatione . tex. 9. Si compositio fieret ex indiuisibilibus , compositum esset non quantum , quoniam indiuisibile additum indiuisibili tangit secundum totum , ex consequenti non faciunt quantum . vnde si infinita puncta se tangerent , cum non distinguerentur situ , non essent plusquam vnus punctus . Motuum autem eorum nihil est , non est enim necesse omne quod est in potentia , posse simul esse , & secundum se totum reduci ad actum , vt patet in successiuis , & de materia prima , quæ est in potentia ad omnes formas , & tamen est impossibile eam simul actuari omnibus formis . sic proposito , licet conuinum sit secundum omnem partem , & secundum om-

ne signum diuisibile, tamen repugnat esse totum diuisum actu, quoniam omnis pars adhuc est diuisibilis in minora, nunquam tamen in indiuisibilia. Hæc de secta Leucippi, & Democriti dicta sint. Et hic terminatur secundum caput.

C A P V T I I I.

IN tertio cap. ponenda est opinio dicentium duo esse rerum principia, scilicet materiale, & efficiens, qui ipsa veritate excitati cognouerunt ex materia nihil produci, nisi adsit mouens ipsam per alterationem, vel per rarefactionem, vel condensationem, ut varix rerum species producantur. isti igitur diuiduntur in tres sectas.

Primæ sectæ auctor fuit Anaxagoras, qui introduxit primum intellectum distinguentem, & separantem diuersas partes indistinctas in illo mixto, & ex eis extractis, & adinuicem congregatis producentem varias rerum naturas. Quæ quidem intellectum distinctum & immixtum illis naturis corporeis posuit, ut eas posset separare. Aduertit enim quod si & ipse mixtus, ac corporeus fuisset, non haberet maiorem virtutem separandi, quam cetera corporea. unde sicut receptiuum debet esse denudatum à natura recepti, sic separatiuum aliquorum mixtorum debet esse denudatum à natura ipsorum.

Hæc fuit positio Anaxagoræ de principio efficiente, quæ dicit Arist. esse deficientem, quoniam non videtur hoc intellectu nisi in assignando necessario in generatione mundi, puta interrogatus Anaxag. quare tot sunt cæli, quare octaua sphaera tot habet stellas, sphaeræ autem planetarum vnam, quare tot moribus mouentur, quare elementa sic locantur, sic mouentur, respondebat id totum prouenire ea primo intellectu sic mouente, & disponente, in generatione autem rerum particularium non utebatur intellectu ut efficiente, sed. nec aliud efficiens assignabat, nisi segregationem, quæ non est efficiens nec mouens, sed effectus & motus segregantis. Patet igitur, quod ex inconsideratione vel impotentia intellectus, diminute valde locutus est de principio rerum efficiente.

Secundæ sectæ auctor fuit Hesiodus vetustissimus poëta,

tarum describentium diuina, hic primus posuit amorem esse principium motiuium, & productiuum omnium, vnde scripsit, quod amor condocet immortalia, id est dirigit, & mouet Deos ad productionem rerum ex chao, & motiuum quidem suum fuit, quoniam videmus in nobis amorem esse primum motiuum ad operandum, nec prima ratio communicandi bonum est alia quam amor. Idem existimauit contingere Hesiodus in rerum, & mundi productione. Hesiodo consensit Parmenides, qui licet, vt diximus supra, poneret tantum vnum ens secundum rationem, tamen secundum sensum ponebat plura principia materialia, scilicet ignem, & terram, & posuit amorem, vt virtutem productiuam, vnde tentans demonstrare vniuersi generationem dixit, deorum amorem fore prouidentem omnibus, id est amor mouet deos ad productionem rerum & totius vniuersi.

De hac secta non multum curat Aristot. quoniam non vt Philosophi inuestigandæ rerum veritati insudabant, sed ut poetæ varijs modis delectabilibus, & figuris nitebantur suadere homini, & allicere ad diuina. Tu tamen aduerte dictum Hesiodi, & Parmenidis esse verum in ratione causæ finalis, non in ratione causæ efficientis. amor enim trahit agens ad operandum sicut & bonum, quod est obiectum desiderantis, sed vt dicemus infra, Philosophi qui videntur attingere causam finalem, non attingunt eam per se, sed per accidens, pro quanto non distinguunt inter causam efficientem & finalem, & id ad plenum declarabitur in 5. cap. Positio ergo hæc non est improbanda vt falsa, sed quoniam amor non attribunt causalitatem quæ conuenit ei per se, quæ autem conuenit ei per accidens est causalitas efficientis. nam amor sicut & bono, ex ratione sua sibi conuenit esse id gratia cuius aliquid fit, non autem esse effectiuum, & productiuum.

Tertiæ sectæ auctor fuit Empedocles, qui vltra quatuor elementa introduxit duo principia productiua, scilicet amorem & odium, siue amicitiam & litem. Et motiuum quidem suum fuit, quoniam aduertit in vniuerso esse bona, & mala vt contraria, immo mala esse plura quam bona, & multa inordinata. Amor autem cum sit circa bonum non potest esse

esse causa, nisi boni . Igitur causa productiua mali debet esse contraria amanti . his autem & odium contrariantur amanti , ergo productiuum boni est amor , mali autem erit odium . Et sicut sunt duæ causæ productiuæ contrariæ , & duo producta contraria, sic sunt apud Empedoclem duo modi producendi contrarij . nam amor agit per congregationem, odium autem per separationem . Hæc fuit positio Empedoclis , qui quo ad amorem concordat cum Hesiodo , & Parmenide , in lite autem discordat .

Sed Arist. reprobatur ipsum, non quasi dicentem falsa (licet falsum dicat, scilicet amorem esse causam boni , ex consequenti bonum esse causam boni, & odium causam mali . ex consequenti malum esse causam mali . nam ut dicemus in lib. 12. bonum est causa boni & mali , sed boni per se, mali per accidens) sed diminutum & deficientem in assignatione causæ efficientis, & hoc dupliciter .

Primo , quia ex positione sua non potest sustinere amorem esse causam omnis boni , immo aliqua sunt ab odio, ut distinctio partium vniuersi, & aliqua mala sunt ab amore, ut confusio partium vniuersi .

Secundo, quia non potest sustinere amorem semper agere per congregationem, immo congregat, & separat secundum positionem suam . nam dominante amore secundum ipsum partes vniuersi confunduntur, & immiscentur, adinuicem , licet autem confunduntur , & immiscantur adinuicem, licet autem congregentur, pro quanto secundum se tota non remanet distincta secundum situm , tamen non miscantur adinuicem , nisi eorum miscibile diuidatur in minutissimas partes & vniatur alteri , ut patet . si ergo amor debet unire aquam terræ, & sic de alijs elementis, necesse est ut separet earum partes, & adinuicem vniat . ergo amor congregat, & disgregat . Idem dico ex parte odij . nam ipso dominante non separat elementa situ, nisi extrahat partes vnius elementi immixtas alteri , & vniat in vnum , ac reducat ad proprium situm . Patet ergo quam insufficienter assignauit causam efficientem, & modum agendi ab ipso assignatum non potest sustinere . Hæc de tertio capite dicta sint .

IN quarto cap. Inuestigandum est, si aliqui ultra causam materialem, & efficientem peruenerunt ad cognitionem causæ formalis, qua rei substantia constituitur, & à qua sumitur diffinitio. Aduerte igitur ad mentem Arist. quòd nullus clare eam posuit qui fuerit ante viam Platonis. Dico clare quoniam nullus eam expressit, licet obscure, & interpretatiue videatur illi approximare, sicut Empedocles, qui posuit os, & carnem habere aliquam rationem, per quam sunt huiusmodi, tamen illam non expressit per modum causæ formalis. Dico ante viam Platonis, quoniam licet Pythagoras, & Alcmaeon Crotoniates, qui cepit philosophari existente iam sene Pythagora, posuerint altiora principia rerum quam Philosophi antiqui naturales, de quibus diximus in 2. & 3. cap. (posuerunt enim unitatem, & numerum esse rerum principia, contra quos disputabat Arist. in lib. 10. quæ possunt applicari naturis sensibilibus & insensibilibus, nam & in rebus incorporeis inuenitur unitas & numerus, non autem ignis, aut aqua, nec aliud elementum corporeum) non tamen expresserunt causam formalem: immo omnia principia ab eis posita videntur reduci ad causam materialem, quod ex hoc patet, quoniam ponebant prima rerum principia esse contraria, vt finitum & infinitum, par & impar, vnum & plura, dextrum & sinistrum, masculinum & foemininum, quiescens & motum, rectum & curuum, lucem & tenebram, bonum & malum, quadratum & quadrangulum, altera parte longius. Hanc autem contrarietatem necesse est accipere ex parte principij materialis, quoniam vt inquit Aristot. ex principijs ab eis positis inter quæ ponunt contrarietatem, dicunt substantiam rei plasmari, vt ex eis quæ insunt, quæ est conditio materiz ad differentiam priuationis, ex qua licet res fiat ex non musico musicum, tamen non permanet in re facta, ex primo. Physicæ 60. Item dico ante viam Platonis, quoniam ipse expressè causas formales introduxit, quas vocat species siue ideas, de quibus proprie dicit haberi scientiam & diffinitiones, nam vt clarius videtur

debitur in lib. 7. dixit ideas esse causas singularium, quo ad esse & generationem scientiæ nostræ. non enim potest sciri nec diffiniri hic homo, sed homo, vt homo, quem vocat per se homo.

Sed contra Pythagoram arguit Arist. triplici ratione.

Primo, quoniam ex principiis contrariis non fit aliquid, nisi actione agentis expellentis vnum, & introducentis alterum in eodem subiecto, sed Pythagoras, ex hoc quod ponit numeros & passiones numerorum esse principia, ex quibus rei substantia constituitur, non assignat causam motus nec generationis, in genere causæ efficientis, ergo diminute locutus est.

Secundo principia, ex quibus res constituitur sunt causa proprietatum eius (fluunt enim passiones à principiis constitutiuis, vt risibile à rationali anima, graue ab elemento prædominante) sed à numeris non potest trahi ratio, quare aliqua sunt leuia, aliqua graua, aliqua lucida, aliqua opaca. nam numeri secundum Pythagoram ita sunt principia corporum mathematicorum, sicut corporum naturalium, ergo quantum sit ex se non sunt causa proprietatum naturalium, aliter ita causarēt eas in mathematicis, sicut in naturalibus videmus enim, quod vbicunque, & in quocunque concurrunt elementa causant aliquam ex his proprietatibus, ergo insufficiens locutus est.

Tertio, Pythagoras videtur dicere duo impossibilia. nam dicit numeros esse principia, ex quibus constant corpora cœlestia, & hæc inferiora, & dicit eundem esse numerum constitutiuum vtriusque. Hæc autem non stant simul, quoniam corruptibile, & incorruptibile non possunt esse eadem principia materialia. Quale enim est compositum talia sunt componentia &c. & in hoc melius sensit Plato, qui etsi existimauit corpora cœlestia, & inferiora componi ex numeris, tamen alium dixit esse numerum cœlorum, & alium inferiorum, & illum esse causam istius. Hæc de sententia Pythagorica circa prima rerum principia dicta sint.

Contra Platonem autem, quo ad positionem specierum in genere causæ formalis, multipliciter arguit, & primo sic:

Id à quo sumitur substantia rei, & per quod in esse constituitur, est intrinsecum rei, non enim possibile est Socratem vivere, nisi anima sibi intrinseca, nec aquam esse calidam nisi calore sibi intrinseco. Cum igitur ideæ secundum Platonē sint formæ separatæ, non possunt esse causæ formales, à quibus sumatur rerum substantia, & per quas constituantur in esse. Secundo, à causa formali fluunt proprietates rerum, ut ab anima potentia suæ, à forma grauis, grauitas, à forma leuis, leuitas, sed ab ideis separatis impossibile est fluere proprietates rerum sensibilibus. proprium est enim rerum sensibilibus subijci motui, & tempori, & loco. Hæc autem non fluunt ab ideis, quoniam secundum Platonem immobiles, inalterabiles, insensibiles sunt & per se, & per accidens, verū quia de his diffuse, iterum disputabit in lib. 7. ubi declarabit, quòd positio idearum nihil proficit, ideo pro nunc transeo prolixas improbationes, quas ponit in hoc primo libro, ne in vanum laboremus. Hæc de quarto cap. dicta sint. Nunc superest inquirere de principio finali.

CAPVT V.

IN quinto cap. inuestigandum est, si qui ultra principium materiale, & efficiens, & formale, perueniunt in cognitionem causæ finalis. Tu igitur aduerte, quod ut inquit Aristoteles in fine huius libri primi, Philosophia à principio visa est sicut infantia balbutiens, quæ ut noua in sermone licet incipiat proferre omnes terminos idiomatis, tam in perfecte proferre nescit, nec potest debilitate instrumentorum naturalium, sed balbutiens obscure & truncate loquitur, sic primi Philosophi excitati ex ignorantia causarum inceperunt eas inquirere, & omnia quatuor genera causarum, quæ pertractata sunt in 2. phys. visi sunt tetigisse, & quintum addere non potuerunt, quoniam pro rei veritate non est dabile, tamen ex difficultate negocij, & debilitate ingenij veluti infantes, nullus clare, & sub propria ratione propriæ causalitatis eas expressit. sed adeo obscure locuti sunt, quod nullam videntur attingisse. nam & Anaxagoras de causa materiali, ut diximus recitantes sententiam suam potius somniauit, quàm aliquid

aliquid vere pronunciauerit . De causa efficiente Empedocles, & Hesiodus & alij minutissime locuti sunt . Assignat enim rationem agendi pro agente & efficiente , vt diximus in tertio cap. Idem patet de formali , vt diximus in quarto cap. Idem nunc declarandum est, de causa finali, quam aliqui videntur attigisse & non attigisse . Attigisse quidem per accidens, non attigisse autem per se . Pro cuius notitia aduerte, quod aliqui posuerunt amorem, & bonum esse causam rerum . Quod quidem potest esse dupliciter .

Primo, vt factiuum & productiuum boni . est enim bonum à bono , sicut calidum à calido .

Secundo , vt illud gratia cuius aliquid fit, vt medicus dat medicinam propter sanitatem apprehensam sub ratione boni . hic secundus modus conuenit causæ finali per se , quoniam in eo cõsistit propria ratio sua, omnis autem alius modus conuenit ei per accidens, non enim per rationem boni, ut est finis, est esse productiuum, sed esse illud gratia cuius produciens producit, est enim terminus intentionis ipsius producentis, & in ipso terminatur motus, quæ ratio, vt inquit Arist. aliqui philosophi considerauerunt, id quod est finis, puta bonum, vt à quo, & non vt gratia cuius aliquid fit, dicit attingerunt causam finalem non simpliciter, & per se, id est secundum propriam rationem, sed per accidens , id est quo ad suum materiale, vel vt sibi attribuunt causalitatem causæ efficientis, quæ conuenit ei per accidens, sicut formæ per accidens conuenit esse subiectum, nam formæ, vt forma conuenit actuare, non autem recipere aut subijci . verum est igitur dicere antiquos attigisse , & non attigisse causam finale modo expõsito . Et hic terminatur secundus tract. in

quo complexi sumus sententias præcedentium

Arist. de primis rerum causis, in quarum co-

gnitione est terminus considerationis

metaphysicalis . Hæc dicta sunt


super primo libro Me-

taphysicæ .

¶

Biisdem

EIVSDEM CHRYSOSTOMI
IAVELLI CANAPITII
E P I T O M E
S V P E R S E C V N D O L I B R O
M E T A P H Y S I C A E.



OSTQVAM in primo libro
visum est, quid senserint anti-
qui de primis rerum causis, in
hoc secundo libro, iuxta ordi-
nem assignatum in cap. 5. pri-
mi tractatus primi libri agen-
dum est de veritate simpliciter
sumpta, & totam mentem Ari-
stotelis complectemur in vni-
co tract. quem distinguemus
in tria capita.

Primo, quod consideratio veritatis est nobis facilis & dif-
ficilis.

Secundo, quòd Metaphysica proprie & maxime habet cõ-
siderare veritatem absolute.

Tertio, quis sit conueniens modus considerandi; & inue-
stigandi veritatem.

C A P V T P R I M V M



IN primo capite declarandum est, quomodo
& qualiter consideratio est nobis pro hac vi-
ta facilis, & difficilis, pro cuius resolutione
agemus tria.

Primo, proponemus aliquas distinctiones.

Secundo, aliquas conclusiones cum probationibus suis.

Tertio, declarabimus, quomodo homines incumbentes
studijs

studij scientiarum iuuant seinuicem, & minuunt difficultatem inuestigandæ veritatis.

Quantum ad primum, aduerte, quòd inquisitio veritatis potest esse circa terminos vniuersalissimos, & primas propositiones, quas dicimus principia prima, & naturalia, & potest esse circa terminos proprios, & propria principia, vt circa propria genera, & differentias, & proprietates, & definitiones vniuscuiusque naturæ. Præterea, rerum cognoscibilium quædam sunt sensibiles materiales, quædam non subiectæ sensui immateriales, quales sunt anima intellectiua, intelligentiæ, & Deus. Præterea, cum veritas dicat respectum rei & intellectus, qui respectus dicitur adæquatio siue conformitas, vt declarauimus in tract. de Transcend. facilitas & difficultas cognoscendæ veritatis potest prouenire ex parte rei, & ex parte intellectus. Ex parte quidem rei, quoniam est modicæ entitatis, vt materia prima, relationes, entia, successiua, nam quia vnumquodque intantum est intelligibile, inquantum est ens, & intantum ens, inquantum est actu. Cum huiusmodi magis sint potentialia, quàm actu, ideo eorum natura parum, & cum difficultate sunt intelligibilia. Ex parte autem nostri intellectus, quoniam est intellectus potentialis & materialis, ex 3. de Anima tex. 5. vnde respectu entium, quæ maxime sunt actu, vt intelligentiæ, & Deus, cum sint sine omni materia, difficultas cognoscendi est ex parte intellectus nostri, sicut difficultas intuenendi solem, est ex debilitate visus nostri.

Quantum ad secundum, propono aliquas conclusiones, quarum prima sit hæc.

Prima conclusio, Via inducens nos ad veritatem, non est nobis impossibilis, hanc sic probat Comment. in 2. Metaph. comment. 1. Cum habeamus naturale desiderium ad sciendum veritatem, si apprehensio eius esset nobis impossibilis, tunc desiderium esset otiosum. Concessum est autem ab omnibus, quòd nulla res est otiosa in fundamento naturæ & creaturæ. ergo &c. Propterea dicit Comment. credimus necessario nos scire veritatem in multis rebus.

Secunda conclusio, Apprehensio veritatis est nobis facilis, & difficilis Et quidem, & sic facilis ostenditur tripliciter.

Primo,

Primo, quia nullus est adeo rudis, qui sit omnino expers veritatis, modo possit uti ratione. vnde nullus antiquorum inuentus est, qui incumbens huic inquisitioni non enunciauerit aliquid de veritate, ex ipsa veritate compulsus, licet balbutiēdo & truncate enunciauerit.

Secundo, quia ut inquit Comment. & Arist. licet quilibet particularis homo parum de veritate inuenerit, tamen ex omnibus inuentis facta est magna aggregatio, ita quod in breui tempore philosophia maximum augmentum suscepit, vnde inuentio totius, aut magnæ quantitatis de veritate cum breui tempore, ut inquit Comment. indicat eius facilitatem.

Tertio, quia prima principia complexa, per quæ tanquā per ianuam patentem datur ingressus ad veritatem rerum perscrutandam, sunt nobis naturale cognita, ita quod in eis non contingit errare, sicut nullus errat in foribus domus, quoniam omnibus sunt manifesto. contingit autem error, & difficultas in deducendis conclusionibus à principijs per se notis. Igitur apprehensio veritatis saltem quo ad principia prima est nobis facilis, vnde inquit Commen. in 3. lib. comment. primo & est facilis secundum hunc modum, quod in quolibet genere entium sunt aliqua in respectu eorum, quasi ianua domus in respectu domus in hoc, quod non latent aliquem, & ista sunt prima cognita, naturaliter habita à nobis in quolibet genere entium &c.

Quod autem sit difficilis ostendit Arist. ex eo quod ut inquit Comment. nullus singularis homo comprehendit totam veritatem de rebus, nec magnam partem, licet ut diximus ex inuentis à multis magnum augmentum suscepit, & propterea, ut inquit D. Alber. in secundo lib. cap. primo dixit Arist. in proœm. quod hæc sapientia versatur circa difficilia cognita, & quod est potius diuina possessio, quam humana, & quod tamen homo aliquāter apprehendit eam, quoniam naturale desiderium habet ad illam, quod non potest esse otiosum. Veruntamen aduerte dictum Ptolemæi adductum à D. Alber. in eodem cap. cum inquit, si aliqua scientia secundum aliquid exaltata est supra nosse nostrum, & secundum aliquid est apprehensibilis, omnino stultus est qui

qui negligit eam propter desperationem illius partis, secundum quam exaltatur supra nostrum nosse, sic enim & omnia sensibilia possent negligi, quoniam in humanis inuentionibus nihil ex omni parte perfectum, sic igitur in apprehensione veritatis vniuersalis illius, quæ pro foribus sunt, in primis innitentes nitemur paulatim ad ea quæ magis distant à cognitione humana.

Tercia conclusio, Difficultas apprehendendæ veritatis rerum materialium, & sensibilium est ex parte earum, difficultas autem circa res immateriales, & abstractis est ex parte intellectus nostri, sicut difficultas videndi solem in sphaera sua, est ex parte nocturæ.

Pro euidencia huius conclusionis antequam probetur, aduerte, quod triplex est intellectus, & triplex intelligibile, con forme triplici lumini solari.

Primus, quidem intellectus est diuinus, qui est purissima lux intellectualis, qui præhabens omnia in seipso, limpidissime omnia intelligit, & est sicut lux solis in rota sua, quæ est vniuersalis causa omnium luminum extra ipsum.

Secundus, est intellectus intelligentiæ, qui participatione luminis primæ causæ radiantis super ipsum intelligit omnia, & quoniam hi duo intellectus semper incipiunt à lumine, nunquam admiscuntur tenebris, nec erroribus, nec falsitati.

Tertius, est intellectus animæ nostræ, quæ quoniam continet in se gradum sensituum, & gradus inferiores sensitui, ideo habet intellectum admixtum imaginationi & sensui, cuius intellectio incipit à debili lumine admixto tenebris, sicut est lumen auroræ, & per separationem à conditionibus materialibus paulatim eleuatur, & per assiduum studium tandem deuenit in intelligibile sincerum, & est in sui inceptione, sicut oculus nocturæ. In progressu tamen speculationum suarum differt ab oculo nocturæ, in hoc quod noctura nunquam adeo confortatur, quod deueniat ad intuitum sinceri luminis. Intellectus autem noster ex assiduo studio adeo in lumine suo confortatur, quod ab intellectu obscura ad claram & sinceram deuenit, & coadunito lumine suo ascendit per gradus vsque ad intellectiorem primæ causæ,
& in

& in hoc est summa felicitas, cuius meminit Arist. in 1. Eth. & ibi est finis desiderij, quo homo naturaliter scire desiderat.

Primum, autem intelligibile est primum principium nihil habens potentialitatis obumbrantis, & minuentis intelligibilitatem, sed est merus actus incircumscriptus illimitatus in se continens plenitudinem entis, & assimilatur luci solari in sole complantata nullis umbris admixta, sed ut mera lux in se continet lucis plenitudinem.

Secundum, intelligibile est substantia intelligentiæ, nulli materiæ, nec quantitati, nec mutationi physicæ admixta, sed immaterialis, æterna, secundum se totam intellectualis existens, & assimilatur lumini solari egredienti à sole immediate in recepto & serenissimo aëre ab omni extraneo & nebulofo vapore depurato.

Tertium, intelligibile est res corporea materialis sensui & mutationi subiecta, plures in se continens gradus, ut substantiam, accidentia sensibilia, inter quæ quædam sunt permanentia, ut quantitas, qualitas, relatio, quædam successiua, ut motus, tempus, actio, passio &c. & assimilatur lumini solari admixto tenebris, ut in aurora, & in aëre caligine consperso. His propositis annecto duas conclusiones.

Prima conclusio, Difficultas apprehendendi quiditatie, primum & secundum intelligibile non est ex parte rei, sed ex parte intellectus animæ nostræ.

Prima pars, sic probatur ad mentem Comment. in 2. lib. cōment. 1. Cum sint entia abstracta, sunt in se actu naturaliter intellecta, id est cum sint sine materia, sunt ex sui natura intelligibilia actu. ergo quantum sit ex se, sunt summe intelligibilia, sicut lumen in sole, & lumen receptum in purissimo aëre est perfectissime visibile.

Secunda pars, sic probatur secundum mentem B. Thom. exponentis, si difficultas non esset ex parte intellectus nostri. ergo maxime cognosceremus huiusmodi entia abstracta, cum habeamus naturale desiderium cognoscendi ea ex sui nobilitate, videmus autem quod diminutissime ea cognoscimus. s. obumbrate & per effectus inadæquatos. ergo &c. Propterea bene Arist. comparauit intellectum nostrum in huiusmodi

modi cognitione oculo nocturæ, qui habens spiritum visum obscurum & pupillam humoris non coadunitam, non potest videre clarum lumen, sed tenebris admixtum. Vtrum autem hæc difficultas tanta sit, quæ inducat impossibilitatem, dux sunt opin. s. Cōment. & B. Thom. Comment. tenet partem negatiuam. Inquit enim in 2. Metaph. cōmen. 1. sed hoc non demonstrat res abstractas intelligere esse impossibile, sicut inspicere solem est impossibile vespertilioni &c. B. Th. exponens tenet partem affirmatiuam, propter improprietatem, quam habet intellectus coniunctus ad res abstractas, cuius sententiam defendimus in quætionibus nostris metaphysica. & soluimus rationem Comment. similitudo autem adducta inter noctuam, & intellectum tenet propter improprietatem virtutis, sicut enim virtus visiva nocturæ, ex sui debilitate est improprietate luminis clari intiendo, sic intellectus noster coniunctus, quia est in ultimo gradu intellectualium, & quia non intelligit, ut coniunctus sine phantasmate, est improprietate cognitioni quiditati rei abstractæ, non autem tenet similitudo, pro quanto potentia visiva nocturæ est organica, immo ut sic est dissimilitudo.

Secunda conclusio, Difficultas apprehendendi res materiales, & corruptibiles, est ex parte rerum, & non ex parte intellectus nostri. Hæc probatur duplici ratione.

Primo, secundum Comment. quia non sunt intelligibilia actu ex se, cum sint coniuncta materiæ, quæ ut sic repugnat intelligibilitati, & necesse est ut intellectus noster faciat ea intelligibilia, per abstractionem à phantasmatibus, & conditionibus indiuiduantibus virtute intellectus agentis, ut declaratum est in 3. de anima. ergo &c.

Secundo, quia ut inquit B. Thom. exponens, cum vnumquodque sit intelligibile in quantum est ens actu, ut manifestabitur in lib. 9. Metaph. tex. 20. quæcunque habent esse deficientes, & imperfectum, parum sunt ex se intelligibilia. huiusmodi autem sunt entia materialia, quoniam ex materia habent esse diminutum & potentiale, & ideo ex parte materiæ sunt non intelligibilia, & omnem intelligibilitatem trahunt à forma, sicut & esse actu. vnde Aristot. in primo Phys. tex. 69. dixit materiam, primam non esse cognoscibilem,

nisi per analogiam ad formam. Tu tamen aduerte, quòd sic entia materialia sunt in triplici gradu, sic tripliciter variatur difficultas apprehendendi ea.

Primus gradus est eorum, quæ etsi non habeant esse nisi in materia sensibili, tamen secundum diffinitionem abstrahunt ab huiusmodi materia, vt mathematicalia, de quibus dicemus in 7. & 8. lib. Metaph. & hæc minus difficilia sunt ad intelligendum, & certiori modo apprehenduntur, eo quod abstrahunt vt sic, ab omni motu & variatione.

Secundus gradus est entium naturalium, quæ habent esse in materia, & non diffiniuntur nisi per materiam sensibilem, vt patet in 2. Phys. tex. 19. quorum esse non est successuum, sed dicuntur entia permanentia, vt lapis, lignum &c. Et hæc minus intelligibilia sunt ex sui natura quam entia mathematica, eo quod nec secundum esse, nec secundum rationem abstrahunt à materia, quæ vt materia, obstat intelligibilitati, & nisi conciperentur sine materia indiuiduali, nullo modo intelligerentur, quoniam sensus est singularium, intellectus autem est vniuersalium.

Tertius gradus est entium naturalium, quorum esse est tantum in fieri, vt successiua, & quorum esse est tantum habitudo ad alterum, vt relationes, & hæc sunt minime intelligibilia, propter deficientem, & minimam eorum entitatem, quæ magis propinquant non enti, quàm enti. Hæc de secundo principali dicta sint.

Quantum ad tertium aduerte, vt inquit Comment. in 2. Metaphys. comment. 2. nullus singularis potest per seipsum solum inuenire artes operatiuas, id est mechanicas, aut consideratiuas, id est speculatiuas, pro maiori parte, id est quasi perfectas, nisi per iuuamentum prioris ad sequentem, id est nisi priores, qui insudarunt in tali studio auxilium dedissent posterioribus, prout, scilicet priores aliquid inuenerunt, & sequentes addiderunt, & sic ex multis, licet paruis inuentis, artes & scientiæ ad magnum augmentum deuenerunt. priores igitur ad inuenerunt posteriores, quapropter prioribus gratiæ agendæ, vnde Timotheus musicus obligatur Phyrno, & nos obligamur Timotheo, cognouit enim Timotheus ex studio Phyrni multas consonantias, quas non
cogno-

cognouisset, & illis addidit, & moderni per Timotheum, per Pythagoram, per Boëthium maxime profecerunt in musicis. & etiam addiderunt, & non solum agenda sunt gratiæ primis inuentoribus liberalium artium, sed & his qui desudarunt antiquitus in inuestigandis rerum causis & naturis, quoniam aut eorum opinionibus, vt veris cōmunicamus, & sic parauerunt nobis viam in venatione veritatis, aut eorum opiniones reputamus erroneas, sicut pro maiori parte vidimus in primo lib. de inuestigatione primarum & vniuersalium causarum entis, & sic etiam obligamur eis, quoniam dederunt nobis occasionem exercendi intellectum nostrū; vt fugientes eorum errores perueniamus ad inquisitam veritatem, igitur, vt inquit B. Th. exponens tam bene dicentes, quā male, adiuuant nos in scrutatione veritatis, licet diuersimode, quoniam bene dicentes adiuuant nos directe; quoniam aliquid veri enunciarunt, cui & nos addidimus, sed male dicentes adiuuant nos indirecte, pro quanto licet veritatem non enuncient, tamen excitant, & exercent nos in huiusmodi venatione. quare vtrisque gratiæ agenda, & omnes digni laude fuerunt. Egerunt enim quantum in eis fuit, vt rerum veritatem enuntiarent, & eam nobis manifestarēt. Pater igitur quomodo homines se mutuo iuuant in apprehendenda rerum veritate, ex quo inuamento multum minorata est difficultas apprehendendę veritatis, cuius signum est manifestum augmentum in qualibet arte & scientia. Hæc de primo capite dicta sint.

C A P V T . I I I.

IN secundo cap. declarandum est metaphysicam esse maxime consideratiuam veritatis vniuersaliter & absolute, pro cuius resolutione tria agenda sunt.

Primo, quod Metaphys. recte vocatur scientia consideratiua veritatis.

Secundo, quod licet omnis scientia speculatiua possit dici scientia veritatis, tamen id proprie & maxime conuenit metaphysicæ.

Tertio, quoniam probatio philosophi innititur huic functioni.

Epit. Iauelli.

C damen

damento, quòd in omni genere causarum datur primum, ideo defendendum est hoc contra ponentes processum in infinitum in causis, & probandum quòd in quadruplici genere causarum est status.

Quantum ad primum intendit Arist. hanc conclusionem, metaphysica est scientia veritatis. i. eius finis, & vltima intentio est scire veritatem, de his circa quæ versatur. Hanc sic probat, scientia speculatiua est scientia veritatis nam distinguitur à practica in hoc, quòd finis practicæ est opus, & si considerat veritatem non sinit in ea, sed ordinat eam ad opus. nã, vt inquit Comment. comm. 3. practici non considerant de causis, & diffinitionibus rerum vt sciant, sed vt agant. finis autem speculatiue est cognitio veritatis, est enim gratia ipsius scire, quo adepti quiescit. sed ut manifestatum est in primi lib. metaph. est speculatiua. ergo merito vocatur scientia veritatis, verum quia, hoc est commune omni speculatiue, vt naturali & mathematicæ. ideo vt appareat excellentia huius scientiæ super alias, ponitur alia conclusio, quæ immediate declarabitur.

Quantum igitur ad secundum ponitur hæc conclusio, Metaphysica præcipue, & maxime est scientia veritatis, quam sic probat Arist. scientia considerans principia, & causas verissimas, præcipue & maxime est scientia veritatis, metaphysica est huiusmodi. ergo &c. Maior probatur, scientia de vero non habetur nisi per causam, quoniam ex 1. Poster. scire est res per causam cognoscere. quam causam necesse est esse veram, quoniam ex 1. Poster. nescimus verum nisi per verum, vnde necesse est demonstrationem esse ex veris, ex 1. Poster. tunc sic, scientia veritatis, quæ considerat causam veram est scientia veritatis. ergo scientia considerans causas verissimas, præcipue, & maxime est scientia veritatis. Minor autem sic probatur, metaphysica, vt dictum est in proæ. considerat primas entium causas, & præcipue effectiuas. ergo considerat causas verissimas, consequentia probatur. Quod est causa aliorum in vnoquoque genere vniuoce: est maxime tale. videmus enim causam omnium calidorum, quæ est ignis, esse calidissimam. sed primum in vnoquoque genere est causa sequentium, ergo primum in vnoquoque est maxime

xime tale. ergo primæ causæ veritatis & entitatis sunt maxime vere, & maxime entia. cum igitur metaphysica consideret primas entium causas, quæ sunt verissimæ, erit præcipue, & maxime scientia veritatis. Et tu aduerte, q̃ Arist. ex hac conclusione trahit duo corollaria.

Primum est, q̃ principia motiua & effectiua corporum cœlestium sunt verissima, quoniam cum sint indefectibilia sunt semper vera, & non quandoque sic, & quandoque nō. Item cum sint principia corporum cœlestium, & non econuerso, & causa dignior, ac verior sit suo effectui, sequitur q̃ sint verissima. Huiusmodi autem principia sunt intelligentiæ motrices, & supremum principium est prima causa, quæ simpliciter est causa, vt corpora cœlestia sint, & moueantur, de qua inquit Comment. in comm. 4. quod est ens per se, & verum per se, & omnia alia sunt entia, & vera per esse & veritatem eius, & de hoc supremo principio intelligendum est verbum Arist. cum dicit, quapropter semper existentium principia esse verissima, necesse est, nec obstat quod utitur numero plurali, quoniam in abstractis loquens, tanquam de vno genere facile transit à plurali ad singulare, & econuerso, vt patet in lib. 12. tex. 29. & 30.

Secundum est, q̃ sicut se habet res ad esse, ita ad veritatem. nam esse rei est fundamentum veritatis, ut dicitur in lib. 6. quale igitur est esse, talis est veritas, si esse est primū, erit prima veritas, si esse est causa omnis esse, sua veritas erit causa omnis veritatis, ynde vt inquit Comment. comm. 4. quanto magis fuerit perfectum in esse, tanto magis erit perfectum in essendo verum.

Quantum ad tertium, aduerte, q̃ cum fundamentum conclusionis præcedentis stet in hoc, q̃ metaphysica considerat causas primas, aliquis posset negare hoc fundamentum, dicens esse processum in infinitum in causis, & sic non dari causas primas, ex consequenti fundamentum non valet, & ideo Arist. intendit firmare dictum fundamentum probans in nullo genere causarum dari processum in infinitum. & Primo, in genere causæ efficientis. Secundo, in genere causæ materialis. Tertio, in genere causæ finalis. Quarto in genere causæ formalis. Quod igitur non sit procedere in infinitum

tum in causis efficientibus, Arist. sic probat, si est processus in infinitum, non datur prima nec vltima: termini enim repugnant infinito: si non datur prima, nec vltima. omnes erunt mediæ, si omnes erunt mediæ, aufertur omnis causalitas, quoniam mediæ non sunt causæ nisi vltimæ. ergo non sunt vniuersaliter causæ. ergo necesse est dari causam primam tanquam vniuersalem, à qua mediæ recipiunt virtutem causatiuam, & vltima recipit à medijs, sed si est processus in infinitum non datur prima, ex consequenti causæ mediæ nullam habent virtutem causandi, nec vltima. ergo aufertur omnis causalitas, quod est manifeste falsum. tenendum est ergo, quod datur causa prima efficiens, à qua media recipiunt virtutem, & vltima recipit à media, & sic optime seruatur causalitas. non ergo est processus in infinitum in genere causæ efficientis in causis per se ordinatis, de quibus nunc intendimus. Hæc fuit demonstratio Arist. de statu in causis efficientibus, & licet in 7. Phys. in 3. tex. & in 8. in tex. 34. videatur idem demonstrasse, vt manifestaret, quod necesse est dari primum motorem immotum, tamen hic non inutiliter replicat, quoniam, vt inquit Comment. in cōment. 8. consideratio vniuersalis in omnibus causis in eo quod sunt causæ. est huius scientiæ, & quamuis Arist. vtatur hic demonstrationibus scientiæ naturalis, tamen inducit eas vniuersaliter (quoniam. s. non applicat se ad motum physicum tantum, sed accipit causam efficientem quacunque efficientiæ, & actione etiam sine motu) & quanto erit demonstratio vniuersalior tanto magis erit propria huic scientiæ & c. Hæc igitur dicta sint de statu causarum efficientium, & tu scias, quod Auic. in lib. 8. suæ Metaph. cap. 1. nesciuit aliam rationem inuenire ad hoc propositum, nisi quam formauit Arist. immo vtitur pene eisdem propositionibus, inquit enim, medium quod est causa proxima causati, est causa vnius rei tantum, scilicet vltimæ, causatum vero vltimum nullius est causa. ergo necesse est dare causam non causatam, à qua pendet collectio causarum mediarum & vltimæ, aliter totum infinitum esset medium, quod est absurdum.

Quantum ad causas materiales aduerte, vt dicit Cōmēt. in cōm. 7. probans statum in efficientibus, probat statum in

ascen-

ascendendo, ita q̄ datur primum, non autem probat in descendendo, quoniam videtur notum dari vltimum causans, & suum proximum effectum, puta quòd homo immediate generat hominem, & ignis immediate còburit lignum. probans autem statum in materialibus, probat descendendo, quoniam videtur concessum etiam ab antiquis, vt visum est in 1. lib. dari vnum primum, siue sit ignis, siue aqua, siue aliud ex quo vt vniuersali materia fiunt alia, non autem ita concessum est in descendendo. Dicet enim aliquis, q̄ ex igne, vt primo fundamento sit aër, ex aëre aqua, & sic in infinitum. Intendens igitur demonstrare statum in materialibus, & supponens statum sursum, probat statum deorsum, & intendit tria.

Primo, ponit distinctiones.

Secundo, q̄ utroque modo est status.

Tertio, declarat quomodo ex duobus modis assignatis fiat res ex materia prima.

Distinctio est hæc. Cum dicitur hoc fieri ex alio, dupliciter potest intelligi.

Primo, ex alio .i. post aliud, vt ex mane fit meridies .i. post mane, & .i. improprium, & quoniam vt sic ly ex, dicit tantum ordinem, & non conuersionem in alterum.

Secundo, ex alio, vt quando vnum subiectum mutatur ex vno in aliud, vt ex calido in frigidum, & .i. proprium. & relinquentes primum sensum, vt improprium, iterum distinguimus secundum sic, aliquid fit ex alio, vt ex puero vir, ex generatione genitum, ex calefactione calefactum. Et aliquid fit ex alio, vt ex igne aër, ex ligno ignis &c. Et illi duo modi dupliciter differunt, quoniam in primo alterum est, vt medium & via: alterum ut terminus, nam pueritia est via ad virum, & generatio est via ac medium ad genitum, hæc enim est vera, genitum generatione generatur. In secundo autem, alterum est terminus à quo, alterum est terminus ad quem, vt ex aëre fit aqua corrupto aëre. Differunt secundo, quoniam in primo modo non fit reflexio, licet enim ex puero fiat vir: non tamen econuerso. in secundo autem fit reflexio, nam sicut ex aëre fit aqua, ita ex aqua fit aër, vt declaratum est in secundo de generatione, & ratio

quidem huius differentiae est, quoniam in primo modo seruatur ordo essentialis prioris & posterioris, nam essentialiter via praecedat terminum & non econuerso, ideo non fit reflexio. Huiusmodi autem ordo non seruatur in secundo modo, quoniam idem subiectum potest vicissim & reflexiue actione agentis esse sub utroque termino, nam sicut actione calidi aqua ex frigida fit calida, ita actione frigidi potest fieri ex calida iterum frigida, quoniam inter calidum & frigidum non est essentialis ordo prioris & posterioris.

Posita hac distinctione, probat Aristot. quod in utroque modo est status, & quidem in primo modo sic: quando dicimus, quod ex puero fit vir, vel ex generatione fit genitum, ly puero, & ly generatione est vt medium & via: Medium & via est inter duo extrema, quae secundum Comment. in com. men. 7. sunt potentia & actus, siue non esse & esse. Quod enim generatur tendit à non esse ad esse. sed inter duo extrema non stat infinitas, quoniam duo extrema terminant. ergo &c. In secundo autem modo sic: in secundo modo est reflexio ab vno ad alterum, vt ex aëre fit aqua, ex igne aër, ex aqua terra, ex terra aqua, ex aqua aër, ex aëre ignis. Idem etiam seruatur, in compositis, nam ex elementis fit compositum ex composito fiunt elementa per resolutionē. sed reflexio & reciprocatio non stat inter infinita, est enim reflexio. reuersio ab ultimo ad primum: primum autem & ultimum repugnant infinito. ergo &c.

Viso quod in utroque modo est status, declarandum est secundum quem istorum modorum fit aliquid ex materia prima, & intendit, quod nihil fit ex ea secundo modo, quoniam in secundo modo terminus à quo corrumpitur, vt cum ex aqua generatur terra, sed materia prima est sempiterna, & ingenita, ex primo physicorum, tex. 81. ergo &c. Fit autem res ex ea, sicut ex primo modo, in hoc sensu, quod sicut in primo modo, id ex quo aliquid fit est in potentia, & imperfectum, sic materia prima, est quid potentiale & imperfectum. Est enim media inter purum non esse, & esse actu. ergo &c. Patet igitur quod in causis materialibus non est processus in infinitum.

Quantum ad causam finalem, quod sit status in ea sic intendit

tendit probare, cum finis sit illud gratia cuius aliquid fit, ad ipsum ordinantur omnia alia, & ipsum non ordinatur ad alia ut finis, ex consequenti habet rationem ultimi ut finis, tunc arguitur sic. Quando agimus, vel est dabile aliquod ultimum ad quod ordinantur omnia præcedentia, ut in medicatione est dabilis sanitas, ad quam ordinantur diæta, quæ sirupus, pharmacum &c. Vel non est dabile aliquod ultimum intentum. Si primo modo, ergo est status in causa finali, si secundo modo, tria inconuenientia sequuntur.

Primo, aufertur natura boni, quoniam, ut inquit Comm. in com. 8. nihil dicitur esse bonum nisi per causam finalem, quæ habet rationem postremi.

Secundo, quia nullus conabitur aliquid operari, operans enim operatur proponens sibi terminum, ad quem sperat peruenire. Si autem aduerteret se non peruenturum ad terminum, non operaretur.

Tertio, auferetur operatio intellectus practici. Agens enim per intellectum intendit finem, ad quem media ordinat, quo adepto quiescit, aliter, ut inquit Commentatorem in commento nono, sua actio esset ociosa. Ne igitur dentur hæc inconuenientia, necesse est ponere statum in causis finalibus.

Quantum ad causas formales, aduerte, quod intendit hæc consequentiam. Est status in quodquid est, id est in diffinitionibus, siue in prædicatis diffinitiuis, ergo est status in formis, consequentiam quidem reputat manifestam, quoniam cum sola species sit quæ proprie diffinitur, & vnumquodque constituitur in specie per formam à qua sumitur rei differentia: eadem ratio est procedere, vel non procedere in infinitum in formis, & in rationibus diffinitiuis, vnde inquit Comment. in comm. 9. Si apparuerit quod natura diffinitionum est finita, id est quod in partibus diffinitiuis est status necesse erit, ut sit de formis. Antecedens autem probat Arist. multipliciter.

Primo sic, videmus quod in partibus diffinitiuis, quæ est prior est magis, id est communior & vniuersalior: posterior autem minus communis. Nam in diffinitione hominis in plus est esse animal, quàm rationale, quia non in quocun-

que est animal est rationale, tunc sic, si est processus in infinitum in partibus diffinitiuus non datur pars prior, ergo nec posterior, non est enim posterior, ut inquit Comment. in cōment. 9. nisi prioris. Si non est pars prior nec posterior, ergo omnes partes erunt æque vniuersales, ergo non declarabūt sufficienter naturam diffiniti, ergo remouetur omnis vera diffinitio, nam vera diffinitio perfecte manifestat, & distinguit diffinitum à quolibet alio.

Secundo, sic. Ista positio destruit ipsum scire, nam nescimus naturā, rei donec perueniamus ad prædicata indiuidua formaliter, quæ sunt prædicata specifica, non enim species nec prædicata conuertibilia eiusdem sunt diuisibilia in plures gradus formaliter ad differentiam prædicati generici. Sed si procedimus in infinitum descendendo in prædicatis diffinitiuus, nunquam deueniemus ad hæc prædicata indiuidua, quoniam cum sint indiuidua sunt postrema, postremum autem repugnat infinito, ergo &c.

Tertio, non solum destruitur scire, sed vniuersaliter omne cognoscere intellectuum, quoniam infinitum non contingit intelligere, nec est instantia de linea, cuius diuisiones tendunt in infinitum, quoniam partes lineæ non sunt actu, sed potentia infinitæ, partes autem diffinitionis cum omnes sint actu, dum integrant diffinitionem, si nō est status in eis, sunt actu infinitæ, ex consequenti non intelligibiles.

Quarto, in omni motu necesse est intelligere materiam & formam, est enim compositum, ut declaratum est in 6. Phys. sed ex parte materiæ habet infinitatem, est enim secundum se interminata, & in pura potentia, ergo ex parte formæ habebit finitatem, forma enim terminat materiam, impossibile est aut infinitum terminare, ergo necesse est esse terminū in formis, aliter infinitum terminaret infinitum, quod est impossibile, nam infinitum adæquat infinitum & non restringit, propterea inquit Comment. in cōment. 11. Quod determinat infinitum, non est infinitum, cum illud quod æquabitur infinito debeat esse infinitum, patet igitur quod est status in causis formalibus.

Et tu aduerte, quod Auic. in lib. 8. suæ Metaphys. cap. 3. concordans cum Arist. probat idem hac ratione.

In partibus diffinitionis datur communitas, & proprietates, id est quædam est communis diffinito & alijs, vt animal respectu hominis, quædam conuenit soli diffinito, vt differentia propria, sed vbi est communitas, & proprietates est naturalis ordo, se habent enim, vt magis commune, & minus commune, magis autem & minus dicuntur respectu alicuius maximi, vt declarabitur in decimo libro Metaph.

Ordo autem repugnat infinitati. ergo &c.

Sed quia posset aliquis dicere licet sit status in causis, quo ad genera, non quo ad species, nam possunt esse efficientes distincti specie infiniti, idem dicetur de materijs, de formis, de finibus. ideo Arist. id improbat tali ratione. Si sunt infinitæ secundum speciem, omnino remouetur ipsum cognoscere, arbitramur enim scire cum causas rei cognoscimus, infinitum autem non est pertransire, id est vt inquit Comment. in comment. 13. intellectus qui est finitus, non potest determinare infinitum, ita quod comprehendat ipsum in actu non in potentia, & diximus in actu, ad differentiam vniuersalis quod comprehendit res infinitas in potentia, non autem in actu. Hæc de secundo cap. dicta sint.

C A P V T III.

IN tertio cap. declarandum est, quis sit modus conueniens considerandi veritatem, & agemus tria.

Primo, declarabimus impedimenta, quibus quæ plures impediuntur à vera comprehensione veritatis.

Secundo, adducemus remedia contra huiusmodi impedimenta, ex quibus constabit conueniens modus considerandi veritatem.

Tertio, quis sit modus conueniens huic scientiæ.

Quantum ad primum, aduerte duo impedimenta, vnum habens modum naturæ, alterum ex parte naturæ. Impedimentum habens modum naturæ dicitur esse consuetudo, quæ videtur habere vim naturæ, vnde dicitur esse altera natura, & quia habet vim naturæ mouet nos ad assentiendum multis, etiam quæ sint falsa & contra rationem. Inde est, quod patiens febrem hecticam, id est quasi consuetudinali,

non

non percipit, nec iudicat calorem suum esse extraneatum, & præter naturalem, licet maior sit, quàm febricitantis tertiana. Hæc igitur consuetudo dicitur esse impedimentum percipiendæ veritatis, quoniam ut consueuimus audire, sic reputamus dignum dici, & esse verum, quæ autem non consueuimus audire, videntur nobis minus nota, minus vera, & veluti extranea, & dissona, non acceptamus etiam quòd vera sint. Cuius signum habemus in legibus, in quibus his qui nutriti sunt in eis, fabulosa & puerilia prævalent veræ cognitioni. Nam ex consuetudine viuendi & operandi, nutriti in lege facta sunt huiusmodi puerilia & vana quasi naturalia, vnde si audiant oppositum etiam quòd sit verum, non cognoscitur, nec recipitur ab illis, sic accidit multis studiosis, qui nutriti in aliqua secta adeo ipsi adhærent ex consuetudine, quòd licet in ea multa vana & falsa contineantur, tamen non percipiunt ea esse falsa, sicut nutriti in via Auerrois nō possunt percipere hanc esse veram. Anima intellectiua plurificatur secundum corpora, & est incorruptibilis, licet sit forma dans esse, & nutriti in via Auic. non possunt percipere hanc esse falsam. Animal perfectum, ut est homo potest produci ex putrefactione sicut rana, & hoc impedimentum consuetudinis adeo efficax est, quod per ipsum fouentur tot contrariæ opiniones dum vnusquisque defendere conatur, quæcunque contenta insecta, cui longo tempore adhæserit, vnde concludi potest consuetudinem abstulisse à nobis semitam assequandæ veritatis.

Impedimentum ex parte naturæ, est varia dispositio, & complexio reperta in humana specie, licet enim homo sit intellectus, non tamen est purus intellectus, sed necesse est ipsum pro hac vita, ut viribus corporeis & potentijs sensitivis dum exit in actum intelligendi, quæ deseruiunt, ut principali agenti ipsi intellectui, qui igitur sunt eiusdem dispositionis, eundem modum seruare volunt in omni genere sciendi & studendi, verbi gratia, qui sunt fortis imaginationis ita quòd imaginatio præualet supra intellectum dati sunt scientijs mathematicis, & nulli conclusioni assentiunt in quacunque alia scientia, nisi certissime sicut in mathematicis, & ad sensum demonstratur, & isti adeo imaginationi intendunt, quæ

quæ non potest esse nisi rei quantæ & corporeæ, quorum ut inquit Comment. in comment. 15. nō possunt credere quin extra cælum sit vacuum, & locus, & tempus, nec possunt apprehendere, quin etiam illic viuientia sint corporea, & breuiter credunt, omne ens corpus, & in loco, similiter qui habet intellectus valde depressum ad sensum, nihil credunt, nisi quod testimonio alicuius poëtæ comprobatur, vel teste alio auctore, vel adducto exemplo & similitudine alicuius corporei, & id prouenit eis ex defectu iudicij, non enim possunt iudicare, utrum ratio vis adducta concludat. Et ideo quærant alicuius auctoris testimonium, in quo fient sententiam suam, tales sunt, poëtixantes, & incumbentes legum studijs, quos Ciuiles dicimus. Qui autem habent intellectū vigorosum, & rationem bene inquisitiuam nihil recipiunt, nisi certitudine & demonstratione firmatum in his quæ demonstrari, & cum certitudine haberi possunt, & ut inquit Comment. in commen. 15. hæc est natura veri Philosophi, dignum. n. est philosopho aliquid nouo recipere nisi certa ratione firmatum, qui vero sunt debiles in ratiocinatione, tristantur si quid diligenti, & certo discursu inquiratur, & contenti sunt superficiali inquisitione. Et isti, ut inquit Comment. in comment. 13. nunquam addiscunt, aut propter seignitiem, aut quia eorum intellectus non potest comprehendere, & retinere totum discursum factum, usque ad ultimam resolutionem, aut quia credunt, quod sicut non decet liberalem computare minima in conuiuio, vel, ut inquit Cōment. sicut non decet mercatorem proteruire in minimis dum negotiatur, emendo aut vendendo, sic non decet studiosum discutere minima, vel, ut inquit Comment. disputare usque ad minima.

Quantum ad secundum, aduerte duo remedia correspondentia duobus impedimentis.

Primum, correspondet impedimento accepto ex modo naturæ, id est consuetudine. Et est inquit Arist. quod homo erudiatur secundum quem modum sumenda sunt, quæ in singulis scientijs dicuntur, nam tunc audita etiam consueta quæ sint contra illum modum non approbabit. Modus autem iste traditur in Logiceis, in quibus agitur de omnibus speciebus

speciebus argumentationibus, & veræ & sophisticæ, quibus inducimur in omni scientia in cognitionem veritatis, & ideo vt patet, qui procedunt in scientijs sine logica multipliciter errant. Quoniam igitur hic modus, id est logica, quæ est modus & regula sciendi, necessarius est in omni scientia, ideo Arist. dicit absurdum esse simul querere scientiam & modum sciendi. i. logicam, q. d. prius est erudiendus homo in logicis, aliter, vt inquit Cōment. nec discet logicam, nec aliā scientiam, & assimilabitur homini, qui docet viam quando discit eam. Et medico qui dedit medicinam infirmo, & postea inspexit librum, & mortuus est infirmus, vt igitur fugiamus ignorantiam & errores, quos incurrimus ex consuetudine, qua detinemur in aliqua secta, primo erudiendi sumus in omni genere argumentationum, vt ordinato discursu apprehendamus quid verum & non verum.

Secundum remedium, correspondet impedimento proueniendi ex parte naturæ, & est vt homo non querat eandem certitudinem in omnibus scientijs, sed conuenientem vnicuique scientiæ, sicut enim varia est stabilitas & certitudo subiecti in diuersis scientijs, sic debet esse alia & certitudo rationum quibus vtimur in eis. Cum igitur entia scibilia alia sint mathematica, alia naturalia, alia moralia, alia metaphysicalia siue diuina, & diuersificentur in hoc, quod mathematica sunt firmissima & immobilia, vt cadunt sub consideratione mathematici, quoniam, vt sic abstrahunt à materia secundum rationem, licet non secundum esse, & materia est principium & causa mutationis, vt declarabitur in libro 8. & in 12. & sunt proportionata intellectui nostro pro hoc statu, quoniam & ipse coniunctus est materiæ, in scientijs mathematicis querendæ sunt certissimæ demonstrationes, quæ sunt in primo gradu certitudinis, vt inquit Cōment. in cōmen. 16. naturalia autem minus stabilia sunt, & minus certa, quoniam non abstrahunt à materia, nec secundum esse, nec secundum rationem, & ideo non sunt querendæ in physica demonstrationes mathematicæ, & propter quid, sed ab effectu, nec querendum quod semper, & ex necessitate est, sed quod vt in pluribus. Moralia adhuc minus certa sunt, propter libertatem principij à quo sunt, qui est homo,

& propter variabilitatem circumstantiarum, & ideo adhuc minus certæ rationes, quàm in physica convenientes sunt in ethicis, & sufficit habere rationes persuasibiles, similiter & in rhetoricis, versantur enim circa civilia, in quibus multiplex est variatio. propterea inquit Aristot. in primo Ethic. Indecens est mathematicum persuadentem acceptare, & rhetoricum demonstrationes expetere. Metaphysicalia autem quoniam abstrahunt à materia secundum esse, & secundum rationem in se certissima sunt, sed quoniam improporcionata sunt intellectui nostro pro hoc statu cuius proprium est intelligere materialia cum sit materiæ vnitus, ideo de eis non possumus habere demonstrationes certissimas, & à priori, vt in mathematicis, nec adeo contractas, vt in physicis, sed vniuersaliores, quoniam proprias differentias specificas, & proprios effectus específicos in substantijs separatim ignoramus, vnde in lib. 12. loquemur de eis, vt de vno genere excepta prima causa, quia igitur non eadem certitudine utendum est in omni scientia, ideo dicit Aristot. quod acrobologia mathematica, id est certissima & euidentissima demonstratio, quali utimur in mathematicis, non est querenda in omni scientia, sed in non habentibus materiam, vt in mathematicis, & in metaphysicis, si essent proporcionata intellectui nostro. In naturali autem vti hac certitudine non esset modus naturalis, id est conueniens scientiæ naturali, quoniam omnis natura, id est ens naturale forsan habet materiam à qua accipit variationem & mutabilitatem, dicit forsan, non quod dubitet aliquod ens naturale carere materia, aliter esset immobile, ex consequenti non naturale, sed quoniam non omnia naturalia habent eodem modo materiam, vt de clarabitur in lib. 8. vel vt inquit Cōment. in cōm. 16. hoc dicit in respectu corporum generabilium & corruptibilium, quæ dicuntur magis naturalia secundum famositatem, quàm corpora cœlestia. Hæc fuit doctrina Aristot. pro inuestiganda rerum veritate in omni scientia, modo conueniendi illi scientiæ, quam confirmat in 1. Eth. cum dicit disciplinati est intentum querere certitudinem secundum vnumquodque genus, inquam natura recipit .i. in quantum conuenit naturæ subiecti scibilis.

E P I T O M E L I B. II.

Quantum ad tertium, aduerte, quod, vt inquit D. Alber. in 2. lib. cap. 13. ex præhabitis elicere possumus modum conuenientem huic scientiæ consistere in duobus.

Primo, quod non debet habere modum inquirendi mathematicum, nec naturalem, sed vniuersaliore vtroque modo, puta quod non considerat lineam in quantum linea, sed in quantum ens vnum, substantia, vel accidens &c. Nec consideret naturam in quantum est principium motus, sed in quantum est ens, in quantum est actus, vel potentia &c. Et eius probationes erunt citra certitudinem mathematicam & physicam, & supra certitudinem topicam.

Secundo, quod debet primo inquirere, si vnus tantum scientiæ est, quærerere principia, & causas entis, secundum quatuor genera causarum, an ad multas scientias pertineat, nam si est vnus tantum, illa erit prima philosophia, quæ versatur circa ens, vt ens est. Si erit plurium, ergo plures erunt primæ philosophiæ, quia plures considerabunt ens, vt ens, & omnes causas entis, sed hoc est

impossibile, quoniam cum scientiæ sunt vnitate, & pluralitatem à

subiecto, non possunt esse plures circa ens, vt ens

est. Hæc de tertio capite dicta

sunt, &

ibi

terminatur intentio Aristotelis, pro secundo

libro Metaphysicæ.

Metaphysicæ

cap. 1.

¶

¶

¶

Eiusdem

258

EIVSDEM CHRYSOSTOMI
IAVELLI CANAPITII
E P I T O M E
S V P E R T E R T I O L I B R O
M E T A P H Y S I C A E .



ECVNDVM ordinem pos-
tum in proœmio primi libri,
antequam accedamus ad deter-
minationem consideratorum
in hac scientia prius expedie
seorsum mouere dubia princi-
palia, circa determinanda, vt
gravius consideretur difficul-
tas in huiusmodi determinan-
dis. Circa quæ variaz fuerunt
antiquorum sententiæ, & qui-

dam eorum omnino prætermiserunt, forte exterriti ex rei
difficultate. Et ne huiusmodi dubia leuia appareant, ideo
more disputatiuo adducemus rationes ad partes oppositas,
& quoniam Arist. in sequentibus libris vbi expresse vel vir-
tualiter determinat huiusmodi dubia non repetit ea, ita qd
discens non facile aduertit, vbi & quomodo determinet ea,
ideo vt fiat doctrina resoluta, & sine repetitione, sic procede-
mus in quolibet dubio.

Primo, proponemus illud formaliter.

Secundo, arguemus ad ipsum.

Tercio, determinabimus ipsum iuxta mentem Arist. qd sic
vel esse, sic apparebit in libris sequentibus, & totum hunc ter-
tium librum comprehendemus in vnico tractatu, quæ
distinguemus in quindecim capita, in quibus
comprehendimus dubia quæ
pertractabimus.

Caput

EPITOME LIB. III.

CAPVT PRIMVM.



IN primo cap. dubitatur cur Arist. antequā determinet considerata in hac sciētia, prius & in libro particulari disputat de eis, mouendo dubia & arguendo ad partes, cum id non fecerit in phycis, cum tamen dubitabilia illic non deficiant, circa quā arguere, & disputare poterat vt hic, sed sigillatim sicut proponit quæstionē, disputat circa eam, deinde determinat.

Ad hoc respondetur per Arist. conuenienter proponit dubitationes determinationibus quadruplici ratione.

Primo, quia hic intendimus inquirere vniuersalem rerū veritatem, quam non possumus recte inquirere, nisi prius mouendo dubia, & arguendo ad partes, vt appareat rei quæ sit difficultas, nam qui rem difficilem determinare quærit, prius non disputando circa eam, assimilatur volenti soluere vinculum & ignoranti eius difficultatem. Dubitatio autem est sicut vinculum, quoniam sicut vinculum ligat membra, puta pedes quo impeditur homo, ne ultra procedat, sic dubium ligat intellectum impediens, ne ad intentæ veritatis finem proueniat. propterea sicut qui intendit soluere vinculum, debet prius considerare modum ligationis, ita qui intendit rem difficilem determinare, prius debet mouendo dubium circa ipsum disputare arguendo ad partes.

Secundo, qui quærunť veritatem, non mouendo prius dubia, assimilantur ambulantiſus ignorantibus quo vadant. Nam determinatio rei, est sicut terminus viæ, via autem est disputatio circa ipsam, & ideo sicut qui ignorat viam, non peruenit ad terminum nisi forte à casu, sic qui prius non disputat circa quæsitum, à casu determinat veritatem de ipso.

Tertio, quia sicut qui tendit ad terminum, & ignorat viā, nescit quando peruenit, posito casu etiam quod perueniat & nescit vtrum illic debeat quiescere, an ultra procedere, sic qui quærit determinare quæsitum prius, non disputando circa ipsum, posito quod vere determinet, ignorat, an
veritatem

veritatem inuenerit, & ideo vtile est prius disputare circa propositum.

Quarto, audiens philosophiam se habet sicut iudex in litigijs, qui recte iudicare non potest, nisi vtriusque partis rationes & fundamenta prius intellexerit. ergo necesse est prius ad proposita quæsitæ pro vtraque parte arguere deinde determinare. Sed aduerte, quod istæ rationes, licet probent esse vtile præponere dubia, & disputare de eis, ante determinationem, tamen non declarant, quare vtile fuerit simul, & in vno libro huius scientiæ, omnia proponere, & de eis disputare, præcipue, quæ vbi inquit Comment. in 3. lib. comment. primo, consuetudo fuit Arist. in omnibus alijs libris sigillatim dubia occurrentia proponere, & circa ea disputare, & in eodem libro determinare. sic fecit in 1. Phys. inquirens veritatem de principijs naturalibus, & in secundo inquirens veritatem de fortuna, ut vtrum natura agat propter finem. & in tertio agens de infinito. & in quarto inquirens veritatem, de loco, de vacuo, de tempore. videndum est igitur quare hunc ordinem particulariter seruauerit in metaphysica magisquam in physicis, & in moralibus.

Tu igitur aduerte, apud Comment. in cōment. 1. vbi recitat sententiam Nicolai Peripatetici, qui in Metaphys. sua non seruauit ordinem hic positum ab Arist. sed sigillatim mouens dubia, & disputans circa ea, statim determinat, & dicit quod putauit Nicolaus se incedere per viam meliorem sic ordinando sermones suos, sed dicit Comment. melius est quod fecit Arist. hac ratione, quia considerauit metaphysicā, & scientiam disputatiuam .i. logicam cōmunicare in subiecto & in vniuersalitate considerationis, subiectum. n. vtriusque est idem .s. ens simpliciter, licet modus considerationis sit diuersus. s. modus probabilis, & modus demonstratiuus, & quia natura sermonum disputatiuorum requirit, quod præponantur sermonibus demonstratiuis, ideo vidit Arist. modum hunc disputatiuum debere poni partem per se huius scientiæ, ita. s. quod ex eo cōficiatur particularis liber, sicut etiam fecit in oibus significatibus intentionibus huius scientiæ. i. in exponendis, & distinguendis significatis terminorum metaphysicalium e contrario ei quod fecit in alijs scientijs,

nam in alijs scientijs exponit nomina in consideratione cuiuslibet quæstionis. In hac autem scientia exponit nomina in vno tractatu. s. in lib. 5. per totum, non ad distinguendum nomen æquiuocum, sed numerando intentiones. i. significata nominum, de quibus considerat hæc scientia, hæc fuit ratio adducta à Comm. sed D. Alb. in 3. lib. tract. 1. & cap. 1. dicit huius rationem fuisse, quia metaphysica est vniuersalis sapientia, & est de principijs aliarum scientiarum, ad quam spectat omnia declarare, & determinare, quod facere non posset, nisi prius multipliciter dicta distingueret, & nisi prius omnia dubitabilia vniuersalia ordinaret disputatiue, vt ex prius disputatis ad determinationem accedat B. Th. exponens aliam rationem adducit, quæ stat in hoc. Quia particulares scientiæ considerant particulares veritates, ideo bene est particulariter, & sigillatim circa singulas veritates dubitare, hæc autem scientia, quia vniuersalis, & quia considerat vniuersaliter de veritate, ideo bene fuit, vt vniuersaliter & simul dubitabilia vniuersalia proponeret. Proponemus dubia eo ordine, quo proponuntur ab Arist. Hæc de primo capite dicta sint.

CAPVT II.

IN secundo capite quæritur vtrū ad vnā tantum scientiam, vel ad plures spectet omnia genera causarum speculari. Circa quod disputans Arist. pro parte negatiua arguit dupliciter.

Primo, quæcunque sunt diuersa, & contraria ad vnā scientiam spectant, quia vnum contrarium est ratio cognoscendi alterum, ut magis declarabitur in 10. lib. ergo si genera causarum sunt diuersa, & tamen non sunt contraria, ad vnā scientiam non spectant. Constat autem, q̄ non sunt contraria, non .n. contrariatur efficiens formæ, immo multoties coincidunt in idem specie, nec forma fini, immo coincidunt multoties, in idem numero, ex 2. phys. tex. 7. nec materia formæ, cum sit receptiua formæ, ergo &c.

Secundo, non omne genus entis, de quo est aliqua scientia habet quatuor genera causarum. ergo non omnis scientia

tia considerat omnes causas. consequentia patet ex 1. Poster. quoniam scientia vnius generis subiecti considerat causas & partes & passionēs eiusdem. ergo si subiectum non habet omnes causas non considerantur in eius scientia. antecedens autem manifestat Arist. in Mathematicis, quæ dicuntur non habere causam finalem, neque efficientē, neque materialem, materialem quidem, quia abstrahunt à materia, ut considerantur à mathematico, efficientem autem, quia si abstrahunt à materia, non est in eis motus. est. n. materia causa mutationis, ut dicit in lib. 8. & in 12. si non est in eis motus, non est in eis efficiens, quoniam causa efficiens ex 2. phys. tex. 29. est unde est principium mutationis. finem autem, quoniam finis est terminus acquisitus per motum, sicut sanitas est terminus & finis. curus gratia facta est medicatio. patet igitur quod in mathematicis est consideratio solius causæ formalis. ergo non omnis scientia omnes causas considerat, sed plures scientiæ sunt de pluribus causis, aliquæ de vna, ut mathematicæ aliquæ de tribus, ut dicemus, aliquæ de omnibus, sed diuersimode.

Ad partem autem affirmatiuam, sic videtur arguere Philosophus, si non omnes causæ ad vnam scientiam spectant, difficile erit inuenire, quæ scientiarum mereatur dici prima philosophia, & sapientia, cum illis dignitatibus quas adduximus in pr. primi libri. Nam alicui videbitur, quod scientia considerans causam finalem sit prima philosophia. Dignum est enim in præmio, quod sapientia est ordinatiua & regulatiua aliarum, & quod aliæ sunt ei deferuientes. istæ autem conditiones conueniunt consideranti finem, quoniam ad finem alia ordinantur, & videmus in artibus, ut dicit Arist. in primo Ethic. consideratiuam finis principari alijs, ut civilis militari, & frenesactiua. Alij autem videbitur, quod consideratiua causæ formalis sit prima philosophia, cum enim per causam formalem maxime sciamus, ut quando sciimus reducere conclusionem in propter quid, quod habet rationem causæ formalis, ut propter quid triangulus habet tres, tunc quiescit intellectus, & decens sit, ut per primam philosophiam maxime sciamus, cum sit dignissima scientiarum, sequitur, quod scientia consideratiua causæ formalis erit, pri-

ma philosophia. Alij vero videbitur, q̄ scientia consideratiua causæ efficientis, sit prima philosophia, nam quando cognoscimus principium generationis, & effectus, tunc videmur maxime scire, vt à qua causa vniuersali, & proxima generatur pluuia, & nix, & composita in specie sua. si igitur prima philosophia facit nos maxime scire, congruum videtur, vt scientia consideratiua causæ efficientis, sit prima philosophia: De causa autem materiali, Arist. mentionem non facit, quoniam nulla est scientia consideratiua solius materiæ cum ordinetur ad formam, nec considerari possit, nec sciri, nisi per formam, ex primo Phys. tex. 69. propterea nulli videri potuit scientiam consideratiuam solius materiæ esse primam philosophiam. Restat igitur quæstio dubia pro vtraque parte.

Sed quoniā Arist. in nullo vno loco inferius videtur hoc dubium determinasse, sed tantum posuisse fundamenta in diuersis locis, vnde possumus determinationem accipere, ideo pro resoluta doctrina bonum est hic determinare propositum, pro cuius euidencia dico.

Primo, non est necesse omnem scientiam considerare & demonstrare, per omnia genera causarum, quoniam vt dictum est, non omni generi scibili insunt omnia genera causarum, vt declaratum est in mathematicis ergo &c.

Secundo est necesse omnem scientiam considerare tantū aliquam vel aliquas causas, sed potest aliqua considerare omnes, patet de scientia naturali, de qua probat Philosophus in 1. Phys. tex. 73. & 74. q̄ demonstrat per omnes causas & cognoscit eas. vnde illic Philosophus inquit, quoniam causæ quatuor sunt, de omnibus erit physici cognoscere, & in omnes inducens, propter quod demonstrabit physicæ materiam, speciem mouentem, & quod est cuius causa. similiter mathematica considerat omnes causas in quantum considerat ens vniuersale, quod diuiditur in causam & causatum, omne enim ens vel est causa, vel causatum. Item considerat vniuersalem finem, vt dicemus in 12. & vniuersale efficiens, & causam formalem, vt considerat de actu in lib. 9. De materia autem licet non consideret, vt est principium mutationis, quoniam vt sic ad physicum spectat, tamen considerat eam

eam inquantum est substantia, & substantia est pars entis.

Tertio, licet physica & metaphysica considerent omnes causas, non tamen eadem ratione, quoniam metaphysica considerat eas simpliciter & vniuersalissime, physica autem contraxit. nam considerat eas inquantum applicantur motui; vnde non considerat finem nisi inquantum terminat intentionem mouentis, & agentis physici, nec formam, nisi acquisitam per motum, & receptam in materia, nec efficientem, nisi ut est principium mutationis physice, nec materiam, nisi inquantum est subiectum receptuum forme, & est causa mutationis, siue ad contraria vbi ut materia cœli, siue ad contrarias formas successiue, ut materia inferiorum. Metaphysica autem considerat finem acquisitum, siue per motum, siue sine motu, & considerat formas, inquantum sunt actus, & non solum acquisitas per motum, & receptas in materia, sed etiam abstractas à materia & immobiles, quales sunt forme separate, & considerat causam efficientem etiam sine motu, ut primam causam agentem per intellectum, & non supposita materia, & materiam inquantum est pars entis & diuisi, per potentiam & actum.

Ad quæsitum ergo dicendum, quod non inconuenit aliquam scientiam particularem considerare omnes causas, sed contraxit, ut declarauimus de physica, & etiam scientiam vniuersalem, quæ considerat de omnibus, ut est metaphysica, sed simpliciter & vniuersalissime, ut declarauimus, aliquæ autem scientiæ considerant de aliquibus causis, & non de omnibus, ut mathematici. vnde patet quod ratione inductæ pro neutra parte concludunt. Ad primam pro parte negatiua, responderetur, quod non est necesse omnia considerata in vna scientia esse contraria, sed vel esse contraria, vel reducibilia ad vnum ad quod ordinantur, nam scientia medicinæ est de sano in vrina, in diætâ, in medicina, in animali, non quia isti modi sint contrarij, sed quia ordinantur ad sanum in anima. sic in proposito licet genera causarum non sint contraria, tamen ordinantur ad vnum, quoniam omnes causæ ordinantur ad causam finalem, ideo dicitur causa causarum. Et propterea non inconuenit, quod ab vna scientia considerentur & consideratione metaphysica ordinantur, siue reducuntur

ad ens. Ad secundam responderetur, quòd etsi concludat in mathematicis, quæ pro quanto considerantur à mathemati-
co non mouentur, neque mouent, ex consequenti non est,
vt sic in eis materia, nec efficiens, nec finis, tamen non con-
cludit in Metaphysica, licet sit de substantijs immobilibus,
& abstractis à materia. non enim omnis finis est terminus
motus acquisitus ab eo quod mouetur, sed potest esse termi-
nus, vel vltimo intentum à mouente immobili, & est illud
gratia cuius mouet, sicut dicemus in 12. lib. quòd substantiæ
motrices mouent cœlos, vt assimilentur primo principio. &
posito casu, quod substantiæ separatæ non mouerent, adhuc
potest in eis assignari finis, qui erit terminus intentus per
actionem suam intellectualem, puta semper intelligunt pri-
mum principium, vt sint semper in optima dispositione, qua
lis nobis est impossibilis, pro hac vita, vt dicemus in 12. lib.
Constat igitur hanc non esse veram vniuersaliter, Vbi non
est motus, non est finis, nec efficiens, nisi dicatur sic, vbi non
est mouens, nec motum, nec agens actione immanenti non
est finis nec efficiens, hæc quidem est vera, & si subsumatur,
quòd in mathematicis non est mouens, nec motum &c. Cõ-
cludetur verum. Si autem subsumatur in Metaphysica, erit
minor falsa, & conclusio falsa.

Ad rationes autem pro parte affirmatiua, vnica ratione
responderetur ad omnes, quòd nec illa quæ considerat causam
finalem tantum, si qua esset, nec formalem tantum, nec effi-
cientem tantum, si quæ tales essent, sed quæ considerat fina-
lem formalem, & efficientem simpliciter, est prima Philoso-
phia. Hæc enim vt declarabitur in 12. considerat primum
principium, quod est primus & vniuersalis finis vniuersi, pri-
ma forma, quia est primus & purissimus actus, & primum a-
gens. Hæc pro secundo cap. dicta sint.

CAPVT III.

IN tertio cap. dubitatur, an ad vnā, vel ad plures scien-
tias pertineat considerare de primis principijs demon-
strationis, quæ dicuntur cōmunes animi conceptiones,
vt, impossibile est simul esse & non esse. De quolibet est affir-
matio,

matio, vel negatio vera. & disputans Arist. pro vtraque parte arguit. Sed aduerte, quòd proponit dubiũ sub duplici parte.

Prima est, vtrum ad vnam vel ad plures scientias pertineat consideratio primorum principiorum.

Secunda est, supposito quod ad vnam, vtrum ad eam, quæ considerat de substantia simpliciter, an ad aliam, & si ad aliã quæ earum debet nominari prima philosophia, quam nunc querimus.

Pro parte negatiua arguit dupliciter.

Et primo sic, non est maior ratio, quòd consideretur magis in vna scientia, quàm in alia, quia omnes vtuntur eis, firmantes super ea demonstrationes suas. ergo vel considerantur in omnibus, vel in nulla, non in omnibus, quia idem inutiliter tractaretur in diuersis, ergo in nulla. ergo nec in ea, quæ considerat substantiam simpliciter.

Secundo sic, si in aliqua scientia considerantur, hoc erit altero duorum modorum, vel quantum ad quid sunt, id est quantum ad eorum significata, vel in quantum demonstrantur, non primo modo, quia cognitis terminis, ex quibus constat, naturaliter scimus quid significant, vnde dicuntur naturaliter nota, & quantum ad eorum significatum supponuntur in omnibus scientijs, tanquam cognita lumine naturali intellectus, non secundo modo, quia omnes demonstrationes sunt de aliqua passione probata, de aliquo subiecto, per propositiones priores & notiores, vt habetur in primo Posterior. Sed prima principia non habent priora & notiora, aliter non essent prima. ergo &c. Patet ergo, quòd nec in vna, nec in pluribus scientijs considerantur, sed omnes vtuntur eis tanquam notissimis & firmissimis fundamentis, ex consequenti patet, quòd nec consideratur in ea. quæ est de substantia simpliciter, vel quæ est consideratiua principiorum primorum, & causarum substantiæ, vt exponit Comment. in comment. quarto.

Pro parte affirmatiua arguitur sic. Cũ ista principia sint ab aliquibus negata, necesse est vt in aliqua scientia consideretur, vtrum sint vera vel falsa. Igitur scientia illa, vel est eadem cum scientia consideratiua substantiæ simpliciter, vel est alia, non alia, quia difficile esset cognoscere, quæ ex eis

esset principalior, & prior, nam quia dignitates sunt primæ, & principia, & fundamenta omnium scientiarum. ex hac ratione scientia cōsideratiua earum, videtur esse prior & principalior, quia vero substantia est primum ens, & omnis scientia est de ente, ex hac ratione, videtur scientia consideratiua de substantia simpliciter esse prior & principalior, ergo erit eadem cum scientia consideratiua substantiæ simpliciter, hæc autem est prima philosophia, vt declarabitur infra, ergo ad primum philosophum spectat considerare de huiusmodi principijs primis.

Et tu aduerte, quòd in quarto libro textu septimo, & octauo determinant hoc dubium pro parte affirmatiua, & in determinatione virtualiter soluit primam & secundam rationem adductam pro parte negatiua, & determinatio stat in duobus.

Primo, quòd magis ad primam philosophiam spectant, quàm ad aliam scientiam, quoniam & si omnes vtantur eis vt conuenit, tamen non considerant de ente communi, hæc autem principia sunt cōmunia omni enti, applicantur enim omni enti, vt de qualibet substantia verum est, quòd est quanta, vel non quanta, de quolibet corpore, quod est corruptibile, vel non corruptibile, de quolibet animali, quod est rationale vel non rationale &c. Quæ autem sunt communia omni enti, sunt de consideratione primi philosophi, nam vt dicitur in quarto libro tex. primo, eadem scientia est consideratiua subiecti, & eorum quæ communiter consequuntur ipsum. Et ex hoc patet, quòd prima ratio in oppositum non concludit.

Secundo, quòd primus philosophus non considerat ea de monstrando, cum sint indemonstrabilia, vnde Philosophus in 4. in tex 8. arguit aliquos conantes ea demonstrare, & dicit quòd id accidit eis propter ignorantiam artis analyticæ traditæ in libris Poster. sed considerant ea tradendo rationes terminorum, quibus cognitis statim sunt manifesta, & soluendo argumenta contradicentium. Et ex hoc patet, quod secunda ratio in oppositum non concludit. Ratio autem adducta pro parte affirmatiua vera est. Hæc de tertio capite dicta sint.

CAPVT IIII.

IN quarto cap. dubitatur. si pertinet ad vnā scientiam considerare de omnibus substantijs, vel si diuersæ scientiæ sunt de diuersis substantijs, puta vna est de substantijs corruptibilibus, alia de incorruptibilibus, vna de separatis, alia de materialibus, & arguit Arist. pro vtraque parte.

Pro parte affirmatiua sic, si non est vnius scientiæ considerare de omnibus substantijs, cuius ergo substantiæ est consideratiua hæc scientia? q.d. non videtur maior ratio, de vna quàm de alia, quoniam cum hæc scientia si de ente, & ens dicatur principaliter de substantia, sicut est de ente vniuersaliter, sic debet esse de substantia vniuersaliter, & non solum de hac vel illa.

Pro parte negatiua sic. Si vna scientia considerat de omnibus substantijs, ergo eadem considerat de omnibus accidentibus consequentibus omnes substantias, sed hoc est falsum, ergo &c. consequentia probatur, quoniam omnis scientia demonstratiua, ex primo Poster. tex. 20. tria requirit, scilicet subiectū, passionēs, & per se accidentia subiecti, quæ de subiecto demonstrantur, & principia ex quibus demonstrantur, si ergo vna scientia de omnibus substantijs, vt de subiecto est, consequenter demonstrabit omnia per se accidentia omnium substantiarum, falsitas autem consequentis ex hoc manifestatur, quod cum scientia accipiat vnitatem & distinctionem à subiecto, ex primo Poster. tex. 42. si vna scientia considerat de omnibus substantijs, & omnibus accidentibus, scientia consideratiua de ente mobili & materiali, erit eadem cum scientia de ente immobili & immateriali siue abstracto, ex consequenti physica & metaphysica erunt vna scientia, quod tamen esse impossibile manifestabitur in 6. Metaph. Et sic remanet questio dubia.

Et tu aduerte, quod Philosophus in quarto lib. tex. 2. determinat hoc dubium, vnde inquit illic Comment. & ista est declaratio prædictæ questionis, in qua dicitur, vtrum sit vnius scientiæ consideratio de substantia, an non, & pro de terminatione huius dubij ad mentem Philosophi propono duas

E P I T O M E L I B. III.

duas distinctiones, ex quibus eliciam, & probabo duas conclusiones. Deinde solvam rationes adductas.

Prima distinctio, consideratio de substantia vniuersaliter, potest esse dupliciter.

Primo, in quantum est substantia.

Secundo, in quantum est hæc, & illa substantia in specie, vel in genere.

Secunda distinctio, consideratio de omnibus accidentibus consequentibus vniuersaliter substantiam potest esse dupliciter.

Primo, de omnibus accidentibus consequentibus omnem substantiam in quantum est substantia.

Secundo, in quantum est hæc substantia distincta in specie, vel in genere ab alia substantia.

Prima conclusio, Est vnius scientiæ considerare de omni substantia, in quantum est substantia, probatur sic. Est vnius scientiæ considerare vniuersaliter de ente, vt est ens, vt probatur in 4. lib. ergo est vnius scientiæ considerare vniuersaliter de substantia, probatur consequentia, omnis scientia considerans de aliquo dicto de pluribus quodam ordine, præcipue est de primo, & principaliter dicto, & exemplificat Philosophus de scientia medicinæ, quæ considerans vniuersaliter de salubri primo, & principaliter considerat de salubri in animali. Ens autem dicitur multis modis, vt declaratur in 5. lib. Primo autem & principaliter de substantia, nam omnia alia dicuntur entia, quia respiciunt substantiam, vt passionem, vel viam, vel mensuram substantiæ, ergo eadem scientia consideratiua entis in quantum ens, primo & principaliter est consideratiua de omni substantia in quantum est substantia.

Secunda conclusio, Non est vnius scientiæ considerare omnes substantias, vt distinguuntur genere, vel specie, sed diuersarum scientiarum, probatur. Nam dicit Philosophus in sexto, quod sicut multiplicatur speculabile in quantum speculabile, ita multiplicantur scientiæ speculatiuæ. Speculabile autem in genere tripliciter diuersificatur, quoniam quoddam abstrahit à materia omnino, quoddam autem secundum rationem tantum, quoddam nec secundum esse, nec secundum rationem, sed tantum abstrahit à materia indiuiduali,

uali, applicando substantijs, substantiæ abstrahentes omnino à materia ad vnam scientiam pertinent, substantiæ autem non abstrahentes à materia, nec secundum esse, nec secundum rationem, sed tantum à materia indiuiduali, ad aliam scientiam pertinent. De abstrahentibus autem tantum secundum rationem, nunc non loquimur, huiusmodi enim sunt quantitates, & non substantiæ, & aduerte, quod sicut formari duas conclusiones de substantia, similiter possunt formari duæ conclusiones de accidentibus, quarum prima erit. Eadem scientia est consideratiua de omnibus substantijs inquantum substantiæ, & de omnibus accidentibus consequentibus omnes substantias inquantum substantiæ. Secunda erit, Diuersæ scientiæ sicut considerant diuersas substantias, inquantum distinguuntur abinuicem, sic considerant diuersa accidentia, consequentia diuersas substantias, & ratio vtriusque conclusionis est, quoniam eiusdem scientiæ est considerare subiectum, & quæ consequuntur ad subiectum, eo modo quo consequuntur ad ipsum.

Ex his patet, quod ratio adducta pro parte affirmatiua non concludit, est enim maior ratio, quod vna scientia puta metaphysica, quæ considerat de ente inquantum ens, consideret de omni substantia inquantum substantia, quàm alia scientia particularis. item quod consideret magis de hac substantia puta abstracta à materia omnino, quàm alia scientia, vt dicetur in libro duodecimo. Secunda autem ratio, quæ est pro parte negatiua, minus etiam concludit, nam falsitas consequentis est nulla, non enim inconuenit eandem scientiam considerare de omnibus accidentibus consequentibus omnes substantias inquantum sunt substantiæ, dummodo non consideret de omnibus accidentibus proprijs & specificis cõuertibilibus cum substantijs, vt distinguuntur abinuicem, hæc enim ad diuersas scientias spectant, sicut & diuersæ substantiæ, vt dictum est. Hæc de quarto cap. dicta sint.

C A P V T V.

IN quinto cap. dubitatur. Si ad eandem scientiã spectat specula-

speculatio, de substantijs, & accidentibus consequentibus per se substantias, an ad aliam & aliam ita, quod una est de substantijs, alia est de earum accidentibus, & arguit ad utramque partem.

Pro parte negatiua, sic arguit. Si ad eandem scientiam utrumque pertinet, cum scientia habeatur per demonstrationem, sequitur quod & substantia & eius accidentia per se, cognoscantur per demonstrationem, sed hoc est falsum, licet enim per se accidentia demonstrarentur de substantia, ut passio de subiecto, per quod quid est subiecti, ut dicitur in primo Poster. tamen substantia non potest demonstrari, quoniam ex 2. Poster. quod quid est declarans substantiam, non potest demonstrari de eo cuius est, & ratio huius est, quoniam ex substantia & suo quod quid est efficitur propositio immediata, sicut ista, homo est animal rationale. ergo &c.

Pro parte affirmatiua, sic arguit. Si una considerat de substantijs, & alia de accidentibus earum, difficile erit videre, quæ consideret de accidentibus per se earum, quoniam cum accidentia per se, habeant attributionem ad ea quorum sunt, videntur ad eandem scientiam pertinere, & sic remanet dubium pro utraque parte.

Et tu aduerte, quod hoc dubium determinatur in lib. 4. in tex. 4. ubi Arist. inquit, palam ergo quod in questionibus dictum est, quia unius est, scilicet scientiæ, de his & de substantia sermonem habere, hoc autem erat unum dubitatorum, scilicet in libro tertio, sua igitur determinatio est pro parte affirmatiua, & ratio intentionis suæ stat in hoc, sicut declaratur infra, principia substantiæ sunt etiam principia suorum priorum accidentium, quoniam fluunt naturaliter & naturali sequela ab eis, ut à quocunque est ignis ab eodem est calor ignis, sed quorum sunt eadem principia, eorum est eadem scientia, ergo, &c. Et sic conceditur ratio adducta pro parte affirmatiua.

Ad rationem pro parte negatiua, negatur consequentia. Licet enim habeatur scientia per demonstrationem, non tamen est necesse, quod omnia cognita in scientia demonstrarentur, sed sufficit propria accidentia demonstrari de subiecto, ut habere tres de triangulo, subiectum autem cognosci-

tur

tur diffinitive, unde de eo præsupponitur quid, ut patet ex primo Poster. Hæc de quinto capite dicta sint.

C A P V T V I.

IN sexto capite dubitatur, utrum præter substantias sensibiles singulares, dentur aliæ substantiæ separatæ à materia, quas Platonici dicunt species siue ideas, ut homo per se, leo per se. Dubitatur etiam utrum inter ideas, & hæc singularia sensibilia dentur intermedia, ut magnitudines separatæ ab omni materia, non solum secundum rationem, sed etiam secundum esse, circa quas aliqui ponunt scientias mathematicas. Et ad primam quidem questionem, arguit ad utranque partem. Et pro parte affirmatiua, remittit se ad primum librum, ubi pertractans opinionem Platonis, circa causam formalem adduxit rationem, quæ fuit fundamentum Platonis in positione idearum, & fuit hæc. Si præter naturalia sensibilia singularia, non dantur substantiæ insensibiles immateriales, de nullo naturali esset scientia, quoniam hæc sensibilia singularia sunt variabilia & corruptibilia: ut patet. Quod autem scitur, non contingit aliter se habere: immo est immobile & perpetuum, ergo præter hunc, & hunc hominem, necesse est dari per se hominem, de quo habeatur scientia, ut de immobili & perpetuo, ex consequenti necesse est per se hominem esse insensibilem, immaterialem, quoniam secundum Platonem omne sensibile, & materiale corruptibile est, unde posuit etiam cælum ex natura sua esse corruptibile, ut patet in Timæo. confirmat opinionem suam ex eo, quod experimur intellectum abstrahere hominem: ut homo est, ab omni singulari, & de homine ut homo est forma diffinitionem, demonstrat passiones proprias, tunc quæritur, aut hæc abstractio est vera vel falsa, si falsa, ergo falsa & chimerica est diffinitio hominis, ut homo est, si vera, ergo sic est in re, sicut fit per intellectum, entitas enim rei est fundamentum veritatis.

Pro parte negatiua, sic arguit. Ponentes substantias insensibiles, quas dicunt ideas, ponunt impossibilia, dicunt. n. quod hic homo, & per se homo, sunt eiusdem naturæ, licet differant

EPI TOME LIB. III.

differant in duobus :

Primo, q̄ hic homo est participatione homo, & per se hō est essentialiter homo, sicut lux in aëre est participatione lux, & lux in sole est essentialiter lux, sunt tñ eiusdem naturæ.

Secundo, q̄ hic homo est corruptibilis, & per se homo est incorruptibilis, sed id penitus est impossibile; probabitur .n. in 10. lib. q̄ corruptibile & incorruptibile differunt genere, & non solum specie, ergo non possunt esse eiusdem naturæ. & sic ex utraque parte remanet quæstio dubia.

Et tu aduerte, q̄ in tota philosophia sua naturali & diuina & morali, vt in primo Ethic. in lib. 2. de physico auditu, tex. 19. & in lib. de generatione, & in 1. & 7. & 12. lib. Metaphysice conatus semper est Aristoteles destruere hanc positionem, sed pro nunc sufficit soluere rationem adductam pro parte affirmatiua, & confirmationem eiusdem. Nam ratio pro parte negatiua, concludit pro Arist. respondendo igitur resolute, negatur consequentia, & ad probationem iterum negatur consequentia, qua inferitur, ergo præter hunc & hūc hominem &c. Nam ad hoc q̄ habeatur scientia de homine sufficit q̄ intellectus feratur super naturam specificam hominis non consideratis singularibus, nec ut stat sub conditionibus indiuiduantibus, sic .n. considerata natura hominis, est quid necessarium, & inuariabile & perpetuum, non quod habeat esse perpetuum extra singularia, sed quoniam de ea sic considerata verificantur infallibiliter, & perpetuo prædicata per se, tam primo, q̄ secundo modo per se, nam hæc semper est vera, homo est animal, est rationalis, est risibilis &c. Et vt sic de homine habetur scientia, & formantur conclusiones necessariae, & deducuntur ex principijs necessarijs, & ut sic, homo est insensibilis, quoniam sensus est singulare, intellectus autem vniuersalium. Et est immaterialis, non q̄ sit abstractus à materia secundum esse, nec à materia sensibili cōmuni, diffinitur enim homo, vt probatur in 2. physico. tex. 19. per carnem & ossa, sed abstrahit à materia indiuiduali, quæ proprie est constitutiva indiuidui, vt dicemus in lib. 7. Ad cōfirmationem, dico illam abstractionem esse veram; & cum inferitur, ergo sic est in re, hoc consequens potest habere duplicem sensum.

Primo.

Primo, quòd sic sit in re. scilicet quòd homo, ut homo habeat esse separatum ab omnibus singularibus, & sic nego consequentiam.

Secundo, quòd sic sit in re. scilicet quòd homo ut homo est aptus intelligi, & diffiniri, non habito respectu ad singularia sine quibus non habet esse, & sic concedo consequentiam & totum sequens. Nam hæc est natura cuiuscunque prioris, quòd potest apprehendi non apprehenso posteriori. Nam cadunt priora in conceptu posteriorum, sed non econverso. propterea non potest per intellectum abstrahi homo ab animali, nec hic homo ab homine, sed bene econverso. Hæc de causa dixit Aristot. in 2. physic. tex. 18. quòd intellectus abstrahit quantitatem à motu, & à qualitatibus sensibilibus, quoniam in substantia materiali, & mobili prius est quantitas quàm qualitas. illa enim immediate consequitur substantiã materiale & immobilem, hæc autem consequitur substantiam mediante quantitate, & ideo inquit illic Aristot. neque fit mendacium abstrahentium. Latet autem hoc facientes & dicentes ideas, physici enim abstrahunt cum sint minus abstracta &c. quod d. aliud est intelligere vnum non intellecto altero, & aliud est intelligere vnum esse sine altero. primum enim est verum, & secundum est falsum, & in primo sensu abstrahunt Peripatetici, in secundo Platonici, ideo &c. Hæc de prima questione pro nunc dicta sint. Nam in 7. lib. diffuse iterum pertractabitur.

Pro secunda questione arguit ad utranque partem. Pro parte negativa sic. sicut geometria est circa lineas, & Arithmetica circa numeros, sic sunt aliquæ aliæ scientiæ mathematicæ circa alia subiecta, puta astrologia circa cælum, musica circa sonos, prospectiva circa radios visuales. ergo si geometria est circa lineas separatas à materia omnino, dabitur cælum separatum, præter cælum naturale, quod est absurdum, quoniam illud cælum vel est mobile, & ut sic non est separatum à materia, omne enim immateriale est immobile, ut dicetur infra, vel est immobile, & hoc repugnat naturæ cœli. sicut enim naturale est graui moueri ad medium, sic naturale est cœlo moueri, vel esse mobile circa medium, & sicut absurdum est dare cælum separatum :
sic

E P I T O M E L I B. I I I.

sic est absurdum dare sonos, & lineas visuales separatas. Nam eadem ratione darentur auditus, & visus separati, qui comprehenderent huiusmodi separata, sicut auditus, & visus quos habemus in nobis comprehendunt huiusmodi non separata. Cum igitur hæc sint absurda, sequitur quod non dantur mathem. separata secundum esse à materia.

Pro parte autem affirmatiua sic arguit, cum magnitudines, quæ sunt in materia corrumpantur ad corruptionem substantiæ rei, si non dantur magnitudines separate immobilis & incorruptibiles, sequitur quod scientia sit de corruptibilibus, & quod ipsa scientia sit corrupta, corruptis his circa quæ est. quod tamen est falsum, quoniam quod scitur non potest aliter se habere, & scientia non corrumpitur, nisi corrupto obiecto circa quod est vel à suo contrario: puta ab ignorantia prauæ dispositionis.

Præterea, res quales traduntur in scientijs, tales debent esse, aliter scientia non esset vera, sed falsa cognitio. sed multa sensibilia non sunt talia qualia traduntur in mathematicis, nam geometra probat sphæram tangere planum, siue rectam lineam in puncto: quod tamen non est verum in sphæra, & in linea, quæ habet esse in materia sensibili, & hac ratione usus est Protagoras arguens contra Geometras. Item dicit Astrologus quosdam esse motus & reuolutiones cælorum, qui tamen videntur repugnare cælo sensibili perfecte sphærico, puta quod sint per eccentricos & epicyclos. Item dicit Astronomus, alitra esse sicut puncta, quod tamen non est verum, de his altris sensibilibus, cum habeant magnitudinem suam. ergo si huiusmodi scientiæ debent esse vere, necesse est vt dentur lineæ, & magnitudines separate ab his sensibilibus, circa quas erunt huiusmodi scientiæ, & sic pro vtraque parte remanet quæstio dubia.

Et tu aduerte, quod Aristoteles in septimo libro determinabit hoc dubium, & vt habeat ex nunc resolutionem, dico tria.

Primo, quod nec mathematica, sicut nec naturalia possunt esse separata à materia, quoniam cum sint accidentia, & de ratione accidentis sit substantia, necesse est in ratione quantitatis includi substantiam, quæ sit materia, forma, vel compositum

fitum, sed quoniam quantitas immediate consequitur materiam, sicut qualitas formam, ideo in ratione quantitatis includitur materia, sicut in ratione hominis includuntur caro, & ossa, & nervi. unde sicut non potest esse homo sine carne & ossa, sic non potest esse quantitas sine materia.

Secundo dico, quod licet non possit esse sine materia, in hoc tamen distinguitur à re naturali, quod potest intelligi, & diffiniri sine materia sensibili, id est materia subiecta qualitatibus, & motui, & generationi, & corruptioni qualem materiam important caro, & ossa, & lignum, & lapis, & æs. & ratio huius est, quoniam posterius non est de intellectu prioris, sed econverso, sed quantitas prior est qualitatibus sensibilibus, consequitur enim materiam, qualitas autem formam. nam prius necesse est intelligere materiam diuisam per quantitatem, quam recipiat formam, & qualitates consequentes formam priores sunt motu, sicut principia motus. ergo intellectus potest intelligere ac diffinire quantitatem, non intellecta materia, ut stat sub qualitate & motu. hac de causa in diffinitione lineæ vel circuli, non cadit lignum vel terra, vel lapis, & hoc est abstrahere quantitatem à materia naturali & à motu, non quod dicat intellectus quantitatem esse sine materia naturali, ut imaginabantur Pythagorici, sed quod intelligit eam, non considerata materia naturali. In re autem naturali hanc abstractionem non potest facere intellectus, quoniam, ut probabitur in 7. lib. ratione hominis est quod constet ex corpore naturali & anima. non datur autem corpus naturale sine qualitatibus sensibilibus, & sine motu, propterea intellectus non abstrahit naturalia à materia sensibili, nec à motu, sed tantum à materia indiuiduali, ut dictum est supra.

Tertio dico, quod per huiusmodi abstractiuam considerationem saluatur veritas scientiæ mathematicæ. Nam Mathematicus considerans lineam sine materia sensibili non iudicat eam existere extra materiam, sed intelligit eam quoad prædicata per se, quæ potest apprehendere, non apprehensa qualitate sensibili. nam si intellectus potest abstrahere frigiditatem ab albedine in niue, prout potest considerare niuem frigidam non considerando, ut albam, multo magis id

E P I T O M E L I B. I I I.

potest in quantitate, quæ prior est qualitatibus sensibilibus.

Ex his patet solutio rationum pro parte affirmatiua, & ad primam negatur consequentia. ad probationem dico, quod prout de magnitudine sensibili habet scientia, non corrumpitur ad corruptionem huius vel illius substantiæ, in quæ nisi per accidens, non enim scitur in quantum est in hac substantia, sed quo ad prædicata per se, quæ immutabiliter verificantur de ea non habito respectu ad materiam sensibilem, puta triangulus semper est prima figura rectilinea & semper habet tres æquales duobus rectis.

Ad secundam, nego minorem, ad probationem nego quin sphaera: ut sphaera est, conueniat tangere planum in puncto, immo si tangeret, & non tangeret in puncto non esset sphaera, est enim proprietas consequens rationem sphaerae: sicut non concurrere est proprietas parallelæ. & si dicis quod experimur ad sensum, pilam tangere planum secundum superficiem ergo non in puncto, dico quod experimur hoc tactu physico, non autem mathematico, sicut experimur, quod diuisio in infinitum non conuenit corpori physico in quo dabile est minimum probatum: ut in primo physico, tex 36. sed corpori mathematici sumpto, id est in quantum continuo. de eccentricis & epyciclis vtrum repugnent cælo videbitur in libro decimo. De astris non dicit astronomus, quod in se sint sicut puncta, sed in respectu ad oculum nostrum, ex maxima distantia quæ prohibet videri obiectum sub sua quantitate. manifestum est igitur, quod non cogimur dare magnitudines separatas, ut verificentur scientiæ mathematicæ.

Et tu aduerte, quod Arist. in hoc tertio libro postquam arguit ad partes, pro dubio proposito introducit opinionem quorundam qui ponunt mathematici media inter ideas, & has magnitudines sensibiles ac materiales, non quidem extra has magnitudines, sed penetrantes eas, & hæc fuit opinio eorum qui ut visum est in 4. Phys. posuerunt quasdam dimensiones per se existentes & penetrantes corpora sensibilia, & dicebant eas esse locum vacuum, cuius sententia, quoniam illic ad plenum reprobata est, ideo non est hic inutiliter repetenda. Hæc de sexto capite dicta sunt.

Caput

CAPVT VII.

IN septimo cap. duo sunt dubia disputanda.

Primum, si principia rerum sunt genera, quæ prædicantur de eis, an partes primæ, ex quibus componuntur, sicut sunt elementa.

Secundum, dato quòd genera sint rerum principia, dubitatur an illa sint communissima, ut ens, & vnum, & magnum & paruum.

Ad primum dubium arguit Philosophus pro vtraque parte, & pro parte negativa sic arguit. Sicut est in vocibus, scilicet articulatis, & in demonstrationibus, quibus probantur descriptiones figurarum, & in artificiatibus, & in naturalibus, sic proportionaliter debet dici in omnibus alijs rebus. sed in vocibus, non dicitur vox, quæ est genus. & prædicatur de omni voce esse principium constitutum vocum, sed literæ ex quibus componuntur primo tanquam ex primis partibus. & apud Geometram non dicitur diagramma siue descriptio, quæ est genus cõmune omni descriptioni figurarum esse principium earum, sed primas demonstrationes geometricales, ex quibus procedunt aliæ demonstrationes, tanquam ex primis principijs. sicut ordinavit Euclides in libro suo, in quo posuit primas propositiones, & primas demonstrationes, tanquam elementa prima sequentium demonstrationum. similiter in artificiatibus non dicitur artificiatum, quod est genus, esse principium eius, sed illa ex quibus constat, puta lapides, cæmentum, figura, sunt principia domus, similiter in naturalibus non dicitur corpus aut animal genus esse principium eorum, sed prima corpora, ut terra, aqua &c. Quæ & antiqui, ut Empedocles, vocabant prima rerum elementa, id est principia materialia, ex quibus componuntur: ergo &c.

Pro parte affirmatiua, sic arguit. Genera sunt principia cognoscendi rem, ergo & essendi. patet consequentia, quoniam eadem sunt principia cognoscendi & essendi. Quod autem genera sint principia cognoscendi, patet, quoniam ex generibus dantur diffinitiones, adiunctis tamè differentijs,

vt dicetur in 7. lib. sed per diffinitiones cognoscimus res. est enim indicans rei essentiam. ergo genera sunt principia essendi in rebus, sicut & cognoscendi & confirmatur, quoniam quidam antiquorum, vt dicetur in decimo libro, vtuntur tanquam primis rerum principijs, ente, & vno, & magno & paruo, quæ existimantur communissima genera. & sic quæ situm remanet ex vtraque parte dubium. Huic dubio forte responderet aliquis dicens tam genera, quàm partes primas componentes esse rerum principia.

Sed contra hanc solutionem, sic arguit Philosophus. Si vtraque essent principia ab vtrisque posset accipi vna & eadē ratio diffinitiuā indicans rei substantiam, quod tamen est falsum, probatur consequentia, quoniam à rei principijs potest sumi rei diffinitio. Nam per rei principia, sua substantia cognoscitur. Et vna est tantum vnius rei diffinitio, cum sit vna tantum eius substantia. ergo si tam genera, quàm partes primæ componentes sunt rerum principia, ab vtrisque posset accipi vna & eadem ratio diffinitiuā, falsitas autem consequentis, patet quoniam genera & partes primæ componentes sunt diuersarum rationum, ergo ab eis sumetur diuersa diffinitio & non vna, puta à genere sumetur ratio logica, à partibus autem ratio Phys. Patet ergo, quod hæc non valet. Ad secundum dubium arguit pro vtraque parte & primo, quod communissima genera non sunt magis principia, sed infima prædicata de indiuiduis, id est specialissima.

Quantum ad cōmunissima genera, quæ hic appellat ens & vnum sic arguit. Si ea quæ sunt vniuersalissima, sunt magis principia, quia sunt genera, cum hmoi communissima, si cut ens & vnum sequitur, quod ens sit genus, similiter & vnū, sed hoc est falsum. Nam necesse est omne genus, ad ita differentia constituere speciem, de qua differentia non prædicatur genus in primo modo per se, quoniam si in diffinitione differentię poneretur genus, semper committeretur nugatio quando genus & differentia prædicantur de specie, puta, si in ly rationali includitur diffinitiuē animal cū dicitur homo est animal rationale bis diceretur animal, sic resoluendo, homo est animal, animal habens rationem, sed de omni differentia prædicatur ens, aliter esset non ens, similiter

liter de omni differentia prædicatur vnum, est enim conuertibile cum ente, vt videbitur in quarto. ergo nec ens nec vnũ possunt esse genera, ex consequenti non possunt esse principia rerum, ex eo quòd sunt communissima.

Præterea non solum ens & vnum sunt communia, sed intermedia vsque ad indiuidua, vt species subalternæ & specialissimæ, quia prædicatur de pluribus, ergo si aliqua sunt principia rerum, quia sunt communia, hæc omnia erunt principia, quòd non videtur rationabile.

Præterea, non solum genera sunt communia, sed & differentia, & sunt causæ cognoscendi rem cum sumantur à forma, qua res est actu, & vnumquodque cognoscitur inquantũ est actu. ergo differentia erunt magis principia rerũ quàm genera, quòd videtur absurdum, quoniam cum sint pene infinita, essent quasi infinita principia rerum, ex consequenti nulla aut parua haberetur de rebus scientia, vt dictum est in primo Phys. tex. 50. contra Anaxagoram.

Pro parte secunda, scilicet, quòd specialissima sint magis principia rerum quàm genera sic arguit, vnum secundum viam Platonis videtur maxime habere rationem principij. ergo quod est magis vnum, magis erit principium. constat autem quòd inter cõmunia prædicata, species specialissima est magis vna. quia est indiuisibilis secundum formam, non enim est diuisibilis per differentias formales sicut genus, sed tantum diuisione indiuiduali siue materiali. ergo est magis principium quàm genera generalissima & subalterna.

Præterea, secundum viam Platonis, ea inter quæ non est ordo prioris & posterioris, nec melioris & prioris, possunt esse separata, ex consequenti possunt esse principia, quĩ Platonem ponebat principia rerum separata, vt dicitur in 7. & in 1. lib. Inter quæ autem est huiusmodi ordo non possunt esse separata. propterea apud Platonem, nec in numeris, nec in figuris potest esse quid separatum, ex consequenti non possunt esse principia secundum Platonem. sed in specialissima respectu indiuiduorum, non est huiusmodi ordo, omnia enim æque participant naturam specificam & differunt solum materialiter: In generibus autem est huiusmodi ordo, quĩ communiora sunt priora, & minus communia poste-

riora, & diuiditur quodlibet genus in contrarias differentias, quarum vna est perfectior altera, ergo magis rationabile est ponere specialissima esse rerum principia, quàm genera.

In oppositum autem, scilicet, quod magis vniuersalia sunt magis principia, & non specialissima, sic arguit.

Quod est causa & principium oportet esse præter principia, & separatum ab eis intelligendo de principio & causa efficiente, quia cum nihil producat seipsum, oportet produciens esse separatum à producto, sed istæ conditiones magis conueniunt magis vniuersalibus, quia prædicantur de omnibus, & non econuerso, à quo sumitur signum, quod sunt præter ea, de quibus prædicantur veluti ab eis separata. ergo sunt magis principia quàm specialissima, & sic patet quod propositum remanet dubium pro vtraque parte.

Pro determinatione vtriusque dubij, aduerte, quod secundum principia doctrinæ Arist. paruum difficultatem continet, nam cum sint tantum quatuor genera principiorum & causarum, duo quidem intrinseca, Materiale & formale, duo extrinseca, efficiens & finale, vniuersalia tam generalissima, quàm media & specialissima, si habent rationem principij cum sint intrinseca, his de quibus prædicantur, & non possint esse separata secundum esse ab eis, vt probabitur in septimo libro, non possunt esse rerum principia, nisi materiale & formale, inter quæ genus erit principium materiale, quoniam vt probabitur in septimo sumitur à materia, & specialissimum erit formale, quoniam constituitur differentia, quæ vt probabitur in eodem loco, sumitur à forma & res magis pendet à forma, quam à materia, quoniam per formam constituitur & conseruatur in actu, ideo specialissimum est magis principium quàm genus.

Secundum principia autem doctrinæ Platonice habent maiorem difficultatem, quoniam cum vniuersalia & communia prædicata sint separata à singularibus apud Platonem, si habent rationem principij erunt principia extrinseca, scilicet efficiens & finis, ex consequenti in via Platonis argumtari potuit pro vtraque parte, an genera essent principia .i. efficientia, & posito quod sic, an prima genera, id est maxime vniuersalia, essent magis principia, quàm specialissima,

cum

cum hæc & illa ponantur separata apud Platonem .

Et quoniam hic nitimur & adhæremus doctrinæ Arist. Bonum est vt soluamus rationes prius positas, & pro solutione rationum ad primum dubium, aduerte duo .

Primo, quòd aliud est loqui de principijs rei consideratio ne logica, quæ est secundum rationem, & aliud de consideratione reali qualis est consideratio physica & metaphysica . Nam consideratione reali partes componentes, sunt verò principia rei, siue vt materia, vt in vocibus literæ in artificiatris lignum vel ferrum, in naturalibus quatuor elementa, siue vt forma, vt in vocibus ordo literarum, in artificiatris compositio siue figura in naturalibus, formæ naturales. Consideratione autem logica, tam genera quàm differentiæ, possunt dici principia inquantum sunt constitutiva diffinitionum & specierum. Nam sicut apud physicum constituitur homo ex elementis & anima, sic apud logicum constituitur ex animali, & rationali, vt ex genere & differentia. Ratione huius duplicis considerationis, patet quid dicendum ad rationes primi dubij . Nam ratio inducta pro parte negatiua, concludit secundum considerationem physicam & metaphysicam. Ratio autem inducta pro parte affirmatiua, concludit secundum considerationem logicam .

Secundo aduerte, quod diffinitio dupliciter dari potest de re.

Primo, per vnum aut per duo genera causarum, puta per materiam, aut per formam, aut per finem, aut efficientem, vt si dicatur homo est quid compositum, ex contrarijs erit diffinitio per materiam. Si dicatur, homo est substantia intellectualis, erit diffinitio per formam. Si dicatur, homo est substantia ordinata ad beatitudinem, est diffinitio per finem. Si dicatur, homo est ens productum à sibi simili in specie, secundum corpus & immediate productum adeo secundum animam erit diffinitio per causam efficientem .

Secundo, potest dari per omnes causas suas, vt si dicatur homo est substantia composita ex contrarijs intellectualis secundum partem, ordinata ad beatitudinem, producta à sibi simili in specie secundum corpus creata immediate adeo secundum animam . Item aduerte, quod diffinitio potest dari de re considerata logice, & de re considerata realiter, vt hæc

homo est animal rationale, est logica, hæc autem, homo est quid compositum ex contrarijs elementis & anima rationali, est realis, ex his distinctionibus, patet quid dicendum ad rationem philosophi qua conatur infringere responsum dicentium, tam genera, quam partes componentes esse rerum principia. Negatur igitur consequentia ad probationem, conceditur quod a rei principiis potest sumi rei definitio, sed negatur quod unus rei sit tantum una definitio, nisi detur per omnia principia rei. Si autem non datur per omnia principia non inconuenit eam multiplicari, ut declaratum est in distinctione data. Et cum probatur unitas definitionis per unitatem substantiæ rei definitæ non valet nisi in definitione complectente omnia rei principia, & si dicas. Ergo non omnis definitio sufficienter indicat essentiam rei definitæ. Respondeo, si complectitur omnia genera causatum conuenientium rei definitæ simpliciter sufficienter indicat essentiam rei definitæ, si non complectitur omnia genera causarum sufficienter indicat pro illo genere causæ, secundum quam datur & illud sufficit. Hæc pro determinatione primi dubij dicta sint.

Pro solutione rationum inductarum pro secundo dubio aduerte, quod rationes probantes communissima & vniuersalissima non esse magis principia concludunt secundum doctrinam Arist. quoniam consideratione reali, nullum vniuersale, ut vniuersale est alicuius causalitatis, nisi ratione alicuius singularis in quo habet esse, hæc enim non est vera, homo generat nisi quia hic, vel hic generat, & quoniam Plato arbitrabatur maxime communissima esse extra singularia, ideo credebatur ea esse maxime principia, sed destructo hoc fundamento, quod destrueretur in septimo & in decimo libro, patet hanc negatiuam esse veram, nullum vniuersalissimum ut sic, est rerum principium, nec aliud commune ut sic, ergo non est magis principium quam minus commune, & propterea non est necesse soluere rationes probantes negatiuam supradictam. Rationes autem inductæ pro secunda parte dubij de specialissimo, quod sit magis principium quam communissimum, non procedunt, nisi ex fundamento Platonis, scilicet quod est magis vnum, & est separatum à singularibus &c.

bus &c. sed hoc fundamentum applicatum siue magis communi, siue minus communi, siue habentibus ordinem, siue non habentibus, est falsum in via Arist. sola enim singularia habent unitatem realem, & per se existunt, siue sint immaterialia, vt intelligentiæ, siue materialia, vt composita ex materia & forma, quare &c.

Ad rationem in oppositum negatur minor secundum doctrinam Aristot. & cum dicitur quod ex quo prædicantur de omnibus, & non econuerso, signum est quod sunt præter ea, ex consequenti sunt separata, immo ex hoc sumitur signum oppositum, quoniam in omni prædicatione affirmatiua & in recto, necesse est prædicatum identificari subiecto, aut in esse subiecto. Identificatur autem prædicatum essentiale, & inest prædicatum accidentale, tam in accidente proprio quàm in accidente communi, quare &c. Hæc de septimo capite dicta sint.

C A P V T V I I I .

IN octauo capite disputantur duo dubia, quæ immediate sequuntur ex præcedentibus. Disputatum est enim utrum vniuersalia sint principia, & utrum magis vniuersalia quàm minus vniuersalia sint magis principia. Et dictum est, quod si sunt separata sunt principia, si autem non, non dubitatur. ergo si dantur vniuersalia separata per se existentia, vel si nihil per se existit nisi singulare. Item dubitatur si præter singulare materiale sensibile datur aliquod ens separatum, quod sit compositum, vel materia, vel forma.

Ad primum dubium arguit pro vtraque parte, pro parte affirmatiua sic. Si nihil est præter singularia, nulla habetur scientia, quoniam cum sint infinita non possunt sciri. si ergo de aliquo habetur scientia, oportet illud esse vniuersale, tunc ultra, aut illud vniuersale habet esse, aut non, si habet esse, ergo præter singularia datur vniuersale separatum, si non habet esse, ergo scientia non erit de vero, quoniam ens & verum conuertuntur, & quod non est non contingit scire.

Pro parte negatiua sic. Si vniuersale est separatum à singularibus, ergo erit necesse quod prima genera, vel quæ sunt
vniuer

vniuersalia, id est specialissima, sint præter sua indiuidua, hoc autem est impossibile, vt dictum est in præcedentibus, & magis dicitur infra.

Pro determinatione huius dubij, aduerte, quòd Arist. in 7. lib. multiplici ratione contra Plat. concludet pro parte negatiua, quas nolo hic formare, ne fiat inutilis repetitio, vnde pro nunc sufficit soluere rationem adductam pro parte affirmatiua.

Ad rationem igitur dico, quòd licet singularia, vt singularia non possint sciri, tamen de vniuersali prædicato de singularibus, habetur scientia, & cum arguitur aut illud vniuersale habet esse, aut non, dico q̄ habet esse, sed nego hanc consequentiam, ergo præter singularia datur vniuersale separatim, nam habet esse & in intellectu, vt cognitum obiectum in cognoscente & in singularibus, vt in his quibus primo competit existentia, hæc enim est vera, homo existit, quia hic vel hic existit, vnde dicit Arist. in prædicamentis, secundas substantias existere in primis, vt in his quæ principaliter & maxime subsistunt. Et si arguitur, q̄ intellectus concipit vniuersale non concepto aliquo singulari, ergo habet esse nõ in singulari, aliter intelligeret rem alio modo quàm sit, & sic falso intelligeret.

Respondeo, & nego consequentiam, quia cum vniuersale sit prius vniuersali non inconuenit intelligere prius non intellecto posteriori, & cum dicitur quod intelligeret rem aliter quam sit &c. dico quòd id non conuenit dummodo nõ enunciet de re aliter quam sit, nam cum intellectus sit virtus immaterialis, intelligit rem materiam immaterialiter, id est modo spiritali, si tamen diceret rem materialem esse immaterialem, falsè intelligeret, similiter cum sit virtus inorganica & receptiua speciei representatiue sine conditionibus singularibus potest intelligere rei naturam vniuersaliter, non eo intellecto aliquæ singulari, si tamen diceret talem rei naturam existere sine singularibus falsè intelligeret. Hæc de primo dubio dicta sint.

Ad secundum dubium arguit pro vtraque parte, & pro parte affirmatiua sic. Si nihil datur præter singulare materiale sensibile, nullum erit ens intelligibile, sed tantum à sensu

su cognoscibile, sensus enim est proprie singularium sensibilibus, tunc ultra, ergo de nullo habebitur scientia, nisi forte quis dicat sensum & scientiam non distingui, ut dicebant alii, quorum positio reprobata est in 2. de Anima tex. 150. scientia enim cum sit in intellectu pro obiecto habet intelligibile, sicut sentire, cum sit in sensu pro obiecto habet sensibile. Præterea, si nihil est præter singularia materialia sensibilia, nihil erit sempiternum & immobile, omnia enim huiusmodi singularia videntur esse sub motu & corruptione, si nihil est sempiternum, non datur generatio, quoniam in omni generatione est id quod fit, & id ex quo fit, ut materia, & non potest esse non ens, quia ex non ente est impossibile aliquid generari, illud ergo ens, ex quo aliquid fit, aut factum est ex alio, aut non, si non, ergo est ingenitum, ergo sempiternum, si ex alio fit, cum non sit processus in infinitum in causis materialibus, ut dictum est in 2. lib. deuenietur tandem ad aliquod non factum ex alio, & illud erit in sempiternum, aliter si non est deuenire ad aliquod primum materiale principium non factum ex alio, nunquam complebitur rei generatio, ex rei consequenti frustra esset. Præterea cum nullus motus sit infinitus necesse est ut habeat aliquem finem, qui erit terminus motus, qui terminus est aliqua forma aut substantialis, aut accidentalis, dempto motu locali, qui est, ad ubi, quem tamen necesse est esse finitum, saltem secundum quamlibet circulationem. Quæro igitur de forma, quæ est terminus motus aut est producta per alium motum siue generationem, aut non, si non, ergo erit ingenita & æterna, si sic, vel est processus in infinitum in causis formalibus, vel est deuenire ad formam primam ingenitam, sed probatum est in secundo libro, non esse processum in infinitum in formis ergo datur aliqua forma ingenita, ex consequenti incorruptibilis & æterna, patet ergo quod ultra singularia materialia sensibilia, quæ cadunt sub motu & corruptione, necesse est dare aliquod separatum ingenitum & æternum, quod quidem non est compositum ex materia & forma, nec est materia, quoniam cum sit ens mere potentiale sibi repugnat per se existere.

Pro parte negatiua sic arguit. Si ponatur esse aliqua forma

nam separatam à singularibus, quaeritur quæ erunt huiusmodi formæ. Certum quod non erunt artificiales, vanum est enim ponere formam domus, siue aliquam domum separatam à domo sensibili & materiali, si ergo hoc non datur in omnibus naturis, difficillimum erit assignare in qua natura datur huiusmodi formæ separatæ.

Pro determinatione huius dubij aduerte, quod formæ sunt in duplici differentia.

Quædam sunt quarum nulla actio supergreditur materiâ omnino, sed exercetur aut qualitatibus naturalibus, ut calefacere ex calore, frigefacere ex frigiditate, vel exercentur potentij animæ organicis, ut vegetare, sentire, moueri progres siue, concupiscere, & huiusmodi formæ non possunt esse separate à materia, educuntur enim de potentia materiæ per actionem agentis naturalis, ex consequenti eis non competit esse nisi per esse compositi materialis, propterea ipso desinente desinunt.

Quædam autem sunt, quarum actio non pendet materia, nec exercetur potentia alligata materiæ, sed eleuata omnino super materiam, ut intelligere, & velle, & has non inconuenit ponere separatas à materia, quæ tamen adhuc sunt in duplici differentia.

Quædam enim sunt pars speciei, ut animæ humanæ, & hæc quidem vnibiles sunt materiæ, cum dent homini esse hominem, separabiles etiam sunt à materia, & post corruptionem compositi separate à materia permanent in esse.

Quædam autem complete sunt in specie, ut intelligentiæ, & primum principium, & non sunt vnibiles materiæ, cum non sint pars, & sunt semper separate à materia, & proprie dicuntur formæ, siue actus omnino immateriales & metaphysici.

De primis, quod non sint, nec possint esse, nisi in materia, determinabit Aristoteles in 7. lib. longo processu.

De secunda determinabit in lib. 12. tex. 16.

De tertijs determinabit in eod. lib. in tex. 30.

Nunc superest soluere rationes inductas pro veraque parte, & ad primam pro parte affirmatiua, dico, quod procedit ex fundamentis Plat. qui arbitratur, ut habeatur scientia de naturali

ruralibus mobilibus sit necesse dare naturas vniuersales præter singularia, quod non est verum, nam vt habeatur scientia de naturalibus, sufficit, q̄ intellectus abstrahat vniuersale à singularibus. scilicet intelligendo vniuersale, non intellectis singularibus, vt declaratum est supra.

Respondendo igitur formaliter, nego consequentiam, nam natura rei sensibilis licet non existat extra singularia, tamen quia conceptibilis est secundum se, non habito respectu ad sua singularia, dicitur esse natura intelligibilis, & vt sic non est necesse vt incidamus in sententiam antiquorum, qui non distinguebant inter scientiam & sentire.

Ad secundam dico, q̄ licet concludat verum. scilicet q̄ necesse est dare aliquod æternum & ingenitum, vt seruetur generatio, tamen non est necesse illud æternum esse aliquam formam, quæ sit terminus generationis, nec secundum veritatem illud est materia prima, quoniam nõ est verum, mundum esse æternum, vt docuimus in 8. phys. licet Arist. aliter senserit. Et quando probatur, q̄ aliter erit processus in infinitum in causis materialibus & formalibus, nego consequentiam, quæ fundatur super hac propositione, quod materia & forma per se generentur, cuius oppositum manifestabitur in libro 7. vbi dicemus solum compositum generari per se, partes autem per accidens. Illud ergo æternum, vt declarabitur in libro 12. est primum agens & intelligentiæ motrices, cum corpore cœlesti, quæ sunt formæ abstractæ inalterabiles &c. Et hæc solutio sufficiat pro secunda & tertia ratione.

Ad rationem pro parte negativa, patet solutio ex distinctione data de formis, solæ enim intellectuales possunt existere sine omni materia, & de artificialibus iudicandum est sicut de natura cibis quantum ad inseparabilitatem à materia. Hæc de octauo capite dicta sint.

C A P V T I X.

IN nono capite duo disputanda sunt.

Primo, verum omnium indiuiduorum vnus species, vt omnium hominum, sit vna substantia, id est
vna

vna quiditas, siue vna forma.

Secundo, vtrum omnium rerum sint eadem principia numero, vel eadem specie & diuersa numero.

Ad primum dubium pro parte negatiua sic arguitur. Si omnium indiuiduorum est vna quiditas siue forma, ergo quæ sunt multa & differentia non erunt multa, & implicat contradictionem, probatur consequentia. Quorum est vna quiditas siue forma, illa non sunt multa, sed vnum, sed per te multorum & differentium indiuiduorum est vna forma. ergo multa & differentia non erunt multa, ex consequenti multa non erunt multa, quod implicat.

Præterea, si forma omnium indiuiduorum est vna, non poterit assignari ratio, quare talis forma vniatur huic materię, & illa illi, nam indistinctis indiuiduis distinctæ sunt materię, aliter non different numero, consequentia autem sic probatur. Quod est in se indiuisum, remanens indiuisum non componitur cum multis distinctis, ergo &c.

Pro parte affirmatiua non arguit, quoniam apud Platonem eiusdem manifestum est, quod omnium singularium eiusdem naturæ est vna forma separata, quam vocat substantiam & quiditatem omnium singularium, vt declarabitur in libro septimo, & quoniam in hoc libro procedit tantum disputatiue adducens antiquorum rationes & fundamenta super dubia hic pertractata sufficiebat pro parte affirmatiua, supponere prædictum fundamentum Platonis.

Et tu aduerte, quod hoc dubium determinatur secundum viam Arist. simpliciter pro parte negatiua. nam in 7. lib. text. 20 probabit, q̄ quid est, id est rei quiditatem idem esse cum eo cuius est, ergo sicut multiplicantur indiuidua habentia suam quiditatem quæ dicitur esse rei substantia, sic multiplicantur quiditates. Præterea, cum generatio sicut & motus, sumat vnitatem & distinctionem à termino. ad quem & terminus generationis sit forma, sequitur q̄ omnium indiuiduorum eiusdem speciei sit vna numero generatio, ex consequenti, omnia indiuidua essent vnum indiuiduum genitum, quod est absurdum. Præterea, cum vnumquodque habeat esse, & vnitatem & distinctionem à propria forma. Si omnia indiuidua vnius speciei habent vnā formā, omnia
erunt

erunt vnum & non multa, & sic omnes homines erunt tantū vnus homo, quod est contra sensum. Rationes adducte pro parte negatiua concludunt, verum ideo non sunt soluendæ.

Fundamentum Platonis adductum pro parte affirmatiua destruetur in septimo vbi declarabitur vanum esse ponere formam separatam ab eo cuius est forma.

Ad secundum dubium arguit Arist. pro vtraque parte & pro parte affirmatiua sic. Cum omne quod est in principia- to pendet à suo principio, si principia rerum non sunt eadē numero nec aliquod principiatum erit vnum numero. ergo nullum genitum erit vnum numero, nec particulare, & nullū erit particulare, nullum erit vniuersale, dicitur enim vniuersale, quod est vnum dictum de multis, & in multis, & si nō erit vniuersale, nulla erit scientia, quoniam est proprie de vniuersali. Præterea si non sunt eadem principia numero, nec ens per se, nec vnum per se, id est primum ens, & primum vnum, quod ponitur esse principium omnium erit idē numero, ex consequenti non erit per se subsistens, quod tamen est falsum, quoniam in entibus est deuenire ad vnum primum. quod est maxime ens, & vnum in seipso subsistēs. ergo &c. Pro parte autem negatiua, sic arguit: Cum diuersitas principiatorum pendeat à principijs, si principia rerum essent eadem numero nulla esset diuersitas in rebus, sicut videmus in sensibilibus, si omnes literæ essent eadem, non fieret distinctio syllabarum, nec dictionum, hæc autem sunt absurdæ. ergo diuersorum diuersa sunt principia.

Et tu aduerte, quod Arist. in 12. in tex. 19. vsque ad tex. 29. determinat hoc dubium, & declarat quomodo sunt eadem, & quomodo diuersa, vtraque enim pars est vera bene intellecta, & resolutio stat in hoc, principia rerum sunt duplicia, scilicet intrinsecam, vt materia & forma siue potentia & actus, & extrinseca, vt efficiens & finis, principia intrinseca, iterum dupliciter considerantur, scilicet in vniuersali, vel in specie, si in vniuersali, sic sunt quodammodo eadem in omni prædicamento, quoniam sicut in prædicamento substantiæ principia sunt forma, cui opponitur priuatio, & materia, sic proportionaliter in quantitate & qualitate, & in alijs prædicamentis sunt quædam, vt forma & priuatio & materia, vt
in

in prædicamento qualitatis forma est lux, tenebra priuatio, diaphanum materia, si in specie, sic sunt diuersa in diuersis, quoniam vniuscuiusque forma recipitur in sua propria materia, vt anima intellectiua in corpore humano, anima equi in corpore equi, forma lapidis in materia lapidis. Principia autem extrinseca quadrupliciter considerantur, quoniam vel vt primo prima absolute, vel vt primo prima in genere, vel vt specifica, vel vt indiuidua. Si primo prima, sic sunt simpliciter eadem. Nam primo primum efficiens omnium est primum principium, à quo pendet cælum & omnia naturalia, vt dicemus in lib. 12. in tex. 38. Si primo prima in genere, scilicet in genere corporalium sub cælo sic etiam sunt eadem principia omnium quæ sub cælo sunt, nam intelligentiæ, & corpora cælestia principia sunt omnium inferiorum, tam in elementis, quàm in elementatis, & hæc cum sint incorruptibilia, semper eadem permanent secundum substantiam, licet cælum mutetur secundum vbi, quo ad eius partes, vt stant sub motu. Intelligentiæ autem mutantur secundum intellectum & appetitum. Quomodo autem id sit, nõ est præsentis loci considerare, sed in 12. lib. Si in specie sic diuersorum productorum distinctorum specie, siue etiam genere, sunt diuersa principia efficientia, nam vt declarabitur in 12. lib. in tex. 13. vnumquodque sit à suo vniuoco. ergo homo ab homine, equus ab equo &c. Si indiuiduo, sic iterum distingo, quoniam vel in distinctis speciebus, vel in eadem. Si primo sic diuersorum indiuiduorum, diuersa sunt principia effectiua, vt huius hominis hic homo, & huius eq, hic equus, vnumquodque enim agit secundum speciem suam, & non vltra speciem. Si secundo non inconuenit idem efficiens numero esse principium plurium indiuiduorum: ut patet de Socrate generante multos filios. Ad conseruandam tamen longam generationem successiuam in eadem specie, necessario requiruntur multa principia effectiua, quoniam nullum eorum est incorruptibile. Patet igitur quomodo principia effectiua rerum sunt eadem, & quomodo diuersa. Et aduerte, quod ad generationem imperfectorum, possunt semper esse eadem, nam vt dicemus in septimo, Cælum est sufficiens effectiuum eorum, vt ranæ & vermīs &c. Vltra ef-

ficiens,

ficiens, datur finis principium extrinsecum, & id similiter est idem & diuersum, nam primo primum, est idem, & hoc est Deus benedictus, ad quem ut dicit Arist. in lib. 12. omnia entia ordinantur, sicut totus exercitus ad ducem. & declarabitur illic, quomodo primum efficiens, prima forma, siue primus actus, & primus finis, incidunt in idem numero, fines autem secundarij & proprij, diuersi sunt, sicut & diuersa agentia, & diuersæ actiones, & diuersæ artes, ut declarat Philosophus in 1. Ethic.

Ratio autem adductæ pro vtraque parte non sunt solvendæ, nam ratio prima pro parte affirmatiua concludit, quod idem numero principiatum, habet idem principium .s. efficiens proximum, ut hic homo, tantum ab vno homine generantur, & habet vnā materiam proximam, & vnā tantum formam substantialem, & vnum finem sibi proprium, & hæc omnia vera sunt. Secunda autem concludit, quod principium primo primum, quod est primū ens, & primum vnum, est idem.

Ratio autem pro parte negatiua, concludit necessariam diuersitatem principiorum proximorum tam in principijs intrinsecis, quam extrinsecis, ut seruetur diuersitas in principiis: nam si materia proxima, & agens proximum non diuersificantur, neque factum diuersificabitur, ut declarabit Philosophus in 8. libro, in tex. 12. Hæc de capite nono dicta sint.

C A P V T X.

IN decimo capite dubitatur. Si sunt eadem principia corruptibilem & incorruptibilem, & pro vtraque parte arguit pro parte negatiua sic. Si sunt eadem, non poterit assignari causa, quare aliqua sint corruptibilia, & aliqua non. Nam cum ex eisdem principijs idem sequitur effectus, vel omnia erunt incorruptibilia, si principia sunt incorruptibilia, vel omnia erunt corruptibilia, si principia sunt corruptibilia.

Ad hanc rationem respondet Hesiodus, & alij Poëtæ dicti Theologi, qui descripserunt diuina sub fabulis, contenti ut ipsi soli seipso intelligerent non curantes de alijs, isti dicunt

Epit. Iauelli.

F cunct

cunt Deos esse principia corruptibilium & incorruptibilium, sed differenter, nam fingunt, q̄ ex dijs aliqui gustauerunt nect̄ar, & ambrosiam, & isti facti sunt immortales; & produxerunt incorruptibilia, vt corpora coelestia. Quidam autem facti sunt mortales, qui non gustauerunt prædicta, & isti produxerunt corruptibilia, vt sunt hæc inferiora.

Sed sic dicentes, loquuntur in intelligibiliter, & pro quāto verba sonant dicunt absurda, nam Dij gustantes nect̄ar &c. Aut gustauerunt, ex voluptate aut ex necessitate. si ex voluptate, ergo propter talem cibum non sunt facti immortales, voluptas enim vt voluptas non est causa permanentiæ, sed supponit eam, si ex necessitate, multo minus facti sunt immortales stultum est enim dicere indigere cibo, & esse se immortalem, nam vt inquit Comment. in comm. 15. Cibus & potus non sunt necessarij, nisi vt restaurent corruptum, quomodo igitur remanet æternum, illud quod est natū corrumpi, sed quoniam hæc fabulosa sunt, relinquamus, quoniam non est dignum philosophiam, quæ est veritatis indagatrix his fabulis multo studio intendere. Ad eandem rationem respondet Empedocles & dicit eadem esse principia omnium, sed eis adiunctum odium, & quidem quæ producta sunt, sine odio remanent incorruptibus quæ aut cum odio remanent, substantia generationi & corruptioni, vt hæc inferiora, coelum autem quia sine odio productum est ideo est incorruptibile.

Sed hæc ratio non consonat alijs dictis suis.

Nam dicit oīa præter Deum generari ea odio, quia non statet distinctio inter entia, nec inter partes vniuersi, nisi ex odio, & dicit q̄ dominante amicitia omnia erunt vnum, & sic dissoluetur vniuersum. de cuius ratione est, vt partes remaneant distinctæ, est igitur odium ita causa generationis, sicut corruptionis, & quidem cum coeli sint distincti, necessario sunt geniti ex odio, ergo sunt corruptibiles.

Quod autem dicit Deum in se non habere odium deducit ad hoc inconueniens, quòd Deus non cognoscit omnia.

Nam secundum Empedoclem simile simili cognoscitur, ita q̄ necesse est cognoscentem habere in se realiter naturā cogniti, vt dictum est in j. de Anima secundum doctrinam

anti-

antiquorum, si igitur Deus non habet in se odium non cognoscit ipsum. ergo non cognoscit omnia quod est valde inconueniens, esset enim minus prudens; id est sapiens alijs substantijs intelligentibus, puta intelligētis & hominibus; quoniam cognoscunt naturam odij. ergo &c.

Sed & huiusmodi opinionem vt poetici relinquamus, nullam nanque dicti sui causam adducit, sed nec rationem reddit quare tanto tempore regnat odium, & tanto amicitia, nisi quia sic aptum natum fuit, sed id non satisfacit philosopho inuestiganti veritatem, patet igitur, quod nec Empedocles recte respondet rationi inductæ pro parte negativa.

Pro parte autem affirmatiua argue.

Si sunt diuersa principia corruptibiliū & incorruptibiliū, aut sunt corruptibilia aut incorruptibilia. si corruptibilia cum omne corruptibile aliquando corrumpatur, tandem corruptentur; quibus corruptis cessabit generatio rerum corruptibilium, ex pñti omnia inferiora, tandem & omnino deficient quod videtur inconueniens, qm generatio tendit in perpetuum, si incorruptibilia remanet dubium, quare ex principijs incorruptibilibus quædā sunt incorruptibilia, quædam autem corruptibilia. deberent. n. fieri tantum incorruptibilia, vt principjata assimilentur suis principijs, præterea oēs antiqui conantur ponere eadem principia omnium corruptibilium & incorruptibilium, licet non videantur curasse rationem adductam pro parte negativa, sed leuiter pertransierunt eam & sic remanet dubium pro vtraque parte.

Et tu aduerte, qd apud Arist. in 12. lib. tex. 34. & in 8. Phys. tex. 48. & in 2. de generatione tex. 55. ex omnibus his locis simul sumptis haberi potest plena huius dubij resolutio.

Pro illius igitur notitia præpono aliquas distinctiones, deinde eorum resoluam.

Prima distinctio, res corruptibiles & incorruptibiles dupliciter sumi possunt, scilicet coniunctim & diuisim.

Secunda distinctio; Rerum incorruptibilium, quædam sunt permanentia, quædam successiua, vt motus corporum coelestium, qui apud Arist. secundum se totum est perpetuus. Idem intellige ex parte rerum corruptibilium nam lapis & homo sunt res permanentes, motus autem inferiorum

res, & generatio & corruptio adiunctis alterationibus sunt successiue.

Tertia distinctio, principia rerum incorruptibilium, vel corruptibilium sunt in triplici differentia.

Quædam prima, simpliciter & vniuersalissima.

Quædam secundaria, vniuersalia.

Quædam proxima, & particularia.

His præpositis dico ad dubium, q̃ principia prima & vniuersalissima effectiua & finalia, tam incorruptibilium, q̃ corruptibilium sunt eadem, immo est tantum vnum, quod est Deus benedictus, qui ut continens in se omnes gradus essendi sua virtute aliquibus dat esse perpetuum & immutabile secundum substantiam, vt intelligentijs & cælo & animabus nostris, omnibus autem alijs dat esse temporale & mutationi subiectum, & quidem q̃ hæc sit mens Arist. dictū est in 2. lib. & in 12. in tex. 23. dicit primum omnium est mouēs scilicet ad esse omnia.

Principia autem secundaria vniuersalia sunt intelligentiæ, & corpora cœlestia, & hæc quidem nullius incorruptibilis permanentis sunt principia effectiua & finalia, sed tantum rei incorruptibilis successiue. Nam sunt principia motus cœlestis effectiua, non autem finalia, ut dicemus in 12. lib. Omnes enim intelligentiæ mouent, vt assimilentur primo principio. Rerum igitur incorruptibilium permanentium quo ad substantiam cum intelligentiæ non sint principia idem & vnum solum est principium. sc. Deus. Rerum aut incorruptibilium successiuarum, vt motuum cœlorum, eadem sunt principia secundaria vniuersalia, quæ sunt intelligentiæ motrices.

Rerum corruptibilium permanentium, & successiuarum eadem sunt principia effectiua & motiua secundaria vniuersalia, quæ omnia sunt incorruptibilia & inalterabilia secundum substantiam, vt intelligentiæ & cœlum, nam Arist. in libro 12. tex. 34. reducit perpetuitatem generationis & corruptionis ad primum cœlum motum vniformi & simplici motu, eo q̃ semper & eodem modo se habet in tali motu, non enim magis declinat ad vnum polum, quàm ad alterum, sed vniformiter mouetur super polos mundi, cuius motus in
duo

duo media diuiditur per æquinoctialem. Alternationem autem generationis & corruptionis, reducit ad motum planetarum sub zodiaco, cuius vna pars declinat ad arcticum, & alia ad meridiem, vt magis declarabitur 12. Ratio autem Arist. ad hoc propositum in 8. physic. tex. 48. fuit talis. principia vniuersalia perpetuæ & alternæ generationis, & corruptionis rerum corruptibilium, tam permanentium, q̃ successuarum aut sunt entia corruptibilia, aut incorruptibilia, non primo modo quoniam aut aliquod vnum corruptibile aut omnia, non vnum quoniam post illius corruptio nem cessaret generatio & corruptio in inferioribus, non omnia, quoniam cum successiue generentur, non omnia sunt simul actu, ergo non omnia possunt esse principia rerum corruptibilium. Relinquitur ergo, q̃ talia principia sint incorruptibilia, vt intelligentiæ & cælum. Et si quæras quomodo ex principiis incorruptibilibus potest causari ens corruptibilis. Respondebitur in solutione rationum. patet igitur q̃ omnium rerum corruptibilium eadem sunt principia effectiua & motiua secundaria vniuersalia.

Rerum autem corruptibilium, tam permanentium, q̃ successuarum diuersa sunt principia effectiua & motiua proxima, nam vt dictum est in cap. præcedenti, vnumquodque fit à suo vniuoco, & plene declarabitur in lib. 7. propterea, concludet Arist. in lib. 12. in tex. 34. q̃ si sic se habet, quid ergo oportet quærere alia principia, puta ideas secundum Platonem, vel litem, & amicitiam secundum Empedoclem, vel deos gustantes nectar & manna, & non gustantes, secundum Hesiodum.

Si autem quærat de principiis intrinsecis, an sint eadem corruptibilium & incorruptibilium. Respondendum, q̃ non, quoniam incorruptibilium materia, non est subiecta priuationi, & eorum forma totaliter perficit potentiam materiæ. Materia autem corruptibilium est subiecta priuationi & eorum formæ, vtpote particulares non sunt tantæ perfectionis, quòd aliqua earum possit omnino perficere materiam. patet igitur quomodo sunt eadem, vel non eadem principia extrinseca, & intrinseca, corruptibilium, & incorruptibilium.

Nunc respondendum est in rationibus vtriusque partis. Ad rationem pro parte negatiua, dico, quod si essent eadem principia vniuersalia, & secundaria vniuersalia, & particularia, tam extrinseca, quam intrinseca, non posset assignari ratio quare aliqua sint incorrup. & aliqua corrup. verum quia distinguitur realiter primum agens ab intelligentijs, & ille à corpore coelesti, & ista omnia ab agentibus naturalibus proximis, & principia intrinseca non sunt eadem in corpore coelesti, & in elementis, ac elementatis, vt declaratum est. ideo potest assignari ratio, quare aliqua sunt corruptib. & aliqua incorrup. nam dicemus in decimo libro, quod ratio intrinseca corruptionis est materia cum priuatione, quæ autem sunt sine materia, aut habent materiam sine priuatione & sine qualitatibus actiuis & passiujs, vt cælum sunt incorruptibilia.

Ad rationem pro parte affirmatiua, dico qd principium primo primum, tam corrup. q̃ incorrup. est vnum & idem quod est Deus, principia autem secundaria, vniuersalia, & particularia corruptibilia non sunt eadem, nam intelligentiæ & cælum motum sunt principia secundaria vniuersalia & sunt incorruptibilia, agentia autem naturalia uniuoca cū suis productis, sunt principia proxima particularia, & sunt corruptibilia, & quando arguitur si sunt corruptibilia cessabit omnino generatio, dico, quod si tam principium primo primum & secundaria vniuersalia essent corruptibilia, sicut sunt corruptibilia principia particularia proxima, consequētia esset vera, sed iam dictum est, quod licet particularia principia proxima sint corruptibilia, non tamen primo primum nec secundaria vniuersalia. Et cum iterum arguitur, quod si sunt incorruptibilia remanet dubium. quare &c. Dico qd apud intelligentem non remanet dubium, nam à primo principio emanant incorrup. & corrup. quoniam est contentiuum omnis gradus entis, & ab intelligentijs producuntur corruptibilia, quia agunt per cælum motum, quod vt motus est causa variationis in inferioribus, & postremo non solum intelligentiæ, & cælum causant corruptibilia, sed & agentia proxima, nam sol & homo generant hominem, & dato casu quod cælum solum produceret aliqua inferiora sicut imperfecta,

fecta, vt ranam adhuc assignatur ratio corruptibilitatis in ea, pura quia sua materia prima est subiecta priuationi, & quia materia proxima, est cum qualitatibus contrarijs, paret igitur quomodo cum identitate & diuersitate principiorum, stat corruptibilitas & incorruptibilitas in rebus, de idēitate principiorum, quam posuerunt antiqui, non est curandum, quoniam non attingerunt veritatem. Hæc de decimo capite dicta sint.

C A P V T X I.

IN cap. vndecimo dabitur, verum vnum & ens sint substantia rerum, vel non, & hoc dubium est valde difficile propter opiniones famosas contrarias, & propter rationes quas pro vtraque parte adducemus. Aduerte igitur, q̄ Pythagorici & Platonici tenent partem affirmatiuam, dicunt enim q̄ ens & vnum non adueniunt alicui naturæ, quæ denominetur ens ab esse & vna ab vnitate, sicut denominantur animata vel quanta, vel grauis ab huiusmodi sibi aduenientibus. Naturales autem vt Empedocles, & qui posuerunt vnum vel plura ex elementis, esse principia materialia ex quibus rerum natura constat, tenent partem negatiuam. Qui enim dicunt omnia componi ex aqua dicunt aquam esse rerum substantiam, similiter qui dicunt & ponunt plura elementa, ex quibus res factæ sunt, dicunt huiusmodi elementa esse rerum substantiam, & per huiusmodi principia attribunt rebus q̄ sint ens & q̄ sint vnum vel plura, nam qui dicunt esse tantum vnum elementum, ex quo res fiunt, dicunt omnia entia esse vnum ens secundum substantiam, & qui ponunt plura elementa dicunt entia esse plura secundum substantiam. Proposito dubio, arguitur ad partes & pro parte Pythagore & Platonis sic arguitur, ipsum ens, & ipsum vnū sunt aliqua substantia separata, & prædicantur de omnibus. Ergo sunt substantia omnium, prima pars antecedentis sic probatur, si non sunt aliqua substantia separata, ergo nullū vniuersalissimum est substantia separata, quod est falsum, probatur hæc consequentia, quoniam ipsum vnum & ens sunt maxime vniuersalia, ergo si ipsa non sunt substantia se-

parata, multo minus ea quæ sunt minus vniuersalia, falsitas autem consequentis, patet ex dictis supra, quoniam .s. essent tantum singularia ex consequenti nulla esset scientia, quoniam sentimus singularia, sed non scimus. Secunda pars antecedentis manifesta est, quoniam omne quod est, ens est, & vnum est, quoniam omne ens est indiuisum in se, & diuisum à quolibet alio, ergo prædicantur de omnibus, consequentia autem sic probatur. Quod de aliquibus prædicatur essentialiter, & accidentaliter est eorum substantia, quoniam prædicata essentialia denotant substantiam rei, sicut accidentalia accidentia rei, sed ipsum ens, & ipsum vnum prædicantur de omnibus, ut declaratum est, ergo &c.

Pro parte vero contraria, sic arguitur si ens & vnum sunt. aliquod subsistens separatum, ergo vnum est idem quod ens. ergo quod non est vnum non est ens, & quod est diuersum ab vno est diuersum ab ente, ex consequenti est non ens, ergo redibit ratio Parmenidis .s. q̄ omnia sunt vnum ens, & sic erit tantum vnum ens, quod est falsum, & improbatum est in 1. Phys. & in primo huius scientiæ, & remanet dubium pro vtraque parte.

Et tu aduerte, q̄ Arist. partim in lib. 4. partim in 10. partim in 12. determinabit hoc dubium. Pro cuius noticia præpono hanc distinctionem. Ens & vnum tripliciter considerari possunt.

Primo, pro primo ente, & primo vno, q̄ est maxime ens, & maxime vnum, quoniam est simplicissime simplex, & dicitur primum principium, siue prima causa.

Secundo, pro ente, & vno transcendentè sumpto, q̄ de omni ente, & omni vno prædicatur essentialiter. Et de hoc modo entis, & vnus pertractauimus diffuse in tractatu de transcendentibus.

Tertio, pro ente, & vno in prædicamento quantitatis, & ut sic, sunt determinati generis, nec exeunt prædicamentum quantitatis, & dicuntur accidens, & non substantiam.

Hac distinctione posita, dico, q̄ vnum & ens primo modo non est rerum substantia, quoniam cum sit purissimus, & perfectissimus actus in seipso, nulli rei extra ipsum identificatur aliter cum sit omnis naturæ extra ipsum principium & causa,

causa, idem esset causa & causatum, substantia enim identificatur ei cuius est substantia, ut etiam manifestabitur in 4. lib. licet autem non sit rerum substantia, est tamen principium à quo pendet omnis rei substantia, sicut à primo calido pendet omne calidum, ut dictum est in 2. lib. & magis manifestabitur in 10. ens autem & vnum, secundo modo dicunt rerum substantiam, quoniam de omnibus prædicantur quiditative, nam de quolibet verum est dicere quod est ens vnum. i. quod habet essentiam indiuisam, non tamen modo Platónico, & Pythagorico, dicunt rerum substantiam. Ipsi enim arbitrantur, quod sint separata & per se existentia, extra res quarum dicunt substantiam. Aristot. autem tenet oppositum, tenet enim quòd sunt intrinseca rebus. Nam sicut nullum est calidum nisi calore sibi intrinseco sic nullum est ens formaliter aliquo ente extrinseco: potest autem esse ens effectiue per aliquod ens extrinsecum, quoniam nihil à seipso pro ducitur.

Ens vero & vnum, tertio modo dicunt accidens in rebus, sunt enim in prædicamento quantitatis, ut declarabitur in libro 10. & quoniam accidens posterius est substantia, ut declarabitur in libro 7. constat quòd non dicunt rerum substantiam, sed consequuntur eam, quod autem sit illud accidens, declarabitur in libro 10. ubi agit Arist. de vno & multo. Et quoniam Plato & Pythagorici non distinguebant inter ens, & vnum, secundo modo, & tertio modo, ideo decepti sunt, & intantum processerunt, quod dixerunt unitatem, quæ est principium numeri, & numerum esse rerum substantiam, quod est penitus impossibile aliter substantia esset ex accidentibus, & id dico secundum quòd eis imponitur ab Arist. Quis autem fuerit sensus Platonis declarabitur loco suo.

Nunc superest examinare rationes inductas secundum mentem Arist. & ad rationem pro Platone; nego primam partem antecedentis, nisi sumatur pro primo ente, & primo vno quod est Deus, & in illo casu, nego secundam partem antecedentis, de nullo enim extra ipsum prædicatur nisi in obliquo, puta, quidquid est extra Deum, est à Deo, & ad Deum.

Ad probationem primę partis antecedentia, nego falsitatem consequentis, & concedo, quòd nullum est per se existens nisi singulare, & vniuersale non existit nisi in singularibus, & cum inferitur, quòd nulla esset scientia, iam ad hoc responsum est in cap. 8. & ad probationem secundę partis antecedentis, nego omne quòd est, esse ens & vnum; sumendo ens & vnum pro primo ente, & primo vno, & cum probatur, dico quòd probatio verificatur de ente & vno transcendentiter sumptis, sic enim sunt prædicata vniuersalissima, sed non sunt separata, sicut nec quòdcunque aliud vniuersale.

Ad consequentiam autem non oportet respondere, quoniam ex quo negamus antecedens non potest deduci quòd sint substantia omnium nisi sumantur transcendentiter, & tunc negandum est quòd sint separata.

Pro ratione adducta à naturalibus aduerte quòd in ratione sua, non intendunt de ente primo & primo vno, sed de ente & vno, vt sunt prædicata vniuersalissima, & ratio sic intellecta, concludit verum. Nam bene sequitur si ens vniuersalissimum est aliquod subsistens separatum, est quid vnum tantum, quoniam non subsistens separatum, non habet vnde multiplicetur, & si dicit substantiam omnium, ergo omnia erunt illud ens vnum, & sic reddit opinio Parmenidis, quòd omnia sunt vnum ens, patet igitur quomodo ens & vnum dicunt substantiam rerum, & quomodo non. Hæc de vndecimo cap. dicta sint.

C A P V T X I I.

IN duodecimo capite dubitatur, vtrum numeri & corpora & superficies & lineæ & puncta dicant substantiam rerum sensibilem vel non, & hoc dubium videtur sequi ex dubio examinato in præcedenti cap. nam qui dicunt quòd vnum est substantia rerum, consequenter dicunt numerum & corpus & superficiem.

Arguit igitur Philosophus ad partes, & pro parte affirmatiua sic. Si numerus & magnitudines non sunt substantia rerum sensibilem non poterimus scire, quid nam sit eorum substantia, vel eorum principia substantialia, ex quibus constant,

stant, quoniam cū in re sensibili puta in homine, videamus passibiles qualitates, & motus & relationes, & habitus & dispositiones, quæ sunt in prima specie qualitatis manifestum est quod nullum ex his est substantia hominis, quoniam omnis hæc respiciunt subiectum, substantia autem non respicit subiectum cum sit ens per se, ergo &c. Præter hæc autem nō videmus in re sensibili nisi dimensiones, puta lineas & superficiem & corporeitatem, ergo si hæc non sunt eius substantia ignorabimus quid nam sit eius substantia.

Et si quæras ac si opinantibus utrum hæc omnia sunt æqualiter substantia rei sensibilis, respondent, q̃ non, quoniam corpus est minus substantia quàm superficies, & superficies minus quàm linea, & linea quàm punctum, & punctus quàm vnitas, quia si aliqua sint substantia inter quæ vnum est diffiniens & aliud est diffinitum, diffiniens est magis substantia, sed corpus diffinitur per superficiem, & superficies per lineam, & linea per punctum, & punctus per vnitatem, ex consequenti vnitas est prior puncto & punctus linea, & linea superficie, & superficies corpore, ergo non sunt æqualiter substantia rerum sensibilium. Et aduerte quod hæc ratio tantum potuit apud antiquos & putauerunt nullum esse ens substantiam, nisi corpus, alia enim omnia dicebant accidentia, vnde volentes inquirere principia entis & substantiæ, vt visum est in primo libro contentabantur inquirere principia corporum. Successores vero, vt Pythagorici & Platonici, alius speculantes, & ponentes entia incorporea, dixerunt non solum magnitudines, sed & numeros esse substantiam entium quoniam numeri applicantur naturæ corporæ & incorporeæ, vt visum est in primo libro.

Pro parte autem negatiua, arguitur multipliciter.

Primo sic, punctus, linea, superficies, non sunt substantia, ergo nec corpus quod est posterius, cōsequentia patet, quoniam expositione tenentium partem affirmatiuam hæc sunt magis substantia quàm corpus, ergo si hæc non sunt substantia, nec corpus erit substantia: antecedens autem probatur, quoniam hæc sunt termini rei corporæ. Terminus autem rei non est substantia rei, aliud est enim terminare, & aliud constituere nam rei, quod enim terminat habet rationem
vltimi,

ultimi, quod autem constituit, habet rationem prioris. Præterea hæc variantur in re sensibili, stantes ipsa re, sicut videmus eundem hominem augeri, impinguari, attenuari, & tamen stat idem homo, non ergo sunt substantia rei, impossibile est enim re permanere, mutata rei substantia.

Secundo, hæc omnia sunt mensuræ & dimensiones rei sensibilis, ergo non sunt substantia eis, probatur consequentia, quoniam substantia identificatur ei cuius est substantia, mensura autem distinguitur à mensurato. ergo &c.

Tertio quod est substantia alicuius est actu in eo cuius est substantia, sed non omnes dimensiones quæ possunt esse in re sensibili, sunt actu in ea, puta in lapide per sectionem possunt fieri multæ figuræ actu quæ non sunt nisi in potentia ante sectionem, & ad factionem nouæ figuræ fiunt actu, nouæ lineæ & superficies, quæ prius non erant actu, sicut in cubo non est actu medietas cubi antequam diuidatur. ergo non sunt substantia rei sensibilis.

Quarto quod est substantia, & aliquando est & aliquando non est, generatur & corrumpitur sed corpus & lineæ & superficies & puncta, licet aliquando sint aliquando nō sint, quoniam variantur secundum quod corpora adinuicem copulantur, & abinuicem separantur per diuisionem, tamen non generantur nec corrumpuntur, omne enim quod generatur, ex aliquo generatur, & quod corrumpitur in aliquod corrumpitur, sed nō potest aliquid assignari, ex quo hæc generentur nec in quod corrumpantur, propter eorum simplicitatem ergo &c.

Confirmatur quoniam vt declaratum est in quarto Phys. sicut se habet nunc in tempore ita punctus in linea, sed licet variantur nunc per decursum mobilis, tamen non generantur nec corrumpuntur, omne enim quod generatur aut corrumpitur, generatur & corrumpitur in tempore vel in instanti, sed nunc non generatur nec corrumpitur in tempore aliter duraret per tempus, nec instanti aliter haberet esse in tempore medio inter ipsum instans & aliud instans in quo corrumpitur, quæ omnia sunt contra naturam instantis cuius natura & duratio est indiuisibilis, similiter dicendum est de puncto quod variatur ad diuisionem vel copulationem lineæ,
nearum,

nearum, absque generatione & corruptione eius. Idem dicendum est de linea quæ variatur ad variationem superficialium, & de superficie quæ variatur ad variationem corporis. His igitur rationibus concluditur pars negatiua, dubij præpositi, & sic pro vtraque parte remanet difficultas.

Et tu aduerte quòd hoc dubium resoluet Philosophus in libro octauo, vbi determinabit principia intrinseca substantialia rei sensibilis esse materiam & formam, quarum vtraque est in genere substantiæ reductiue, & tota substantia rei sensibilis est illud quod resultat ex vnione formæ & materiæ, & illud proprie, est id quod generatur & corrumpitur, & ipsi adueniunt corporeitas, superficies, & lineæ, & puncta, tanquam termini, & qualitates tanquam principia motuum, & dispositiones, ita tamen, quòd dimensiones adueniunt ratione materiæ, quantitas enim primo consequatur materiam, qualitates autem adueniunt ratione formæ, & relationes consequuntur, tam quantitatem, quàm qualitatem, vt declarabitur in libro quinto. Nam secundum quantitatem, dicitur hic lapis æqualis vel inæqualis alteri, & secundum qualitatem dicitur similis vel dissimilis. Nunc igitur soluenda est ratio adducta pro parte affirmatiua, nam rationes pro parte negatiua, verum concludunt.

Ad prædictam igitur rationem respondendo, negatur consequentia, ad probationem, negatur diuisio vt insufficiens, quoniam vltra dimensiones, & qualitates & motus, & relationes, deprehendimus materiam & formam quæ sunt principia substantialia, ex quibus resultat substantia composita, aliter substantia esset ex non substantijs, ex consequenti principia componentia essent posteriora recomposita, non igitur dimensiones sunt substantia rerum sensibilium, neque æqualiter, neque inæqualiter.

Sed videtur quòd ad mentem Arist. saltem corpus sit substantia rei sensibilis, nam hæc prædicatio est substantialis & in primo modo per se lapis est corpus graue, cælum est corpus quintum. ergo &c.

Ad hoc dicitur quòd secundum doctrinam Arist. corpus dicit duo.

Primo, dicit compositum ex materia & forma, ad quod sequitur

quitur quantitas continua, non enim datur magnitudo sine materia neque materia sine magnitudine aliter non esset diuisa à quacunque alia materia.

Secundo, dicitur trinam dimensionem, scilicet long. & lat. & profunditatem, quæ sunt accidentia & de prædicamento quantitatis, corpus primo modo est substantia & consideratur absolute à metaphysico, in quantum autem mobile, à physico, secundo modo est quantitas & consideratur à mathematico, concedo igitur secundum doctrinam Arist. quod corpus primo modo dicitur substantiam rei sensibilis, & ingreditur eius definitionem; nego autem secundo modo, & quoniam antiqui ignorabant hanc distinctionem crediderunt corpus, secundo modo esse substantiam rei, & in hoc decepti posuerunt mathematica ut corpus, superficies lineas puncta, numeros esse rerum sensibilibus substantias. Hæc de cap. 12. dicta sunt.

C A P V T X I I I.

IN cap. 13. dubitatur si præter res singulares sensibiles & præter magnitudines mathematicas, quas diximus non esse principia substantialia nec substantiam rerum sensibilibus sit necesse ponere formas, id est ideas separatas, & arguitur ad partes.

Et pro parte affirmatiua, antequam arguatur declaratur differentia & conuenientia sensibilibus naturalium cum mathematicis.

Aduertere igitur, quod in hoc differunt, quia sensibilia naturalia differunt cum materia, mathematica autem sine materia, ut supra dictum est. Conueniunt autem quoniam utrobique inueniuntur plura numero sub eadem specie. Nam sicut sunt plures homines sub specie hominis sic sunt plures lineæ rectæ, sub linea recta & plures isosceles sub isoscele, posita hac declaratione, sic arguitur si non dantur species separate præter sensibilia & mathematica quarum quælibet sit una specie & numero, sequitur quod principia entium sensibilibus non sunt determinata secundum numerum, sed secundum speciem, sed hoc est falsum, de consequentia quidem manifesta est, quoniam cum homo sit principium hominis, & sub homine continetur

gat dari plures homines numero, si non datur homo separatus, qui sit vnus specie & numero, patet quod principia hominis non sunt determinata secundum numerum, sed tantum secundum speciem, pro quanto non est homo nisi ab homine, falsitas autem consequentis probatur, quoniam si rerum sensibilium non sunt determinata principia secundum numerum erunt ergo indeterminata, ex consequenti poruerunt esse numero infinita, quod est falsum, & improbatum in 1. Phys. & in primo lib. huius scientiæ, vt ergo fugiantur hæc inconuenientia oportet ponere species separatas, quæ sunt, principia determinata numero omnium singularium, puta quod per se homo sit principium omnium hominum, & per se leo, & harum specierum talis sit natura, quod nihil per accidens conuenit eis, sed tamen ea quæ sunt de ratione speciei, unde hæc est falsa, per se homo est albus vel niger, vel sanus, vel æger.

Pro parte autem negatiua sic arguit.

Si ponantur huiusmodi specie sequuntur omnia inconuenientia quæ supraposita sunt in cap. 6. præcipue quod corruptibile & incorruptibile erunt eiusdem naturæ, dicunt enim ponentes ideas hunc hominem & per se hominem esse eiusdem naturæ, & tamen hunc hominem esse corruptibilem, & per se hominem incorruptibilem, præter hoc inconueniens adducentur multa in lib. 7. & sic pro vtraque parte remanet difficultas dubij propositi.

Et tu aduerte, quod vt diximus in cap. 6. hoc dubium determinabitur absolute in lib. 7. parte negatiua in naturalibus, quàm in mathe. & nisi adduxisset Arist. hic particularem rationem pro Platone non replicatum fuisset hoc dubium.

Nunc igitur demissa ratione pro parte negatiua, quoniam verum concludit, soluemus adductam pro parte affirmatiua, ad cuius euidentiam aduerte, quod vt supra diximus in cap. 9. principia rerum sensibilium sunt duplicia quædam extrinseca, vt efficiens & finis, quædam intrinseca, vt forma & materia, de principiis extrinsecis præcipue de efficiente & mouente primo, & vniuersalissimo & de efficientibus secundis vniuersalibus, quæ sunt intelligentiæ & corpora celestia verum est, quod sunt determinata specie, & numero, & quot sint, inuestigabit Arist. in lib. 12. in tex. 42.

De efficientibus autem particularibus & vniuocis cum suis productis, dico, quòd sunt determinata secundum speciem, pro quanto vnumquodque agit sibi simile in specie, & non aliter, nisi ad sit quod monstrum quod prouenit ex defectu agentis vel in dispositione materię, non autem est necesse, vt Plato opinatur quòd sint determinata specie & numero, ita, scilicet quòd in omni natura sensibili, detur natura specifica pręter omnia singularia quę existens vna specie & non multiplicata numero, sic productiua omnium indiuiduorum in tali natura, sed sufficit, quòd hoc indiuiduum sit ab hoc efficiente eiusdem nature, concurrente efficiente vniuersali primo & Vniuersali secundo, de principiis autem intrinsicis maxime de formis sufficit, quòd sint determinate secundum speciem, & quòd differant gradibus formalibus & indiuiduentur per materiam signatam, extra quam non habent esse, nisi anima intellectiua, quę non educitur de potentia materię.

Ex his respondeo ad rationem, & concessa declaratione illic posita, similiter concessa consequentia quo ad principia intrinseca formalia, negatur falsitas consequentis ad probationem concedo quòd erunt indeterminata quo ad numerum considerata indiuidualiter, nam sicut multiplicantur indiuidua eiusdem speciei per successionem generationis, sic multiplicantur eorum formę, & cum dicitur id esse falsum & improbatum in primo Phys. & in primo lib. huius scientię, dico quòd illic non est improbata indeterminatio secundum numerum indiuidualem, sed secundum numerum formalem, puta quòd in omni productione debent esse tot principia intrinseca & non plura neque pauciora, scilicet materia & forma & priuatio, & probatum est in secundo libro huius scientię, quòd est status in causis materialibus sumptis formaliter, & similiter in causis formalibus, non autem fuit intentio philosophi; ponere determinationem secundum numerum in formis indiuidualibus, neque in partibus materię signatę siue vt stat sub quantitate, quoniam vt quęta diuisibilis est in infinitum, patet ergo, quòd positiō Platonis quo ad ideas nullam inducit necessitatem. Hęc de cap. 13. dicta sunt.

CAPVT XIII.

IN capite 14. dubitatur vtrum prima principia sint in actu vel in potētia, & ratio dubitandi fuit diuerſa opinio antiquorum, nam qui ponebant tantum principia materialia dicebant ea eſſe in potētia, quoniam de ratione materiæ eſt, vt ſit in potētia ad hoc quod ex ea fiat aliquid. Qui vero poſuerūt principia formalia vt Plato qui poſuit ideas, dicunt ea eſſe actu, quoniam forma eſt actus, & facit rem eſſe actu, arguit igitur Philoſophus ad partes, & q̄ ſint in potētia arguit ſic. Si ſunt actu aliquid eſt prius primis principijs quod eſt impoſſibile, probatur conſequentia, potētia eſt prior actu, ergo potētia erit prior primis principijs, probatur antecedens, quoniam prius eſt à quo non conuertitur ſubſiſtendi conſequentia, ſed bene ſequitur, hoc eſt actu, ergo poteſt eſſe, quod .n. eſt impoſſibile non poteſt eſſe actu, ſed non conuertitur, hoc poteſt eſſe. ergo eſt actu manifeſtū eſt igitur potētiā eſſe priorem actu ex conſequenti. neceſſe eſt prima principia eſſe in potētia, ne detur aliqd prius eis.

In oppoſitum arguitur ſic. Si prima principia ſunt in potētia, nihil erit productum, immo nullum erit ens, nam qđ eſt in potētia, nundum eſt, ex conſequenti eſt non ens. ergo prima principia ſunt non entia ergo nullus erit effectus, quoniam non ens nihil poteſt cauſare. Cum igitur omne ens ſit principium aut principiatum, ſi prima principia ſunt in potētia neque erunt entia, neque aliquis effectus erit ab eis, ex conſequenti auferetur totum ens.

Et tu aduerte q̄ Philoſophus in lib. 12. tex. 30. & 31. replicat idem dubium & eaſdem rationes vt hic, ſed iam in lib. 9. tex. 13. determinauerat propoſitum, & determinatio ſtat in hoc. Actus & potētia dupliciter conſiderantur. Primo, ſimpliciter. Secundo, in eodem procedente à potētia ad actu, primo modo, actus eſt prior potētia, quoniam nihil reducitur de potētia ad actu. niſi per aliquod iam exiſtens actu, vel formaliter, vel virtualiter. formaliter quidem, vt in productione vniuoca. virtualiter autem, vt in productione æquiuoca. in eodem vero procedente à potētia ad actu,

Epit. Iauelli.

G conſtat

constat potentiam esse priorem actu, & hoc inuenitur in omni generabili, quod enim generabile est prius est in potentia, quam in actu. nam si generabile est, nondum actu est, ex hac ergo distinctione patet, quod primum principium, a quo producitur omne ens est omnino actus, & nullo modo in potentia, ut probabit Arist. in lib. 12. in tex. 30. loquendo autem de primo principio materiali, dico quod prius est in potentia quam in actu, quoniam de ratione materie est esse ens in potentia, & tamen non potest reduci ad actum nisi per ens actu, ex consequenti principium materiale non potest esse primum ens, principium autem primum formale, quoniam ut dicemus in lib. 12. coincidit in idem numero, cum primo efficiente necesse est ut sit actu. Dicemus .n. Deum esse primum actum, siue primam formam metaphysicalem, primum efficiens & primum finem.

Nunc superest soluere rationem probantem quod sunt in potentia. nam ratio in oppositum concludit. negatur igitur consequentia. Ad probationem, negatur potentiam esse vniuersaliter priorem actu, licet concedatur in vno & eodem procedente a potentia ad actum, & cum arguitur, quoniam non conuertitur &c. dico quod ille modus arguendi verificatur in omni eo quod reducitur de potentia ad actum. & est illud cuius esse est corruptibile. in æternis autem, ut dicit Arist. in 3. Phys. cum non differat esse & posse, potentia passiva non præcedit esse actu, & quoniam prima principia entium productiua sunt æterna & incorruptibilia & immaterialia, ut declarabitur in lib. 12. ideo semper fuerunt actu, secundum veritatem quidem primum principium semper fuit actu, secundum Arist. autem & primum principium & intelligentiæ & cœlestia corpora. Hæc de cap. 14. dicta sint.

CAPVT XV.

IN cap. 15. dubitatur, utrum prima rerum principia sint vniuersalia, vel singularia. & hoc dubium ponitur propter Platonem, qui posuit naturas específicas abstractas & esse principia & productiua, ac formalia singularium. Et arguitur ad arabas partes, & pro parte negatiua sic. Si pri-

ma principia prima sunt vniuersalia non erunt substantiæ; & sic hient substantiæ a non substantijs, quod est impossibile. leu probatur consequentia. substantia significat hoc aliquid, vniuersale non significat hoc aliquid, sed quiddid. i. quale substantiale, quod idem est quod commune multis in genere substantiæ. ergo si principia sint vniuersalia non erunt substantiæ. Et aduerte, q̃ hæc propositio, substantia significat hoc aliquid, proprie verificatur de prima substantia, quæ in se & per se existit. Et quoniam apud Plat. ideæ quas ponit principia sunt per se subsistentes, ideo si sunt substantiæ sunt substantiæ primæ, ex consequenti significant hoc aliquid, ex hoc sequitur q̃ non possunt esse vniuersales. vnde viderur Plato dicere contradictoriæ. s. q̃ principia prima sint substantiæ in se subsistentes, & si vniuersales.

Sed forte dicit aliquis, non inconuenit, quod est commune multis, esse hoc aliquid.

Sed contra hoc, sic arguit Philosophus, ergo singulare poterit esse multa hoc aliquid, quod est falsum, quoniam tunc non esset vnum numero, probatur consequentia. In Sociate, est animal vt commune multis, & homo, & est ipse Socrates, ergo erit tria hoc aliquid. s. animal, homo, Socrates, inimo Socrates erit tria animalia. nam animal est animal, & homo est animal, & Socrates est animal. hæc autem sunt absurda. ergo &c.

Pro parte affirmatiua sic: Si prima principia non sunt vniuersalia non sunt scibilia, quoniam scientiæ sunt vniuersalia. si non sunt scibilia, nec principiata, erunt scibilia, pendet enim scientia principiatorum a scientia principiorum, & sic omnis scientia peribit.

Et tu aduerte, q̃ in lib. 7. in tex. 46. 47. & 48. replicabit rationes hic adductas pro parte negatiua, & alias addet, & determinabit pro parte negatiua absolute, quoniam apud Aristot. per se subsistere conuenit tantum, singulari, & quoniam causare, siue principiare, præcipue effectiue, vt dicitur in libro 9. fundatur in rei existentia, ideo necesse est omne principium productiuum esse singulare, nec actio verificatur de aliquo vniuersali, nisi q̃a est in aliquo singulari. nã vt sæpe diximus, homo non generat nisi quia hic, vel hic homo gñat.

Propterea, vanum est ponere principia prima rerum esse vniuersalia in prædicando, licet sint vniuersalia in causando, vt Deus intelligentia, cælum, quorum tamen vnumquodque est in se singulare, & hoc aliquid, vt declarabitur in lib. 12.

Relictis igitur rationibus pro parte negatiua, quoniam verum concludunt, soluenda est ratio pro parte affirmatiua: negatur igitur consequentia. ad probationem dico, quòd scientiæ non solum sunt vniuersalia, sed etiam singulariū incorruptibilium & immaterialium, sunt enim entia necessaria, & non contingit ea aliter se habere, ergo sunt scibilia, quod autem dicitur scientiam non esse singularium intelligitur proprie de singularibus corruptibilibus & materialibus, cum sint in continua variatione, quoniam igitur prima rerum principia productiua sint immutabilia secundum substantiam, licet sint hoc aliquid, tamen sunt vera scibilia,

immo perfectissima, cum sint maxime actu, & non est necesse vt fiant actu intelligibilia, sic

ut hæc materialia. Patet igitur, quòd

non cogimur ponere prima prin-

cipia rerum esse vniuersalia,

neque vt sint producti-

ua, neque vt sint

scibilia. Hæc

de ca-

pite

decimo quinto dicta sint, &

de omnibus dubijs dis-

putatis ab Arist. in

hoc 3. libro

Metaphy-

sicæ.

•

EIVSDEM CHRYSOSTOMI
IAVELLI CANAPITII

E P I T O M E

SUPER QVARTO LIBRO

M E T A P H Y S I C A E

ARISTOTELIS.



ISPVTATIS dubijs motis
in libro tertio, & determinatis
à nobis, ne studium addiscen-
tis fieret inutile.

In hoc quarto libro intendit
Arist. stabilire subiectum hu-
ius scientiæ, & declarare quòd
ad Metaphysicum spectet con-
siderare de substantia & acci-
dente, & de passionibus entis,
& vt de vno, & multitudine eo

dem & diuerso, & de oppositis, & de primis principijs com-
plexis, quæ dicuntur dignitates. Totam igitur intentionē
Arist. concludemus in duobus tractatibus.

In quorum primo, agemus de subiecto huius scientiæ, &
de quibus habet considerare.

In secundo, agemus de principijs complexis.

T R A C T A T V S P R I M V S.



PRIMUM tractatum diuidimus in quatuor
capita.

In primo probabitur, q̄ hæc scientia versa-
tur circa ens inquantum ens, & circa acciden-
tia, quæ per se conueniunt enti, ex consequenti ens inquan-

tum ens est subiectum eius.

In secundo probabitur, q̄ hęc scientia habet considerare, tam de substantijs, quàm de accidentibus.

In tertio probabitur, quòd hęc scientia habet considerare de vno, & multitudine, & eodem, & diuerso, quæ sunt opposita.

In quarto probabitur, q̄ habet considerare de principijs primis complexis, & defendere ea contra negantes.

C A P. V. T I. P R I M V M.



N primo cap. probandum est, quòd hęc scientia versatur circa ens in quantum ens, & circa eius proprias passiones. Ad cuius probationem propono duo.

Primum est, quoniam ens & proprietates suæ, vt vnum & multa, & idē & diuersum &c. sunt termini communissimi, à quorum cognitione pendet sequētiurn cognitio (ignoratis enim primis impossibile est sequentia scire) necesse est vt in aliqua scientia considerentur, & si dicat aliquis, q̄ sufficit in aliqua specie considerare ens, quoniam ingreditur conceptum omnium, non autē est necesse considerare ea quæ sunt accidentia entis.

Contra determinatum est in 1. Posset q̄ eiusdem scientię est determinare de subiecto, & de passionibus, siue proprietatibus; quæ per se conueniunt subiecto, vt qui cōsiderat numerum considerat parem, vel imparem. ergo eiusdem scientię est considerare ens, & quæ per se conueniunt enti.

Dico autem quæ per se conueniunt subiecto ad differentiam eorum, quæ conueniunt per accidens, & quoniam quæ per se conueniunt inferiori, per accidens conueniunt superiori, sicut esse risibile per se conuenit homini, sed animali conuenit per accidens: nam potest inueniri animal sine risibili; non autem homo, ideo quæ conueniunt per se partibus entis, vt enti mobili esse in loco, habere materiam, & enti quanto esse diuisibile in partes quantitatiuas, per accidens conueniunt enti in quantum ens, nam datur ens sine loco, & sine materia, & sine diuisione quantitatiua, vt declarabitur

in 12. libro. Ideo huiusmodi proprietates non sunt considerandæ in scientia de ente inquantum ens. Quæ autem cõueniunt enti inquantum ens, sunt ea quæ conueniunt cuilibet enti diuisim, vt vnum vel multa, idem vel diuersum, simile vel dissimile. Et hæc consideranda sunt in scientia, quæ est de ente inquantum ens.

Secundum est, qd scientia considerans de ente inquantum ens non est aliqua, ex scientijs speculatiuis particularibus, quales sunt physica & mathematica. Ille enim assumunt sibi partem subiectiuam entis, circa quam occupantur, & considerant per se accidentia illius partis, sicut mathematica assumit sibi numeros & magnitudines & considerat de eis, & de suis per se accidentibus, vt de recto & curuo, de pari & impari, & naturalis assumit sibi, vt inquit Commen. in cõm. 1. ens mobile, & considerat de accidentibus eius secundum quod est mobile, vt de motu, de loco, de tempore &c.

Ex his duobus concluditur, qd metaphysica est illa scientia, quæ versatur circa ens inquantum ens, & circa eius per se accidentia, & probatur sic.

Scientia consideratiua vniuersalium causarum & principiorum entis inquantum ens, versatur circa ens inquantum ens, & eius per se accidentia, eiusdem enim scientiæ est considerare subiectum & principia & causas subiecti, ex j. Poster. sed vt dictum est in proemio huius scientiæ ipsa considerat principia & causas vniuersales entis inquantum ens, cum sit simpliciter sapientia, ergo &c. Et confirmatur quoniam antiqui quærentes prima & altissima principia, quærebant principia entis, vnde qui posuerunt tantum principia materialia dixerunt philosophiam naturalem esse primam philosophiam, arbitantes sola corpora esse ens, patet igitur metaphysicam versari circa ens inquantum ens. Hæc de primo cap. dicta sunt.

C A P V T I I.

IN secundo cap. probandum est, quomodo hæc scientia habet considerare tam de substantijs, quam de accidentibus, & quoniam ens sufficienter diuiditur per substan-

tiam, & accidens, consequenter manifestum erit, quod hæc scientia de omni ente considerat, ut igitur habeatur plena resolutio, ponuntur tres conclusiones.

Prima conclusio, hæc scientia considerat de substantijs & accidentibus simul, & sic probatur.

Scientia considerans aliquod commune multis non æquiuoce, sed analogice considerat de omnibus modis, quibus dicitur. Hanc declarat Philosophus exemplificans de salubri, siue de sano, quod quoniam consideratur in arte medicinæ, & de multis dicitur in habitudine ad vnum, ut de cibo, de medicina, de vrina, in ordine ad animal quod est subiectum sanitatis, ideo ars medicinæ habet considerare de omnibus modis quibus dicitur sanum, sed ens dicitur multipliciter, non æquiuoce, sed in ordine ad vnum primum quod est substantia, nam alia entia sunt, aut mensuræ substantiæ, ut quantitates, aut dispositiones eius sicut qualitates, aut viæ ad eam, ut motus & generatio, aut priuationes & negationes eius, sicut corruptio & mors, ergo hæc scientia quæ considerat ens in quantum ens, habet considerare de substantijs, & de omnibus, quæ non sunt entia secundum se, sed in ordine ad eas, hæc autem sunt accidentia, tam respectiua, quam absoluta, tam permanentia, quam successiua. patet igitur, quod hæc scientia considerat de substantijs, & accidentibus.

Secunda conclusio, hæc scientia est principaliter consideratiua substantiæ, probatur primum & principale ens est substantia, quoniam est ens per se, & non in ordine ad aliud, accidentia autem sunt entia in quantum fundantur, & pendent a substantia. Ergo hæc scientia principaliter considerat de substantia, probatur consequentia, quoniam scientia consideratiua alicuius communis analogi. primo & principaliter est de primo analogato, & non est de alijs nisi in ordine ad ipsum, unde ars medicinæ principaliter est de animali sano, & non est de alijs modis, nisi in ordine ad ipsum, cum igitur hæc scientia sit consideratiua entis analogi, principaliter est de substantia, quæ est primum analogatum & non est de alijs nisi in ordine ad substantiam.

Tertia conclusio, hæc scientia habet considerare de omnibus substantijs non quidem secundum specificas rationes, quibus

quibus abinuicem distinguuntur, sed inquantum sunt entia & inquantum substantiæ, hæc probatur sic. Quæcunque sunt vnus generis subiecti ad vnā scientiam pertinent consideratiuā illius generis subiecti. Nam quia omnes colores continentur sub colore quod est obiectum visus, ideo ad visum pertinent, & quia omnes voces literate continentur sub voce literata quæ est genus subiectum circa quod versatur grammatica; ideo ad vnā scientiam grammaticā pertinent, sed omnes substantiæ, tam sensibiles, quā immateriales sunt vnus generis subiecti quia continentur sub ente, ergo ad illam scientiam spectant, quæ versatur circa ens, quæ est hæc, dixi autem, nō quidem secundum specificas &c. Quoniam id non ad vniuersalem scientiam spectat qualis est hæc, sed ad particulares scientias consideratiuas tantum de aliqua parte entis, puta ad physicā quo ad substantias sensibiles, substantiæ autem insensibiles quod ad proprias earum rationes, spectant ad vltimā partem huius scientiæ, vt declarabitur in libro duodecimo. Nam illic proprie fiet applicatio ad huiusmodi substantias, quarum cognitio videtur primi Philosophi. Patet igitur quomodo hæc scientia considerat de substantijs & accidentibus, sed principaliter de substantijs, & de omnibus substantijs inquantum entia & substantia sunt. Et in his habes totalem resolutionem dubij moti in libro tertio in cap. 4. Hæc de secundo capite dicta sint.

C A P V T I I I.

IN tertio capite probandum est, quòd hæc scientia debet considerare de vno, & de speciebus vnus sumpti transcendenter quæ sunt idem, simile, æquale, similiter habet considerare de opposito ipsi vni, quod dicitur multa, siue pluralitas, & de speciebus oppositis speciebus vnus quæ sunt diuersum dissimile inæquale; & omnia genera oppositionum, sicut oppositio contraria contradictoria, priuatiua, relatiua, vt igitur resoluantur omnia præposita pono conclusiones tres.

Prima conclusio, hæc scientia habet considerare de vno sumpto

sumpto transcendenter, quod dico ad differentiam vnus, vt est principium numeri quantitatiui. Illud enim vt sic, est de consideratione mathematici. Hanc conclusionem probat Arist. sic. Quæ sunt idem conuertibiliter realiter, licet distinguantur ratione ad eandem scientiam pertinent, sed ens & vnum transcendens sunt idem conuertibiliter, realiter, licet differant ratione. ergo &c. Maiorem Arist. relinquit vt manifestam, nam eiusdem scientiæ est considerare hominem & rationale animal & sensitiuum, principium & causa, quoniam sunt idem conuertibiliter realiter. Minorem vero probatur dupliciter, sed prius declarandum est, qd se adinuicem consequuntur, id est se habent conuertibiliter, vnde inquit Arist. qd se inuicem consequuntur sicut principium & causa. Quod tu intelliges de principio productiuo, & de causa productiua, quæ in rebus creatis conuertibiliter se habent, nam in creatis omne principium productiuum est causa, & omnis causa productiua est principium, vtrum autem principium absolute sumptum conuertatur cum causa, dicemus in lib. 5. Item qd differunt ratione licet sint idem re, aliter esset nugatio dicere ens vnum, sicut cum dicitur, vestis & indumentum, sic declarata minor probatur sic.

Primo, si aliqua duo dicantur de aliquo & nullam diuersitatem causant in eo, sunt penitus idem re, sed ens & vnum si dicantur de aliquo nullam diuersitatem causant in eo, nã sicut idem est dicere homo & ens homo, ita homo & vnus homo, & probatur sic, simul generantur & simul corrumpuntur simultate naturæ, homo & ens homo, homo & vnus homo. Quæ autem simul simultate naturæ ad differentiam subiecti & propriæ passionis, ex quibus passio est posterior natura generantur & corrumpuntur sunt idem & nullam diuersitatem dicunt in eo de quo prædicantur. ergo manifestum est, qd ens & vnum transcendens sunt idem conuertibiliter realiter.

Secundo sic, quæ prædicantur de substantia rei per se ipsa & non mediante alio, sunt idem realiter, & dico non mediante alio ad differentiam propriæ passionis, quæ quoniam non prædicatur de subiecto, nisi mediante differentia substantiali vel forma à qua fluit, non est idem re cū subiecto,

nam

nam rifibile non prædicatur de homine, per feipfum, fed mediante, rationali, fed ens & vnum transcendens prædicantur de fubftantia rei per feipfa. Nam de ente conftat, quoniam quidquid eft, ens eft, de vno autem fic probat Comment. in comm. 3. & concorditer B. Thom. Si res eft vna, non per feipfum, fed mediâte alio, quæritur de illo alio cum fit ens, erit vnum, aut ergo per feipfum aut per aliud, fi per feipfum habetur intentum, quoniam & de primo idem poterat refponderi. Si per aliud iterum quæritur vt fupra, & cum non fit processus in infinitum dicendum eft, qd vnum quodque eft ens & vnum per feipfum & non per aliquod medium. Conftat ergo quod ens & vnum funt idem realiter conuertibiles. Vtrum autem vnum transcendens & vnum numerale funt idem, determinabitur in quæftionibus noftis.

Secunda conclusio, hæc fcientia habet confiderare de fpeciebus vnus ficut de fpeciebus entis, & fumitur ibi fpecies largo modo, vt fit fensus, qd habet confiderare de partibus vnus fivæ de modis, ficut de partibus & modis entis, & probatur fic. Quia ens & vnum funt idem realiter per præcedentem conclusionem, ad eandem fcientiam pertinent, ergo quia eadem funt fpecies utriusque ad eandem fcientiam pertinent. Species autem fivæ modi entis funt fubftantia quantitas qualitas &c. Species autem fivæ modi vnus funt idem æquale fimile. Idem fundatur in fubftantia, æquale in quantitate, fimile in qualitate, vt dicitur in lib. 10. Ergo hæc fcientia habet confiderare de eodem, ficut de fubftantia & de qualitate, ficut de quantitate & de fimili, ficut de qualitate, quod autem eadem funt fpecies entis & vnus probatur, quoniam ficut diuerforum diuerfæ funt fpecies & differentia fic eorundem eadem funt, fed vt probatum eft, entis & vnus eft eadẽ natura, ergo eorundem funt eadem fpecies.

Ex hac conclusione fequitur corollariæ, qd partes huius fcientiæ ordinantur ficut fpecies entis & vnus, fpecies autẽ entis & vnus fic ordinantur, quod inter eas vna eft prima, & alia fubfequitur, quod patet in fubftantia, quæ principaliter eft ens, nam datur fubftantia abftracta & fubftantia fenfibilis, abftracta quidem eft prima perfectione, fed poftrema in cognitione. Senfibilis autem eft prima in cognitione nofta;

stra, sed posterior perfectione, eodem modo ordinantur partes huius scientiæ, nam pars consideratiua de substantia abstracta, est prior nobilitate, sed vltima in doctrina, & ideo traditur ab Arist. in vltimo loco. i. in lib. 12. pars autem consideratiua de substantia sensibili est prior doctrina, quoniam nostra cognitio incipit à sensu, & ideo traditur ab Arist. in lib. 7. & 8. est autem posterior nobilitate, quoniam trahit scientia maiorem, vel minorem nobilitatem à re scibili, vt dictum est in primo de anima, & declarabitur in lib. 12. vnde patet, vt inquit Philosophus, q̃ metaphysicus in hoc assimilatur mathematico, nam in scientijs mathematicis vna est prior vt Arithmetica, quia est de numero, alia posterior vt Geometria, quia est de magnitudine, quæ est posterior numero, quoniam qualis est ordo inter vnitatem principium numeri & punctum, principium magnitudinis talis est inter numerum & magnitudinem, constat autem vnitatem esse priorem puncto, quoniam licet vtrunque sit indiuisibile, tamen punctus addit situm super vnitatem, sic in metaphysica vna pars est prior, & alia posterior, vt dictum est.

Tertia conclusio, huius scientiæ est considerare de pluralitate, siue de multitudine, & de negatione & priuatione, & de speciebus oppositis, speciebus vnus quæ sunt diuersum inæquale dissimile. Hæc probatur quo ad singulas partes prima sic, eiusdem scientiæ est considerare de oppositis, quoniam per vnum cognoscitur illud, vnde eadem est disciplina sani & ægri, recti & obliqui, sed vnum & multa opponuntur, vt declarabitur in libro decimo. ergo huius scientiæ est considerare de vtroque: secunda pars sic, eadem scientia est consideratiua alicuius, & eorum quæ sunt de ratione eius, sicut scientia considerans de lapide, considerat de materia & forma lapidis, sed negatio & priuatio sunt de ratione vnus non quidem negatio absolute, quoniam cum negatio absolute dicta verificetur, tam de ente, quàm de non ente, tam ens, quàm non ens esset vnum, quod est falsum, quoniam in plus esset vnum, quàm ens: & tamen dictum est in prioribus, quod sunt idem conuertibiliter. Negatio igitur in subiecto est de ratione vnus, vt dicatur res vna cuius natura, vel entitas est indiuisa: hæc autem negatio in subiecto dicitur priua-

priuatio, de qua tractabimus in libro quinto, & in libro decimo. Sed tu aduerte, quòd quam priuationem includat vnum, an. f. priuationem multitudinis, an priuationem diuisionis formalis, vel quantitatiue determinabitur in quæstionibus nostris: tertia pars sic, idem, & diuersum, æquale, & inæquale, simile, & dissimile sunt opposita. ergo ad eandem scientiam pertinent, & quoniam contrarietas quædam differentia est, omnis autem differentia, quædam diuersitas est, vt declarabitur in decimo libro, ideo huius scientiæ est considerare de contrarijs; & non solum de his, sed & de omni genere oppositionis, quoniam omnia opposita diuersa sunt. Impossibile est enim idem, vt idem sibi ipsi opponi. Pater igitur quòd hæc omnia consideranda sunt in præsentī scientia, sed quia quodlibet eorum dicitur multipliciter, non quidem æquiuoce, nec vniuoce, sed analogice, ideo prius diuidendum est vnumquodque eorum & omnes modi reducendi sunt ad vnum principaliter dictum, & id Philosophus agere per totum quintum librum. Hæc de tertio capite dicta sūt. Ex quibus habes plenam determinationem dubij mori in tertio libro, cap. 5. Illic enim quærebatur, si eiusdem scientiæ est considerare substantias, & accidentia per se substantiæ, quæ dicuntur esse vnum & multa idem &c. Nam cum sola substantia simpliciter sit ens, quod conclusum est hic de ente, potest applicari substantiæ.

Et tu aduerte, quòd postquam Philosophus secundam & tertiam conclusionem rationibus proprijs probauit, eisdem applicat quasdam rationes communes & probabiles, ex quibus formamus duas ad pleniorē doctrinam, relinquentes residuum, vt non necessarium præsentī proposito. Deceui-mus enim ita ordinare negotium metaphysicum quod non relinquamus vtilia, nec immoremur in superfluis, & breuiciter studendum est.

Prima igitur ratio secundum Comment. in comm. 5. & conformiter B. Th. sic formatur. De eodem & de contrarijs mouentur multa dubia, vt dum quæritur, si idem est Socrates & Socr. sedens, & si vnum vni contrarium est, & similiter sunt quæstiones de simili & dissimili &c. Ergo in aliqua scientia hæc dubia consideranda sunt, constat autem q̃ non

non considerantur in aliqua scientia particulari, quoniam in illa non cōsiderantur nisi dubia quæ sunt circa proprium subiectum, & suas proprias passiones, puta in Geometria circa magnitudinem, si componitur ex indiuisibilibus. Circa rectum & obliquum si sufficienter diuidunt lineam, idem intellige in arithmetica circa numerum & passiones suas.

In scientia naturali circa ens mobile & motum, & graue & leue. ergo ad scientiam vniuersalem, quæ est metaphysica spectat de his considerare. Cum igitur entis & vnius eadem sint proprie passiones, & hæc scientia considerat de ente, & vno consequens est, vt de passionibus eorum consideret, & determinet quæ circa eas mouentur dubia. Quapropter antiqui sapientes quærentes de primis rerum principijs, non peccabant considerantes de vno & multitudine & numero, & de contrarijs, sed peccabant quoniam relinquebant considerationem substantiæ quæ debebat esse principalis.

Secunda autem ratio, metaphysicus, logicus, sophista, assimulantur in subiecto circa quod, nam de ente omnes considerant, sed distinguuntur modo considerandi, & fine. Modo quidem quoniam metaphysicus considerat de ente quo ad prædicata realia. Logicus autem quo ad prædicata intentionalia, quæ sunt genus species indiuiduum &c. Ideo dicitur versari circa ens rationis. Quod quidem quid proprie sit, & quomodo distinguitur ab ente reali, pertractauimus in tractatu de transcendentibus, quem præposuimus toti negotio metaphysico. Item differunt, quoniam, vt inquit Commentator comm 5. Metaphysicus considerat de ente consideratione demonstratiua. Logicus autem consideratione probabili. Sophista autem nullam habet veram cognitionem, sine vero differunt. quoniam metaphysicus intendit scientiam, logicus veram opinionem, sophista neutrum, sed gloriam & apparentiam tantum, sed ex eo quod logicus & sophista versantur circa ens, de omnibus pertractant & in omnibus se immiscunt, vnde pertractare de prædicamentis, de causis, de contrarijs, de priuatione, de habitu, de simili & dissimili, de forma, de materia, de fine, vt patet in topicis. ergo & metaphysicus cuius subiectum est ens debet versari circa omnia prædicta, modo sibi conuenienti. f. modo

modo inuestigatio ueritatis, & generatio ueræ scientiæ. Concludit igitur Arist. q̄ ad vnā scientiam spectat speculari ens inquantum ens, & de his quæ consequuntur ens ut ens, & non solum de prædictis passionis entis & vnius & pluralitatis, sed de priore & posteriore, genere & specie, toto & parte. & de alijs talibus, quoniam, ut inquit Cōment. cōm. sexto. Omnia ista sunt accidentia enti inquantum ens essentialia, sed quædam opinabilia .i. secundum opinionem antiquorum puta, quòd omne ens sit totum & pars, hoc enim dicunt, qui tenent tantum ens corporeum. Quòd autem omne ens sit prius aut posterius est secundum veritatem, quoniam ut declarabitur in lib. 12. omnia entia sunt quodammodo ordinata.

CAPVT IIII.

IN quarto cap. probandum est, q̄ hæc scientia habet considerare de primis principijs, quas nominat Arist. dignitates mathematicas, quia mathematicus maxime utitur eis, quia habet magis certas & manifestas demonstrationes, ut igitur propositum resoluator pono aliquas conclusiones de mente philosophi.

Prima conclusio, ad philosophum primum spectat consideratio talium principiorum, & probatur sic. Quæ sunt communia omnibus generibus entis inquantum ens, debent considerari à philosopho primo speculante ens inquantum ens, sed talia principia sunt communia omnibus generibus entis, sunt enim applicabilia cuilibet generi entis, cuius signum est, quòd omnes scientiæ speculatiue, quarum subiecta sunt diuersa genera entis utuntur his principijs, non quidem absolute, sed ut eis conuenit, verbi gratia, dicit geometra, omnem lineam esse simetram, vel asimetram, vel æqualem, vel inæqualem, dicit physicus, omne ens mobile esse corruptibile, vel incorruptibile. ergo &c. Et confirmatur, quoniam cum in aliqua scientia necesse sit ea considerare, aliter demonstrationes nullam haberent firmitatem, quoniam in ipsis firmanur, & constat quòd nulla scientia de eis considerat quæ sit particularis, licet eis utatur, relinquatur hæc considera

eo quod non est eis valde manifestum .

Secunda est, quòd debet esse verum absolutè , & non sub conditione vel ex suppositione, quod enim est necesse haberi ab intelligente quodcunque genus entium, debet esse simpliciter verum & non ex conditione, aliter intelligens nunquam posset se firmare nisi data tali conditione, constat autem, quòd necesse est intelligentem quemcunque habere veritatem primi principij aliter de nullo sequenti veritatem haberet, ergo necesse est ipsum esse non conditionaliter, sed absolute verum .

Tertia est , quòd eius cognitio adueniat nobis per naturam ; id est quòd naturaliter & non per demonstrationem sit nobis cognitum . ea autem naturaliter cognoscimus quæ non per investigationem ex aliquo priori noto, sed solo lumine intellectus cognitis terminis apprehendimus esse vera, & opposita esse falsa, & sic apprehendimus prima principia complexa, & maxime primum in quo fundantur omnes scientiæ . Sed iste tres conueniunt huic complexo . Impossibile est idem eidem simul in esse & non in esse, quòd sic manifestatur, prima conditio ei conuenit . Nam impossibile est aliquem sani intellectus mente concipere , quòd idem eidem possit simul inesse & non inesse, licet aliqui dicant Heraclitum aliter dixisse, sed non est necesse omne dictum oræ mēte teneri, ergo nullus potest circa ipsam decipi , antecedens sic probatur . Si quis potest mente concipere idem simul esse & non esse, ergo potest in suo intellectu habere simul contrarias opiniones quòd est manifeste falsum, contraria sunt enim quæ se mutuo expellunt ab eodem subiecto, consequentia sic probatum . Determinatum est in secundo perihermenias , quòd duæ opiniones duorum contradictoriorum sunt contrariæ, sed simul esse & non esse sunt duo contradictoria . ergo si quis opinetur duæ contradictoria esse simul vera, habebit simul in suo intellectu contraria opiniones .

Patet igitur quòd prima conditio conuenit ei , ex consequenti conuenit ei, secunda .

Nam si non possum aliter mente concipere, necesse est ut sit absolute verum & non ex conditione, alioquin, remota

conditione, posset esse non verum, & tunc possem mente tenere oppositum similiter tertia conditio sequitur ex prima, nam ea circa quæ errare non possumus, oportet ut nobis statim innotescant, ergo non per discursum sunt nobis nota; omnis enim discursus fit in tempore, & ex aliquo magis noto, si non per discursum. ergo solo lumine intellectus, ergo naturaliter.

Patet igitur hoc esse primum & firmissimum principium ad quod demonstrantes expresse vel virtualiter reducant ultimam opinionem suam, nec possumus aliquid firmiter apprehendere nisi hoc principio intellecto & firmato.

Quarta conclusio, licet hoc principium non possit absolute demonstrari, potest tamen elenchice, id est redarguitive.

Prima pars sic declaratur: demonstratio absolute sumpta est ex notioribus & prioribus, si igitur hoc principium potest absolute demonstrari, aut per seipsum, aut per aliud, non per seipsum, quoniam esset notius & ignotius. Si per alterum aut procedetur in infinitum aut stabitur in aliquo indemonstrabili & tamen notissimo, non est processus in infinitum, ut probatum est in primo Poster. nec est status in aliquo indemonstrabili notissimo, quoniam nullum principium est notius isto, nec firmitus eo, propter conditiones positas supra, hinc patet error eorum, qui dignantur hoc principium demonstrare, in quem inciderunt propter ineruditionem quorum debeat esse demonstratio, & quorum non. neque enim omnia sunt demonstrabilia, aliter, aut contingeret circulus in demonstrando, aut processus in infinitum. Si igitur quorundam non est demonstratio id maxime convenit huic principio propter sui maximam evidentiam.

Secunda autem pars sic declaratur: demonstrare elenchice non est ex aliquo priori vel notiori, sed ex aliquo dicto & concesso, à dubitante, etiam quod secundum sui naturam esset minus notum. Quod si dubitans nihil concedit: derisio est querere rationem ab eo qui nulla utitur ratione. Talis enim est similis plante, & deterior bruto, quoniam bruta utuntur certis signis ad signandum ad extra proprias phantasias & affectus, qui autem nihil concedit saltem determinatum significatum terminorum, non utitur certis signis ad signandum

dum quod habet in mente, ideo similatur plante carenti cognitione, & est deterior bruto. Qui igitur negant hoc principium, aut aliquid concedunt, aut non, si sic, possunt ex concessio redargui quod est demonstrare elenchice. Si nihil concedunt deridendi sunt. Et hoc modo procedet Arist. in tract. sequenti, contra negantes hoc principium. Hæc de 4. cap. dicta sint. Et hic terminamus primum tractatum super 4. lib.

TRACTATUS SECVNDVS,

super quarto Metaphysice.



IN hoc secundo tractatu defendendum est primum principium contra negantes, ipso enim defensato, defensantur reliqua prima complexa, quoniam firmitatem accipiunt ab eo, & comprehendimus mentem Arist. in quinque capita.

Primo, disputandum est contra eos vniuersaliter & ex rationibus vniuersalibus.

Secundo, soluendæ sunt dubitationes propter quas primum principium negarunt.

Tercio, disputandum est contra statuentes veritatem rerum in apparentia.

Quarto, disputandum est contra eos qui ponunt medium inter contradictoria, ex consequenti concedunt ea esse simul falsa.

Quinto, disputandum est contra errores principiorum logicæ & philosophiæ naturalis.

CAPVT PRIMVM.

IN prima cap. disputandum est contra eos vniuersaliter quod impossibile est contradictoria esse simul vera, & arguit Philosophus septem rationibus, quarum prima procedit ex determinato significato nominis. Ad cuius euidentiæ præpono quatuor.

Primo, contra negantes primum principium complexum

H ij non

ponit substantiam hominis . secundum autem negat.

Quarto, homo & non homo non significat idem, quoniā homo significat esse hominem , & non homo significat non esse hominem, sed hæc duo non sunt idem, aliter non homo prædicaretur de homine, præterea magis differunt homo & non homo quàm homo & album . illa enim differunt substantialiter, hæc autem accidentaliter, sed hæc duo non sunt idem, licet vnum prædicetur de altero , vt dictum est supra , ergo multo minus sunt idem . esse hominem & non esse hominem .

His præpositis, sic formatur prima ratio, Necessè est q̃ homo sit animal bipes , hoc enim est determinatum significatum suum, vt declaratum est supra, & summo pro eodem hominem significare esse hominem | & hominem esse animal bipes, tunc ultra , ergo est impossibile hominem non esse animal bipes, quod enim necesse est esse impossibile est nō esse, si est impossibile hominem non esse animal bipes , ergo impossibile est hanc esse veram, homo non est animal bipes, ergo semper erit falsa , & cum sit contradictoria huius , homo est animal bipes, quæ necessario est vera, impossibile est duo contradictoria esse simul vera ; Sed forte respondebit aliquis & dicet rationem non concludere, quoniam quando quis interrogatur , si homo significat animal bipes vel non, non respondebit affirmationem tantum , vel negationem tantum, sed dicet, quòd significat utrunque , contra id arguit Philosophus. Quando quis simpliciter interrogatur id est de parte affirmat. vel negatiua . Simpliciter de vna debet respondere, aliter, nunquam terminaretur disputatio, si vellet de omnibus conuenientibus rei respondere , constat enim quòd homini potest conuenire esse album & magnū, & doctum quodammodo infinita prædicata . Si igitur quis in disputatione interrogatur , an homo sit albus vel non & respondere velit quòd est albus magnus doctus calidus gravis &c. Vana esset huiusmodi disputatio, nec vnquam concluderetur . Cum igitur in proposito quis interrogatur an homo significet animal bipes vel non, respondere debet de altera parte tantum, aliter non est disputandum cum eo, cū nihil determinate ponat .

Secunda ratio sumitur ex ratione prædicati substantialis & accidentalis. Et stat in hac conditionali. Si contradictoria sunt simul vera, ergo nullum erit prædicatum substantiale & quiditativum, sed omnia erunt prædicata accidentalia, ex consequenti aufertur omnis vera diffinitio, quoniam nõ datur nisi per prædicata substantialia & quiditativa, sed impossibile est omnia prædicata esse accidentalia, ergo &c.

Pro resolutione huius rationis probanda est consequentia, deinde manifestanda est impossibilitas consequentis.

Pro euidencia consequentiæ præpono duo.

Primo, prædicatum substantiale in hoc differt ab accidentali, quod semper inest, & impossibile est ab esse, cum sit de natura & essentia rei. Accidentale autem potest ad esse & ab esse, hæc enim est ratio accidentis, ex quo sequitur, qd si de aliquo verificatur prædicatum A. & de eo verificatur suū oppositum, erit prædicatum accidentale.

Secundo, prædicatum substantiale est tantum vnum re, licet possit plurificari ratione, nam est idem re cuius est prædicatum, quælibet autem res est tantum vna cum sit indiuisa in seipsa, aliquo modo indiuisiõis, ergo prædicatum substantiale est tantum vnum re, vt animal rationale cum sint idem cum homine, sunt tantum vnum re, sed prædicatum accidentale non est vnum re, quoniam licet sit in subiecto, non tamen est idem cum subiecto, nam licet Socr. sit albus, non tamen est albedo, & propterea non inconuenit plus esse prædicata accidentalia conuenientia vni rei.

Ex his arguitur sic. Si hæc duo sunt vera simul homo est homo, & homo non est homo, vel ista. & homo est non homo, ergo esse hominis cõuenit homini, & remouetur ab eo; sicut enim nigrum remouet album, sic non homo, vel non esse hominis, remouet esse hominis, ergo tam esse hominis, quàm non esse hominis est prædicatum accidentale. Præterea esse hominis & non esse hominis, non sunt vnum prædicatum. Dictum est enim in prima ratione, quòd nomen significat determinate vnum, sed non sunt vnum esse hominis & non esse hominis, vt probatum est in prima ratione. Si non sunt vnum, nec sunt idem homini, ergo sunt prædicata accidentalia, ex declaratione, & differentia assignata inter prædi-

prædicatum substantiale & accidentale. Pater igitur quòd hæc positio destruit totaliter prædicatū substantiale. Quod autem sit impossibile omnia prædicata esse accidentalia, sic probat Philosophus. Si non est aliquod prædicatum substantiale, ergo nullum erit prædicatum per se & vniuersale id est secundum quod ipsum, sed omne prædicatum prædicabitur per aliud & non per seipsum, quod enim per accidens prædicatur non per seipsum, sed per aliud prædicatur, nam & propria accidentia prædicantur de subiecto per aliud, vt per definitionem subiecti. Diffinitio autem per seipsam verificatur de subiecto, tunc ultra.

¶ Si omne prædicatum accidentale prædicabitur per aliud, ergo non est deuenire ad primum ex consequenti erit processus in infinitum in prædicatis accidentalibus, sed hoc est impossibile, & quod sit impossibile, sic declarat Philosophus. Modus prædicationis accidentalis est tantum duplex, quoniam aut prædicatur accidens de subiecto, vt Socr. est albus vel prædicatur accidens de accidente, vt musicum est album, sed in neutro possibilis est processus in infinitum, non quidem quando accidens prædicatur de accidente, quia ambo conueniunt subiecto, ergo erit status in subiecto, quod est primum fundamentum huius prædicationis, nec quando accidens prædicatur de subiecto. Ille enim processus in infinitum, non fieret nisi duobus modis, primo quòd sicut Socrates subijcitur albo, ita Socrates albus subijciatur alteri à accidēti, puta calido, & Socrates albus calidus subijciatur alteri, puta graui, & Socr. albus calidus grauis subijcitur alteri, & sic in infinitum, sed hic modus est impossibilis, quoniam ideo Socr. subijcitur albo. quia est quid vnum, sed ex Socr. & albo non fit tale vnum, qualis est Socrates, est enim Socrates vnum per se: Socrates autem albus vnum per accidens, & propterea non est necesse, quod subiectum & accidens subijciatur alteri accidenti, sicut subiectum subijcitur accidenti. Secundo quod sicut Socr. subijcitur albo, ita album calido, & calidum graui &c. Sed hoc est impossibile, quoniam accidēs ex se non habet virtutem subijciendi alteri. De ratione enim accidentis est quod accadat alteri. i. substantiæ non quod subijciatur alteri, aliter esset ordo inter accidentia, puta quòd musicum

esse, multo magis verificabitur non esse alterius, vnde si ista est vera homo est non homo, multo magis est non lignum, non lapis &c. Supponitur secundo, id quod dicit hæc positio, scilicet quia contradictoria sunt simul vera, de quocunque verificatur negatio, verificatur affirmatio ex quo habetur, quod si homo est non lignum, est etiam lignum, ex his suppositis sic probatur consequentia. Si homo est homo & est non homo. ergo est non lignum non triremis non murus &c. Per primum suppositum si est non lignum, & si est non murus, est etiam murus &c. Per secundum suppositum, homo ergo erit omnia, & sic sequitur quod omnia erunt vnum quod est absurdum.

Quarta sumitur ex cognitione, & arguitur sic à sufficienti diuisione, si contradictoria sunt simul vera, aut sic est in omnibus contradictorijs aut in quibusdam. Si in quibusdam tantum, ergo in alijs, verum erit certitudinaliter vnam partem esse veram, & aliam falsam, si in omnibus hoc potest esse dupliciter.

Primo, quod affirm. & negat. in omnibus sint simul veræ, ita quod fiat econuerso, puta quoties affirmatiua est vera, negatiua etiam sit vera, & econuerso.

Secundo, quod non fiat econuerso, puta licet quando affirmatiua est vera, sit negatiua vera, non tamen econuerso, ita quod fiat negat. esse veram, & tamen affirm. esse falsam. Si dicatur secundo modo, ergo negat. erit verior & firmior quàm affirm. quod est absurdum, probatur cōsequencia, quoniam negat. absolute & semper erit vera, non autem affirm. quia dicis, non semper esse affirm. veram, quando negat. est vera, semper autem negat. esse veram, etiam quod affirm. sit falsa, ergo erit verior & firmior, falsitas autem consequentis probatur, quoniam negat. probatur per affirm. & non pēdet veritas affirm. ex veritate negat. nec conclusio negat. potest probari nisi ex aliqua præmissarum affirmatiua, si dicatur primo modo, id potest esse dupliciter, scilicet diuisim vel coniunctim diuisim quidem, verbi grātia, quod hæc est vera per se, homo est animal, & hæc est vera per se, homo non est animal, coniunctim autem quando neutra esset vera per se sumpta, sed si simul sumatur utraque est vera sicut si sumatur

Plato

Plato per se, & Socrates per se, neuter trahit nauem. Sumpti autem simul trahunt nauem, & tunc est verum qd Socr. & Plato trahunt nauem. Si dicatur coniunctim, duo sequuntur inconuenientia.

Primo, quod neutra pars est vera, nam à coniunctis à diuisa non valet consequentia & cum omnis propositio sit vera vel falsa, sequitur veramque partem esse falsam.

Secundo, quod omnia sunt vnum, vt etiam dictum est in præcedenti ratione, nam per te istæ duæ sunt simul veræ, homo est Deus, homo non est Deus, & quod dicitur de his duabus potest dici de omnibus alijs contradictorijs, quoniam de vnoquoque possunt omnia alia entia affirmari & negari. Si dicatur diuisim, sequuntur multa inconuenientia.

Primo, omnia erunt vnum, quoniam etiam diuisim, possunt omnia alia de vnoquoque affirmari & negari, vnde si istæ duæ sunt veræ diuisim, homo est albus & homo non est albus, possum inferre, ergo homo est albus, & quod dico de albo potest dici de quolibet ente prædicato de homine, & sic patet, qd homo erit omnia. Item quod homo nullum ens erit, qm omnes propositiones negatiue, quæ sunt altera pars contradictionum, sicut istam positionem sunt veræ, ergo non est homo non est animal, non est substantia, non est ens &c.

Secundo, omnes semper dicerent verum, quoniam non loquuntur nisi per affirmationem vel negationem, ergo si vtraque est vera, omnes dicent verum, & omnes mentientur quia omnes consententur se dicere falsum, quando dicitur contradictorium prioris dicti, quod reputabatur esse verum, puta dicens negationem post affirmationem quam reputabat esse veram, confitetur se mentiri.

Tertio, nulla erit perscrutatio veritatis nec disputatio, quia necesse est disputantem dicere determinate ita esse, vel non ita esse, quod si dicat sic, & non sic esse, iam nihil determinate ponit nec determinate negat, ergo non relinquitur locus disputationi.

Quarto, aufertur definitio veri & falsi. Nam verum est quando res ita est sicut dicitur vel non est; falsum autem quando res non est sicut dicitur, ex quo sequitur, qd si per affirmationem res dicitur sicut est, affirmatiua erit vera, & quoniam

per negatiuam contradictoriam aliter dicitur, negatiua erit falsa, non potest igitur saluari diffinitio veri & falsi, & pone re cōtradictoria esse simul vera, verum quia aduersarius posset dicere, q̄ Arist. in hoc 4. inconuenienti petit principium. Nam si aduersarius ponit contradictoria simul vera non admitteret diffinitionem datam de vero & falso. Et propterea subiunxit quintam rationem.

3 Quintā ratio sumitur ex natura rei significare per propositionem, & arguitur sic. Si dicens contradictoria dicit verū, ergo dicens affirmationem tantum esse veram, mentitur & qui dicit negationem tantum esse veram, mentitur sed hoc est falsum, consequentia patet, falsitas consequentis probatur, si dicens affirm. tantum esse veram vel negationem tantum mentitur. ergo naturæ rerum non sunt determinate entitatis, ergo sol non est magis lucidus quā non lucidus, & terra non est magis grauis quā leuis & ens non est magis ens quā non ens ex consequenti dicens aliquid, non dicit aliquid nec opināns aliquid, opinatur aliquid quia non magis opinatur de eo quā de suo opposito; ita enim opinatur solem obscurum sicut clarum, sed qui talia dicit, non est audiendus nec disputandum cum eo, quia non differt à planta, & negat se esse rationale, quoniam ut inquit Comment. in comm. 17. Rationale non diuiditur ab animatis, id est vegetabilibus & brutis nisi per comprehensiones & exaltationes terminatas, scilicet hoc esse tale vel non esse tale.

Sexta ratio sumitur à desiderio & fuga virtutis appetitiue, & arguitur sic. Si contradictoria sunt simul vera, ergo opinans ea simul vera non magis appetet vnum quā aliud, nec magis fugiet vnum quā aliud, ex consequenti, qui longe est à patria non magis desiderabit ire; quā non ire, ex quo ire, & non ire sunt simul vera, & qui timet cadere in foueam non magis fugiet viam ducentem ad foueam quā oppositam, videmus autem per experientiam, quòd propositis duobus contradictorijs homo eligit vnum & relinquit aliud. Nam propositis famelico comedere, & non comedere eliget comedere, & relinquet oppositum, ergo manifestum est contradictoria non esse simul vera; cum videamus homines saltem in manifeste bonis & malis

& in

stat enim diuerfos de eadem re diuerfas & contradictoria habere existimationes. Nam existimat Socrates voluptatem esse summum bonum & Plato existimat oppositum, ergo voluptas est summum bonum, & non est summum bonum, si veritas stat in apparentia, vel humana existimatione, sed contra positionem hanc disputabitur in tertio cap. Hæc de primo cap. dicta sint.

C A P V T I I.

IN secundo cap. soluendæ sunt dubitationes, propter quas aliqui tenebant contradictoria simul vera.

Vnde aduerte, quòd vt inquit Arist. aliqui deducti sunt ad hunc errorem, ex aliquibus rationibus quas nesciebant soluere, & ideo cgebantur concedere conclusionem. Sicut dictum est in sexto Physicorum de Zenone, qui coactus fuit negare motum propter rationem sophisticam, quam nesciuit soluere. Aliqui autem ad hunc errorem deducti sunt non ex ratione sophistica cogente, sed ex proteruia & elatione, vt viderentur singulares in sententijs suis. Aduercentes enim primum principium non posse probari per demonstrationem, statuent tenere oppositum, suadentes sibi quòd nulla ratione possent concludi nec aliqua via probatiua, & quoniam utrique istorum infirmi sunt intellectu, sed non eodem modo, quoniam primi infirmantur ignorantia, secundi autem proteruia, ideo diuerso modo iuuandi sunt; primi quidem solutione rationis, quam nesciunt soluere curabuntur, secundi autem non possunt curari, nisi rationibus positjs in præcedenti cap. & præcipue ratione. Sumpta ex significato terminorum, nunc igitur intendentes curationi primorum, adducemus rationem quam soluere nescierunt.

Tu igitur aduerte, quòd aliqui ex his sensibilibus corruptibilibus & generabilibus, moti sunt ad concedendum contradictoria simul vera, hac ratione quam nescierunt soluere contraria sunt in eodem, ergo & contradictoria, antecedens probatur. Ex eodem fiunt contraria. ergo sunt in eodem. nam ex aqua fit aër qui est calidus, & fit terra quæ est frigida,

da, ergo calidum & frigidum præexistunt in aqua, cum enim ex nihilo naturale nihil fiat necesse est omne quod fit præexistere in eo, ex quo fit consequentia vero probatur, quoniam in vno est negatio alterius, nam frigidum est non calidum. Si igitur in aëre est calidum & frigidum est etiam calidum & non calidum, & sic contradictoria sunt simul vera, verum est enim dicere aërem esse calidum & esse non calidum quia & frigidus. Et hac ratione motus est Anaxagoras ponere omne in omni, quia videbat omne ex omni fieri, & credebat nihil fieri ex alio nisi præexisteret in eo. Eidem rationi videtur consensisse Democritus, quia posuit omnia fieri ex pleno & vacuo, & plenum attribuit enti, vacuum autem non enti, ex consequenti in quolibet ponebat ens & non ens, quæ sunt contradictoria. Huic rationi dupliciter respondet Arist. Primo sic distinguit. Ens dicitur dupliciter, scilicet in actu & in potentia, eodem modo dicuntur contraria, & quidem si intelligunt quod ens sit ex ente præexistunt in actu male intelligunt. Quod enim actu est iam non fit, sed factum est, si intelligant de ente in potentia bene dicunt, sed non sequitur contraria esse actu in eodem, sed tantum in potentia. Subiectum enim quod est actu sub vno contrario est in potentia ad aliud. Inuenitur etiam aliquod quod in se continet vtrumque in potentia, neutrum autem actu saltem perfecto, ut in tepido, est calidum & frigidum in potentia, neutrum autem perfecte actu. Ad rationem igitur nego antecedens, intelligendo de contrariis in actu, de contrariis autem in potentia concedo antecedens, sed nego consequentiam, & cum probatur antecedens, nego quod præexistant actu in eodem. Similiter ad probationem consequentiae, dico quod in vno contrario non est negatio actualis alterius contrarii nisi alterum contrarium existat actu, & ideo non sequitur contradictoria esse simul vera.

Secunda responsio stat in hoc, quod ipsi habent concedere substantiam vnā immobilem ingenerabilem incorruptibilem, de qua locuti sumus in phisicis; ex qua non possunt fieri contraria, cum sit inalterabilis, ex consequenti non sunt contraria in ea, ergo saltem in ea ratione contrariorum, non potest concludi, quod de ea verificentur contradictoria,

sed

sed prima responsio melior est, quoniam in nullo ente debet concludi siue sit mobile, siue immobile, contradictoria esse simul vera. Hæc de secundo capite dicta sint.

CAPVT .III.

IN tertio cap. disputandum est contra eos, qui statuunt veritatem rerum in apparentia, siue in existimatione, sed isti fuerunt in duplici differentia. Nam aliqui sic senserunt propter quædam dubia quæ nesciebant soluere, & aliqui ex sola proteruita, disputandum est igitur, primo contra primos, secundo contra secundos. Pro disputatione contra primos tria agenda sunt.

Primo, ponetur eorum ratio, propter quam moti sunt ad sic sentiendum.

Secundo, ponetur causa talis positionis.

Tertio, improbantur.

Quantum ad primum aduerte, quod sicut aliqui posuerunt, contradictoria simul vera, ex eo quod credebant in sensibilibus corruptibilibus præexistere simul contraria actu. Sic aliqui posuerunt quod ex parte rerum nullam certam veritatem habemus, nec scientiam, sed tantum secundum apparentiam & existimationem humanam, ad hoc autem deueniunt, quia vident, quod de eodem fiunt contrariæ opiniones & contraria iudicia apud diuersos, & vnusquisque determinat sic esse in re vt existimat, verbi gratia. Idem cibus ab vno iudicatur esse dulcis, ab alio amarus. Idem pabulum videtur boui sapidum & homini insipidum. Immo idem homo iudicat idem puta vinum vno tempore dulce alio tempore amarum, vt cum febricitat. Ex his contrarijs experiencijs, sic arguunt nulla certa ratio assignari potest manifestatiua quæ harum existimationum sit vera, & quæ sit falsa, omnes enim suadent sibi existimare verum. Ergo vel vtraque opinio est æqualiter vera, vel æqualiter falsa, ex consequenti vel homo nullam cognoscit veritatem vel consistit in apparentia & existimatione, & ideo has contrarias existimationes considerans. Democritus inquit, quod aut nihil est verum ex parte rerum, aut est nobis in manifestum, quoniam scilicet istos non iudicamus

dicamus de rebus nisi per sensum. Sensus autem non est certus, quoniam non est semper æque sufficiens & dispositus nec eiusdem complexionis in diuersis, & ideo de re nõ feruatur idem iudicium, sed pro vno tempore iudicat vnum, p alio iudicat contrarium.

Sed forte aliquis dicet, q̃ certa ratio assignari potest, quæ ex contrarijs opinionibus sit vera, & quæ falsa, & dicet quo ad sensibilia dum immutant sensum, illud iudicium est verũ quod faciunt sani, quorum sensus non sunt impediti, nec in dispositi, falsum autem est quod faciunt infirmi, quorum organa sensuum alterata sunt. Quantum autem ad intellectua lia dicet illud esse verum, q̃ iudicatur per sapientes & intelligentes & illud falsum quod iudicatur per stultos.

Hanc solutionem remouent sic opinantes, & dicũt quod non potest sciri veritas hoc modo, quoniam hoc non esset, nisi secundum pluralitatem & paucitatem sic opinantium, sed veritas & falsitas non stat in huiusmodi pluralitate, & paucitate, nam si omnes homines, vel quasi omnes essent infirmi, & tantum duo sani tunc infirmi reputarentur sani, & eorum iudicium reputaretur verum, duo vero sani, reputarentur infirmi & iudicium eorum falsum, similiter se quasi omnes essent stulti, & tantum duo sapientes stulti reputarentur sapientes & iudicium eorum verum. Duo vero sapientes reputarentur stulti & eorum iudicium falsum. ergo dicta solutio non valet.

Quantum ad secundum aduerte, quod sic opinantes ad hanc positionem deuenierunt ex hac prima radice falsa, q̃ non distinguebant inter sensum & intellectum, ex consequenti, nec inter cognitionem sensitivam & intellectiuam, & ex hoc sequebatur, quod iudicium sensus est iudicium intellectus. Iudicium autem sensus dicebant fieri per actionem sensibilis in sensum, sensus igitur iudicat secundum quod sensibile imprimit. Sensibile autem imprimit secundum quod est. ergo sensus iudicat sicut est, ergo stat veritas in exitima tione sensus. Hæc fuit radix sui erroris. In quam plures antiquorum inciderunt. Inter quos fuit Empedocles & Democritus, vt coniecturare possumus ex dictis suis & Parmenides & Anaxagoras, & Homerus, & quidem quod sensus

sus non distinguantur ab intellectu secundū Empedoclem; pater ex eo quod dixit permutantes complexionem, permutare intellectum. Et Parmenides dixit, q̄ intellectus appropriatur homini secundū complexionem membrorum; & Anaxag. dixit, ad quosdam socios. Talia sunt entia, qualia existimauerunt, & Homerus loquens de Hectore vulnerato dixit, quod percussus amisit proprium intellectum, ex quo dicto trahitur quod Homerus opinatus est intellectū esse virtutem organicam, neque propter plagam illatam amisisset intellectum nisi esset organicus, patet igitur radix, ex qua in hunc errorem deueniunt, & grauissime peccauerunt, quoniam si cognouerunt nullum verum posse sciri, nisi tantum existimatione hominum, cum essent tantum diligentes in inuestigatione veritatis, quare nō cessauerunt, & quare non respuerunt conantes philosophari, nam si eorum positio esset vera inquirere veritatem assimilatur ei qui profectitur volancia, quæ quanto magis profectitur tanto magis elongant se.

Sed dices vnde prouenit tanta cæcitas sic opinantium, respondet Arist. q̄ id processit ex duplici causa.

Primo, quia non putabant esse alia entia nisi hæc sensibilia in quibus considerabant multam indeterminationem ex parte materiæ, quæ indeterminare se habet ad multas formas, & ex parte ipsius esse corruptibilis, & propterea opinati sunt nihil determinate veri esse nobis manifestum, sed prout sensui apparet, cuius apprehensio variabilis est, sicut & sensibili variatur, & quidem licet eorum opinio non sit vera, est tamen verisimilis considerata sensibilibus variabilitate, & melius est sic dicere, quàm non dixit Epiphanius ad Xenophanem, quid autem dixerit non explicat Arist. sed Albertus inquit dixit Xenophanes, ut visum est in primo lib. omnia esse vnum ens, & illud esse Deum. Contra quem instabat Epiphanius propter multitudinem, quæ videtur in sensu diuersarum substantiarum sensibilibus, ex quibus constat q̄ Epiphanius concordabat cum istis qui ponunt sola sensibilia esse entia, sed verior videtur expositio B. Th. dicit enim quod Epiphanius forte dicebat, omnia entia esse necessaria & immobilia, & per certitudinem sciri. quod dictum est mi-

nus rationabile, quoniam constat nobis de contingentia & variatione sensibilium.

Secundo, in hanc opinionem ceciderunt, quia sequebatur opinionem Heracliti dicentis, omnia esse in continuo motu, nec posset idem bis demonstrari, & ad hoc devenit, quod credebat de nullo posse loqui, nec per orationem demonstrari, sed solo digito ostendebat. Suadens sibi motum digiti breviorē, quā sit pronuntiatio orationis, ex consequenti credebat, quod si oratione loqueretur aut demonstraret rem, citius illam transire, & factam aliam, quam oratio terminaretur, & dixit arguens Aristippum, quod non solum bis, sed nec semel potest homo intrare in eundem fluuium, propter continuū defluxum aquæ in quo una superuenit alteri, eodem modo dixit contingere in natura rerum corruptibilium, ita quod nunquam in eodem statu permanent. Isti igitur adhaerentes opinioni Heracliti dixerunt nullam determinatam veritatem esse in rebus sensibilibus, sed tantum secundum existimationem, quoniam de eo quod mutatur secundum quod mutatur nihil potest determinate verificari. Nam quod calefit, nec est calidum, quoniam nundum est in termino ad quem, nec est frigidum, quoniam non est amplius in termino à quo. Idem intelligendum est in omnibus alijs sensibilibus supposito quod sint in continuo fluxu, ut dixit Heraclitus. Iste fuerunt causæ & radices, ex quibus moti sunt plures ex antiquis, ut dicerent rerum veritatem consistere in apparentia & existimatione.

Quantum ad tertium, aduerte, quod Arist. arguens contra eos.

Primo, arguit contra causam sumptam expositione Heracliti.

Secundo, contra causam sumptam ex variabilitate & indeterminatione sensibilium corruptibilium.

Tertio, improbat dictum eorum de veritate rei secundum apparentiam & iudicium sensus, declarans quomodo contraria iudicia de eadem re non sunt à sensu, sed à phantasia, & alijs causis.

Ad euidenciam primi sic arguit. Qui existimat non esse quod non est, vere existimat & vere enunciat, si ore profert. sed

sed qui dicit de eo quod mutatur dum mutatur, quod nō est in termino à quo, nec in termino ad quem, dicit non esse qđ non est, ergo vere existimat, & vere enunciat, ergo de his quæ mutantur. posito etiam qđ essent in continuo defluxu, potest aliquid vere sciri.

Præterea in eo quod mouetur, verum est dicere quòd est aliquid de termino à quo aliter iam motum esset, & aliquid de termino ad quem, aliter nundum moueretur, & in eo quod generatur, vel corrumpitur verum est dicere, quòd est materia ex qua, quoniam non sit ex nihilo, nec veretur in nihilum & est agens à quo generatur, vel corrumpitur, quoniam nihil seipsum producit aut destruit, nisi forte per accidens. ergo de eo quod mouetur, siue generatur, siue corrumpitur potest aliquid vere sciri, consequentia est manifesta, & omnes partes accidentis probare sunt in physicis.

Præterea, contra positionem Heracliti, sic arguitur. Motus non solum est ad quantitatem, sed etiam ad qualitatem, & ad formam, posito ergo casu, quòd omnia essent in continuo motu quo ad quantitatem, quia continue augentur, licet insensibiliter (sic enim dicebat Heraclitus cuius opinio reprobata est in 8. phys. tex. 23.) non tamen sequitur qđ sint in continuo motu sē qualitatem, nec continue transmutentur sē substantiam. Ergo stante positione Heracliti licet falsa, adhuc de eo quod mouetur potest aliquid vere sciri, magis enim est cognoscibilis res per suam qualitatem, & speciem, quàm per quantitatem.

Præterea, impossibile est omnia moueri neque continuo neque discontinuo motu, probatum est enim in 8. phys. tex. 40. quòd in mouentibus & motis, est status & deuenitur ad unum omnino immobile, & idem iterum manifestabitur in lib. 12. huius scientiæ, ergo stultum est dicere nullum verum sciri, quia omnia sunt in motu.

Præterea, sententia sic opinantium repugnat alteri sententiæ eorum, quia supra dixerunt contradictoria esse simul vera, nam si sunt simul vera, idem est & non est, sed si res sunt in continuo motu, non est verum dicere, idem est & non est, quoniam de eo quòd mouetur ut mouetur, neque

est, neque non est, cum non sit interminio, à quo, nec interminio ad quem, vltra hoc sequitur, quòd si contradictoria sunt simul vera, omnia quiescant, omnia enim erunt vnum, vt declaratum est supra, & omnia erunt in omnibus ex consequenti nihil mouebitur, quia non erit in quod, vel ad quod possit aliud permutari, si enim frigidum est in egido quomodo poterit calidum moneri ad hoc quod fiat frigidum, nihil. n. mouetur ad habitum, sed ad non habitum.

Ad euidentiā secundi sic arguit. Irrationabile fuit iudicare de omnibus entibus nullam habere veritatem, & omnia entia esse in continuo motu, ratione sumpta ab his sensibilibus inferioribus, quoniam sunt minor pars in entibus, tota enim terra est veluti punctus, respectu superiorum quæ videmus immobilia & immutabilia præter quam motu locali, quo tamen non mutatur rei substantia, vt probatum est in 8. phys. vnde minus peccassent si tota natura sensibilibus fuisset iudicata secundum motum corporum superiorum cum multum excedant hæc inferiora in quantitate.

Ad euidentiā tertij, aduerte, q̃ Arist. multiplicetur arguit contra opinantes quod verum & falsum est secundum quòd apparet vel non apparet sensui, sentienti rem sic esse vel non sic esse, puta si gustus iudicat vinum esse dulce, vinum est dulce, si iudicat esse amarum, est amarum & falsum est ipsum esse dulce. Contra hoc igitur arguit primo sic, sensus circa proprium obiectum non decipitur, ergo semper est verus, si igitur de eodem sensibili fiant iudicia contraria, vt circa vinum respectu dulcis & amari, hoc non prouenit à sensu, vt sensus est, sed ex indispositione organi vel medij, vel à phantasia, quæ, vt inquit Comment. in comm. 14. solet imaginari res, quæ præcise videntur impossibiles sicut q̃ detur chimera in mundo, præcipue autem tunc prouenit error à phantasia, quando læsum est eius organum, sed phantasia nō est sensus. s. exterior, sed motus factus à sensu, vt declaratum est in secundo de Anima. ergo &c.

Præterea mirandum est, quomodo isti dubitare possunt verum tantæ sunt magnitudines, quantæ videntur de propinquo, an quantæ apparent à remoto, & de coloribus, si tales sunt, quales videntur de propinquo, vel quales à remotis,

tis, & de gustabilibus si talia sunt qualia videntur sanis, vel qualia infirmis, & de ponderibus, si talia sunt qualia videntur robustis, vel qualia debilibus. Omnia ista dubia derisoria sunt, quoniam recte sentienti constat, quod res visa à remotis, non ita perfecte mouet sensum, sicut visa de propinquo, & ideo iudicare de magnitudine, vel colore, ut videtur à remotis falsum iudicium est. Item organum infirmi indispositum, & malo humore, ideo falsum est eius iudicium, quod non contingit in sano. Item virtus portatiua hominis debilis, diminuta est, ideo falsum est iudicium eius de ponderibus, iudicat enim minus graue esse magis graue, ex paucitate virtutis, quod tamen non est ex parte rei grauis, id autem non contingit in robusto, vana igitur sunt huiusmodi dubia, & sunt similia, sicut si quis dubitaret, utrum res sint, quales apparent dormientibus, an quales vigilantibus, & posito quod aliquis diceret eas tales esse quales apparent dormientibus, tamen non sic mente teneret, cuius signum est, quod non talia agit, quia sic somniauit, qualia ageret si vigilasset. Manifestum est igitur quod non omne apparens sensui est verum.

Præterea, non esset differentia inter sermonum sapientis & ignorantis, & tunc consilium medici sapientis esset simile consilio nescientis sanare, vel non sanare. i. nescientis pronosticari infirmum sanandum, vel moriturum, quod est derisorium dicere.

Præterea, non differret in veritate, iudicium sensus circa proprium obiectum, & circa obiectum alienum, vel circa sensibile commune. Nam visus videns pomum, vel vuam, non solum iudicat de colore, sed etiam de sapore, puta quod est dulcis. Si igitur omne apparens sensui verum est, sequitur quod sicut visus non erat circa colorem vuæ, sic nec circa saporem, quod tamen est falsum. Accidit enim, quod gustus percipit vuam amatam quam visus iudicauerat esse dulcem. Idem dico de sensibili communi. Contingit enim visum iudicare sphericum esse planum, sicut iudicat de terra, propter sui amplitudinem, & cælum tangere terram propter Orizontem, & tamen ratione manifestatur oppositum, ergo non omne quod apparet sensui verum est.

Præterea sensus, neque pro eodem tempore neque pro diuersis temporibus, habet contraria iudicia circa propriū obiectum, nunquam enim iudicat dulcedinem esse amaritudinem, sed si habet iudicia contraria id provenit ex mutatione sentientis vel ex mutatione facta circa subiectum in quo est obiectum proprium sensibile, verbi gratia, quod vinum modo iudicetur ponticum, quod heri gustabatur dulce, nō est ex natura dulcedinis, quæ mutata sit in acetositatem, sed quia lingua gustantis heri in sua naturali dispositione erat; hodie vero forte infecta est phlegmate crudo, propter quod quidquid gustatur, videtur ponticum vel quia vinum mutatum est in ponticum siue acetosum. Non ergo omne, quod apparet sensui verum est ex parte rei, nisi quod apparet stante debita dispositione organi sensus, & debita propinquitate, & non mutato subiecto proprij sensibilis.

Præterea, sic opinantes, non solum auferunt prædicata substantialia, sicut & illi qui ponunt prædicata contradictoria simul vera, de quibus dictum est supra, sed etiam auferunt prædicata necessaria. Nam necessarium est illud quod non potest aliter se habere, si igitur natura rei, sensibilis talis est qualis est apparens sensui, sequitur quod dulcedo contingenter sit in dulci, & non necessario, nec ex natura rei. Nam si vinum dulce gustatur à febricitante iudicatur amarum, & si gustatur remota febre iudicatur dulce, si igitur veritas est ut apparet sensui sequitur dulcedinem & amaritudinem esse prædicata accidentalialia & non necessaria, & idem intellige de alijs prædicatis conuenientibus, rei ex natura rei.

Præterea, sequitur nulla esse sensibilia si non sit sensus, & sic nulla erunt inanimata, neque vegetabilia, quod tamē est falsum, quoniam non inconuenit prius est sine posteriori, sensibile autem prius est sensui, quoniam est mouēs sensum, & mouens est prius moto. Nec obstat quod videntur esse correlatiua quæ sunt simul natura, quoniam non sunt correlatiua mutua relatione reali, ut declarabitur in libro quinto.

Præterea licet sensibile in actu sit simul cū sensui in actu, quoniam sensatio est passio facta à sensibili in sensum, tamē
non

non inconuenit sensible in potentia esse sine sensu, consequentia autem sic probatur. Isti sic opinantes dicunt sensible non esse tale, nisi iudicetur à sensu esse tale, puta non est ignis calidus nisi iudicetur tactu esse calidus, remoto igitur tactu, non erit ignis, quia si non est calidus non est ignis & sic dico de omnibus sensibilibus, cum igitur absurda sint omnia prædicta, patet vanam esse sententiam opinantium, rerum veritatem consistere in apparentia & existimatione sensus.

Reprobatis illis, qui aliquibus dubijs moti statuerunt verum in apparentia nunc reprobandi sunt alij, qui sola proteruia & elatione, tandem sententiam tenuerunt, non sustentantes se aliqua ratione, sed sic molestantes eos qui dicunt opiniones contrarias non esse æque veras, sed opinio quam habet sanus de gustato accipienda est ut vera, & opinio infirmi ut falsa. Similiter opinio quam habet sapiens de re, est vera, opinio autem nescientis est falsa, & opinio vigilantis est vera, dormientis autem ut in pluribus est falsa. Contra hos igitur recte sentientes, instant aliqui ex proteruia, quomodo potest iudicari quis sanus ex certitudine, & quis sapiens, & quis vigilans, & in summa in quacunque diuersitate opinionum, quomodo potest sciri quis recte indicat & quis non recte. Nam qui reputatur sapiens ab aliquibus, ab alijs habetur ut stultus, non igitur potest sciri, quæ contrariorum opinionum sit verior aut quæ falsa.

Sed ut inquit Arist. omnes istæ instantiæ sunt stultæ, & procedunt ex eadem radice, nam credunt quod ea quæ non possunt demonstrari, non possint cognosci, & in eis potest homo loqui, ut licet, & tenere quod tibi placet, & quoniam aduertunt ea quæ sumantur, ut prima principia non posse demonstrari, proteruentes dicunt ea non posse sciri, & tamen si aduertunt naturam demonstrationis de cuius ratione est, ut resoluator in aliqua prima indemonstrabilia, & tamen notissima, aliter non faceret scientiam, non habent causam persistendi in huiusmodi errore. Et notandum, quod licet verbis defendant suum errorem tamen mentem non sic tenent, cuius signum est, quod non agunt secundum quacunque opinionem, sed secundum opinionem quæ reputant veriorē,

riorem, puta secundum opinionem vigilantis & non dormientis, aliter somniantes agerent in vigilia sicut somnauerunt, quod tamen non agunt. Contra igitur istos dupliciter Aristoteles procedit.

Primo, ex eorum positione.

Secundo, secundum rei veritatem.

Quantum ad primum aduerte, quod isti proteruientes in tantum audent, quod non solum dicunt, omnia apparentia esse vera, sed etiam quod contraria sunt in eodem & sunt simul vera. Nam vnus iudicat vinum esse dulce, alter iudicat ipsum amarum. Cum ergo quæ apparent sint vera, vt dicunt ipsi, sequitur vinum esse dulce & amarum. Contra istos igitur, primo arguitur expositione eorum: Isti dicunt omne apparens est verum, ergo omne apparens est, quoniam esse & esse verum idem sunt. Similiter omne non apparens non est, quoniam non apparens secundum eos, non est verum, ergo non est, ergo res sunt & non sunt solum ex apparentia, sed hoc est stultum dicere, quoniam si non omnia sunt ad aliquid, sed aliqua sint absoluta, non est necesse, quod sint, vt apparent, sed vt sunt in seipsis. Si autem omnia essent relatiua, verisimilis esset eorum opinio, quoniam apparens relatiuum est. Nam apparens alicui apparet, puta visui, vel alteri sensui, vel opinanti, ex consequenti rerum esse staret in apparentia. Quod autem omnia entia sint ad aliquid vel non, nunc Aristot. non determinat, sed posito secundum opinionem sic proteruientium, quod omnia essent ad aliquid, adhuc non sequitur, quod contraria absolute & simpliciter sint in eodem, nam quando querunt vtum omne apparens sit verum non est concedendum absolute quod sic, quoniam ineuitaliter sequeretur contraria esse simul, nam vt dictum est de vino, vni apparet dulce alteri aulterum, ergo esset dulce & aulterum, sed est respondendum cum his determinationibus, id quod apparet esse verum, non simpliciter, sed illi cui apparent, & quantum & quando & sicut apparet, & non aliter, ex consequenti nō stat rei veritas in apparentia simpliciter, sed ei cui apparent, & quidem sic respondendo, vitantur multa inconuenientia.

Primo,

Primo, quòd contraria absolute non sunt eodem, sed tantum secundum opinionem & apparentiam illius opinantis.

Secundo, quòd contradictoria non sunt simul vera, quoniam esse verum huic sic opinanti, & non esse verum alteri, aliter opinanti, non est contradictio, debet enim esse respectu eiusdem, & secundum idem, & similiter, & eodem tempore. Patet igitur, quòd etiam sequendo eorum positionem, non possunt nos deducere ad inconuenientia prædicta.

Quantum ad secundum, aduerte, quòd Arist. secundum rei veritatem dupliciter arguit contra eos, etiam non concedendo aliquod positum ab eis.

Et Primo, omnia entia habent respectum ad id cui apparent; quoniam apparens alicui apparet, non apparent autem nisi sensui, vel opinioni, ergo omnia habent respectum ad sensum, vel opinionem, & cum esse verum sic esse, sequitur omnia entia habere, esse per sensum & opinionem, quod est falsum, quoniam si non apparerent, id est apprehenderentur sensu, vel opinione non essent entia, ex consequenti res non sensate, nec opinatæ, sicut multa occultata in visceribus terræ, & in corporibus cælestibus, non essent entia, quod est stultum dicere.

Secundo, arguitur sic. Si omnia entia referuntur ad sensum, vel opinionem, sequitur quòd vnum relatiuum non referatur solum ad vnum relatiuum & determinatum, sed hoc est falsum, quoniam unicuique relatiuo correspondet determinatum correlatiuum, sicut patri filius, domino seruus; dimidio duplum, æquali æquale &c. cōsequentia autem probatur. Si omnia entia habent respectum ad opinantem, sumo dimidium, de quo constat quòd habet respectum ad duplum, & per positionem istorum habet respectum ad opinans, ergo vnum relatiuum, non refertur solum ad vnum determinatum relatiuum. Cum igitur tot & tantis rationibus reprobatus fuerit, sic opinantium error manifestum est hanc esse firmissimam & verissimam sententiam, quod contradictoria non sunt simul vera, & ad hanc sequitur, quod non possunt esse contraria actu, & simpliciter in eodem, cum enim in vno
contra

contrario sit negatio alterius contrarij. Si essent in eodem contradictoria essent simul vera, si enim manus est calida & frigida, ergo est calida & non calida. Dixi autem actu & simpliciter, quoniam non inconuenit vtrunque esse in potetia, sicut calidum & frigidum potentialiter sunt in tepido, vel vnum in actu alterum in potentia. Nam aqua frigida est potentialiter calida, vel vnum secundum principales partes, & alterum secundum vnam tantum. Sicut æthiops secundum corpus est niger, secundum dentes tantum est albus. Hæc pro tertio capite dicta sint.

CAPVT IIII.

IN quarto capite disputandum est contradicentes dari medium inter contradictoria, quorum aliqui mori sunt ad hoc nescientes soluere quasdam rationes sophisticas, aliqui autem, quia in omnibus quærent probationem, & quæ non possunt eis probari, nolunt concedere, & quoniam prima principia non possunt probari. scilicet per demonstrationem, cum non habeant aliqua priora magis nota, ideo nolunt ea concedere, vnde sicut aliqui contra quos disputatum est supra dixerunt contradictoria esse simul vera, qui scilicet sequebantur opinionem Heracliti ponentis omnia in continuo fluxu, ita aliqui posuerunt inter contradictoria dari medium, ita quod non est necesse alterum eorum esse verum, immo vtrunque erit falsum, & isti sunt qui sequebantur opinionem Anaxagoræ. Nam ponebat omnia esse mixta in quodam medio, mixtum autem neutrum est extremorum, ex consequenti nec est bonum, nec non bonum, nec ens, nec non ens. Contra hos igitur disputandum est ex significato nominis, sicut & supra disputandum est contra ponentes contradictoria simul vera. Significatum autem nominis, est eius diffinitio, quod si negant significatum nominis relinquendi sunt, sunt enim ut plantæ igitur sic arguitur contra eos.

Primo supponitur diffinitio veri & falsi, & sunt iste, verum significare, est significare rem, sicut est, vel sicut non est, falsum

falsum significare, est significare rem aliter quam sit, tunc arguitur sic. Quicumque dicit aliquid aut dicit, sicut est vel sicut non est, & sic dicit verum, aut dicit aliter quam sit, & sic mentitur, ergo stante diffinitione veri & falsi impossibile est dari medium inter contradictoria.

Præterea, cum medium inter extrema non inueniatur, nisi per participationem vtriusque extremi, sicut tepidū est medium inter calidum & frigidum, vel per negationē vtriusque extremi, sicut lapis est ens medium inter hominem & equum si est medium inter contradictoria, aut est per obnegationem, aut per participationem, non primo modo, quoniam nulla posset fieri mutatio quod probatur sic, omnis mutatio est inter extrema contrariæ vel contradictoriæ opposita, ut probatum est in 5. Phys. & quando est inter contraria, est etiam inter contradictoria, quoniam in vno cōtrario est negatio alterius, si igitur datur medium per abnegationem inter contradictoria, illud nec erit ens nec non ens, alterum enim contradictorium est ens, alterum non ens. Si illud medium non est ens nec non ens, cum omnis mutatio sit ab extremo ad medium, vel extremo per medium ad extremum, sequitur quod mutatio terminetur ad medium quod non est ens nec non ens, vel id quod permutatur antequam perueniat ad extremum, peruenit ad huiusmodi medium, sed impossibile est dari terminum, neque medium neque extremū immutatione, quod non sit ens, neque non ens, omnis enim mutatio est à bono ad non bonum, vel econuerso. Quod autem neque est ens, neque non ens, non est bonum, neque non bonum. ergo &c. Non secundo modo, quoniam medium per participationem, non est nisi inter extrema, quæ sunt vnius generis, ut patet de tepido & de palido, sed duo contradictoria non sunt eiusdem generis, ut contradictoria sunt, quoniam alterum est ens, alterum est non ens, quibus non potest assignari commune genus, ut patet. ergo &c.

Præterea, omnis intellectus componens & diuidens, aut componit & diuidit sicut res est, & sicut non est, & sic est verum ex diffinitione veri aut componit aliter quam sit, & eodem modo diuidit, & sic est falsum ex diffinitione falsi,

E P I T O M E L I B. I I I I.

falsi, ergo impossibile est dari compositio, vel diuisio, quæ nõ dicat rem eo modo quo est, vel eo modo quo non est. Et aduertere hanc rationem parum differre à prima.

Præterea, si contradictoria habent medium id erit in omnibus contradictorijs. Quod enim naturaliter conuenit alicui, vt inquit Comment. in comm. 27. non inuenitur in quodam sic, & in quodam non, sed hoc est impossibile, tunc enim inter verum & non verum daretur medium, & sic homo posset loqui, & non dicere verum neque non verum, qd est inopinabile, quoniam aut dicit sicut res est, & sic dicit verum, aut aliter quam sit & sic, dicit falsum, vt patet ex diffinitione falsi & veri. Item daretur medium inter ens, & non ens, quod est impossibile aliter daretur transmutatio quæ non esset generatio, nec corruptio omnino, neque sibi substantiam, neque secundum accidens. Omnis enim generatio est à non ente ad ens, & corruptio est ab ente ad nõ ens, talis autem transmutatio nõ est imaginabilis, quoniam non inciperet ab ente, neque à non ab ente, nec alterum eorum terminaretur.

Præterea cum in altero contrariorum includatur contradictorium alterius, sequitur quòd dari posset numerus qui non esset par, neque impar, est enim impar non par, hoc autem est impossibile, quoniam omnis numerus diuisibilis est per æqualia, vel inæqualia, si per æqualia est par, ex diffinitione paris, si per inæqualia est impar ex diffinitione imparis.

Præterea, si quis intetrogatur, vtrum sit nix alba, respondens aut assentit, aut non, si sic, affirmat, si non, negat, ergo manifestum est, non esse medium inter affirmationem & negationem, ex consequenti nec inter contradictoria.

Præterea, si inter par & impar datur medium, ergo illud erit numerus. Medium enim est eiusdem generis cum extremis. Ergo ille numerus erit par, vel impar. Quoniam diuiditur per æqualia, vel inæqualia, & si inter par & impar datur medium adhuc dabitur numerus, qui vt præcedens diuiditur per par & impar, inter quæ iterum dabitur medius numerus, & sic nunquam erit status in his medijs. Intellectus autem abhorret infinitum. Ergo est stultum dicere inter cõ

tradiſtoria dari medium. Deinde ſi inter par & impar datur medium, ergo inter duo & tria datur nullus medius, ergo inter duo & tria non datur proportio emiola, id eſt ſexquialtera, quoniam tria non ſolum continebunt duo & medietatem duorum, ſed & illum numerum medium. Cum autē hæc omnia ſint irrationabilia, patet quòd inter contradiſtoria non datur medium. Hæc pro quarto capite dicta ſint.

C A P V T V.

IN quinto capite diſputandum eſt contra eos qui deſtruunt principia logicæ, & contra eos qui deſtruunt principia philoſophiæ naturalis, nam cum omnia principia ſcientiarum particularium fundentur ſuper hoc principium, non ſunt contradiſtoria ſimul vera nec ſimul falſa; nec datur medium inter ea. Et cum hoc principium ſit de conſideratione huius ſcientiæ, ut dictum eſt in ultimo cap. præcedentis tract. ex conſequenti ad hanc ſcientiam ſpectat deſenſare principia ſcientiarum particularium, fuerunt autem multi qui deſtruxerunt principia logicæ, ſcilicet quòd omnis propoſitio eſt vera vel falſa, quoniam vel ſignificat ut eſt in re, vel aliter. Multi autem, dicunt quòd omnis propoſitio eſt vera. Alij autem quòd propoſitio eſt falſa, & omnes propoſitiones ſunt ſicut iſta. Diameter eſt commenſurabilis coſte, vtraque igitur reprobanda eſt & ſi daretur tertia, ſcilicet quòd omnes ſunt ſimul veræ & falſæ reprobaretur, ſicut duæ præcedentes, nam ſi probabitur quod de neceſſitate omnis propoſitio eſt vera vel falſa, contabit, quòd non omnis eſt vera nec omnis falſa, nec omnis ſimul vera & falſa, & pro fundamento ſupponitur ſignificatum veri & falſi, id eſt diſſinitiones ſuæ quas ſi non concedunt, non eſt diſputandum cum eis.

Primo, igitur ſic arguitur. Conſtat dari aliqua contradiſtoria, ut dictum eſt in capite præcedenti, inter quæ non datur medium, ut verum & non verum, ens & non ens, ergo de neceſſitate, alterum verum alterum falſum. ergo non omnia ſunt vera nec omnia falſa, nec omnia ſimul vera & falſa.

Præterea, verum eſt dicere quod eſt eſſe, vel quod non eſt
non

non esse, falsum autem est dicere, quod est nō esse, vel quod non est esse. Quicunque ergo dicit quod est esse, vel quod non est non esse dicit verum, ergo qui dicit oppositum dicit falsum, ergo non omnia sunt vera, nec omnia falsa.

Præterea iam probatum est, q̄ omne quod contingit affirmare contingit etiam negare, ergo non omnia possunt si mul affirmari & negari, ex consequenti licet omnis propositio sit vera, vel falsa, non tamen omnis est vera, nec omnis est falsa.

Præterea istis contingit quod famosum est. s. quod positiones suæ, seipsas destruunt, nam qui opinatur omnia esse vera, facit opinionem contrariam suæ opinioni esse veram. Sed opinio contraria suæ opinioni est quod non omnia sint vera. ergo ista positio destruit seipsam. Ex ipsa enim inferitur opposita contra seipsam. Item qui opinatur omnia esse falsa, facit opinionem contrariam suæ opinioni esse falsam, sed opinio contraria suæ opinioni est quod non omnia sunt falsa, ergo destruit seipsam, cum ex seipsa inferatur oppositum contra seipsam. Cum igitur impossibiles sint huiusmodi positiones patet esse verissimum principium logicę. s. q̄ omnis propositio est vera vel falsa, non autem omnis vera, nec omnis falsa.

Fuerunt autem & alij qui destruxerunt principium primum philosophiæ naturalis. s. q̄ datur quies & motus in naturalibus, quoniam ex diffinitione naturæ, natura est principium motus & quietis, aliqui autem dicunt vt Heraclitus q̄ omnia sunt in continuo motu, ex consequenti nihil quiescit. Ad improbationem igitur huius erroris probatur, primo, q̄ non omnia semper quiescunt, secundo, q̄ non omnia semper mouentur, tertio, q̄ non omnia aliquando mouentur, & aliquando quiescunt, sed quædam semper mouentur, quædam sunt semper immobilia, quædam aliquando mouentur aliquando quiescunt.

Primum probatur sic. Si omnia semper quiescunt, ergo omnia remanent in eadem dispositione in qua aliquando sunt, ex consequenti quod est verum, semper erit verum, & quod est falsum, semper erit falsum, hoc autem videmus esse inconueniens, nam propositio variatur de veritate, in falsitatem,

tatem, quoniam videmus rem variari, saltem videmus ad sensum Socratem debentem verum variari, quoniam pro aliquo tempore non fuit, & pro aliquo tempore non erit, & qui negat hoc, est sine iudicio & sensu, ergo non omnia semper quiescunt.

Secundo probatur sic, si omnia continue mouentur, nihil erit verum, sed omnia falsa, cuius oppositum probatum est supra, probatur consequentia, quod est, verum est, nam significare verum, est significare rem sicut est, sed quod mouetur, ut mouetur nundum est, aliter, iam motum esset, ergo &c.

Præterea, in omni re mota est aliquid permanens, ergo non omnia continue mutantur, probatur antecedens. Omne quod mutatur est ens, quoniam purum non ens non potest esse subiectum motus nec quietis, & omne quod mutatur, mutatur ex alio in aliud, vel in alio, puta in qualitate, vel in loco, ergo omne quod mutatur permanet successive sub utroque termino, ita quod secundum substantiam non mutatur. ergo &c.

Tertium probatur sic, corpora cælestia semper mouen-

tur & nunquam quiescunt ut videmus. Primum

autem mouens, ut probatum est in 8. phys.

est semper immobile, & inferiora ali-

quando sunt, aliquando non sunt,

ergo &c. Et hic terminatur

tota intentio Arist. in

quarto libro Me-

taphysicæ.

•

EIVSDEM CHRYSOSTOMI
IAVELLI CANAPITII
E P I T O M E
SVPER QVINTO LIBRO
M E T A P H Y S I C A E .



OSTQVAM stabilitum est
subiectum huius scientiæ, & de-
claratum quod habet considera-
re de proprietatibus entis in-
quantum ens est, & defensauit
prima principia, cōsequens est,
vt assignentur multiplicia signi-
ficata terminorum significantiū
principia entis, & huius termini
ens, & terminorum significantiū
passiones entis, & id faciemus in

præsenti libro, quod vtique expedit, antequam determi-
nemus de partibus & passionibus & principijs entis, quoniam
vt inquit D. Albert. in 5. lib. Metaph. tract. 1. cap. 1. pote-
stas subiecti non scitur nisi per diuisionem subiecti in partes
& partium vltius in partes, & ideo, quoniam ista scientia
intendit considerare de ente, & de principijs, & de causis, &
de proprietatibus eius, & de primis eius partibus oportet
in ea assignare multipliciter istorum. Tunc .n. nos scien-
tiam perfecte de his habebimus, cum singulorum assignate
fuerunt diffinitiones, siue rationes quo ad singulos modos.
Et aduerte, q. vt inquit Comment. comm. 1. non ideo distin-
guuntur hic huiusmodi nomina ad sciendum intentionem
quæsitam ab alia intentione. i. vt aliquis modus hic intentus
accipiat, & alius modus non intentus dimittatur. Sic .n. fit
in scientijs particularibus, sed vt sciatur tota latitudo eorum
quæ hic tractanda sunt & cū tractata fuerint sciatur pfectio
huius

huius scientiæ . Totum igitur hunc librum complectemur in tribus tractatibus .

Primus , erit de nominibus significantibus causis entis , quod est subiectum huius scientiæ .

Secundus , erit de nominibus significantibus subiectum & primas partes subiecti huius scientiæ .

Tertius , erit de nominibus significantibus proprietates eius .

T R A C T A T V S P R I M V S .



R A C T A T V M primum diuidimus in quinque capita .

Primo , agitur de hoc termino principium .

Secundo , de hoc termino causa .

Tertio , de hoc termino elementorum .

Quarto , de hoc termino natura .

Quinto , de hoc termino necessarium .

C A P V T P R I M V M .

IN primo capite agendum est de hoc termino principium quot modis dicatur , sed antequam descendamus ad ipsos modos , aduerte tria .

Primo , quoniam omnes termini hic distinguendi sunt de natura analogorum de quorum ratione est , vt inter omnes modos detur vnus principalis ad quem omnes alij habent attributionem , vel cuius respectu suscipiunt prædicationem analogi , ideo Arist. in hoc termino principium postquam posuerit omnes modos principij , reducet eos ad vnum commune , ad quod omnes respiciunt .

Secundo , quoniam innata est nobis via procedendi à cōmuniōribus conuenienter inter terminos importantes causalitatem incipit à principio , quoniam communius est , licet enim omnis causa sit principium , non tamen econuerso . Nam punctus est principium lineæ , non tamen realiter causa , & mane est principium diei non tamen causa .

Tertio , quoniam quæ manifestiora sunt sensui , sunt nobis

bis via deueniendi ad minus manifesta, ideo Arist. in omnibus his terminis semper incipit à modo magis manifesto, & ab omnibus, concesso etiam quòd non esset modus perfectior ex parte rei. Et in hoc declaratur Arist. fuisse naturalissimus doctor, tradens hanc scientiam modo proportionatissimo nostro intellectui.

His præpositis aduerte quinque modos assignatos à Philosopho quibus dicitur principium.

Primus & notissimus est in situ, ut id quod est primum in longitudine siue in via, à quo incipit motus localis rectus dicitur principium motus, & oppositum, id est in quo terminatur motus localis dicitur ultimum, & secundum Cōment. principium motus augmenti est illud secundum quod primo fit, fit autem primo secundum longitudinem, deinde secundum latitudinem, deinde secundum profunditatē. Dicemus igitur quòd secundum hunc modum longitudo dicitur principium augmenti. Et quoniam qualis est ordo in magnitudine talis est in motu & in tempore, ideo secundum hunc modum, sicut prima pars magnitudinis dicitur principium eius, sic prima pars motus & prima pars temporis dicentur principium motus. & principium temporis, & quoniam in omni specie motus, datur aliquod primum à quo incipit motus, & dicitur terminus à quo, ideo hic primus modus verificatur non solum in motu locali, sed & in omni alio motu & in generatione ac corruptione substantiali adiunctis alterationibus præiis. Quod ideo dico, quoniam secundum se sunt instantaneæ ex consequenti non distinguitur in eis primum & ultimum.

Secundo, dicitur principium, omne illud ex quo primo congrue & optime aliquis operatur, siue facit siue mouet, & distinguitur hic modus à præcedenti in hoc, quoniam illic quod est simpliciter primum in situ ex parte rei dicitur principium, hic autem quod sumitur pro primo, quia reputatur esse opportunum à quo incipiat motus vel operatio, dicitur principium, ut in ludo saltandi, saltans incipit moueri non à prima parte viæ simpliciter, sed ab ea, quam reputat sibi magis congruam. Et exemplificat Arist. in doctrina, nam qui docet alique non semper incipit ab eo quod est primum simpliciter,

sed

sed ab eo quod magis congruit intellectui adscendentis. Sicut Arist. fecit in philosophia naturali, qui ab effectibus incipit, cum tamen sint posteriores causis. Et aduerte q̄ hic, modus etiam verificatur in motu sphærico, nam licet in sphæra nō sit principium distinctum à termino, tamen mouens mouere potest à puncto signato, quod dicitur principium hoc modo, quoniā est primum à quo incipit motus, prout cōgruit & videtur optimum mouenti, & sic in motu cœli primi, principium motus est punctus orientis. Principium autem motus planetarum est punctus oppositus.

Tertio, modo dicitur principium illud quod primo in re generatur & est intrinsecum rei, & illud à quo primo effectiue res generatur & est extrinsecum à re, quoniam nihil seipsum generat. Exemplum primi, fundamentum est principium domus, cor est principium animalis, secundum eos qui cōsiderant animal, ex eo q̄ mouet seipsum, vel cerebrū secundum eos qui considerant animal, in quantum sentit, vel aliud, puta hepar, secundum eos qui considerant animal in quantum nutrit seipsum. Quod autem sit illud apud Arist. dictum est in libro de motu animalium & in libro de somno & vigilia. Exemplum secundi, pater est principium filij, & conuicium est principium belli.

Quarto modo dicitur principium præcipue in moralibus & in artificialibus, illud à quo primo mouentur inferiora siue deseruiencia. Exemplum primi, princeps & rex tyrānus dicuntur principium, quoniam eorum voluntate & decreto mouentur subditi. Exemplum secundi ars Architectonica est principium artium deseruientium, ut militaris est principium equestris, & freuēfactiua, dirigit enim eas & dat modum eis sic vel sic operandi.

Sed tu aduerte, q̄ hic quartus modus potest verificari de principio effectiuo secundum exempla data, & sic exponit B. Thom. & potest verificari de principio finali, ut exponit Comment. & D. Alber. & tunc intelligatur sic textus Aliud secundum cuius voluntatem mouentur mobilia, id est propter cuius voluntatem mouentur mobilia, non enim subditi ordinate mouerentur à principe, nisi volūtas principis quā supponunt iustam & velut regulā, esset finis propter quem

sic vel sic agunt. Similiter inter artes, architectonica est, principium finale artium subseruientium, ordinantur enim ad eam & ea subtracta, ille subtrahuntur. Et aduerte q̃ D. Albert. in 5. Metaph. tract. 1. & cap. 1. reprehendit expositionē B. Thom. & inquit. non ignoramus quosdam accipere hūc modum principij secundū rationem causæ efficientis, sed illorum dicta non curamus, quia inductos modos non nisi secundū materiā verificant, & ciuilia, & ciuiliū rationes ignorant, vt videtur hic.

Mirum est quomodo tam leuiter reprehendit B. Thom. Cum verba philosophi, ita bene exponi possit de principio efficiente sicut de finali, & melius nam in fine textus, ibi quā propter natura principium antequam faciat verbū de principio finali, replicat, & præuoluntas de qua mentionem fecerat in quarto modo. Deinde facit verbum de principio finali dicens. Et quod est cuius causa. Ergo non est abijcienda expositio B. Thom. præcipue cum sæpe coincidant principium & efficiens & finale, vt dicitur in lib. 12. de primo motore qui mouet vt efficiens & finis, vnde non inconuenit, in ciuilibus voluntatem principijs esse à quā & propter quam mouentur subditi. Idem intellige de architectonica.

Quinto modo, dicitur principium illud per quod primo rem cognoscimus per discursum intellectus, & quoniam omnis discursus resoluitur in primas & notissimas propositiones quas defensauimus in 4. lib. ideo illa dicuntur principia hoc quinto modo. Similiter quoniam per definitionem subiecti innotescunt nobis proprietates subiecti, ideo definitio dicitur principium hoc quinto modo. Et aduerte q̃ vt inquit Comment. distinguitur hic modus à modo secundo in quo explicatum est de principio doctrinæ, quoniam illic dicitur principium illud à quo incipit doctor mouere intellectum discipuli accommodans se eius capacitati, dato q̃ non sit primum ex natura rei. hic autem dicitur principium illud à quo ex natura rei incipit notitia intellectualis discursiua, ita quod illud dicetur principium in adiscendo, hoc autem dicetur principium in quærendo & venando sciētiam. Et dicitur principium essendi rem & cognoscendi. Illud autem sufficit esse principium cognoscendi. Tot igitur modis

modis dicitur principium, & aduerte quòd cum omnis causa sit principium, licet non econuerso, potest etiam dici principium tot modis quot dicitur causa.

De modis autem causæ dicemus in capite sequenti.

Positis modis principij, cum sit analogum reducit eos ad vnum, cuius participatione omnes alij verificantur & quo remoto remouentur, dicitur igitur principium vniuersaliter & absolute quod est primum in ordine, ante quod nullū tale est, ad quod sequuntur ea quæ principiata sunt. Huiusmodi autem primum potest esse, vnde res est aut fit aut innotescit. Et propterea aliquod principium est intrinsecum, sicut natura & elementum, & forma rei, aliquod autem est extrinsecum sicut mens, id est intellectus qui est principium artificiatorum. Et præuoluntas, puta principis quæ est principium in ciuilibus, vt diximus in quarto modo, finis etiam dicitur principium, quoniam bonum in prosequendo, & malum in fugiendo, mouent agens ad sic vel sic agendum. Bonum autem habet rationem finis & propter bonum agunt agentia naturalia & moralia, & artificialia. Hæc de primo cap. dicta sunt.

C A P V T · I I.

IN secundo cap. agendum est, de hoc termino causa, & quot sint causarum genera, & qui sunt modi causarum. Sed antequam descendamus ad genera causarum, aduerte quòd licet eodem modo tractet hic de causis quo & in 1. Phys. non tamen eadem ratione. Nam illic considerantur in ordine ad ens mobile tantum. Hic autē in ordine ad ens, considerantur enim in quantum sunt causæ entis & non solū in ordine ad motum, vnde datur efficiens & finis & forma siue actus metaphysicus etiam sine motu physico, vt dicemus in lib. nono, & in 22. Hoc prænotato, aduerte quòd Aristot. intendit tria.

Primo, distinguere causam in genera sua siue species, quæ sumuntur aduersa ratione causandi, alia est enim causalitas efficientis alia formæ &c.

Secundo, assignare quædam consequentia ad causas.

K iij

Tertio,

Tertio, reducere oēs causas ad quatuor genera causarū.

Quarto, assignare diuersos modos causarum, etiam in eodem genere causæ.

Quantum ad primum, aduerte, q̃ causa primo dicitur illud ex quo res fit, & est in existens ac permanens in re facta sicut æs est causa statuæ, & non solum æs, sed metallum & liquabile, quæ se habent vt generā ad æs. Dixi autem & est in existens ac permanens ad differentiam contrarij, ex quo aliquid fit aut priuationis, quoniam vt inquit Philosophus in 1. Phys. tex. 60. Non oppositum quidem, id est materia, manet in re facta, oppositum autem, id est terminus à quo qui aliquando est contrarium, vt quando ex albo fit nigrum, aliquando est priuatio, vt ex non homine fit homo &c. Illud non manet aliter opposita essent simul in eadem materia & in eodem subiecto.

Secundo, dicitur causa, species & exemplar, id est forma intrinseca, per quam res est, & forma extrinseca ad quam res fit, & apud Græcos dicitur idea siue paradigma, & quoniam à forma intrinseca rei, sumitur ratio & diffinitio rei indicatiua siue quiditatis, ideo hoc modo causa dicitur non solum species siue forma, sed & ratio & quod quid erat esse rei, principale enim indicatiuum quiditatis, est ipsa forma. Et non solum forma specificè sumpta, dicitur causa hoc secundo modo, sed & eius genera, vt causa diapason in musica, non solum est proportio duorum ad vnum, sed & proportio dupla, & numerus, & non solum tota diffinitio rei dicitur causa, hoc secundo modo, sed etiam omnes partes diffinitiuæ, & maxime quæ dicuntur in recto de diffinito. Secus autem si dicuntur in obliquo, tunc enim habent rationem materiæ vt cum dicitur, finitas est nasi curuitas.

Tertio, dicitur causa quod est principium à quo aliquid mouetur, aut fit aut producitur aut omnino mutatur. Et hoc modo consilians, generans, efficiens & mouens est causa, & vniuersaliter disponens, adiuuans, perficiens & quod est causa non solum à quo est motus, sed etiam quietis dicitur causa hoc modo. Ab eodem enim habet res quod moueatur ad locum & quiescat in loco sicut ab eodem aqua calefit & permanet calida ad tempus.

Quarto

Quarto modo dicitur ut finis, & est illud gratia cuius aliquid sit quod quidem licet in re sit ultimum, tamen est vere causa in quantum mouet agentem ad operandum, nam interrogati propter quid sic agimus, respondemus quod propter talem finem, & tunc credimus reddidisse causam, finis ergo est causa. Sed aduerte quod non tantum ultimum in aliquo ordine est causa ut finis, sed etiam quæ sunt intermedia, nam in ordine sanationis, ante sanitatem præcedunt attenuatio & purgatio exercitium &c. Et hæc ita se habent, quod vnum respectu præcedentis est causa finalis, respectu autem sequentis est causa efficiens, verbi gratia attenuatio est finis proximus purgationis & est efficiens sanitatis, & quod dixi de istis actionibus intermedijs, intellige etiam de instrumentis quibus præparatur medicina, vnum enim ordinatur ad aliud, & omnia ad sanitatem, vnde solet dici, quod omnia in termedia habent rationem finis quo, ultimum autem est finis gratia cuius. Ista igitur sunt quatuor genera causarum famosa.

Quantum ad secundum aduerte tria consequentia ad dictas causas.

Primo, vnius rei possunt esse multe causæ per se, non tamen in eodem genere æque proxime, & sufficientes, ut statuarum artifex est causa & metallum, sed artifex ut causa efficiens, & metallum, ut causa materialis. Dixi per se, quoniam de causis per accidens non dubitatur, declaratum est enim in 2. Phys. quod quodammodo infinitis causis per accidens, potest produci effectus per accidens, ut inuentio thesauri. Dixi æque proxime quoniam non inconuenit plura agentia per se producere idem, sed vnum erit agens proximum, alterum remotum, ut sol & homo generant hominem. Dixi sufficientes quoniam non inconuenit plures causas eiusdem generis, dummodo nulla per se sufficiat, concurrere ad eundem effectum, sicut multi trahunt nauem coniunctim & non diuisim.

Secundo, contingit causas esse sibi inuicem causas, in diuerso tamen genere, ut exercitium est causa sanitatis, sed effectiua, & sanitas est causa exercitij, sed finalis. Est autem efficiens respondens fini, quoniam actione sua producit finem: siue attingit ipsum, & finis respondet efficienti, quoniam mo-

uet efficiens ad operandum, sine quo non operaretur. Quæ tamen correspondentia non est secundum esse, licet enim efficiens deducat finem ad esse, non tamen econuerso, quoniã finis supponit esse efficientis. Et aduerte quòd sicut correspondentia est inter efficiens & finem, ita est inter causam materialem & formalem, nam forma est causa materiæ, quoniam facit ipsam actu, cum secundum se sit tantum in potentia & materia est causa formæ, quoniam recipit & sustentat ipsam, ex consequenti sunt sibi inuicem causæ quo ad esse, licet non semper eodem modo. Nam licet forma substantialis det esse actu simpliciter ipsi materiæ, non tamen forma accidentalis nisi secundum quid, non enim immediate recipitur in materia nuda, sed in materia iam actuata forma substantiali, similiter licet materia sustentet simpliciter omnem formam edactam de potentia materiæ, non tamen formam cuius esse non pendet à materia nisi pro tempore quo informat materiam, nam separata retinet esse & talis esse anima intellectiua, de qua loquemur in lib. 12.

Tertio, contingit idem esse causam contrariorum effectuum in eodem genere causæ, puta in genere causæ efficientis, sed diuersimode. Nam præsentia luminosi est causa illuminationis, & absentia eius est causa obtenebrationis. Præsentia principis in ciuitate est causa pacis & absentia eius est causa tumultus. Dixi autem diuersimode, quoniam idem eodem modo se habens, causat idem, ut igitur causet contraria, necesse est ut diuersimode se habeat.

Quantum ad tertium Arist. reducit omnes causas ad quatuor genera per hanc sufficientiam, omnis causa vel est illud ex quo res fit, ut elementatum ex elementis, dictio ex literis, artificiatum puta statua ex ære, totum ex partibus conclusio ex præmissis, non in quantum propositiones sunt, sed in quantum continet maiorem & minorem extremitatem. Nam in quantum propositiones sunt illatiue conclusionis, ex consequenti non sunt causa ex qua, sed aqua, & sic omnia prædicta reducuntur ad genus causæ, quod dicitur materiale, quod demonstrantur per hanc propositionem, ex vel est illud quo res constituitur in actu, sic ordine constituitur ciuitas vel exercitus, compositione constituitur domus, mixtio

ne constituitur elementatum, & breuiter illud quo posito, res habet esse actu, & quo remoto definit esse & est intrinsecum ei. Omnia hæc reducuntur ad genus causæ, quod dicitur formale, & demonstrantur solo ablatiuo sine aliqua præpositione, vt exercitus constat ordine, domus compositione mixtum mixtione, animatum anima &c. Vel est illud à quo res fit aut producit aut mouetur aut quiescit, vt virtute actiua seminis generatur animatum, à medico vel ab ambulatione, id est exercitio fit sanus æger, à generante mouetur graue & quiescit in loco suo, & hæc reducuntur ad genus causæ, quod dicitur efficiens, & demonstratur per hanc propositionem A, vel est illud gratia cuius alia sunt, & est finis ac bonum eorum. Et hoc est genus causæ finalis, quod demonstratur per hanc propositionem. propter. Et est tantæ excellentiæ, vt inquit Comment. in comm. 3. quod omne carens causa finali, caret bono Patet igitur omnes causas reduci ad quatuor genera, scilicet materiale formale efficiens finale, quorum potissimum est finale. Est enim causa quod agens causet & est causa quod forma det esse, & est causa quod materia recipiat & sustentet formam, vnde dicitur esse causa causalitatis aliorum generum causarum.

Quantum ad quartum, aduerte quod Arist. assignat modos causarum. Et hæc diuisio differt à præcedenti in hoc, quod illa est veluti per diuersas rationes causandi essentielles, quarum plures non possunt conuenire vni generi, nam causalitas materiæ tantum conuenit materiæ; idem dico de alijs, hæc autem est per rationes diuersas causandi accidentales, ex quibus non inconuenit plures inueniri in vno genere, puta datur efficiens particulare & vniuersale, per se & per accidens, potentiale & actuale. Isti igitur modi ordinate collecti reducuntur ad sex & quilibet diuiditur per potentiam & actum, vt declarabitur, omnes igitur simul sumpti sunt 12.

Primo diuisio, causarum quædam prior quædam posterior, quod quidem potest dupliciter exponi.

Primo, secundum causalitatem, vt dicatur causa prior, quæ dat causalitatem causæ sequenti, & posterior quæ causat in virtute prioris, sicut videmus in causis per se subordinatis, vnde sol dicitur causæ prior & hō causa posterior hois geniti.

Secundo,

Secundo, secundum prædicationem, & tunc causa prior dicitur causa generica, Posterior autem causa specifica vel singularis, vt causa sanitatis prior, id est vniuersalis dicitur artifex, causa autem posterior dicitur medicus vel hic medicus, differunt tamen causa prior & posterior secundum prædicationem, à causa priori & posteriori secundum causalitatem, quoniam sumpte secundum prædicationem non distinguuntur realiter, neque enim distinguitur realiter magis vniuersale, à minus vniuersali, neque minus vniuersale à singulari, sed tantum ratione, vt declarabitur in 7. lib. Sumptæ autem secundum causalitatem distinguuntur realiter, quoniam realiter vna recipit ab alia, & non econuerso. Isti duo modi maxime quo ad prædicationem inueniuntur in omni genere causæ, nam causa materialis prior hiale est metallum, posterior autem est argentum, causa formalis prior in diapason est numerus, posterior autem est proportio dupla. Causa efficiens prior in sanitate est artifex. Posterior est medicus, causa finalis in gulosio prior quidem est voluptas, posterior autem est voluptas in gultu.

Secunda diuisio, causarum quædam per se, quædam per accidens, causa per se est, quæ secundum se influit in effectum, vt calidum per se calefit, medicus per se medicatur, ædificator per se ædificat, causa per accidens est, quæ accidit causæ per se, & secundum se nihil influit in effectum, vt quoniam ædificatori accidit esse Socratem, vel album vel musicum, ista dicuntur causa per accidens, & horum genera, vt homo animal corpus coloratum quale &c.

Tu tamen aduerte q̃ causa per accidens dicitur dupliciter, primo ex parte causæ per se, secundo ex parte effectus per se, ex parte causæ per se, illud dicitur causa per accidens, quod accidetaliter coniungitur causæ per se, vt si musica adueniat ædificatori dicitur musicus ædificat. Ex parte effectus per se illud dicitur causa per accidens alicuius quod accidit effectui per se. Sicut si discordia coniungatur domui quæ est effectus per se ædificatoris, potest dici ædificator causa per accidens discordiæ, quia discordia coniungitur domui. Hæc autem causa per accidens ex parte effectus variatur tripliciter, nam contingit quod semper habet ordinem ad effectum intentum,

intentum, puta quotiescunque remouetur impediens lapidem descendere, lapis descendit & descensus lapidis dicitur effectus per se intentus à generante ex gravitate sibi impressa. Remouens autem impedimentum dicitur causa per accidens huius descensus, quoniam nihil influit in lapide, vt descendat. Contingit etiam quod rarissime & præter propositum agentis coniungitur effectui, per se, vt rarissime & præter intentionem fodientis, coniunguntur fossio sepulchri & inuentio thesauri. Contingit etiam q̃ nunquam realiter, sed tantum existimatiue coniungitur effectui per se, vt q̃ me nudato, vel extracto ense rubiginoso sequatur eclypsis, vnde hæc dicitur causa per accidens mere imaginaria.

Tertia diuisione causarum quædam complexa, quædam incomplexa. Incomplexa quando sumitur sola causa per se vel sola causa per accidens, vt ædificator ædificat, vel Policletus ædificat. Complexa autem quando vtraque sumitur, vt Policletus ædificator ædificat, potest etiam dici incomplexa, quando vna sola agit & sufficit. Complexa autem quando plures vniuntur, & nulla per se sufficit, vt in conflictu contra inimicos. Sed de hoc non loquitur Philosophus, quoniam pro rei veritate non sunt plures causæ, sed partes integrantes vnã causam.

Positis tribus diuisionibus, vnumquenque modum diuidit per potentiam & actum, nam quædã causa prior siue vniuersalis, potentialiter causat, sed nondum actu, vt sol in hyeme habet potentiam productiuam rose, sed nondum actu producit, in vere autem actu producit. Idem intellige de causa posteriori, siue particulari, eodem modo intellige in secunda & tertia diuisione. Ratio autem diuisionis per potentiam & actum fuit, qm̃ aliam habitudinem habent causa in actu, & causa in potentia ad effectum, nam causa in actu proxima & singularis huius effectus simul ponitur & remouetur cum hoc effectu, dum est in fieri. Si .n. medicus actu medicatur, aliquem infirmum medicatur, & si est aliquod ædificans est aliquod ædificatum, & econuerso. Et si ædificans remouetur, ædificatum cessat ædificari. Non sic autem est de causa potentiali, & de effectu, non enim est necesse q̃ si corrumpitur ædificator, qui iam ædificauit domum, corrumpatur domus

domus, quoniam non pendet ab edificatore nisi in fieri, non autem in facto esse. Quod si pendet effectus in fieri & in facto esse à causa sua, tunc remota causa, definit esse & effectus, ut lumen in aëre definit ad absentiam luminosi, fit enim & conseruatur lumen sola præsentia luminosi. Et eandem habitudinem habent omnia creata ad primam causam, à qua non solum produciuntur, sed & manu tenentur.

Sed dices, quare Arist. comparans causam in actu ad effectum, comparat solum causam singularem ad effectum singularem, cum sit necesse omni causæ in actu siue vniuersali siue singulari correspondere effectum in actu, nam si sol generat aliquod est generatum, & si nullum est generatum sol nō actu generat. Ad hoc dico, q̄ alio modo comparatur causa vniuersalis in actu, ad effectum in actu, & causa singularis in actu ad effectum in actu. Nam singularis determinate respicit hunc effectum tantum, vniuersalis autem non præcise respicit hunc, sed hunc vel illum, non enim sequitur, q̄ si sol generat hominem, generet hunc puta Socratem, sed alium vel alios, & huius causa est, quoniam virtus causæ particularis est limitata ad hunc effectum virtus autem causæ vniuersalis stat in quadam amplitudine, & quanto maior est vniuersalitas sua, tanto ad plures effectus se extendit, nō solum numero, sed & specie & genere differentes. Volens igitur Arist. assignare differentiam inter causam in actu, & causam in potentia notificauit per causam singularem & effectum hunc singularem, inter quæ manifestior est simultas positionis & remotionis, nam inter causam vniuersalem in actu & effectum, non seruetur huiusmodi simultas nisi disiunctim, vel inconfuso, ut dictum est. Hæc de secundo cap. dicta sint.

CAP V T I I I.

IN tertio capite assignandi sunt modi, quibus dicitur elementum. Deinde reducendi sunt ad aliquod vnum commune, cuius participatione, omnes modi assignandi dicuntur elementum, & non aliter. Ad plenam igitur notitiam præsentis propositi quatuor agenda sunt.

Primo, describendum est elementum.

Secundo,

Secundo, assignandi sunt modi elementi proprie dicti.

Tertio, assignandus est modus elementi improprie & transumptiue dicti.

Quarto, reducendi sunt ad vnum commune.

Quantum ad primum sic describitur elementum ab Arif. Elementum est illud ex quo primo componitur aliquid, & est inexistens, & est indiuisibile specie in aliam speciem.

Aduerte qd ratione primæ particulæ, elementum proprie nõ verificatur nisi de causa materiali ex consequenti non dicitur nisi de causis intrinsecis, & in hoc opponitur principio quod verificatur proprie de causis agentibus quæ sunt causæ extrinsecæ, ut testatur Comment. in comm. 4. Ratione autem secundæ particulæ verificatur solum de primis componentibus quæ non componuntur ex prioribus, vnde caro & ossa non sunt elementa hominis, sed prima corpora simplicia, vt ignis aqua &c. Ratione tertiæ particulæ priuatio & contrarium, ex quo res fit, non sunt elementum, quoniã vt diximus in capite de causis, non permanent in re facta, & secundum Comment. materia transiens ex qua aliquid fit, non potest dici elementum, vnde licet ex sanguine generetur caro, tamen sanguis non potest dici elementum, quoniã non permanet, ut pars carnis. Ratione quartæ particulæ nullum corpus determinate speciei, siue naturæ diuisibile .i. solubile in priora corpora diuersarum naturarum potest dici elementum, vnde nulla materia proxima ex qua fit animal, puta caro, ossa, nerui, possunt dici elementum, quoniam diuisibilia sunt in priora corpora diuersarum specierum, puta in aquam, aërem, &c.

Et aduerte, qd dixi indiuisibili specie in aliam speciem, vt denoter negationem diuisionis formalis, non autem quantitatiue, non. n. diuisio in partes quantitatiuas impedit rationem elementi, aliter ignis & aqua non essent elementa. qm cum sint corpora, diuisibilia sunt in partes quantitatiuas. Hæc descriptio elementi, quam B. Th. dicit non conuenire materiæ primæ ex defectu quartæ particulæ, qm non habet aliquam speciem fm se, cum sit in pura potentia, fm Comment. autem maxime conuenit ei, qm non est diuisibilis ab solute in priora diuersa specie. Quæ autem harum opinionu

fit verior, determinauimus in quæst. nostris metaphysicalib.

Quantum ad secundum, aduerte tres modos elemēti, pri-
mus est in vocibus, secundus in naturalibus, tertius in demō-
strationibus. Quantum ad primum literæ sunt elementa
vorum, id est terminorum, componuntur enim ex syllabis
& syllabæ ex literis, & illic est status, quoniam literæ non di-
uiduntur nec componuntur ex prioribus specie diuersis, sed
si diuidantur, diuisio erit in partes consimiles sicut quando
diuiditur aqua in partes aque, omnes enim sunt eiusdem na-
turæ. Similiter quando diuiditur litera, diuiditur secundum
tempora prolationis, prout litera longa habet tempora duo,
breuis autem tantum vnum, omnes vero partes temporis
sunt eiusdem naturæ, quoniam omnes sunt tempus. Non
fit autem præcise talis diuisio in syllabis, quoniam resolu-
biles sunt in literas diuersarum specierum, puta in A, in B, in
C, & c. Quæ sunt diuersarum specierum in genere suo. Quan-
tum ad secundum prima corpora ex quibus naturalia com-
ponuntur, & in quæ ultimo resoluntur, & quæ non resol-
uuntur in priora diuersarum specierum, siue huiusmodi cor-
pora sint tantum vnum vt posuit Diogenes omnia compo-
ni ex aëre tales ex aqua, aliqui autem posuerunt plura, vt Em-
pedocles & de his actum est in primo libro, dicuntur ele-
menta, quoniam omnia diuiduntur in ea vltimate, ipsa au-
tem non diuiduntur in priora diuersarum specierum, & tu
intellige per diuisionem alteratiuam, non autem per solam
quantitatiuam, aliter quolibet homogeneousse elemen-
tum. Indiuisibile est enim quantitatiue in diuersas species
cum partes suæ recipiant prædicationem totius in recto. In-
telligatur ergo de diuisione alteratiua, nam si mixtum ho-
mogeneousse alteretur, resoluetur tandem in terram & a-
quam & c. Quæ sunt diuersarum specierum. Si autem alte-
ratur aqua, ita quod corrumpatur, non resoluetur in priora cor-
pora, sed materia prima remota forma aquæ recipiet for-
mam alterius elementi, vt declaratum est in secundo libro
de generatione. Merito ergo prima corpora naturalia di-
cuntur elementa, non autem aliquod mixtum siue homo-
geneum, siue ætherogeneousse. Quantum ad tertium dicun-
tur elementa, primæ demonstrationes maxime in geome-
triciis

tricijs & vniuersaliter in alijs scientijs, nam primæ demonstrationes factæ ex primis propositionibus sunt elementa omnium sequentium demonstrationum, quæ componuntur ex eis, & resoluuntur in illas, & ille non resoluuntur in priores quoniam est status in primis propositionibus cognitis ex terminis, vt declarauimus in 4 lib. & sunt indemonstrabiles. Primæ autem demonstrationes constant ex tribus terminis tantum, quoniam medium non resoluatur in aliquod prius. Sequentes autem constat ex pluribus, puta secunda ex quatuor, tertia ex quinque, quarta ex sextæ &c. Et vt id pateat sic declaro, si volo demonstrare q̃ omne animatum mouet seipsum deducam sic. Omne habens principium motuum intrinsecum seipsum mouet seipsum. Omne animatum habet principium motuum intrinsecum in seipso, quia habet animam, quæ est principium motus inanimato, ergo omne animatum mouet seipsum. Si autem volo demonstrare q̃ sensitium mouet seipsum deducam sic, & accipiam cōclusionem præcedentem pro principio. Omne animatum mouet seipsum, omne sensitium est animatum ergo &c. Si autem volo probare quod animal mouet seipsum, sic deducā. Omne sensitium mouet seipsum, omne animal est sensitium: ergo &c. Si vltius volo probare q̃ homo mouet seipsum sic deducā, omne animal mouet seipsum, omnis homo est animal, ergo &c. In his demonstrationibus patet q̃ quarta est magis composita continet. n. sex terminos. s. maiorem & minorem extremitatē, & medium quod continet tria media præcedentium demonstrationum, nam animal resoluatur in sensitium, & hoc inanimatū, & hoc in principium intrinsecum motuum quod est anima, & illic est status, merito ergo prima demonstratio dī elementum & subsequentes sunt elementate, & hac de causa cōsueuimus dicere, prima & vniuersalissima theoremata esse elementa in gñe intelligendi, sicut p̃positiones libri de causis, primæ & vniuersalissime p̃positiones Eucl. &c.

Quantum ad tertium principale aduerte, q̃ aliqui extenderūt hoc nomen per similitudinem ad supradicta, ad omne illud quod est vnum siue simplex & indiuisibile, & ad multa vtile. Hinc processerunt antiqui vt aliqui eorum ponerent punctum esse elementum corporis, aliqui posuerūt maxime vniuer

E P I T O M E L I B. V.

vniuersalia, vt ens & vnum esse aliorum elementa, eo quod
 indiuisibilia sunt secundum diffinitionem. cum enim non
 habeant genera superiora, quæ diuidantur per differentias
 oppositas eorum diffinitiones sunt irresolubiles in genus
 & differentias, non sic autem est de generibus subalternis
 nec de speciebus vt patet. Aduerte tamen quòd secundum
 rei veritatem, punctum non potest dici elementum corpo-
 rum, quoniam magnitudo non resoluitur in puncta, nec cõ-
 ponitur ex punctis. Ex consequenti descriptio elementi nõ
 conuenit ei sed magis vniuersalia possunt dici vere elemen-
 ta, quoniam vt declaratum est in 3. lib. in cap. 7. nullum vni-
 uersale est pars componens compositione reali, sed tantum
 consideratione logica: vnde licet sint indiuisibilia secudum
 diffinitionem, ex hoc tamen non habetur quod sint elemen-
 ta proprie, quoniam de ratione sua est, vt sit illud ex quo pri-
 mo aliquid componitur. Si tamen. ratione indiuisibilita-
 tis potest dici aliquid esse elementum, id magis competet
 magis vniuersali, quam minus vniuersali, quoniam minus
 diuisibile est, nam diffinitio minus vniuersalis, puta speciei
 diuiditur in genus & differentiam, non autem diffinitio ge-
 neris generalissimi, cum non habeat genus supra se. Transcẽ-
 dentia autem non sunt vere genera, cum non sint vniuoca,
 ergo &c. Quantum ad quartum principale, aduerte qd cum
 ratio elementi sit esse primum in vnoquoque composito,
 ex quo componitur & in quod vltimate resoluitur, quilibet
 dictorum modorum intantum dicitur elementum, inquan-
 tum participat hoc commune, & quoniam id maxime com-
 petit materiæ primæ, ideo secundum Comment. est elemen-
 tum & est causa aliorum elementorum, cum sit primum sim-
 pliciter, ex quo, & in quod resoluuntur omnia naturalia, &
 est omnino simplex, & secundum se indiuisibilis omnino se-
 cundum formam, & secundum quantitatem, omnem enim
 diuisionem, accipit à forma & à quantitate. quare &c. Hęc
 de tertio capite dicta sint.

C A P V T I I I I.

I N quarto capite assignandi sunt modi quibus dicitur
 hoc

hoc nomen natura. Sed antequam descendamus ad modos naturæ.

Aduerte, quòd natura dupliciter consideratur.

Primo, inquantum est principium motus & quietis præcise, & sic non cadit sub consideratione huius scientiæ, sed philosophiæ naturalis, vt visum est in secundo Physic.

Secundo, inquantum dicitur naturà secundum vnum modum vt patebit de omni substantia, & dicitur de materia & forma, quæ sunt partes entis, & dicitur de causis, est enim causa efficiens quædam natura, & causa materialis, & causa formalis, & vt sic est de consideratione huius scientiæ, nam ea ratione qua considerat de substantia vniuersali, & de materia ac forma inquantum sunt partes entis, & de causis, eadem ratione habet considerare de natura, vt dicitur de omni substantia & de forma & de materia & de causis.

Descendentes igitur ad modos naturæ, primo assignabimus singulos eorum, secundo reducemus omnes ad vnum principalem.

Primo, dicitur natura, generatio nascentium, nascuntur autem propriæ viuientia, vnde eorum natiuitas siue nascentia, solet dici natura quasi nascitura, & tunc apud Græcum physis. i. natura sumpta pro nascitura producit primum. y.

Secundo, dicitur natura illud ex quo primo generatū genitum est siue formatum, & illud primum est formans, & est intrinsecum ipsi formato, & hoc modo cor potest dici natura, qm̄ est primum ex quo formantur membra, & radix in planta, potest dici natura, quoniam est primum ex quo formantur rami, folia, fructus, & semini, & est intrinsecum ipsi formato, quoniam in viuentibus formatum adhæret non solum per contactum, sed etiam per continuationem suo principio, vt patet in embryone, & in ramis plantarum, & per talem continuationem porrigitur virtus formatiua generantis ad formatum & fit sibi intrinseca ratione cuius, principium formans dicitur intrinsecum formato.

Tertio, dicitur natura, illud vnde est motus in quolibet ente mobili & est in eo per se & non secundum accidens, vt anima dicitur natura in ente animato, quoniam est principium motus in eo, inquantum est animatum, & grauitas

est natura in lapide, quoniam est principium motus deorsum in eo inquantum grauis est, & quoniam in quolibet ente naturali, formæ & suæ qualitates siue actiue, siue passiuæ, sunt principia motuum & operationum, ideo hoc tertio modo dicuntur natura, dixi autem & non secundum accidens, aliter si medicus infirmatur & sanatur à seipso, ars medicine existens in eo esset natura, quod non est concedendum, quoniam non inquantum medicus, sed inquantum infirmus sanatur, accidit autem eundem esse medicum, & infirmum.

Quarto, dicitur natura, illud ex quo primo est aut fit aliquid, quod secundum se est in formæ & non potest moueri sua virtute, ut formetur per receptionem formæ, sed necesse est ut moueatur ab aliquo agente cuius actione disponitur ad formam & recipit eam, & remanet saluum, mutatis & abiectis dispositionibus & forma per contrarium. Et hoc modo materia dicitur natura, ut vasorum æreorum, æs, & vasorum ligneorum, lignum. Nam abiecta forma adhuc saluatur æs, & lignum, ideo iudicatur sola materia esse eorum natura. Idem iudicium faciebant antiqui naturales de rebus naturalibus, quoniam existimabant omnes formas esse accidentia, sicut formæ artificialium: unde, qui ponebant tantum unum elementum, ex quo dicebant constare omnia, puta aquam, vel aërem, dicebant illud esse naturam omnium, & non aliud. Idem dicebant qui ponebant plura, ut Empedocles, & decepti sunt omnes, quoniam non cognouerunt nisi generationem accidentalem, & negauerunt aliquid generari simpliciter. Contra quos satis actum est in primo de generatione. Sed aduerte, quod licet omnis materia, tam artificialium, quam naturalium, possit dici natura, tamen materia prima in quolibet genere proprie dicitur natura, puta omnium liquabilium, aqua est natura, est .n. prima eorum materia aqua, quoniam quæ calido liquecunt & frigido indurantur sunt à prædominio aqueo, ut declaratur in 4. Meteor. & omnium inflammabilium natura est aër, aut ignis, & omnium durorum non liquabilium natura est terra.

Quinto, dicitur natura, forma, vel species, per quam res habet esse actu, sicut dixit Empedocles naturam rerum, quæ sunt ex elementis esse compositionem, ex hoc enim, quod per
amici-

amicitiā elementa adinuicem diuersimode componebantur, diuerſe res producebantur, & quoniam arbitrabantur rē per compositionem fieri actū, ideo dicebant compositionē eſſe rei naturam, vniuerſaliter autem conſiderantes q̄ nullo naturalium eſt actū, nec dicitur eſſe niſi habeat formam ſuam & remota forma definit eſſe, vt patet in animalibus quæ per aduentum animæ ſunt actū, & per remotionem deſinunt eſſe, ideo conuenienter dixerunt formam eſſe naturā & quæ ſunt composita ex vtriſque. i. ex materia & forma dicuntur a natura, vel naturalia. Sed aduerte, q̄ non ſolum forma partis dicitur natura, ſed etiam forma reſultans ex vnione formæ & materiæ, quæ ſolet dici forma totius, ut humanitas eſt natura hominis, & equinitas equi. Ratio autem propter quā potest dici natura eſt, quoniam ſicut forma partis eſt principium generationis, ita forma totius eſt terminus generationis, recepta enim forma in materia, conſurgit forma totius & terminatur generatio in vnaquaque ſpecie. Extenſiue autem & per quandam ſimilitudinem, omnis eſſentia & quiditas & ſubſtantia ſolet dici natura, vt natura Dei eſt eſſentia ſua, ſimiliter natura intelligentiæ, natura cœli, natura elementj, & quoniam de omni ſubſtantia ſolet dici, ideo ratione iſtius vniuerſalitatis eſt de conſideratione metaphyſici.

Poſitis modis naturæ reducit eos Ariſt. ad quintum tantum ad principium, in cuius reſpectu verificantur alij modi. dictum eſt enim quòd quinto modo forma partis dicitur natura, quoniam per ipſam res ſit actū, & dicitur naturalis, quando habet formam, & non ante, quoniam ergo forma conſtituit rem naturalem actū & eſt principium actionis & motus in naturalibus, ideo ex parte rei. primo, & principaliter dicitur natura, & materia non dicitur natura niſi quia recipit formam. Et generatio, ſue natiuitas non dicitur natura, niſi quia eſt via ad formam, & principium motus non dicitur natura, niſi quia tale principium eſt forma intrinſeca ſubſtantialis, vel accidentalis conſequens ſubſtantialem. Et non dicitur natura illud ex quo primo genitum formatum eſt, niſi quia in eo primo reſidet virtus formatiua, fluens à forma animati in quantum animatum eſt.

Dictum est enim in 2. lib. de Anima, q̄ seminatiua & formatiua deseruiunt animæ vegetatiuæ. Patet igitur, q̄ natura principaliter dicitur de forma & per prius ex parte rei. Dixi autem ex parte rei, quoniam respectu cognitionis nostræ, quæ pro maiori parte incipit à posteriori & à magis sensato, prius dicitur de generatione viuentium, nam per generationes & operationes & motus deuenimus in cognitionē formæ quæ est principium generationis & operationis & motus. Et quoniam Arist. tradit vt naturalis doctor hanc scientiam modo conuenienti intellectui nostro, ideo incipit à modo naturæ nobis notiori, sed ex parte rei posteriori, reducens autem omnes ad vnum, reduxit ad priorem ex parte rei, vltimum autem in ordine cognitionis nostræ. Hæc de quarto capite dicta sint.

C A P V T V.

IN quinto cap. distinguendum est hoc nomen necessarium cuius consideratio ideo sequitur considerationem causarum, quoniam licet non dicat causam formaliter, tamen modi quibus dicitur, ad diuersum genus causæ reducuntur, & propterea omnis causa dicit quædam necessitatem ad effectum, nam à causa de necessitate sequitur vel est aptus sequi effectus, Arist. igitur.

Primo, assignat modos necessarij.

Secundo, reducit eos ad vnum, cuius participatione alij verificantur.

Tertio, agit de necessario in demonstrationibus.

Primo igitur, dicitur necessarium sine quo non potest animal esse nec viuere, quod licet non sit principalis causa essendi, aut viuendi, tamen est simul cum alio causa, vt respirare, & cibus in animali, nam licet vita fundetur in calido & humido bene temperato, tamen calidum non posset seruari, nisi temperaretur per inspirationem & expirationem, nec humidum radicale, quod est subiectū caloris naturalis posset conseruari nisi per restaurationem factam ex nutrimento, & hæc omnia declarauimus in Paruis naturalibus. Patet igitur, quod sicut calidum naturale, & humidum radicale sunt

sunt materialis causa vitæ, & de necessitate, ita necessaria sunt hæc duo, vt concausa, respirare, & cibus, aliter non saluatur animal.

Secundo, dicitur necessarium, illud sine quo nõ potest homo, aliquod bonum consequi, aut aliquod malum expellere, respectu boni, puta vt quis acquirat pecuniam, necessaria est nauigatio ad eginam. Respectu mali, puta vt quis libere tur à febre necessarium est bibere pharmacum. Et breuiter omne medium, sine quo non potest finis intentus haberi dicitur necessarium, hoc modo.

Tertio, omne violentum. i. omne factum contra inclinationem vel naturalis, vel contra voluntatem in agente à proposito, dicitur necessarium. Omneq. agens faciens violentiam dicitur necessitate, vt proijciens necessitat lapidem ascendere & depopulans ciuitatem, necessitat ciues mendicare, & quoniam talis necessitas est contra voluntatem, ideo est contristatiua & lamentabilis & digna miseratione, & non est culpabilis, nec reprehensibilis. non enim culpamur, nec meremur reprehendi nisi in voluntarijs, vt probatum est in moralibus.

Quarto, dicitur necessarium illud quod non contingit, vel non potest aliter se habere, & hæc est propria ratio necessarij, nam opponitur possibili, siue contingentij, possibile autem est, quod potest aliter esse, ergo necessarium est quod nõ potest aliter esse, oppositum .n. oppositæ sunt rationes. Et aduerte, q, vt inquit Commen. in comm. 6. iste modus est famosior inter omnes, nam cõmuniter loquentes dicimus, hoc est necesse, quia non potest aliter esse.

Positis modis prædictis, reducit Arist. tres præcedentes ad hunc quartum, vt ad principalem, quoniam non verificantur nisi in quantum participant rationem huius quarti modi. nam tertius modus ideo est necessarius, quia violentatus ab aliquo agente faciente impetum & cogente, vel impediente, non potest aliter agere, vel non potest non pati, & secundus modus est necessarius, quia non potest sine tali medio acquiri bonum, puta pecunia vel liberari ab ægritudine: & primus modus est necessarius, quia nõ potest seruari animal in esse, nec viuere nisi respiratione & cibo. patet ergo quod

ratio quarti modi seruatur in omnibus præcedentibus.

Et si quæras in quo differat quartus modus à præcedentibus, dico, quod in quarto est necessitas absoluta, in alijs autem est necessitas conditionata. Absoluta autem dicitur quando nullo modo potest aliter esse, posita siue remota quacunque conditione. Et talis necessitas sumitur à causis intrinsicis, ut à materia & à forma, siue ab ipsa rei essentia, puta necesse est elementatum corrumpi, quia componitur ex contrarijs elementis, necesse est hominem esse risibilem, quia habet animam intellectiuam necesse est intelligentiam esse æternam quia est immaterialis, necesse est Deum esse tantum vnum quia est naturæ omnino infinitæ. Conditionata autem dicitur quando non absolute, sed aliquo supposito, non potest aliter esse, & hæc sumitur à causis intrinsicis, ut à fine, vel ab agente, nam medicina non est mihi necessaria nisi supposito, quod velim sanari, nec cibus est mihi necessarius, nisi supposito quod velim viuere nec necessitor mendicare, vel incarcerari, nisi supposito quod non possim præualere contra violentantem. Patet igitur differentia inter quartum modum & alios, & etiã quomodo omnes isti modi reducuntur ad aliquod genus causæ, propterea post distinctiones nominum signantium, causas conuenienter Philosophus assignauit modos necessarij.

Et quoniam necessarium non solum inuenitur in complexis, sed etiam in incomplexis, aliqua .n. propositio est contingens, ut Socrates currit aliqua necessaria, ut homo est animal, ideo postquam tractauit de necessario complexo, tractat de complexo, ex quo constituitur demonstratio, & intendit tria.

Primo, quod conclusio demonstrationis est necessaria quarto modo.

Secundo, quod præmissæ sunt similiter necessariae.

Tertio, ex omnibus dictis tam de necessario complexo, quàm incomplexo concludit tres conclusiones.

Quantum ad primum, dicit Philosophus demonstratio est necessariorum, id est de conclusione necessaria, quoniam quod demonstratur simpliciter non contingit aliter se habere, aliter demonstratio non faceret scire, nam primo Poster. illud scitur quod non contingit aliter se habere, sed conclusio demon-

demonstrationis est ea quæ demonstratur & scitur, quoniam scientia est habitus conclusionis demonstrare, ergo conclusio demonstrationis est necessaria. Dixi autem quod demonstratur simpliciter, quoniam si demonstratur tantum ad hominem illud non requiritur, quoniam talis demonstratio potest esse de aliquo impossibili concluso ex alio impossibili concesso ab aduersario sicut fecit Arist. in 4. lib. disputans contra negantes primum principium complexum ubi inter cetera conclusit, quod si contradictoria sunt simul vera. ergo non omnia sunt vnum.

Quantum ad secundum probatur, quod oportet præmissas esse necessarias, nam cum se habeant ad conclusionem, sicut causa ad effectum, si possent aliter se habere quo ad veritatem, ergo effectus necessarius produceretur à causa non necessaria quod est impossibile, aliter maior perfectio esset in effectum quàm in causa. Et propterea inquit Cōment. in cōm. 6. Si terminus medius sit de natura possibili, illa res, id est conclusio erit de natura possibili, & terminus medius sit de natura necessaria, illa res erit de natura necessarij, patet igitur quod tam conclusio quàm præmissæ demonstrationis sunt necessariae quarto modo.

Quantum ad tertium, aduerte tres conclusiones, quarum prima est de necessario complexo & incomplexo, secunda & tertia de necessario incomplexo.

Prima cōclusio, necessariorum tam complexorum, quàm incomplexorum quædam habent causam suæ necessitatis quædam non, sed sunt causa alijs. Exemplum de complexis conclusio necessaria habet causam, id est præmissas, nam idcirco homo est risibilis quia est rationalis & triangulus habet tres, quia habet angulum extrinsecum æqualem duobus intrinsecis & ternarius est impar, quia diuiditur per inæqualia. Exemplum de incomplexo, motus cæli est necessarius secundum Philosophum quia non potest desinere, & tamen habet causam, scilicet primum mouens & cælum est necessarium secundum substantiam, & tamen habet causam largientem sibi esse, & motum, ut dicemus in lib. 12. Quædam autem non habent causam, sed sunt causa alijs. Exemplum de complexis, ut prima principia indemonstrabilia defensata in

quinto libro cognita nobis à natura. Exemplum de incomplexis, vt prima causa, quæ est penitus independens habens esse à se, non ordinata ad alterum, à qua omnia entia capiunt esse & veritatem, vt dixit Comment. in lib. 2. cōm. 4.

Secunda conclusio, primum necessarium incomplexum & quod proprie est necessarium secundum omnem conditionem necessitatis, est simplex in substantia sua, nam si est primum habet causam suæ necessitatis, sed potius est causa alijs. Si est proprie & omnino necessarium, nullo modo potest aliter & aliter se habere, sed si non est simplex in substantia posset aliter & aliter se habere, omne enim compositum aliqua mutatione mutabile est, quod autem mutabile est aliter & aliter esse potest, facit enim mutatio distare rem à dispositione priori, cum igitur primum sit omnino necessariū est simplex in substantia. Præterea, non contingit ipsum habere plusquam habeat, nec etiam minus, quod enim plus & minus habet. ideo habet quia non habet à se, sed recipit ab alio, si enim à se haberet perfectissime & in summo haberet, quoniam per essentiam & non per participationem, sed primum quidquid habet, habet à se, & non recipit ab alio, quoniam ipsum largitur omnibus, ergo nec plus nec minus habere potest, ex consequenti est omnino simplex & inuariabilis substantiæ, & conuenienter appellatur primum necessarium, omne enim præter ipsum est ens possibile vel necessariū cum admixtione alicuius gradus possibilitatis.

Tertia conclusio, si aliqua sunt entia sempiterna & immobilia, sunt quidem necessaria, quarto modo, non autem tertio modo, ita quod nihil per vim neque præter naturam est in illis, nam violentum nulli inest, nisi quia ex potentia alicuius agentis extrinseci remouentur à dispositione sua naturali, quod autem sic remouetur, mutatur, quod mutatur immobile non est, si igitur dentur aliqua entia sempiterna & immobilia, nullum violentum inest illis, quæ autem sint huiusmodi entia dicemus in lib. 12. Et tu aduerte quod ex his duabus conclusionibus, patet error quorundam Auer. sequentium, qui dicunt Arist. in toto hoc tex. incipiens ibi. Horum quidem ita quod altera & c. vsque in finem cap. non loqui nisi de necessario complexo. Conditiones enim posi-

tæ in secunda & tertia conclusione manifeste ostendunt op-
positum. Et confirmatur per D. Alber. qui in cap. de necessa-
rio, circa finem, sic inquit. Hæc autem dicta sunt de ordini-
bus causarum inesse sumptarum, ex primo motore, & non
sunt dicta de necessario demonstrationum. Item aduerte q̃
Cōment. in cōm. 6. quia tenet nullum necessarium perma-
nens acquirere esse ab alio exponit hanc tertiam conclusio-
nem, non ad mentem Arist. sed vt sequens dictum suum fun-
damentum falsum, scilicet quod nullum ens simplex æternū
& immobile acquirit esse necessarium ab alio, sed quod id
sit contra mentem Philosophi declarabitur in quæstionibus
nostris super lib. 12. Hæc de quinto capite dicta sint.

SECUNDVS TRACTATVS,

*Eiusdem Chrysostomi Iauelli, super quinto
libro Metaphysicæ.*



IN hoc secundo tractatu iuxta ordinem
positum in principio libri distinguenda
sunt nomina significantia ea quæ sunt
subiectum in hac scientia, & significan-
tia partes eorum, subiectum autem com-
munissimum huius scientiæ, vt dictum
est in quarto libro est ens, & quoniã ens
& vnum sunt idem realiter, potest dici, quod etiam vnum est
subiectum in ea, subiectum vero principale est substantia,
quoniam ipsa est simpliciter ens, accidentia vero in ordine
ad substantiam, primo igitur distinguemus hæc tria, vnum,
ens, substantia, deinde significantia partes vnius, & partes en-
tis, & distinguemus totum tract. in tot cap. quot erunt no-
mina distincta.

CAPVT PRIMVM.

IN primo capite distinguendum est hoc nomen vnum.
Aduerte igitur q̃ cum vnum & ens sint idem, quotu-
plex est ens totuplex est vnum. ens aut prima diuisione
diuiditur

diuiditur in ens reale, & ens rationis. Et ens reale diuiditur prima diuisione, diuiditur in ens per se, & ens per accidens, vt declarauimus in tract. nostro de transcendentibus. Conformeriter Arist. in hoc cap. diuidit vnum diuisione reali & diuisione logica, quæ est diuisio secundum rationem, vnum autem realiter sumptum diuidit in vnum per accidens & in vnũ per se, vnum per accidens diuidit in tres modos, & vnum per se in sex, deinde reducit ad vnum principalem.

Modi vnus per accidens sunt tres.

Primus est, quando prædicatur accidens de subiecto, ut Coriscus est musicus.

Secundus est, quando compositum ex subiecto & accidente, vt Coriscus est Coriscus musicus.

Tertius est, quando accidens prædicatur de accidente, vt musicus est iustus. Differunt autem isti modi, quoniam in primo vnum accedit alteri. scilicet musicus Corisco, in secundo, quoniam prædicatum ratione vnus partis accedit subiecto, licet enim musicus accedat Corisco, non tamen Coriscus accedit Corisco. in tertio, quoniam vtrunque accedit tertio. id est subiecto. Hæc enim non est vera, musicus est iustus, nisi quia idem homo est musicus, & est iustus.

Et aduerte, quod sicut exemplificatum est de subiecto singulari, ita exemplificare possumus de subiecto vniuersali, siue specifico, siue generico, vt homo est musicus, homo est homo musicus, musicus est iustus, quia homini potest in esse musica & iustitia, sed differentia est in hoc, quod prædicatum per accidens verificatur immediate de singulari, primæ. n. substantię principaliter & immediate substant accidentibus. de vniuersali autem non verificatur nisi mediante singulari. Secundæ substantię non substant nisi quia sunt in primis secundum doctrinam Arist. Opposito autem modo fit in prædicatis per se, non. n. verificantur de singulari nisi quia participat naturam vniuersalem, vnde hæc non est vera, Socrates est risibilis, nisi quia homo cui primò & per se, & secundum ipsum conuenit esse risibile prædicatur de Socrate, sed alio modo prædicatur homo de Socrate & risibile, nam homo prædicatur vt species, ex consequenti est prædicatio essentialis, risibile autem prædicatur, vt passio, vel vt habitus &c.

Modi

Modi vnus per se realiter sumpti .i. vt inuenimus in re-
rum naturis sunt sex.

Primus modus, ea quæ sunt continua sunt vnum. Conti-
nuorum autem quædam continuantur per artem, vt tabulæ
visco compaginatæ. Quædam continuantur per naturam,
vt partes animalis vnite per nervos & chordas, horum ta-
men magis proprie continua sunt quæ per naturam, quàm
per artem. Quæ enim per artem per aliquod alterius natu-
ræ copulantur, vt tabulæ clauo, vel visco, lapides cemento,
vnde magis contacta, vel contigua quam continua dici de-
bent. Quæ autem per naturam, si per aliquod medium co-
pulantur illud est eiusdem naturæ cum eis, vt duæ medietates
lineæ copulantur per punctum quod est in eodem gene-
re reductiue cum linea, & membra animalium cōtinuantur
per nervos qui sunt naturæ animatæ sicut ipsa membra.

Præterea quæ continuantur per artem nō dicuntur quid
vnum, non enim duo ligna compaginata visco dicuntur vnū
lignum, quæ autem copulantur per naturam dicuntur quid
vnum, nam duæ medietates lineæ copulatæ ad punctum.

A / dicuntur vna linea. ergo continua per naturam sunt ma-
gis continua, quam continua per artem. Item continuo-
rum per naturam quædam sunt continua solida, sine refle-
xione, vt tibia, quædam sunt continua cum reflexione, vt to-
tum resultans ex tibia & crure quæ faciunt reflexionem in
genu, ex his magis continua sunt quæ sunt sine reflexione,
siue sunt recta, siue curua, nam propriissime continua sunt,
quæ sunt vnus motus .i. in quibus non potest vna pars mo-
ueri quin totum moueatur, id autem videmus verum in con-
tinuis solidis carentibus reflexione, non sic autem est in con-
tinuis habentibus reflexionem, contingit enim moueri ti-
biam, & quiescere crus.

Secundus modus, illa sunt vnum quorum subiectum pro-
ximum, vel vltimum, id est remotum est vnus quantitatis
continue, & vnus formæ, & talia sunt omnia homogenea,
quarum partes recipiunt nomen & diffinitionem totius,
vnde aqua in cyatho est vna hoc modo, & caro, & ner-
uus, & os, quoniam omnis pars carnis est caro. idem dico
de nervo & de osse, per oppositum, si aliqua sint continua
secundum

EPI TOME LIB. V.

secundum quantitatem & sint diuersarum formarum non sunt vnum nisi primo modo, vnde baculus cuius vna pars est sicca, & alia viua non est vnum hoc secundo modo, sed tam primo modo. Dixi autem quorum subiectum proximum, vt comparando omnes partes aquæ in cyatho ad formam aqua, & omnes partes vini ad formam vini. Dixi vero subiectum vltimum, vt comparando omnia liquida non ad proprias formas, sed ad aquam, quæ videtur esse communis materia eorum, vnde omnia liquida possunt dici vnum hoc modo, quia conueniunt in vno subiecto quod est vnus formæ, id est in aquam, minus tamen sunt vnum quam ea quorum subiectum est vnus formæ, & est subiectum proximum, illa enim ad proximas formas comparata non sunt vnum, ista autem cum cōueniant in forma specifica sunt vere vnū.

Tertius modus, illa sunt vnum quæ conueniunt in genere propinquo vel remoto diuiso in oppositis differentijs, vt homo, capra, leo, sunt vnum in animali, quia conueniunt in sensitiuo quod est constitutiuum animalis, similiter sunt vnum in animato, quod est genus remotum & superius. Sed aduerte, quod alio modo verificatur esse vnum in genere propinquo, & alio modo in genere remoto, nam genus remotum prædicatur de speciebus vltimis cum additione vnitatis & in recto, vt Isocheles & Scalenon sunt vna figura, continentur enim sub vna differentia figuræ scilicet constitui tribus lineis rectis conuenientibus in tribus angulis. Genus autem proximum cum descendat in species per diuersas differentias, non potest prædicari de eis cum additione vnitatis, nisi in obliquo, vnde hæc est falsa. Homo & leo sunt vnum animal, & hæc est vera, homo & leo sunt vnum in animali, similiter hæc est falsa, Isocheles & Scalenon sunt vnus triangulus sunt tantum vnum in triangulo, quia conueniunt in ratione trianguli, licet non eadem differentia. Item aduerte, quod iste modus est similis modo quo aliqua dicuntur esse vnum in materia, nam sicut quæ sunt vnum materia distinguuntur proprijs formis, sic quæ sunt vnum genere distinguuntur proprijs formis differentijs, præterea, licet genus non sit materia quia prædicatur in recto de eo cuius est genus, tamen sumitur ab eo quod est materiale in re. illud autem

autem est quod est determinabile per differentias sicut materia est determinabilis per formam, unde sensitivum comparatur ad rationale sicut materia ad formam & propterea in animali genus sumitur à sensitivo, & differentia à rationali.

Quartus modus, illa sunt vnum quorum est vna diffinitio indicans quid est esse rei, ex consequenti, eorum diffinitio est indivisibilis non quin diuidatur in genus & differentiam, hoc est enim commune omni diffinitioni, sed dicitur indivisibilis, quia diffinitio vnius non distinguitur à diffinitione alterius, sicut sunt omnia synonyma. Sed adverte quod id contingit dupliciter. Primo, quorum est vna diffinitio propria & totalis, ut si homo & simia convenirent in hoc quod est esse rationale animal essent omnino vnum quarto modo. Secundo, quorum est convenientia in ratione generica, non autem in ratione propria, ut homo & leo dicuntur convenire in diffinitione animalis, non autem in rationibus proprijs, & hæc non simpliciter dicuntur vnum quarto modo, sed secundum quid similiter augmentum & diminutio dicuntur vnum secundum quid hoc quarto modo, quia conveniunt in ratione motus facti in quantitate, similiter omnes species superficiiei dicuntur hoc modo vnum secundum quid, quia conveniunt in ratione superficiiei.

Quintus modus, perfectior & verior & famosior illa sunt vnum, quorum intelligentia est indivisibilis, id est quorum natura conceptus non componitur ex multis, sed est in se simplex, ut in quantitate continua punctus in quantitate discreta unitas, in genere substantiæ, substantia immaterialis, & potissime prima causa, in qua est summa simplicitas & unitissima unitas, & in latitudine entium quæ sunt propinquiora primæ causæ sunt magis vnum hoc quinto modo, & ea quæ sunt vnum hoc modo, sunt magis vnum quam quæ sunt vnum modis præcedentibus.

Sextus modus, aliqua dicuntur vnum non quia continua nec quia habent partes requisitas, sed ultra continuitatem, & totalitatem partium habent debitam speciem, id est formam, non sicut homogenea, sed consurgentem ex debita dispositione partiū, puta in artificiatis dicimus vnum calceum, vel

EPI TOM B LIB. V.

vel vnā vellem, quando habet partes requisitas & adinuicē ordinatas, sicut figura calcei & vestis, si autem partes nō sunt debite ordinate non erit calceus, nec vnus calceus, vnitas .n. supponit esse. Et aduerte, q̄ hic modus non sumitur ab indiuisiōe, sed à totalitate & perfectione, & propter hoc linea sphaerica est maxime vna, quoniam non solum est continua, sed perfecta, quoniam sibi non potest fieri additio ex coincidentia principij & finis. Positis modis vnus per se sumptis realiter reducit quinque ad vnum, qui est, q̄ omne vnū tantum vnum, in quantum non habent diuisionem vt ea dicuntur vnum in homine, quæ sunt indiuisa & indifferentia in diffinitione hominis, sicut indiuidua speciei humanæ, & ea dicuntur vnum in animali quæ conueniunt in ratione animalis, vnde quinque modi prædicti in tantum diuidunt vnum in quantum diuersimode dicunt in diuisionem, vnde primus modus dicit indiuisiōem in quantitate continua: secundus in forma: tertius, in materia, & in genere quod habet similitudinem materiæ: quartus, in diffinitione: quintus, in intelligentia & in substantia. dixi notanter quinque, quoniam sextus potius sumitur à perfectione, quàm ab indiuisiōe, vt dictum est. Isti sunt principales modi, post quos assignat Arist. quosdam secundarios, quoniam pro rei veritate sunt plura, vt plures trahētes nauem dicunt vnum, quia communicant in vna actione, & ciuitas dicitur vna, quia ciues communicant in vno regimine, sub quo regulantur, aut quia habent vnum putā agrum, aut quia respiciunt vnum, sicut exercitus ducem. Posita diuisione vnus per se & realiter sumpti assignandi sunt modi secundum considerationem logicam.

Aduerte igitur quatuor modos .s. vnum numero, vnum specie, vnum genere, vnum analogia. Illa sunt vnum numero quorum est vna materia signata, quæ est principium singularitatis, vt determinabimus in q. nostris, vnde synonyma sicut M. Tullius sunt proprie vnum numero. Illa sunt vnum specie specialissima quorum est vna diffinitio cōstans ex genere & differentia specifica, & quoniam differentia sumitur à forma, quæ sunt vnum specie communicant in vna forma specifica, vt omnis homo in anima intellectiua & in humanitate,

tate, quæ est forma totius. Illa sunt vnum genere quæ conueniunt in vna figura prædicationis. i. in vno modo prædicandi, & quoniam prædicamenta distinguuntur secundum diuersos modos prædicandi, vt dicemus in cap. seq. ideo quæ sunt vnius prædicamenti sunt vnum genere. Et aduerte, q̃ hic non facit mentionem de genere subalterno, quoniam intendit assignare modos vnius secundum logicam considerationem qui verificantur absolute, vnde sicut absolute sunt vnum specie, quæ conueniunt in specialissimo, quoniam ita est species, q̃ non est genus, ita absolute sunt vnum genere quæ conueniunt in genere generalissimo quoniam ita est genus quod non species, quæ autem conueniunt in genere subalterno. possunt dici vnum specie & vnum genere, quoniam subalternum diuersa habitudine est species & genus, & ideo non possunt dici absolute vnum genere, nec vnum specie. Illa sunt vnum analogia, quæcunque se habent sicut aliud ad aliud, vt tranquillitas in mari & serenitas in aëre sunt vnum analogia, quoniam sicut quies in aqua facit tranquillitatem in mari, sic quies in aëre facit serenitatem in aëre. De modis autem analogiæ quomodo .s. aliqua est diuersorum ad diuersa aliqua diuersorum ad vnum, aliqua vnius ad alterum, determinabimus in q. nostris agētes de ente, an sit vniuocum, vel analogum, & quomodo substantia, & accidens analogantur in ente. Inter hos quatuor modos talis datur ordo, q̃ vnum numero est vnum specie, sed non conuertitur, & tu intellige per se. nam si in specie non sit nisi vnum indiuiduum, vt in abstractis, tunc vnum specie est vnum indiuiduum, sed hoc accidit speciei, vt inquit Comment. in cōm. 12. Species enim vt species est prædicabilis de pluribus, sed singulare vt singulare tantum de vno, & quæ sunt vnum specie, sunt vnum genere, & non conuertitur, quoniam natura generica partitur oppositis differentiis, quæ impossibile est conuenire in vna specie, cum sint contrariæ, & quæ sunt vnum genere sunt vnum proportionem, & non conuertitur, quoniam substantia & accidens sunt vnum proportionem, dicit enim accidens habitudinem ad substantiam, & tamen non sunt vnum genere, quoniam non habent conuenientiam nisi in ente quod non est genus, vt dictum est in 3. libro. Sed ad-

uerte

uerte quoniam non ita clarum est quęcunque sunt vnum genere esse vnum proportionē, ideo super hoc inuenio duas opin. vna est Commen. in comm. 12. qui dicit id verificari, quoniam æqualitas quam sumit pro proportionē, est aliquod genus, sed id non est verum, quoniam si proportio esset genus aliquod, quęcunque conueniunt in proportionē conuenirent in genere, ex consequenti cum substantia & accidens conueniunt in ente, vt proportionata & analogata conuenirent in genere, quod est manifeste falsum, quoniam supra, generalissimum non est genus, alia est D. Alber. in 5. Metaph. cap. 9. qui inquit, ex omni communitate naturę sequitur communitas proportionis & non conuertitur. Cū enim dico, Socrates & Plato sunt homo vel animal, id est cōmunicant in homine vel animali, ex illa communitate relinquitur q̃ Socrates & Plato sunt supposita eiusdem speciei vel eiusdem generis, conueniunt ergo Socrates & Plato in hoc qui supposita sunt, & communitas supposita est communitas proportionis, quia est communitas vnius habitudinis duorum vel plurium inferiorum ad vnā naturā communem, verum est ergo q̃ quęcunque sunt, sunt vnum genere, sunt vnum proportionē, & non conuertitur. Hic terminatur consideratio modorum vnius, & qm̃ vnum & multa opponuntur ex modis vnius. manifestantur etiam modi multorum, vnde aliqua sunt multa, quia non continua, & aliqua, quia sunt diuersarum formarum, & aliqua, quia sunt diuersorum generum, & aliqua, quia non sunt diuersarum diffinitionum, & aliqua, quia sunt simplicis, sed diuisibilis substantię, sicut omnia corporea cōposita ex materia & forma. Tu tñ aduerte q̃ Arist. non assignat modum multorum correspondentem modo vnius, qm̃ ex hoc q̃ substantia rei corporeę est diuisibilis, non sequitur q̃ sit multa, nisi virtualiter. si autem diuidatur, fiet multa simpliciter Et hæc dicta sint pro primo cap. De proprietate vero vnius. scilicet mensuram, dicemus in 10. lib. ideo hic ptrāseo, ne fiat inutilis repetitio.

C A P V T I I.

IN secundo cap. agendum enim est de modis entis, & quoniam

quoniam entium quoddam est per se, vt homo, quoddam per accidens, vt homo musicus. Primo distinguemus ens per accidens in modis suis. Deinde ens per se, de quo proprie habetur scientia. Modi entis per accidens sunt tres.

Primus, quando accidens prædicatur de accidente.

Secundus, quando accidens prædicatur de subiecto.

Tertius, quando subiectum prædicatur de accidente, & isti modi diuersa ratione verificantur.

Nam primus verificatur, quia duo accidentia insunt vni subiecto, vt musicum & album inest homini, ratione cuius vnum accidens in concreto prædicatur de alio accidente, sensus est enim, illud cui inest musicum, inest etiam album.

Secundus, autem verificatur, quia prædicatum inest subiecto, puta musicum inest homini.

Tertius, verificatur, quia prædicatum est illud cui inest subiectum, vt musicus est homo, sensus est enim, quod homo est illud cui inest musicum, & ideo prædicatur de musico. Et aduerte quod ens per accidens se habet, vt causa per accidens, nam sicut fit causa per accidens, quia aliquid accidit causæ per se, puta musicum accidit ædificatori, ita fit ens per accidens, quia accidens accidit subiecto, quod est ens per se. Quid autem sit ens per se, & ens per accidens, declarauimus in tractatu de transcend.

Modi entis per se tripliciter assignantur.

Primo, vt habet esse in rerum natura.

Secundo, vt habet esse in anima.

Tercio, vt diuiditur per potentiam & actum.

Quantum ad primum, aduerte modi entis per se vt habet esse in rerum natura, tot sunt quot prædicamenta. Sumuntur enim prædicamenta à modis prædicandi, & modi prædicandi fundantur in modis essendi, aliter essent vana. Prædicamenta autem sunt decem, vt communiter concessum est in via peripatetica.

Modi igitur entis per se sunt decem, id est modus substantiæ, modus quantitatis, modus qualitatis. De quorum sufficiëntia vide B. Th. in expositione huius tex. & in 3. lib. Phys. super text. 22. Quod autem prædicamenta distinguantur, per diuersos modos prædicandi sumptos à modis essendi,

determinabimus in q. nostris Metaph. p. 137.

Quantum ad secundum, dicit Philosophus q. ens non solum significat id quod habet esse extra animam, sed etiam significat compositionem factam per intellectum inter prædicatum & subiectum, & dicitur ens verum, verum est illud quod ita est vel non est, sicut apprehenditur & enunciatur, per oppositum autem falsum est q. aliter se habet q. apprehenditur & enunciatur. nam quia Socrates est musicus, hæc est vera, Socrates est musicus, & negatiua est falsa, & quoniam diameter non commensuratur corde, affirmatiua est falsa, & negatiua est vera. Et aduerte q. ens in anima consequitur ens extra animam. nam cognitio nostra causatur à rei natura, ex consequenti, veritas quæ est in intellectu pendet à re, loquendo de intellectu speculatiuo, & verum in propositione fundatur in re, quoniam ab eo quod res est vel non est, dicitur oratio vera vel falsa. Et iterum aduerte quod iste modus entis dicitur ens rationis, de quo diffuse pertractauimus in tract. de transcend. Et iterum loquimur de eo in lib. 6. Item aduerte quod ens vt significat rei essentiam est prædicatum substantiale, vt Socr. est ens, vt autem significat ens verum expressum in propositione per copulam verbalem est prædicatum accidentale, quoniam cum res non pendeat à nostro intellectu, nec à scientia nostra accidit rei quod aliquid affirmetur vel negetur de ea intellectu vel voce. nam remoto intellectu componente vel diuidente adhuc res est talis in se.

Quantum ad tertium, dicit Philosophus quod ens est dicibile actu & est dicibile potentia, id est aliquod ens potest dici esse actu, & aliquod in potentia, & hæc distinctio circumdat omne prædicatum accidentium. nam in puero quantitas cubitalis est in actu, & bicubitalis in potentia. in aqua calida frigiditas est in potentia, & in glacie est actu, & sic discurre in alijs prædicamentis accidentium, circumdat etiam entia quæ sunt in anima, ut species intelligibilis actus & conceptus, horum enim quædam sunt actu, quædam possunt esse, & qui habent scientiam aliquando est utens ea actu, aliquando potest uti, & circumdant prædicamentum substantiæ, aliqua enim iam actu est, aliqua potest esse, ut rosa in hyeme, &

imago Mercurij aliquando est actu in lapide, aliquando in potentia, similiter medietas lineæ post diuisionem totius lineæ est actu, ante diuisionem est in potentia, hæc tamen exemplæ ponuntur in prædicamento substantiæ secundum opinio. antiquorum, qui dicebant metaphysicam esse substantiam rerum, & reprobabuntur in sequentibus. Quid autem sit ens actu & ens in potentia, & quomodo differant, & quid sit prius dicemus in libro 9. Hæc de secundo cap. dicta sint.

C A P V T I I I.

IN tertio cap. distinguendum est hoc nomen, substantia, & Arist. quidem assignat quatuor modos, incipiens à nobis notissimo, & ab omnibus confessio, ex quibus tres sunt veri, quartus autem est secundum opin. antiquorum, & non verus, ut declarabitur deinde reducit omnes ad duos. Primus, & famosissimus est, quod substantia dicitur de primis corporibus simplicibus, quæ dicuntur elementa, & sunt prima fundamenta, ex quibus constant omnia naturalia composita, ex consequenti dicitur substantia de omnibus corporibus compositis tam homogeneis quàm ætherogeneis, & de animalibus, & de eorum partibus materialibus, ut de carne, osse, & neruo, hæc autem omnia dicuntur substantia qui non dicuntur de subiecto, id est de inferiori, quia sunt indiuidue & particulares substantiæ, sed alia dicuntur de eis. Et aduerte quod Arist. breuitati studens in hoc quod dicit, sed alia dicuntur de eis innuit, inquit Comment. in comm. 15. quod hic sermo continet primas & secundas substantias, & hæc est diuisio qua posuit in prædicamentis. Item aduerte quod in hoc primo modo etiam subintelligitur contineri materia prima. nam quod substantiæ indiuiduæ non dicuntur de subiecto, sed sint penitus incommunicabiles, hoc habent à materia prima, per quàm indiuiduantur secundum viam nostram. ergo materia prima reductiue continetur sub hoc primo modo. dicitur igitur substantia de materia prima & de omnibus corporibus naturalibus particularibus, tam simplicibus quàm compositis, tam animatis quàm inanimatis,

EPI TOM E LIB. V.

& de demonibus, id est de idolis, ut alia litera habet, quorum materia est corpus naturale, siue lignum, siue metallum, & hæc sunt prima substantia descripta in prædicamentis, quæ non dicitur de subiecto, nec est in subiecto, dicitur ex consequenti de secundis substantijs, quoniam dicuntur de primis prædicatione quid.

Secundus est, quod substantia dicitur de eo quod est causa intrinseca existendi, id est quod sunt actu substantiæ, quæ non dicuntur de subiecto, & intendit quod illud per quod indiuidua substantia constituitur actu sit substantia, hoc autem non est materia, quoniam potentia non dat esse, sed est forma quoniam cum sit actus constituit in actu cuius est forma, & exemplificat de anima in animali, de qua ut declaratum est in 2. de Anima constat quod sui præsentia existit animal, & sui remotione definit esse animal, quod non est ita manifestum in alijs naturalibus, licet ex parte rei idem sit dicendum. nam sicut non est animal actu sine anima, sic nec ignis, nec lapis, nec caro, & sic de alijs sine formis suis. dicitur igitur secundo modo substantia forma per quam naturalia existunt actu.

Tertius est, quod substantia dicitur de quo quid est, id est de quiditate & essentia cuiuslibet rei, & hoc est significatum diffinitionis. nam diffinitio hominis non significat solam materiam, aut solam formam, aliter non prædicaretur in recto de diffinitio, sed significat naturam resultantem ex partibus, quæ dicitur essentia & quiditas & substantia hoc secundo modo, unde esse animal rationale est substantia hoc tertio modo. Et aduerte, quod hic modus potest applicari tantum prædicamento substantiæ, & sic significatum cuiuscunque diffinitionis date de substantia erit substantia hoc tertio modo. potest etiam applicari cuilibet prædicamento tam substantiæ quam accidentium. nam & accidentia habent essentias & quiditates suas, & sic substantia dicitur de significato diffinitionis tam substantiæ quam accidentis, unde Cōment. in cōment. 15. exponens hunc modum inquit. Dicitur substantia de illo quod datur ad interrogationem factam per quid in vnaquaque rerū, & hæc est substantia cuiuslibet rei, & eodem modo Arist. in antepædicamentis accepit substantiam, cum dicit, vniuoca sunt, quorum nomen est vnum, & ratio substantiæ

tiæ est eadem, constat autem q̄ in accidentibus & in substantijs dantur æquiuoca & vniuoca, essentia ergo & quiditas cuiuslibet rei potest dici substantia hoc tertio modo.

Quartus modus secundum antiquos est, q̄ substantia dicitur de terminis corporum naturalium, termini autem sunt punctus, linea, superficies, vnitas, numerus, & fundamentum eorum fuit; quoniam opinabantur illud esse rei substantiã, quo remoto natura rei remouetur, & quoniam viderūt non posse constare rei sensibilis naturam sine his dimensionibus neque sine vnitatem vel numero, quoniam omne ens aut vnũ, aut multa est, ideo arbitrati sunt talia esse rei substantiam, sed hic modus non est verus, nec ratio sua cogit, non enim necesse est omne inseparabile à re esse substantiam rei, sed sufficit quod consequatur rei substantiam, vt proprietas eius, aliter calor in igne, humiditas in aqua, grauitas in lapide essent substantia, quod constat esse falsum, quoniam quod est substantia in nullo est accidens. constat autem calorem & humiditatem in manu esse accidens, ergo in nullo sunt substantia, & iste error prouenit eis, quoniam non pertingebant ad rerum cognitionem, nisi vt subiacent sensui. Item de vnitatem & numero errauerunt, quoniam non distinguebant inter vnum numerale & vnum transcendens. Hæc tamen opin. diffuse reprobabitur in lib. 7. & in 10.

Positis hic quatuor modis reducit eos ad duos, quorum primus est, quod substantia dicitur vltimum subiectum, id est substantia prima quæ per se & vltimate, id est non mediã re alio substat accidentibus, ideo non dicitur de inferiori, & est hoc aliquid, & est distincta ab omni alio, ex consequenti est separabilis à quolibet alio indiuiduo, vt Socr. cum sit vnum numero, & in his conditionibus differt substantia prima à substantia secunda, vt patet.

Secundus modus est, quod substantia dicitur species & forma rei, & per speciem intellige essentiam vel quiditatem per formam intellige formam partis qua res constituitur actu, & ad hos duos modos reducuntur omnes alij, præter quartum, qui est falsus. nam ad primum reducuntur omnes substantiæ singulares & partes eorum materiales; & materia prima, quæ veræ est vltimum subiectum, ad secundum

non potest apponi signum vniuersale; cum dicatur de inferiori. reducuntur omnes formæ reducetes materiam in potentia ad esse actû, & sunt termini generationis substantialis. Idem reducuntur omnes essentia & quiditates, tam materiales quàm abstractæ à materia, vnde & Deus & intelligentia sub hoc secundo modo continentur, & omne quod significatur per speciem aut genus, nam cum species prædicatur de indiuiduis, & genus de speciebus, in quid, tã in prædicamento substantia quàm in prædicamentis accidentium significant essentiam eorum de quibus prædicatur. Hæc de modis substantia dicta sint.

CAPVT IIII.

Distinctis nominibus significatibus subiectum huius scientia, incipiemus distinguere nomina significantia partes ipsius subiecti, & primo, ea quæ signant partes vnius, deinde ea quæ signant partes entis. Partes quidẽ vnius sunt, idem, simile, æquale. Incipientes igitur ab hoc nomine idem, aduerte, quod distinguitur eo modo quo & vnum, scilicet in idem per accidens, & in idem per se. Modi identitatis per accidens sunt quinque.

Primus est, quando prædicatur accidens de accidente, vt album est musicum, nam albedo & musica dicuntur per accidens idem, quia in sunt eidem subiecto.

Secundus est, quando accidens prædicatur de subiecto.

Tertius est, econtrario, tunc enim est identitas per accidens, quia vnum inest altero, & non per se, qm contingit inuenire vnum sine altero, puta hominem sine albedine.

Quartus est, quando simplex prædicatum prædicatur de composito subiecto, vt albus homo est albus.

Quintus est econtrario, vt albus est albus homo. Et aduerte q̃ in his modis nunquam apponitur signum vniuersale, quoniam cum prædicata per accidens non conueniant naturæ vniuersali secundum se, sed tantum ratione singularium, hæc esset falsa, omnis homo est albus, vel econtrario, & ideo subiectum propositionum accidentalium debet esse particulare, vel indefinitum, vel singulare, singulari autem

non

non potest apponi signum vniuersale, cum dicatur de inferiori.

Modi identitatis per se tot sunt, quot modi vnus per se. nam cum identitas sit vnitas vel vnio, pari modo diuidetur. Quot autem sint modi vnus per se, vide in cap. de vno. Sed aduerte, quod quæcunque sint idem per se, vel sunt idem, quia licet sint plura secundum proprias naturas, tamen in aliquo vno conueniunt, ratione cuius dicuntur idem, puta quæ distinguuntur formis conueniunt in materia siue proxima, vt duo vasa terrea, siue remota, vt omnia metalla in aqua, & quæ distinguuntur numero sunt idem specie, & distincta specie idem genere &c. vel sunt idem quia licet sint eadem res, tamen intellectus apprehendit ea vt plura, puta licet in linea sit idem punctus qui est principium & finis respectu partis præcedentis & sequentis, tamen intellectus ponit aliquam pluralitatem secundum conceptum, quoniam alium conceptum format de puncto, vt est principium, & alium, vt est finis propter quod dicitur punctus idem re, & distinctus secundum rationem, eodem modo contingit quando intellectus comparat eandem rem ad seipsam, dicendo, idem est eidem idem, cum enim comparatio sit relatio, & relatio sit inter duo extrema, necesse est quod quando idem comparatur sibiipso, distinguatur à seipso, non re, sed per opus intellectus collatiui, aliter inter idem & idem non esset relatio identitatis. Tu tamen aduerte, quod hæc relatio quando idem numero comparatur sibiipso, est relatio rationis, quoniam non sunt extrema distincta realiter, sed tantum per opus intellectus, quando autem indiuidua comparantur adinuicem in natura specifica (vt cum dicitur Socrates & Plato sunt idem in homine) tunc hæc relatio identitatis est relatio realis, quoniam extrema distincta sunt realiter, & fundamentum est reale. Idem dico quando comparantur duæ species ad naturam generis, sed de natura relationis loquemur in cap. ad aliquid, & in q. nostris. Et quoniam sicut vnum & plura opponuntur sic idem & diuersum nam idem est pars vnus, & diuersum est pars pluralitatis; quæ autem opponuntur debent successiue pertractari, cum sit eadē disciplina oppositorum. igitur post modos identitatis

assignandi sunt modi diuersitatis, & quoniam sub diuerso continentur differentia & opposita & diuersa specie. nam nihil à seipso differt; nec sibiipso opponitur, nec est à seipso specie diuersum; ideo post diuersum agendum est de differentiis, de oppositis, de specie diuersis.

Quantum ad diuersum aduerte, quod cum opponatur eidem, & quot modis dicitur vnum oppositorum tot modis & reliquum, ideo quot sunt modi identitatis siue per accidens, siue per se tot modi diuersitatis possunt assignari. Tres tamen famosiores & magis vtitati assignantur ab Arist.

Primo, ea sunt diuersa quorum sunt plures species, vt homo & equus. Distinguuntur enim formis specificis & differentiis specificis, & hæc dicitur diuersitas realis formalis.

Secundo, ea sunt diuersa, quæ licet sint in eadem specie, tamen distinguuntur numero, vt duo individua eiusdem speciei. Distinguuntur enim materia & quantitate quæ sunt principia singularitatis, & hæc dicitur diuersitas realis materialis, non autem formalis, quoniam sub specialissimo non dantur plures gradus formales, vnde licet Socrates & Plato distinguantur suis proprijs formis, non tamen formaliter, sed materialiter, quoniam & suæ propriæ formæ distinguuntur ex materia in qua recipiuntur.

Tertio, ea dicuntur diuersa quæ licet sint idem re, vel subiecto, tamen eorum est diuersa ratio siue definitio, & dicuntur diuersa secundum rationem formalem. Exemplum primi, Actio & passio licet sint vnus motus, tamen sunt diuersa secundum rationem formalem. Exemplum secundi, Homo & mulicum licet sint idem subiecto, tamen alia est ratio hominis, & alia mulici. Et aduerte, quod diuersitas primi modi est maior, & secundi est minor, & tertij adhuc est minor, vt patet.

Quantum ad differentiam ponit Arist. duos modos, quorum vnus est communiter dictus, & alius proprie. Communiter igitur differentia sunt quæ in genere sunt diuerso, & in nullo genere cōueniunt, nec etiam generalissimo, vt linea, & albedo quæ in nullo vno generalissimo cōueniunt, & hoc modo differens est idem quod diuersum. nam diuersa proprie sunt quæ in nullo cōueniunt, sed sunt distincta

seiphs,

seipſis, vt materia prima, & Deus, & duæ vltimæ differentiæ, nam ſi omnes differentiæ aliquibus differentijs differrent, eſſet in eis proceſſus in infinitum. Proprie vero differentiæ ſunt quæ licet in aliquo conueniant, tamen vnum non eſt aliud, illud autem in quo conueniunt poteſt eſſe idem ſuppoſitum, vt Socrates ſedens differt à ſe non ſedente, licet ſedens & non ſedens conueniant in ſubiecto ſiue ſuppoſito. Item poteſt eſſe ſpecies, vt licet Socrates & Plato ſint diſtincta indiuidua, tamen conueniunt in homine. Item poteſt eſſe genus, vt licet homo & aſinus ſint diſtinctæ ſpecies, tamen conueniunt in animali. Item poteſt aliquod proportionale ſiue analogum, vt licet ſubſtantia & quantitas ſint diſtincta, tamen conueniunt in ente. Hæc igitur ſunt proprie differentiæ, & hæc diſtinguuntur à proprie diuerſis, quoniam ratio eorum ſtat in hoc, quòd cum ſint diſtincta in nullo conueniunt. Ratio autem proprie differentium ſtat in hoc, quod cum in aliquo conueniant, tamen ſunt abinuicem diſtincta. Et ſi quæras quæ ſint propriiſſime differentiæ. Dico quòd ſunt duæ ſpecies contrariæ conuenientes in vno genere diuiſo per differentiæ contrarias, & duæ ſpecies caloris, vel ſaporis, vel ſaltem ſint duæ ſpecies non contrariæ conuenientes in vno genere diuiſo per differentiæ contrarias, ut homo & aſinus, licet enim ſpecies ſubſtantiæ non ſint contrariæ, tamen conſtituuntur differentijs contrarijs. Omne enim genus diuiditur per differentiæ cōtrarias, vt dicemus in lib. 10. Ideo autem dicuntur propriiſſime differentiæ, quoniam differunt ſubſtancialiter & formaliter. Defectu primi non differunt propriiſſime, Socrates ſedens & Socrates nō ſedens. Defectu ſecundi non differunt propriiſſime duo in diuidua eiſdem ſpeciei, quoniam inter ea tantum eſt diſtinctio materialis, vt dictum eſt ſupra. Item aduerte quod cum diuerſum ſe habeat in pluſquam differens, non ſequitur, quod ſi aliqua ſint non differentia quòd ſint idem, nam ſtat quod ſint diuerſa, quia ſeipſis diſtincta, & tamen non ſunt differentia, quia in nullo conueniunt. Hinc patet error Alexandri Græci, qui vt refert D. Alber. in hoc quinto libro tractatu ſecundo capite ſeptimo, dixit materiam primam & noym, id eſt mentem, & Deum eſſe idem, quoniam cum in nullo conueniant

conueniant (sunt enim simplicissima) non differunt, ergo sunt idem, constat autem, quod licet non differant, tamen sunt diuersa, ideo non sunt idem, secus autem si nec diuersa, nec differentia essent.

Quantum ad opposita assignat Arist. quatuor genera oppositionis, quæ sunt simplicissima. scilicet oppositio contraria, contradictoria, relatiua, & priuatiua, quarum sufficientia stat in hoc, omne quod opponitur alteri, aut opponitur, ratione dependentiæ, & sic est oppositio relatiua, nam vnum relatiuum necessario sequitur ad aliud, vt filius ad patrem, seruus ad dominum, passiuum ad actiuum &c. aut opponitur ratione remotionis, quia. scilicet. vnum remouet aliud, quæ remotio tripliciter potest fieri, nam si vnum totaliter remouet reliquum nihil relinquens est oppositio contradictoria, alterum enim contradiatorium est non ens, si vero remouet formam & relinquit subiectum aptum habere formam, sic est oppositio priuatiua: priuatio enim est negatio in subiecto apto nato, vt dicemus infra, si autem remouet formam & relinquit subiectum quod ex natura sua est receptiuum eius, & relinquit identitatem in genere, sic est oppositio contraria, nam licet albedo remoueat nigredinem a superficie, non tamen destruit superficiem eius receptiuam, nec destruit colorem in quo conueniunt quatuor igitur sint genera oppositionum.

Sed aduerte, quod Arist. hic non prosequitur de contradictoria, quoniam satis de ea actum est in lib. 4. vbi defensauimus primum principium contra negantes, nec de relatiua, quoniam in hoc 5. lib. formabitur cap. de ad aliquid, nec de priuatiua, quoniam de priuatione in hoc libro formabitur cap. possumus tamen dicere, quod cum in omni contrarietate seruetur ratio priuationis & habitus, se habet enim vnum vt perfectum, & alterum vt imperfectum, vt dicemus in 10. lib. Arist. prosequens de contrarietate agit simul, & virtualiter de oppositione priuatiua. Innitens igitur prosequi de modis contrarietatis, prius dat duos modos cognoscendi opposito in communi, siue contradictoriæ, siue contrariæ, siue priuatiuæ &c.

Primus modus est, quæcunque se habent vt terminus a quo

quo, & terminus ad quem in mutatione sunt opposita contradictoria, vt in generatione substantiali, & similiter in corruptione, vel contraria, aut priuatione, vt in motu locali, & in augmento & decremento, & in alteratione, probatum est enim in 1. phys. tex. 43. omnem motum esse inter terminos oppositos, non possunt autem esse oppositi relatiue, quoniam in 5. phys. tex. 10. non est motus in ad aliquid.

Secundus modus est, quando aliqua sunt apta inesse eidem susceptibili, & non se compatiuntur in eodem, sicut duo extremi colores & duo medij. nam quia album & nigrum non se compatiuntur in eadem superficie, neque viride & rubeum quæ componuntur ex extremis, ut dicemus in 10. libro.

Positis his duobus modis ad cognoscendum aliqua esse opposita in communi, consequenter assignat modos contrarietatis, & sunt decem.

Primus est, ea dicuntur contraria quæ differunt genere, & non possunt inesse eidem naturaliter, vt qualitas elementaris, & motus sphericus, quorum vnum .i. qualitas elementaris repugnat mobili sphericæ naturaliter. Dico naturaliter quoniam si corpus elementare moueatur sphericæ, hoc non est ei naturale, sed præter naturam, vt declaratum est in primo cæli. Moueri autem naturaliter sphericæ conuenit tantum cælo cui repugnat qualitas elementaris, vt probatum est in primo cæli. Sed aduerte, quod hic modus est valde improprius.

Secundus modus est, ea dicuntur contraria quæ cum plurimum differant conueniunt, vel in vno genere, vt album & nigrum in colore, vel in vno susceptibili generico, vt sanum & ægrum apta in esse soli animali, vel in eadem potestate .i. in potentia rationali quæ se habent ad opposita, vt declarabitur in lib. 9. sicut consonantia, & inconsonantia in musica, veritas & falsitas in syllogizando. Sed aduerte, quod plurimum differre potest esse tribus modis.

Primo, simpliciter, vt oriens, & occidens in motu cæli, arcticum, & antarcticum in axe cæli.

Secundo, in genere eodem, & duæ extremæ differentiæ constituentes duas extremas species, & diuisiue eiusdem generis.

Tertio, in eadem specie, vt principia indiuiduantia duorum

E P I T O M E L I B. V.

extremorum indiuiduorum sub eadem specie, puta principia indiuiduatiua perfectissimum hominem, & hic secundus modus est proprius.

Positis his duobus, vt principalibus assignat alios modos secundarios.

Quorum Primus est, q̄ aliqua sunt contraria habitu .i. quia sunt habitus qui sunt principia contrariarum operationum, vt virtus, & vitium.

Secundus est, aliqua sunt contraria, quia sunt receptiua contrariorum, sicut homo ægrotatiuus, qui de facili ægritudinem recipit, & homo sanatiuus, qui de facili sanitatem recipit.

Tertius est, aliqua dicuntur contraria, quia actu existunt contraria, vel quia actu substant contrarijs.

Exemplum primi, calor, & frigiditas.

Exemplum secundi, ignis, & aqua.

Quartus est, aliqua sunt contraria, quia sunt actiua contrariorum, sicut agentia per qualitates contrarias, vt ignis, & aqua, vel sicut agentia virtualiter, sed formaliter contraria, vt Saturnus qui est causatiuus frigiditatis, & Iupiter causatiuus caloris, licet calor, & frigiditas non sint formaliter in eis, similiter dicitur piper contrarius camphoræ, quoniam ille calefacit, & hæc infrigidat.

Quintus est, aliqua dicuntur contraria, quia sunt potentiæ receptiue contrariorum non à contrarijs, sed ab eodem, vt visus noctue recipit à luce tristitiam, & visus aquilæ recipit lætitiā.

Sextus est, aliqua dicuntur contraria, quia sunt agentia, & patientia, quoniam omne patiens à suo dissimili & contrario patitur, & cum assimilatum fuerit suo agenti non amplius patitur, vnde & in secundo de Anima, tex. 44. & 45. dicit Aristot. alimentum ante decoctionem esse contrarium alito, quoniam patitur ab alito per calorem naturalem decoquentem.

Septimus est, aliqua dicuntur contraria, quia vnum est causa acquirendi, vel suscipiendi vnum contrarium, & alterum est causa expellendi, & sic combusta sunt contraria scamoneæ, quoniam combusta generant choleram, & scamonea

monea expellit choleram.

Octauus est, aliqua dicuntur contraria, quia vnum est receptiuum habitus, & alterum priuationis, vt aër conclusus est receptiuus tenebrarum & apertus est receptiuus luminis. Hæc de contrarijs dicta sint, in 10. autem lib. complebitur eorum considerationem.

Quantum ad diuersa specie aduerte quòd Arist. quinque modos assignat.

Primus est, quando aliqua sunt in eodem genere saltem generalissimo, & tamen non in eodem genere subalterno, sicut scientia & triangulus, licet enim contineantur sub qualitate, alterum tamen continetur sub habitu, & alterum sub figura.

Secundus est, quando aliqua continentur sub eodem genere & habent differentiam adinuicem, etiam quod illæ differentię non sint veræ contrarię, vnde homo vt bipes, & leo vt quadrupes sunt hoc modo diuersa specie, quæ diuersitas sumitur à figura in qua non est alteratio vt probatur in 7. lib. phys. tex. 15. ex consequenti nec proprie contrarietas.

Tertius modus, quando aliqua sunt distincta contrarijs differentijs diuisiui vnius generis, siue illa distincta sint contraria, & differentię eorum contrarię, vt albedo & nigredo & congregatiuum & disgregatiuum, nam tam species quàm differentię sunt contrarię, siue differentię sint contrarię, nõ existentibus speciebus contrarijs, vt rationale & irrationale, non tamen homo est alius sunt species contrarię, quoniam in substantia non est contrarietas.

Quartus modus, quando sunt duę species specialissime constitutę specificis differentijs diuisiuis vnius generis vltimi, & hæc propriissime dicuntur diuersa specie, quæ enim sunt diuersa genere & specie, sicut homo & lapis, ita possunt dici diuersa genere sicut diuersa specie.

Quintus modus, quando aliqua sunt simul in eadem substantia realiter differentia, vt duo accidentia in eodem subiecto sunt diuersa specie, vt albedo & dulcedo in pomo, caliditas & siccitas in igne, quando impossibile est duo accidentia eiusdem speciei, vt duę albedines inesse simul eidem saltē secundum esse materiale, vtrum autem possint simul inesse eidem

eidem secundum esse intentionale determinabitur in q. nostris. Hæc de eodem diuersis oppositis contrarijs & diuersis specie dicta sint.

C A P V T V.

IN hoc cap. distinguendum est hoc nomen simile, & suū oppositum quod est, dissimile. Et aduerte quòd Arist. primo assignat modos similium, deinde dat regulam per quam possumus cognoscere aliquod esse maxime simul alteri.

Primus igitur modus est, quando aliqua patiuntur siue recipiunt per alterationem eandem specie qualitatem, vt duo corpora dum denigrantur vel calefiunt. Hæc dicuntur similia non quia conueniant in vna qualitate, sed quia mouentur ad vnā qualitatem, vnde sunt similia in fieri, licet mūdum in facto esse.

Secundus est, quando aliqua sunt patientia, id est mouentur ad eandem vel diuersas qualitates dicuntur similia, non ratione termini, si mouentur ad diuersas qualitates, sed ratione motus, quia conueniunt in alteratione quæ est motus ad qualitatem, & secundum hunc modum dici possunt similia corpus quod calefit & corpus quod infrigidatur, in quantum vtrique inest alteratio, sed hic modus est imperfectior primo, vt patet.

Tertius est, quando duo conueniunt in vna qualitate specifica quā iam actu habent, vt nix & lac in albedine, & hic est verus & proprius modus similitudinis. Modi vero dissimilium sunt oppositi modi similium, & sunt etiam tres, quos ex teipso considerare poteris.

Regula autem, per quam maxime siue præcipue similia cognoscere possumus stat in duobus.

Primo, si dantur duo quæ conueniant in paucioribus qualitatibus, & duo conuenientia in pluribus, ista sunt maxime similia, illa autem non, vnde piper est maxime similis igni, quoniam calidus & siccus est, mel autem non, quoniam est calidum humidum.

Secundo, quod conuenit cum alio in qualitate sibi magis propria

propria est maxime simile illi, unde quod participat calorē similius est igni quā id quod participat siccitatem. Pateet igitur quod aer est similior igni quam terra. Hæc de modis similitum, & quomodo aliqua sunt maxime similia dicta sint. Sed aduerte, quod prædicti modi similitum proprie verificantur inter ea, quorum vnum non pendet ab altero. nam in his quorum vnum est causa, & alterum causatum, falsum est dicere, quod sint mutuo similia, & præcipue in causa impropotionaliter excedente causatum qualis est causa prima. nam similitudo quædam imitatio est, constat autem causatum imitari causam, quia accipit à causa bonitatem, non autem econuerso, unde licet imago dici possit similis imaginato, non tamen econtrario. Item aduerte, quod licet æqualitas sit pars vnius, sicut identitas & similitudo, tamen Arist. non distinguit eam, quoniam cum constet in indiuisibili nō potest dici multis modis, nisi forte applicando diuersis speciebus quantitatatis, vt æqualitas in numeris. æqualitas in lineis, æqualitas in superficiebus &c.

CAP V T V I.

IN sexto cap. assignandi sunt modi prioris & posterioris antequam distinguantur nomina significantia partes entis, & hoc quidem rationabiliter fecit Arist. quoniam considerauit prius & posterius consequi ad multa prædeterminata, vt ad principium, ad causam, ad substantiam, ad vnū, nam in ente finito principium est prius, & principiatum posterius, idem est inter causam & causatum, & inter substantiam & accidens, & inter vnum & pluralitatem, vtile igitur fuit post distinctionem posteriorum assignare modos prioris & posterioris. Aduerte ergo quod omnes modi assignari ab Arist. possunt reduci ad &c.

Primus, prius dicitur de eo quod est primum in quolibet genere determinato à quo fuit tota natura illius generis, & posterius dicitur illud ad quod deriuatur natura illius primi, & constituitur in esse per ipsum, vt in genere substantię prius est, quod est prima & nobilissima substantia, & omnes alie dicuntur posteriores ad illam. In genere quātitatatis
continue

continue punctus dicitur prius, & omnis dimensio posterior. In genere quantitatis discrete vnitas dicitur prius, & numerus dicitur posterius. in genere scientię Metaphysica dicitur prior & omnes alię posteriores &c. *ex horum, &c.*

Secundus est, quod est propinquius alicui principio determinato, & posterius quod est remotius ab eo, & id manifestatur primo in loco, nam prius in loco dicitur quod est propinquius alicui, quod consideratur vt principium in ordine locandi, siue sit centrum mundi, siue concauum orbis lunę, & quidem si sit centrum mundi dicetur aqua prior secundum locum, & aer posterior. si autem sit concauum orbis lunę erit opposito modo. Idem intellige quando determinatur principium non solum ex natura rei, sed ex proposito humano. nam sumpta magnitudine A, D, cuius principium sit A, & diuidatur in tres partes, scilicet in A, B, & B, C, & C, D, & locetur lapis vnus in A, B, & alius in B, C, constat quod locatus in A, B, est prior secundum locum, & alius est posterior. secundo in tempore, in quo pro principio sumitur aliquod instans, pura instans presens, respectu cuius aliquod dicitur prius & posterius in tempore, sed alio modo in preterito, & alio in futuro. In preterito quidem quod est remotius a presenti, nunc dicitur prius, vt prius fuit bellum Troianum quam Romanorum, quoniam tunc nondum erant Romani, & prior fuit Hector quam Alexander. In futuro autem quod propinquius erit presenti nunc, dicetur prius, vt nobis constitutis in hyeme, verum est dicere. prius erunt rosę quam poma. Tercio in motu, in quo aliquid determinatur pro principio, a quo incipit motu, vt in motu cœli Aries sumitur pro principio, respectu cuius verum est dicere quod motus Solis in Tauro est prior motu eiusdem in Cancro, eodem modo dicemus puerum esse priorem viro, quoniam propinquior est principio generationis, a quo incipit motus augmenti, & puer est prior quo ad motum augmenti. Eodem modo dicimus viros qui sunt maioris auctoritatis apud principem esse priores quo ad regimen, quod consistit in diuersis motibus voluntarijs sub ordinatis, quorum principium primum est voluntas princeps. Tales enim viri mouent inferiores ad sic operandum, & si non

mouent

mouent, nec inferiores mouent se ad operandum. Quarto, in ordine, respectu cuius illud dicitur prius, quod est uicinius principio talis ordinis, posterius autem quod est remotius ab eodem, ut in ordine curialium ille est prior, qui propinquior est principi, & in ordine militum propinquior duci dicitur prior, & in choris cytharæ illa est prior, quæ propinquior est chordæ graui, & in numeris ille est prior qui propinquior est unitati.

Tertius, prius est, quod est prius secundum cognitionem per respectum ad intellectum vniuersalia sunt priora, quoniam eius proprium obiectum est natura vniuersalia, quod ad sensum singularia sunt priora, quoniam sunt illa quæ primo imprimunt in sensum, sed de his satis dictum est in 2. lib. & 3. de anima.

Quartus, priora sunt quæ sunt passiones priorum subiectorum, ut rectitudo, quæ est passio lineæ prior est lenitate, quæ est passio superficiæ, quoniam lineæ, ut patet prior in superficie, similiter potentia vegetatiua prior est potentia sensitua, quoniam illa consequitur animam vegetatiuam, hæc autem consequitur animam sensitiuam, quæ naturaliter posterior est anima vegetatiua.

Quintus, priora sunt quæ sunt priora quo ad esse ex natura sui, & id contingit tripliciter.

Primo, quo ad ea quæ possunt esse sine alijs, & non econuerso, & sunt illa in quibus non conuertitur existendi consequentia, & hoc modo magis vniuersalia priora sunt minus vniuersalibus nam potest esse substantia, puta Deus, dato quod non sit corpus, sed non econuerso, & potest esse animal dato, quod non sit asinus &c.

Secundo, quo ad substantiam ad accedens: nam quoniam ens principaliter dicitur de substantia & dicitur de accidente in ordine ad substantiam, ideo substantia ex natura rei est prior accidente.

Tertio, quo ad potentiam & actum. nam, ut dicemus in lib. 9. in generabilibus prius est esse in potentia, quam esse in actu, quoniam in his est progressus à potentia ad actum. Loquendo autem absolute prius est esse actu, quoniam nihil reducitur de potentia ad actum, nisi per aliquod exi-

E P I T O M E L I B. V.

stans actu, ut declarabitur in 9 & in 11. lib. Item quæcunque componunt aliud, priora sunt secundum potentiam, & posteriora secundum actum. nam partes quandiu componunt totum non habent esse nisi in potentia, si autem debent esse actu, id est si debent habere separatim esse à toto necesse est, ut totum corrumpatur & resoluitur in partes, unde elementa quæ habent esse in potentia in mixto incipiunt habere esse in actu per corruptionem mixti resoluti in elementa. Iti sunt modi quibus dicuntur aliqua priora & posteriora, & si tu bene consideras, aduerteres quod omnes reducuntur ad primum membrum quinti modi, in quo dictum est quod ea sunt priora quæ non possunt esse sine alijs, & posteriora quæ non possunt esse sine illis. nam de natura posterioris est præsupponere prius, ex consequenti aliquo modo pendere à priori, unde remoto priori saltem per intellectum, remouetur posterius, sed non e contrario. Et tu applica quod dictum est ad omnes supra dictos modos & inuenies sic esse, dummodo prius sit talis naturæ, quod sibi ex se non repugnet esse actu quod dico propter materiam primam, quæ licet sit prior forma, tamen non potest esse sine forma, quoniam ex se est ens mere in potentia, & omnem actualitatem accipit à forma secundum viam nostram. Hæc de priori & posteriori dicta sunt.

C A P V T V I I.

Distinctis nominibus significatibus partes vnius, nunc distinguenda sunt nomina significantia partes entis. Partes autem entis sunt potentia & actus, & decem prædicamenta. Primo ergo distinguendum est hoc nomen potentia, deinde nomina prædicamentorum. Distinctionem vero actus relinquemus considerandam in lib. 9. ne fiat inutilis repetitio.

Quantum igitur ad nomen potentie primo distinguemus potentiam.

Secundo, ipsum possibile.

Terrio, impotentiam.

Quarto, ipsum impossibile.

Quinto,

Quinto, declarabimus potentiam metaphoricam .

Sexto, reducemus omnes modos ad vnum .

Quantum ad primum, aduerte quatuor modos potentiz proprie dictæ .

Primus, potentia dicitur principium mouendi siue transmutandi aliud in quantum aliud, ita q̃ mouens siue transmutans, in quo est tale principium semper est aliud siue supposito siue realiter ab eo quod mouetur aut transmutantur, nihil enim vt probatum est in 8. Phys. tex. j. & per se mouet aut transmutat seipsum . dico autem primo quoniam non inconuenit idem mouere seipsum secundum partem , vt cū Socr. manu percutit seipsum . Dico per se, quoniam vt inquit Arist. accidit artem medicatiuam esse in sanato . nam per accidens est eundem esse medicum & infirmum . igitur hoc principium in motu vel transmutatione per se necessario est in alio, quod mouet vel transmutat aliud, vt ars ædificatiua est in ædificante quod transmutat ædificatum. Dixi autem semper est aliud siue supposito siue realiter, quoniam aliquando suppositum mouet aliud suppositum, vt hic ignis calescit hanc aquam, Socr. mouet hunc lapidem, aliquando pars mouet totum, vt anima mouet animatum, & in hoc sufficit quod mouens in quo est potentia motiua sit aliud realiter à moto . nam pars realiter distinguuntur à toto . iste igitur est primus modus potentiz, & est de potentia actiua .

Secundus, potentia dicitur principium quo aliquid mouetur aut transmutatur ab alio, & hæc est potentia passiuæ, vt grauitas in lapide qua mouetur deorsum à generante, & hæc est potentia qua patiens potens est pati, siue patiatur proprie sint improprie . Improprie quidem pati est aliquid recipere siue bonum siue malum, vnde infirmus recipiens sanitatem, & debilis fortitudinem improprie patitur . proprie autem est recipere aliquid quo transmutatur à conuenienti dispositione, vt infirmari, tristari, incarcerari &c. sub hoc autem modo continetur potentia, quæ quocunque modo est principium patiendi siue recipiendi aliquid ab alio, vnde potentia materiæ & potentia qua mouetur cælum ab intelligentia continetur sub hoc modo .

N ij Tertius,

Tertius, potentia dicitur principium quo possumus bene & perfecte operari, vel quo potest aliquid bene & de facili pari, ut expeditum lingua dicimus posse loqui, quia bene loqui, & balburientem non posse loqui, quia male loquitur. Si militer quæ sunt secundum legem dicimus posse agere, quæ autem sunt contra legem dicimus non posse, quia non bene fierent, ex parte autem pari, ut lignum dicimus incisibile, quia de facili inciditur, lapidem autem e contrario, & hic tertius modus continet in se potentiam actiuam & passiuam adiuncta hac conditione bene vel de facili.

Quartus, potentia dicitur omnis habitus siue dispositio vel virtus, qua possumus resistere corruptentibus, & reddimur quasi impassibiles, & per oppositum, si non possumus resistere dicimur habere impotentiam, & hæc est naturalis potentia vel impotentia, quam posuit Arist. in prædicamentis in secunda specie qualitatis.

Quantum ad secundum, aduerte quatuor modos quibus dicitur aliquid possibile, id est potens.

Primus, potens est illud quod in se habet principium mouendi vel transmutandi aliud, & dicitur potens potentia primo modo dicta quæ est potentia actiua, siue sit potens immediate vel mediate. Immediate, ut ignis comburit lignum. Mediate autem, ut ignis calefit manum, pro quanto communicat calorem aëri circumstanti, & aër ex calore sibi communicato calefacit manum.

Secundus, potens est illud quod in se habet principium quo potest moueri vel transmutari in aliud, siue in melius, & dicitur potens potentia primo modo dicta, id est potentia passiuæ hoc modo corruptibile dicitur potens corrumpi, causa quidem qua aliquid dicitur hoc modo potens consistit in duobus.

Primo, in habere aliquid, puta Socrates est potens infirmari, quia habet naturam vel cōplexionem talem, vel quia habet humorem peccantem & non regulatum.

Secundo, in habere priuationem alicuius virtutis qua posset resistere contrariis inducentibus infirmitatem, puta debilitatem virtutis naturalis, ex qua debilitate cum non possint vincere contrarium ducitur ad ægritudinem, & si tu be-

ne aduerteres inuenies quod in omni potente pati, hæc duo concurrunt, scilicet aliquid habere, & aliquo priuari. nam aqua ideo potens est pati ab igne, quia habet naturam receptiuam caloris, & quia caret virtute, qua possit repugnare ne ignis agat in ipsam.

Tertius, potens dicitur illud quod nō habet aliquod principium per quod patiatur vel corrumpatur ab alio in quantum aliud, vt Socrates regulatus in humoribus dicitur, potens, quia caret principio, id est regularitate humorum qua posset infirmari, & cœlum est hoc modo potens, quia caret qualitatibus alteratiuis, quibus posset corrumpi.

Quartus, potens dicitur illud quod in se habet principium, quo potest bene & prompte agere vel pati, vt Logicus dicitur potens arguere, quia inest sibi logica, vt principium recte arguendi, & cera dicitur potens diuidi propter mollietatem, & hic modus translatus est etiam ad inanimata. nam cytharam in chordis temperatam dicimus potentem ad sonandum, quia bene & dulciter sonat, intemperatam autem dicimus non potentem, quia male & insuauiter sonat.

Quantum ad tertium prius assignanda est ratio impotentiae, deinde modi ipsius.

Aduerte igitur, quod cum potentia sit principium agendi vel patiendi, tam bene quam male, vt patet ex dictis, impotentia est ablatio illius principij non absolute, sed in determinato subiecto apto habere illud principium, eo modo quo sibi conuenit, & tali tempore, vnde in viro eunucho est impotentia generandi, quoniam vt homo est aptus generare, & est ætatis aptæ ad generandum, non autem in puero, quoniam impotentia proprie est priuatio potentiae, priuatio autem non est negatio simpliciter, sed cum circumstantijs, dictis cum igitur impotentia opponatur potentiae, quot modi potentiae assignati sunt tot sunt impotentiae, quos non est necesse numerare, quoniam tibi manifesti erunt, si singulis modis potentiae applicaueris ablationem illius principij. nam sicut potentia primo modo dicta est principium in alio mouendi vel transmutandi aliud, sic primus modus in potentiae est ablatio principij in alio mouendi &c. vnde sicut in sano est principium mouendi lapidem decem ponderum, sic

infirmo est ablatio eiusdem principij eodem modo consideratum in alijs modis potentiz.

Quantum ad quartum, aduerte duplex impossibile, scilicet reale & logicum. Reale opponitur possibili reali, quod dicitur potens aliquo modo potentiz, vt declarabimus. Impossibile igitur reale idem est quod impotens, sicut ergo potens dicitur tot modis quot potentia, sic impotens dicitur tot modis quot modis dicitur impotentia. Isti autem tot sunt quot modi potentiz, ergo &c. Dicitur ergo infirmus impossibilis, id est impotens ad mouendum lapidem decem ponderum, eodem modo applicatu in alijs modis. Impossibile logicum opponitur possibili logico, quod est complexum non de necessitate verum, nec de necessitate falsum, dicitur enim possibile logicum quod potest esse & non esse, vt Socratem sedere, & hoc possibile facit propositionem modalem distinctam contra propositionem de necesse & de impossibili. Impossibile logicum est complexum de necessitate falsum, cuius oppositum de necessitate verum, vt diametrum esse commensurabilem est impossibile, quoniam sua negatiua est de necessitate vera, & huiusmodi impossibile constituitur ex repugnantia terminorum, vnde quęcunque implicanc contradictionem dicuntur hoc modo impossibilia.

Quantum ad quintum, aduerte quod dicitur potentia & potens per quandam similitudinem in mathematicis, sicut quando dicimus quod ternarius est in potentia ad nouennarium, quoniam si ducatur in seipsum consurgit nouennarius. nam ter tria constituunt nouem, hæc autem potentia non est realiter & vere potentia, quoniam in quantitate, vt sic, non est principium actiuum nec passiuum, sed tantum per similitudinem. nam sicut ex eo quod est in potentia fit id quod est in actu, ita ex ductu alicuius numeri in seipsum constituitur numerus quadratus & numerus ductus in seipsum dicitur metaphoricę radix siue potentia.

Et aduerte, quod potentia metaphoricę dicta concordat cum possibili & impossibili logico in hoc, quod sicut ibi dicitur, possibile & impossibile non per realem potentiam vel impotentiam, sed ex habitudine terminorum, sic ibi dicitur

citur

citur potentia per solam similitudinem.

Quantum ad sextum, aduerte quòd omnes modi potentiz respiciunt primum modum qui est de potentia actiua, ita quod illo sublato alij auferuntur, & id sic declaro. nam quod est in potentia passiuā, ideo est quia aliquid potest agere in ipsam, ergo passiuā respicit actiuā, & quod potest bene & faciliter agere respicit posse agere, & quod potest bene & faciliter pati, respicit posse pati, & naturalis potentia qua possumus resistere corrumpentibus necessario est actiua vel passiuā, passiuā autem, vt diximus necessario respicit actiuā, constat ergo quod actiua est principalis, & omnes aliz reducuntur ad ipsam. Et quod dixi de modis potentiz intellige similiter de modis possibilis id est potentis, & de modis impotentiz & de modis impossibilis, id est impotentia realis. Omnes enim respiciunt impotentiam actiuā, dem pro possibili & impossibili logico, & potentia metaphorice dicta. Bene ergo Arist. diffiniens potentiam primo modo dictam tanquam principalem dixit eam esse principium permutationis in alio secundum quod aliud. Hæc de modis potentiz & possibilis, & impotentiz & impossibilis dicta sint.

CAPVT VIII.

IN octauo cap. distinguendum est hoc nomen quantum, sed antequam descendamus ad modos eius tria declaranda sunt.

Primo, cum hic intendat distinguere nomina significatia partes entis, prout distinguuntur in 10. prædicamenta, quare non incipit à substantia, vt à primo prædicamento.

Secundo, cum sint decem prædicamenta quare distinguit tantum tria nomina scilicet quantum, quale, ad aliquid, & prætermittit alia sex.

Tertio, quare prius assignat diffinitionem quanti quàm distinguat, cum in prædicamentis statim incipiat à distinctione & prætermittat diffinitionem, sic enim incipit. Quantitatis aliud continuum, aliud discretum.

Ad primum, patet responsio ex prædeterminatis. nam in tertio cap. huius trac. distinctum iam fuit hoc nomen, sub-

stantia, quoniam ipsa est principale subiectum in hac scientia, non fuit ergo necesse replicare hic.

Ad secundum, dico quòd cum metaphysicus sit vniuersalis & maxime vniuersalium considerator, vt dictum est in proœmio metaphysicæ, ad ipsum non spectat considerare quæ sunt determinati generis secundum propriam rationem, sed ad scientias particulares, nam ens mobile in quantum mobile, non spectat ad metaphysicum, sed ad physicum. Similiter quæ consequuntur ens mobile, vt motus & actio & passio, quæ non distinguuntur à motu, ex tertio Phys. & locus & tempus quæ sunt mensura entis mobilis, vbi autem respicit locum, & quando respicit tempus. Similiter situs respicit locum, habitus autem videtur esse de genere ad aliquid, prætermisit igitur ea Aristot. vt pertinentia ad physicum ne habitus scientifici confundantur. Potest etiam dici quòd cum hæc videantur dicere absolutum adiuncto respectu, quod quidem absolutum est substantia vel quantitas, vel qualitas, respectus autem eorum continetur in ad aliquid, ex eo quod pertractat de substantia quantitate & qualitate & ad aliquid, persuasit sibi Aristot. tractasse de alijs sex.

Ad tertium dico quòd Arist. in prædicamentis non considerat de quantitate nisi vt habet rationem mensuræ. Mensura autem alia ratione conuenit quantitati cōtinuæ, & alia quantitati discretæ. Quæ vero sunt diuersarum rationum, vt sic non possunt vna diffinitione explicari. Et propterea necesse est ea prius distinguere, deinde singulorum membrum diffinire, hic autem considerat eam secundum naturam suam, & in quantum est in se tale ens, & in quantum sui modi sunt speciales modi entis & vt sic potest diffiniri & assignari communis ratio, in qua conueniunt tam quantitas continua quam discretæ.

His declaratis assignanda est communis ratio eius, deinde descendimus ad modos suos.

Aduerte igitur, quòd sic diffinitur ab Aristot. Quantum est, quod est diuisibile in his quæ insunt quorum vtrunque aut singulum vnum quid, & hoc aliquod aptum est esse, id est. Quantum est quod est diuisibile in partes, quæ ei insunt non

non solum in virtute, vt elementa in mixto, sed per essentiã, quorum vtrunque si quantum diuiditur in duas medietates, aut singulum, si diuiditur in plura quàm duo, est quod vnum quantum, quando est actu diuisum à toto. Et hoc vnum est aptum natum esse hoc aliquid, id est aliquid saluarum in se ipso, ita quod retinet eandem entitatem, quam habebat in toto. Et in hoc distinguitur quantum à substantia animata, cuius partes separate à toto, non retinent priorem entitatem, caro enim abscisa non est caro, nec oculus est oculus nisi æquiuoce, vt dicitur in secundo de anima. Pars autem quanti continui, siue in toto siue extra totum, retinet in se entitatem & vnitatem & continuitatem suam. Et si numerus diuidatur, partes suæ ita sunt vnitates & indiuisibiles, sicut existentes in toto, hæc igitur est diffinitio quanti secundum entitatem suam, & non per respectum ad aliquod extrinsecum.

Posita diffinitione quantitati, diuidendum est in species suas, deinde in modos suos. Species suæ sunt duæ, scilicet pluralitas & mensura, id est multitudo & magnitudo. Multitudo est numerabilis, & magnitudo est mensurabilis, & dicitur multitudo id quod est diuisibile in partes non continuas. Magnitudo autem est quod est diuisibile in partes continuas. Quæ quidem diuisio in partes continuas potest esse triplex, scilicet secundum longitudinem tantum, secundum longitudinem & latitudinem, secundum longitudinem & latitudinem & profunditatem. Et quidem si multitudo sit finita dicitur numerus, si diuisio secundum longitudinem sit finita dicitur linea. Si diuisio secundum longitudinem, & latitudinem, sit finita, dicitur superficies. Si diuisio secundum triam dimensionem sit finita dicitur corpus.

Sed dices, quare Arist. apponit ly finita cum linea diuidatur per finitam & infinitam, similiter superficies, & corpus vt patet apud mathematicum.

Respondeo Aristot. in mathematica considerat partes & modos entis, prout possunt esse, vel eis non repugnat esse, & sic considerat de quanto non vt quantum præcise, sed vt est pars entis & vt sibi competit esse. Et quoniam repugnat apud ipsum dari quantum infinitum actu, siue continuum, siue

sive discretum, vt probauit in tertio libro phys. ideo appo-
suit ly finita, quasi dicat licet apud mathematicum conside-
rantem quantum præcise in ratione quanti & abstracte. Lō
gitudine siue imaginata vt finita, siue vt infinita, dicatur li-
nea, non tamen apud metaphysicum, considerantem quan-
tum in ordine ad esse, quoniam repugnat dari quantum infi-
nitum. Et ideo vt sit linea & superficies & corpus, necesse
est apponi ly finita. Idem intellige de multitudine ad hoc
quod sit numerus, nam de ratione numeri est mensuratio
quæ repugnat infinito.

Modi vero quanti sunt in duplici differētia, quoniam ali-
qui sunt modi quanti per se, & aliqui, quanti per accidens.

Quantum quidem per se est duplex.

Quoddam est vt substantialiter & essentialiter quantum,
& est omne illud in cuius ratione ponitur quantū siue quan-
titas, vt numerus, linea, superficies, corpus.

Quoddam autem vt passio consequens quantum substan-
tialiter, vt multum & paucum, consequitur numerum, lon-
gum & breue, consequitur lineam, latum & strictum, conse-
quitur superficiem, altum & profundum, consequitur cor-
pus, magnum & paruum consequitur, consequitur omne
quantum substantialiter, tam continuum, quàm discretum,
aliquando quidem absolute, aliquando autem respectiue,
vt dicetur in libro decimo & dictum est in prædicamento
quantitatis.

Et aduerte, q̃ paruum & magnum etiam transferuntur ad
qualitates, sic & equalitas, vt dicemus in lib 10. vnde dicimus
magnam scientiam esse in magistro, & paruam in discipulo.
Magnam auctoritatem esse in duce, & paruam in milite.

Quantum autem per accidens dicitur dupliciter.

Primo, quia est in subiecto quanto, sic album est quantū,
quoniam est subiectiue incorporeæ quod est quantum per
se, & hoc modo omnia accidentia recepta in quanto, sunt
quanta per accidens, id est per subiectum quantum.

Secundo, quia habent continuitatem & diuisionem ad di-
uisionem, & continuitatem alicuius per se quanti ad quod
consequuntur. Et hoc modo motus est quantus, quoniam
habet continuitatem & diuisionem à magnitudine super
quam

quam est motus, probatum est enim in sexto physic. tex. 10. quòd motus diuiditur secundum quòd diuiditur magnitudo, vnde si magnitudo diuideretur indiuisibile, similiter & motus, eodem modo tempus est quantum, quoniam sumit continuitatem & diuisionem à motu, cuius est in mensura, vt patet in sexto physic. Sunt igitur motus & tempus quanta per accidens, non quia sunt subiectiue in quato, sed quia sumunt continuitatem & diuisionem in aliquo primo & per se quanto, respectu cuius possunt dici & per accidens & posterius quanta.

Sed dices, quare Aristot. in prædicamentis ponit tempus quantitatem per se, hic autem per accidens, & quare hic nō nominat locum quem posuit illic. Speciem quantitatis continue & quare hic non nominat orationem quam illic posuit quantitatis discrete speciem, & quare hic nominat motum de quo non fecit illic mentionem. Pro responsione præmissorum, præmitto duo.

Primo, vt dixi Arist. in prædicamentis non considerat de quantitate, nisi vt habet rationem mensuræ, vnde dato quòd vnamet quantitas haberet plures rationes mensuræ respectu diuersorum talis constitueret diuersas species quantitatis, & per oppositum. Si essent duæ quantitates, quæ tamen non haberent diuersam rationem mensuræ, non ponerentur distinctæ species. In metaphysica autem considerat quantitatem, quo ad entitatem & esse suum, & ideo nisi adsit distinctio realis, non ponuntur vt distincte species & nisi habeat diuisibilitatem ex se non dicuntur quantitates per se, sed per accidens. In prædicamentis autem dummodo habeant propriam & distinctam rationem mensuræ, computantur inter quantitates, per se etiam quòd habeant diuisibilitatem ab alio.

Secundo, præmitto quod dicit hic Cōment. in cōm. 18. in fine, scilicet quod Arist. in prædicamentis intendit nominare solum species famosas quantitatis, sed in metaphysica intendit loqui secundum rei veritatem.

His præmissis dico q̃ tempus in ratione mensuræ est quantitas per se. Nam linea superficies & corpus mensurant illud in quo sunt, tempus autem mensurat extrinsecum, id est motum,

motum, sed quo ad esse quantitatis, quod est esse diuisibile est quantitas per accidens, diuisibile est enim ad diuisionem motus & motus ad diuisionem spatij ex sexto physicorum. De loco dico, quod est eadem quantitas cum superficie, est enim locus superficies locantis, ex quarto physic. tex. 41. & ideo secundum metaphysicum non facit distinctam speciem per se, propterea cum Arist. nominauit hic superficiem, intendit omnem quantitatem non distinctam realiter à superficie, secundum logicum autem quoniam eadem superficies comparata corpori contento, est mensura eius extrinseca, ideo in ratione mensuræ ponitur à logico distincta species, à superficie. De oratione dico quod quo ad esse non distinguitur à motu, & ideo Arist. nominans motum, intendit nominatum id, quod est idem cum motu. Quantum autem ad rationem mensuræ, dico quod habet distinctam rationem à numero. Nam numerus proprie dicitur mensura discreti, tam permanentis quàm successiui. Oratio vero proprie est mensura discreti successiui, ideo ponitur species distincta à numero, de motu dico, quod in prædicamentis non nominauit eum, quia non competit sibi ratio mensuræ secundum se, nam, ut inquit Comment. in comm. 18. non est consuetudo quod mensurentur per partem suam, sed per spatium super quod fit aut per tempus in quod fit. Hic autem nominauit eum inter quanta per accidens, quoniam habet esse quantum, id est esse diuisibile non quidem ex se, sed ex alio, id est ex magnitudine super quam fit, diuiditur enim secundum partes magnitudinis, ut declaratur in 6. phys. Hæc de quanto dicta sint.

CAP. V. T. IX.

IN nono cap. assignandi sunt modi huius nominis quale. Aduerte igitur, quod Arist. assignat quatuor modos, deinde reducit eos ad duos.

Primus modus, quale siue qualitas dicitur de omni differentia substantiali qua res substantialiter abinuicem differunt. Differentia enim qualificat substantiam cuius est, unde ad ipsam responderetur per quale. dum enim queritur quale est

est animal responderetur, bipes aut quadrupes. Et qualis figura est circulus responderetur exagona. i. sine angulis.

Secundus modus, omne qualificans mathematica siue ponantur immobilia, ut dicunt Platonici ponentes ea abstracta secundum esse, siue ponantur mobilia quia non abstrahunt à materia nisi secundum rationem, ut tenet Aristot. dicitur quale, vel qualitas, unde proportionibus numerorum dicuntur esse qualitates, puta par impar primus compositus perfectus superfluous diminutus, quadratus, cubus superficialis, solidus. Similiter differentiarum figurarum, quibus abinuicem differunt, dicuntur qualitates, ut trigonum tetragonum pentagonum exagonum &c. Nam si queritur, numerus senarius, qualis est, responderetur, perfectus, quoniam confurgit ex omnibus partibus suis simul sumptis, & si queritur figura ignis, qualis est, responderetur, pyramidalis, & figura terre est rotunda.

Et aduerte, quod hic modus correspondet quarto generi qualitatis in prædicamentis, ubi dixit Aristot. Amplius autem adhuc rectitudo & curuitas, & si quid simile est his, secundum enim unumquodque eorum, quale quid dicitur. Triangulum enim vel quadratum esse quale dicitur.

Tertius modus, omnes passionibus secundum quas mutantur substantiæ sensibiles, id est secundum quas fiunt alterationes, dicuntur qualitates, ut caliditas, frigiditas, humiditas, siccitas, sapor, odor, & breuiter omne quod est obiectum sensus exterioris, & hic modus correspondet tertiæ speciei qualitatis in prædicamentis. Vbi exemplificans Aristot. inquit, sunt autem huiusmodi, ut dulcedo & amaritudo & austeritas & omnia his cognata. Amplius autem & calor, & frigus, & albedo, & nigredo. Et quod hæc qualitates sint manifestum est. Quæcunque enim ea susceperint qualia dicuntur secundum ea.

Quartus modus, Omne illud quo disponitur homo ad operandum secundum virtutem vel vitium & vniuersaliter omne quo res bene vel male se habet in ordine ad naturam suam vel ad propriam operationem, dicitur qualitas, unde omnes habitus intellectuales, & sua opposita, & omnes habitus boni morales & sua opposita, & omnes habitus corporales

rales boni & sua opposita, vt sanitas & ægrotudo, pulchritudo & deformitas &c. Sunt in hoc quarto modo. Et hic modus correspondet primæ speciei qualitatis in prædicamentis, vbi inquit Arist. Et vna quidem species qualitatis, habitus & dispositio dicitur.

Positis his quatuor modis, reducit eos ad duos, nam secundum reducit ad primum, quoniam proprietates in mathematicis sunt differentiæ substantiales, eis enim vt differentijs differunt, puta differt quaternarius à ternario, quia est compositus quia est pars quia est primus numerus quadratus &c. Quartum autem modum reducit ad tertium, nam sicut qualitates sensibiles sunt principia moruum & actionū in naturalibus sic habitus & dispositiones sunt principia bone, vel male actionis maxime in agente libero vt in homine, & hoc vel secundum intellectum vt scientia & ignorantia, vel secundum voluntatem vt virtus & vitium, vel secundum corpus vt sanitas & ægrotudo.

Sed dices, quare Arist. primum modum hic positum non nominauit in prædicamentis, & quare hic prætermisit genus, secundum positum in prædicamentis. Respondeo aliter considerauit Philosophus de qualitate in prædicamentis & aliter hic, nam illic considerauit in quantum est vnum prædicamentum accidentium, & ideo necesse est oēs species eius esse accidentia, & qm̄ differentia substantialis nō est accidens, ideo non posuit eam inter species qualitatis in quantum est prædicamentum. Hic autem considerat eam non vt est prædicamentum sicut dicit Comment. in comm. 19. sed vt est nomen multiplex, & intēdit numerare omnes modos quos hoc nomen quale siue qualitas communiter dicta, significare consuevit, siue sit substantia, siue accidens, dummodo prædicetur in quale, & quoniam differentia substantialis prædicatur in quale: ideo continetur sub qualitate communiter dicta, non autem sub prædicamento qualitatis.

De secundo autem genere, quod est naturalis potentia & impotentia, dico quod prætermisit, illud, quoniam iam locauerat ipsum in capite de potentia, siue potestate. Et est quartus modus. In prædicamentis autem nominauit eam, quoniam & secundum esse est accidens, & quo ad modum,

nomi-

nominandi; habet modum qualitatis. Hæc de qualitate dicta sint.

C A P V T X.

IN capite decimo, assignandi sunt modi huius nominis, ad aliquid siue relationis, & primo quidem modi relationis secundum se, deinde modi secundum aliud, siue ratione alterius.

Primus modus est, qui fundatur super quantitatem, tam continuam, quam discretam.

Super continuam quidem, ut æquale & inæquale. Dux enim lineæ finitæ adinuicem comparatæ sunt æquales, aut inæquales.

Super discretam vero, ut duplum, triplum, dimidium, sed quia quantitas continua, non fundat relationem; nisi ut induit rationem vnitatis, aut numeri, ideo Aris. dicit quod primus modus est secundum numerum, ut duplum ad dimidiū; triplum ad tertiam partem, & multiplex ad submultiplex, & excedens ad excessum.

Et aduerte, q̃ in hoc primo modo continentur omnes species proportionum numeralium, quæ sunt aut numeri ad numerum, aut numeri ad vnitatem, & ordinatam diuisionē harum specierum: iam disposuimus in epitomi super octo libros physic. in libro 7. vbi pertractauimus de proportionibus motuum. Et B. Thom. ordinat in expositione præsentis tex.

Et iterum aduerte, omnes relationes huius primi modi esse reales & mutuas, quoniam ex natura rei omnes dux quantitates numerales mutuum ordinem habent adinuicem in rationem mensuræ fundatæ super quantitatem. Patet enim quodd sicut dimidium ex sui natura, & non solum ex apprehensione nostri intellectui respicit duplū ita & econuerso.

Idem intellige in alijs, & iterū aduerte, quodd in hoc modo continentur omnes relationes quæ sunt inter excedens & excessum & inter continens & contentum, dato quod nō sit commensurabilia; sicut est latus & diameter in quadrato, cum enim vtrunque sit quantitas finita, verum est dicere, quodd sunt æqualia, vel inæqualia, non equalia, ut patet, ergo

in

EPI TOME LIB. V.

inæqualia, ergo vnum est tantum, & adhuc amplius.

Secundus modus est qui fundatur super potentiam actiuam & passiuam inquantum sunt principia agendi, vel patiendi. Quæ quidem dupliciter possunt considerari.

Primo, inquantum nundum sunt coniuncte actui, & nominantur his terminis verbalibus, motuum mobile, actiuum passiuum, vt calefactiuum calefactibile.

Secundo, inquantum sunt coniuncte actui, & nominantur terminis participiorum præsentis temporis ex parte potentie actiue, & terminis participij præteriti, ex parte potentie passiue, vt mouens motum, calefaciens calefactum, causans causatum. Item inquantum non sunt coniuncte actui, possunt comparari ad tempus præteritum, & ad futurum.

Ad præteritum quidem inquantum fuerunt sub actu, vt pater & filius: pater enim est qui genuit, & filius qui genitus.

Ad futurum autem inquantum erunt sub actu, vt ædificaturus & ædificandum. In hoc autem modo etiam continentur relationes fundate super priuationem potentie, quæ dicitur impotentia à qua deriuatur impossibile, vel impotens reale, de quo locuti sumus in cap. 7. vbi assignauimus differentiam inter impossibile reale, & impossibile logicum: nam quod est impossibile, vel impotens reale, respectu alicuius est impotens, & quod est inuisibile, respectu alicuius est inuisibile.

Et aduerte, quod relationes huiusmodi omnes sunt reales mutue modo sint fundate super potentiam actiuam & passiuam creatas, sic enim sunt eiusdem ordinis & se mutuo perficiunt. Nam agens creatum non solum actu suo actuat, & perficit passum, sed & ex actu suo perficitur. Si autem fundentur super potentiam actiuam increatam, & potentiam passiuam creatam, non erit mutua realis, sed realis tantum ex parte creati, quoniam licet passum creatum, perficiatur ab agente increato tamen ipsum actu suo non perficitur, cum sit substantia sua, vt dicemus in lib. 12.

Tertius modus est, qui fundatur super mensurationem, vel dependentiam vnius rei ab alia, vel super imitationem
vnius

vnus rei ad aliam. Exemplum primi, vt sensibile & sensus, scibile & scientia intelligibile & intellectus. Nam sensus quo ad actum pendet à sensibili, habemus enim sensum vt sentiamus, vt dicetur in nono lib. Sic scientia nostra speculatiua pendet à scibili, sic intellectus noster quo ad actum pendet ab intelligibili. Exemplum secundi, vt imago & imaginatum, dicitur enim imago, quia imitetur imaginatum. Relationes autem huiusmodi in hoc distinguuntur à relationibus primi & secundi modi, quoniam ille sunt reales mutue, ex hoc quòd vnum extremum refertur ad aliud & econuerso, hic autem non sunt mutue, sed stat relatio realis tantum in vno extremo, scilicet in eum quod dependet vel imitatur. Alterum autem dicitur relatiue, solum quia alterum extremum refertur ad ipsum & ipsum est terminus talis relationis, verbi gratia scibile dicitur relatiue ad scientiam, quia scientia refertur ad ipsum, & quia terminat dependentiam scientiæ ab ipso. Similiter imaginatum dicitur ad imaginem, quia imago refertur ad ipsum & terminat illius imitationem, vtrum autem extremum terminans talem relationem, terminet eam sub ratione absoluti an sub ratione relatiui, declarabitur in questionibus nostris metaphysicalibus. Isti igitur sunt modi relatiuorum per se assignati ab Arist. Sed dices, videtur Philosophus diminutus, nam idēitas specifica, vt diuersitas sunt relationes reales. Socrates enim & Plato realiter conueniunt in natura humana, homo autem & leo realiter differunt in naturis specificis. Et hæc idēitas & diuersitas non fundantur super quantitatem, nec super potentiam actiuam & passiuam, nec super mensurationem siue dependentiam, sed super rei substantiam. ergo &c. Præterea similitudo & dissimilitudo, sunt relationes reales & fundantur super qualitatem. ergo &c.

Respondeo, fundamentum relationis non debet considerari præcise vt res est, sed vt stat sub ratione fundandi, nam vt res potest esse substantia, quantitas, qualitas, actio, passio, vt autem stat sub ratione fundandi, dico quod non potest fundare, nisi vt induit rationem quantitatis, puta vnus vel numeri vel rationem potentie actiue & passiue vel rationem dependentie &c. Vnde substantia non fundat idē-

Epit. Iauelli.

O

titatem

EPITOME LIB. V.

ritatem nisi vt vna, nec diuersitatem nisi vt plures. Idem dico de qualitate, vt fundat similitudinem & dissimilitudinē, propterea inquit Arist. in tex. Hæc enim secundum vnum dicitur omnia, eadem nanque quorum substantia vna. Similia vero quorum qualitas est vna &c. Modi vero ad aliquid ratione alterius sunt tres.

Primus est, ratione generis, vt medicina dicitur ad aliquid, quia continetur sub scientia vt sub genere, quæ dicitur ad aliquid, & est in tertio modo, vt visum est.

Secundus est, ratione habentis, vt æqualitas & similitudo, & aliæ habitudines dicuntur ad aliquid, quia habentia æqualitatem, i. æqualia &c. dicuntur ad aliquid. Hic tamen modus est improprius, quoniam huiusmodi habitudines sunt quibus aliqua dicuntur ad aliquid & non quæ dñr ad aliqd.

Tertius est, ratione accidentis, vt subiectum dicitur ad aliquid, quoniam enim accidens dicitur ad aliquid, puta quia hic homo est duplex secundum quantitatem comparatus alteri homini, dicitur hic homo ad aliquid, quia ei accidit esse duplum, quod est ad aliquid, & Socrates dicitur aliquid quia est seruius, quod est aliquid. Hæc de modis aliquid dicta sint. Et hic terminatur secundus tractatus.

INCIPIT TERTIVS TRACTATUS,

Eiusdem Chrysostomi Iauelli, super quinto libro Metaphysicæ.



In hoc tertio tractatu distinguenda sunt nomina quæ significant per modum proprietatum, siue passionum entis, & sunt istæ.

Perfectum.

Terminus.

Secundum quod.

Dispositio.

Habitus.

Passio.

Priuatio.

Habe

Habere.

Ex aliquo.

Pars.

Torum.

Colobon.

Genus.

Falsum.

Accidens.

C A P V T P R I M V M.

IN primo cap. assignandi sunt modi huius nominis perfectum, & sic procedemus.

Primo, ponemus modos perfecti secundum se.

Secundo, declarabimus quomodo isti modis diuersis diuersimode conueniunt.

Tertio, assignandi sunt modi, quibus aliqua dicuntur perfecta in ratione alterius.

Quantum ad primum, aduerte, q̃ modi perfecti secundum se, sunt tres.

Primo, illud perfectum est, cui nulla particula deest requisita ad integritatem suam, & hoc est perfectum in quantitate dimensionem suam, & non verificatur nisi in rebus quantis, ut tempus puta dies dicitur perfectum quando pertransierint 24. hore, & tempus vite cuiuslibet viuentis dicitur perfectum, quando nulla pars deest tali tempori, & homo ut totum integrale dicitur perfectus, quando nullum membrum sibi deest, nec est membrum diminutum, nec excedens conuenientiam nature sue, & hoc modo dicitur corpus perfectum, quia cum non dentur nisi tres dimensiones nulla sibi deest & mundus corporeus dicitur perfectus, quoniam nulla substantia corporea ad eius integritatem requisita sibi deest.

Secundo, illud est perfectum, cui nihil deest de virtute, & bonitate secundum quod sibi competit, ita quod in genere suo non datur excedens ipsum in virtute, nec ipsum in virtute, nec ipsum est minus habens quam habeat habere, & dicitur perfectum secundum qualitatem. Er hic modus verificatur tam in rebus corporeis, quam incorporeis, ut sol

perfectus est in luce, & intelligentia est perfecta in virtute motiua & in scientia, & medicus perfectus est cui nihil deest requisitum ad actionem medicinæ, nec datur superior eo in tali arte, & aduerte quod hic modus adeo communis est, quod etiam vsutur in rebus prauis, dicimus enim perfectum mendacem quando in summo mentitur, & perfectum furē, quando est in summo latrocinij nec est mirum, quoniam cum perfectio sit bonitas, vtimur etiam per extensionem nomine boni in rebus malis, vt bonus supplantator bonus fur & est, quando aliquis in malo opere ita prudenter procedit sic ut bonus in bono opere.

Tertio, illud est perfectum quod est consecutum finem suum, vt homo dicitur perfectus quando est beatus, tunc .n. attingit vltimum bonitatis suæ, & dicitur bonitatis suæ. Ad differentiam eorum qui cōsequuntur finem malum, vt adulter & proditor patriæ, isti enim non merentur dici perfecti ex fine malo, sed miseri, quoniam sicut malum opponitur bono, ita & perfectioni. Tu tamen aduerte, quod quoniam finis habet rationem vltimi, consueuerunt loquentes extendere hoc nomen perfecti, ad quodcunque vltimum etiam quod sit malum, vnde cum res omnino destructa vel corrupta fuerit, solet dici perfecta destructa, sed hæc locutio est impropria, & solum per metaphoram sicut & quando dicimus mortem esse finem, quia est vltimum. Quod tamen non est proprie dictum, nam de ratione finis duo sunt, scilicet esse vltimum & esse appetibile, est enim id gratia cuius operamur, sed secunda conditio deficit in morte. quare &c.

Quantum ad secundum, aduerte, quod illi modi præcipue primus & secundus alicui cōueniunt absolute & simpliciter alicui in genere. Absolute quidem primus conuenit mūdo corporeo, qui continet omnem dabilem magnitudinem extra quem, vt probatur in secundo cœli, nulla est magnitudo nec corpus nec locus nec tempus, secundus autem modus absolute conuenit soli Deo qui in se continet omnes dabiles bonitates cuiuscunque generis, nec ab aliquo exceditur nec ab alio accipit, nec extra ipsum est bonitas, quæ non sit ab ipso, & dicit Comment. in comm. 21. quod ista est dispositio primi principij, id est Dei. In genere autem primus modus conuenit

conuenit illi cui nihil deest requisitum ad integritatem substantiæ suæ corporeæ, & eodem modo omne corpus dicitur perfectum, in quantum sibi inest omne genus dimensionis, scilicet longitudo, latitudo, & profunditas ex opposito lineæ & superficies dicuntur imperfecta, secundum, vero modus inest illi, qui habet omnem virtutem & bonitatem sibi debitam, pro tali genere & à nullo exceditur in tali genere, nec diminuitur, ut perfectus medicus, perfectus musicus, perfectus philosophus.

Quantum ad tertium, aduerte aliqua nominari perfecta ratione alterius, quatuor modis.

Primo, quia producit aliquid perfecte, ut dicitur in quarto Meteor. perfectum est vnumquodque cum producit tale quale ipsum est.

Secundo, quia habet aliquid perfecte, ut sol dicitur perfectus quia habet perfectam lucem.

Tertio, quia imitatur aliquid perfecte, ut discipulus perfectus, quia in docendo perfecte imitatur magistrum.

Quarto, quia repræsentat aliquid perfecte, ut imago conformis imaginato sic omnis effectus vniuersus dicitur perfectus quando perfecte assimilatur causæ suæ. Hæc de perfecto dicta sint.

C A P V T I I.

IN secundo cap. assignandi sunt modi huius nominis terminus, sed prius declarandum est, quid sit terminus consideratione metaphysica. Aduerte igitur quod terminus est ultimum cuiusque rei. Intra quod continetur quidquid ad terminatum pertinet, & extra quod nihil rei primæ terminate restat, ut primum cælum est terminus mundi corporei, quoniam intra ipsum continentur omnes partes mundi, & extra ipsum nihil restat. Dixi autem rei primæ terminate, quoniam non inconuenit idem esse ultimum partis præcedentis, & principium partis sequentis, ut punctus in medio lineæ potest dici terminus, id est ultimum primæ medietatis, non autem secundæ.

Modi autem termini sic diffiniti sunt quatuor.

Primus, dicit ultimum magnitudinis vel habentis magni

O iij tudinem,

tudinem, vt superficies est terminus corporis, & superficiiei lineæ, & lineæ punctus, & cutis in animali est terminus partiū animalis. s. ossis, carnis, nerui, sanguinis &c.

Secundus, dicit vltimum ad quod est motus, siue actio, vt quantitas debita rei animate, est terminus augmenti. Dixi autem ad quod est motus, quoniam licet solitum sit dicere, motum esse inter duos terminos. s. à quo, & ad quem, tamen proprie dicitur terminus, id ad quod est motus, quoniam de ratione termini est terminare, id est vltimare.

Tertius, dicit finē gratia cuius aliquid fit, quoniam finis est vltimum ad quod respicit agens, vt sanitas est terminus medicantis, & habitus est terminus ædificantis.

Quartus, dicit rei diffinitionem significantem rei substantiam, & quiditatem dicitur autem diffinitio terminus quia habita rei diffinitione haberi potest vltimata rei cognitio. Nam habita diffinitione demonstrari possunt passionēs de subiecto, quibus demonstratis acquisita est de re scibili sciētia. Quod si diffinitio est terminus cognitionis, est etiam terminus rei, quia diffinitio significat essentiam qua vnumquodque terminatur in certo gradu entis, & quoniam primum ens est illimitatum & penitus in terminatum vtpote existens æquiualeuter omne ens, ideo de eo non potest haberi diffinitio proprie dicta. Patet igitur quot modis dicitur terminus apud metaphysicum. Quod dico, vt excludam considerationem logici, de qua nunc non me intromitto.

Et aduerte, q̄ si comparetur terminus ad principium tot modis dicitur quo & principium & amplius, nā omne principium est terminus, vnde principium lineæ. i. punctus dicitur terminus, sed non omnis terminus est principium, nam punctus in quo finitur linea est terminus, sed non est principium. Hæc de termino dicta sint.

C A P V T I I I.

IN tertio capite distinguenda sunt hæc tria, secundum quod, secundum se. i. per se, & dispositio. Ratio autem distinguendi hæc tria successive est hæc, quoniam vt patebit aliquis modus secundum quod, est idem cum aliquo modo

modo per se. Item aliquis modus secundum quod dispositione, ut manifestabitur.

Aduerte igitur, quod ly *scilicet* quod quatuor modis dicitur.

Primo, dicitur essentia & quiditate rei, nam si quæzatur, secundum quid homo est risibilis, responderetur secundum quod est animal rationale, & secundum quid mouet seipsum, responderetur, secundum quod est substantia animata.

Secundo, dicitur de primo subiecto & immediato recepti uo alicuius accidentis, ut si quæzatur secundum quod corpus est coloratum, responderetur secundum superficiem, & aduerte hunc modum pertinere ad causam materialem, quoniam subiectum habet rationem materiæ, primus autem ad causam formalem.

Tertio, dicitur vniuersaliter de omni causa, nam idem est quæzere secundum quam causam id factum est. i. congelata est aqua, vel factum est tonitruum, & per quam causam, sed hic modus idiomate latino non est multum in usu.

Quarto, dicitur de positione siue de situ, ut cum quæzitur, secundum quem stat ille in ecclesia. i. iusta vel penes quem. Sed hic modus vsitator est idiomate græco. Hæc de secundum quod dicta sint.

Modi vero secundum se. i. per se sunt quatuor.

Primo, illud dicitur per se quod significat rei essentiam, & quoniam diffinitio & partes diffinitionis ad essentiam, spectant, ideo quando dicitur diffinitio, vel pars diffinitionis de diffinito continetur in hoc primo modo per se.

Secundo, illud est per se, quod apparet in aliquo primo subiecto, siue secundum totum, siue secundum partem.

Exemplum primi, superficies est colorata.

Exemplum secundi, homo est viuens, quia eius pars est anima cuius naturæ est esse primum principium vitæ.

Tertio, illud est per se quod conuenit alicui sine alia causa, sed ex se, ut quando idem prædicatur de seipso, nam licet sint multe causæ quare homo existit, puta anima efficiens, materia, tamen huius nulla per se hoc tertio modo. Et aduerte, quod hic modus maxime verificatur in Deo glorioso, quia non mediante alio est omne quod est, unde dicitur hoc tertio modo, per se bonus, per se viuens, per se intelligens &c.

O iiij Quarto,

Quarto, illud est per se, quo sine consortio est, & tunc ly per se æquipollet solitariæ, vt fenix est per se in mundo. Et hic modus ponitur tertius in libro Poster. Primus autem & secundus correspondet primo & secundo in posterioribus & tertius hic positus possunt correspondere quarto in posterioribus.

Quantum ad hoc nomen dispositio, aduerte primo quid sit, deinde quot modis dicatur. Est igitur dispositio ordo partium in quolibet habente partes, vt dispositio domus est, q̃ fundamentum sit inferius, & parietes in medio & tectum superius. Modi eius sunt tres.

Primus est, secundum ordinem partium in loco, ita q̃ sicut totus locus correspondet locato, ita partes loci correspondant partibus locati, puta totus locus à concavo orbis lunæ vsque ad centrum correspondet quatuor elementis, huius autem totalis loci, alia pars correspondet igni, alia aëri &c. Et ex hoc ordine dicuntur elementa bene disposita secundum locum.

Secundus est, secundum ordinem partium quo ad virtutem, siue potentiam actiuam, aut passiuam, puta respectu nutritionis, q̃ dentes, q̃ stomachus, q̃ cetera membra vitalia bene se habeant, & tunc dicimus esse animal dispositum ad nutriendum se, quando autem male se habent dicitur animal indispositum.

Tertius est, secundum ordinem partium quo ad speciem siue formam totius, & iste modus requirit tres condiciones.

Primo, q̃ omnes partes sint permanentes, vnde in successu suis non seruatur hic modus dispositionis.

Secundo, q̃ omnes partes sint in toto, vt requirit forma totius, puta in homine, caput sit sursum, pedes deorsum, oculus in capite &c. Vnde in monstro non seruatur hic modus dispositionis.

Tertio, q̃ partes adinuicem continuentur, propterea in homine cuius pedes, aut manus essent abscisse, non seruatur hic modus dispositionis.

Et aduerte, vt dicit Comment. in comm. 24. q̃ dispositio secundum primum modum, est prædicamentum situs, & quo ad tertium modum est differentia quantitatis, dictum est .n.

in prædicamentis aliquam quantitatem habere positionem, vt linea, superficies &c. aliquam autem non, vt tempus & numerus. Et quantum ad secundum modum, vt dicit B. Th. est prima species qualitatis. Hæc de dispositione & de modis eius dicta sint.

C A P V T I I I I .

IN quarto cap. assignandi sunt modi huius nominis habitus, deinde passionis, deinde priuationis, deinde huius infinitiui habere.

Quantum ad habitum Arist. duos modos assignat.

Primus est habitus dicitur de eo quod est medium inter hominem vestitum & vestem, & est quasi vt actio, aut passio quædam, nam sicut inter calefaciens & calefactum mediat calefactio, quæ ex parte agentis dicitur calefactio, actio, & ex parte passi dicitur calefactio passio, ita inter habentem vestem, & habitam vestem mediat habitus, qui ex parte habentis signatur vt actio, ex parte habite vestis signatur vt passio. Quid autem realiter sit, an respectus, an absolutum determinabimus in q. metaphysicalibus.

Sed dices, si habitus est quid medium inter vestitum & vestem, nunquid inest vestito mediante alio habitu.

Respondeo, q. non, aliter esset processus in infinitum, nã si habitus inest vestito mediante alio habitu, quæri poterit de illo alio sicut de primo, & sic de alijs dicendum est, ergo habitum inesse vestito per seipsum, & non per alium habitum medium, vnde idem est iudicium de habitu, sicut de accidente quod inest subiecto non mediante alio accidente, vanum enim est dicere albedine inesse niui, mediante alia albedine & vanum est dicere relationem inesse relatiuo mediante alia relatione, & aduerte, q. habitus sic dictus est vltimum prædicamentum.

Secundus est habitus, & dicitur dispositio .i. qualitas qua aliquid bene, vel male dispositum est, vt virtute homo bene disponitur moraliter & vitio male, sanitate bene disponitur quo ad actione naturales, ægritudine autem male. Sed aduerte habitum sic dictum posse conuenire alicui dupliciter.

Primo

Primo, secundum se & sic homo existens vere sanus dicitur habere habitum sanitatis in se & secundum se.

Secundo, in respectu ad aliud, ut laborans febre quartana potest dici esse sanus respectu laborantis febre continua. Item aduerte, quod non solum de bona vel mala dispositione totius dicitur habitus. hoc secundo modo, sed etiam bona dispositio partium, puta si quis sit sanus capite, & infirmus pede, potest dici habere habitum sanitatis secundum partem, & habitum sanitatis secundum partem, & habitum ægritudinis secundum partem. Idem dico respectu corporis & animæ, contingit enim forte habere habitum bonum secundum corpus, quia sanus & robustus, & malum secundum animam quia vitiosus & profanus, & habitus sic dictus est in prima specie qualitatis, ut patet in prædicamentis. Et aduerte huiusmodi habitum esse medium inter potentiam & actum secundum & constituitur res per ipsum in actu primo, unde sciens dormiens dicitur sciens in habitu. Hæc de modis habitus dicta sunt.

Quantum ad modos passionis, aduerte quatuor positos ab Arist.

Primo, omnis qualitas secundum quam fit vera alteratio, dicitur passio, unde omnis qualitas in tertia specie qualitatis potest dici passio, unde & Arist. in prædicamentis appellat huiusmodi qualitates, passionem vel passibiles qualitates & secundum eas proprie & solum fit alteratio, ut probatur in 7. Phys. tex. 14. Huiusmodi autem qualitates sunt primæ qualitates elementares, & secundæ qualitates causatæ à primis, ut sapor, & odor, & durities, & mollicies, & aliæ de quibus agitur in 4. lib. Meteor.

Secundo, dicitur de omni motu alterationis denominato ab his qualitatibus, ut se tenet ex parte recipientis ut calfactio aquæ dicitur passio, & vniuersaliter omnis receptio sensibilis qualitatis in subiecto dicitur passio, & hoc modo passio est prædicamentum oppositum prædicamento actionis.

Tertio, dicitur de alterationibus nociuis, id est trahentibus naturam rei, à conuenienti dispositione ad sibi contrariam, ut ægroratio, & hic modus est proprius & famosus, nam ut dicit Arist. in 7. Phys. tex. 16. ridiculum est dicere rem dum
perfi-

perficitur alterari, vt quando infirmus sanatur, aut domus accipit complementum. Alteratur autem proprie, quando deterioratur vnde febricitantem dicimus alteratum, idem dicendum est de passione, nam communi sermone passio proprie dicit receptionem disconuenientis & contristatiue qualitatis.

Quarto, dicitur de magnis calamitatibus & de magnis prosperitatibus & gaudijs non quidem secundum se, sed vt cadunt in malum nescienti bene vti bona fortuna, & nescienti se regulare in magnis exultationibus propter huiusmodi abusum, quam plures in multis malis inciderunt, ideo sicut calamitates magne dici consueuerunt passionibus, sic & magne exultationes. Hæc de modis passionum dicta sint.

Quantum ad modos priuationis, aduerte, q̃ cum dicat negationem cum aptitudine in subiecto, possunt assignari ex parte aptitudinis & ex parte negationis. Ex parte aptitudinis sunt quatuor modi.

Primo, dicitur priuatio siue priuari de eo quod est aptum, natum esse in aliquo, non tamen in eo quod dicitur priuatum vt lapis priuatus est oculis, qui licet non sint apti esse in lapide, tamen sunt apti esse in aliquo alio puta in homine. Si autem tale non est aptum esse in aliquo de eo non verificatur priuatio, vanum est enim dicere lapidem esse priuatum chimera, quoniam cum sit ens fictitium in nullo est aptum esse realiter.

Secundo, dicitur de eo, quod licet non sit aptum habere, tamen aliquod sui generis est aptum habere, vt talpa dicitur priuata visu, quem licet talpa non sit apta habere, tamen aliquid sui generis, vt homo, canis, leo, equus &c. Quæ continentur sub animali, vt talpa sunt apta habere.

Tercio, dicitur de eo, q̃ est aptum habere secundum seipsum, & non habet pro tempore sibi conuenienti & in quo loco, & secundum talem partem & secundum modum conuenientem, & hæc est propriissima priuatio, propter primam circumstantiam, canis non est cæcus ante nonum diem propter secundam non dicitur nox esse in centro terræ, quia lux solis non est apta ibi illustrare, propter tertiam non dicitur homo caluus secundum manum, quia capilli non

non sunt apti esse in manu, propter quartam non dicitur homo parvus, quia non est magnus sicut turris, nec tardus in motu, quia non currit ut ceruus.

Quarto, dicitur de eo, à quo aliquid per vim auferitur, quod est aptum possidere illud ut viator dicitur priuatus vestite, quam prædones ab eo rapuerunt, & hic modus est valde famosus apud communiter loquentes, unde solemus dicere aduersam fortunam priuasse sortem filijs aut amicis aut diuitijs &c. Igitur inter omnes modos tertius & quartus sunt magis in usu.

Ex parte autem negationis quinque sunt modi.

Primo, negatio alicuius solet dici priuatio, ut æqualitas, iniustitia, inuisibile, eo quod non habet calorem omnino, nec lucem.

Secundo, non solum negatio alicuius solet dici priuatio, sed etiam si illud habeatur defectiue aut turpiter sicut infirmus dicitur priuatus colore, quia aut non habet debitum colorem, aut habet turpem. Et raucus dicitur priuatus voce, quia non habet bonam.

Tertio, quod habet parum de eo quod est aptum habere dicitur priuatum esse, ut infirmus grauis dicitur priuatus viribus & spiritu, & sermone, qui de ijs parum habet.

Quarto, quod non de facili aut bene, est tale vel tale dicitur priuatiue tale ut lapis est infecabilis, quia cum difficile te secatur.

Quinto, dicitur aliquid priuatius & proprie si non solum defectiue aut turpiter, aut parum, aut non bene, sed si omnino non habet ut ille dicitur cæcus, non quia est monoculus, aut parum videt, sed quia omnino non videt, & tamen est aptus videre.

Et aduerte, quod inter hos modos, primus in impropriissimus, & quintus propriissimus, medij autem, medio modo se habent. Iterum aduerte, quod quoniam priuatio proprie dicta, dicit negationem & aptitudinem in subiecto, cum circumstantijs suprapositis inter habitum & priuationem datur medium, unde ante omnis homo est iustus vel iniustus, sed potest esse non iustus ut puer, & in hoc differt oppositio priuatiua ab oppositione contradictoria in qua non datur medium,

medium, unde & Cōment. dicit in cōm. 27. habitus & priuatio diuidunt verum & falsum non in omnibus rebus, sed in subiecto, scilicet proprio & apto, hæc de modis priuationis dicta sint.

Habere autem dicitur quatuor modis.

Primo, de eo, quod habet aliquid in dispositione, & facultate sua, vt febris habet febricitantem. Tyrannus ciues possessor rem possessam dominus seruum.

Secundo, subiecto, cui inest forma, aut substantialis, aut accidentalis, vt materia cœli habet formam cœli corpus habet animam, cuprum habet statum, superficies habet colorem, intellectus habet scientiam, & vniuersaliter hic modus verificatur de subiecto respectu cuiuscunque accidentis sibi existentis.

Tercio, de omni continente respectu contenti, & hoc modo cœlum habet omnia elementa, & elementata, & omne totum habet suas partes, & omnis locus suum locatum.

Quarto, de omni prohibente aliquid moueri, aut operari secundum impetum suum, sic columnæ habent domum, quoniam prohibent ipsam moueri secundum impetum suum, scilicet deorsum, sic apud poëtas Athlas habet cœlum, quia prohibet ipsum cadere, sic anima habet corpus, quia prohibet ipsum dissolui, quandiu est in eo. & hoc etiam modis continens habet contentum, quia tenet ipsum vnitum aliter separarentur partes contenti abinuicem. Isti sunt modi ipsius habere, quibus, vt inquit Arist. correspondet modi essendi, qui in quarto phys. sunt octo, ex quibus primus, & secundus, tertius, quartus, & octauus correspondet tertio modo ipsius habere. Quintus autem correspondet secundo modo ipsius habere. Sextus, correspondet primo modo ipsius habere. Septimus, vero correspondet quarto modo ipsius habere. Hæc de modis habitus, & passionis, & priuationis, & habere dicta sint.

C A P V T V.

IN quinto cap. distinguenda sunt nomina, quæ important partem, aut totum, siue integrale, siue essenziale, siue

E P I T O M E L I B. V.

ue vniuersale, & quoniam pars est ex qua aliquid componitur, ideo prius distinguendum est hic terminus, ex quo, deinde pars, deinde totum, deinde colobon, deinde genus.

Aduerte igitur, quòd aliquid potest dici fieri ex aliquo tripliciter.

Primo, proprie, & primo.

Secundo, propriè, sed tantum secundum partem.

Tertio, improprie.

Modi quibus aliquid fit propriè, & primo sunt quatuor.

Primo, aliquid fit ex aliquo, vt ex materia, siue remota, siue proxima. Remota quidem omnia liquabilia fiunt ex aqua, proxima autem, vt domus fit ex lapidibus, & statua ex ære & hic modus procedit via compositionis, & est oppositus tertio modo, vt apparebit.

Secundo, aliquid fit ex aliquo, vt ex primo mouente sic pugna fit ex conuicio &c. & omne primum, ex quo originatur aliquid.

Tertio, aliquid fit ex aliquo via resolutionis, sicut ex composito componentia, resoluitur enim compositum in componentia. & hoc modo fiunt elementa ex elementato, versus ex poemate, literæ ex syllabis, lapides ex domo. & hic modus opponitur primo non solum, quia hic attenditur penes resolutionem, & illè penes compositionem, sed quia hic est processus à forma ad materiam, illic autem est processus à materia ad formam. partes enim habet rationem materiæ, totum autem habet rationem formæ, & perfecti.

Quarto, aliquid fit ex aliquo, sicut species ex parte speciei, vt homo ex anima, & corpore, vel ex carne, & osse, & neruo, dicitur autem pars speciei illud, sine quo non saluatur natura speciei, vel quod est de ratione speciei. Constat autem, quòd non saluatur natura speciei, puta homo sine carne, & osse, & neruo. saluatur autem sine his carnibus, & his ossibus. & ideo huiusmodi partes indiuiduales dicuntur partes materiæ. Ad hoc enim quod saluetur natura specifica hominis, non est necesse esse hunc hominem, ex consequenti potest esse homo sine his carnibus, quoniam si non ex his etiam ex alijs, sed de partibus speciei, & materiæ ad plenum dicemus in libro septimo.

Modus autem, secundum quem aliquid fit ex aliquo secundum partem est, quando aliquid dicitur fieri ex aliquo toto. & tamen non fit ex toto, nisi ratione partis, ut filius dicitur ex patre, non ratione totius substantiæ patris, sed ratione spermatis, & dicitur fieri ex matre non ratione totius, sed ratione menstrualis materiæ, & plantæ sunt ex terra ratione nutrimenti tracti ex terra.

Modus vero secundum quem improprie, & transumptiue fit ex aliquo est quando ly ex, stat pro post, ut quando dicimus ex die fit nox, id est post diem, ex nubo fit serenum.

Et aduerte, quod vniuersaliter duobus modis contingit aliqua fieri ex aliquo.

Primo, quando transmutantur adinuicem sic, totum fit ex partibus via generationis, & partes fiunt ex toto via corruptionis.

Secundo, quando vnum fit post aliud præcise, ita quod ibi est tantum ordo secundum tēpus, ut ex festis Dionysijs fiunt festa tragelia. Hæc de modis huius termini, ex quo dicta sine.

Pars autem dicitur quinque modis, secundum viam Cōmentatoris, sed secundum B. Thom. quatuor modis, quoniā in primo comprehendit duos.

Primo, dicitur de parte quantitativa non aliquota, nec mensurante totum, ut duo sunt pars trium, & tria sunt pars quinque. & hoc modo omne quantum subtractum ab aliquo quanto, modo fit minus, eo à quo subtrahitur dicitur pars eius.

Secundo, dicitur de parte quantitativa aliquota, & mensurante, ut tria sunt pars nouem, quoniā ter tria constituunt nouem. & hoc modo omne quantum subtractum ab aliquo toto, si aliquotiens sumptum præcise mensurat totum dicitur pars eius. & hic modus est qui obseruatur à geometra, & est propriissimus modus.

Tertio, dicitur de parte subiectiua, & verificatur de omnibus inferioribus, in quæ diuiditur superius, & hoc modo indiuidua sunt partes speciei, & species partes generis, & genera subalterna partes generalissimi.

Quarto, dicitur de parte essentiali, id est ex qua constat natura

natura rei, vt corpus, & anima sunt partes animati, & metal-
lum est pars statuæ, & angulus est pars trianguli. constat
enim natura trianguli ex tribus angulis. Huiusmodi autem
pars essentialis aliquando dicitur pars speciei, vt sumpta in
vniuersali, sicut quando dicitur homo est quid compositum
ex corpore, & anima rationali, aliquando dicitur pars ma-
terię, vt quando dicitur hic homo constat ex hoc corpore,
& hac anima, sed vt prædiximus de partibus speciei, & parti-
bus materię loquemur in libro septimo.

Quinto, dicitur de parte diffinitiuā, vt de genere, & diffe-
rentia, ex quibus constituitur tota diffinitio, sed aduerte q̃
pars diffinitiuā dicitur pars secundum rationem, & non se-
cundum rem. prædicatur enim de diffinito in recto, quia di-
cit totam naturam diffiniti, licet aliter genus, quia sub con-
ceptu confuso, & aliter differentia, quia sub conceptu deter-
minato. Hæc de modis quibus pars dicitur, dicta sint.

Locuturi de modis totius, prius diffiniemus ipsum totū,
inquantum totum absolute. Aduerte igitur, q̃ totum ab-
solute est illud, cui nulla partium suarum deficit, ex quibus
constituitur natura totius, & continentur in toto, ita quod
sunt vnum in eo, quia non habent esse separatim, sed existūt
per esse totius, quandiu componunt ipsum. & hæc diffinitio
verificatur de quolibet simpliciter toto, quoniam totum &
perfectum, siue completum videtur esse idem ex tertio phy-
sicorum tex. 63.

Modi autem totius sunt duo.

Primus est, de toto vniuersali, vt genus, & species sunt
enim continua suorum inferiorum; sicut totum continet
partes.

Secundus est, de toto essentiali, & integrali, vt homo in-
quantum est compositum naturale, & linea, & numerus qui
narius inquantum sunt composita quantitativa.

Differunt autem isti duo modi in hoc, quod totum vni-
uersale non proprie est quid compositum ex partibus subie-
ctiuis, sed ita continet eas, quod est vnaquæque earum, præ-
dicatur enim in recto de partibus. nam & homo, & leo, &
capra sunt animal, totum vero integrale, & essentialē est cō-
stitutum, & resultans ex partibus, ita quod nulla partium su-

scipit prædicationem totius in recto . non enim anima est homo , nec materia sua est homo , nec brachium est homo . Et aduerte , quòd in toto integrali possunt esse partes in potentia , vt in linea ante diuisionem , & partes in actu , vt in exercitu , & in domo . quilibet enim homo in exercitu habet esse separatim ab altero , sic & singuli lapidès , ex quibus constructa est domus . est tamen verum q̃ perfectius est , verius est totum , in quo partes sunt in potentia , quoniam totalitas est quædam vnio . vnde vbi maior vnio partium , ibi perfectior totalitas .

Iterum aduerte , q̃ totum continuum potest esse secundum naturam , vt lapis , & planta . & potest esse secundum artem , vt tabulæ , in quibus plura ligna sunt compaginata , cõtinuũ quidem per naturam est magis totum , quoniam est magis vnum , vt probauimus in tract. 2. cap. 1. vbi id probauimus duplici ratione . vltra hoc autem q̃ est magis totum : aduerte , q̃ tripliciter diuersificari potest propter situm , & dispositionem partium . nam licet in omni continuo partes sint situate , & positionem habeant tamen in aliquibus continuis quocunque modo situentur , siue sic , vel sic ponantur non diuersificatur natura rei , & huiusmodi sunt corpora humida , quæ figurantur non propria , sed figura continentis . & in his nominamus totum per ly omne . Dicimus omnis aqua , & omne oleum , & non dicimus , nisi improprie , tota aqua , & id magis verificatur in idiomate græco , nam in latino cõsueuimus nominare huiusmodi per ly omne , & per ly totum . in aliquibus autem requiritur determinata positio partium , ita quòd non constaret natura rei , si aliter disponerentur , vt in animali , & in domo , & in alijs , in quibus requiruntur diuersæ partes sic , & non aliter situate . & in his nominamus totum nomine totius , & non per ly omne . non enim dicimus omne animal , quando est tantum vnum , sed totum animal , aliquando autem per transpositionem partium non mutatur rei natura , sed figura . & ista sunt , quæ habent partes eiusdem naturæ . & tamen possunt figurari diuersis figuris , sicut vestis linea , cuius omnes partes sunt ex ligno . in qua ex vario situ partium , licet non mutetur natura rei , qui semper erit linea , tamen mutabitur quo ad figuram . nam

EPI T O M E L I B. V.

alia figura causatur in veste, si partes anteriores fiant posteriores, vel superiores fiant inferiores. & in his totum potest nominari per ly omne, ex parte naturæ rei. & per ly totum ex parte figuræ.

Et si quæras, quare totum similium partium dicitur omne, num autem totum dissimilium partium.

Dico id esse, quoniam totum similium partium sola diuisione fit multa, quorum singulum est eiusdem naturæ cum toto, vnde vna aqua sola diuisione fit plures aquæ, quare potest dici vna existens. & omnis hæc aqua, & omnes hæc aquæ, id autem non seruat in toto dissimilium partium, quoniam nulla est eiusdem naturæ cum toto. & ex diuisione non multiplicatur natura totius, immo destruitur ex consequenti non continet in se actu, nec in potentia proxima pluralitatem eiusdem naturæ. vnde in homini non verificatur omne quod pluralitatem signat cum sit signum vniuersale, verificatur autem totum quod collectionem, siue resultantium ex pluribus signat. Hæc de modis totius absolute sumpti sint.

Circa colobon, quod dicitur totum diminutum, vel deficiens in aliqua suarum partium. Aduerte, quod Arist. non assignat plures modos, quoniam non dabiles sunt, nisi secundum magis, & minus, puta homo cui deficiunt manus, & pedes est magis colobon, quam ille cui tantum pedes deficiunt. immoratur igitur ad declarandum conditiones requisitas ex parte totius diminuti, & ex parte particule deficientis ad hoc, quod aliquid dicatur colobon. Aduerte igitur, quod ex parte totius requiritur, ut sit totum quantitatum ad differentiam totius vniuersalis, ut est genus, aut species. nam ex subtractione individui non dicitur species coloba. aliter omnes species corruptibilium semper essent colobe. & quod sit ex dissimilibus partibus compositum vnde homogenea ex subtractione partis non sunt coloba, ut aqua, caro, os, neruus. & quod subtractum semper sit minus. vnde si aliquid componatur ex duabus partibus tantum, & æqualibus. ablata vna reliquum non potest dici colobon, vnde lapis bicubitalis ablato cubito non dicitur colobon, nec homo sectus in duo media. Et quod post ablationem partis remaneat nomen, & substantia totius, vnde numerus ex subtractione unitatis non

non dicitur colobon, quoniam non remanet nomen, nec eadem species numeri. & quòd transpositio partium faciat differentiam in toto, eo modo quo declarauimus in modis totius. vnde vt diximus homogenes non possunt dici coloba. & quòd totum sit ex partibus continuitatis adinuicem. vnde exercitus ex subtractione alicuius militis non dicitur colobon, nec harmonia ex subtractione vnius vocis dicitur coloba, quoniam componitur ex vocibus grauib, & acutis, quæ adinuicem non continuantur, sed proportionantur. Ex parte autem particulæ subtractæ, requiritur quòd non sit ex principalibus, propter quas seruatur totius substantia. vnde animal absciso capite, nec planta abscisa radice possunt dici coloba, quoniam destruitur substantia totius, & quòd sit situata in extremitatibus, vt auris, nasus, manus, ramus. vnde si ab homine aufertur pars carnis, puta ex coxa, vel etiam aufertur aliquod intrinsecum, puta splen. non dicitur colobon. & quòd pars ablata non regeneretur. vnde ex subtractione folij, aut rami non dicitur arbor colobon, nec animal subtractione pilorum, nec homo subtractione vnguium, aut capillorum. Hæc de colobon dicta sint.

Vltimo assignandi sunt modi huius nominis genus, & quot modis dicuntur aliqua diuersa genere.

Genus igitur quatuor modis dicitur.

Primo, de continua generatione multorum conuenientium in eadem natura specifica, vt hominum genus.

Secundo, dicitur de principio generante, à quo primo descendit talis multitudo, vt Romulus dicitur Romanorum genus. & Heber Hebreorum genus. & sic primus pater cuiuscunque multitudinis conuenientis in natura specifica dicitur genus. & digniori modo, quàm mater, quoniam pater est agens. mater vero vt materia, licet & prima mater aliquando dicatur genus, vt pleias dicitur genus pleiadum, quoniam trahunt originem à pleia matre.

Tertio, dicitur de primo, & cõmuni subiecto rerum diuersarum formarum, vt aqua est genus omnis metalli, quia est prima eorum materia. & superficies est genus omnium figurarum superficialium, siue planatum. est enim proprium primum subiectum in quo figurantur omnes figuræ planæ,

E P I T O M E L I B. V.

ne, sicut corpus est genus omnium figurarum solidarum.

Quarto, dicitur de eo, quod primo ponitur in diffinitione, & dicitur de diffinito in quid, & diuiditur differētijs, quæ sunt qualitates generis. qualificant enim & determinant naturam generis, ut animal est genus. primo enim ponitur in diffinitione speciei, puta hominis, & dicitur de eo in quid, & diuiditur rationali, & irrationali quibus determinatur ad species, ideo dicuntur esse qualitates suæ. & aduerte, quod hæc doctrina non deuiat à doctrina Porphyrij. nam in prædicabilibus, ut videre poteris ponit primum, & secundum modum eo modo, & ordine quo Arist. ponit, sed in secundo modo in hoc differt ab Arist. quod Porphyrius addit locum, siue patriam, & Arist. ponit matrem, quartum modum etiam manifeste posuit Porphyrius, cum dixit, Genus est cui supponitur species, & prædicatur de pluribus specie differentibus inquit. tertium modum non posuit manifeste, quia potius ad mathematicum, & metaphysicum spectat, quam ad logicum, possumus tamen dicere, quod virtualiter posuit, quoniam tertius, & quartus, quasi ad vnum reducuntur, eo quod vterque habet rationem materiæ, & potentie. nam sicut subiectum se habet ad formam sic genus ad differētiā, distinguuntur tamen in hoc, quod genus non est vere, & realiter subiectum, nec materia. prædicatur enim in recto. de eo cuius est, & dicit totum rei naturam sub conceptu tamen generico, qui est conceptus confusus. subiectum autem est materia non dicit totam rei essentiam, sed partem, ut patet. Hæc igitur de modis dicta sint.

Quantum ad diuersa genere, aduerte, quod Aristot. non immoratur circa primum, & secundum modum generis, quoniam magis ad oratorem, quam ad Philosophum spectant. assignat autem diuersa genere, iuxta tertium, & quartum modum.

Primo, igitur illa dicuntur diuersa genere, quorum primum subiectum. i. materia est diuersa ita quod non transmuntur adinuicem, nec vtrunque in aliud tertium, unde color & sapor sunt diuersa genere, primum enim subiectum coloris est superficies, saporis autem est humidum, quantitas vero & qualitas sunt adinuicem intransmutabiles, similiter cælum,

& elementum sunt diuersa genere, quoniam materia cœli diuersa est à materia elementi, vt alias declarabitur, per oppositum omnia elementa & elementata sunt vnius generis, quia communicant in materia prima eiusdem rationis, & sunt adinuicem transmutabilia, vt declaratur in libro 2. de generatione. Et aduerte hic loquimur de genere physico quod sumitur non ab vno modo prædicandi, sed ab vnitatem, vel diuersitate primi subiecti.

Secundo, illa dicuntur diuersa genere quæ continentur sub diuersis prædicamentis, vt linea & albedo: Res enim diuersorum prædicamentorum non transmutantur adinuicem, nec reducuntur ad aliud tertium, cum non conueniant viscū ente quod non est vnum nisi analogia, per oppositum res vnius prædicamenti possint dici vnius generis saltem generalissimi. Et aduerte, q̄ hic secundus modus magis attenditur secundum genus logicum, quàm genus physicum, nam constat, q̄ res huius prædicamenti dici possunt secundum physicum diuersarum generum, vt cœlum & elementum, quæ tamen continentur in prædicamento substantiæ, & in eodem genere subalterno, quod est corpus. Hæc de modis diuersorum genere dicta sint.

C A P V T V I.

IN sexto capite distinguenda sunt nomina quæ videntur importare ens diminutum. Et hæc sunt falsum, & accidens.

Circa falsum aduerte, q̄ potest dici de re, de diffinitione, de homine. De re quidem dupliciter, primo de eo quod non est & tamen dicitur esse, vt diametrum esse simetrum falsum est, cuius oppositum est verum, & nota, q̄ hoc falsum dicitur dupliciter.

Primo, cum redditione ad verum, vt Socr. stare dum sedet, & dicitur falsum coniungens, secundo sine redditione ad verum, vt hominem esse alium, & dicitur falsum impossibile.

Secundo, principaliter dicitur de eo quod in se quidem est aliquid, non tamen est illud de quo facit apparētiā, vt somnium & auriscalcum, nam somnium in se quidē est reuersio

simulacrorum ad sensum communem, vt diximus in lib. de somno & vigilia, tamen non est res ad extra de qua est somnium. Item auricalcum est metallum, non tamen est illud quod apparet, scilicet aurum.

De diffinitione dicitur duobus modis.

Primo, de ea quæ nullius rei potest esse diffinitio, & dicitur falsa secundum se, & est illa quæ constat ex partibus repugnantibus, vt si dicerem homo est animal incorporeum.

Secundo, de ea quæ alicuius quidem est diffinitio, non tamen illius cui attribuitur, & dicitur falsa per accidens, scilicet ratione male attributionis, in se tamen vera est, vt si dicerem trigonum est figura agona. Hæc enim verificatur de circulo. Et falsatur de trigono.

De homine dicitur duobus modis, primo de eo qui eligit rationes & sermones falsos & delectatur in illis, quasi finis eius sit delectari falso & non aliam commoditatem ex petit, quod dicitur propter vendentem dicentem falsum cuius finis non est delectari falso, sed lucrari, & tunc verius dicitur homo cupidus quam homo falsus, secundo de eo qui facit. & causat rationes falsas in alio vt appareat alius quàm sit sic Hypocrita dicitur falsus, & proditor & adulator dicuntur homines falsi, quia licet sint aliquid, non tamen tales sunt qualem de se causant apparentiam, & assimilantur rebus quas diximus in secundo modo esse falsas.

Ex prædictis immediate patet falsitas duarum opinionum.

Prima est in Ipia qui est liber Platonis. Hæc dicit eundem hominem esse verum & falsum, qui potest mentiri & potest dicere verum, sed id non sequitur, nam ex potentia mentendi & dicendi verum, non dicitur homo falsus & verus, & nisi eligat menti & delectatur mendatio aut causet opinionem falsam in alio, nec etiam dicitur homo verus nisi eligat & delectetur dicere aut causare in alio veram opinionem, aliter vir sciens & prudens posset dici falsus, quia potest mentiri, & verus quia potest dicere verum, & eadem oratio esset vera & falsa, quoniam potest esse falsa puta Socr. sedet ipso stante, & potest esse vera ipso sedente.

Secunda opinio est eorum qui dicunt, agentem praua sponte, meliorem esse quàm agens praua coactus quod sic probant,

bant, claudicans sponte perfectior est claudicante vi puta ex detruncata tibia ergo à simili agens praua sponte, sed isti decipiuntur, quia agere praua est deficere in moralibus in quibus voluntarium aggrauat & inuoluntarium excusat, claudicare autem est deficere in naturalibus ex in dispositione instrumenti potentiae motiuae, & ideo si sponte claudicat non stat indispositio ex parte instrumenti ex consequenti non est deterior. Tu tamen aduerte, secundum philosophum, potest esse similitudo in hoc claudicans sponte deterior est in genere moris, quoniam reprehensibilis est, sed melior est in esse naturae, quia non deficit instrumento potentiae motiuae, quae est potentia naturali, eodem modo, agens praua sponte deterior est in genere moris, non tamen in esse naturae, quia forte est magis perfectus secundum intellectum puta quia est magis sciens quo modo operandum in moralibus licet non agat secundum scientiam praua voluntate. Hæc de modis falsi dicta sint.

Circa accidens aduerte duos modos assignatos à philosopho.

Primo, accidens dicitur id quod alicui inest, & verum est dicere quod inest, non tamen necessario, nec ut in pluribus sed in paucioribus, ut fodientem causa plantandi vitem inuenire thesaurum accidens est, quoniam non ex necessitate nec ut in pluribus hæc duo coniunguntur, nec necessario vnum causatur ab alio, nec sequitur ad aliud, quoniam miles foditur terra nec semel inuenitur thesaurus. Item hominem musicum esse album vel album esse musicum accidens est, quoniam non ex necessitate fit horum coniunctio, aliter homo non albus non posset esse musicus quod ad sensum est falsum, neque hæc coniunctio fit ut in pluribus ut patet & sicut assignatum est accidens ex parte subiecti, ita potest assignari ex parte temporis, puta quod quando fit corruptio occidatur animal accidens est, & ex parte loci, ut quod fossura & inuentio thesauri coniungantur in eodem loco accidens est. Et aduerte, quod accidens hoc modo dictum non habet causam determinatam, quod enim à pluribus causis potest esse non est præcisè ab una, determinata, sed à casu quæ est causa indeterminata ex secundo Phys.

E P I T O M E L I B. V.

ut cum aliquis nauigat eginam & tamen non intendebat il-
 luc nauigare, sed causa nauigandi fuit orta tēpestas aut quia
 captus à latronibus & illuc deductus, patet igitur huiusmo-
 di accidens non esse à causa determinata, sed potest disjunc-
 tum à pluribus esse & fieri. Et si quæras in quo differt exē-
 plum primum sumptum ex parte loci vel temporis ab exem-
 plo secundo sumpto ex parte subiecti. Dico secundum Cō-
 ment. in cōm. 35. q̄ in primo vnum est causa per accidens al-
 terius, fossura enim est causa inueniendi thesaurum, & cor-
 ruscatio est per accidens occidendi animal. In secundo autē
 vnum non est causa alterius, sed est coniunctum causæ, acci-
 dit enim homini qui est causa musici q̄ sit albus, vnde possu-
 mus dicere primum exemplum esse de causa, secundum au-
 tem de prædicabilibus per accidens, vel secundum B. Th. pri-
 mum sumitur à fieri, secundum autem abesse.

Secundo, dicitur accidens illud quod conuenit alicui per
 se, & tamen non est substantia eius, ut risibile est accidens ho-
 mini, & habere tres angulos, accidens triangulo, & hic secū-
 dus modus per se est assignatus in posterioribus, & supra. Et
 si quæras in quo differt hic secundus modus dicendi à pri-
 mo, dico quòd differt in duobus.

Primo, quoniam accidens hoc secundo modo, est sempi-
 ternum, nam proprium inseparabile est ab eo cuius est pro-
 prium. Ex accidentibus autem primo modo dictis nullum
 contingit esse sempiternum, quoniam non habent necessa-
 riam connexionem, neque respectu loci, neque temporis,
 neque subiecti, Et rationem huius magis assignabimus in li-
 bro sexto. Vbi loquemur de ente per accidens, nam ut dicit
 Cōment. in cōm. 35. loqui de accidentibus & de modis acci-
 dentium ad alium tractatum spectat, hic autem non inten-
 dit Arist. nisi exponere tantum nomina.

Secundo, differt, quoniam ut inquit, B. Th. primus modus
 opponitur huic quod duo secundum se, secundus autem op-
 ponitur essentiali & quiditatiuo prædicato. Hæc de modis
 accidentis dicta sint. Et hic terminatur tota consideratio
 nostra super quintum librum Metaphysicæ distincta in tri-
 bus tractatibus.

Eiusdem

301

EIVSDEM CHRYSOSTOMI
IAVELLI CANAPITII

EPITOME
SVPER SEXTO LIBRO
METAPHYSICAE.



ECVNDVM ordinem, quē
proposuimus in proœmio hu
ius scientiæ, incipiendum est
in hoc sexto libro tractare de
ente, & quoniam vt visum est
in libro quinto dicitur ens
multipliciter, ideo prius consi
derandum est qui sint illi mo
di entis, de quibus nō est prin
cipalis intentio Metaph. consi
derare, hæc autem sunt ens

per accidens, & ens verum, totam igitur intentionem Philo
sophi in hoc sexto complectemur in vnico tractatu quem di
uidemus in quatuor capita.

Primo, declarandus est modus proprius huius scientiæ,
quo habet considerare de ente.

Secundo, excludemus ab hac scientia ens per accidens.

Tertio, quoniam dicere posset aliquis vane excludi ens p
per accidens, quoniam non datur aliquod ens per accidens, id
eo destruenda est hæc opinio.

Quarto, excludendum est ens verum quod dicitur ens
in anima, & sic concludemus principale inten
tum Metaphysici esse versari circa vniuersa
le ens reale per se, cuius consideratio
nem incipit in libro septimo.

Caput

E P I T O M E L I B. V.

ut cum aliquis nauigat eginam & tamen non intendebat il-
 luc nauigare, sed causa nauigandi fuit orta tēpestas aut quia
 captus à larronibus & illuc deductus, patet igitur huiusmo-
 di accidens non esse à causa determinata, sed potest disiun-
 ctim à pluribus esse & fieri. Et si quæras in quo differt exē-
 plum primum sumptum ex parte loci vel temporis ab exem-
 plo secundo sumpto ex parte subiecti. Dico secundum Cō-
 ment. in cōm. 35. q̄ in primo vnum est causa per accidens al-
 terius, fossura enim est causa inueniendi thesaurum, & cor-
 ruscatio est per accidens occidendi animal. In secundo autē
 vnum non est causa alterius, sed est coniunctum causæ, acci-
 dit enim homini qui est causa musici q̄ sit albus, vnde possu-
 mus dicere primum exemplum esse de causa, secundum au-
 tem de prædicabilibus per accidens, vel secundum B. Th. pri-
 mum sumitur à fieri, secundum autem abesse.

Secundo, dicitur accidens illud quod conuenit alicui per
 se, & tamen non est substantia eius, ut risibile est accidens ho-
 mini, & habere tres angulos, accidens triangulo, & hic secū-
 dus modus per se est assignatus in posterioribus, & supra. Et
 si quæras in quo differt hic secundus modus dicendi à pri-
 mo, dico quòd differt in duobus.

Primo, quoniam accidens hoc secundo modo, est sempi-
 ternum, nam proprium inseparabile est ab eo cuius est pro-
 prium. Ex accidentibus autem primo modo dictis nullum
 contingit esse sempiternum, quoniam non habent necessa-
 riam connexionem, neque respectu loci, neque temporis,
 neque subiecti, Et rationem huius magis assignabimus in li-
 bro sexto. Vbi loquemur de ente per accidens, nam ut dicit
 Cōment. in cōm. 35. loqui de accidentibus & de modis acci-
 dentium ad alium tractatum spectat, hic autem non inten-
 dit Arist. nisi exponere tantum nomina.

Secundo, differt, quoniam ut inquit, B. Th. primus modus
 opponitur huic quod duo secundum se, secundus autem op-
 ponitur essentiali & quiditatiuo prædicato. Hæc de modis
 accidentis dicta sint. Et hic terminatur tota consideratio
 nostra super quintum librum Metaphysicæ distincta in tri-
 bus tractatibus.

Eiusdem

301

EIVSDEM CHRYSOSTOMI
IAVELLI CANAPITII

EPITOME
SVPER SEXTO LIBRO
METAPHYSICAE.



ECVNDVM ordinem, quē
proposuimus in procēmio hu
ius scientiæ, incipiendum est
in hoc sexto libro tractare de
ente, & quoniam vt visum est
in libro quinto dicitur ens
multipliciter, ideo prius consi
derandum est qui sint illi mo
di entis, de quibus nō est prin
cipalis intentio Metaph. con
siderare, hæc autem sunt ens

per accidens, & ens verum, totam igitur intentionem Philo
sophi in hoc sexto complectemur in vnico tractatu quem di
uidemus in quatuor capita.

Primo, declarandus est modus proprius huius scientiæ,
quo habet considerare de ente.

Secundo, excludemus ab hac scientia ens per accidens.

Tertio, quoniam dicere posset aliquis vane excludi ens p
accidens, quoniam non datur aliquid ens per accidens, id
eo destruenda est hæc opinio.

Quarto, excludendum est ens verum quod dicitur ens
in anima, & sic concludemus principale inten
tum Metaphysici esse versari circa vniuersa
le ens reale per se, cuius consideratio
nem incipit in libro septimo.

Caput



I R C A primum caput vt sciamus modum proprium huius scientiæ in consideratione entis, quinque agenda sunt.

Primo, ostendetur conuenientia eius cum alijs scientijs.

Secundo, ostendetur eius differentia in cõmuni ab alijs scientijs.

Tertio, ostendetur modus proprius Physicæ & Mathematicæ & huius scientiæ.

Quarto, declarabitur q̃ cum Physica & Mathematica & hæc scientia sint theor. quare hæc sola dicitur theologia.

Quinto, soluetur dubium.

Quantum ad primum, aduerte, q̃ omnis scientia particularis quocunque modo sit cognitio intellectiua, siue speculatiua, siue practica actiua, vt moralis, siue mechanica inquirat principia & causas sui subiecti, siue per omnimodam certitudinem, vt Mathematicæ, siue cum aliquali incertitudine & superficialiter, vt morales, & hæc quidem propositio manifestatur inductiua. nam medicina inquit causas conualescentiæ, geometria causas & principia magnitudinis, puta punctum est principium lineæ, linea principium superficiei, & Arithmeticus principia & causas numeri, puta vnitas est principium numeri, & diuisio continui est causa eiusdem naturalis, principia & causas entis mobilis, puta materiam & formam & efficientem, moralis principia & causas habitus moralis, puta agens liberum & frequentati actus consimiles, mechanica, puta edificatoria principia & causas edificiij, puta hanc materiam, hunc finem, hanc figuram, hoc agens. Patet igitur omnem scientiam inquirere principia & causas sui subiecti. Cum igitur Metaphysica sit maxime scientia, ad ipsam spectat considerare principia & causas entis in quantum ens quod est eius subiectum, vt stabilitum est in 4. lib. tract. 1. cap. 1. in hoc igitur conuenit hæc scientia cum alijs scientijs particularibus, quòd sicut ille considerant principia & causas sui subiecti proprij, sic & ista.

Quantum

Quantum ad secundum, aduerte differentiam in cōmuni consistere in hoc, sicut omnes scientiæ particulares versantur circa determinatum genus entis, nō in quantum est ens sed in quantum est hoc vel illud genus entis, puta geometra versatur tantum circa magnitudinem, non in quantum, est ens (sic enim ad primum Philosophum spectat) sed in quantum est magnitudo, sic inquirūt propria & particularia principia illius generis entis, & proprias causas in quantum est tale ens, & non aliter. Primus autem philosophus sicut speculatur ens vniuersale, quod est ens in quantum ens, sic habet inquirere prima & vniuersalia principia & vniuersales causas entis in quantum ens, & id iam stabilitum est à nobis in primo tract. primi libri cap. 2. & manifestum erit in lib 12. patet ergo quomodo differt primus philosophus à quocunque alio sciente particulari, tam in speculatione subiecti, & in inquisitione principiorum & causarum. Et ex hac differentia aduerte corollaria duo.

Primum est, sicut nulla scientia particularis cōsiderat ens in quantum ens, nec aliquod genus entis in quantum ens, sic non habet considerare quod quid est, siue quidditatem suā subiecti. eiusdem enim scientiæ est considerare rei entitatem & suam quidditatem, suum quòd quod quid est. Ad primum igitur philosophum spectat considerare de quod quid est sicut de ente.

Sed dices quomodo ergo scientia particularis demonstrat passiones de proprio subiecto, cum quod quid est subiecti sit medium in demonstratione.

Respondeo, licet non inuestiget quod quid est subiecti sui tamen accipit ipsum vt notificatū sibi ex sensu, sicut physicus accipit quid est anima, quoniam sensu accipit ipsam esse principium operum vitæ, vel supponit ipsum vt notificatū in prima sciētia, sicut geometra accipit à primo Philosopho quid sit magnitudo, & eo notificato sibi per sensum vel supposito vtitur ad demonstrandum, quæ quidem demonstratio non est de ipso quod quid est, vt probatum est in secundo Poster. sed de passione quam concludimus inesse subiecto per ipsum quod quid est. Tu tamen aduerte, quòd hæc propositio, solus metaphysicus considerat quod quid est habeo
ambigui

ambiguitates, quas determinabimus in q. metaphysicalib.

Certum est enim, quod philosophus inuestiget quidnam, est motus, & infinitum, & locus, & tempus, nec id supponit inuestigandum a primo philosopho.

Secundum est, sicut nulla scientia particularis considerat quod quid est sui subiecti, sic nec dicit, an sit vel non sit, quoniam eiusdem scientiæ est manifestare de subiecto an sit, & quid sit, spectat ergo ad primum philosophum quæstio de quid est, & an est cuiuscunque subiecti determinati in aliqua scientia particulari, & propterea Arist. in j. Poster. dicit q. de subiecto supponitur quid & quia.

Quantum ad tertium, aduerte, quod modus proprius Physicæ quæ apud antiquos non ponentes aliquod ens incorporeum & immobile credebatur, prima philosophia manifestatur ex tribus, primo quia versatur circa certum genus entis, quod non circa ens communissimæ sumptum, hoc autem genus dicitur ens naturale, in quo est principium motus & quietis, & dicitur ens mobile, quod pro maiori parte dicitur inseparabile à materia, nec habet esse nisi in materia excepto intellectu, de quo dicit Arist. in lib. 12. tex. 17. quod nil prohibet ipsum remanere separatum à materia, secundo, quia considerat ens naturale modo speculatiuo & non practico, est enim theoricæ & non practicæ, quod sic declaratur, omnis scientia practica aut est actiua, aut factiua, actiua proprie dicitur cuius actio remanet in agente, vt velle, eligere, appetere, vnde & philosophia moralis dicitur practica actiua, versatur enim circa actiones immanentes & partis rationalis & partis appetitiuæ, vt est apta obedire rationi, sicut declaratur in fine primi Eth. factiua autem proprie est cuius actio transit in materiam exteriorem, vt ædificare, sculperè, pingere, vnde artes mechanicæ dicuntur practice factiuæ, quoniam earum actiones transeunt in exteriorem materiam, & non remanent in agente, sed philosophia naturalis non est scientia actiua nec factiua. nam tam actiua, quam factiua est principium productiuum sui obiecti, vt scientia moralis adiuncta voluntate est principium productiuum actus & habitus moralis & scientia ædificatiua adiuncta voluntate est principium productiuum domus, sed

sed philosophia naturalis non est principium productiuum rei naturalis, quoniam res naturales pro principio habent naturam quæ est principium in quo est, vt dictum est in quinto lib. Et præterea. astronomia non est productiua, sed cognoscitiua cœli, nec homo generans hominem generat per philosophiam naturalem, aliter soli philosophi generarent, ergo philosophia naturalis non est practica. Et aduerte quod ex hoc quod practica est productiua sui obiecti, theorica autem non, sed supponit ipsum, extracta est illa differentia inter practicam, & speculatiuam, quàm posuit Aristot. in præmio huius scientiæ, & in secundo lib. tex. 3. cum dixit, Theoricæ finis est veritas, id est vera cognitio sui obiecti practicæ autem opus, & est differentia sumpta ex parte finis.

Verum quia considerare obiectum modo speculatiuum, & esse theoricam, commune est physicæ & Mathematicæ & huius scientiæ, ideo tertio Aristot. declarat modum proprium physicæ ex modo diffiniendi sibi proprio, modus autem diffiniendi proprius physicæ, non potest manifestari nisi etiam manifestetur modus proprius diffiniendi mathematicæ & huius scientiæ. Aduerte igitur tres modos diffiniendi.

Primus est, quod in materia sensibili qualis est diffinitio simi.

Secundus est, siue materia sensibili, licet diffinitum non habeat esse separatum à materia sensibili, qualis est diffinitio recti & curui.

Tertius est, siue omni materia, tam sensibili quàm intelligibili, eo quod diffinitum est omnino immateriale & non quantum, qualis est diffinitio intelligentiæ, primus modus est proprius scientiæ naturali, eo quod naturalia non abstrahunt à motu, ex cōsequenti, nec à materia sensibili, vt patet de partibus animalis & de partibus plantæ, vnde & in 2. Phys. tex. 19. assignans philosophus differentiam inter physicam & Mathematicam, dixit diffinitionem naturalium esse sicut diffinitio simi, in cuius ratione ponitur subiectum sensibile. scilicet nasus, & non solum naturalia composita diffiniuntur per materiam sensibilem, sed & formæ naturales & quæcunque anima non potest esse sine materia, vnde diffiniuit eam per esse

esse actum corporis physici. Dico autem animam quæ non potest esse sine materia, quoniam si quæ est separabilis à materia ea ratione qua separabilis est, iam ad metaphysicū pertinet, unde in 2. physic. tex. 26. ponens philosophus terminum cōsiderationis circa formas, inquit, Quomodo autem se habeat hoc separabile .i. anima inquantum separabilis, & quid sit, scilicet secundum essentiam suam primæ philosophiæ est determinare.

Secundus autem modus est proprius mathematicæ, nam licet nundum sit determinatum utrum entia mathematica sint separata à materia secundum esse, ut dicunt aliqui quorum rationes adduximus in 3. lib. cap. 5. & eas iam solvimus illic. Arist. autem hoc determinavi in lib. 7. tamen manifestū est quod speculantur à mathematico, ac si essent separata. nō. n. considerat triangulum inquantum ligneum, aut eneum, aut terreum, sed inquantum est talis figura rectilinea, & propter ea mathematica entia, ut cadunt sub scientia mathematica, non recipiunt in diffinitione sua materiam sensibilem, sed ut sic dicuntur abstrahere secundum rationem à motu, à materia, à fine, unde in 2. phys. tex. 19. dixit Arist. impar & par, & lineam, & rectum, & curvū diffiniri sine motu, & sine materia, non autem caro & os, & homo &c.

Tertius vero modus, proprius est huius scientiæ, nam si est aliquod ens immobile sempiternum & separatum à materia sē esse, constat quod ad hanc scientiam pertinet, nam physica licet sit rhetorica versatur tantum circa entia mobilia, ut dictum est, & Mathematica licet sit theorica versatur tantum circa quantitatem continuam aut discretam, quæ licet ut consideratur à mathematico abstrahat à motu, tamen sē esse est inseparabilis à materia, ut determinabitur in lib. 7. pertinet ergo ad scientiam priorem & digniorem Physicæ & mathematicæ, talis autem non datur nisi hæc scientia, & quoniam entia immobilia separata & æterna, sunt maxima & prima entia, & maximum & primum est causa aliorum, ut dictū est in 2. lib. ideo hæc scientia considerat primas & uniuersales causas horum sensibilibium quas in 12. lib. dicemus substantias abstractas, & præcipue primam.

Cum igitur Metaphysica consideret huiusmodi entia, necesse

celle est quod eius modus diffiniendi sit omnino sine materia. nam cum vera diffinitio sit indicatiua essentiae rei diffinitae si daretur per materiam, non competeret diffinitio, immo esset falsa, vt declarauimus in lib. 5. tract. 3. cap. 6. puta si dicerem intelligentia est ens corporeum. sicut si dicerem, animal est ens incorporeum.

Quantum ad quartum aduerte, qd Arist. ex triplici consideratione entis. scilicet entis mobilis inseparabilis à materia secundum esse & secundum rationem, & entis separabilis à motu, & à materia tantum secundum rationem, & entis separati secundum esse, & secundum rationem, & concludit tria genera philosophiae theoreticae, scilicet physicam, mathematicam, & hanc scientiam quam dicit theologiam, quod declarat dupliciter. Primo, quia si est in aliquo genere rerum aliquod diuinum, maxime in genere entium separatorum, quae diximus considerari in hac scientia. Secundo, quia cum haec scientia sit honorabilissima, vt declaratum est in prooemio, debet versari circa honorabilissimum ens, hoc autem est ens diuinum, conuenienter, dicitur ergo theologia.

Quantum ad quintum, aduerte, qd ex praedictis immediate oritur dubium. nam si haec scientia distinguitur à physica & mathematica, quia ille considerant de ente inseparabili à materia, haec autem de ente abstracto & sempiterno, ergo erit scientia particularis, sicut & ille, ens. n. abstractum sempiternum est vnum determinatum genus entis, sicut & ens inseparabile, cuius tamen oppositum determinatum est in 4. lib. vbi dictum est hanc scientiam speculati ens inquantum ens, & quae per se insunt enti, propterea dicta est communis & vniuersalis & prima scientia.

Ad hoc respondetur, qd licet haec scientia principaliter versetur & vltima intentione circa ens abstractum sempiternum, ex hoc tamen non est scientia particularis, quoniam entia abstracta sunt causae & principia totius entis, ex consequenti considerat totum ens, haec autem ratio deficit in physica & mathematica, quoniam non solum considerant determinatum genus entis, sed & principia & causae ab eis consideratae non sunt principia vniuersalia & causae vniuersalis entis, vt dictum est supra.

Pote st

Potest etiam dici, quòd hæc scientia non solum est communis & vniuersalis, quia considerat primas & vniuersales causas entis, sed quia considerat non solum entia separata & immobilia vt intelligentias, sed & ens vnum & bonum & actum &c. quæ quidem cōmunia possunt dici separata secūdum esse non repugnanter, non enim de necessitate habent esse in materia, aliter non inueniretur ens & vnum, & bonū & actus nisi in materia, & hæc ratio etiam deficit in physica & in mathematica, quoniam omne ens naturale cum sit mobile, & omnis quantitas, quoniam consequitur materiam, de necessitate non habent esse nisi in materia, patet ergo quod non est necesse hanc scientiam esse particularem, sicut physica & mathematica, est tamen verum quod si non daretur nisi substantia naturalis & eius accidentia, physica est prima & communis & vniuersalis scientia, quia consideraret de toto ente, & non esset alia scientia prior & honorabilior ea. Hæc de primo cap. dicta sunt.

CAPVT II.

IN secundo cap. excludendum est ens per accidēs à principali consideratione metaphysici, ad cuius resolutionē duo agenda sunt.

Primo, quòd de ente per accidens non potest haberi scientia, ex consequenti hæc scientia vane laboraret circa ipsum, ideo prætermittendum est.

Secundo, quoniam qualiscunque cognitio haberi potest de ipso, ideo cum hæc scientia consideret ens inquantum ens, & omnes diuisiones entis inter quas hæc est prima, entium aliud per se, aliud per accidens, ideo congruum est vt ibi consideretur quidquid de ente per accidens cognoscibile est, ne apud metaphysicum remaneat aliquis modus entis penitus intactus.

Quantum igitur ad primum pono hanc conclusionem. De ente per accidens nulla est scientia, hanc probo signo & ratione, signo quidem sic, si de eo tractaret aliqua scientia, vel illa esset practica, vel theorica, non practica, nā practica,

Ætica,puta edificatoria, licet consideret per se requisita domui,puta talem materiam,talem formam, talem finem, tamen quæ per accidens possunt aduenire domui,puta quòd vni sit in tristitiam,alteri in voluptatem,vni utilis,alteri dānosa non consideret,nec potest considerare, à causis enim infinitis hæc accidere possunt,ex consequenti,cognosci nō possunt,nec speculatiua non enim geometria speculatur si triangulus est ligneus vel terreus,hæc enim accidunt triangulo, sed considerat quæ per se conueniunt ei,puta quod est prima figura rectilinea quod habet tres æquales duobus rectis &c.Ratione autem sic,omnis scientia est de eo quod est ens,quòd enim non est non contingit,scire ex 1. postter. sed ens per accidens non est ens, sed potius non ens, & si est ens est magis nomine quàm re, pro quanto vnum de alio prædicatur,puta dicendo grammaticum est musicum,& quidem quòd re non sit ens patet ex hoc quòd cum ens & vnum sint idem vt probatum est in quarto lib. ens per accidens non magis est ens quam sit vnum, est autem vnum nomine pro quanto vnum de altero prædicatur, copula enim significat vnionem,non autem est vnum re, nulla enim res est quæ cōstituitur ex albo & musico, licet eidem subiecto inesse possint.

Præterea,quæ vere sunt ens,vt animal rationale & corpus animatum vna generatione generantur, & eodem modo corrumpuntur, dum enim generatur rationale generatur animal, sed quæ sunt ens per accidens non vna generatione generantur, nec simul corrumpuntur, sed diuisim, vt album vna,& musicum alia, ergo entia per accidens magis & verius sunt non entia quàm entia,& propterea Plat. non male fecit ordinans artem sophisticam circa ens per accidens: ordinare ipsam circa non ens, Dicebat enim ens per accidens, circa quod desudant sophistæ esse non ens.

Sed dicens quomodo sophistæ versantur circa ens per accidens.

Respondeo, cum multæ sint fallaciæ maxime versantur circa fallaciam accidentis, per quam propter sui subtilitatē, multotiens decipiuntur sapientes, prouenit autem in hmoi fallacia ex eo quod aliqua sunt sibi se accepta diuersa, & tamen

Epit. Iauelli.

Q

aliquo

aliquo modo vniuntur siue coniunguntur, & ex hoc quòd aliquo modo vniuntur creditur quidquid conuenit vni conuenire alteri, vt si arguatur sic, musicum est diuersum à grammatico, quoniam alia scientia est musica & alia est grammatica, & musicum est grammaticum, contingit enim eundem esse musicum & grammaticum, ergo musicum est diuersum à se, non sequitur, quia in maiori est diuersitas per se, in maiori autem est vnitas per accidens: ex qua non potest concludi diuersitas eiusdem à seipso, eodem modo dicendum est ad hunc paralogismum, musicum est diuersum à Corisco, quia alterum dicit qualitatem, alterum substantiam, & musicum est Coriscus, quia Coriscus potest habere musicam, & contingit q̄ de facto habeat, ergo musicum est diuersum à se. Item non sequitur si sic arguatur quod est, & non semper fuit, est factum, sed grammaticus est musicus, contingit enim Socrates prius didicisse grammaticam, & post aliquod tempus didicisse musicam, ergo grammaticus factus est musicus non sequitur, quia maior est vera in ijs quæ per se sunt tantum, sed grammaticum esse musicum non est per se, vt patet, & ideo non sequitur grammaticum esse factum musicum ad sensum quo intendit sophista, intendit enim eandem productionem esse terminatam ad vtrumque, quod non est verum, quoniam nō sunt vnum nisi per accidens, & ideo alia productio terminatur ad vnum, & alia ad aliud, si autem essent vnum per se sicut homo & animal, sophista haberet intentum, quoniam eadem productione producitur homo & animal, & homo & vnus homo, & homo & rationale.

Quantum ad secundum, aduerte, q̄ licet de eo q̄ est ens per accidens non possit haberi certa cognitio, sicut nec de eo quod ponitur infinitum, vel fortuito, vel vacuum, id est de subtracto, tamen de ente per accidens formaliter sumpto potest haberi cognitio, sicut de infinito, vt patet in 3. Phys. vbi diffinitur, & de fortuito, vt patet in 2. Phys. & de vacuo, vt patet in 4. Phys. De ente igitur per accidens formaliter sumpto, duo consideranda sunt, primo, quæ sit eius causa, secundo, quæ sit eius natura & ex ijs manifestum erit quare de eo quod sit per accidens, id est de subtracto non potest haberi scientia.

Quantum

Quantum ad causam, aduerte, quòd cum omne per accidens reducatur ad per se necesse est entia per se esse causam entis per accidens entia aut per se sunt duplicia, quædã sunt semper eodem modo se habentia, ex consequenti necessaria, non per violentiam, sed quia non possunt se aliter habere vt complexa in primo & secundo modo per se, quædam non sunt semper, sed vt in pluribus, vt hominem generare hominem & non monstrum, hyemem esse pluuiosam, æstatem calidam & serenam, & hæc sunt causa entis per accidens, nam vt inquit Comment. in cõm. quinto quando in eis quæ fiunt pro maiori parte, non fit illud quod innatum est fieri, fit illud quod est per accidens, puta quando homo non nascitur cum quinque digitis, nascitur monstrum quod dicitur ens per accidens, quoniam est ex defectu eius, quod est vt in pluribus, vnde sequitur quod si omnia essent necessaria & infallibilia, nullum esset ens per accidens. Ad hoc ergo quod saluetur ens per accidens, necesse est dari entia contingentia, quæ licet sint talia pro maiori parte, tamen prout raro fit oppositum dicitur ens per accidens, patet igitur, quod causa entis per accidens est id quod est vt in pluribus in quantum deficit.

Quantum ad naturam entis per accidens, aduerte q̃ de ratione, & quiditate eius est, vt non sit semper, nec pro maiori parte. sic enim esset ens per se, sed raro, & in paucioribus. Ex hoc enim, quod ea quæ sunt, vt in pluribus, aliquando deficiunt prouenit ens per accidens, vt si sub cane pluat, est ens per accidens. nam vt in pluribus æstas, & maxime sub calida ætluans, & sicca. & id conuenit æstati per se. Item quod homo sit albus est per accidens, vel quod albus sit musicus. quod autem sit animal, vel risibilis est per se, quoniam hoc est semper, illud autem raro. Item q̃ ædificator ædificet est per se, quòd autem sanet aliquem est per accidens, quoniam vt in pluribus ædificat, raro autem contingit ædificatorem esse medicum, & ideo per accidens sanat. Item quod coquus faciat cibum delectabilem est per se. id enim intendit, & vt in pluribus sic facit. quod autem faciat cibum salubrem est per accidens, quoniam id non intendit in quantum coquus, & raro id facit, vnde sicut ad medicum specta-

E P I T O M E L I B. V I.

tur per se dare medicinam salubrem, per accidens autem medicina suauem, sic opposito modo contingit in coquo. Ens igitur per accidens proprie dictum est illud quod raro, & præter intentionem euenit. & est à causa interminata, vt declarauimus in libro 5. in tract. 3. cap. 6. distinguentes hoc nomen accidens & pro rei veritate hoc ens per accidens coincidit cum fortuna, & casu, de quibus manifestum est in 2. Phys. Hæc igitur de ente per accidens formaliter sumpto dicta sint, ex quibus possumus rationem sumere, quare de subtracto non potest haberi scientia, nam omne quod scitur potest doceri, omne quod potest doceri est semper, vel vt in pluribus. necesse est enim docentem determinare id quod docet, aut quia semper sic est, aut pro maiori parte, aut pro tali tempore, puta in luna noua. quod autem raro à causa interminata prouenit non potest determinari. ergo non potest sciri. nam docens medicinam, ideo docet mellicratum esse bonum febricitanti, quia pro maiori parte sibi prodest, quod si raro, & indeterminare sibi proficeret, non posset de eo certa regula fieri, ex consequenti, nec sciri, nec doceri. Hæc de secundo cap. dicta sint.

C A P V T I I I.

IN cap. tertio, destruenda est quædā opinio, quæ conatur tollere ens per accidens, quod est ens fortuitum, siue causale, & quatuor agenda sunt.

Primo, ponentur fundamenta huius opin.

Secundo, arguetur contra eam.

Tertio, inferetur contra dictam opinionem corollarium per quod sustinetur natura entis per accidens.

Quarto, soluentur duo dubia.

Quantum ad primum, aduerte quosdam dicere omnia ordinato cursu sibi succedere, & vnum ex alio de necessitate procedere, vt omne futurum ex aliquo præterito, & fundant se super duas propositiones, quas habent pro veris, licet decipiantur. prima est, omne quod fit in mundo inferiori habet causam per se, & determinatum. secunda est, ad quālibet causam per se, & determinatam necesse est sequi effectum,

ctum, ex his duobus suppositis sequitur causam nunquam frustrari suo effectu, ex consequenti nihil agitur, nisi quod aptum natum est agi. ergo nullum est ens per accidens. Dictum est enim ens per accidens provenire ex eo, quod cause agentes, vt in pluribus aliquando deficiunt.

Quantum ad secundum, aduerte, quod Arist. intendens destruere hanc opinio. proponit hoc fundamentum, non in conuenit generari, & corrumpi principia, & causas aliquorum effectuum, & tamen non necessario secundum eum ordinem, & infallibilem successionem producuntur, & corrumpuntur effectus, quoniam possunt impediri, vel ex indispositione materię, vel ocurso contrarij agentis.

Exemplum primi, ex indispositione materię, aliquando non nascitur semen seminatum stante virtute actiua sufficiens in semine, & influencia cœli, quoniam terra est non madefacta, vel non culta.

Exemplum secundi, palea sicca approximata igni non comburitur, quoniam aqua superinfunditur, ex hoc fundamento sic arguit Arist. si omnis effectus habet causam per se, & ad illam positam per successionem causarum, necessario sequitur effectus, ergo omnia de necessitate euenient, ita quod nihil contingens, nihilque liberum erit & de quolibet futuro erit verum determinate dicere, erit vel non erit, hoc autem est falsum, quoniam vt inquit Comment. in comment. 7. id est contra intellectum, & sensum; consequentiã sic deducimus, si omne quod fit habet causam per se, ad quã necessario sequitur effectus, sumo aliquod futurum, puta granum seminatum nasciturum, & quæro, aut habet causam positam in præterito, vel in præsentī. ad quam secundum te necessario sequitur aliud quod respectu sequentis erit causa, & ad illam aliud, & ad illam aliud, & sic per conuersionem causarum sibijnuicem succedentium, tandem deuenietur de necessitate ad effectum futurum, cuius iam causa est posita, & sic erit verum dicere etiam de præsentī, hunc determinate hoc erit, quoniam tempus medium inter præsens. nunc & illud, in quo effectus produceretur est finitum, ex consequenti tandem totum consumeretur per ordinatam successionem causarum, si autem causa non ponitur deter-

minate erit verum dicere, q̄ non erit, & vt manifestius fiat, q̄ dicimus, proponitur hoc futurum, Socr. occidetur, & deducitur ex fundamentis huius opin. q̄ de necessitate occidetur, & ponatur causa suæ occisionis, quia exiuit de nocte domo. ad quod secundum hanc opinionem sequitur de necessitate aliud, puta quod fuit inuentus ab inimico, ad hanc inuentionem sequitur vulneratio lætalis. ad hanc sequitur mors. est ergo verum determinate dicere, quia Socr. exiit domo inuentus erit ab inimico, quia erit inuentus vulnerabitur, quia vulnerabitur occidetur. huius autem effectus .s. exiit domo ponitur causa præcedens, puta quia volet haurire aquam, & huius etiam ponitur causa præcedens, puta quia sitiet. & huius etiam ponitur causa præcedens, quæ tandem demonstrabitur in præsentī, vel fuisse in futuro, puta quia heri comedit salsa, vel nunc comedit, & sic à prima causa iam posita, decurrendo ordinate per causas medias, de necessitate deuenietur ad occisionem Socr. Idem intelligendum est de quolibet futuro contingenti singulari. & sic patet, quod omnia de necessitate eueniet, quia non est maior ratio de vno contingenti, quàm de alio.

Quantum ad tertium, aduerte, q̄ cum sit stultum ponere omnia euenire ex necessitate, manifestum est, quòd non omne futurum habet omnem suam causam per se, licet enim effectus futuri assignari possint aliquæ causæ per se, tamen nō est necesse eas reduci ad aliquam primam causam per se, immo illa prima aliquando erit per accidens, & casualis, verbigratia, occisio Socr. habet causam proximam per se, scilicet quia lætally vulneratus, & hæc reducitur ad causam per se. s. quia incidit in latrones, hæc autem nō reducitur in causam per se, quod enim inciderit in latrones non datur determinata causa, sed potuit esse ab infinitis causis. & ideo per accidens, & casualiter incidit in latrones. nā licet Socr. intenderet ire ad talem locum, puta ad puteum, & latrones intenderent ire ad eundem locum, tamen fuit mere per accidens, & præter intentionem, quòd simul concurrerint in eodem loco, vnde patet quod prima causa occisionis Socr. fuit non per se, sed per accidens, à qua prouenit effectus per accidens, qui dicitur ens per accidens, scilicet ipsa occisio. falsa
ergo

ergo sunt fundamenta reprobare opinio. scilicet omne quod fit in mundo fit à causa per se, ita quòd & prima, & omnes inter medix sint causa per se. Item quod à causa per se infallibiliter, & de necessitate semper sequatur effectus, quoniam multx causx per se impediri possunt, vel defectu materie, vel concursu contrarij agentis, vt diximus supra.

Quantum ad quartum, aduerte, q̄ circa prædicta oriuntur duo dubia.

Primum est, quoniam dictum est immediate, q̄ non est necesse reduci omnem effectum in causam per se, sed prima illius causa poterit esse per accidens, vt exemplificatum est in occisione Socr. dubitatur, ad quod genus causx, illa reduci-
tur an ad materiam, an ad efficientem, an ad finalem, de formali non potest esse dubium, quoniam in generatione effectus ipsa forma est finis. vnde si talis reductio fit ad causam finalem fit consequenter ad causam formalem, prout forma est finis. Hoc dubium mouet quidem Arist. in tex. sed pertrā fit non respondens, innuens q̄ recurrendum est ad determinata in 2. Phys. tex. 65. vbi determinauit casum, & fortunam, qux sunt causa per accidens reduci ad causam efficientem, quoniam fortuna est in his, qux fiunt per intellectum, & casus in his, qux fiunt per naturam, sed intellectus, & natura, id est agens naturale sunt in genere efficientis, ergo &c. propter hoc igitur, vt inquit Comment. in commen. decimo diuinit hic loqui de hoc dubio, vt pote determinatum in Physic.

Secundum est, quare Arist. arguens contra negantes ens per accidens formauit, & deduxit consequentiam, & tamen non probauit falsitatem consequentis, scilicet quòd falsum sit omnia euenire de necessitate. Ad hoc dico, sicut ad præcedens, quoniam id iam declarauerat in fine primi Perihier. vbi inquit, si omnia de necessitate eueniunt, iam non expedit consiliari, neque negociari, consiliamur enim non in necessarijs, sed in his qux possunt alio, & alio modo fieri, sed si omnia de necessitate eueniunt, non possunt aliter se habere. Item negociamur credentes, quod nisi sic, vel sic operemur, non consequemur finem intentum, sed si omnia ex necessitate eueniunt, siue operemur, siue non

E P I T O M E L I B. V I.

consequemur finem intentum . ergo vanum erit negociari, stulta est igitur hæc opinio, quoniam aufert omnem moralitatem, quæ fundatur in actu libero, & legem præmiatiuam, ac punitiuam, sicut enim in naturalibus, sic in necessarijs nõ est meritum, nec demeritum, ex consequenti nec præmium, nec pœna . Item aufert motiuum omnis honesti laboris, & constituit hominum genus in totali ocio . Tenendum est ergo, quod vltra ens necessarium, & ens, vt in pluribus datur ens contingens, & ens per accidens, de quo sufficit.

C A P V T I I I I.

IN cap.4. excludendum est ens, verum à principali consideratione metaphysici . & tria agenda sunt .

Primo, qualiter dicatur hoc ens .

Secundo, in quo est, an in rebus, an in anima, siue in mète.

Tertio, assignatur ratio, quare est prætermittendum à metaph.

Quantum ad primum, aduerte, quòd ens verum, & non ens, vt falsum est significatum propositionis veræ, & propositionis falsæ, & designatur per copulam verbalem affirmatam, vel negatam, vt cum dicimus . hæc propositio est vera, homo est animal, quia significat sicut est . & hæc est falsa, homo non est animal, quia significat aliter, quàm sic, & huiusmodi ens non est in terminis incomplexis, vt declaratum est in primo Peri her. sed tantum in propositione affirmatiua, quæ dicitur compositio, quia componitur prædicatum cum subiecto, vel quia signat prædicatum in esse subiecto, & in propositione negatiua, quæ dicitur diuisio, quia signat prædicatum remotum à subiecto, & huiusmodi ens verum, & non ens falsum circumdat omnem contradictionem, quoniam necesse est, vt probatum est in quarto libro vnā partem esse verā, & alterā falsā, sed differenter in terminis repugnantibus, & in terminis non repugnantibus . nam in terminis repugnantibus affirmatiua est falsa, vt homo est asinus, & negatiua est vera, vt homo non est asinus, in terminis autem non repugnantibus, sed coniunctis adinuicem affirmatiua

firmatiua est vera, vt homo est animal, & negatiua est falsa, vt homo non est animal, & hoc est regulariter verum in materia necessaria, siue naturali, & in materia remota, sed in materia contingenti, sufficit quòd si affirmatiua est vera, negatiua est falsa, & si negatiua est vera, affirmatiua est falsa. & ratio huius est, quoniam in materia contingenti termini nō sunt necessario coniuncti, nec necessario disiuncti. nam Socrates potest esse diues, & potest non esse diues. si tamen hæc est vera, Socrates est diues, hæc erit falsa, Socrates non est diues, & si hæc est vera, Socrates non est diues affirmatiua erit falsa.

Sed dices, si huiusmodi ens est tantum in propositione, siue affirmatiua, siue negatiua, cum propositio sit quoddam compositum ex prædicato, & subiecto, nec possit intellectus propositionem formare, nisi intelligat subiectum, & prædicatum, quæritur an simul vtrunque intelligat, an separatim, id est vna intellectione, vel distinctis, quarum vna consequenter se habet ad aliam.

Huic quæsito Arist. non respondet hic. sed dicit quod de hoc est alius sermo, scilicet in lib. 3. de anima. ex quo potest trahi responsio ad hoc. nam in 3. lib. de anima. tex. 23. loquens Arist. de prima, & secunda operatione intellectus, intendit quod si intellectus intelligit partes alicuius diuisibilis, puta duas medietates lineæ, in quantum sunt vnum in linea, quam componunt intelligit eas simul, quia per modum vnius. si autem intelligit eas in quantum ab inuicem distinguuntur, & vnamquaque secundum se tunc intelligit eas seorsum, & separatim, id est distinctis intellectionibus, quia tunc intelligit plura per modum plurium, sic in proposito quæsito, si intellectus intelligit subiectum secundum se, puta hominem, & prædicatum, vt animal, intelligit ea seorsum & distinctis intellectionibus, quæ erunt duæ distinctæ apprehensiones duorum terminorum incomplexorum. si autem intelligit ea, vt sunt vnum, id est vt componunt hanc propositionem, homo est animal, sic intelliguntur simul, & vnica intellectione, quæ est secunda operatio intellectus.

Quantum ad secundum aduerte, quòd cum verum, & falsum sint circa compositionem, & diuisionem intellectus, & operatio

EPI TOME LIB. VI.

operatio intellectus, utpote operatio immanens sit tantum in intellectu. patet quod verum, & falsum sunt in intellectu, & non simpliciter, quoniam non est in prima apprehensione, nec in diffinitione, sed in secunda operatione. & ex hoc patet, quod verum, & falsum distinguuntur à bono, & malo, quoniam hæc sunt in rebus. nam res dicitur bona inquantum habet perfectionem sibi debitam. mala autem inquantum deficiunt a perfectione sibi debita. unde oculus conuenienter videns est bonus. si autem est cæcus est malus. verum autem & falsum sunt in cognitione. nam si res cognoscitur ut est, est vera cognitio, si aliter, quàm sit, est falsa cognitio. cognitio autem non est in re cognita, sed in cognoscente, sicut visio in vidente. ergo verum & falsum non sunt in rebus, sed in mente. i. intellectu cognoscente. unde inquit Comment. in comm. 8. verum, & falsum sunt in cognitione, & bonum, & malum sunt in materia, & nullum entium, quæ sunt in cognitione dicitur esse simpliciter, sed secundum quod est extra animam. De vero igitur & falso qualiter sint, & in quo sint, hæc dicta fuerint. Reliqua autem considerata circa huiusmodi ens pro quanto spectat ad metaphys. pertractabimus in fine 9. lib. huius scientiæ. Dixi autem prout spectat ad metaphys. quoniam directæ eius consideratio ad logicum pertinet, unde & subiectum in ea ponitur ens rationis. i. ens in anima, quod Arist. hic nominat ens verum, cui opponitur falsum, utrum autem sit in re veritas, & in primâ operatione, & in diffinitione diximus in tract. de transcend. de opinione Heruei, & B. Thom.

Quantum ad tertium, aduerte, quod Philosophus hac principali ratione excludit ens utrum ab hac scientia, ita. scilicet. quod non debet esse de principaliter consideratis ab ipso. nam hoc ens, ut diximus consistit in compositione, & diuisione. non quidem qualis inuenitur in rebus, sed in intellectu componente terminos incomplexos, vel diuidente, pro ut comparat vnum ad alterum, vel idem ad seipsum, ut ad alterum, talis autem compositio, & diuisio sunt operatio intellectus, sed eiusdem scientiæ est considerare de potetia, & actu eius, & proprietate consequente actum. nam considerans de luce solis considerat de illuminatione, & calefactione, quæ consequi

sequitur illuminationem . liber autem de anima, vt patet in
 3. lib. considerat de intellectu, & actibus intellectus . ergo
 ad ipsum spectat considerare de vero, & falso . Hac igitur
 ratione dimittatur à metaphysico, sicut & ens per accidens,
 licet alia ratione . Diximus enim dimitti ens per accidens,
 quoniam habet causam interminatam, ex consequenti in co-
 gnoscibilem, verum autem & falsum, quoniam sunt passio
 mentis .i. consequuntur operationem mentis . Tu tamen
 aduerte, q̃ licet, vt sunt passio mentis spectent ad scientiam
 de anima, tamen vt sunt ens rationis spectant etiam ad logi-
 cum . Potest tamen & alia ratio assignari, propter quam tã
 ens per accidens, quàm ens, verum relinquenda sunt à meta-
 physico . nam vtrunque est circa ens per se, ens enim per ac-
 cidens, prouenit ex concursu duorum, quorum vtrunque se-
 cundum se acceptum est ens per se, puta musicum est ens per
 se, ædificator est ens per se, quod autem in eodem subiecto
 conueniant est ens per accidens . Item intellectus facit
 compositionem, & diuisionem circa res prædicamentales, vt
 homo est substantia, albedo est color &c. circa quam com-
 positionem, & diuisionem stat verum, & falsum, vt diximus,
 res autem prædicamentales sunt entia per se . Si igitur me-
 taphysicus sufficienter pertractauerit de ente per se, ex
 consequenti manifestum erit de ente per acci-
 dens, & de ente vero, non ergo est necesse,
 quod particularem considerationem
 faciat de eis, sed satis erit, si consi-
 derabit de ente per se vniuer-
 salissime sumpto, per-
 scrutando ipsius
 causas, &
 princi-
 pia,
 & hanc speculationem
 incipiemus in li-
 bro septi-
 mo .

*
 RQ

Eiusdem

EIVSDEM CHRYSOSTOMI
IAVELLI CANAPITII

E P I T O M E

SVPER SEPTIMO LIBRO
M E T A P H Y S I C A E.



VONIAM ens est subiectum metaphysicæ, & ab eius consideratione abieciimus ens, per accidens, & ens in anima, restat vt consideremus de ente per se, quod est extra animam, quod quidem diuiditur. s. per corporeum, siue materiale, & incorporeum, per actum, & potentiam, per vnum & multa. De ente materiali agendum

est in 7. & 8. lib. de actu & potentia, in 9. de vno & multo, in 10. de entibus incorp. quæ sint primæ, & vniuersales causæ entis corporei in lib. 12. in quo complebitur consideratio primi philosophi. & quoniam ens materiale dicitur de substantia, & accidente existente in substantia materiali. & potest pertractari modo logico, & modo reali. vtroque modo pertractandum est, quoniam vt diximus in 4. lib. logicus & metaphys. consimiles sunt in subiecto de omnibus, inconsiderant. prima igitur consideratio erat logica, & fiet in lib. 7. secunda erit realis, & fiet in lib. 8. intendens ergo resolute, & ordinate procedere perstringemus totam intentionem Arist. in hoc 7. lib. in vnico tract. quem diuidemus in decem capita.

Primo, quod de ente dicto de subiecto, & accidente sufficienter pertractabitur, si de substantia pertractatum fuerit.

Secundo,

Secundo, quòd de substantia sensitiui prius determinandum est.

Tercio, de quod quid est, ex quibus prædicatis constituitur.

Quarto, de quod quid est, quorum est, an substantiarum tantum, an accidentium, an vtriusque.

Quinto, si quod quid est, identificatur ei, cuius est.

Sexto, si quiditates rerum sensibilibus generantur à formis, siue ideis separatis.

Septimo, ex quibus partibus constituitur quidditas substantiæ sensibilis.

Octauo, quod quid est substantiæ sensibilis ex partibus constitutum est vnum.

Nono, quod vniuersalia non sunt substantiæ, nec sunt substantiæ à singularibus separatae, nec ipsæ ideæ Platonis possunt diffiniri.

Decimo, substantia, quæ est ipsum quod quid est, causa, & principium.

CAPVT PRIMVM.



IN primo capite declarandum est, quod ad habendam notitiam de ente sufficit tractare de substantia, quatuor igitur agenda sunt.

Primo, quod substantia est primum, & principaliter ens.

Secundo, quòd est prior accidentia, notitia, tempore, & natura.

Tercio, quod de sola substantia agendum est, & id sufficit ad habendam notitiam de ente vniuersali.

Quarto, quid determinandum sit de substantia, secundum opiniones antiquorum, & secundum opinionem Aristotelicam.

Quantum ad primum ponitur hæc conclusio, cum ens dicatur multipliciter. scilicet de eo quod est quid. id est de substantia, & de quanto, & quali, & de alijs prædicamentis accidentium. ens quod signat substantiam est primum ens. & probatur ratione, ac signo, ratione quidem sic, substantia est ens per se

se. & simpliciter . accidens autem est ens, secundum quid, & in ordine ad aliud, id est ad substantiam . ergo substantia est primum ens . antecedens sic probatur, quæ significant substantiam dicunt quid est aliquid absolute , puta quid est homo , aut lapis, aut deus, quæ autem significant accidens non dicunt quid aliquid sit, sed quale quid, aut quantum quia, per quod significatur esse ens secundum quid . Item substantia non respicit accidens , sed econuerso , propter quod accidens non est ens, nisi quia est entis, puta quia est qualitas, aut quantitas substantiæ . ergo accidens est ens in ordine ad aliud, quod est substantia . consequentia vero manifesta est . nam omne simpliciter prius est eo, quod est secundum quid, & quod est per se prius est , eo quod est quid aliud , vel per aliud . nam secundum quid , & per aliud supponit id , quod est simpliciter, & per se , ergo &c. si ergo sic , si sumantur accidentia in abstracto, vt vadere, & sanare, & albedo, & nigredo , dubitatur si sunt entia , vel non . si autem sumantur in concreto . non dubitatur . ratio autem dubitationis est, quia in abstracto sumuntur sine subiecto , à quo non sunt separabilia . & propterea in abstracto videntur, non entia . in concreto autem sumuntur cum subiecto, quod est substantia, & per subiectum videntur habere esse quoniam accidentis esse est inesse . manifestum ergo est primum ens esse substantiam , & per eam accidentia sunt ens, & ea remota non sunt ens, primum ergo & per se, & simpliciter ens est substantia .

Quantum ad secundum pono hanc conclusionem , substantia est prior accidente, natura, tempore , & cognitione, natura quidem, quoniam accidentia pendent ex substantia, ex eo enim quod insunt entia sunt , non autem econuerso , quoniam fundamentum à fundato non pendet, tempore autem, quoniam nullum accidens potest inueniri sine substantia, cum sit inseparabile à substantia, in latitudine autem substantiarum non inconuenit inueniri subiectum sine accidente, vt est primum principium , in quo quidquid est substantia est, vt dicitur in lib. duodecimo cognitione vero . quoniam & prius diffinitur , & prius cognoscitur . quod quidem prius diffiniatur, patet, quoniam accidens diffinitur per substantiam, & non econuerso . nam sicut non est ens, nisi per

per substantiam, vt dictum est, sic non potest diffiniri, nisi per substantiam, cum diffinitio declaret naturam diffiniti, sicut est. id autem per quod aliquid diffinitur est prius eo. diffinitione, vt animal homine, quod autem prius cognoscatur patet, quoniam quando scimus aliquid per prædicamenta substantialia magis scimus, quàm quando per accidentalia. magis enim notificatur nobis homo per esse corpus animatum sensitiuum rationale, quàm per esse magnū, calidum, album &c. Item magis scimus rem cognoscendo quid sit, quàm cognoscendo quanta qualisque sit, sed non cognoscimus quid sit, nisi per prædicamenta substantialia, vt dicemus infra. ergo &c. & quidem quòd magis cognoscamus rem, cognoscendo quid sit, quàm quocunque alio modo, patet ex eo quòd & accidentia putamus scire quando scimus quid sunt. patet ergo substantiam esse priorem cognitione, quàm accidentia. Tu tamen aduerte, quòd ratio Arist. videtur probare de prioritate cognitionis, non quidē tempore, sed perfectione, vt sit sensus, quòd cognoscere rem per subiectum est perfectius, quàm cognoscere per accidens. Vtrum vero sit verum de prioritate cognitionis, quo ad tempus determinabitur in q. nostris.

Quantum ad tertium ponitur hæc conclusio, pro consideratione entis vniuersalis sufficit determinare de substantia. nam & antiqui quærentes naturam entis circa solas substantias laborabant, inuestigantes si omnium esset vna substantia. vel plures, & aliqui ponebant vnā, vt qui posuerunt tantum vnum principium materiale, aliqui plures, aliqui finitas, aliqui infinitas, & has opiniones perstrinximus in j. lib. volens igitur Aristot. imitari antiq. in hoc dicit, quapropter nobis maxime, & primum, & solum, vt est dicere de sic ente, id est de substantia speculandum quid sit, & id rationabiliter facit, quoniam cum substantia sola sit ens absolute, de ea sola absolute speculandum est, & cum accidentia non super entia, nisi per subiectum non cognoscuntur, nisi per substantiam. sicut enim res habet se ad esse, ita ad cognosci, patet quòd cognitio accidentium est participatio cognitionis substantiæ, sicut esse accidentis est participatio esse substantiæ, ex cōsequenti cognita natura substantiæ cognita est, & natu

ra accidentis, quantum spectat ad primum philosophum. pro consideratione ergo entis vniuersalis quasi sufficit, & determinare de sola substantia.

Quantum ad quartum, aduerte, q̄ aliquas esse substantias manifestissimum est, vt animalia, & plantas, & naturalia corpora, vt ignem, & aquam & terram, & horum partes, vt cœlum, & atra, de tribus autem non est manifestum vt de magnitudinibus, de numeris, de speciebus rerum sensibilibus, & non solum est immanifestum, an sint substantiæ, sed an sint separate ab his sensibilibus, vel non. Circa huiusmodi enim sunt oppositæ scientiæ, vt manifestauimus in quinto libro huius scientiæ, vt igitur perfectam habeamus notitiam de substantia, perscrutandum est in seq.

Primo, quidem de substantia sensibili, quam manifestum est esse substantiam, vt elementa, & elementata, & cœlum &c.

Secundo, si mathematica, & species sunt substantiæ, & an separate, vel non.

Tertio posito, quòd nec mathematica, nec idæ sint separate. vtrum dentur præter substantias sensibiles aliquæ substantiæ separate immateriales æternæ. & hoc determinabitur in libro vltimo huius scientiæ. Hæc de primo capite dicta sint.

C A P V T I I.

IN secundo capite declarandum est, quòd de substantia sensibili, & materiali prius determinandum est. & cum diuidatur in materiam, & formam, & compositum prius determinandum est de forma, sic ergo procedendum est.

Primo, resumemus distinctionem de substantia.

Secundo, ponetur hæc conclusio relictis alijs modis prius agendum est de substantia sensibili.

Tertio, ponetur hæc conclusio, licet hæc substantia sensibilis diuidatur in materiam, & formam, & compositum relictis composito, & materia prius agendum est de forma.

Quantum ad primum, aduerte, quòd pro nunc solent assi-

gnari

gnari quatuor modi.

Primo, dicitur substantia ipsum quod quid est. i. quidditas & essentia rei, vt animal rationale est substantia hominis. & hic modus est verus.

Secundo, dicitur de vniuersalibus, scilicet de speciebus, quas dicunt Platonici esse substantias, & separatas à singularibus. & hic modus est falsus, & improbabitur infra.

Tertio, de primis, & vniuersalissimis generibus, quæ apud Plat. & Pythag. dicuntur ens, & vnum, de quibus disputabimus in tertio lib. cap. xj. & hic modus est falsus, & vltra de terminationem quam fecimus in tertio libro, reprobabitur etiam infra.

Quarto, de subiecto .i. de substantia particulari, quæ dicitur prima substantia, de qua alia. i. superiora, & accidentia prædicantur. ipsa autem de alijs non prædicatur, nisi indirecte, vt homo est Socr. vel per accidens, vt musicus est Plato. & hic est verus modus, & confessus ab omnibus. vnde & in prædicamentis dicitur esse maxime substantia, & est illa quæ ad sensum nota est.

Quantum ad secundum, aduerte, quòd cum sit nobis in nata via procedendi à notioribus nobis conuenienter prius, de quarto modo substantiæ determinandum est. nam cū substantiæ sens. particulares subiaceant sensui sunt notiores nobis, etiam quòd sint minores nobilitatis, & entitatis, ex consequenti per eas habebimus viam procedendi ad notiora naturæ, quæ sunt maioris nobilitatis, licet sint à sensu remota, vnde sic contingit in practicis, quod ex singularibus bonis peruenitur ad consecucionem boni vniuersalis, vt patet in regimine ciuitatis, & in arte medicandi, in qua ex sanatione membrorum particularium peruenitur ad sanationem totius, sic in speculatiuis ex notitia substantiæ particularis peruenimus ad notitiam substantiæ vniuersalis, & ex notitia horum sensib. perueniemus ad notitiam substantiarum insensib. quæ digniores, & notiores sunt secundum naturam, vt declarauimus in libro 2. capite 1. & hæc notitia præbebit nobis viam ad ea, quæ pertractanda sunt in vltimo libro.

Quantum ad tertium, aduerte, q substantia sensibilis tria
 Epic. Iauelli, R dicit

dicit. scilicet materiam, ut cuprum, & formam, ut figuram puta Mer-
 curij, & compositum puta statuam, & comparando formam
 materie, & composito, declarandum est formam esse priorē
 magis ens, quam materia. & similiter eam esse priorē cō-
 posito. deinde reprobanda est opin. antiq. qui arbitraban-
 tur solam materiam esse substantiam, & maxime substantiā,
 demum declarandum est, quod relicta materia, & compositō
 prius agendum est de forma. Quod igitur forma sit
 prior, & magis ens, quam materia. constat ex hoc, quoniam
 ut inquit Comment. in comm. 7. materia est in potentia,
 & forma est in actu, sed ut determinabitur in lib. 9. & in 12.
 actus simpliciter loquendo est prior potentia. nihil enim
 reducitur de potentia ad actum, nisi per aliquod extra ens
 actu, ergo &c. eadem ratione est magis ens quam materia,
 quoniam propter formam materia est ens. ordinatur enim
 ad formam, ut potentia ad actum. ergo formę est magis ens
 ex illo propter quod vnumquodque &c. eadem ratione for-
 ma est prior composito, quoniam non est actu, nisi per for-
 mam, & tam forma, quam materia sunt principia compositi;
 principium autem est prius principiatio, utrum autem sit ma-
 gis ens, & in quo sensu, quam compositum determinabitur
 in q. nostris. Visa comparatione facta inter partes substan-
 tię sensibilis secundum ordinem prioris, & posterioris repro-
 banda est antiq. opin. qui credebant solam materiam esse
 substantiam, quod omnes formas esse accidentia, quorum
 ratio fuit hæc. si a re sensibili, puta lapide auferantur omnia
 quę constat non esse substantias, sed dispositiones, vel affe-
 ctiones, vel viam ad substantiam, ut magnitudo, qualitates,
 & motus, siue generationes. patet quod nihil remanet, ni-
 si materia, ex qua res est, puta terra, vel aqua &c. & id maxi-
 me apparet in artificiatis. ergo videtur materia sola esse sub-
 stantia. & maxime substantia. nam ex conditionibus attri-
 butis materie, ut diximus in j. lib. in tract. 2. in cap. 2. sunt
 istę, quod sit ultimum, in quod omnia resoluuntur. & q̄ tam
 in generatione, quam corruptione permaneat secundum sub-
 stantiam, licet formę, & dimensiones, & qualitates varien-
 tur. hac ratione igitur visum est antiquis solam materiam
 esse substantiam. Sed contra eos arguitur, & ut ratio no-
 stra

stra euidentior sit contra eos, declaratur prius, quæ sit natura materiz. nam ex ignorantia eius peccauerunt antiqui; non enim cognouerunt dari primam materiam, quæ sit ens in pura potentia, sed credebant ipsam esse ens actu, ex quo fierent omnia, puta aquam, aërem, &c. & ideo ignorauerunt mutationes substantiales, vt clare habetur in primo de generatione.

Aduerte igitur secundum Arist. materiam primam esse talis naturæ, quod non est quid .i. substantia, nec quantitas, nec qualitas, nec ens cuiuscunque prædicamenti .s. in actu, sed est in potentia omnia ista 10. prædicamenta. est enim receptiua formæ substantialis: per quam fit substantia actu, & est receptiua quantitatis, per quam fit quanta actu, & sic de alijs, & esse eius aliud est ab vnoquoque eorum, quæ recipit, quoniam vt declaratum est in 1. phys. necesse est subiectum motus, & mutationis alterum esse ab utroque termino. materia autem ponitur subiectum motus, & mutationis, vt declaratum est in 1. phys. & declarabitur infra, ergo &c.

Et aduerte, quod licet natura materiz sit alia ab vnoquoque receptorum. in ea tamen omnia prædicantur de ea. hoc quidem modo, q̄ omnia accidentia prædicantur de substantia, quæ est actu, vt homo est quantus qualis similis agens, patiens &c. substantia autem actu prædicatur de materia, non quidem secundum se, sed concretive sumpta, vel denominatiue. nam hæc esset falsa materia est homo, quoniam sola materia non dicit totam essentiam hominis, sicut hæc esset falsa, homo est quantitas, sed hæc est vera, hoc materiaticum .i. hoc, cuius pars est materia est homo, sicut hæc est vera, homo est quantus .i. est ens cui inest quantitas. ex hoc autem modo prædicandi vult innuere Arist. q̄ sicut accidentia sunt aliud à substantia, de qua prædicantur denominatiue, ita substantia actu existens est aliud à materia, de qua prædicatur denominatiue ex consequenti materia non est tota substantia rei.

Et aduerte, q̄, vt inquit Comment. in comm. 8. sermones quos hic induxit Arist. sunt logici & famosi. In 8. lib. loquimur de forma & substantia materiz modo demonstratiuo.

E P I T O M E L I B. VII.

Declarata materia, nunc probandum est quod non sola, nec maxime est substantia, immo quod & compositum & forma sunt magis substantia, nam esse separabile, & esse hoc aliquid sunt conditiones substantiæ, substantia enim cum sit prior accidente est ex natura sui in quantum substantia separabilis ab accidente, & est hoc aliquid demonstratum, quod non competit alicui generi accidentium, significat enim aut quantitatem, aut qualitatem &c. sed hæc magis conueniunt composito & formæ, nam compositum habet esse per se, & est actu, & completum in natura sua, ideo habet esse separatum à quocunque alio composito, & hoc est aliquid demonstratum, forma vero licet non habeat esse per se completa substantia, cum sit pars, tamen cum sit actus est causa compositi quod sit actu & sit hoc aliquid, hæc autem non conueniunt materiæ ratione suæ potentialitatis, ergo &c. His præhabitis declarandum est, quod pro nunc relinquenda est substantia composita & materia, & incipiendum est à consideratione formæ, nam si de priori prius agendum est; constat non incipiendum esse à composito cum sit posterius suis principijs quæ sunt forma & materia.

Præterea, ipsum compositum est substantia manifesta, subiacer enim sensui, & omnes antiqui consentiunt huiusmodi sensibilia composita esse substantias, & ideo in eius cognitione non est, primo immorandum, sed in eo, de quo dubitatur multum propter sui inevidentiam, hoc autem est forma, quoniam formæ rerum sensibilibus non subiacent sensui.

Et si dicas, quare prius considerandum est de forma, quàm de materia, cum circa utranque sint multa dubia.

Dico, quod ideo fit, quoniam materia quoquo modo cognita & confessa est ab omnibus esse substantiam, formam autem non,

Dico quoquo modo, quoniam & si ab omnibus non fuerit cognita prima materia, tamen quod unusquisque ponebat materiam illud confitebatur esse substantiam. Circa igitur formam, ut circa rem magis dubitabilem prius

immorandum est. Hæc de secundo

capite dicta sunt.

Caput

C A P V T I I I.

IVta ordinem præpositum agendum est de forma substantiæ sensibilis. Sed aduerte, quod huiusmodi forma potest sumi pro forma partis, ut anima, vel forma lapidis, & potest sumi pro quidditate, vel essentia rei, ut humanitas, lapideitas &c. & hæc iterum potest dupliciter considerari.

Primo, in abstracto, & dicitur forma rotius.

Secundo, in concreto, & dicitur significatum diffinitionis, ut esse animal rationale est quidditas hominis.

Nam facta interrogatione quid est homo. Respondetur, quod est animal rationale, unde apud Arist. esse animal rationale est quod quid est homo. In hoc igitur lib. agendum est de forma in hoc ultimo sensu, unde pertractabitur sub hoc tir. quod quid est. Sed aduerte, quod ly quod quid est apud philosophum realem sumitur pro significato diffinitionis, quod est ipsa quidditas, vel essentia, vel substantia rei, apud logicum sumitur pro diffinitione indicante essentiam per prædicata essentialia. In hoc 7. libro pertractatur modo logico. In octavo autem modo reali, & ideo in hoc septimo lib. procedentes modo logico acturi de quod quid est, id est de diffinitione, considerabimus in hoc cap. ex quibus prædicatis constituitur, pro cuius resolutione ponuntur tres conclusiones.

Prima conclusio, Quod quid est non constituitur ex prædicatis per accidens, & probatur, quod quid est rei est illud per quod respondetur ad interrogationem factam per quid, sed secundum prædicata per accidens, non convenienter respondetur ad interrogationem de quid, si enim interrogo quid tu sis, & respondes quod tu es musicus, male respondes. nam dum interrogo quid tu sis, quero de essentia & natura tua, constat autem quod essentia musici non est essentia tui, musica enim qualitas est, tu es substantia, cum igitur per quod quæram, quid tu sis secundum teipsum intrinsece, & non secundum aliquod extraneum, non est respondendum per prædicata accidentalia, ergo quod quid est non constituitur ex prædicatis per accidens.

Secunda conclusio: Nec constituitur ex prædicatis per se, quæ tamen sunt in secundo modo per se quales sunt proprietates & passionēs. nam prædicatum per quod respondetur ad quid dicit essentiam eius, de quo fit interrogatio, puta si quæro quid est homo, intendo quærere quæ natura, & quæ res sit homo, & si respondetur quod est animal sensus est, ea res vel essentia, quæ est animal est ea quæ est homo, sed prædicata per se in secundo modo non dicunt essentiam eius, de quo fit interrogatio per quid, immo aliam, nam hæc est per se, superficies est colorata, & tamen ut constat aliud est esse superficiem, quoniam id ad quantitatem pertinet, & aliud esse coloratum, quoniam id ad qualitatem spectat, ergo & c.

Præterea, quæ prædicata per se in secundo modo non dicant eandem essentiam cum subiecto, de quo fit interrogatio per quid, sic probatur, cum contingat eidem assignari multas passionēs, ut superficiei passionēs sunt coloratum, asperitas, lenitas, si dicuntur eandem essentiam cum superficie, ergo inter se erunt idem, quod est manifeste falsum. nam asperum & lene contraria sunt, consequentia patet per illud principium quæcunque vni & eidem sunt eadem inter se sunt eadem. Patet ergo, quod quid non constitui ex prædicatis per se in secundo modo per se.

Tertia conclusio, quod quid est constituitur ex prædicatis per se in primo modo, quæ dicuntur prædicata essentialia, siue quidditatiua. nam cum sit necesse quod quid est constet ex aliquibus prædicatis & non constet ex his quæ sunt per accidens, nec ex ijs quæ sunt per se in secundo modo, restat ex sufficienti diuisione quod constet ex ijs quæ sunt per se in primo modo, & id rationabiliter, nam cum definitio dicat rei essentiam, necesse est eam constare ex prædicatis magis intimis & essentialibus, hæc autem sunt in primo modo per se, ut declaratum est in posterioribus analyticis, ergo & c. Hæc de hoc.

C A P V T I I I I.

IN hoc quarto cap. videndum est quæ possint habere quod quid est. i. quorum potest esse definitio, & pro resolutione agemus quatuor.

Primo,

Primo, quod eorum quę sunt ens, aut vnum per accidens, non potest esse diffinitio .

Secundo, quod tam substantię, quàm accidentium sumptorum per se vt superficiiei & albedinis &c. potest esse diffinitio.

Tercio, quod diffinitio primo est solius substantię, secundo autem est accidentium.

Quarto, solvuntur duo dubia .

Quantum ad primum, aduerte, qđ sicut ex materia, & forma fit substantia sensibilis composita, sic ex subiecto, & accidente fit compositum accidentale, puta homo albus, & sicut substantia composita potest signari per vnum nomen, vt per hominem vel lapidem, sic & compositum accidentale, vnde homo albus potest signari per vestem, vt vtamur exemplo Arist. & sicut de homine potest assignari aliqua ratio, per quam declaratur quid significet homo puta animal rationale, ita de veste potest assignari ratio significatiua nominis, puta qđ vestis significat hominem album, ex consequenti videtur ex omnibus istis quod sicut substantię compositę possunt diffiniri, sic & composita accidentalia, & propterea Arist. ne quis decipiatur ponit conclusionem negatiuam, cuius ratio est, quęcunque composita diffiniuntur constat ex duabus partibus quę sunt eiusdem prædicamenti puta vtraque est substantia, & dicuntur per se, & constituunt aliquid, id est aliquod vnum quod dicit vnā essentiam, vel quidditatem, sed compositis accidentalibus nulla harum conditionum conuenit, vt patet, ergo &c. & quoniam istę conditiones conueniunt speciei specialissime in genere substantię, ideo illa proprie diffinitur, nec obstat quod de composito accidentali potest assignari ratio, quoniam non omnis ratio declaratiua nominis potest dici diffinitio, nisi constet ex genere & differentia, quorum vtrunque prædicatur per se de diffinito, alias, vt inquit Arist. Ilias potest dici diffinitio. Declarat enim totum bellum Troianum per Homerum descriptum. Huiusmodi autem ratio declaratiua contingit fieri dupliciter, primo quando per nomen magis notum manifestatur quid significet nomen minus notum, vt si per hoc nomen sapientiam manifestatur qđ

fit philosophia, secundo quando per orationem manifestatur significatum nominis simplicis, vt interpretando philosophum per amorem sapientie.

Quantum ad secundum, aduerte, quòd cum diffinitio importet quod quid est, siue quidditatem, & ipsum quod quid est inueniatur in substantia, quæ proprie significat quid & hoc aliquid inueniatur etiam in prædicamenti accidentiũ, nam & in eis fit interrogatio per quid vt quid est albedo, quid linea, quid centrum, & per huiusmodi interrogationem querimus de quidditate siue essentia eorum, manifestum est quod accidentia sicut & substantiæ possunt diffiniri, & confirmatur, nam sicut se habet ens ad substantiam & accidentia, sic & quod quid est & diffinitio, quoniam hæc significant rei entitatem, sed ens non tantum significat substantiã, sed & quantitatem & alia prædicamenta, ergo quod quid est, & diffinitio non solum conuenit substantijs, sed & accidentibus.

Quantum ad tertium, aduerte, quòd licet accidentia habeant quid, non tamen simpliciter, sed secundum quid, nam sicut sunt entia, sic habet quid dictum est autem supra, quod substantia est primum & simpliciter ens, accidens autem est ens in habitudine ad substantiam, vnde est ens, quia est entis, ex consequenti, est ens secundario & secundum quid, quoniam per substantiam, cum igitur habeant quid secundum quid, & diffinitio significet quid, patet & diffinitio primo & principaliter est solius substantiæ, secundario est accidentium, & ex ijs sequitur corollarie quòd diffinitio competit substantiæ & accidenti, non vniuoce, quoniam cum vniuatione non stat primum & secundarium, sicut nec prius, nec posterius, nec æquiuoce, quoniam in æquiuocatione nõ seruetur ordo, nec habitudo vnius ad alterum, ergo competit proportionaliter, scilicet in respectu vnius ad alterum & id rationabile est, nam sicut ens analogicè conuenit substantiæ & accidenti, sic dicendum est de quid, & de diffinitione, vnde & Arist. in tex. dicit, quòd hæc se habent sicut medicinale, quod constat dici non vt vnum, sed vt ad vnum, id est prædicatur de pluribus, puta de opere, de vase, per respectum ad corpus medicabile, quod est subiectum in quo operatur

ratur medicina, patet ergo, quòd tam substantiæ quàm accidentis est diffinitio, sed substantiæ simpliciter, accidentis autem secundario. Sed dices, videtur Arist. sibi contrarius, nam iam determinauerat q̃ accidentis potest esse diffinitio, hic autem determinat oppositū. Ad hoc dico dupliciter. primo, non negauit supra, quin accidentis sit, diffinitio, sed entis per accidens, quod est vnum per accidens, vt homo albus, non est autem eadem ratio de vtroque, quoniam accidens, puta albedo est ens per se, dictum est enim in lib. 5. ens per se distingui in decem prædicamenta, ens autem per accidens non est ens per se, vt patet, sed omne diffinibile necesse est esse ens per se, aliter non diceret vnā essentiam vel quidditatem, ex consequenti non diceret quid, & sic eius non posset esse diffinitio, stat ergo quod de ente per accidens non potest esse diffinitio, & tamen de accidente per se sumptu erit diffinitio, vnde & hominis & albi est diffinitio, sed hominis albi nulla est diffinitio. Dico secundo quòd tam entis per accidens quàm accidentis, si negauit Arist. diffinitionem non negauit nisi primo & simpliciter, illud enim conuenit soli substantiæ, vt declarauimus, non autem negauit secundario, & ideo non est sibi contrarius.

Quantum ad quartum, aduerte, quòd ex determinatione facta qua dictum est accidentis esse diffinitionem, licet secundario duo insurgunt dubia, & secundum insurget ex solutione, qua soluetur primum.

Primum, si accidentia habent diffinitionem, aut illa diffinitio est sine additione aut ex additione, id est aut in ea nihil assumitur quòd non pertineat ad essentiam diffiniti, aut aliquid assumitur quòd est extra essentiam diffiniti, si primo ergo diffiniuntur accidentia sicut substantiæ omnis enim pars diffinitiuā substantiæ est substantia & sunt de quidditate diffiniti, vt homo est animal rationale, vel quid compositum ex corpore & animali rationali, sed hoc est falsum, dictum est enim q̃ diffinitio non conuenit substantiæ & accidenti vniuoce, ergo non eodē modo, si secundo, ergo diffinitiones accidentium non sunt diffinitiones, nam cū diffinitio sit indicatiua solius essentiæ diffiniti, nulla pars diffinitionis debet esse extra essentiam diffiniti .i. hmoi ergo diffinitio-

nes non sunt vere diffinitiones . Ad hoc respondetur quod cum duplicia sint accidentia, scilicet simplicia & copulata siue composita, simplicia quidem sunt quæ non determinant sibi certum subiectum, vt communia accidentia, & accidentia mathematica, vt rectum & curuū, linea & superficies & c. licet enim non possint esse sine subiecto, tamen non determinant sibi hanc vel illam substantiam pro subiecto, copulata vero siue composita sunt quæ sunt determinatæ circa tale vel tale subiectum, & extra quod non possunt esse, & huiusmodi sunt accidentia propria, vt risibile, rudibile, simum, aquilum, crispum . nam risibile determinat sibi hominem rudibile asinum, simum & aquilum nasum, crispum capillos, licet simplicia, in sui diffinitione non recipiant determinatū subiectum, tamen est necesse id fieri copulatis, quoniam siue proprio subiecto non possunt intelligi, nam sicut masculinum & foemininum non potest intelligi sine animali ex consequenti non potest diffiniri sine animali, sic nec simum nec aquilum sine naso . Ad rationem igitur in oppositum, dico quod huiusmodi accidentium diffinitiones sunt per additionem, ad improbationem dico quod sufficit diffinitioni indicare essentiam rei diffinitæ, secundum modum conuenientem rei diffinitæ, nam si res diffinita est ens simpliciter & secundum se & nō respectum ad alterum, diffinitio ita debet manifestare essentiam rei diffinitæ, quæ quælibet pars diffinitiva sit de essentia eius, si autem non est ens simpliciter & secundum se, sed secundum quid, & in ordine ad aliud, ita debet manifestare essentiam rei diffinitæ, quod exprimat illud per quod est ens, etiam quod sit extra essentiam suam, & quoniam huiusmodi accidentia sunt entia in ordine ad subiectum, ideo necesse est in eorum diffinitione assumi subiectum, nego igitur quod sit necesse omnem partem diffiniri esse de substantia rei diffinitæ nisi sit substantia, & non solum substantia, sed sit sine habitudine ad alterum, & id dico, quoniam in diffinitione formæ substantialis ponitur propria materia, vnde & Arist. in secundo de Anima . diffinit animā per esse actum corporis physici, propter quod concluditur quod diffinitio siue additione non datur nisi de substantia, completa & quæ non habet rationem partis .

Secundum

Secundum dubium insurgit ex solutione primi, dictum est enim quod accidentia copulata habent diffinitionem ex additione, & quod hoc non est conueniens cum non possint intelligi nec esse sine proprio subiecto, sed contra. nam si habent diffinitionem ex additione, accipio nasum simum, & quero autem est idem dicere nasum simum & nasum concauum, non idem, quoniam eadem diffinitio non datur de utroque, nam simum assumit nasum in sui diffinitio, secundum te, concauum autem non, cum sit accidens mathematicum, quæ abstrahunt à materia sensibili, ut dictum est in 6. lib. & dicetur infra in hoc 7. lib. si non est idem, ergo hoc ideo est, quia dum dico simum dico nasum, cum autem dico concauum non dico nasum, quo per te concessio quotiens dico nasum simum faciã nugationem, nam loco nominis licet diff. ponere, idem ergo est dicere nasum simum & nasum concauum, sed cum vianda sit negatio in diffinitionibus, patet quod non debet admitti huiusmodi diffinitio per additionem in accidentibus, sed tenendum est solius substantiæ esse diffinitionem.

Ad hoc dico, quod omnino necesse est accidentia diffiniri per subiectum, quoniam cum dependeant à subiecto non habent esse nisi in subiecto, nec possunt intelligi sine eo, & cum arguitur, ergo fiet nugatio, nego consequentiam, ad probationem dico, quod simum & concauum essentialiter sunt idem, non enim est aliud essentialiter simitas nisi quædam conca. unde differunt solum ex connotato, quod tamen non est de essentia nec simita. nec concauitatis, & quoniam sunt idem essentialiter idem penitus est dicere nasum simum & nasum concauum, unde si queratur quid est nasus simus, non est respondendum quod est nasus nasus concauus, sed quod est nasus concauus, & cum arguitur quod loco nominis potest poni diffinitio, hoc non est vniuersaliter verum, nisi quando utraq; pars diffinitiuæ est intrinseca diffinitio, quod si in aliquibus alijs tenet erit accidens, potest etiam dici quod id vniuersaliter est verum, dummodo sumatur præcise ipsum diffinitum, puta simum, nam loco fini potest poni diffinitio, scilicet nasus concauus, in proposito autem, dicendo nasum simum non sumitur præcise diffinitum, ideo non valet. Hæc de 4. cap. dicta sint.

IN quinto cap. videndum est si quod quid est, est idem an diuersum ab eo cuius est, sed antequam deueniamus ad determinationem quaerit aduerte, & Arist. id quaerit propter Plat. quod ut sibi imponit Aristot. tenebat quod quid est, id est quiditatem specificam esse substantiam distinctam & separatam secundum esse ab ijs quorum est quiditas .i. a suppositis suis, ut quiditas hominis a quolibet homine, quando ergo quaerit Arist. utrum quod quid erat esse sit idem, aut alterum &c. intendit utrum suppositum & natura specifica illius sint idem, aut diuersum, puta Socrates, & id quod est homo, & quoniam Arist. in improbatione Plat. diffusus est, adeo quod videtur addiscentis ingenium inuolueret, ideo conabor determinationem facere resolutam & compendiosam.

Pro determinatione igitur faciam quatuor.

Primo, praeponomam distinctionem.

Secundo, ponam hanc conclusionem, in ijs quae sunt per se entia, quod quid est, nec est diuersum, nec separatum ab eo cuius est.

Tertio, ponam hanc conclusionem, in ijs quae sunt per accidens quod quid est, non est idem cum eo cuius est.

Quarto, soluentur quaedam argumenta sophistica.

Quantum ad primum, aduerte, & cum Arist. in hoc. 7. lib. procedat modo logico, ut diximus supra, qui sumitur a modo praedicandi vnius de altero, & cum omnia praedicata dicantur de subiecto per se vel per accidens quando quaeritur utrum quod quid est sit idem cum re cuius est, potest quaeri in ijs quae praedicantur per se, & in ijs quae praedicantur per accidens, exemplum primi, Socrates est homo, homo est animal &c. exemplum secundi, homo albus est homo albus, & pro utraque parte distinctionis quaeritum determinabitur.

Quantum ad secundum, probandum est quod in ijs quae sunt per se, id est quando praedicatum dicitur per se de subiecto, ut Socrates est homo, quod quid est praedicati .i. quod signifi

significatur per prædicatum, non est diuersum essentialiter à subiecto, nec habet esse separatum extra subiectum & qui dem quod non sit diuersum, probatur dupliciter .

Primo, supposita imaginatione Platonis quod dentur illæ ideæ abstractæ, quas dicit priores substantias illis singularibus, si vniuersaliter quod quid est sit diuersum ab eo cuius est, sequitur q̃ cum ille ideæ sint quædam res, habeant suum quod quid est, & quod suum quod quid est sit diuersum ab ipsis, non enim est maior ratio de vno quàm de alio, hoc autem est falsum quoniam ideæ haberent priores substantias abstractas, nam quod quid est, est prius eo cuius est : quoniam vnumquodque pendet à suo quod quid est, & sic ens & bonum & vnum haberent aliquod prius, quod tamē est contra Plato. qui tenet per se ens, per se bonum, per se vnum esse simpliciter prima.

Secundo, si quod quid est non est idem cum eo cuius est, ergo erit processus in infinitum, quod est absurdum, nam sumatur equus & suum quod quid est, si sunt idem, ergo quod quid est equi est alia res ab equo, & cum quælibet res habeat suum quod quid est . ergo quod quid est equi habet suum quod quid est, quod est idem vel diuersum a quod quid est equi, si idem, eadem ratione debuit poni idēitas inter equū & suum quod quid est, si diuersum, ergo & ipsum habebit suū quod quid est, de quo quæritur, vt supra, & sic patet q̃ erit processus in infinitum, quod tamen est falsum. Demonstratum est enim in secundo libro q̃ in omni genere causarum est status, quod quid est autem habet rationem causæ & principij formalis, vt dicemus infra, ergo &c. Dicendum est ergo q̃ in ijs quæ sunt per se. Quod quid est & id cuius est, sunt idem realiter, & non solum realiter, sed etiam ratione .

Quomodo autem sunt idem ratione declarabitur in q̃ nostris metaphysicalibus. Quòd autem non sit separatum ita quod sit extra id cuius est, probatur sic. Cum quod quid est dicat quidditatem & substantiam siue naturam eius cuius est, si est separatum, ergo id cuius est, puta homo animal bonum, ens non poterit sciri, nec ens erit ens, nec bonum erit bonum, nec vnum erit vnum, quæ omnia sunt absurda, probatur consequentia, nam vnūquodque scitur per suam quidditatem :

ditatem, sed si est separata quomodo poterit sciri, nam sicue est impossibile scire rem esse animatam, nisi sibi insit anima sic impossibile est scire rem talem nisi sibi intrinseca sit quidditas sua. Nam vanum est arbitrari circulum esse scibilem, nisi inesset sibi rotunditas. Quod autem sequatur ens non esse ens &c. Probatur sic nullum est talis nature, nisi per aliquod sibi intrinsecum, & precipue in ijs quæ non dicuntur ad alterum. Quod dico quia in respectu potest fieri denominatio ab extrinseco, ut locatum à loco, qui tamen non est in locato. In absolutis autem id non contingit, nam stultum esset dicere, calidam aquam, nisi calor sibi inesset, & hominem esse animal nisi natura sensitiva sibi inesset. Stigitur quod quid est entis, non inest enti, ens non erit ens, idem dico de bono, de vno, & de quolibet alio in genere suo, ut igitur non sequantur hæc inconuenientia dicendum est. Quod quid est entis, & boni & benigni & cuiuscunque alterius, in ijs quæ sunt per se, non esse diuersum, nec separatū ab eo cuius est.

Quantum ad tertium, aduerte, quod in ijs quæ dicuntur per accidens, ut homo albus est homo albus, ideo quod quid est prædicati est aliud à subiecto, quàm si comparatur totum prædicatum ad hominem certum est quod aliam naturam dicitur homo albus ut albus, ab homine inquatum homo, si autem comparatur prædicatum ratione partis, puta albus ad subiectum ratione partis, puta homo, certum est quod non est idem, quoniam quidditas albi est accidens, quidditas hominis est substantia. Quod si comparatur prædicatum ratione albi, ad subiectum ratione albi, tunc erunt idem, nam sicut quod quid est hominis est idem cum homine, sic quod quid est albi est idem cum albo, album enim essentialiter puram qualitatem significat, patet igitur quomodo in ijs quæ dicuntur per accidens, quod quid est, non est idem cum eo cuius est, in sensu tamen exposito est idem, sed aduerte, quod album non prædicatur de albo per accidens, est enim prædicatio eiusdem de seipso quæ est per se, ut homo est homo unde dicendum quod loquendo proprie in ijs quæ dicuntur per accidens semper est diuersum quod quid est ab eo cuius est.

Quantum ad quartum, aduerte, quod aliqui sustinere volentes, quidditatem non identificari ei cuius est quidditas, formant quædam

quedā argumenta sophistica, quorum tñ solutio potest haberi ex nunc determinatis, arguunt aut sic. Si Socr. est idem cum sua quiditate, ergo est idem cum animal rationali. Sed animal ratione est duo, ergo Socr. est duo. Item si Socrates est idem cum sua quiditate, ergo quidquid est Socrates, est sua quiditas, sed Socr. est albus per casum, ergo albus est quiditas Socr. Item si homo est sua quiditas, ergo est incorruptibilis, quia rerum quiditates sunt incorruptibiles, cū sint vniversales & vt sic abstrahant ab hic, & nunc.

Patet aut ex determinatis horum & similis solutio intelligendum, est enim rem & quiditatem suam esse idem, quoad intrinseca essentialia, non aut omnibus modis. nam quiditas importat sola prædicta essentialia, & excludit omnia prædicata extranea & accidentalia. Res aut cuius est quiditas, vt Socrates & homo licet importent prædicata essentialia, non tamen excludunt prædicata accidentalia neque principia indiuidualia, & ideo nihil prohibet aliquid prædicari de re, quod non prædicatur de quiditate, vt album prædicatur de Socr. & de homine, & non de quiditate, & aliquid prædicatur de quiditate, quod non prædicatur de re, vt esse principium scientiæ siue demonstrationis esse principium formale, constitui ex genere & differentia quæ significatur vt duo, vnde si bene consideras huiusmodi sophismata, peccant per fallaciam accidentis. Patet igitur ex dictis quò quodquid est, (pro eodem. n. accipimus quodquid est & quiditate) in ijs, quæ sunt per se est idem & nō est separatum ab eo cuius est, in ijs autem quæ sunt per accidens non est idem, & quomodo soluuntur sophistici elenchi. Hæc de 5. cap. dicta sunt.

C A P V T V I.

IN sexto capite videndum est si res sensibiles singulares generantur à formis separatis quas Plato vocat species vel ideas, Sed antequam determinemus propositum, aduerte, q̃ Plato vt sibi imponit Arist. triplici de causa posuit ideas, primo vt per eas sciremus substantias sensibiles corruptibiles, & hanc causam pertractauimus in libro tertio in cap. 6. vbi & soluimus rationem Plato. secundo vt per idea-

rum

rum participationem, res sensibiles singulares existerēt, existimabat. n. quod sicut non existit calor in aqua nisi participatione caloris essentialis, qui est in primo calido, sic nō existērent indiuidua sub hac vel illac specie, nisi participarēt naturam specificam quæ essentialiter est idea, sed hæc causa reprobabitur infra tertio, vt essent principia effectiua generationis horum sensibilibum. Existimauit enim quod sicut primo & per se calidum est causa effectiua omnis calidi sic. primo & per se homo est causa generationis omnis hominis: primum autem & per se hominem vocat ideam hominis, & hominem per essentiam, & hæc causa reprobabitur in hoc cap. Pro determinatione igitur propositi tria agenda sunt.

Primo, præponentur quædam quæ necesse est præcognoscere ante determinationem propositi.

Secundo, determinabitur propositum contra Plat.

Tertio, soluentur quatuor dubia quæ consurgit ex determinationis.

Quantum ad primum, aduerte, quod quatuor præcognoscenda sunt. Primo, quot modis contingit res generari. Secundo, quot requiruntur in omni generatione. Tertio, quod est illud quod proprie generatur. Quarto, quod vnumquodque generatur à suo simili.

Quantum ad modos generationis, aduerte quod tribus modis contingit fieri generationem, scilicet ex natura, & dicitur generatio naturalis, vel ex arte, & dicitur generatio artificialis, vel à casu siue fortuna, & dicitur generatio casualis siue fortuita.

Naturalis generatio est illa cuius principium est natura, vt quando generatur planta, aut lapis, aut animal, horum enim principium est virtus naturalis indita rebus naturalibus per quam agunt.

Quæ autem sit & quomodo fiat generatio, quæ est alia à naturali, & causalis dicemus postquā assignauerimus quot requiruntur in omni generatione.

Aduerte igitur tria requiri. Primo, id à quo res fit, nihil enim seipsum generat, aliter se de potentia ad actum reduceret, ex consequenti prius esset quam esset. Secundo, id de quo generatur, nihil enim naturaliter fit ex nihilo, sed necesse

cesse est subijci subiectum, siue materiam, vt probatum est in primo phys. tertio id quod generatur quod dicitur terminus generationis qui quidem terminus non solum inuenitur in prædicamento substantiæ, sed & in prædicamentis accidentium, generatur enim & Socrates & quantum & quale &c. licet generatio in prædicamento substantiæ dicatur generatio simpliciter, & in prædicamentis accidentium, generatio secundū quid, vt declaratum est in 5. phys. Et aduerte quod licet in omni generatione requiratur forma, tamen de ea non loquitur particulariter Arist. qm̄ includitur in termino generationis, quod enim generatur accipit esse per formam, & qm̄ manifestum est in omni generatione dari agēs & id quod generatur, ideo philosophus probat solum de materia sic arguens. Quæcunque possunt esse, & non esse habent materiam, nam materia in quantum est in potentia ad formam est principium essendi, & in quantum est sub priuatione est principium non essendi, vnde dicemus infra, quod materia est in potentia contradictionis & quæ non habent materiam, vt sic incorruptibilia sunt, sed quæcunque generantur, natura aut arte, possunt esse & non esse, nam ad sensum patet quod aliquando sunt aliquando non sunt. ergo &c.

Et si quæras quomodo hæc se habent ad naturam, vtrum tam materia quàm forma & generatum & agens possint dici natura. Respondeo vt determinatum est in 2. phys. Materia vere dicitur natura, quoniam intrat constitutionem rei naturalis & permanet, vnde inquit Arist. in 2. phys. tex. 10. vno quodam modo natura dicitur prima unicuique subiecta materia habentium in seipsis principium motus, & mutationis, & aduerte, quod à materia vt est natura dicuntur generationes corporum simplicium puta ignis & aquæ, esse naturales, nam cum dicitur natura esse principium motus, non est necesse, quod semper sit principium actiuum, sed vel actiuum vel passiuum, prout rebus cōuenit natura in rebus animatis natura est principium actiuum, generantur enim à principio intrinseco, & seipsam mouent localiter; in rebus aut inanimatis est principium passiuum, qm̄ generantur à principio extrinseco, vt patet in 2. de generatione, & mouentur localiter nō à seipsis, sed ab extrinseco, vt declarauimus in quarto cœli.

Epit. Iauelli.

Item

Item forma s^m quam res sit, dicitur proprie & est magis natura quam materia, q^m vt declaratu^m est in 2.phys.tex.14. generatio rei maxime in viuentibus dicitur natura, quia est via in naturam, constat autem quod ideo est via in naturam, quia est via in formam, ergo forma proprie est natura, & magisquam materia, quoniam per formā h^c res naturalis actu, per materiam vero tantum potentialiter.

Generatum vero, non propriæ dicitur natura, quoniam natura formaliter est principium, generatum vero est principiatum, vnde vt inquit Arist. in 2.phys.tex.12. Quod autem est ex ijs, natura quidem non est, sed à natura.

Agens autem quoniam non secundum se totum agit sed per formam, forma autem est natura, ideo vt sic potest dici natura, & præcipue quoniam forma agentis & forma geniti vel sunt eiusdem speciei, & distinguuntur tantum numero, si sit agens vniuocum, vel saltem habent aliquam conformitatē, si non est generatio vniuoca, vt declarabitur infra, quando inuestigabimus, si vnumquodque generatur à suo simili. Patet igitur quod requirantur in omni gnatione, & quō se hñt ad naturā. Reuertentes nunc ad manifestandum gnationem distinctā à naturali, & casualē considerabimus duo. primo, qd sit. secundo, quō proceditur in ea quæ est artificialis.

Aduerte igitur, vt colligitur ab Arist. sic potest diffiniri. Generatio distincta à naturali est, quæ propriæ dicitur factio, cuius principium actiuum est, aut ars, aut potentia, aut intellectus, in qua contingit aliquid fieri à casu, & à fortuna, sicut in his quæ generantur à natura.

Primo dicitur, quæ propriæ dicitur factio. nam, vt inquit Comment. in comm.22. generabilia, quæ sunt in substantijs propriæ dicuntur generata. alia vero quæ sunt præter substantias magis sunt acta, quàm generata, vt sanatio per artem, p-iectio lapidis per virtutem motiuam manus gubernatio familiaris &c. Et ratio quidem huius differentię est, quod producta à natura determinato modo producuntur. & non aliter, ideo dicuntur genita. Quæ autem producuntur alio principio quàm à natura, puta ab intellectu, vel voluntate produci, possunt aliter, & aliter, ideo non propriæ dicuntur genita, sed acta, aut facta, & eorū productio dicitur propriæ factio.

Secundo dicitur, cuius principium est, aut ars &c. Aduer-

te, & in his quæ non fiunt à natura, aliquando sufficit sola potentia facientis sine arte, ut tractus campanæ, proiectio lapidis, scissio ligni, fractio continui, & harum factionum dicitur potentia. s. agentis esse principium. Quæ quidem potentia secundum Comment. in côm. 22 significat virtutem animatam naturalem, ut virtutem motiuam s. locum, de qua locuti sumus in 3 de anima. & in tract. de motu animalium, aliquando ultra potentiam naturalem requiritur ars, qua prædeterminata media agens operatur, ut in edificatione. & tunc hæc factionum dicitur ars esse principium. Aliquando sufficit excogitatio intellectus sine arte, aut alio habitu, ut quando quis regulat equum, aut nauem ex suo ingenio absque hoc, quod artē gubernatoriam circa hominē didicerit, & harum factionum principium est mēs, siue intellectus unde inquit Cōmen. in cō. 22. & per cognitionē intēdit illud quod hō agit excogitatione, & volūtate &c.

Tertio dicitur, in qua contingit aliquid fieri casu, & fortuna &c. Aduerte quod sicut in generatione naturali aliquid euenit præter intentionem agentis, ut quod homo nascatur cum sex digitis, quod est fieri à casu, ut determinatum est in 2. Phys. Item sicut in naturalibus aliqua, generantur ex spermate, dicuntur genita per se, aliqua sine spermate, ut rana, & vermis, & dicuntur genita à casu, de quibus dicemus infra. sic in his factionibus non naturalibus, contingere aliquid potest præter intentionem agentis, puta Socr. infirmus intēdit itinerari gratia solatij, & sanatur præter intentionem. & huiusmodi sanatio fit à casu, & aliquis projiciens lapidem ad signū. frangit caput transeunti, & aliquis ædificans in altum, ruit deorsum, & frangitur tibia. & hæc dicuntur esse à casu.

Quomodo autem genita sine spermate sint eadem, vel non eadem cum his quæ generantur cum spermate, & quomodo sint genita à casu, determinabimus in quæst. Metaphys.

Viso quid sit factio, ut distinguitur à gnatione naturali videndum est, quō procedimus in factione, cuius principium est ars, & considerabimus duo. Primo, de principio effectiuo artificiali. Secundo, quō ex hoc principio procedimus ad artificiatum producendum. Aduerte igitur, quod sicut in gnatione naturali principium quo agēs agit est forma eius naturalis qua est actu, sic in factione artificiali, principium quo artifex opat

est forma artificiatum existens in anima artificis, sicut esse cognitum, quam Aristoteles appellat speciem, & quod quid erat esse, id est significatum per definitionem artificiatum, & primam substantiam, id est primam formam. est enim causa formæ artificiatum ad extra, ex consequenti est prior. Quæ quidem forma differt in tribus à forma naturali. Primo in esse, quoniam illa habet esse reale, hæc autem esse cognitum. Secundo, ex subiecto, plures enim formæ naturales oppositorum non se compatiuntur in eodem, iste autem se compatiuntur in eodem intellectu, quoniam licet esse unius oppositi sit corruptio esse alterius oppositi, non tamen cognitio unius tollit cognitionem alterius, immo adiuuat, ut per materiale cognosco immateriale, & per virtutem cognosco vitium. Tertio ex effectu, nam forma naturalis non producit, nisi sibi simile, forma autem, quæ est in anima producit contraria, ut pro sanitate cognita potest medicus causare sanitatem, & infirmitatem, ut clarius dicemus in lib. 9. agentes de potentia rationali. Patet igitur, quod principium artificiatum est species, siue ratio eius in mente artificis.

Quantum ad materiam procedendi in productione artificiatum, aduerte, quod duæ actiones requiruntur: prima dicitur intelligentia: secunda dicitur factio. nam primo necesse est ut intelligam quid sanitas, & quomodo diffinitur per adæquationem humorum, necesse est ut secundo loco intelligam quid sit adæquare, & quomodo adæquantur humores, & quomodo adæquare diffinitur per reducere ad temperamentum humorem excedentem, necesse est ut tertio loco intelligam, quid, & quomodo reducit ad temperamentum, & quomodo reductio huiusmodi fit per appositionem contrarij est necesse quarto loco, ut intelligam, quod est illud contrarium, & quomodo apponendum est, & qua mensura, & in hoc ultimo est status intelligentiæ, & ab eodem incipit factio, ita quod primum in intelligentia est ultimum in factione, & ultimum in intelligentia est primum in factione, quæ dicitur executio. Hoc igitur modo procedimus in factionibus artificialibus respectu artificiatorum, quæ sunt per se, id est ex intentione agentis, ut secludamus artificiatum casuale. Hæc de factione artificiali dicta sunt.

Nunc agendum est de factione casuali.

Aduerte

Aduerte igitur q̄ factio tunc est casualis, quando acquiritur finis, qui etiam acquiritur per artem, sed non per intelligentiam agentis, immo præter propositum suum, cuius tamen principium in exequendo cōtingit esse idem cum principio factionis artificialis, verbi gratia, Socrates infirmatur propter excessum humoris frigidi, quem necesse est dissolui per calorem, medicus intendens dissolutionem caloris ordinat confricationem, vt excitatiuam caloris, & ab ea incipit sanationem. Plato laborat excessu eiusdem humoris, & ne sciens confricationem excitatiuam caloris confricationem facit, & ad eam præter intentionem sequitur sanitas. Patet ergo. idem esse principium in exequendo vtriusque sanationis. Dico in exequendo, non quo ad intelligentiam, qui enim operatur casualiter respectu effectus casualis non procedit per intelligentiam. Quod quidem principium, puta calor, si per seipsum sanat est pars sanitatis. Si autem per respectum non sufficit. ad ipsum sequitur aliquid, puta subtilitatio humoris crassi, ad quam sequitur sanitas. Contingit. n. aliquando per vnum medium, aliquando per plura acquiri sanitatem, tam per artem, q̄ casualiter. Manifestum est igitur ex prædictis, quot modis contingit res generari, & quot requiruntur in omni generatione, & præcipue quomodo necesse est præexistere materiam, quoniam apud physicum ex nihilo nihil fit, quam necesse est esse partem substantiæ sensibilis, quoniam inest ei, & permanet. & potest dici, quod sit ipsum genitum per aduentum formæ, quæ deducitur ad actum. nam ferrum per aduentum figuræ gladij fit gladius.

Quantum ad tertium. s. quid est illud quod proprie generatur in omni productione, tam naturali, q̄ artificiali, q̄ etiā casuali, aduerte, q̄ cum omne quod fit, fiat ab aliquo agente, & fiat ex aliquo, vt ex materia, & non solum ex priuatione, & fit aliquid quod est terminus productionis, id quod fit, non est materia, illa etiam præexistit, vt probatum est supra, ergo non est terminus productionis, quo habito cessat productio, nec est forma, licet sit terminus formalis productionis. nam quod proprie fit, vt probatum est etiam in primo phys. fit ex materia, & forma. Hæc enim sunt principia per se requisita in omni **factione physica**, sed forma, vt pater nō

EPI TOME LIB. VII.

fit. ex materia, licet educatur de potentia materiæ actione agentis, nec fit ex forma aliter forma esset formæ, & sic processus in infinitum, nō ergo proprie, & per se fit forma, licet possit dici fieri per accidens, id est quia aliud producitur, & ipsa producitur, puta quia producitur ænea sphaera, potest dici quod producitur sphaera, & quia producitur lapis, producitur forma lapidis. Restat ergo à sufficienti diuisione, q̄ producatur compositum, cuius ratio est. Cum generatio sit processus à non esse ad esse illud proprie fit, cui competit esse, vt quod est, hoc autem est ipsum compositum, vnde dicitur hoc aliquid, formæ vero non competit esse, vt quod sed quod est enim forma qua compositum habet esse. Constat ergo solum compositum fieri proprie. & per se, non autem formam, sed illam dicemus fieri in materia, id est introduci in materia per eductionem de potentia materiæ, & sicut non fit forma, nisi per accidens. sic non fit quodquid eti hominis, licet sit idem cum eo, cuius est, vt probatum est supra, nā quod quid est ad naturam specificam spectat, excludens principia indiuidualia, sed natura specifica, non per se generatur, cum sit vniuersalis, & generationes non sint, nisi singularium, ergo &c. Patet ergo id quod generatur per se esse solum compositum.

Quantum ad quartum, scilicet q̄ vnumquodque genere tur à sibi simili declaratur sic. Quæcunque fiunt, aut fiunt ab arte, aut à natura, aut à casu. Quæcunque fiunt ab arte, patet q̄ fiunt à sibi simili. Dictum est enim q̄ domus ad extra, fit à domo cognita, quæ est in mente artificis, & sanitas ad extra, ab intelligentia sanitatis, quæ est in anima medici, fit ergo domus à domo, & sanitas à sanitate, propterea inquit Aristoteles. Quare accidit modo quodam fieri domum habentem materiam ex domo sine materia, & ex sanitate sanitatem fieri. Similiter quæ fiunt à natura fiunt à suo simili videmus enim quod homo hominem generat, & equus equū, & qui negat hoc, negat sensum. Hac enim causa, intrinseca sunt semina inanimatis perfectis, vt producant sibi simile, & qualitates actiuæ, & passiuæ insunt elementis, vt producant sibi simile. nam videmus ignem generare ignem. Quæ autem fiunt à casu, non est necesse vt fiant à sibi simili, qm̄ non

non sunt ex intentione agentis, & sunt multotiens ex indispositione materiæ, ut patet in monstris, per quam prohibetur assimilatio geniti ad generans, utrum autem id verificetur, tam in substantijs, quam in accidentibus, & utrum hæc similitudo debeat esse in eadem specie, & quantum latitudinem suscipiat, determinabitur in q. Metaph. Hæc igitur sunt quæ necesse erat præcognoscere ante determinationem præpositi.

Quantum ad secundum principale, ex præmissis, & præcognitis ponitur hæc conclusio contra Platonem non sunt ponendæ species abstractæ vniuersales, ut per se homo, per se leo propter generationem sensibilibus singularium & probatur sic. Si ponuntur ut causæ generationis, ergo vel ut generantes, vel ut exemplaria. ad quorum similitudinem ab aliâ quo agente generantur, non ut generantes, quoniam cum vnumquodque producat a sibi simili, & videamus genitum esse hoc aliquid, puta Socratem, & Caliam, & esse hoc aliquid est, quia habet esse in hac materia, necesse est generans esse hoc aliquid, sed species separatæ non sunt hoc aliquid sed quale quid, id est quid vniuersale, ut homo animal &c. Nam secundum Platonem non habent esse in hac, vel illa materia per quam fit hoc aliquid. ergo vanum est ponere tales species quasi generantes, & si ponerentur essent quantum ad hoc inutiles, nam ut inquit Comment. in côm. 28. homo, & animal vniuersale est sicut sphaera vniuersalis, quæ non generat, nec generatur, non sicut exemplaria, quoniam videmus manifeste in naturalibus, & in generationibus naturalibus vnumquodque generare sibi simile, ut pater generat filium, qui licet non sint vnum numero, sunt tamen vnum in specie, ad inducendam igitur similitudinem generantis in genito, sufficit virtus formatiua indita generanti, & non est recurrendum ad exemplar extrinsecum, nec obstat, quod in aliquibus videmus generari simile à dissimili, ut mulum ab equo, quoniam talis generatio est præter naturam, id est præter intentionem naturæ particularis puta equi generantis. Intendit enim producere equum, sed quoniam semen equi receptum in materia menstruali asinæ non potest causare formam equi, ideo ne opus naturæ frustreretur causat formam mediam inter equum, & asinum.

722
 num. Dicendum est ergo in generationibus secundum naturam, quas vocat Comment. in comm. 28. generationes non cessabiles, simile generari à sibi simili in specie. In generationibus autem præter naturam, sufficit similitudo in genere, quoniam utrunque est animal, & utrunque est iumentum. Cum igitur videamus generans, & genitum esse duo in numero, & vnum intentione vniuersali, impossibile est ponetur formas abstractas, vt causas generationis.

Quantum ad tertium principale, aduerte, q̄ ex prædictis quatuor insurgunt dubia.

Primum est, si in omni productione requiritur illud, ex quo res fit. vnde est quod illud, ex quo res fit aliquando prædicatur de re facta, & si non in abstracto, saltem denominatiue. nam quia statua fit ex ære, licet non sit æs. est tamen ærea, & quia homo fit ex carne, & osse, licet non sit caro, & os, est tamen carneus, & osseus, aliquando autem id, ex quo nō prædicatur de re facta in abstracto, nec denominatiue. licet enim ex infirmo fiat homo sanus, tamen nō dicitur sanus est infirmitas, nec dicitur sanus est infirmus.

Ad hoc respondens Arist. dicit id prouenire, quia ly ex aliquo verificari potest de subiecto. i. de materia, vt ex carne, & osse fit homo, & de priuatione, vt ex infirmo, & sanus, ex tenebroso fit lucidum. Sed aduerte, q̄ potest subiectum esse id, ex quo, vt ex ferro fit gladius, & id in quo, vt in homine fit sanitas, quando est subiectum, in quo magis dicitur fieri illud, quàm ex illo, vt verius dicitur, homo fit sanus, quàm q̄ ex homine fit sanus. Quando autem est subiectum ex quo magis dicitur fieri ex illo, quàm quod fiat illud, vt verius dicitur, ex ære fit statua, quàm quod æs fiat statua. Ex his ad dubium respondens. dico q̄ quando ly ex aliquo dicitur de priuatione, non prædicatur de re facta, nec in abstracto, nec denominatiue, quoniam priuatio non permanet in re facta, vnde licet ex infirmo fiat sanus, tamen hæc est falsa, sanus est infirmus. Quando autem ly ex aliquo dicitur de materia subiecta priuationi, ut ex ære infigurationi subiecto fit statua tunc prædicatur de re non in abstracto, sed denominatiue, vt statua facta ex lapide dicitur lapidea, quoniam licet materia animi priuatione non remaneat in re facta, tamen quo

quo ad subiectum permanet. ideo prædicari potest denotaminatæ, & hoc non contingit in priuatione, vt dictum est.

Secundum dubium est, dictum est supra, quòd sicut in naturalibus, aliquando fit aliquid à casu, sic in artificialibus, aliquando fit aliquid à casu, vt sanitas ex confricatione, dubitatur, quare aliqua artificialia possunt fieri, & ex arte, & à casu vt sanitas. Aliqua autem non possunt fieri, nisi ex arte, vt domus. Et aduerte, quòd artificiatum tunc fit à casu, quando fit à natura. Erit ergo dubium, quare aliqua artificiata fiunt ab arte, & à natura, vt sanitas, aliqua autem ab arte tantum, vt domus, & gladius, & vestis &c.

Ad hoc respondens Arist. dicit id prouenire, quia materia artificij, aliquando habet in seipsa partem rei fiendæ, per quam ex se potest moueri ad formam absque mouente extrinseco, sicut corpus humanum, quod est materia sanitatis, habet in se virtutem actiuam, puta calorem naturalem in corde, vt in primo principio, per quem potest moueri ad sanitatem, sicut si moueretur ab arte medicinæ, & tunc contingit idem produci ab arte, & à natura. Aduerte tamen, quòd licet huiusmodi virtus sit motiua materiæ, non tamen semper eodem modo quo moueretur ab arte. nam licet virtus motiua secundum locum, quæ est homini sit causa saltationis, non tamen talis saltationis, qualis est in correis, nisi adsit ars corrizandi, quæ adiuuatur arte musicæ. nam, vt inquit Comment. in comm. 29. quædam artes non possunt agere actiones suas, nisi alia ars adiuuet, verbi gratia, ars saltandi, quæ non complebitur, nisi arte irach, quæ est pars musicæ. Ad hoc ergo, quòd idem possit fieri ab arte, & à natura, necesse est vt illa virtus intrinseca sit sufficiens motuum materiæ ad formam, sicut si moueretur ab arte.

Aliquando autem in materia artificij non est huiusmodi virtus actiua, sed tantum est aptitudo recipiendi formam, si sibi imprimatur ab extrinseco agente, vt in ferro, nulla est virtus actiua, qua moueatur ad formam gladij, sed est durities, qua est aptum recipere huiusmodi formam, sicut in elementis, nulla est virtus qua moueatur materia ad formam elementi, sed necesse est, vt generentur ab extrinseco generante, sicut mouentur localiter ab extrinseco mouente, & huius

iussmodi artificata non possunt fieri, nisi ab arte mouente materiam ad formam, vnde aduerte, quòd artificata, quæ possunt fieri ab arte, & à natura, assimilantur rebus animatis, quæ possunt moueri localiter à seipsis, ex 8. phys. & ab extrinseco, vt quando mouentur ab agente violento. Artificata autem, quæ tantum fiunt ab arte assimilantur rebus inanimatis, quæ mouentur tantum à mouente extrinseco, & hanc similitudinem expressit Comment. in côm. 29. cum inquit, ita enim est de generabilibus, sicut de mobilibus, quemadmodum enim eorum, quæ mouentur localiter, quædam mouentur ex se, & quædam ex alio, sic est de generabilibus, vtrum autem rei generandæ præsit aliqua pars, quam aliqui dicunt inchoationem formæ, determinabitur in quæstionibus nostris metaphysicalibus.

Tertium dubium est, dictum est vnumquodque generari à sibi simili, & propterea non est necesse ponere ideas generantes, sed non apparet id esse verum vniuersaliter. nam generatur calor ex motu, & rana non semper ex rana, sed putrefactione, & mulus non ex mulo, sed ex equo. Quæritur ergo, quomodo hoc principium habeat veritatem.

Pro responsione huius præpono talem distinctionem. Quod generatur, vel est accidens, puta calor, vel substantia. Si substantia, vel naturalis, vel artificialis, si substantia, siue naturalis, siue artificialis, vel generatur per se, vel per accidens, id est à casu.

Si generatur per accidens, non est necesse quòd generetur à suo simili, videmus enim calorem generari à motu, qui non est calor, nisi virtute, & quantitas, & relatio non generantur à suo simili, quoniam nec quantitas, nec relatio sunt formæ actiuæ, sed causantur à substantia agente: qui enim dat formam rei, dat accidentia eius &c.

Si generatur substantia naturalis, vel generatur ex spermate, vel nō, si ex spermate generatur à suo simili, vel in specie, vel in genere proximo, in specie quidem, quando virtus formatiua potest introducere formam eiusdem speciei in materia, quam transmutat, vnde videmus hominem generare hominem, & leo generat leonem. Si autem virtus formatiua nō potest introducere formam eiusdem speciei, saltem intro-

introducitur formam eiusdem generis proximi, ut quando generatur mulus ex equo, conueniunt enim non solum in genere animalis, sed & in genere iumentis, si sine spermate, non est necesse quod generetur à sua simili, neque specie, neque genere. Hæc enim generantur à casu comparata agenti particulari, quod est calor putredinalis, neque enim huiusmodi calor intendit generationem animalis, puta ranæ, vel vermis, sicut intendit virtus formatiua, quæ est in spermate. assimilatur enim arti, unde inquit Arist. sperma facit, sicut quæ ab arte, quæ autem per accidens, & à casu fiunt non est necesse assimilari generanti, quoniam eueniunt præter intentionem generantis, unde non oportet thesaurum inuentum assimilari fodienti sepulcrum, neque monstrum generanti, neque muscam cadaueri ex quo generatur, sed sufficit in materia putrescente esse aliquam virtutem generatiuam, puta calorem, quæ proportionatur virtuti generatiuæ, quæ est in spermate, quæ tamen in hoc differunt, quod virtus spermatis est ab anima, & à cælo, ut ab vniuersali principio omnis generationis, & corruptionis, virtus autem, quæ est in materia putrescente habet vigorem tantum à corpore cælesti, in quo virtualiter continentur omnes formæ rerum inferiorum excepta anima intellectiua, de qua loquemur in lib. 12.

Si sit substantia artificialis, puta domus, aut gladius, partim fit ex simili, partim ex dissimili, ex simili quidem quo ad formam exemplarem, quæ est in anima agentis. Ex dissimili quo ad esse, quoniam forma artificiati producti habet esse materiale, in anima autem artificis habet esse immateriale. Quod non contingit in substantijs naturalibus. In illis enim generatum potest esse simile omnino generanti, quoniam in utroque forma est eiusdem rationis, & in utroque habet esse naturales.

Sed dices, si per artem non produciatur substantia artificialis, puta domus, sed qualitas, puta sanitas, nunquid necesse est quod sit assimilari ei à quo fit.

Ad hoc dico quod sic, sed hæc assimilatio aliquando est actualis, aliquando virtualis. Actualis quidem quando causatum ad extra præest in mente agentis secundum intelligentiam, ut medicus causans sanitatem, ex ratione siue quod
quid

E P I T O M E L I B. V I I.

quid est sanitatis . virtualis autem quando causans continet virtute , & non formaliter ipsum causatum , vt quando per motum causatur calor , non enim formaliter , sed virtualiter motus est calor . & aduerte , quòd vtraque assimilatio potest contingere dupliciter , quoniam vel secundum totum , vel secundum partem , secundum totum quidem , quando totum productum præest actu , vel virtute in producente , vt sanitas in mente artificis , & calor in motu . secundum partem vero , quando in producente præ existit pars producti , siue actu , siue virtute , actu quidem , vt quando medicina calida causat calorem in corpore ægri excessiue in frigiditati , & sanatur . calor enim est pars sanitatis , est enim sanitas consurgens non solum ex calore , sed ex alijs humoribus adæquatis . virtute vero , vt quando ex motu in corpore ægri causatur calor proportionaliter , sicut ex medicina , & inducitur sanitas .

Patet igitur quomodo verificatur hoc principium vnumquodque à suo simili producit . De his autem quæ generantur per accidens , & à casu non est necesse sollicitari . nam cum secundum Arist. in lib. 12. tex. 13. casus , & fortuna sint priuationes naturæ , & artis non est necesse in his attendi similitudo inter generans , & genitum , nisi forte quo ad prædicata transcendentia , puta quòd ens generat ens , quod vnum , vnū quod res , rem &c.

Quantum dubium est . Quoniam determinatum est supra fieri compositum , & non formam . Quæritur si id est verum , tam de forma substantiali , quàm accidentali .

Ad hoc respondens Arist. tenet partem affirm. pro vtraque forma , cuius ratio est , quoniam omnis forma , tam substantialis , quàm accidentalis non habet esse , vt quod , sed vt quo . ergo non potest esse id quo generatur . Dicendum est ergo quòd sicut non generatur forma lapidis , sed lapis sic non generatur sphaera , sed ænea sphaera , nec albedo , sed lignum albū , nec quantitas , sed lignum quantum , aut animal quantū .

Aduerte tamen , quòd licet , tam in substantijs , quàm in accidentibus compositum , & non forma sit genitum , tamen eorum generatio in hoc differt , quòd compositum substantiale necessario præexigit alteram substantiam , aqua generetur . non enim generatur substantia , nisi à substantia , compositum

positum autem accidentale non necessario præexigit compositum alterum actu præexistens. sed quòd sit tale in potentia, puta non est necesse ad hoc quòd fiat album præexistere album actu, sed sufficit præexistere materiam, siue substantiam, quæ sit alba in potentia. & hoc ideo est, quia substantia non potest esse, nisi à substantia, aliter productum esset nobilius producente. accidens autem potest esse à substantia. nam cum substantia sit primum, & simpliciter ens, ut dictum est supra non inconuenit quòd sit causa substantiæ, & accidentis. vnde videmus quòd generans ignem generat calorem, & leuitatem, & siccitatem, & lucem in igne. Hæc de sexto cap. dicta sint.

CAPVT VII.

IN cap. septimo inuestigandum est, ex quibus partibus constituitur quiditas substantiæ sensibilis. & quoniam quiditas, quæ est ipsum quodquid est, significatur per diffinitionem, cum hic procedamus modo logico, ut diximus in principio huius libri, manifestum erit propositum, si declaratum fuerit, quæ partes intrent diffinitionem. nam ut inquit Arist. cum diffinitio significet rei quiditatem, & omnis diffinitio habeat partes. cum sit oratio, & quid compositum ex genere, & differentia. conueniens videtur, quod sicut tota diffinitio correspondet toti rei diffinitæ, ita partes diffinitionis partibus rei. quod quidem an verum sit, & in quo sensu determinabimus in q. nostris.

Ut igitur sciamus, quæ partes ponantur in diffinitione, & ex consequenti, ex quibus partibus constituitur quiditas substantiæ sensibilis. Aduerte quod Arist. ad huius declarationem, præponit duo dubia.

Primum est, si partes rei, siue diffinitiones partium rei ponuntur in diffinitione totius.

Secundum est, si partes sunt priores, vel posteriores toto.

Quantum ad primum dubium Arist. arguit ad partes, & pro parte neg. sic semicirculus est pars circuli, & tamen nec semicirculus, nec diffinitio semicirculi ponitur in diffinitione circuli, aliter cum diffiniamus semicirculum per circum-

lum

lum (est enim semicirculus portio circuli) essent ciculares diffinitiones. Pro parte autem affirmatiua sic. Literæ ponuntur in diffinitione syllabæ. nam syllaba est quid compositum ex literis, sed literæ sunt partes syllabæ, sicut semicirculus est pars circuli, ergo &c.

Quantum ad secundum dubium arguit similiter, & pro parte affirmatiua sic, simplicia & componentia sunt priora composita, quoniam supponit illa, sed partes sunt simplices, & componentes respectu totius, ergo &c. Pro parte negatiua sic. Totum ponitur in diffinitione partis. diffinitur .n. angulus acutus per angulum rectum. nam acutus est qui est pars recti, & si diffinitur digitus, in eius diffinitione ponetur homo. sed diffinitio datur per priora, ergo &c. Præterea totum potest esse sine parte, & non econuerso, ut homo sine digito, non tamen digitus sine homine, nisi æquiuoce. separatus .n. ab homine non est digitus, sicut nec oculus pictus est oculus ex 2. de anima, sed quod potest esse sine alio, & non econuerso est prius, ut declarauimus in 5. libro, ergo &c.

Pro resolutione primi dubij ponetur distinctio de partibus. Deinde duæ conclusiones cum probationibus suis.

Pars est duplex. scilicet quantitatiua, & essentialis. Quantitatiua est, ex qua integratur res quanta, ut quanta; ut linea cubitalis est pars integralis lineæ bicubitalis essentialis est, ex qua constituitur substantia rei compositæ, ut corpus, & anima sunt partes essentielles animalis, tunc prætermittenda est pars integralis, & scrutandum est de partibus essentialibus.

Aduerte igitur, quod sicut substantia composita potest dupliciter considerari. scilicet ut vniuersalis, puta homo, & ut singularis, puta hic homo. sic partes essentielles in vniuersali quidem, ut corpus, anima, caro, os, neruus, &c. In singulari vero, ut hoc corpus, hæc caro &c. Considerate in vniuersali dicuntur partes speciei, sumendo speciem non pro forma, sed pro quiditate, siue naturæ substantiæ compositæ vniuersalis, ut hominis, equi, &c. Considerate in singulari dicuntur partes materiæ. id est partes individuales, siue constituentes indiuiduum. Constituitur enim indiuiduum determinata materia non solum in specie, sed in numero: nam Calias non solum constituitur ex carne, & osse, sed ex carne, & hac carne

ne humana, & hac anima rationali. differunt autem in hoc quod partes speciei per se conueniunt naturæ specificæ. nō enim saluatur natura specifica substantiæ compositæ, nisi cōstituat ex his partibus, vt homo non esset homo, nisi constaret ex corpore humano, & anima rationali. Partes autem materiæ per accidens conueniunt naturæ specificæ. Accidit enim homini quod sit Calias. Adhuc enim remoto Calia saluatur homo, puta in alio indiniduo. & accidit circulo diuidi in duos semicirculos. Hoc enim non conuenit circulo in quantum circulus, sed in quantum hic, vel ille circulus. Et sicut accidit homini esse Caliam, sic accidit homini componi ex hac carne, & ex hac anima, & circulo accidit componi, ex semicirculo A, & semicirculo B.

Ex hac distinctione ponuntur duæ conclusiones.

Prima est. Quæ sunt partes speciei, ponuntur in diffinitione totius probatur. Quæ sunt constituentia substantiam, & quiditatem totius, & per se eidem conueniunt, ponuntur in diffinitione eius, aliter diffinitio non sufficienter declararet naturam diffiniti, sed partes speciei constituunt quiditatē totius, & per se ei conueniunt, vt declaratum est, ergo &c.

Secunda conclusio: Partes materiæ non ponuntur in diffinitione totius vniuersaliter sumpti, nec singulariter sumpti. Quod non vniuersaliter sumpti probatur. nam diffinitio est ex his, quæ per se conueniunt diffinito, vt declaratum est supra in 3. cap. sed partes materiæ non per se conueniunt toti vniuersaliter sumpto, vt diximus paulo ante, ergo &c.

Quod non singulariter sumpti probatur, quoniam singularia non diffiniuntur, sed imaginatione, & sensu cognoscuntur. Et si cognoscuntur ab intellectu, non cognoscuntur, nisi in ratione vniuersalis, puta cognoscitur hic circulus, quia est circulus, & hic homo, quia est homo. Tu tamen aduerte, qd si singulare diffiniretur in eius diffinitione ponerentur partes materiæ, quoniam sunt constituentia indiuiduum, & per se ei conueniunt.

Ex his patet solutio ad argumenta adducta ad partes. nam ideo semicirculus non ponitur in diffinitione circuli, quia vt declarauimus est pars materiæ. ideo autem literæ ponuntur in diffinitione syllabæ, quia sunt partes speciei, con-
surgit

surgit. n. syllaba ex literis, sicut homo ex carne, & osse &c.

Aduerte tamen, quòd literæ absolute sumpte sunt de ratione syllabæ. non autem literæ æreæ, aut plumbeæ: non enim est necesse literas fieri in ære, vel in plumbo. vnde vt sic se habent per accidens ad syllabam, vt syllabam.

Ex his corollariz sequitur quòd cum non possit saluari natura substantiæ sensibilis, nisi in materia non solum forma, sed & materia sumpta in vniuersali sunt de diffinitione, & quiditate eius. & non solum id verificatur in sensibilibus, sed in mathematicis, licet aliter & aliter. nam materia est duplex, scilicet sensibilis, & intelligibilis, sensibilis quidem est, vt æs, & lignum, & elementa, & caro, & os, & breuiter omnis materia mobilis. Intelligibilis est, quæ comprehenditur ab intellectu esse in sensibilibus non inquantum sensibilia sunt, qualia sunt mathematica, vt linea, corpus, superficies. ista enim dicuntur materia figurarum mathematicarum. nam sicut formæ naturales non sunt, nisi in tali materia sensibili sic figuræ mathematicæ non sunt, nisi in quantitate continua, quæ diuiditur in lineam superficiem, & corpus. vnde inquit Comment. in comm. 35. linea demonstrata superficies, & corpus sunt materia figurarum habentium angulos, & carentium angulis, sicut igitur materia sensibilis sumpta in vniuersali est de diffinitione, & quiditate substantiæ sensibilis, sic materia intelligibilis est de ratione figurarum mathematicarum. vnde in diffinitione trianguli de necessitate sumitur linea, vel superficies, vel corpus. Hæc pro primo dubio dicta sint.

Pro resolutione secundi dubij, ponuntur tres conclusiones.

Prima est: Partes speciei sunt priores toto, probatur, ex partibus speciei constituitur quiditas totius, & ponuntur in diffinitione eius. sicut declaratum est supra, sed constituentia, & diffiniencia vt sic, sunt priora constituto, & diffinito, ergo &c.

Secunda est: Partes materiæ comparatæ toti, sunt posteriores, probatur. Totum ponitur in diffinitione earum si diffiniuntur, vt digitus est pars hominis, semicirculus est portio circuli. Angulus acutus est minor recto, sed diffiniens

niens est prius diffinito, ergo, &c.

Tertia est : Partes materiæ, secundum illum modum quo aliquid dicitur prius, ut principium principiatio sunt priores toto. s. individuo quod componunt, nam componens est prius composito, & causa effectui, secundum autem illum modum, quo aliquid dicitur prius, quia potest esse sine alio, & non econuerso, quædam sunt posteriores, quædam simultaneæ, nam minus principales ut digitus, oculus, auris, &c. Non possunt esse sine toto, sed bene econuerso, ut patet, principales autem ut cerebrum e par cor, non possunt esse sine toto, nec totum sine ipsis, ut patet, ergo &c.

Ex ijs ergo patet quod proposito dubio non est simpliciter respondendum, nam in vno sensu sunt priores, in alio posteriores, in alio simultaneæ. Patet etiam ex quibus partibus constituitur quidditas substantiæ sensibilis, quoniam ex ijs quæ intrant diffinitionem eius. Hæ autem sunt partes speciei. Hæc de septimo cap. dicta sunt.

C A P V T V I I I.

IN octauo capite inuestigandum est, cum diffinitio & quod quid est, quod est significatum diffinitionis, constet ex partibus, quomodo diffinitio est vna, & quod quid est vnum.

Ad resolutionem igitur huius dubij dicemus tria.

Primo, quare idem dubium motum in 2. Post. non fuit illic solutum.

Secundo, argumentabimur ad partes.

Tertio, resoluemus ipsum.

Quantum ad primum, aduerte, quod Philosophus in 2. Post. mouit hoc dubium. Quare diffinitio significat vnum, & tamen habet partes, puta si diffinitio hominis est animal bipes. Quare significat vnum, puta naturam hominis quæ est vna, cum animal & bipes non videatur esse vnum, sed plura. Hoc quidem dubium ideo illic non determinatur sed Comment. in comm. 42. quoniam licet sit commune logico & primo philosopho considerare de diffinitione, modis tamen diuersis, nam logicus considerat de eâ in quantum est

instrumentū inducēs intellectum ad intelligere quiditatem rerum, primus autem Philosophus in quantum significat rerum naturas; & ideo reddere causam, quare significat vnum licet habeat partes, magis pertinet primo philosopho, qui considerat naturas rerum, ex consequenti considerat partes diffinitionis, non in quantum prædicantur de diffinito (hoc enim ad logicū spectat) sed in quantum sunt naturæ rerum diffinitarum, nam si genus & differentia ex quibus constat diffinitio, essent diuersæ naturæ, impossibile esset diffinitionem significare vnum. Quoniam igitur ad primum philosophū spectat inuettigare si partes diffinitionis sunt idem realiter, vel non, ideo ad ipsum spectat determinatio propositionis dubij, nam ex eo solo quod diffinitio & partes diffinitionis prædicantur de diffinito, non potest sciri.

Quantum ad secundum, aduerte, q̃ Arist. pro parte negativa sic intendit arguere diffinitio, vel constat ex genere & vna differentia, vt animal rationale, vel ex genere & pluribus differentijs, vt substantia animata sensitiua rationalis, sed neutro modo potest significare vnum. ergo &c. Et quod primo modo, non significet vnum arguit sic. Si duo debent significare vnum, necesse est illa esse vnum, vel fieri vnum, nā quoniam homo est album sunt duo nisi fierent vnum ex eo quod homo recipit & participat album non significarent vnum, puta hominem album, quod est vnum per accidens, sed genus & differentia, puta animal bipes sunt duo, quoniā inuenitur animal sine bipede, & non possunt fieri vnum, quoniam cum genus diuidatur contrarijs differentijs, qua ratione fieret vnum cum vna participando illam, eadem ratione fieret vnum cum altera participando eam, sed hoc est impossibile, quoniam contrariæ differentię simul inessent eidem generi, ergo impossibile est diffinitionem constantem ex vno genere, & vna differentia significare vnum.

Quod aut secundo modo, non significet vnū arguitur sic. Sit hæc diffinitio hominis. Homo est animal gressibile bipes alatū, si istæ tres differentię sunt vnum cum animali, & vnū inter se (ibi. n. intelligimus de vnitae essentiali) hoc ideo est, quia sunt in vno, puta in animali, sed id non sufficit, aliter omnia accidentia quæ sunt in vno subiecto essent vnum essen-

essentialiter, & sic albedo, dulcedo grauitas in pomo essent vnum essentialiter, quod est falsum vt patet. Præterea, vt inquit Cōment. in cōm 43. totus mundus esset vnum essentialiter, quia omnia sunt in cælo quod est vnum, ergo &c.

Pro parte autem affirmatiua sic arguit. Diffinitio significat rei substantiam; sed rei substantia est vna, vt hominis substantia est vna cum sit vna species, & Socratis substantia est vna, cum sit vnum numero & hoc aliquid. ergo &c.

Quantum ad tertium inuestiganda est ratio quare diffinitio constans ex genere & vnica differentia significat vnum, similiter quando constat ex genere & pluribus differentijs. Exemplum primi, homo est animal rationale. Exemplum secundi, homo est substantia animata sensitiua rationalis, deinde soluenda sunt argumēta inducta pro parte negatiua.

Aduerte igitur, q̄ ratio propter quam diffinitio constans ex genere & vnica differentia significat vnum est hæc quia genus & differentia addita generi, & contrahens genus ad speciem non dicunt diuersas essentias, sicut genus & differentia accidentalis vel propria passio, vt animal album, vel animal rudibile, quorum vnum est substantia & alterum qualitas, sed dicunt eandem essentiam diuersimode conceptum, puta genus sub conceptu confuso, & differentia sub conceptu determinato, vnde in hoc quod dicitur rationale comprehenditur natura animalis, sed specificata sub tali gradu, puta cum ratione. Ex hoc igitur fundamento possumus sic arguere. Ratio constans ex duobus quæ realiter sunt vnum significat vnum, sed diffinitio est ratio &c. ergo &c. Hinc manifeste constat quare species est vnum quid per se: quoniam tam genus quam differentia dicunt totam naturam speciei: sub diuerso conceptu vt diximus. Et signum quod dicant totam naturam speciei est, quia tam genus quam differentia vt genus est, prædicantur in recto de specie. Dico autem vt genus, ad differentiam eius quod aliquando est genus, aliquando est materia, vt corpus, nam quando sumitur vt genus prædicatur in recto, vt homo est substantia, & est corpus, est animal. Quando autem sumitur vt materia, prædicatur in obliquo: vt homo est quid compositum ex anima & corpore. Quomodo vero idem possit esse genus & materia,

& quibus rationibus declarabimus in quæſtionibus noſtris.

Ratio autem propter quam diffinitio conſtans ex genere & pluribus differentiis ſignificat vnum, eſt quia vltima differentia quæ dicitur ſpecifica. i. conſtituens ſpeciem, & dicitur indiuidua. i. non diuiſibilis in alias differentias inferiores, continet omnes ſuperiores, quæ dicuntur genericæ, ex conſequenti diuiſibiles in alias, puta in hac diffinitione, homo eſt ſubſtantia corporea animata ſenſitiua rationalis, ly rationalis continet omnes præcedentes, quoniam prædicantur de rationali, & præterea, vt inquit Philoſophus, ſi non contineret eas, oporteret multoties idem reperere in diffinitionibus, & fieri nugationem, v. g. cum corporeum diuidatur per animatum & inanimatum, & animatum per ſenſitiuum, & non ſenſitiuum, & ſenſitiuum per rationale & irrationale, ſi inferior non includit ſuperiorem, ergo erit neceſſe dicere, q̃ homo eſt ſubſtantia corporea, corporea, habens animam: ſimiliter quod eſt animata: animata habens ſenſum, & quod eſt ſenſitiua: ſenſitiua habens rationem: omnis autem ſuperfluitas & nugatio vitanda eſt in diffinitionibus: dicendum eſt ergo inferiorem differentiam continere ſuperiorem, & vltimam includere omnes præcedentes, quoniam igitur vltima includit omnes præcedentes, ita q̃ prædicantur de ea prædicatione identica, & vltima complet diffinitionem, ideo diffinitio conſtans ex genere & pluribus differentiis eſſentialibus ſignificat vnum, ſicut ea quæ conſtat ex genere & vnica differentia, nam ſicut differentia adita generi, non dicit aliam eſſentiam à genere, ſic nec differentia adita differentię, dicit aliam eſſentiam ab ea cui aditur, ſed tantum diſtinctionem formalem, vt plene declarabimus in q. noſtris. Vltima ergo differentia dicit totam rei ſubſtantiam, ex conſequenti diffinitio quæ completur per vltimam differentiam manifeſte ſignificat vnum.

Ad argumentum primum pro parte negat. dicendum q̃ genus & differentia non ſunt duo realiter diſtincta, immo ſunt vnum, & quando dicitur q̃ genus inuenitur ſine differentia, puta animal ſine rationali, ut in aſino. Ex hoc non impeditur, quin ſint vnum, ſed q̃ non ſunt vnum conuertibiliter. Dicendum eſt etiam q̃ non inconuenit contraria in eſſe

esse eidem potentialiter, differentiz autem contrariæ non insunt actu generi, quoniam genus secundum se abstrahit à differentijs, sicut materia secundum se abstrahit ab omni forma. Ad secundum dubium dico, q̄ non sunt vnum, quia sint in vno, sed quia vltima includit præcedentes, & prædicantur de ea essentialiter, ex consequenti dicunt eadem naturam, sub diuerso conceptu. Hæc de octauo cap. dicta sunt.

CAPVT IX.

IN cap. nono reprobanda est opinio Platonis, quam sibi imponit Arist. de generibus & de maxime vniuersalibus, vt de ente & vno, & de ideis q̄ non sint substantiæ, & vt perstringamus longum discursum Arist. cuius mentem iam tractauimus in 3. lib. in cap. xj. dicemus quatuor.

Primo, q̄ absolute non sunt substantiæ.

Secundo, q̄ non sunt substantiæ, à singularibus separate.

Tertio, q̄ ideæ Platonice non possunt diffiniri, nec demonstratio potest de eis haberi, ex consequenti vane ponuntur.

Quarto, videndum est in quo Plato bene, vel male dixerit circa huius modi.

Quantum ad primum, aduerte ne procedamus per incognita, q̄ vniuersalia hic non intelliguntur nature, quibus potest intellectus attribuire intentionem vniuersalitatis, quæ vt sic dicuntur vniuersalia obiectiue, vt natura hominis, natura equi huiusmodi enim vt sic, sunt substantiæ, habentes esse in singularibus, secundum veritatem, sed hic intelliguntur nature, vt stant sub intentione vniuersalitatis, puta homo, animal, ens, in quantum prædicantur de multis, & apta sunt esse in multis, sic. n. sumuntur à Plat. vt sibi imponit Arist. & volebat q̄ vt sic essent substantiæ, & haberent esse extra singularia, & contra hunc sensum intendit arguere Arist.

Dupliciter autem arguit.

Primo, q̄ nō sunt substantiæ, in quantum vniuersalia sunt. i. in quantum prædicantur de multis.

Secundo, nec in quantum sunt partes d'ffinitionis.

Pro primo sic arguit, cū omnis substantia sit alicuius pro-

pria substantia, ita q̄ non est alterius, si vniuersale est substantia est alicuius substantia, aut ergo est substantia omnium de quibus prædicatur aut vnius tantum & non omnium, non potest esse omnium, quoniam cum illa sint plura, & plura sint illa, quorum substantiæ sunt plures impossibile est tale vniuersale, esse substantiam omnium, aliter illa omnia non remaneret plura, sed essent vnum. Quorum. n. substantia est vna, illa sunt vnum nec potest esse vnius tantum, quoniam qua ratione esset vnius, esset etiam aliorum, cum prædicetur de illis, vnde sequitur q̄ aut omnia indiuidua alicuius vniuersalis erunt vnum numero, si habent vnā substantiam numero, quæ sit substantia illius vniuersalis Platonici, aut nō vni- uocantur in ipso vniuersali, si est substantia tantum vnius.

Præterea, substantia secundum id, quod est realiter, ut præscindamus à consideratione logica, non dicitur de subiecto, quoniam omnis substantia secundum id, quod est, est alicui propria, sed vniuersale dicitur de subiecto, ut patet. ergo nō est substantia. Et aduerte hanc rationem concludere apud Philosophum, qui considerat rei naturam, & non intentiones rei attributas ut considerat logicus.

Pro secundo sic arguit, si vniuersale inquantum est pars diffinitionis, est substantia, sequitur idem esse substantiam duorum. nam si diffinitur homo, diffinitur per animal, similiter si diffiniretur Socrates, diffiniretur per animal, ergo si animal vniuersale est substantia erit substantia & hominis & Socratis, quod est inconueniens, qm̄ omnis substantia alicuius propria, & non alterius est substantia, ut dictum est.

Præterea, sequitur quod dabitur tertius homo, nam cum homo sensibilis, puta Socrates sit homo, & homo intelligibilis apud Plat. sit homo, sequitur q̄ datur tertius homo qui de utroque prædicatur. Et aduerte, q̄ non solum dabitur tertius, sed quartus & quintus, & sic in infinitum, nam cum Socrates sit homo, & homo intelligibilis sit homo, & homo, tertius sit homo, dabitur quartus qui prædicatur de tribus eadem ratione dabitur quintus, & sic in infinitum.

Præterea, sequitur substantiam singularem, non esse vnū per se, qm̄ ex pluribus existentibus in actu non sit vnum per se, sed ex pluribus, quorum vnum sit actus & alterum poten-
tia,

tia, vt ex forma & materia, vel vtrunque fit in potētia, vt dicitur, medietates existentes in linea in potentia constituunt vnam lineam actu, sed si vniuersalia sint substantiæ, existūt actu in substantia singulari, puta in Socrate existeret actu homo & actu animal, ergo Socrates non erit vnum per se.

Sed dices, si vniuersalia non sunt substantiæ, & si ex pluribus in actu non fit vnum per se, sequitur substantiam singularem sensibilem esse, vel incompositam, vel componi ex nō substantijs. Quorum vtrunque est manifeste falsum.

Respondeo, nego consequentiam, datur enim tertium, nā declarabitur infra, q̄ componitur ex substantijs in potentia, totum enim componitur ex partibus, quæ sunt in potentia in toto. Patet igitur ex omnibus prædictis, q̄ vniuersalia absolute non sunt substantiæ.

Quantum ad secundum probandum est, q̄ non sunt substantiæ separatæ à singularibus & arguitur sic. Si homo & equus & leo sunt substantiæ separatæ, cum huiusmodi species componantur ex genere & differentia, ea ratione qua ponuntur species separatæ à singularibus, ponentur etiam genera & differentiæ, quod inconueniens est, vt etiam Plato concedit, consequentia quidem probatur, nam ideo Plato ponit species separatas ab indiuiduis, quia secundū vnā rationem prædicantur de indiuiduis, & quia intellectus potest abstrahere speciem ab eis .i. quia potest intelligere naturam specificam, non intellecto indiuiduo, sed genus s̄m vnā rationem prædicatur de omnibus speciebus, similiter differentia, vt patet, ergo &c. Et potest per intellectum abstrahi genus à speciebus, sicut species ab indiuiduis. ergo &c.

Quantum ad tertium, aduerte, q̄ vt imponit Arist. Platoni, posuit Plato ideas vt de naturalibus haberetur scientia, quæ non potest haberi de singularibus naturalibus, eo quod vnumquodque eorum corruptibile est, scientia autem habetur de eo q̄ potest diffiniri & demonstrari. Intendens igitur Arist. declarare opinionem Platonis esse vanam de ideis, probat etiam q̄ si darentur non possent diffiniri.

Primo igitur, sic arguit, de singulari non datur diffinitio, quoniam non intellectu, sed sensu cognoscitur singulare, sed idea, cum sit aliquid per se subsistens, & immateriale,

est quid singulare & vnum numero . ergo &c.

Secundo, quia posset responderi rationi præcedenti eam concludere de singulari materiali corruptibili, ideo arguit sic, cū idea sit quid singulare si diffinitur, talis diffinitio, aut constat ex terminis singularibus, aut communibus, si singularibus, ergo illa erunt synonyma vt si diffiniatur Cicero quod est Marcus Tullius, per synonyma autem non datur competens diffinitio, si communibus ergo diffinitio non cōpetet soli diffinitio, ergo &c.

Quantum ad quartum, dicit philosophus, ex quo Plato ponebat ideas esse substantias bene dixit eas esse per se existentes & extra singularia. Male autem dixit eandem ideam esse in multis singularibus. Repugnat enim aliquod vnum subsistens esse in multis.

Et tu aduerte, quod in reprobatione hac contra Platonem, perfunctoriæ transiui, quoniam & in primo libro & in tertio & iterum in duodecimo Aristot. idem pertractat, & nos pertractauimus ad mentem eius in primo libro in tractatu secundo capite quarto, & in tertio libro capite octauo, & in secundo libro de generatione super textu 52. formauimus de hac materia duas quæstiones, & in quæstionibus nostris super septimum librum huius scientiæ discutimus, quantum valeant rationes Aristotelis contra Platonē, pro nunc aduerte quod Aristoteles incēpit impugnare Platonem de ideis, etiam viuēte Platone, nam apud Platonem in Parmenide introducitur Parmenides disputans cum Socrate præsentē Aristotele de ideis, vbi sic legitur. Antequā exercitatus sis ò Socrates, scilicet in positione idearum, definire aggredieris, quid pulchrum, iustum, bonum, & aliarum quamlibet specierum. Hoc enim pridem animaduerti hic te audiens. vna cum Arist. disputantem. pulcher sane atque diuinus hic imperus tuus, quo ad rationes aduolas. Ceterum collige te ipsum, diligentiusq. te in ea facultate exerce, quæ inutilis esse videtur, & à multis garrulitas siue nugatio nuncupatur, dum iuuenis es, alioquin te veritas subiugiet. Hæc ibi ad literam. Hæc pro quanto spectant ad nonum caput dicta sint.

C A P V T . X.

IN cap. decimo declarandum est, quòd substantia, quæ est quod quid est, siue quiditas rei sit principium & causa, & ad euidentiã propositi dicemus tria.

Primo, quòd est principium & causa.

Secundo, mouebitur dubium & soluetur.

Tertio, quòd non est principium siue causa materialis, sed formalis.

Quantum ad primum, ponitur hæc conclusio. Quiditas rei, est principium & causa, puta quiditas hominis, id est id quod est homo, puta animal rationale, vel compositum ex corpore & anima intellectiua est causa & principium omnium quæ per se consequuntur ad hominem, puta quod homo sit electius & deliberatius, & risibilis &c. & probatur. De quiditate rei nõ formatur quæstio propter quid, sed per ipsam soluuntur alia quæ sita propter quid, ergo est principium & causa, consequentia quidem manifesta est, quoniam propter quid dicit causam, vt propter grauitatem lapis descendit. Antecedens vero quo ad primam partem sic probatur. In omni quæstione propter quid, queritur aliquid aliud de aliquo, puta propter quid in luna est eclipsis, nam eclipsis aliud est à luna, sed quiditas non est aliquid aliud ab eo cuius est quiditas, vt declaratum est supra, ergo &c. Et propterea si quis quæreret, propter quid homo est homo, nihil quæreret, nec si quis quæreret, propter quid homo est animal rationale. Ille enim sunt propositiones immediate nisi forte quis dicat vt inquit philosophus, quia idem prædicatur de seipso vel quia vnumquodque est indiuisibile, siue vnum sibi ipsi. secunda pars antecedentis si declaratur, licet apud logicum, quæstio propter quid reducatur aliquando in causam formalem, vt propter quid homini inest intellectus & voluntas, responderetur propter animam intellectiuam existētem in homine aliquādo in causam materialem, vt propter quid gladius est durus, responderetur propter ferrum aliquando in causam efficientem, vt propter quid lapides & ligna fiunt domus, responderetur propter artem ædificatiuam. Aliquando

quando in causam finalem, vt propter quid sumitur medicina, respondetur propter sanitatem, tamen apud primum philosophum proprie reducitur in quod quid est, siue inde finitionem indicantem rei quiditatem, vt propter quid lapis est suauitudo, quia est ens per se propter quid triangulus habet tres angulos, quia est ens per se propter quid triangulus habet tres angulos, quia est figura rectilinea, habens angulum extrinsecum æqualem duobus intrinsecis sibi oppositis, & huius quidē ratio est quoniam sicut vnumquodque per suā quiditatem est talis, vel talis naturæ, ita per eandem insunt sibi tales proprietates effluentes à rei quiditate vt calor & leuitas à quiditate ignis, cum igitur de quiditate non fiat questio propter quid, & per ipsam saluantur cetera quæ sita, manifestum est, quòd dicitur principium & causam.

Quantum ad secundum, aduerte, quoniam dictum est, quòd in omni quæstione propter quid, quæritur aliud de aliquo dubium confugit, quoniam stantibus prædictis dum quæritur quid est homo quæstio nulla esset, non enim quæritur aliud de aliquo, sed de eodem simpliciter quæritur quid sit.

Ad hoc dicendum, quod licet in quæstione quid, non quærat formaliter aliud de aliquo, tamen cum quæstio quid & quæstio propter quid coincidant in idem numero, vt probatur in lib. 2. Poster. potest verti quæstio quid in quæstionem propter quid, & tunc manifeste apparebit quod hoc de illo quæritur, verbi gratia, scito quod homo est animal rationale, potest quæri, propter quid Socrates est homo, & respondetur propter animal rationale, vt igitur in quæstione quid, quærat aliud aliud de aliquo, vertatur in propter quid, & tunc nullum erit dubium.

Ex quibus corollarie sequitur, quod in substantijs simplicibus in quibus non est aliud, & aliud non potest formari quæstio propter quid. Quoniā de omni eo quod quæritur, contingit aliquid cognoscere, puta de luna cognosco quod eclipsatur, sed ignoro causam propterea formatur quæstio propter quid, sed in simplicibus cum non sit aliquid & aliquid, non contingit aliquid scire, & aliquid ignorare, sed aut totum scitur, aut totum ignoratur. Ergo in eis, non habet locum proprie quæstio propter quid, sed est alius modus nobis

perueniendi in cognitionem earum. ſ. à poſteriori, & per effectum, vt declarabitur in lib. 12. vbi per motum æternum inueſtigabimus ſubſtantiam æternam immaterialem.

Quantum ad tertium, aduerte, q̃ cum in hoc lib. 7. loquamur de quiditate ſubſtantię ſenſibilis, quę eſt compoſita, neceſſe eſt huiusmodi quiditatem eſſe, vel partes componentes, vel id, quod reſultat ex partibus componentibus, puta q̃ quiditas hominis ſit caro & oſſa, & quiditas lapidis ſit ignis, terra, & alia elementa, vel aliquid, vt tertium reſultās ex eis, non poteſt autem eſſe partes componentes, quoniam ſtat partes componentes ſaluari, & tamen quiditas compoſiti non ſaluatur, nam ſicut literę a, b, componentes ſyllabam ab, quando ſeparantur ab inuicem ſaluantur, & tamen ſyllaba ab non ſaluatur, ita elementa componentia lapidem qñ corrumpitur ſaluantur, & tamen ſubſtantia lapidis non ſaluatur, cum igitur partes componentes ad principium & cauſam materialem pertineant, patet quiditatem rei non eſſe principium, aut cauſam materialem, relinquitur igitur vt ſit entitas reſultans ex partibus vnitis, quę quidem dicitur eſſe principium, aut cauſa formalis quę non eſt forma partis. illa nanque non eſt quiditas, ſed pars quiditatis, vt declaratū eſt ſupra, ſed dicitur forma totius, ut humanitas, equinitas, quę quidem, vt diximus ſupra in cap. 3. poteſt ſignari nomine abſtracto, & tunc habet rationem quo & ſignari nomine concreto & habet rationē quod, & dicitur ipſum quod

quid eſt, & ſignificatum diſſinitionis, & pro tanto

apud primum philoſophum habet rationem

principij formalis, quia eſt ratio per

quam inſunt proprietates, & de-

monſtratur de ſubiecto &c.

Hęc de capite decimo

dicta ſint, & ibi ter-

minatur re-

ſolutę

ſententia Ariſtotelis in ſepti-

mo libro Meta-

phyſicę.

EIVSDEM CHRYSOSTOMI
IAVELLI CANAPITII
E P I T O M E
SVPER OCTAVO LIBRO
M E T A P H Y S I C A E.



ECVNDVM ordinem pos-
tum in principio septimi libri
in hoc 8. lib. agendum est de
substantia sensibili modo rea-
li, inuestigando de partibus &
principijs suis intrinsecis, cum
enim sit substantia composita
necesse est ipsam constare ex
principio materiali, & princi-
pio formali. Totam igitur sen-
tentiam in vnico tract. perstrin-

gentes diuidemus ipsum in quatuor capita.

Primo declarabitur, q materia & forma insunt substan-
tiæ sensibili, vt principia intrinseca constitutiuæ.

Secundo, considerabuntur quæ consideranda sunt à pri-
mo Philosopho de forma.

Tertio, considerabuntur quæ consideranda sunt à primo
philosopho de materia.

Quarto, considerabitur de causa vnionis earum adinuicē,
& propter quid ex eis sit vnum quod est substantia compo-
ta quæ est vna per se.

C A P V T P R I M V M.

IN primo cap. manifestabitur in omni substantia sensi-
bili esse materiam & formam vt principia intrinseca cō-
ponentia. Et de materia quidem dicemus tria.

Primo

Primo, in quo differt à forma, & à composito.

Secundo, q̄ in omni substantia sensibili necessario ponitur materia.

Tertio, q̄ non in omni substantia sensibili est eodem modo materia.

Quantum ad primum, aduerte materiam, formam compositum in hoc distingui essentialiter, q̄ materia non est aliquid actu demonstratum s̄m se, sed est in potentia, vt per aduentum formæ sit aliquid actu, puta ferrum s̄m se non est gladius, sed per aduentum formæ gladij sit gladius actu, vt etiam declaratum est in 2. phys. tex. xj. forma vero distinguitur à materia, quia est actus, & ea sit aliquid actu, dat enim esse actu ei cuius est forma, & est separabilis s̄m rationem. i. diffinitionem à materia, non autem s̄m esse, s̄m rationem dico, quoniam cum forma sit actus non repugnat esse per se cognoscibilem, cum autem materia sit pura potentia, non est cognoscibilis nisi per formam, vt declaratum est in primo phys. tex. 70. patet igitur formam esse separabilem à materia s̄m cognitionem, non autem materiam à forma, quoniam esse per se cognoscibile repugnat potentix passiuæ, vt declarabitur in nono lib. Dico autem nō s̄m esse, quoniam, vt inquit Comment. in hoc lib. in comm. 3. impossibile est formam separari à materia, quod intelliges tu de forma naturali educta de potentia materiæ, vt præserues te ab anima intellectiua, vel si includatur anima intellectiua, dictum Comment. erit verum de forma in quantum forma i. quo ad actū informandi, non autem quo ad substantiam, & sic verum est vniuersaliter nullam formam informatiuam materiæ esse separabilem à materia secundū esse informatiuum, cum quo tamen stat eam esse separabilem secundū substantiam, unde de anima separata verum est dicere, q̄ est substantia per se existens, non tamen actu forma, cum actu perficiat materiam. Compositum autem quod est tertium resultās ex ijs, est separabile simpliciter. i. vt inquit Comment. in comm. 3. & secundū diffinitionem, cum sit ens actu, ex consequenti est secundū se cognoscibile, & secundū esse, quoniam cū sit illud quoddam proprie generatur, & corrumpitur, vt declaratum est in 7. lib. conuenit ei separatim existere. i. habere esse

esse distinctum à quocunque alio composito, & ideo solum compositum dicitur proprie hoc aliquid & ens actu, est igitur materia ens in potentia, forma vero actus, compositum autem quod existit actu.

Quantum ad secundum, aduerte, quòd fundamentum vendi materiam esse in omni substantia sensibili est, quia omnis substantia sensibilis cum sit naturalis, mutabilis est, in omni autem mutatione tam accidentali quàm substantiali, cum eius termini sint oppositi, necesse est dari subiectum, quod habet rationem materiæ, quod aliquando est sub vno termino, & aliquando sub alio, vt in alteratione, idem subiectum; aliquando est album, aliquando nigrum, & in augmento, aliquando est sub parua quantitate, aliquando sub magna, est enim processus à parua ad magnam, vel à minori ad maiorem quantitatem, & in motu locali, aliquando est in vno situ, deinde in alio, & in generatione substantiali. necesse est dari subiectum. quòd recipit vnā formam cum abiectiōe alterius, & hæc omnia iam pertractata sunt in primo Phys. ubi declaratum est in omni fieri naturali ultra duo contraria requiri tertium, id est subiectum quod sit successiue receptiuum contrariorum, & hoc incipiendo à tex. 51. vsque in finem lib. Cum igitur omnis substantia sensibilis mutabilis sit. & non possit saluari mutatio sine materia necesse est in ea poni materiam vt principium intrinsecum, ita tamen quòd vt inquit Comment. in cōm. 4. materia quæ est subiectum in transmutatione substantiali, sit in omni potentia, quæ autem subiectum in transmutatione accidentali sit in actu quo ad esse substantiale, in potentia autem quo ad formam accidentalem, recipiendam, & vt sic est media inter esse actu, & non esse.

Quantum ad tertium, aduerte, quòd cum substantia sensibilis diuidatur in sempiternam, quale est cælum, & in generabilem ac corruptibilem, qualia sunt elementa & elementata, alio modo est materia in substantia generabili & corruptibili, & alio modo in sempiterna. nam in generabili, & corruptibili est materia quæ est subiectum generationis & corruptionis, & dicitur materia subiecta priuationi, quoniam dum est sub vna forma est priuatiua alia, & est in potentia ad ipsam,

ipsam, & sicut est subiectum generationis ac corruptionis, sic est subiectum aliarum mutationum, omne enim generabile est alterabile & mobile secundum locum, in substantia vero sempiterna cum non sit generabilis, nec alterabilis, ut probatur in primo cœli. alteratione proprie dicta, sed mobilis tantum secundum locum, est materia, quæ solius mutationis localis est subiectum, & hanc vocat Arist. materiam localem, quoniam per ipsam est substantia sempiterna sensibilis, in potentia ad diuersa, ubi successiue, aliam autem vocat generabilem & corruptibilem, quod tu intelliges subiectiue & non terminatiue, alioquin contradiceret ei quod dixit in lib. 7. tex. 26. & in primo Phys. tex. 82. Dixi autem alteratione proprie dicta, quæ fit secundum qualitates actiuas & passiuas, & quæ est verè motus in prædicamento qualitatis, ut excipiam illuminationem quæ fit in substantia sempiterna, ut in astris, & præcipue in luna, sed huiusmodi illuminatio non est motus localis, licet igitur in omni substantia sensibili sit materia, non tamen in omni eodem modo. Tu tamen aduerte, quod licet alio modo sit materia in cœlo & in ijs corruptibilibus, tamen in omnibus est pars essentialis, ita quod & cœlum & inferiora vere sunt composita ex materia & forma modo sibi conuenienti, vnde non acceptabis dictum Cōment. in cōm. 4. cum dicit, ideo videmus quod cœlum non componitur ex materia quæ est in potentia, & forma quæ est in actu. Et scias quod contra Cōment. formauimus in hoc lib. 8. pro defensione B. Thom. vide eam ad placitum.

Postquam manifestauimus in omni substantia sensibili dari materiam vel principium intrinsecum, nunc agendum est de forma, & declarandum quomodo necessario est in ea, & est de substantia eius, & dicemus duo.

Primo, quid de hoc senserint antiqui.

Secundo, quid de hoc dicendum secundum Arist. & veritatem.

Quantum ad primum, aduerte, quod omnes antiqui in quolibet sensibili ponebant formam, ut seruarent distinctionem rerum abinuicem, quæ sumitur non à materia, quoniam in ea conueniunt, sed à forma, vnde recitat Arist. Democritum assignantem in rebus tres differentias, scilicet secundum figuram,

figuram, secundum situm, secundum ordinem, quæ tamen non sufficiunt, ut declarat Aristot. in tex. nam multo plures aliz sunt rerum differentiz ad prædictas tres non reducibiles. Differunt namque aliqua compositione, aliqua mixtione, aliqua colligatione, aliqua tempore, aliqua loco, aliqua mollicie, & duritie, raritate, & densitate, gravitate, & leuitate, licet autem formam in quolibet sensibili ponerent, tamen decipiebantur in hoc, quod non posuerunt aliquam formam esse de substantia rei, existimabat enim totam substantiam rei esse materiam, & formas omnes esse accidentia, ut declaratum est in 2. phys. tex. 7. & propterea, negauerunt generationem & corruptionem substantialem. ut patet in primo de generatione, tex. 5. ibi Democritus, & Leucippus, verum positionem hanc satis improbauimus in primo de generatione, & in questionibus nostris, ideo nolo in hoc immorari, sed sufficit pro nunc tibi constare, quod si sequeremur antiquorum sententiam non esset substantia sensibilis constans ex materia, & forma, ut partibus substantialibus, sed tota substantia esset materia. reliqua autem omnia essent, aut passionēs, aut dispositiones, aut habitus, ut dicit Aristot. in 2. physicorum, tex. 9.

Quantum ad secundum, aduerte, quod Arist. manifestat in substantia sensibili esse formam, ut actum substantialem ratione sumpta à differentia substantiali, & intendit sic arguere. Quælibet substantia sensibilis habet suam diffinitionem, siue suum quod quid est. ergo habet genus, & differentiam. ex his enim constat diffinitio, ut patet in lib. 7. huiusmodi autem genus, & differentiam, necesse est esse prædicata, non per accidens, nec per se in secundo modo per se, sed per se primo modo, ut declarauimus in 7. lib. ex consequenti necesse est, ut sint prædicata, quiditativa, & substantialia, sed genus sumitur à materia. differentia autem à forma. ergo sicut quod quid est substantiæ sensibilis constat ex genere, & differentia substantiali. sic ipsa substantia sensibilis constat ex materia, & forma, ut partibus substantialibus. Præterea cum substantia sensibilis non habeat esse actu, nisi per formam, nam sicut gladius non est gladius, nisi per formam gladij, sic nec caro, nec os, nec homo habent esse actu, nisi per
pro

propriam formam, necesse est dicere huiusmodi formam esse substantiam, & magis substantiam, quàm materiam, quàm dat esse substantiale, magis quàm materia dat enim esse actuale. materia autem tantum potentiale. Tenendum est igitur secundum Arist. & veritatem substantiam sensibilem constare ex materia, & forma, quorum utrunque est substantia. & quoniam forma est, quæ distinguit, ideo necesse est diuersas formas esse diuersarum materialium, ita ut proprius actus fiat in sua propria materia. hinc videmus aliam esse materiam, scilicet proximam, in qua recipitur forma lapidis, & aliam, in qua recipitur forma plantæ.

Propterea dixit Arist. in 2. de Anima. tex. 26. vniuscuiusque actus natus est, non in qualicunque, sed in propria fieri materia, & quoniam diffinitio debet sufficienter declarare naturam rei diffinitæ. ideo qui diffiniunt sensibilia per solam materiam, aut per solam formam male diffiniunt. Quæ autem diffinitiones complectuntur utrunque. approbantur etiam ab Archita, sicut qui diffinit serenitatem dicēs, quod est quies in aëre multo. nam quies est forma, & aër multus est materia, & tranquillitas est æquitas maris, æquitas forma, mare est materia. Hæc de primo cap. dicta sint.

C A P V T I I.

IN secundo cap. debemus considerare ea, quæ à primo Philosopho consideranda sunt de forma. & sunt quinque. Primo, forma rei sensibilis non est tota quiditas, vel essentia eius, sed pars. nam si esset tota essentia eius. ergo nomen impositum substantiæ, sensibili, ut homo, & animal, & domus importaret solam formam, sicut dixit Plat. ideas, ut per se hominem & per se leonem dicere tantum formas separatas à materia, sed hoc est falsum, quoniam animal importat animam in corpore, & non solam animam, præcipue cum animam sit alicuius corporis actus, & domus non importat tantum tegumentum, sed tegumentum compositum ex lapidibus, & lignis &c. & quod huiusmodi nomina non significant solam formam. patet ex hoc, quoniam in formis separatis à materia idem est quod quid est, & id cuius

Epit. Iauelli. V est

est in his autem sensibilibus non est idem, quod quid est, & id cuius est, vt declaratum est in lib. 7. ergo & c. quiditas substantiæ. ergo sensibilis non est sola forma, sed quid resultans ex materia, & forma.

Secundo, forma est aliquid præter partes materiæ, puta compositio domus est aliquid præter lapides, & ligna. & anima est aliquid præter corpus, & partes corporis. nam cum forma sit actus, & perficiat materiam, necesse est vt sit aliqd præter materiam. alioquin actus, & potentia coinciderent.

Tercio, nulla forma est per se generabilis, & corruptibilis, sed tantum per accidens, scilicet ad generationem, & corruptionem compositi. id declaratum est in 7. lib. in cap. 6.

Quarto, formæ rerum corruptibilium non sunt separatæ à materia, vt existimauit Plat. & aduerte, qd ly formæ non stat solum per formam partis, sed pro quiditate specifica, vt humanitas, equinitas, & lapideitas, id quidem pertractatum est diffuse in 3. lib. & in 7. lib. contra Plat. & in hoc 8. lib. Arist. declarat propositum in artificialibus, de quibus constat quod non sunt separatæ, vt domus, vas, scamnum & c. & quoniam aliquis posset dicere non esse eandem rationem de formis artificialibus, & naturalibus, quoniam ille sunt accidentia, quibus esse est inesse materiæ, & subiecto. iste autem sunt substantiæ, quibus non repugnat esse sine materia. unde Plato id aduertens posuit formas naturales, & non artificiales separatæ.

Contra hanc responsionem sic instat Aristot. si species, & quiditates, siue formæ rerum sensibilibus sunt separatæ haberent locum dubitatio Antisten. philosophi; licet indocti forte propter imperitiam logicę contra Plat. Dixit. n. Antisten. nihil posse diffiniri, quoniam existimabat quiditatem cuiuscunque rei esse simplicem diffinitionem autem cum sit oratio longa, quoniam componitur ex genere, & differentia nõ posse conuenire rei simplici, ex consequenti nullam quiditatem posse diffiniri. Dicit igitur Arist. si formæ rerum sensibilibus sunt separatæ à materia sunt simplices. ergo non possunt diffiniri, cum diffinitio constet ex genere, & differentia, & genus correspondeat materiæ. differentia autem formæ, & sic dubitatio Antisten. concludet contra Platonem.

Quinto, licet formæ, & quiditates rerum non sint numeri, vt existimauit Pithagoræ & Platon. tamen in quatuor assimilantur numero, primo sicut omnis numerus tandem resoluitur in indiuisibilia, id est in unitates, sic omnis definitio quæ est indicatiua quiditatis resoluitur in indiuisibilia, id est in primum genus, & primam differentiam, aliter si definitionis esset definitio in infinitum, non esset status in partibus definitiuis, ex consequenti de nullo haberetur scientia, vt dictum est in secundo lib. & propterea illic Arist. probauit esse statum in causis materialibus, & formalibus. secundo, sicut non remanet idem numerus aliquo etiam minimo (quale est unitas) addito, vel subtracto, sed fit alia species, vt patet si ternario additur unitas, non remanet ternarius, sed fit quaternarius, & si à quaternario remouetur unitas, non remanet quaternarius, sed fit ternarius, sic in definitionibus indicantiibus quiditates, & compositis ex genere, & pluribus differentiis, si addatur, vel subtrahatur differentia fit alia definitio, & non remanet eadem quiditas, verbi gratia in definitione animalis, quæ est hæc. animal est substantia animata, & sensitua, si remouetur sensitua fiet definitio plantæ, si additur rationale fiet definitio hominis, tertio, sicut numerus est vnus, puta binarius per vltimam unitatem, & similiter ternarius per tertiam unitatem, & sic de reliquis, sic natura rei sensibilis, puta hominis habet unitatem à forma sua, ab eodem enim res habet esse, & vnum esse, sed à forma habet esse, ergo &c. ex quo sequitur corollarie, quod ea sunt vnum, quorum est vna forma, & plura, quorum sunt plures formæ, quod to, sicut numerus non recipit magis, & minus, & minus, ita enim in indiuisibili, quælibet enim trinitas est æque trinitas in quantum trinitas, sic forma, & quiditas specifica non recipit magis, & minus, non enim vt inquit Comment. vnus homo est maioris humanitatis secundum formam, id est secundum naturam specificam hominis, quam alius homo, sed si suscipiet magis, & minus, hoc est materia. i. si consideretur cum dispositionibus, quæ se tenet ex parte materiæ, quia sunt ratio recipiendi formam, potest dici recipere magis, & minus, non quidem secundum se, sed ratione dispositionum, quæ sunt qualitates intensibiles, & remissibiles. Hæc de 2. cap. dicta sint.

IN tertio cap. considerabimus, quæ à primo philosopho consideranda sunt de materia, & sunt octo.

Primo, si est vna materia omnium, quæ sunt, id est omnium generabilium, & corruptibilium.

Secundo, posito quòd sit vna, vnde prouenit diuersitas, & multitudo.

Tertio, si ad habendam rei cognitionem sufficit assignare primam materiam, & idem intellige de alijs causis.

Quarto, si est materia in substantijs naturalibus æternis.

Quinto, si est materia in accidentibus.

Sexto, si eorum, quæ quandoque sunt, & quandoque non sunt, non tamen per se generantur, & corrumpuntur est assignare materiam.

Septimo, si materia est in potentia æqualiter, & sine aliquo ordine ad duo contraria.

Octauo, si vinum est materia aceti, & viuū materia motui.

Quantum ad primum aduerte, quòd Arist. duplicem materiam assignat, scilicet primam, & propriam. De prima dicit quòd est eadem, siue sunt eadem prima corpora, vt quatuor elementa, ex quibus generantur omnia composita inferiora, & in quæ resoluuntur. De propria dicit, quod non est eadem omnium, sed diuersorum diuerse sunt, vt materia flegmatis est dulcis cibus, & crassus, siue vnctuosus, & materia cholerae est cibus amarus, & ratio est, quoniam flegma humidum est, dulcia, & vnctuosa humida sunt, amara vero sicca, cum igitur cholera sit sicca, & vnumquodque generetur ex sibi cōuenienti generatur cholera ex cibo amaro, & flegma ex dulci. Tu tamen aduerte, quòd contingit eiusdem esse plures materias, quodam tamen ordine, vt pote quando vnū sit ex alio, verbi gratia flegmatis est materia, dulce, & vnctuosum, siue pingue hoc tamen ordine, quod pingue sit ex dulci, cum pingue sit sapor medius, & dulce est sapor extremus, & media fiunt ex extremis. Item materia cholerae est amarum, & terrestre combustum, hoc tamen ordine, quòd amarum sit ex terrestri combusto, & hæc manifestata sunt in

in lib. de sensu & sensato . Item aduerte, quòd duobus modis contingit aliquid fieri ex aliquo, vt ex materia . Primo via generationis, vt quando vltimum est ex primo, quia primum transmutatur in vltimum, vt quando elementa transmutantur in compositum . Secundo via resolutionis, vt quando primum est ex vltimo, quia vltimum transmutatur in primum, vt quando compositum resoluitur in elementa .

Quantum ad secundum, aduerte quòd licet sit vna prima materia generabilium, tamen plures causas, possumus assignare diuersitatis, & pluralitatis in entibus, & primo potest provenire ex diuersitate agentis, vel quia si sit vnum agens potest diuersimode agere, & id maxime patet in artificialibus . nam ex ligno potest statue factor facere imaginem, & carpentarius facere arcam, vel si idem homo habeat vtranq; artem, faciet vtrunque ex ligno, quoniam licet sit idẽ agens supposito, non est tamen idem formaliter . stante igitur vnitatem materię etiam proprie possunt causari diuersa propter diuersitatem agentis . secundo potest provenire ex diuersitate formarum specificarum nam quandam formę sunt, quę in eadem materia sunt apte recipi, vt forma statuę, & scāni, & arcę in ligno. quędam autem est, quę non potest recipi, nisi in vna materia, vt forma serre in ferro propter duritiem & non in ligno, nec in lana, & hæc diuersitas reducitur in diuersitatem materię, quę tamen sumitur à diuersitate formarum, & finis ex quibus sequitur corollarie, quòd si forma nõ determinat sibi determinatam materiam, vt dictum est de ferra . stante eodem agente, & diuersa materia non inconuenit idem secūdum speciem produci, vt artifex producit phialam in auro, & phialam in argento, quę tamen secundum speciem nõ distinguuntur . si autem agens esset vnum, & materia, tam prima, quàm propria esset vna, esset impossibile seruare distinctionem, & diuersitatem specificam in entibus naturalibus . Tu tamen aduerte, quòd cum diximus quasdam formas aptas recipi in eadem materia, intelligendum est de formis artificialibus, vt inquit Comment. in comment. 1. 1. nam quęlibet forma naturalis habet materiā propriam, in qua recipitur ex secundo de Anima, tex. 16.

Quantum ad tertium, aduerte, si debet cognitio haberi
V iij propria,

propria, & distincta alicuius nō sufficit assignare causam materialē remotam, puta quatuor elementa, sed propria, puta in homine est assignandus menstruus sanguis pro materiali causa propria. nam per causas vniuersales, & remotas non habetur cognitio de re, nisi imperfecta, & confusa. ideo dixit Arist. in primo Poster. tunc arbitramur scire cum causam cognoscimus, & quoniam illius est causa, scilicet propria, & quod dictū est de causa materiali, intellige de alijs causis, verbi gratia causa efficiens in homine est sperma maris, causa formalis est illa forma, quæ dat quiditatem homini, id est per quam homo est homo, ut anima intellectiua, causa finalis est illa, propter quam fit homo, puta propria operatio, & vltima perfectio sua. Tu tamen aduerte, qd causa formalis, & finalis multoties sunt idem. nam forma in quantum dat esse est causa formalis, & in quantum terminat generationem est causa finalis, vnde solet dici formam esse finem generationis, sed non rei genite illud enim est propria operatio, in qua stat rei perfectio.

Quantum ad quartum, aduerte, quod Arist. per substantias materiales æternas intendit, ut dicit Comment. in cōm. 12. elementa quæ sunt æterna secundū totum, & corpora cœlestia dicit, igitur qd de his alia ratio est, quā de generabilibus, quoniam quædam eorum (& hæc sunt omnia corpora cœlestia, ut excipiat elementa) forsan non habent materiam. aut si habent non talem qualis est in generabilibus, qm alia est sub priuatione, per quam dum est sub vna forma est in potentia an aliam. & hanc materiam, ut diximus in 1. Phys. cognouimus ex generatione, & corruptione substantiali, cui necesse est assignare subiectum quod successiue stet sub vtroque termino, hanc igitur constat non esse in cœlo, cum sit elongatum à generatione, & corruptione, verum quia cœlum mouetur secundū locum, & dum est in vno, vbi est in potentia ad alterum vbi, ideo necesse est ponere in cœlo materiam mobilem secundū locum, id est per quam cœlum est in potentia ad diuersa loca, & hanc Arist. supra in tex. 4. appellauit materiam localem.

Sed dicet, vtrum hæc materia localis sit vere, & proprie materia, ita quod ex se sit ens in pura, & potentia, & pars cōpositiua

positiua corporis cœlestis.

Respondeo secundum Comment. in côm. 12. non est vere materia, inquit enim, materia in rei veritate, cuius esse est in potentia non inuenitur, nisi in rebus generabilibus, & corruptibilibus, substantiæ vero æternæ, quia in eis non est potentia ad corruptionem non est in eis materia, sed materia eorum est aliquid existens actu, scilicet corpus, ideo dignius habet hoc nomen subiectum, quàm hoc nomē materia. Hęc Comment. Et aduerte, q̄ in eodem côm. dicit cœlum non esse compositum ex materia, & forma, sed ex corpore, & forma animata intelligibili, quæ. s. mouet cœlum localiter, hæc fuit mens Comment. quam reprobatur B. Thom. in 8. Phys. lect. 21. & in prima parte, q. 69. art. 2. & tu videbis q. nostram Metaphys. in hoc 8. lib. vbi sustineo viam B. Thom. declarās, quomodo vere est materia in cœlo, quæ ex se ens est in pura potentia, cuius tamen potentialitas iam perfecta, & completa est ex forma quàm habet, nec te moueat quòd B. Thom. in hoc 8. lib. exponens tex. 12. ibi, in naturalibus quidem & c. videtur declarare ad viam Cômment. & vitur termino Comment. s. subiectum, sic enim dicit, corpus cœleste vniuersaliter nullo modo habet materiam, si subiectum materiam nō dicat, vel habet materiam ad vbi, si subiectum dicatur materia, licet in quam sic dicat hic, tamen melius considerans in 8. Phys. & in primo cœli, & in prima parte declinauit omnino à via Comment.

Quantum ad quintum, aduerte, quòd Comment. exponit ly in accidentibus non, vniuersaliter, sed de accidentibus quæ apparēt in corporibus cœlestibus, vt de eclipsi, sicut exemplificat Arist. verum quia exemplificat etiā de somno, quod constat non esse in cœlo, melius est, vt dicamus Arist. hic intelligere de accidente vniuersaliter, quod est priuatiuum. in tex. autem sequenti de accidentibus positiuis, & de omnibus formis, quæ non per se generantur. loquendo ergo de accidentibus priuatiuis dicit Arist. quòd non habent materiam, quæ, scilicet sit ens in pura potentia, in qua immediate recipiantur, sed materia eorum est substantia, quæ patitur & recipit accidens in priuatiuum, & quoniam huiusmodi substantia est subiectū talis accidentis potest dici materia, solet enim

subiectum dici materia pro quanto recipit accidens, sicut materia recipit formam, & exemplificat de eclipsi lunæ, de quasi quærat materia. respondebitur, quod est luna, quæ patitur defectum luminis, si quærat causa eius efficiens. respondetur quod est terra, quæ interiacens dimetraliter inter solem, & lunam prohibet lunam illuminari à sole. & si quærat causa eius finalis forte non poterit assignari, quia eclipsis contingit propter motum, & propter necessitatem cōuersionis lunæ ad solem, & non propter aliquod intētum ad extra, & si quærat causa formalis, dicetur, quod est ratio, & quiditas rei quæsitæ, puta eclipsis est formaliter priuatio luminis, sed hæc ratio erit diminuta, nisi addatur causa efficiens, ut sic dicatur, eclipsis est priuatio luminis in lunā proueniens ex obiecta terra inter solem, & lunam, exemplificat etiam de somno, cuius causam materialem, & primū principium, siue radicem, & causam effectiuam, & formale, & finalem diffuse declarauimus in Epit. nostra sup lib. de somno, & vigilia.

Quantum ad sextum, aduerte, quod non solum accidentia priuatiua carent materia, ex qua, sed eorum materia est eorum subiectum, immo & quæcunque accidentia positiua, quæ aliquando sunt, & aliquando non sunt, licet non generentur per se, sed per accidens, sicut quātitates, & qualitates, & formæ substantiales, nam quæcunque habent materiam, ex qua in his generabilibus sunt transmutabilia adinuicem & utrum generatur ex altero, & vnū elementum ex altero, & homo albus ex hoīe nigro, sed vna qualitas, nec quātitas, nec forma substantialis, transmutatur in aliā, nec generat ex alia, ut declaratum est in primo, & in 5. Phys. & in 7. Metaph. in hoc ergo non datur materia, ex qua, sed in qua.

Quantum ad septimum, aduerte, quod contraria sunt in duplici differentia, quædam. n. sunt talis naturæ, quod quando vnū eorum est in materia actu, alterum est in potentia, & quando fuerit actu sub eo iterum est in potentia ad alterum, v. g. quando corpus animalis est ægrum est in potentia ad sanitatem, & quando est actu sanum est in potentia ad ægritudinē, & econuerso. Item quando aër est tenebrosus est in potentia ad lucem, & quando actu est sub luce est in potentia ad tenebras, & econuerso, quædam autem sunt talis naturæ, quod

vnus comparatur ad alterum, vt ad terminum, ita q̄ vnus præsupponit alterum præfuisse in materia, sicut terminus præsupponit viam. Respectu quidem primorum materia indifferenter se habet ad ea, & sine ordine prioris, ac posterioris. Respectu autem secundorum quodam ordine se habet ad ea. nam materia prius respicit illud contrarium, quod est vt habitus, & est sicut via ad aliud quod est, vt priuatio, vnde aqua, quæ est materia humidorum prius respicit formam vini, deinde formam aceti. est enim vinum via ad acetum, & nõ econtrario, & materia animalis prius respicit vitam, posterius mortem, quoniam vita est via ad mortem, & nõ econuerso, & quando est sub vita est in potentia ad mortem, sed non econuerso.

Quantum ad octauum, aduerte, quòd cum acetum sit corruptio vini, non potest vinum esse materia aceti. Materia enim permanet in eo, ex quo fit, vt declaratum est in j. Phys. tex. 60. & in hoc distinguitur materia à priuatione. constat autem quòd non permanet vinum in aceto, immo corrumpitur ab eo, idem dico de viuo, & mortuo. Et si quæras quæ sit materia aceti, dico q̄ est aqua, quæ secundum ordinem prioris, & posterioris respicit formam vini, & formam aceti, sed prius formam vini, & materia animalis prius respicit vitam, deinde mortuum. Et si quæras, quomodo ergo hæc est vera ex vino fit acetum, & ex viuo fit mortuum. Dico, q̄ ly ex, signat ordinem, & non materiam, vnde in eodem sensu hæc verificatur, ex vino fit acetum quo verificatur ista ex mane fit merities, id est post mane, sic in proposito ex vino fit acetum, id est postquam materia vini recepit, & quoniam sic formam vini recipit formam aceti, eodem modo expone istã, ex viuo fit mortuum, & istam ex vidente fit cæcum, & aduerte, q̄ dicit Arist. quæcunque sic transmutantur, ita se habent, q̄ non fit in ea mutua reuersio, puta quòd ex aceto fiat vinum, & ex mortuo viuum, sed necesse est, vt fiat resolutio ad materiã primam, puta ad quatuor elementa, deinde per formas medias tandẽ fiat reuersio ad idem in specie, puta si ex mortuo debet fieri viuum, oportet quod quatuor elementa, per iteratam mixtionem, & talem complexionem, & con-
& si temperantiam vniantur tali modo, quod generetur animal,

& si ex aceto debet fieri vinum, necesse est vt resoluatur in aquam, quæ est materia, & vini, & aceti, & aqua iterum miscetur ad principia vini in vitæ, & ratio huius irreuerſibilitatis est naturalis, & immutabilis ordo, quo materia prius respicit id quod est, ut habitus, & per ipsum est via ad priuationem, cuius signum est, quod si materia, vel subiectum indifferenter respiciat vtrumque est mutua reuerſio, vt quoniã aer in quantum diaphanus indifferenter respicit lumen, & tenebram, ideo a tenebra est reuerſio ad lumen, & econuerſo. Hæc de tercio cap. dicta ſunt.

CAP V T I I I I.

IN quarto capite resoluendum est dubium, quod apud antiquos fuit valde difficile. Dubium autem est, cum substantia sensibilis sit composita ex materia, & forma, & sit quid vnum per se, dubitatur per quam causam, vel per quod medium materia, & forma vniantur adinuicem, ita quod ex eis fiat vnũ p se. Pro resolutione igitur dubij tria agenda sunt.

Primo, manifestabitur difficultas eius.

Secundo, soluemus ipsum secundum veritatem.

Tertio, declarabimus solutiones antiquorum esse erroneas, ita quod nulla est vera solutio, nisi quam inuenit Arist.

Quantum ad primum, aduerte, quod ex duobus manifestatur difficultas huius dubij. primo, quidquid habet partes, & est quoddam totum non vt aceruus lapidum, sed vt resultans ex partibus, ita quod est aliquid præter partes necessario habet aliquam causam, per quam vt per medium ex partibus fit vnum, nam videmus in corporibus compositis ex pluribus partibus partes vniri, aut vinculo, aut visco, aut alio coniunctiuo, vt medio, aliter non fieret vnum, & id maxime patet in artificiatis, & in corpore animalis, in quo necessarii sunt nerui, & alia multa colligamenta, vt ex diuersis partibus fiat vnum corpus compositum, & dissolutis illis ligamentis dissoluitur corpus, & desinit esse vnum, sed substantia sensibilis, puta homo habet partes essentielles. scilicet formam, & materiam. & est quid vnum, non sicut aceruus lapidum, nec sicut Ilias, quod est poema Homeri, quod est vnum sola aggregatione carminum, sed est vnum per se, quia significat vnã naturã

speci-

specificam . ergo merito dubitatur per quid est vnum , & nō multa . secundo , si admitteretur positio Plato . qua tenet animal esse , quod separatum per se subsistens . idem tenet de bipede , & tenet hominem esse hominem , quia participat ijs duobus . scilicet animali , & bipede , & hunc hominem esse hominē , quia participat homine separato , si inquam admitteretur hæc positio , esset impossibile saluare quin homo esset duo . scilicet animal , & bipes . non . n . posset assignari causa , quare animal , & bipes vnirentur in homine , necesse est ergo dari causam mediam vnitam partium substantiæ sensibilis , vt seruetur eius vnitas , & id est difficile inuenire , ideo præsens dubium est valde difficile .

Quantum ad secundum , aduerte , q̃ licet præsens dubium motum sit solum circa substantiam sensibilem naturalem , t̃m moueri potest etiam circa mathematica , puta qua de causa circulus est quid vnum per se , & potest moueri circa entia separata , in quibus nullo modo est materia , & querere qua de causa intelligentia Saturni est quid vnum per se , vt igitur Arist . plenam , & vniuersalem solutionē daret . soluit primo in naturalibus . secundo in mathematicis . tertio in separatis .

Quantum ad naturalia , dicit Arist . si admitteremus positionem Plat . quæstio esset insolubilis . impossibile est enim duo separata per se subsistentia , neque seipsis , neque p̃ quodcunque medium ita vniri , quod constituent vnum per se . Relicta autem positione . Plat . si aduertimus naturam materiæ , & formæ , ex quibus componitur substantia naturalis . adeo facilis est solutio , q̃ nec videtur aliqua dubitatio . nam materia est ens in potentia , & forma actus , materia igitur est res fienda in potentia , puta aqua est potentia vinum , & metallum est statua in potentia , & per aduentum formæ illud quod erat in potentia fit actu , nulla ergo alia causa requiritur ad hoc , quod ens in potentia fiat ens actu , nisi causa efficiens , quæ actione sua id , quod erat in potentia transfert ad actum , ex eo quod materia fit actu sub tali forma , quæ prius erat in potentia . Et aduerte , quod non est imaginandum substantiam naturalem antequam recipiatur forma in materia non esse vnā , & post receptionem fieri vnā . hæc enim imaginatio est falsa , sed tenendum est , quod illud quod erat

EPI TOM B L I B. VIII.

erat ens, & vnum in potentia actione agentis fit ens, & vnū actu. vnde inquit Cōment. in cōm. 15. est igitur hic aliquid vnū quod primo est in potentia, & postea transfertur de potentia ad actum. scilicet actione agentis. qm̄ igitur queritur qd facit substantiam naturalem esse quid vnum per se, rñdendum est nullam esse causam intrinsecam, sed qm̄ componitur ex materia, quæ est ipsa substantia in potentia & illud idē quod erat in potentia fit actu actione agentis qua actuatur materia sua propria forma. vnū ergo est querere causam mediā vnitivam intrinsecā inter materiam, & formam. Et aduerte hanc resolutionem factam fuisse etiam in 2. de anima. tex. 7. vbi inquit Arist. vnde nō oportet querere, si vnū est anima, & corpus. i. quo medio vnitur anima corpori, sicut neque cetera, & figura, neque oīno vniuscuiusque materia. & id, cuius est materia. scilicet forma, q. d. cum materia sit potentia, & forma sit actus sunt per se, & sine medio vnibiles, quod vtrique nō esset, vt dicit Cōment. in 2. de anima. cōm. 7. si materia s̄m se esset actu, & forma actu, qm̄ tunc duo existentia in actu non vniuntur, nisi per medium quod se habet, vt nexus, vel vinculum. & ex his patet solutio primi argumenti. quod inductum est ad ostendendam difficultatem primi dubij. nam maior non est vera, quando partes ita se habent, q̄ vna est potētia, & altera actus, vt contingit in proposito, secundū autem argumentum concludit verum, quoniam admissa passionem Plat. vt diximus, dubium esset insolubile.

Quantum ad mathematica Arist. dat eandem solutionē. nam si queratur, quare diffinitio circuli, vel quod qd est circuli significat vnum per se. Rñdetur, quia cum hæc sit diffinitio circuli, circulus est figura superficialis, figura est vt forma & superficies vt materia, sicut. n. in materia naturali recipitur forma naturalis, sic in superficie recipitur forma circuli. Tu tñ aduerte, q̄ materia hæc dī materia intelligibilis, à qua nō abstrahitur mathematicus, licet abstrahat à materia sensibili, & naturali. quid aut sit vtraque earum declarauimus. in 7. lib. in cap. 7. Itē aduerte, quod in mathematicis non requiritur causa efficiens, sicut in naturalibus, quæ id quod erat in potētia trasferat ad actum, mathematicus enim, vt declarauimus in 3. lib. in cap. 2. non considerat causam efficientem, neque

neque finalem, qm̄ abstrahit à materia naturali, & à motu.

Quantum ad separata, in quibus nec materia sensibilis, nec intelligibilis. dicit Arist. q̄ statim sunt vnum. i. ex seipsis. nam cum sint substantiæ simplices, & simplices actus mathematici nihil expectât, à quo habeant esse actû, & esse vnû: sed ex seipsis sunt ens, & vnum, ad differentiam compositi & sensibilij, quæ nec sunt ens actû, nec vnum, nisi per aduentum formæ in materia. vnde inquit Arist. sicut ens seipso, & non per aduentum differentiarum descendit in decem prædicamenta, & sic substantia, qualitas, quantitas &c. Genera autem non descendunt in species, nisi per aduentum differentiarû, quæ se habent ad genera, sicut actus ad potentiam, sic entia separata seipsis sunt ens, & actus, & sunt vnum per se. cõposita autem non seipsis, sed per aduentum formæ in materia.

Quantum ad tertium, aduerte, quia antiqui reputabant impossibile materiam, & formam, & in particulari animam, & corpus vniri, & constituere vnum sine medio colligante. ideo quasi dubitantes de necessitate talis medij laborabant in assignatione huiusmodi medij. Ratio autem qua reputabant impossibilem hanc vnionem sine medio est, quia credebant materiam, & formam esse duo diuersa actû, & hæc fuit radix erroris sui, vt dicemus, eodem modo existimabant de corpore, & anima factò falso fundamento visi sunt sic argumentari, impossibile est duo diuersa actû vniri sine medio: & præcipue contraria, vnde videmus album, & nigrum vniri in pallido, & calidum, & frigidum in tepido, & elementa contraria in mixto mediante contemperantia, sed materia, & forma sunt diuersa actû, & in quantum sunt, vt potentia, & actus sunt contraria, ergo &c. Assignantes autem medium diuersa locuti sunt. Quidam dicebant esse participationē, verbi gratia, dicebant hominem esse quid vnum, quia participabat animal, & bipes, sed quærebant quæ sit causa huius participationis, & quid sit huiusmodi participare, & nesciebant se resolvere. Quidam vt Lycophron applicans ad medium vnitiuum corporis, & animæ dicebat esse coexistentiam animæ cum corpore, quam D. Th. accipit pro animatione. Alij autem accipiunt pro mixtione. dicebat enim Lycophron, q̄ sicut anima, & corpus conueniunt in vna operatione,

tione, puta in eo quod est intelligere (arbitrabatur. n. nul-
 lam actionem esse propriam animae, sed vtriusque. unde intel-
 ligere dicebat esse corporis, & animae, sed ab anima est vera
 intellectio. à corpore autem falsa) sic conueniunt per mi-
 xtionem in vna substantia. Quidam autem dicunt animam
 vniri corpori per vitam, siue per viuere, & vt dicit Albert. in
 tract. 2. cap. 4. huius 8. lib. Multi moderni cadunt in hunc er-
 rorem. dicunt enim animam intellectuam vniri corpori me-
 diante sensitiua, & sensitiuam mediante vegetabili, & vegeta-
 bilem mediante spiritu vitali, quem dicunt esse corpus dis-
 cernum per totum corpus, maiorem habens conuenientiam
 cum anima vegetabili, quam corpus terrestre physicum or-
 ganicum, sed licet diuersi diuersa media assignent, tamen non
 satisfaciunt quæsito, nam si secundum eos datur medium vni-
 tiuum inter animam, & corpus eadem ratione dabitur me-
 dium inter cuprum, & figuram trianguli receptam in cupro:
 & inter superficiem, & albedinem in ea receptam, sicut enim
 se habet anima ad corpus ratione qua forma, sic trigonum
 ad cuprum & albedo ad superficiem, & breuiter dabitur me-
 dium in omni compositione duorum adinuicem, quod cum
 sit manifeste falsum non est necesse assignare medium inter
 formam, & materiam, nec inter animam, & corpus. Tu igitur
 aduerte antiquos errasse, quia iudicabant de forma, & ma-
 teria, de anima, & corpore, sicut de duobus existentibus actu
 diuersis, quod tamen non est verum, quoniam vt diximus su-
 pra, materia & forma sunt idem pro quanto illudmet quod
 ex parte materię est in potentia, fit actu per formam, ex con-
 sequenti non est ponendum medium inter ea, sicut inter di-
 uersa actu. patet ergo, quod nulla est vera solutio, nisi quam
 diximus supra, scilicet quod nulla est assignanda causa me-
 dians in naturalibus, sed sola causa efficiens, quae
 transfert id quod est in potentia ex materia
 ad esse actu per formam. Quae autem
 sunt sine omni materia ex seipsis
 sunt ens, & vnum. Hæc de
 quarto capite dicta
 sunt.

EIVSDEM CHRYSOSTOMI
IAVELLI CANAPITII
EPITOME
SVPER NONO LIBRO
METAPHYSICAE.



IXIMVS in principio libri
septimi, ens diuidi per corpo-
reum & incorporeum, per actū
& potentiam, & per vnum &
multa. Postquam igitur in 7.
& in 8. lib. pertractauimus de
ente corporeo materiali, qđ
přecipue dicitur de substantia
sensibili, consequens est ut in
nono pertractemus de poten-
tia & actū, Et complectentes

intentionem philosophi in vnico tractatu, diuidimus ipsum
in quatuor capita.

Primo, quę fuit ratio mouens Aristotelem ad pertractan-
dum de potentia & actū.

Secundo, tractabimus de potentia.

Tertio, tractabimus de actū.

Quarto, tractabimus de potentia & actū, comparando
vnum ad alterum secundum prius & posterius, secundum bon-
num & malum, secundum verum & falsum.

CAPITVLVS PRIMVS.



In primo capite assignanda est ratio, quę
mouit Aristotelem ad considerandum de po-
tentia & actū in particulari libro huius scien-
tię. Aduerte igitur, quod quadruplici ratio-
ne fuit inductus.

Primo,

E P I T O M E L I B. IX.

Primo, quia in libro quarto proposuerat hanc scientiam esse considerationem entis in quantum ens, & eorum quae enti in quantum ens conueniunt. Isti autem sunt vniuersales modi entis, ut vnum & multa, necessarium & possibile, finitum & infinitum, actus & potentia, cum enim haec sint vniuersalia praedicata, à quibus rerum cognitio pendet, si in hac scientia incognita permanerent, de nullo certa cognitio haberetur, fuit ergo necesse de ijs considerationem facere.

Secundo, quia in lib. 8. determinauerat substantiam sensibilem constare ex materia & forma, & materiam dixit potentiam, formam vero actum, & in fine libri concluderat non aliam esse causam, qua substantia sensibilis sit quid vnum per se, nisi quia constet ex materia & forma, & materia quidem est potentia, forma vero actus, ne igitur natura materiae & formae remaneret incognita, fuit necesse de potentia & actu determinare, tertio quia in lib. 12. tractaturus erat de separatione, & dicet in substantia aeterna mouente non admisceri potentiam, sed esse principium tale, cuius substantia est actus, ut praepareret viam ad cognitionem separatorum entium, fuit necesse de potentia & actu praecognoscere, quarto, quia haec scientia, ut dictum est in 6. lib. sola considerat quod quid est, in quo multoties ingreditur potentia aut actus, ut patet in definitione motus & animae, ne igitur definitiones huiusmodi dentur per ignota, fuit necesse de ijs considerare, & prius quidem de potentia, deinde de actu. Sed aduerte quod cum potentia proprie dicta, & quae est nobis magis manifesta, sit ea quae inuenitur in rebus mobilibus & naturalibus, ab ista incipit Aristoteles. ut à magis noto, non quod sit de intentione huius scientiae, ut sic, sed ad physicum spectat, verum quia ex huius cognitione quae cadit sub sensu, deducemur in cognitionem potentiae & actus simpliciter, & inueniemus, quod potentia & actus non solum sunt in rebus transmutabilibus quales sunt res naturales, sed etiam in immobilibus & intellectualibus, ideo ab ista & ab actu sibi correspondente incipiemus.

C A P V T I I.

IN secundo capite, agendum est de potentia, & ut habeatur

tur plena resolutio, quinque consideranda sunt.

Primo, quot modis dicatur potentia.

Secundo, quomodo potentia diuersificatur respectu subiectorum in quibus sunt, ita quod aliquæ sunt rationales, aliquæ irrationales.

Tertio, querendum est si in aliquo est potentia, in quo tamen non est actus.

Quarto, considerandum est quando & quomodo potentia præcedat, vel subsequatur actum.

Quinto, quomodo potentia irrationales & rationales reducuntur ad actum.

Quantum ad primum, aduerte, q̃ Arist. assignans modos potentia refert se ad dicta in 5. lib. vbi distinxit hoc nomen potestas, & quoscunque modos assignat hic, assignauit etiã in 5. lib. licet non eodem ordine, ideo ne simus prolixiores inutiliter, remittimus adiscentem ad ea quæ ordinauimus in 5. lib. in tract. 2. in cap. 7. vbi disposuimus modos potentie realiter dictæ & per similitudinem, & modos possibilis & impossibilis realiter, & secundum logicum, & modos impotentia, in eo etiam q̃ dicit hic Arist. impotentiam esse priuationem potentia, declarans priuationem multipliciter dici, nõ est immorandum, qm̃ quæcunque dicit hic de priuatione, iã dixit in 5. lib. & nos ordinauimus modos priuationis illic in tract. 3. in cap. 4. Et tu aduerte, quod Arist. hic determinat se tractaturum tantum de modis potentia realiter dictæ, scilicet de potentia actiua & passiua, relinquens potentiam dictam per similitudinem, qua utitur mathematicus, & potentiam & impotentiam logicam prouenientem ex repugnantia vel non repugnantia terminorum, nam ad primum philosophum spectat considerare rei quiditatem & suas proprietates reales in vniuersali, quæ aut nullam quiditatem dicunt, nec sunt quid reale, non cadunt sub cõsideratione sua.

Quantum ad secundum, aduerte, q̃ potentia actiua & passiva inueniuntur in rebus animatis anima rationali, vt in homine, & in rebus inanimatis & animatis anima vegetatiua, vt in plantis, & anima sensitua, vt in bruto & in homine, decepta parte rationali, quæ sunt in animatis anima rationali dicuntur potentia rationales, quales sunt artes mechanicae,

& scientiæ practicæ actiuæ, vt morales, nam cum huiusmodi artes & scientiæ ordinentur ad opus, sunt verè principia agendi & operandi in alio quantum aliud, vt ars ædificatiua, & scientia politica, ergo sunt potentia actiuæ. Hæc enim fuit diffinitio potentia actiuæ, quæ vero sunt in rebus inanimatis, aut animatis vegetatiuis & sensitiuis, vt sic, dicuntur potentia rationales, vt calor in igne, frigiditas in aqua, virtutes lapidum, potentia animæ vegetatiuæ, potentia animæ sensitiuæ tam interiores quam exteriores, patet enim hæc omnia esse principia operandi siue agendi, ergo &c.

Posita distinctio: potentiarum sumpta ex parte naturæ, in quibus sunt, assignanda est differentia earum adinuicem.

Aduerte igitur differentiam consistere in hoc, quod potentia rationales sunt factiuæ duorum contrariorum, vt per artem medicinæ potest medicus causare in Socrate & sanitatem & ægritudinem, potentia autem irrationales sunt factiuæ tantum vnius, & ita determinatæ sunt ad illud quod non possunt causare suum contrarium nisi Socr. per accidens, vt declarabitur, vt calor ignis tantum calefacit, & ratio quidem huius differentia stat in hoc, agens naturale agit per formam & qualitatem suam naturalem, vt ignis per calorem, agens intellectuale operatur per scientiam suam practicam, scientia autem principaliter fundatur in ratione & diffinitione rei scitæ, est enim medium in demonstratione faciente scire, sed eadem diffinitio est ostensiuæ rei diffinitæ primo, & sui oppositi contrarij, vel priuatiui, & secundo, vt per diffinitionem recti cognosco rectum primo, & obliquum secundario, & per diffinitionem sanitatis cognosco sanitatem & ægritudinem, & per diffinitionem calidi cognosco frigidum, nam & alterum contrariorum habet rationem priuatiui, vt manifestabitur in lib. 10. cum igitur scientia practica sit potentia actiuæ, eodem modo est principium operandi quo est principium cognoscendi, sed vt diximus est principium cognoscendi opposita, licet non equaliter, ergo est principium operandi opposita, eo quidem ordine quo est ostensiuæ oppositorum, ita, scilicet quod primo est principium operandi eius quod est vt habitus, posterius autem eius quod est vt priuatio, vnde medicus per scientiam medicinæ per se & primo est

est operatiuus sanitatis, posterius autem quod dicit Aristot.
secundum accidens est operatiuus ægritudinis, & memento
vt exponas ly secundum accidens per posterius, vel de secun-
da intentione, vel vt in paucioribus. nam si sumatur ly se-
cundum accidens in suo proprio significato, non distingue-
rentur potentia rationales ab irrationalibus, quoniam vt
dicemus, potentia irrationalis est principium operandi op-
posita, sed vnum quidem per se, alterum autem per accidens,
id est non secundum naturam suam, quia vero forma & qua-
litates naturales est principium agendi in agente naturali,
eo modo est principium agendi quo est principium essendi,
sed est principium essendi tantum secundum vnum esse, vt
patet in calore in igne, qui dat igni tantum esse calidum, nã
si daret esse calidum & esse frigidum, eidem inessent simul
contraria inesse reali, quod est impossibile, ergo est princi-
pium agendi tantum vnum, & non opposita nisi meræ per
accidens, puta calor ignis tantum calefacit, quod autem in-
frigidet id non facit in quantum calor, sed in quantum rare-
facit, & per rarefactionem aperiuntur porri, quibus apertis
datur frigidus aditus ingrediendi corpus & ipsum infrigidan-
di, hæc igitur infrigidatio est per se à frigido ingrediente, &
per accidens à calore rarefaciente, patet igitur ratio quare
potentia rationalis potest in opposita per se licet non æque
primo, irrationalis autem est determinata ad vnum, quæ au-
tem sit prima potentia rationalis, & per quot differat ratio-
nalis ab irrationali, & quomodo potest in opposita pro eo-
dem instanti determinauimus in quæst. nostris metaphys.

Quæ ad tertium, aduerte, quod circa hoc duplex fuit
antiq. opin. prima quæ fuit Megaricorum tenet non dari po-
tentiam ante actum, ita quod nullum agens habet poten-
tiam agendi, nisi dum actu agit, & cum cessat agere non re-
tinet potentiam agendi. secunda est contraria primæ, tenet
enim potentiam ita præcedere actum, quod stat, potentia
etiam quod nunquam sequatur actus, ex consequenti secun-
dum hanc opin. omnia sunt possibile. primo igitur pertra-
ctabitur prima opin. deinde secunda. Aduerte igitur, quod
licet Arist. non adducat rationem motiuam huius opin. ta-
men vt colligitur ex Alb. in 9. Metaph. tract. 2. capite primo,

multiplici ratione videtur processisse, primo quia dictum est in 5. lib. causam & effectum esse simul, sed potentia actiua & actus eius vt visus & videre se habent vt causa & effectus, ergo potentia non præcedit actum, secundo idem eodem modo se habens semper facit idem, aut nunquam, cum igitur potentia actiua sit à forma, & forma sit natura, quæ eodẽ modo se habet, aut semper erit agens, aut nunquam, & quocumque modo dicatur sequitur potentiam nõ separari ab actu.

Secundum B. Th. ratio huius opinionis videtur processisse ex hoc, q̃ opinabantur omnia ex necessitate euenire per connexionem causarum, vt dictum est in libro 6. ex quo sequitur quod si aliqua actu non eueniunt, non possunt euenire ex consequenti nulla potentia præcedit actum suum.

Auerroës autem in cõm. 7. arbitrabatur opinionem hanc coincidere cum opinione modernorum, & intendit per modernos loquentes in lego, isti dicunt quod est vnum agens omnia entia sine medio, scilicet Deus, ex hoc dicto inquit Comment. contingit eis vt nullum ens habeat actionem propriam naturaliter, & cū entia nõ habuerint actiones proprias, nõ habebūt essentias proprias, actiones. n. non diuersantur nisi per essentias diuersas, & ista opinio est valde erronea & c.

Quid veritatis habeat hæc sententia Comment. manifestabitur, postquam fuerit reprobata opinio Megaricorum.

Aduerte igitur, q̃ Arist. multipliciter arguit contra eam.

Primo, si potentia non est nisi quando actus est, ergo non remanet aliqua ars in artifice, quando desinit agere secundum artem, & sic ædificator deperdit artem quando non ædificat, vel postquam ædificauit, sed hoc est falsum, quia ars & scientia non deperduntur, nisi aut obliuione, aut ægritudine, aut longo tempore in quo non sit vsus artis, sed nullum horum contingit in proposito. Supponimus enim q̃ Socrates heri ædificauerit, & hodie cesseret, & cras iterum ædificet, & sit sanus. ergo & c. Præterea, cum artifex non possit operari secundum artem, nisi acquirat artem, si quando non operatur non habet artem, & quando iterum operatur habet artem, ergo de nouo acquirit artem, aut disciplina, aut propria inuentione hoc autem est stultum dicere, nam si tantum per horam cesseret ab operatione, eadem hora deperderet

& acquireret artem, quod est implicans contradictionem.

Secundo, cum calidum & frigidum, & aliæ qualitates sensibiles sint potentiaæ actiuæ, sunt enim immutatiuæ sensus si potentia non est sine actu, sequitur nihil esse calidum vel frigidum, vel dulce, vel amarum, nisi dum actu sentitur, quod est vanum dicere, & est concordare cum Pythag. contra quæ disputauimus in 4. lib. tract. 2. cap. 3. qui ponebat nihil esse verum, nisi vt cadebat sub sensu vel opinione.

Tertio, sequitur quod animal non habeat sensum quando actu non sentit, ex cōsequenti, si cessat videre vel audire, cum sit aptum videre vel audire, erit priuatum visu vel auditu, & sic continget quod in vna die fiet multoties cæcum & surdū, & iterum videns & audiens, quæ omnia sunt absurda,

Quarto, sequitur quod id quod actu non est sit impossibile fieri, & sic auferetur omnis motus, omnis generatio, omnis mutatio, nam secundum hanc opinionem, quod actu nō est, aut sit, non habet potentiam vt sit, vel fiat, quod non habet potentiam non potest esse vel fieri, quod non potest esse vel fieri, est impossibile fieri, ergo si Socrates infirmatur, est impossibile vt sanetur, & si sedet, est impossibile vt postea stet, qm̄ dum sedet secundum hanc opinionem, non habet potentiam vt stet, cum igitur hæc sint absurda tenendum est actum & potentiam esse diuersa, ita quod non inconuenit aliquid posse esse, quod tamen nondum est, & aliquid esse quod potest desinere esse, & hoc tam in prædicamento substantiaæ quàm in prædicamento accidentium, nam qui nō incedit, & qui non est albus potest esse albus, & incedit potest desinere ab incessu, aliter nō esset in rerum natura ens gñabile & corruptibile, & penitus auferetur motus & mutatio.

Et quoniam Arist. contra Megaricos tenet potentiam & actum esse diuersa & ab inuicem separabilia, ideo declarare intendit quid sit esse in potentia, & quid esse actu. Aduerte igitur secundum Arist. illud esse in potentia, vel esse possibile, quo posito in actu nullum sequitur impossibile, vt si dicas, aqua potest esse calida, quia fit calida non sequitur aliquid impossibile, si autē sequitur impossibile illud ad quod sequitur, non erat possibile, nec potentiam habebat, verbigratia homo non potest esse lapis. quoniam ad hoc sequitur

propriam differentiam esse separabilem ab eo, cuius est, quod est impossibile.

Ut autem scias quid sit rem esse actū, aduerte, quod ly actus primo impositum est à motu tanquam à magis noto secundum sensum, unde motum dicimus esse actum mobilis, & moueri non attribuitur, nisi existentibus, deinde impositum est ad significandum terminum motus, terminus autem motus est forma acquisita, qua res perficitur, & complementum recipit, & sic quantum ad id, cui nomen imponitur, actus significat formam apud physicum, quæ est terminus motus, siue mutationis apud metaphysicum formam abstractam à materia, quæ est veræ, & substantialiter perfectio. Hoc prænotato, dico, quod rem esse actū est rem existere, unde sicut moueri non verificatur, nisi de existente, sic nec esse actū, & quoniam quæ sunt in potentia, ut sic non existunt, ideo non verificatur de eis moueri, nec esse actū, licet de eis verificentur alia prædicata, puta entia in potentia sunt intelligibilia, opinabilia, vel concupiscibilia, pro quanto, scilicet habent esse in anima, licet non existant ad extra, ut rosa in hyeme scibilis, & desiderabilis est, reprobata igitur opin. Megaricorum soluenda sunt argumenta inducta, ut motiua positionis suæ.

Ad primum dico, quod simultas causæ, & effectus non verificatur, nisi de causa in actu, & effectū in actu, unde & Arist. in 5. lib. in cap. de causis, dixit quod non est necesse causam in potentia, & effectum, scilicet in actu esse simul, & nos iam id declarauimus in eodem cap.

Ad secundum dico, quod argumentum nullam habet apparentiam in potentia actiua rationali, quoniam non est natura, nec agit modo naturæ, scilicet ex necessitate, sed libere, in potentia vero actiua naturali, licet habeat aliquam apparentiam, quia est determinata ad vnum, & ex necessitate agit, tamen non concludit, quoniam vltra potentiam actiuam requiritur passum sufficienter approximatum, & dispositio qua sit aptum recipere ab agente, & quoniam non semper seruatur debita approximatio, nec debita dispositio non inconuenit potentiam actiuam præcedere actum.

Ad tertium negatur, quod omnia ex necessitate eueniant, &

iam id reprobauimus in lib. 8. cap. 3.

Quantum ad dictum Comment. aduerte, quòd sicut lex Maurorum tenet omnia entia processisse à primo ente per creationem, & vt sic sine causa media, sic etiam tenet catholica fides, tamen ex hoc non sequitur entia creata non prius et actionibus proprijs naturalibus, & essentijs proprijs, quoniam primum agens creans indidit cuilibet naturę proprias potentias, quibus exercent proprias operationes naturales, vnde dictum Comment. nil concludit contra Christianam veritatem.

Secunda opin. contraria Megaricis tenet, quòd non solum potentia potest præcedere actum, sed quòd stat potentia, etiam quòd nunquam sequatur actus, ita quòd secundum hanc opin. omnia sunt possibilia, contra hanc igitur sic intendit Arist. multa sunt ad quę si ponantur sequitur impossibile, vt si ponatur diāmetrum esse simētrum apud geometram, sequitur esse proportionem numeri ad vnitatem, vel numeri ad numerum inter diāmetrum ad costā quadrati, quod est impossibile, ergo non omnia sunt possibilia, probatur consequentia ex diffinitione possibilis, illud enim est possibile, ad quod nullum sequitur impossibile, cum igitur hæc opinio sit falsa, tenenda est media via, quę est hæc, eorū quę non sunt, quędam erunt, vt rosa in vere, ortus solis crastinus quędam non erunt, & hæc sunt duplicia, quędam nō erunt, licet eis nō repugnet esse, vt Socrater non erit diues, licet vt homo possit esse diues, quędam non erunt, quia eis repugnat esse, vt homo non erit asinus, nec diāmeter non erit simeter. Ex his quę sunt in primo, & in secundo gradu dicuntur habere potentiam, & esse possibilia, quę autem sunt in tertio gradu nullam habent potentiam, neque sunt possibilia, immo impossibilia.

Et aduerte, quòd ex diffinitione possibilis non solum patet falsitas prædictę opinionis, sed etiam veritas trium regularum, quę formantur de possibili, & impossibili, quomodo se habent in vera consequentia.

Prima regula, si alicuius consequentię antecedens est possibile, necesse est consequens esse possibile, probatur, quoniam si consequens esset impossibile, antecedens nō esset possibile.

ex diffinitione possibilis. Dictum est enim, q̄ possibile est, ad quod non sequitur impossibile, si ergo ad antecedens possibile sequitur consequens impossibile, definit antecedens esse possibile. & aduerte, q̄ ly possibile in consequenti sumitur non pro contingentis, sed ut opponitur impossibili, nihil enim prohibet antecedens esse possibile, & consequens necessarium, ut hic, si Socrates scribit, Socrates est homo.

Secunda, si consequens est impossibile antecedens est impossibile, hæc patet ex præcedenti, quoniam ex possibili nõ sequitur impossibile.

Tertia, si antecedens est impossibile non est necesse consequens esse impossibile, sed potest esse necessarium, ut hic, si Socrates est asinus, Socrates est animal, & potest esse contingens, ut hic, si Socrates est asinus, Socrates mouetur. Hæc pro nunc dicta sint de consequentia possibilium, & impossibilium, quomodo autem possis saluare tex. philosophi. & quomodo debeas ipsum exponere, cum dicit, sed erat primũ impossibile, ergo & secundũ vide in q. nostris metaph. in lib. 8. in illa q. si in consequentia possibilium, & impossibilium. antecedens, & consequens debent esse similia.

Quantum ad quartum, aduerte, q̄ ex potentijs quædam sunt nobis à natura, ut potentia sensitiua, & intellectus, & vegetatiua, & motiua secundum locum, quædam fiunt in nobis ex consuetudine, & frequentatis consimilibus actibus, ut habitus morales, siue boni, siue mali, quædam ex doctrina, siue ex propria inuentione, ut artes practicae, sicut ars cytharizandi, & ars medendi, quæ longo tempore, & experientia acquiruntur, quæ sunt nobis à natura præcedunt actus suos, sicut ea quæ sunt ad finem præcedunt finem. Manifestum est enim, q̄ si debeo videre necessario præceditur visus &c. quæ autem fiunt consuetudine, aut doctrina, aut inuentione necessario subsequuntur actum, se habent enim ad actus suos, sicut effectus ad causam, causa autem, ut causa præcedit id, cuius est causa, vnde in his necesse est nos præexercitari frequentatis actibus, utpote generatiuis consimilis habitus, ut declarat Arist. in lib. 2. Ethic. vnde inquit in principio lib. duplici existente virtute hac quidem intellectualem, hac autem moralem, ea quidem quæ intellectualis plurimum ex doctrina

&rina habet, & generationem, & augmentum, ideo experimen-
 to indiget, & tempore, moralis vero ex maiori, id est ex
 consuetudine .

Quantum ad primum, aduerte, q̄ cum potentia irrationali
 sit actiua solum vnius . rationalis autem oppositorum ir-
 rationalis reducitur ad actum sola appropinquatione passi
 ita dispositi, q̄ possit pati ab agente, & agens possit agere in
 ipsum remoto omni impedimento extrinseco . Quod dico,
 quoniam si ignis propinquus esset combustibili sicco, & in-
 flammabili, & cum superinfunderetur aqua non sequeretur
 combustio : rationalis autem cum sit actiua contrariorum
 non reducitur ad actum sola propinquatione passiui, aliter
 produceret contraria in passiuo, puta medicus propinquans
 Socrati faceret ipsum sanum, & infirmum . cum igitur sit ex
 se indeterminata ad agendum hoc, vel illud oppositum, ne-
 cesse est vltra propinquationem passiui, & remotionem im-
 pedimentorum, quodd determinetur ab aliquo : hoc autem
 erit appetitus, siue electio, quod enim appetimus, aut eligi-
 mus illud agimus, si sumus ita dispositi, & passiuum ita se ha-
 bet, quod possumus exire in actum . Ex his trahuntur tria
 corollaria .

Primum est, actio potentie irrationalis est necessaria, &
 naturalis, ideo neque meritum, neque demeritum habet, ac-
 tio autem potentie rationalis libera est, ideo vt sic, laudabi-
 lis, & vituperabilis est .

Secundum est, sicut potentia irrationalis necessario agit,
 quando stat debita appropinquatio, & debita dispositio in
 passo, sic quando potentia rationalis determinata est ab ap-
 petitu ad alterum oppositum stante illa determinatione,
 & debita appropinquatione, & dispositione necessario agit
 illud oppositum, ad quod determinata est, nec est necesse ad-
 dere nullo extrinseco prohibente, quoniam supponimus
 agens sufficiens ad agendum pro tali tempore, & taliter . Si-
 militer patiens ad patiendum . si autem esset exterius prohi-
 bens non esset sufficiens ad agendum, nec patiens ad patien-
 dum, durante pro tali tpe extrinseco impediante, quare &c .

Tertium est, licet potentia rationalis in se considerata, &
 vt libera sit simul contrariorum, possum enim per volunta-
 tem

tem velle moueri, & velle quiescere, tamen quia non exit in actum, nisi determinata ad hoc, vel illud oppositum non sequitur, q̃ possit simul agere opposita, quia dum est sub hoc opposito repugnat sibi esse sub alio, & hoc est quod solet dici potentiam rationalem esse oppositorum pro eodem nūc, & diuisim, & id ad plenum pertractabitur in quæst. metaph. quando disputabitur, si potentiz rationales possunt in opposita pro eodem instanti. Hæc de cap. 2. dicta sint.

C A P V T I I I.

IN tertio cap. habemus tractare de actu. pro cuius notitia, tria declaranda sunt.

Primo, quid sit actus.

Secundo, quomodo diuersimode dicitur actus.

Tertio, quando, & quō aliquid est in potentia ad actum.

Quantum ad primum, aduerte, q̃ cum actus sit de terminis vniuersalissimis, & primis simplicibus non potest propriè diffiniri, cum vera diffinitio debeat dari per priora. ita tamen q̃ sit status in diffinitionibus. & ideo Arist. manifestat actum non diffiniendo, sed inductione sumpta à dissimilitudine, quam habet ad potentiam. & hæc est tutissima via, quoniam actus, & potentia sunt relatiua, & relatiua per se inuicem manifestantur, cuius signum est, q̃ si diffiniuntur, per se inuicem diffiniuntur. intendens igitur declarare quid sit actus, & non potens ipsum definire, putat se satis fecisse. si declarauerit quid sit esse actu. dicit igitur actus est, quando res existit. non tamen eo modo, quo est quando est in potentia. Dicimus. n. Mercurium esse in potentia in ligno antequā figuretur. postquam autem figuratus est dicitur esse in actu, & pars, siue medietas est in potentia in toto ante diuisionē: postquam autem est separata à toto dicitur esse actu, & sciēs dicitur esse speculans in potentia. Quando autem considerat dicitur esse speculans actu. & breuiter esse actu, & esse in potentia est, sicut esse ædificantem, & ædificatorem, vigilan-tem, & dormientem, videntem, & claudentem oculos, formatum, & non formatum, siue arte, siue natura. A dissimilitudine igitur sumpta inter potentiam, & actum sic manifestum

stum sit, quid sit actus, vel saltem esse actu.

Quantum ad secundum, aduerte, q̄ actus dicitur de forma, quæ actuatur, & perficit id cuius est forma, & de motu, siue operatione, quæ est à potentia actiua, siue operatiua, vt intelligere est actus intellectus videre visus &c. Et hæc diuersitas actus manifestatur duplici proportionē. nam actus pro forma manifestatur per proportionē, quæ est, vt hoc in hoc. v. g. sicut se habet anima ad corpus, ita visus ad oculum, sed anima est in corpore, vt actus, & perfectio eius. ergo similiter visus in oculo. Actus autem pro motu, vel operatione manifestatur per proportionem, vt hoc ad hoc, v. g. sicut se habet intellectus ad intelligendum, ita visus ad videndum, sed intellectus ordinatur ad intelligendum, vt ad finem, & perfectionem suam. ergo visus ad videndum.

Et aduerte, q̄ hæc diuersitas actus coincidit cum ea, quā posuit Arist. in 2. de Anima, tex. 5. cum dicit. Hic autem sicut scientia, alius autem sicut considerare &c. & scientia quidem est actus primus, considerare autem actus secundus.

Præterea, aduerte, q̄ sicut diuersimode dicitur actus, ita & esse actu. nam quædam secundum se tota exeunt de potentia ad actum, sicut entia generabilia permanentia. Quædā autem ita exeunt in actum, quod semper habent actum admixtum potentie, sicut sunt infinitum, & vacuum; & entia successiua, vt manus, & tempus, & hanc diuersitatem iam habes declaratam ab Arist. in 3. phys. tex. 57. ideo recurre illuc, & est famosa distinctio.

Quantum ad tertium, aduerte, q̄ aliquid est in potentia ad actum dupliciter. scilicet in potentia remota, & in potentia propinqua, & hæc duo differunt in duobus.

Primo, q̄ est in potentia remota non transfertur ad actum, nisi per multas transmutationes, vt terra est in potentia remota, vt ex ea fiat lignum, quoniam per multas transmutationes fit transitus antequam recipiatur forma ligni in materia terræ. Quod autem est in potentia propinqua nullo extrinseco, nec intrinseco prohibente vnica actione transfertur à potentia ad actum, vt lateres sunt in potentia propinqua ad formam domus, & qui vnica medicina potest curari est in potentia propinqua ad sanitatem, nā ædificator sola
&

& ordinata aggregatione laterum facit domum, & medicus in tali casu vnius medicaminis administratione sanat infirmum.

Secundo, quod sit ex aliquo existente in potentia remota non denominatur ex eo, vt quia statua ærea fit ex aqua, vt ex potentia remota, supposito quod aqua sit materia remota omnium liquabilium non dicitur huiusmodi statua esse aqua, neque aqua, & arca, licet fiat ex terra per potentiam remotam, prout signum fit ex terra non dicitur esse terra, neque terrea. Quod autem sit ex aliquo existente in potentia propinqua, denominatur ex eo, & recipit illius prædicationem in concreto. non autem in abstracto, vt statua est ærea, non autem æs, & arca est lignea, non autem lignum, & si terra fieret immediate ex aqua posset dici aquea, non autem aqua, idem dico de aqua respectu aëris, & de aëre respectu ignis. Ignis autem si esset prima materia, vt ponebant aliqui antiquorum non denominaretur ab aliquo priori.

Et aduerte, quod huiusmodi prædictio assimilatur prædicationi qua prædicatur forma accidentalis de subiecto. nam sicut ista est vera, homo est musicus, siue albus. non tamen est musica, siue albedo. sic ista est vera, arca est lignea, non tamen lignum. Differt tamen vtraque denominatio in hoc, quod in denominatione, quæ fit ab accidente vltimum, id est subiectum est substantia deferens, siue sustentans accidens. In denominatione autem, quæ fit à materia, id est ab eo, ex quo aliquid fit, & quod est quædam natura, siue hoc aliquid, vt lignum ex terra: vltimum, scilicet ad quod fit resolutio dicitur materia, scilicet prima, siue prima substantia materialis, ex qua alia fiunt, & de qua aliud non dicitur denominatiuæ cum non fiat ex priori, vt dictum est igne. si ex eo fierent omnia, sicut putauit Heraclitus. patet igitur, quomodo aliquid est in potentia ad actum potentia remota, & potentia propinqua. verum quia esse in potentia remota est esse in potentia secundum quid, & esse in potentia propinqua est esse in potentia simpliciter, ideo Arist. relicta potentia remota, pertractauit de potentia propinqua.

Hæc de 3. cap. dicta sunt.

Caput

CAPVT IIII.

IN quarto cap. agendum est de actu, & potentia comparatiuæ, Quæ comparatio est circa tria.

Primo, circa prius, & posterius.

Secundo, circa bonum, & malum.

Tertio, circa verum, & falsum.

Quantum ad primum, aduerte, quodd cum prius dicatur multis modis, vt declaratum est in libro quinto, pro nunc accipiemus tres modos, scilicet prius ratione, prius tempore, & prius substantia, id est perfectione. Queritur ergo, si actus est prior potentia, ratione, tempore, & perfectione.

Ad primum istorum respondetur absolutæ quod sic, quoniam diffinitum alicuius est prius ea ratione & noticia, necesse est enim diffinitionem dari per priora & notiora, sed potentia diffinitur per actum, siue in ordine ad actum, nam potens actiue est illud quod potest agere, vt ædificator, qui potest ædificare & speculator, qui potest speculari, possibile autem passiuæ est quod potest esse vel fieri actu vt visibile quod potest videri generabile quod potest generari, ergo actus est prior ratione, & noticia quam potentia, & confirmatur ex eo quod supra in tex. 2. diffiniuit potentiam actiuam per hoc quod est esse principium transmutandi aliud, & passiuam per hoc quod est esse principium transmutandi ab alio, & ly transmutandi dicit actum, vt patet. ergo &c.

Quando autem inuestigauit quid sit actus non diffiniuit ipsum per potentiam, sed inductione manifestauit ipsum, vt patuit supra. Ex ijs ergo constat actum esse priorem potentia ratione & noticia.

Ad secundum respondetur cum duplici distinctione.

Prima, est potentiarum alia passiuæ, alia actiuæ: Si loquimur de passiuæ, potest esse prior, & posterior actu, prior quidem quantum ad idem numero, posterior autem quantum ad idem spẽ, nam omnẽ procedens de potentia ad actum, sicut sunt omnia generabilia, prius est in potentia materiæ quàm sit actu, vt rosa generanda in vere, prius est in potentia quàm generetur actu. Quod autem est in potentia non potest seipsum

sum ad actum reducere, nec reduci ab aliquo existente in tali potentia, agit enim vnumquodque in quantum est actu, ergo necesse est vt aliquod idem specie præcedat, à quo quod est in potentia reducatur ad actum, pura quod hic homo generandus ab alio homine præexistente generetur, & id quidem constat in factionibus vniuocis, in quibus vnumquodque fit à sibi simili in specie, vt declaratum est in libro 7. in factionibus autem non vniuocis, sufficit quod præcedat aliquod existens actu tale, non formaliter, sed virtualiter, qualis est effectus producendus, vt quando generatur calor & rana à sole, continet enim sol calorem & naturam ranæ virtualiter in sua forma quæ est forma vniuersalis, in qua eminenter continentur omnes formæ generabilium præter animam rationalem.

Si loquimur de potentia actiua, potest esse prior, & posterior actu, nam cū hæc sit duplex .s. ingenita & acquisita exercitio disciplinæ aut consuetudine, vt declarauimus supra. Quæ est ingenita, vt intellectus & sensus & alię potentię animæ, est prior actu, constat enim quod antequam intelligam, aut sentiam, necesse est me habere intellectum & sensum, quæ autem est acquisita exercitio necessario posterior actu, nam vt diximus supra frequentati actus sunt generatiui huiusmodi potentię, sicut cytharizando fit cytharedus, & fabricando efficitur faber, ergo actus sunt priores potentia, sicut causa est prior effectui.

Sed aduerte, q̃ hic solet fieri syllogismus sophisticus quo videtur probari esse impossibile, actum præcedere potētiā actiuam, & arguitur sic, Quod facit opera artis habet artem, sed per te qui adiscit artem, facit opera artis. ergo qui adiscit artem habet artem, quod est repugnans veritati, nam si habet non adiscit, & si adiscit nondum habet, etenim adiscere est motus acquisitiuus, & non esse acquisitum.

Ad hoc respondetur, q̃ qui adiscit artem habet principia naturalia sicut quædā semina ex quibus facit aliquod opus quale fit ab arte, licet valde imperfectum, postquam autem didicit artem, operatur perfecte secundum arte, ita quod in huiusmodi potentijs verum est dicere actum præcedere, & subsequi potentiam, nam actus imperfectus est præcedens,

&

& paulatim causatius potentia, perfectus autem est subsequens, ex ijs respondendo ad argumentum, negatur maior intellecta de actu imperfecto, ex consequenti non potest concludi quod adiscens artem habeat artem, potest etiam concedi quod adiscens artem habet artem imperfecte saltem quo ad principia, sicut quod calefit habet calorem, sed imperfecte, & quod mouetur, secundum aliquid motum est, ut probatum est in 6. phys. & tunc non inconuenit adiscentem artem, habere artem, non enim adiscit, ut habeat imperfectam, sed perfectam.

Ad tertium, respondetur absolute, quod actus est prior substantia, id est perfectione quam potentia, & id quidem manifestatur in rebus generabilibus, quæ procedunt de potentia ad actum, quæ aliquando sunt, aliquando non sunt. Arguitur igitur primo sic. Quæ sunt posteriora generatione sunt priora perfectione, id est perfectiora, nam ut patet natura in ijs generabilibus semper procedit ab imperfecto ad perfectum, ut producit prius herbam, deinde granum, prius generatur sperma, deinde animal, prius est puer, deinde vir, &c. Sed in eodem numero in his generabilibus, actus est posterior generatione & tempore, ut declaratum est in præcedentibus, ergo &c. Secundo finis est prior, secundum perfectionem ijs quæ sunt ad finem, nam quæ sunt ad finem sumunt bonitatem & perfectionem à fine, & non econuerso, sed actus est finis potentia, tam actiue, quam passiue. Actiue quidem ut ars ædificatiua ordinatur ad ædificandum, visus ad videndum, intellectus ad intelligendum, non enim intelligimus, ut habeamus intellectum, sed econuerso. Passiue autem ut materiam dicimus ordinari ad formam, & elementa ad formam mixti, ergo &c. Confirmatur propositum præcipue quo ad potentiam actiuam duplici signo. Primo docentes arbitrantur se consecutos finem & perfectionem laboris sui, quando ostendunt discipulos sic operantes, sicut ipsi operantur, ergo actus est finis & perfectio, ad quam ordinatur potentia actiua docentis. Secundo, si actus non esset finis potentia ex consequenti perfectior non esset differentia inter scientem dormientem, & scientem speculantem, nec posse discerni ignorans à sciente, unde, ut inquit Arist.

Paxonas stultus erit Mercurius, quasi dicat, nō cognoscitur differentia inter stultum & sapientem, nisi ex actu, ergo &c.

Tu tamen aduerte, quōd in aliquibus potentijs actiuis, finis est ipsa operatio, vt finis visus est videre, intellectus intelligere, & auditus audire, in aliquibus autem finis non est sola operatio, sed aliquod operatum, vt finis pictoris non est solum depingere, sed imago depicta & idem contingit in ceteris artibus mechanicis. Differentia autem harum potentialiarum stat in hoc, quōd operationes quæ sunt fines potentialiarum remanent subiectiue in operante, & non transeunt in subiectum exterius, stat enim videre in vidente, & intelligere in intelligente, operationes autem ultra quas sunt operata, sunt subiectiue in operato, sicut motus in mobili, vt ædificatio, in ædificato, & contextio in contexto, primæ dicuntur actiones immanentes. secundæ vero transeunt. Item primæ sunt perfectiones operantis quia remanent in eo. secundæ autem sunt perfectiones operari vel eius circa quod sunt, quoniam cum exeant ab operante, & recipiantur in operato perficiunt ipsum. Ex ijs sequitur felicitatem quæ perficit felicitatem. esse actionem immanentem vnde & in 10. Eth. concludit Aristoteles felicitatem esse speculationem circa diuina, constat autem speculationem esse in speculante. ergo &c.

Postquam manifestauimus actum esse priorem secundum perfectionem ipsa potentia, tam actiua quam passiuā in his generabilibus, restat vt declarem idem in rebus incorruptibilibus & sempiternis, & necessarijs, comparando ea his corruptibilibus, & antequam probemus propositum ponitur hoc fundamentum, omne sempiternum & necessarium est actus & non est in potentia, scilicet passiuā, & quidem quod sit actus probatur, quoniā non quandoque est, & quandoque non est ex diffinitione sempiterni & necessarij. Quōd autem non sit in potentia passiuā, probatur, omnis potentia passiuā est potentia contradictionis, id est qua potest res esse & non esse, nam à potentia passiuā dicitur possibile, possibile autem opponitur non possibili, non possibile est quod nunquam potest esse, ergo per oppositum possibile est quod aliquando potest esse & aliquando non esse, ex consequen-

ti passiuæ potētiæ à qua dicitur huiusmodi possibile est principium quo res potest esse & non esse, sed nullum sempiternum, neque necessarium potest esse, & non esse, aliter esset corruptibile quod repugnat sempiterno & necessario, omne enim corruptibile, & temporale, & contingens est inquantū corruptibile, ergo nullum sempiternum, neque necessarium est in potentia passiuæ eo modo quo sempiternum & incorruptibile est, quod ideo dico, quia stat aliquod esse incorruptibile & immutabile secundum substantiam, quod tamen secundum aliquod accidens, puta secundum locum, secundum lumen, non est immutabile, & ut sic est in potentia passiuæ, puta luna licet non sit mutabilis ab esse ad non esse, & e converso secundum substantiam, est tamen mutabilis, secundum locum ex motu locali, & secundum lumen quod recipit à sole. Ex ijs sequitur entia necessaria, non esse in potentia passiuæ, quia non possunt non esse, & si possent non esse, aliquando non essent, quia essent corruptibilia, & si aliquando non essent, omnia entia deficerent, constat enim quod corruptibilia non semper sunt, cum ergo omnia entia sint necessaria, aut contingentia remotis necessarijs reliqua tollerentur, similiter si aliquis motus est sempiternus, & aliquod motum sempiternum, non sunt in potentia passiuæ, quoniam motus ille semper actu est, & illud motum semper actu mouetur, cum hoc tamen stat quod est potentia ad diuersa ubi, & ut sic habet potentiam passiuam quæ est materia non quidem generabilis, sed localis, ut declarauimus in lib. 8. cap. 3. & quoniam motus cœlesti est huiusmodi, & cœlum est sempiternum, ideo secundum Arist. sol & alia semper agunt in hæc inferiora, & causant generationem æternam, ut probauit in 2. de generatione, nec est timendum cœlum quiescere, quoniam non est in eo potentia contradictionis. i. ad esse & ad non esse, ut in ijs corruptibilibus; nec intelligentiæ in mouendo laborant, cum sint immateriales inalterabiles, & incorruptibiles. Labor enim non prouenit motori, nisi quia ex natura sua est in potentia contradictionis, & quoniam vnitur corpori corruptibili, ut de anima mouente animal, nec mirum si cœlum semper agit in hæc inferiora, cum videamus & elementa quæ sunt corruptibilia semper actu

agere, vt patet de igne calefaciente & terra fructificante appropinquato passo, & remota in dispositione. Patet igitur ex dictis sempiterna & incorruptibilia esse actus, & non in potentia passiuā, & per oppositum patet hæc corruptibilia esse in potentia, pro quanto possunt esse & non esse. Stantibus his sic arguitur sempiterna sunt priora secundum perfectionem his corruptibilibus & de hac nullus dubitat, sed sempiterna se habent ad corruptibilia sicut actus ad potentiam, vt declaratum est, ergo signum est, actum esse priorem potentia secundum perfectionem, ex quo patet error Platonis, qui in genere scientifico, ponebant scientiam abstractā quam dicebat per se scientiam, esse quid perfectissimum, nā cum consideratio comparatur ad scientiam, sicut actus ad potentiam actiuā & operatio sit perfectior, quoniam est finis, vt diximus supra, ipsius potentia, patet quod scientia abstracta si daretur non esset quid perfectissimum, sed consideratio circa ipsam. Hæc de primo principali dicta sint.

Quantum ad secundum principale, aduerte, quod actu potest considerari in bonis & in malis, tam moralibus quā naturalibus, in moralibus quidem vt iuste agere & iniuste agere, in naturalibus autem, vt sanari & infirmari. Si loquimur in bonis, actus est melior potentia. nam cum actu bono, non admiscetur malum, quoniam actus bonus est bonus simpliciter, cum potentia vero ad bonum admiscetur malū, quoniam qui potest esse virtuosus potest esse viciosus, & potens sanari potest infirmari, ergo potentia in bonis, est bona secundum quid, cum igitur bonum simpliciter sit melius bono secundum quid, patet actum in bonis esse meliorem potentia. Si autem loquimur in malis, actus est prior potentia, quoniam cum actu malo non admiscetur bonum, cum potentia vero ad malum, admiscetur bonum quoniam qui potest esse malus potest esse bonus, est ergo actus malus simpliciter malus, potentia vero ad malum mala secundum quid. ergo in malis actus est peior potentia.

Ex his sequitur, malum non esse aliquid præter res bonas, nam malum secundum actum est posterius quā potentia, quia magis elongatum à perfectione naturæ, & ideo peius est & indignus quā potentia, sed potentia non est aliquid præter

præter res, eadem enim natura rei potest in bonum & in malum, ut quatuor humores possunt adæquari & inadæquari, ergo nec malum quod sequitur potentiam.

Ex ijs etiam sequitur, quod in æternis & in corruptibilibus, non est malum, neque peccatum, neque corruptio. Iste enim sunt species mali & probatur sic. Malum secundum actum subsequitur potentiam, ut prædictum est, sed potentia non est in æternis, quoniam semper sunt actu, ut visum est supra. ergo &c.

Sed contra, in luna est eclipsis, id est verus defectus luminis & luna est æterna & incorruptibilis, ergo &c. Præterea secundum astronomos quædam stellæ dicuntur fortunate quædam infortunate, ergo male.

Ad primum dico, propositionem philosophi intelligendam esse quo ad eorum substantiam & non quo ad accidentia, ut est ubi & lumen, nam ut sic luna non est æterna & incorruptibilis, nam circa huiusmodi non se habeat semper uniformiter, unde non inconuenit in ijs quæ sunt æterna secundum substantiam inueniri malum secundum accidens, unde & Theo. admittit malum actum liberum inseparatis, ut auersionem à conditore.

Ad secundum, dico, secundum Cōment. in cōm. 19. illud non esse admittendum, sed tantum scire possumus de eis, quod quædam sunt meliores quibusdam. Hoc inuenitur in abso- lutis à motu, id est in intelligentijs, ut declarabitur in lib. 12. super tex. 44. potest etiam admitti dictum astronomi in hoc sensu, quod quædam stellæ sunt infortunate non secundum se, sed quo ad nos quia habēt influxum nocium super nos, ut quando causant pestem, aut nimiam siccitatem &c. Hæc de secundo principali dicta sint.

Quantum ad tertium, principale duo manifestanda sunt. Primo, quod vnumquodque intelligitur in quantum est actu, & non in quantum est in potentia.

Secundo, quod verum & falsum consistit circa actum, & non circa potentiam.

Aduerte pro euidentiā primi, quod considerans Ariston. certitudinem cognitionis inueniri maxime in mathemati- cis declarat propositum signo sumpto à mathematicis qui

per inuentionem cognoscunt descriptiones geometricas, puta quod trigonum habet tres æquales duobus rectis, & id quidem cognoscunt per diuisionem actualement, protrahentes vnum latus, & constituentes angulum extrinsecum, quo constituto statim apparet quod quærunt, ante protractionem vero, id eo latebat quoniam angulus exterior, erat tantum in potentia. Adducit etiam exemplum de angulo recto constituto in semicirculo. Qualiter autem hæc duæ conclusiones demonstrentur, vide B. Th. in hoc 9. lib. super tex. 20. Manifestum est igitur quod cum aliquid reducitur de potentia ad actum, tunc intelligitur, & id conueniens est, quoniam & intelligentia .i. intelligere est actus ideo quæ intelliguntur oportet esse actum, vtrum autem sit necesse omne quod debet sciri, siue per inuentionem, siue per doctrinam esse actum, iam determinauimus in nono huius scientiæ in questionibus metaphysicalibus.

Pro euidencia secundi, aduerte, quod verum & falsum inueniuntur in rebus compositis, & consistit in compositione & diuisione intellectus cui si correspondet compositio & diuisione in re erit propositio vera, vt hic, Socrates est homo, & Socrates non est asinus. Si autem aliter sit in re propositio erit falsa, vt hic Socrates est asinus, & Socrates non est homo, & quoniam compositio & diuisione intellectus tripliciter potest variari, quia potest fieri in materia naturali, vt homo est animal, in materia contingenti, vt homo est albus, in materia remota, vt homo est asinus, sic veritas & falsitas tripliciter potest variari, quoniam in materia naturali, veritas erit semper in compositione & falsitas in diuisione in materia remota erit semper opposito modo, in materia contingenti, aliquando compositio erit vera, aliquando falsa, vt Socrate sedente, hæc est vera Socrates sedet, quo surgente erit falsa, idem dico de diuisione, vt de nocte hæc est vera, sol non est super terram, de die autem est falsa, ex ijs arguitur sic, verum & falsum in rebus compositis consistunt in compositione, & diuisione intellectus cui correspondet compositio & diuisione in re, sed compositio & diuisione dicunt actum, ergo verum & falsum consistunt in actu.

Non solum autem est verum in rebus compositis, sed & in

in substantijs simplicibus, potest enim haberi scientia de eis ut patet in lib. 12. scientia autem est ex veris & de vero sicut demonstratio ex primo poster. sed hoc verum non consistit in compositione & diuisione, quoniam cum sint substantiæ, simplices compositioni intellectus non potest correspondere compositio rei. sed verum consistit in hoc quod est simpliciter attingere earum quodquid est, siue earum quiditates. Quæ si attinguntur sciuntur si non attinguntur ignorantur. Quæ quidem ignorantia non potest proprie dici falsitas aut deceptio aut error, nam hæc proprie contingunt in his in quibus contingit aliquid intelligere, & aliquid non intelligere, sicut in compositis in quibus possumus intelligere formam & nescire materiam in simplicibus autem cum non sint componentia nec aliud & aliud necesse est aut totum aut nihil intelligere, si totum intelligitur est verum in intelligente, si nihil est in eo ignorantia, ex quo sequitur quod licet in materialibus substantijs contingat esse verum, non tamen sed ignorantia, quæ ut inquit Arist. non est ut cæcitas, quoniam esset à nobis inseparabilis & sic nunquam possemus intelligere entia separata, quod tamen est falsum, ut de clarabitur in lib. 12. His declaratis probatur quod in simplicibus verum sit circa actum. Nam probatum est in precedentibus, substantias sempiternas & immateriales semper esse in actu, & nunquam in potentia passiva, quoniam cum sit potentia contradictionis essent generabiles & corruptibiles, ergo verum inuenitur in eis in quantum sunt actu patet ergo quod & intelligentia & verum & falsum in quibuscunque inueniuntur, inueniuntur secundum actum, & non secundum potentiam.

Postremo, aduerte, quod quoniam abstracta & necessaria semper sunt actu, & non sunt mobilia secundum esse, ita quod quandoque sint quandoque non, non potest contingere deceptio circa ea secundum quando, sicut contingit circa contingentia quæ quandoque sunt, & quando non sunt, & sic una propositio pro vno tempore est vera, & pro alio est falsa, quoniam contingentia mobilia sunt secundum esse. Dico quod non potest contingere deceptio secundum quando apud quæcunque existimantem, abstracta esse im-

EPITOME LIB. IX.

mobilia secundum esse, secus autem esset, si existimaret ea mobilia. Idem intellige de necessarijs mathematicis vt triangulus habet tres, hæc enim est immutabilis.

Tu tamen aduerte, quòd circa huiusmodi necessaria, potest esse deceptio quo ad inferiora ex quibus aliqua sic se possunt habere aliqua aliter, puta licet omnis triangulus habeat tres, non tamen omnis est æquilaterus, sed aliquis sic, vt isopleuros, aliquis duorum æqualium laterum vt isosceles, aliquis trium inæqualium vt scalenon, similiter circa numerum potest esse deceptio non quantum ad hoc, quod omnis numerus mensuratur vnitate, sed quo ad inferiora & proprietates numerorum, puta quis inter pares sit numerus primus an binarius vel alius vel nullus, est autem numerus par primus qui sola vnitatem mensuratur. Hæc autem

deceptio quo ad inferiora non contingit in immobilibus & in necessarijs circa illud quod

est vnum numero, quoniam vnum numero non diuiditur in multa, vt

patet, ex consequenti nec

secundum, quoniam,

nec secundum

suppo-

sita cadet in eo deceptio, quoniam sem-

per eodem modo se habet.

Hæc de quarto cap.

dicta sint.

•

•

•

•

•

•

•

•

•

•

•

•

•

•

•

•

•

Eiusdem

EIVSDEM CHRYSOSTOMI
IAVELLI CANAPITII
EPI TOM E
SVPER LIBRO DECIMO
METAPHYSICAE.



OST considerationem entis,
vt diuiditur per actum & poten-
tiam, considerandum est in hoc
decimo libro de ente, vt diuidi-
tur per vnum & multa, & totam
intentionem Aristotelis com-
prehendemus in vnico tracta-
tu, quem partimur in quinque
capita.

Primo, considerabimus de vno
secundum se.

Secundo, de vno in ordine ad multitudinem, & de his que
consequuntur ad vnum & ad multa.

Tertio, inter cetera quæ consequuntur ad multa conside-
randum est de contrarietate.

Quarto, de medijs contrariorum.

Quinto, de contraria, quomodo quædam differunt spe-
cie, quædam numero, quædam genere.

CAPVT PRIMVM.



N primo capite considerandum est de vno
sem se, de quo inuestiganda sunt quatuor.

Primo, quot modis dicitur vnum.

Secundo, quæ est ratio propria vnus inquã-
tum vnum.

Tertio, si ratio mensuræ conuenit vni.

Y iiij

Quarto,

Quarto, si vnum est substantia rei vt dicebant Pythagorici.

Quantum ad primum, aduerte, quòd in 5. lib. in tract. 2. in cap. 1. assignauimus omnes modos vnius & realiter & logice & per se & per accidens. Hic autem Arist. ex omnibus illis replicat solum quatuor modos per se principales quorum primus coincidit cum primo assignato in quinto in vltima distinctione vt, scilicet illa dicantur vnum quæ sunt cõtina non artè, sed natura, & quorum est vnus & indiuisibilis, id est vniformis motus, & hoc modo linea recta & linea circularis sunt continua, nam si vna pars mouetur totum mouetur, non autem sic sunt continue duæ lineæ constituentes angulum.

Secundus, etiã virtualiter coincidit cum secundo illic assignato vt. sc. illa dicantur vnum, quorum est vna forma, ita quod super continuitatem addunt vnitatem formæ, & hoc modo virga tota vitidis est vna. Si autem secundum partem est sicca, non est vna hoc modo, sed tantum primo modo.

Tertius, modus aliququaliter coincidit cum quarto illic assignato, vt, scilicet illa dicantur vnum quorum est vna ratio, siue diffinitio, & ista sunt quæ vna apprehensione apprehenduntur vt synonyma.

Quartus, modus coincidit in parte cum ijs quæ dicta sunt in 5. de modis vnius consideratione logica, vt, scilicet dicantur vnum quæ sunt vnum numero vnum specie, vnum quidẽ numero est ipsum singulare, quòd de multis non prædicatur, vnum autem spẽ sunt quæ & si extra intellectum sint distincta, tamen apud intellectum apprehendentem naturam specificam abstractam à conditionibus singularibus sunt vnũ remanet enim vna ratio & indiuisibilis quæ prædicatur de omnibus indiuiduis, in qua vt sic apprehensa, vt in vno conueniunt & dicuntur esse vnum in illa, vnde licet hæc non sit vera, Socrates & Plato sunt vnus homo, hæc tamen est vera Socrates & Plato sunt vnum in homine, & sicut apud intellectum huiusmodi natura est vna, ita est vnum scibile, & scientia quæ habetur de ea est vna, accipit enim scientia vnitatem ab vnitatem scibilis. Isti sunt modi vnius repetiti ab Aristotele.

Quantum

Quantum ad secundum, aduerte, q ratio propria & formalis vnus in quantum vnum est hæc, vnum est ens indiuisum, ita quod vt declarauimus in tractatu de transcendentibus vnum transcendens non addit super ens nisi in diuisionem quæ est modus generalis negatiuus. Et quoniam hæc est cõmunissima ratio vnus ideo intantum verificatur vnũ de quolibet modo vnus, in quantum verificatur esse ens indiuisum puta continuum est vnum, quia est ens indiuisum secundum quantitatem & secundum motum, & aqua est vna, quia est ens indiuisum secundum quantitatem & secundum formam, & id satis manifestauimus in quinto reducens omnes modos vnus ad vnum.

Quantum ad tertium vt plene resoluator quatuor agenda sunt.

Primo, quod esse mensuram, primo & essentialiter conuenit vni.

Secundo, quod conuenit vni vt est principium quantitatis discrete.

Tertio, quod ab vno & à numero deriuatur mensura ad alias species quantitatũ continue.

Quarto, quod per quandam similitudinem deriuatur mensura ad quædam alia, quæ tamen non sunt quantitates.

Primum quidem probatur sic. Vni ex sua ratione formali, primo & essentialiter conueniunt conditiones mensuræ, ergo &c. consequentia nota, probatur antecedens, nam vt colligitur ex Aristot. in hoc 10. lib. Mensura debet habere tres conditiones, primo quod sit indiuisibilis, secundo quod sit quid minimum, tertio quod sit quid certissimum. Hæc autem primo & essentialiter conueniunt vni, nam ex ratione sua est ens indiuisibile. secundo est quid minimum, omnis enim numerus est partibilis, & in vnitæte est status. Et si dicis quod etiam punctus est quid in partibile, ergo ita conuenit puncto esse quid minimum sicut vnitati. Respondeo vnitætas simpliciter est quid minimum quoniam non solum in partibilis est, sed abstrahit etiam ab omni situ, quod non conuenit puncto, ideo vnum meretur dici absolute minimum, & simplicissimum, tertio est quid certissimum, quoniam notificat numerum, numerus quantitatem continuam

tinuam, vt dicemus, ergo patet veritas antecedentis, & confirmatur, quoniam, vt inquit Arist. in tex. 2. illud est primo & essentialiter mensura, quo rei quantitas, primo cognoscitur proprie enim mensurabilis est quantitas, sed quantitas primo cognoscitur vno, cognoscimus enim numerum per vnitatem & per vnitatem ac numerum cognoscimus quantitatem continuam, vt declarabitur. Præterea, vt inquit Arist. in eodem tex. Quod est primum vniuscuiusque generis est neutrum. Constat, autem vnum esse primum in genere quantitatis, ergo &c.

Secundum sic probatur. Quantitas continua mensuratur numero aut vno, cognoscimus .n. eam cum dicimus mēsurantes, vnum stadium, vel duo stadia &c. Numerum autem & si mensuramus aliquando per alium numerum replicādo, vt bis duo, quatuor, ter & tria nouem, tamen vltima mensura stat in vnitatem replicata, vnde dicitur numerus multitudo aggregata ex vnitatibus & mensurata vnitatem, vnitatis autem non habet aliquid prius quo mensuretur, ergo &c.

Pro euidētia tertij, aduerte, quod non solum conuenit mensuræ esse quid indiuisibile, aut simpliciter, aut secundum institutionem humanam, sed debet esse cognata .i. eiusdem naturæ cum mensurato, & non solum in genere, sed & in speciali, ita quod longitudo mensuretur longitudine, & latitudo latitudine, & motus motu, & vox voce, & grauitas grauitate. Hoc supposito dico, quod in quolibet genere illud est metrum, quod est vnum, id est indiuisibile saltem secundum institutionem humanam, puta in ponderibus prima mensura erit vncia, quæ & si secundum se sit diuisibilis, tamē sumitur vt indiuisibilis, & in longitudine erit pedalis, & in motu erit velocissimus & regulatissimus motus, vnde motu primi mobilis mensuramus alios motus, & in voce diuisis .i. minima. Et hæc pro tanto sunt mensura, quoniam vnū quodque eorum sumptum vt indiuisibile, est quid minimum, & certum in suo genere, ita quod in nihil potest subtrahi. Et iste sunt conditiones veræ mensuræ, aliter non certificaret quantitatem mensurati. patet igitur q̄ ab vno, & à numero deriuatur mensura ad alia quanta, eo quod in eis quod sumitur vt vnum .i. indiuisibile & minimum & certum est mensura

sura aliorum, siue per seipsum, siue per replicationem.

Pro euidencia quarti. Aduerte, q̄ mensura x hac conditione, q̄ per eam cognoscitur natura rei mensurate, translata est ad multa alia in quibus dicimus illud est mensuram, quo ipsa nobis rei natura manifestatur. Hinc scitur scientia mensura rei scite, & sensus mensura rei sensate, quoniam per scientiam rem scitam, & per sensum rem sensatam cognoscimus. Tu tamen aduerte, q̄ cum duplex sit scientia nostra .i. practica & speculatiua, scientia practica verius est mensura rei scite, quàm speculatiua, nam illa est causa rescite, & secundum esse, & secundum cognosci. Ista autem causa est à re scita, vnde magis habet rationem mēsurati, quàm mensuræ, & propterea dictum Pythagoræ qui ait hominem esse omnium metrum propter scientiam & sensum, non est realiter verum, nisi quo ad ea, quæ pendent ab homine per scientiam practica. Arbitrabatur, tamen ipsum esse verum vniuersaliter, quia vt visum est in 4. libro. Sententia eius fuit rerum veritatem consistere & pendere, ab hominum sensu & opinione, sed id penitus falsum est, vt declarauimus ibi, ideo dictum suum, non est dignificandum nisi in rebus scitis practica scientia.

Item aduerte, q̄ ex eadem conditione attributa mensuræ, dicitur primum in quolibet genere, esse mensura omnium illius generis, eo quod cognoscuntur magis aut minus perfecta, secundum maiorem, aut minorem propinquationem ad illud primum quod est perfectissimum in suo genere. Hinc albedo dicitur mensura omnium colorum, aurum omnis metalli, homo omnium animalium, prima substantia omnis substantie, primum bonum omnis boni, & de hoc satis locuti sumus in q. nostris metaphys.

Quantum ad quartum principale, aduerte, q̄ in lib. 3. in cap. xj. super hoc dubium argumentatum est pro Pythagoricis, & pro naturalibus, & fecimus determinationem secundum doctrinam Arist. fundatam in his quæ dicit hic. Recurre igitur ad librum tertium. Quod autem dicit hic Arist. in tex. 7. in quolibet genere dari aliquam naturam quæ est vna, & quæ est perfectissima, in illo genere, patet in exemplis quæ adducit, & q̄ dicit in tex. 8. ens & vnū significare aliquo modo
idem

EPITOME LIB. X.

idem iam determinatum est in 4. lib. in tract. primo, in cap. tertio eisdem rationibus virtualiter, quas etiam tangit hic, ideo non est ijs amplius immorandum. Hæc de primo capite dicta sint.

CAPVT II.

IN secundo cap. habemus considerare de vno ordine ad multitudinem & de ijs quæ consequuntur ad vtrunque, consideratio quidem vnius in ordine ad multitudinem versatur circa modum oppositionis, nam licet constet ea esse opposita, tamen non constat modus oppositionis. Quatuor enim modis dicuntur oppositiones, vt visum est in post prædicamentis, & in lib. 5. huius scientiæ, scilicet contradictoriæ, relatiuæ, priuatiuæ, contrariæ. Inuestigandum est igitur quomodo oppositionis opponuntur vnum & multa. Pro eius notitia aduerte, secundum philosophum hic in textu nono opponuntur priuatiuæ, quoniam vnum est quod non diuiditur, multa autem quæ diuiduntur, indiuisio autem & diuisio se habent, vt priuatio & habitus, non tamen opponuntur meræ priuatiuæ, vt cæcitas & visus, quoniam vnum non est indiuisio, sed est ens, vt stat sub indiuisione, & multitudo non est diuisio, sed non ens, vt stat sub diuisione, cum igitur vnum non sit mera priuatio, non opponuntur meræ priuatiuæ, nec opponuntur contradictoriæ, quoniam alterum contradictorium, verificatur de ente & de non ente, sed neque vnum neque multa, verificantur de non ente, cum vtrunque includet ens, vt patet ex suis proprijs rationibus, nec opposuntur relatiuæ, quoniam vnum non refert aliud, vt patet. vtrum autem in aliquo sensu, puta inquantum vnum est principium multitudinis, & mensurat multitudinem, opponantur relatiuæ determinauimus in questionibus Metaphysicalibus, opponuntur autem contrariæ, quoniam cum vtrunque sit ens, & vnum se habeat, vt priuatio, alterum vero vt habitus participant conditiones contrariorum. nam duo contraria sic se habent quod vtrunque est ens, & alterum est, vt priuatio alterius. non tamen mera priuatio, vt nigrum est priuatio albi, & amarum priuatio dulcis. Resoluendo er

go dicimus vnum, & multa opponi priuatiuæ, sed non priuatiuæ, & contrariæ, non autem contradiçtorix, neque relatiuæ, nisi forte vt considerantur in ratione mensuræ, & mensurati, principij, & principijati.

Sed hic videntur esse duo dubia.

Primo, si vnum est, vt priuatio, & multitudo, vt habitus. ergo vnum est posterius multitudine. quod tamen est falsum, quoniam est principium multitudinis. & præterea non conuertitur subsistendi consequentia, licet enim sequatur, si multa sunt, vnum est, non tamen econuerso.

Secundo, non videntur opponi priuatiuæ, nec contrariæ, quoniam vnum constituit multitudinem. oppositum autem non constituit, immo destruit suum oppositum, ergo &c.

Hæc duo dubia determinauimus in questionibus metaphysicalibus, vbi & declarauimus dictum Arist. hic in text. 9. cum dicit, quare ratione prior multitudo &c. Tu igitur vide illic, ne inutilis fiat repetitio.

Facta consideratione de oppositione inter vnum, & multa considerandum est de his quæ causantur ex vno, & ex multo, siue pluralitate. Aduerte igitur, quod ex vno causantur idem, & simile, & æquale. idem dicit vnitatem in substantia, simile vnitatem in qualitate, & æquale vnitatem in quantitate. & aduerte, quod Arist. in lib. 5. vt nos disposuimus illic in tract. 2. in cap. 4. assignauit modos identitatis, tam per accidens, quam per se, vt videbis illic. Hic autem solum tres adducit.

Primo, aliqua sunt eadem, quia sunt vnum subiecto, id est conueniunt eidem supposito, vt Socr. est homo, & ipsemet est albus.

Secundo, quia plura supposita sunt vnum in natura specifica, vt Socr. & Plato sunt idem in humanitate, id est sunt vnum specie.

Tertio, quia plura conueniunt in vna ratione quiditatiua, siue specifica, siue generica. Hoc modo omnia individua eiusdem speciei sunt idem in ratione specifica, & omnes species eiusdem generis sunt idem in ratione generica, & apud mathematicum omnes lineæ rectæ æquales sunt idem in ratione lineæ rectæ. omnes enim sunt breuissima extensio in

ter duo puncta, & omnia tetragona æqualium laterum sunt idem in ratione tetragoni isagoni, id est æquilateri. Tu autem ut habeas plenam resolutionem de omnibus modis quibus dicitur idem, recurre ad quintum lib. in tract. 2. in cap. 4. & illic videbis quid sit idem subiecto idem numero, & specie, & genere, & materia &c. Et quomodo hæc est vera, idem est eidem idem.

Quantum ad simile, aduerte, quod in duobus differt ab eodem.

Primo, quia idem dicit vnum in substantia. simile autem vnum in qualitate.

Secundo, quia quæ sunt eodem, eo modo, quo sunt eadẽ sunt indistincta in substantia. similia autem licet sint vnum in qualitate, tamen sunt necessario diuersa in substantia, quoniam nihil est sibi ipsi simile. Quot autem sint modi similitudinis, iam disposuimus ad plenum in lib. 5. tract. 2. cap. 5. Arist. vero his in tex. 1. adducit quatuor.

Ex quibus primus est; quando aliqua conueniunt in vna forma, siue figura, siue in vna proportionem, sic duo tetragona in æqualia sunt similia. Trigonum autem, & tetragonum dissimilia, & ex hoc elicitur, quod in substantia, ut induit modum qualitatis saluatur similitudo. vnde Socr. & Plato, ut conueniunt in rationali sunt similes. prædicatur enim differentia, in quale, licet secundum rem sit substantia.

Secundus autem est, quando aliqua conueniunt in vna forma intesibili, & reminiscibili, & participant eam æquali gradu, ut duo corpora æqualiter calida. & aduerte, quod ut sic non solum dicuntur similia, sed æque similia, vel æqualia in participatione caloris.

Tertius est, quoniam aliqua conueniunt in vna forma, sed gradibus inæqualibus, sicut calidum, ut quinque, & calidum, ut septem.

Quartus est; quando aliqua in pluribus formis conueniunt, aut realiter, aut apparenter, ut stannum est magis simile argento, quam plumbum. nam in sono, in duritia, in gravitate, in luciditate, magis conuenit quam plumbum. unde plumbum respectu stanni est magis dissimile, quam simile argento, isti sunt modi similitudinis hic adducti ab Arist.

tu autem si vis habere plenam resolutionem reuide in lib. 5. in tract. 2. in cap. 5. illic etiam inuenies, quare non distinguuntur æquales in plures modos .

Ex multo autem, siue ex pluralitate causantur diuersum quod opponitur eidem, & dissimile oppositum simili, & differens. Quid sit dissimile, & quot modis dicatur Arist. hic prætermittit, quoniam possunt hæc facile cognosci per suum oppositum quod est simile. Quantum ad diuersum, aduerte quod dicitur omne illud quod comparatum alicui non est ipsum, sed aliud, & hac de causa omne ens comparatum alteri, aut est idem, aut diuersum. nam si est ipsum est idem cum eo, si est aliud est diuersum. De modis autem diuersi, iam per tractauimus in lib. 5. in tract. 2. in cap. 4. Arist. autem hic numerat tres modos .

Primus est, illud dicitur diuersum, quia non est ipsum, sed aliud. nam sicut ipsum est relatiuum indicans identitatem, ut Socr. est homo, & ipse est iustus. sic aliud est relatiuum diuersitatis, ut animal est aliud à lapide.

Secundus est, quando materia non est una, nec ratio una, & tu horum declaratione, vide in lib. 5. in tract. 2. in cap. 4. ubi inuenies diuersa formaliter, materialiter, & ratione, & diuersa specie.

Tertius est, in mathematicis, in quibus dicimus lineam curuam esse diuersam à recta, & trigonum diuersum à tetragono. & aduerte, quod hic modus correspondet tertio modo quo dicitur idem, prout diximus supra, quod omnes lineæ rectæ æquales sunt idem.

Iterum, aduerte, quod notanter diximus omne ens comparatum alteri, aut est idem, aut diuersum, quoniam de non ente non verificatur idem, neque diuersum. sunt enim opposita contrariæ, & non contradictoriæ, utrunque autem contrariorum est ens. Si autem sumatur idem, & non idem sic opponuntur contradictoriæ. & propterea non idem verificatur, tam de ente, quam de non ente. unde licet chimera non sit diuersa ab homine est tamen non idem homini. Item, aduerte, quod cum idem, & diuersum verificentur de quolibet ente, & identitas sit vnitas in substantia. diuersitas autem sit pluralitas debet intelligi ly substantia non solum, pro re præfenti

E P I T O M E L I B. X.

senti substantię, sed pro essentia eo modo quo diximus in 5. lib. tract. 2. in cap. 3. quod quęlibet essentia potest dici subtilitas. & sic identitas, & diuersitas inueniuntur in omni genere accidentium. nam hæc est vera actio, & passio sunt idem motus. Album & nigrum sunt diuersę qualitates.

Quantum ad differens, aduerte, quod in hoc distinguitur à diuerso. Quęcunque differunt aliquo differunt, & in aliquo communi conueniunt, vt duo indiuidua differunt conditionibus indiuiduantibus, & conueniunt in specie. Duę species differunt differentijs specificis diuidentibus genus, & conueniunt in genere. Duo subalterna, vt substantia corporea, & incorporea differunt differentijs suis constitutiujs, & conueniunt in genere generalissimo. Quę autem sunt diuersa non est necesse quod aliquo sint diuersa, & in aliquo vno præcipue vniuoco conueniant. possunt enim seipsis esse diuersa. vnde duo generalissima sunt diuersa, & deus, & creatura. in nullo enim conueniunt, nisi in ente, quod tamē non est vniuocum, sed analogum, vt determinauimus in quęstionibus metaphysicalibus.

De modis autem differentium iam pertractauimus in 5. lib. tract. 2. cap. 4. Hic vero Arist. tātum duos assignat, vt magis proprios, quorum primus est, differentia genere, secundus est differentia specie. ea autem sunt differentia genere, quibus non est vna communis materia, & ex consequenti non sunt transmutabilia ad inuicem, vt cælum, & elementū. Item quęcunque sunt in distinctis prædicamentis, vt linea, & albedo. Differentia specie sunt, quę in vno genere proximo conueniunt, & distinguuntur formis proprijs, à quibus sumuntur proprię differentię, vt homo, & leo conueniunt in animali, & distinguuntur formis proprijs. De alijs modis vide in libro quinto vbi supra, illic enim fecimus vniuersalem considerationem super hoc. Hęc de 2. cap. dicta sunt.

C A P V T I I I.

Sed quoniam contrarietas est quædam differentia, contraria enim sunt, quę sub eodem genere differunt, ideo in hoc tertio capite considerare debemus de contrarietate,

tate, quæ inter alia genera oppositionum, videtur continere multas difficultates, vt apparebit infra.

Pro notitia igitur contrarietatis tria agenda sunt.

Primo, quid sit contrarietas.

Secundo, quomodo se habet ad alia genera oppositionum.

Tertio, soluentur quædam dubia, quæ orientur ex determinatis.

Quantum ad primum, aduerte, q̃ contrarietas est maxima differentia, siue distantia duorum differentium sub eodẽ genere. Pro declaratione huius diffinitionis: nota primo, q̃ supponitur contrarietatem esse quandam differentiam. Quæcunque enim contraria sunt, plura sunt. nihil enim sibi ipsi contrariatur, & necesse est, vt in aliquo cõueniant, sicut declarabitur, ergo &c. Item nota, q̃ in rebus necesse est dari maximam differentiam. videmus enim ad sensum, aliqua magis, & minus differre, vt minus differt color glaucus ab albo, quàm ceruleus, sed magis, & minus non est, nisi per comparationem ad maximum, ergo &c. Item nota, q̃ diuersa, siue differentia genere non possunt dici maxime distare. illa enim proprie distant, inter quæ est communis via, qua itur ab vno ad alterum, vt patet in distantia locali, vel qua mouetur vnum ad alterum, vt patet in alteratione, qua mouetur frigidum ad calidum, sed inter differentia genere non datur hæc communis via, siue motus. non .n. mouetur dulce ad album, neque paruum ad coloratum, nam diuersa genere, nisi aliud impediat se compatiuntur in eodem subiecto. Illa igitur sunt maxime differentia inter quæ est communis via, siue motus. hæc autem sunt distincta specie contenta sub vno genere, vt album & nigrum, calidum & frigidum, sursum & deorsum. Ab vno enim ad alterum est motus per se, sed vt declaratum est in primo phys. necesse est terminos motus esse contrarios. illa ergo quæ maxime distant sub eodem genere sunt contraria, ex consequenti contrarietas est maxima differentia duorum maxime distantium sub eodem genere, & ab vno ad alterum contingit esse motum per se. Hæc est diffinitio data ab Aristot. de contrarietate, cui concordant omnes. aliæ diffinitiones, quæ

solent dari, & sunt quatuor.

Prima est. Contraria sunt quæ plurimum differunt. nam plurimum, & perfecte, & finaliter, & maxime differre idem sunt.

Secunda est. Contraria sunt quæ plurimum distant in eodem genere. nam vt declarauimus in distinctis genere, non sumitur proprie maxima distantia. cum inter ea ea non sit communis via, neque motus.

Tertia est. Contraria sunt quæ plurimum differunt in eodem susceptibili. i. apta recipi in eodem subiecto, quoniã eadem est materia susceptiua contrariorum, cum vnum generetur ex altero.

Quarta est. Contraria sunt, quæ plurimum distant sub eadem potentia. s. rationali, vt sub arte, vel scientia practica. Dicitur enim in lib. 9. quod potentia rationalis potest in opposita contraria, vt medicinalis scientia potest insanum, & ægrum, & ars ædificatoria potest construere magnam, & paruum domum, & pigmentarius dulce, & amarum electuarium. si tu autem vis perfecte, & clare diffinire contraria sic diffinias, contraria sunt quæ maxime distant sub eodem genere apta inesse vicissim eidem susceptibili, & ab eodem vicissim expelli, nisi alterum insit à natura, vt color in igne, albedo in niue &c.

Et aduerte, qd diffinitio data de contrarietate verificatur de vera, & perfecta, & primaria contrarietate, & non de secundaria qualis est inter extremum, & medium, vt inter album, & rubeum, patet enim quod album, & rubeum non maxime distant sub colore. Item aduerte, quod ex diffinitione veræ, & primariæ contrarietatis sequuntur duo corollaria. primum est. s. contrarietas est maxima distantia, ergo est perfecta distantia. nam perfectum est vltra quod non est aliquid sumere. ergo vltra perfectam distantiam non est accipere maiorem, si nō est accipere maiorem, ergo est maxima, maximū enim est quod non exceditur ab aliquo, si ergo contrarietas est maxima distantia, est perfecta, & si est perfecta est finalis, quia perfectum est, quod ad finem peruenit, secundum est, duo non possunt esse contraria vni, sed tantum vnū vni. nam cum perfecta contrarietas sit tantum inter extre-

ma contenta sub genere, si duo vni contrariantur, ergo vni extremo correspondent duo extrema, quod est impossibile. nam vnus perfecte distantie non possunt esse, nisi duo vltima, sicut patet in linea, cuius vltima non sunt, nisi duo puncta. cum igitur contrarietas sit perfecta distantia, constat, quod est tantum inter extrema, & quod tantum vnum vni est contrarium, scilicet contrarietate vera, & primaria.

Quantum ad secundum, cum quatuor sint genera oppositionum, manifestum est quod contrarietas non est oppositio relatiua. vnum enim contrarium non dicitur ad aliud, vt patet. Præterea inter contraria est motus, ita quod vnum contrariorum est terminus à quo, & alterum est terminus ad quem, sed inter relatiua non est motus, vt probatur in 5. Phys. tex. 10. Manifestum est etiam, quod non est oppositio contradictoria, quoniam inter contradictoria nō datur medium, de quolibet enim verificatur alterum contradictoriū, vt declaratum est in 4. lib. sed inter contraria potest dari medium. Datur enim sapor qui non est dulcis, nec amarus, & lapis, nec est sanus, nec est æger. Restat igitur considerare, quomodo se habeat ad oppositionem priuatiuam. Aduerte igitur, quod licet sint distinctæ oppositiones, quoniam priuatio propriæ dicta non est aliqua natura, sed negatio, vtrūque autem contrariorum est aliqua natura, tamen priuatiua oppositio est radix, & principium contrarietatis, ita quod alterum contrariorum est, vt priuatio, & alterum, vt habitus, ex consequenti vnum est, vt perfectum, alterum vt imperfectum, vt patet de amaro comparato dulci, & de nigro respectu albi, & de ægro respectu sani.

Sed antequam probetur propositum. Quædam prænotanda sunt circa priuationem. Aduerte igitur primo, quod cum priuatio dicatur multipliciter, potest enim esse negatio extremi in aliquo medio, vt rubeum est negatio albi, & potest esse negatio extremi in alio extremo, vt nigrum est negatio albi. Quando dicimus priuationem, & habitum esse radicem contrarietatis, intelliges de priuatione in extremo, aliter non seruaretur maxima distantia inter contraria.

Et hanc priuationem Aristot. appellat perfectam, non ex se, sed ratione extremi, in quo est, & quod perfecte,

id est maxime distat ab alio extremo .

Aduerte secundo, q̄ licet oppositio priuatiua non coincidat cum oppositione contradictoria, est tamen quædam contradictio in subiecto, scilicet determinato . nam esse videntem, & esse cæcum est esse videntem, & non esse videntem in natura quæ est capta esse videntem . Hinc est, quòd licet alterum contradictoriorum verificetur de quolibet ente, & etiã non ente . ex consequenti nunquam detur medium, tamen in oppositione priuatiua datur medium, licet enim lapis sit videntem, aut non videntem, tamen non est cæcus, vnde inter cæcum, & videntem mediat non videntem, nisi in natura apta videre, eo modo, ea parte, eo tempore quo est apta videre .

Aduerte tertio, quòd de modis, quibus dicitur priuatio iam locuti sumus in 5. lib. in tract. 3. in cap. 4.

His prænotatis probatur propositum sic . Omnis generatio, siue substantialis, siue accidentalis fit in determinata materia inter terminos contrarios, vt declaratum est in 1. Phys. tex. 47. ergo necesse est, quod omnis generatio fiat ex termino, à quo qui sit priuatio termini ad quem, vt contingit in generatione substantiali . Ex eo enim quod materia est sub priuatione talis formæ, puta aquæ mouetur actione agentis naturalis ad recipiendam formam aquæ, vel quod sit forma contraria termino ad quem, vt contingit in generatione accidentali, puta in dealbatione, in qua nigrum est terminus à quo, sed ex nigro non posset fieri album, nisi in nigro esset negatio albi ex consequenti, quod est sub nigro est priuatum albo. Si ergo generatio omnis est inter contraria, & in generatione substantiali, terminus à quo est priuatio, in accidentali autem forma, quæ est terminus, à quo continet priuationem formæ, quæ est terminus, ad quem, constat contrarietatem esse quandam priuationem, & oppositionem contrarium fundari in oppositione priuatiua. Præterea prima contraria, quæ sunt genera aliorum contrariorum sunt, vt habitus, & priuatio. nam prima contraria sunt vnũ, & multa, ad quæ reducuntur alia, vt simile reducitur ad vnũ, & dissimile ad multa similiter æquale, & inæquale, & idẽ, ac diuersum, ad diuersum autẽ reducitur differentia, ad differentiam contrarietas, vt declarauimus supra, si igitur prima contraria,

traria, quæ seruantur in alijs contrarijs se habent, vt habitus & priuatio, signum est priuationem, & habitum esse radicē omnis contrarietatis. Præterea ex inductione patet sic esse. omnia enim contraria sic se habent, quod vnum est diminutum, siue defectuum respectu alterius, vt patet in extremis saporum, & colorem, in similitudine, & dissimilitudine, æqualitate, inæqualitate, malitia, & virtute, ignorante, & docto & c. Manifestum est igitur, quod de necessitate contraria reducuntur ad priuationem, & habitum.

Quantum ad tertium, aduerte, q̄ contra corollarium secundum, scilicet quod vni tantum vnum est contrarium insurgunt duo dubia.

Primum est, de equali, cui videntur contrariari magnum, & paruum.

Secundum est, de vno, cui videntur contrariari multum, & paucum.

Pro resolutione igitur primi dubij tria agenda sunt.

Primo, arguetur ad partem affirmatiuam.

Secundo, ad partem negatiuam.

Tertio, determinabitur veritas, sed antequam arguamus notandum est, quod non vtimur ex necessitate hoc termino, nisi in oppositis, vt cum quærimus, vtrum homo sit sanus vel æger, doctus, vel indoctus, & dico ex necessitate, quoniā opposita ex sui natura non possunt simul esse, ex quo sequitur, quod si vtimur ly. vtrum in non oppositis est vana inquisitio, puta vtrum pomum sit dulce, vel album, nisi fiat suppositio quod vtrumque non contingit simul fieri, puta si ponatur quod pater, & filius non possunt simul liberari à carcere, & tunc possumus quærere. vtrum pater vel filius liberabitur à carcere, constat autem q̄ magnum, & paruum opponuntur æquali merito. ergo vtimur ly, vtrum quærentes, vtrum ita opponantur, quod contrariantur æquali.

Et pro parte affirmatiua arguitur sic, cum æquale non sit magnum, nec paruum (& sumatur ly magnum, & paruum, pro maiori, & minori) aut cōtrariatur tantum magno, aut tantum paruo, aut vtrique nō, primo quia non est maior ratio de vno, quàm de alio, cum æquale non sit maius, neque minus. ergo secundo, ergo vni contrariantur duo, & non

tantum vnum. Præterea æquali contrariatur inæquale, sed inæquale inest, & magno, & paruo. nam & maius, & minus inadæquantur æquali, ergo æquali contrariantur, & magnū, & paruum. Pro parte autem negatiua, sic arguitur, ex diffinitione contrarietatis requiritur quod sit maxima distantia, sed maxima distantia non potest attendi, nisi inter duo extrema, vt declaratum est supra. ergo vni non potest contrariari, nisi vnum. Præterea æquale est medium inter maius, & minus æquale, est enim quod nō est maius, neque minus, sed inter medium, & extrema non est vera, & primaria contrarietas, cum illic non sit maxima distantia, ergo æquale nō contrariatur magno, & paruo.

Pro determinatione huius dubij, aduerte, quòd Aristor. concedit æquale opponi magno, & paruo, id est maiori, & minori. nam quando quærimus de aliquo quanto, comparando ipsum alteri quanto sic formamus quæsitum, vtum hoc sit maius, aut minus illo, aut æquale illi. verum igitur concludunt rationes pro parte affirmatiua, pro quanto concludunt æquale opponi magno, & paruo. Similiter verum concludunt rationes pro parte negatiua, pro quanto concludunt, æquale non opponi contrarie magno, & paruo. Si igitur opponuntur, & non contrarie quærendum est qua oppositione opponuntur. Manifestum est autem, quòd non relatiue, non enim, dicitur æquale ad maius, nec ad minus, sed ad æquale, sicut enim dicitur simile simili simile. Idem eidem idem sic æquale æquali æquale, nec opponuntur secundum affirmationem, & negationem, id est contradictoriæ. nam æquale non diceret, nisi negationem maioris, & minoris, & cum negatio verificetur, tam de ente, q̃ de non ente, æquale verificabitur de omni eo, quod non est maius, neque minus, & cum non quantum, vt albedo, & sapor, & vnitas, & punctus non sint maius, neque minus, ergo erunt æqualia, similiter cum non ens non sit maius, neque minus, ergo erit æquale, q̃ est absurdum, nam hæc tria non verificantur, nisi in rebus quantis. Restat igitur, vt opponantur secundum priuationem, & habitum, & habitum quidem ponamus ex parte maioris, & minoris, vt dicatur maius quod excedit, minus vero quod exceditur. priuatio autem est in æquali, nam
æquale

æquale est quod cum sit quantum, non est maius, nec minus, cum tamen sit aptum ratione, qua quantum esse maius, aut minus, & sic æquale est medium priuatiuum inter maius, & minus, sicut etiam contingit dari medium priuatiuum inter bonum, & malum maxime in polyticis. nam rusticus, quoad ciuilia, neque bonus, neque malus est.

Sed aduerte, quod huiusmodi medium priuatiuum, in quo vniuntur plures priuationes, in aliquibus est nominatum vno nomine, in aliquibus pluribus nominibus. In aliquibus remanet omnino in nominatum. nam aliquando illæ plures priuationes cadunt tantum super vnum determinatum, quod non dicitur multipliciter, nec diuersis modis, & tunc medium, in quo vniuntur plures priuationes est tantum vnum, & de facili nominatur vnico nomine, & tale medium est hoc, quod dicitur æquale. nam priuationes maioris, & minoris contente in eo cadunt super quantum, in quantum habet vnam, & eadem quantitatem æqualis mensuræ cum alia. Aliquando cadunt super vnum determinatum genericæ, sed non specificæ, sicut quod non est album, nec nigrum priuatiue est quidem coloratum, verum quia inter album, & nigrum non est vnica species, sed plures, in quibus coniunguntur priuationes albi, & nigri. ideo inter ea dantur plura media priuatiua, & pluribus nominibus nominantur, vt rubeum, croceum, viride &c. Aliquando cadunt super indeterminatum, & genere, & specie sicut priuationes boni, & mali, quæ possunt inueniri in naturalibus, & in artificialibus, & in moralibus, & polyticis, sicut bonum, & malum, & tunc media priuatiua remanent in nominata propter multiplicitatem susceptibilium, id est rerum, in quibus potest esse bonum, & malum, & priuatio vtriusque.

Ex his patet falsitas opinionis dicentium, quod si inter bonum, & malum, inter maius, & minus, inter dulce, & amarum datur medium, quod neutrum est extremorum, ergo inter omnia poterit assignari medium, puta inter pedem, & calceum, inter corpus, & vestem, quod est derisorium. Hæc quidem consequentia nulla est, quoniam ad hoc, quod inter aliqua sit medium priuatiuum, necesse est illa esse extrema opposita, inter quæ est communis via, & perfecta distantia,

ita quod id quod mutatur ab extremo prius perueniat ad medium, & attingat alterum extremum, sic enim diffinitum est medium in physicis, & quoniam non omnia quæ sumuntur sunt vere extrema opposita, vt exemplificatum est de pede, & de calceo, de albedine, & dulci & caideo non est necesse inter omnia esse medium. Tu tamen aduerte, quod licet hæc sit vera. Inter quæcunque est medium illa sunt opposita, hæc tamen est falsa. Inter omnia opposita datur medium, vt patet in contradictorijs, & contrarijs immediatis.

Pro solutione secundi dubij duo agenda sunt.

Primo, arguitur, quod non solum multa opponantur vni, sed etiam pauca, ex consequenti duo sunt contraria vni. Arguitur ergo sic. Si solum multa opponuntur vni, ergo vnum erit pauca, quod est falsum, vt probabitur. consequentia autem dupliciter deducitur: primo sic, secundum te quibuscunque multa opponuntur illa sunt vnum, quoniam secundum te solum multa opponuntur vni, sed paucis opponuntur multa. ergo pauca sunt vnum, & econuerso, vnum est pauca: secundo sic, omnia multa opponuntur paucis, sed duo sunt multa, sunt enim plura vno, ergo sunt multa, ergo duo opponuntur paucis, sed sub duobus non datur aliquid minus, quam vnum. ergo vnum erit pauca. falsitas autem consequentis sic manifestatur, sicut se habent productum, & breue ad longitudinem, sic multa, & pauca ad pluralitatem, sicut enim productum, & breue sunt proprietates longitudinis, sic multa, & pauca pluralitatis, sed productum est longitudo similiter breue, ergo multa sunt plura similiter pauca. Si igitur vnum est pauca, vnum erit plura quod implicat contradictionem, vt ergo ista impossibilia euentur, tenendum videtur quod multa, & pauca contrariantur vni, ex consequenti non tantum vnum est contrarium vni.

Secundo, determinandum est dubium, pro quo præponitur hæc distinctio, ly multa dupliciter sumitur: primo absolute, & simpliciter: secundo, respectiue.

Primo modo quæcunque sunt plura vno, dicuntur multa. vnde omnis numerus est quædam multitudo absolute sumpta, & vt sic multa non opponuntur paucis, quoniam pauca in hoc primo sensu, cum sint plura, sunt etiam multa.

Tantum

Tantum ergo multa absolute sumpta opponuntur vni .

Secundo modo non omnia plura dicuntur multa, sed quę dicunt magnam pluralitatem, & correspondenter non dicuntur pauca, nisi quę dicunt diminutam pluralitatem, & vt sic, si heri fuerunt mille homines in foro, & hodie decem, solemus dicere . Heri fuerunt multi homines in foro, hodie pauci, & in hoc sensu multa non proprie opponuntur vni, sed paucis, & sic ex hac distinctione patet, quod non duo contrariantur vni, sed vnum vni . Quod si non fiat prædicta distinctio euitari non poterunt prædicta inconuenientia . Ad argumentum ergo adductum in oppositum negatur consequentia . Ad primam probationem dico ad maiorem, quod non est vera, nisi de multis sumptis absolute, in quo sensu nego minorem, quoniam multa tantum respectiue sumpta opponuntur paucis . Ad secundam probationem nego maiorem, & minorem, ad probationem minoris nego consequentiam intelligendo de multis respectiue, sicut intelligit arguens .

Patet igitur illud corollarium esse verum, scilicet tantum vni est contrarium . & si quęras : si multa absolute sumpta non opponuntur paucis, sed vni, qua oppositione opponuntur . Respondetur, quod vnum transcenderet, & multa transcenderet, vt declarauimus in 2. cap. opponuntur priuatiuę, & contrarię . vnum autem vt est principium numeri, & multa quę sunt ipse numerus in genere quantitatis opponuntur relatiue in tertio modo relatiuorum, quę se habent, vt mensura, & mensuratum, in quo modo non est relatio mutua, sed vnum relatiue dicitur ad alterum, quia alterum dicitur relatiue ad ipsum, puta dicitur mensura ad mensurabile, non quia mensura refertur ad mensurabile realiter, sed quia mensurabile refertur ad mensuram, & est simili modo, sicut in scientia, & scibili maxime in scientia speculatiua, cuius veritas est causata à re, & non est causa rei, dicitur enim scientia ad scibile, quia scientia, vt dependens à scibili realiter refertur ad scibile, scibile autem refertur ad scientiam, non quia pendeat à scientia, sed quia scientia refertur ad scibile . & quoniam inter huiusmodi relatiua non est mutua dependentia, ideo non est necesse quod se mutuo ponant,

& auferant . potest enim vnum poni reliquo non posito . s. eo quod non dependet ab altero . vnde licet non possit poni scientia speculatiua sine scibili, potest tamen dari aliquod scibile, de quo nundum habetur scientia, vt quadratura circuli, similiter licet non possit dari numerus sine vnitae, potest tamen dari vnum, siue vnitae sine numero. Idem dico de imagine & imaginabili, de sensu & sensibili, desiderio & desiderabili . Hæc sufficiant pro tertio capite .

C A P V T I I I I .

ET quoniam contingit inter aliqua contraria dari medium, vt in coloribus, & in saporibus, ideo de huiusmodi medijs agendum est, & cōsiderabimus quatuor.

Primo, q̄ omnia media sunt in eodem genere cum his, quorum sunt media .

Secundo, q̄ omnia media sunt inter opposita .

Tertio, q̄ non sunt inter opposita contradictorie, nec regulariter inter opposita relatiue, sed inter contraria, & priuatiue opposita .

Quarto, q̄ necesse est huiusmodi media contrariorum componi ex extremis contrarijs .

Quantum ad primum, aduerte, q̄ medium proprie est illud, in quod prius peruenit, quod permutatur, quàm in extremum, & id quidem manifestum est in motu locali . nam sit linea . A D, cuius medium sit C, constat q̄ mobile non perueniet in D, nisi prius perueniat in C. Similiter in alteratione . non enim quod denigratur fiet nigrum, nisi prius perueniat ad palidum, siue plumbeum. Ex his ergo arguitur sic. Medium proprie est in his, inter quæ est motus, siue permutatio per se, sed motus non est per se, nisi inter ea quæ sunt eiusdem generis . non enim aliquid mouetur per se, à colore ad figuram, neque ab albo ad dulce, sed ab albo ad nigrū, ab amaro ad dulce, à dextro ad sinistrum &c. Ergo cum sit motus per se ab extremo ad medium, & à medio ad alterum extremum, necesse est medium esse in eodem genere cum extremis .

Quantum ad secūdum, aduerte, q̄ vt declaratur in j. phys. tex.

tex.43. non est motus inter terminos contingentes, id est q. possunt simul esse, nisi per accidens, vt non fit musicum ex albo, nisi per accidens. necesse est ergo, vt termini motus per se sint oppositi, & determinati, puta quòd musicum fiat ex immusico, & calidum ex frigido, & magnum ex paruo, & his arguitur sic. Medium est inter ea, inter quæ est motus per se, vt prædictum est, sed ea inter quæ est motus per se, necesse est esse opposita. ergo media omnia sunt inter opposita.

Quantum ad tertium, aduerte, quòd manifestum est, inter contradictoria non dari medium, quoniam altera pars contradictionis, de quocunque, siue ente, siue non ente necessario verificatur. nam tam de Socra. quàm de chimera. verum est dicere, quòd viuit, vel non viuit. vnde vt probatum est in 4. lib. contradictoria diuidunt verum, & falsum absolute, & vniuersaliter. Inter relatiua opposita contingit quidem dari medium, non in quantum relatiua, sed in quantum sunt relatiua aliqua contraria, inter quæ contingit esse motus, vt inter magnum, & paruum datur æquale, vt declaratum est supra. vnde inter relatiua non contraria, & inter quæ non est relatio mutua, vt sunt relatiua tertij modi non datur medium, vt inter scientiam, & scibile, inter imaginem, & imaginatum, & ratio huius est, quoniam vt prædiximus extrema, inter quæ datur medium debent esse eiusdem generis; aliter non esset inter ea motus per se, sed duo relatiua tertij modi non sunt necessario in eodem genere. nam vt inquit Comment. in côm. 22. potest vnum esse in vno genere alterum in alio, vt scientia est in qualitate. scitum autem potest esse in substantia. idem patet de imagine, & imaginato. Ex his igitur constat. quòd si datur medium inter relatiua. ideo est, quia aliqua eorum sunt contraria, & sunt eiusdem generis. Inter priuatiuæ opposita, si datur medium est, quia oppositio priuatiua est radix oppositionis contrariæ, vt declarauimus supra. nam quia in albo est priuatio nigri, & in nigro est priuatio albi. datur medium, puta rubicū quod non est album, neque nigrum, cum igitur non sine plura genera oppositionis constat, quod medium propriæ non datur nisi inter contraria eo, quod contraria sunt eiusdem generis & inter ea est motus per se. Medium autem

autem, vt diximus supra debet esse inter ea quæ sunt eiusdæ generis, & inter quæ est motus per se, quare &c.

Quantum ad quartum cum probatum sit quod tantum inter contraria proprie datur medium & medium sapiat naturam extremorum, perscrutandum est si medium componitur ex extremis contrarijs. Pro cuius euidencia propono tres conclusiones.

Prima conclusio: Extrema contraria vt albedo & nigredo inter quæ est medium vt rubedo, habent differētiās priores contrarias ex quibus constituuntur, probatur sic. Ista extrema contraria, vel habent genus supra se in quo conueniunt, vel nullum habent, si nullum habent, ergo nec habēt medium, quoniam, vt diximus supra, medium est inter ea quæ sunt vnius generis: si habent, cum omne genus diuidatur differentijs contrarijs, qua ratione genus est prius istis extremis contrarijs eadem ratione differentiæ diuisiue sunt priores eisdem extremis, & cum species non cōstituatur ex solo genere, sed ex genere & differentia, sequitur q̄ huiusmodi extrema habent differentias contrarias priores quibus constituuntur, & quidem quod sint priores patet, quoniam constituens vt sic: est prius constituto & quod diximus, patet in coloribus, nam albedo & nigredo conueniunt in colore, vt in genere, q̄ est prius & communis & quod diuiditur contrarijs differentijs prioribus .s. disgregatiuo quæ licet ex parte rei, non sint veræ differentiæ, sed potius effectus, tamen in nostra cognitione sumuntur loco differentiarum, & albedo constituitur ex colore & disgregatiuo, nigredo autem ex colore & congregatiuo.

Secunda conclusio: Species mediæ inter duo extrema contraria puta rubedo & viredo habent differentias medias quibus constituuntur: probatur sic, cum omnes species constituantur ex genere & differentia necesse est species medias habere proprias differentias quibus constituantur. Istæ autem differentiæ non possunt esse ille quibus constituuntur species extremæ contrariæ, quoniam tunc mediæ species non distinguerentur à speciebus extremis, omnis .n. color disgregatiuus est albedo, & congregatiuus est nigredo, necesse est, ergo medias species habere differentias distinctas à
disse

differentijs constitutiujs extremorum, quæ conuenienter dicuntur differentia mediæ, nam sicut colores medijs dicuntur species mediæ, sic conuenienter dicuntur differentia mediæ quæ sunt constitutiuæ mediarum specierum.

Tertia conclusio: Species mediæ necessario componuntur ex speciebus extremis contrarijs, probatur sic. Quod se habet ad duo extrema ita quod vnus est magis, & alterius est minus componitur ex extremis, hæc est manifesta, quia non esset magis vnus extremi, nisi magis contineret de illo nec esset minus alterius extremi, nisi minus contineret de illo, sed omnis species media ita se habet, q̃ comparata duobus extremis, est magis vnus & minus alterius, puta tepidū est magis frigidi, & minus calidi, & viride est magis nigri, & minus albi, ergo omnis species media magis continet de vno extremo & minus de alio, non autem est possibilis hæc continentia nisi componatur ex eis, ergo &c. Vtrum autem extrema componant media ita q̃ actu seruentur in medijs, vel tantum virtute determinabimus in quæst. nostris, nam pro vtraque parte sunt solemnes opiniones. Hæc de quarto capite dicta sint.

C A P V T V.

IN quinto cap. declarandum est, quomodo quædam contraria differunt specie quædam solo numero, quædam non solum specie, sed etiam genere.

Quantum ad primum, aduerte, q̃ quædam contraria differunt formaliter, & sunt illa quæ sumuntur à gradibus formalibus qui significantur per differentias diuinas per se allicuius generis, quas necesse est esse contrarias, quoniam cū non se compatiuntur in eodem sunt oppositæ & nō possunt esse oppositæ contradictorie neque priuatiue, quoniam altera pars contradictionis & priuatio sunt negatio, neutra autem differentiarum est negatio aliter non constitueret speciem & non possunt esse oppositæ relatiue, quoniam relatiua non sunt necessitate eiusdem generis, vt dictum est supra de relatiuis tertij modi, differentia autem diuina eiusdem generis continentur sub eodem genere, ergo sunt oppositæ

posite contrarie. Differentiæ igitur diuidentes & diuersificantes vnum genus cum sint constitutiue specierum & sint contrarie, constituunt distinctas species, quæ autem sunt veræ contrariæ secundum se, vt in qualitate albedo & nigredo, aut sunt contrariæ saltem ratione differentiarum contrariarum quibus constituuntur, vt duæ species in prædicamento substantiæ contentæ sub eodem genere, nam in substantia vt substantiæ, non est contrarietas, vt declaratum est in prædicamentis, & ideo duæ species, puta equus & homo non sunt secundum se contrariæ nisi ratione differentiarum contrariarum diuidentium animal. patet igitur, q̃ illa contraria constituta per differentias contrarias diuisiuas vnius generis differunt specie cum sint distincte species constitute distinctis differentijs & formalibus. Et aduerte, q̃ species esse contrarias ratione contrariarum differentiarum, commune est omnibus speciebus cuiusque generis tam in prædicamento substantiæ, quàm in prædicamentis accidentium, quoniam competit omni generi diuidi per differentias contrarias sicut competit materiæ diuersificari per diuersas formas, non ita tamen q̃ genus sit materia & differentia sit forma, nam genus & differentia dicunt totum & prædicantur in recto de eo cuius sunt, materia autem & forma dicunt partem, & prædicantur in obliquo de eo cuius sunt, sed similitudo stat in hoc, q̃ sicut formæ diuersificant materiam ita differentiæ diuersificant genus.

Quantum ad secundum, aduerte, q̃ quædam contraria non sumuntur ex gradibus formalibus alicuius naturæ, sed ex varijs conditionibus materiæ indiuidualis, puta quia hæc materia proxima & signata est sub tali qualitate, & illa sub opposita, ideo in eadem specie producuntur indiuidua contraria non ratione formæ specificæ, sed ratione contrariarum qualitatuum existentium in materia indiuiduante. Hac ratione Aethiops niger, & Græcus albus, sunt contrarij, non gradu formali naturæ humanæ, sed quia corpus huius est adustum sole, huius autem non, eadem ratione Socr. masculus, & Minerua scæmina habent contrarietatem, quoniam sperma humanum aliquando est sub tanto calore quod est aptum generare masculum aliquando sub tam remisso quod non

non est aptum generare nisi fœminam, fœmina igitur & masculus licet contrariantur, non tamen differunt specie, sed solo numero, quoniam non cōtrariantur ex forma, sed ex materia cuius signum est quod idem homo aliquando generat masculum, aliquando fœminam quod non posset si differunt specie, nihil enim agit ultra speciem suam præcipue actione unioca & perfecta, ut nunc loquimur, nec obstat q̃ masculinum, & fœmininum videntur esse proprietates per se animalis cum in diffinitione eorum ponatur animal, sicut in diffinitione paris & imparis ponitur numerus, ex consequenti videntur facere differentiam, secundum speciem, sicut volatile & gressibile. Hoc inquam non obstat, quoniam ad hoc quod proprietas competens animali faciat differre specie non sufficit quod sit proprietas per se, sed quod sit per se, & quod sumatur à gradu formali, & non à conditionibus materiæ particularis, & ideo licet gressibile & volatile differant specie, quoniam sumuntur à diuersis gradibus animalitatis, non tamen masculinum & fœmininum, quoniam sumuntur ab eodem gradu & diuersificantur solum ex conditionibus materiæ particularis.

Quantum ad tertium, aduerte, quod quædam contraria non sumuntur à diuersis gradibus formæ genericæ, nec à diuersis dispositionibus materiæ particularis, sed à potentia & impotentia, & à diuersitate materiæ non particularis, sed simpliciter dictæ prout .s. vnum contrariorum habet materiam, & alterum non, vel si habet non est eiusdem rationis cum materia sui contrarij, & huiusmodi contraria differunt genere, quoniam sicut differentia secundum speciem sumitur à forma, ita differentia secundum genus .s. physicum sumitur à potentia, & à materia. Talia contraria sunt corruptibile & incorruptibile, & quidem quod sint contraria manifestatur ex hoc quod alterum dicit potentiam, alterum impotentiam, nam, ut diximus in 5. lib. in capite de potestate. Quæcunque sunt impossibilia & immutabilia, & non de facili in peius mobilia dicunt potentiam per quem modum durum & sanatiuum dicunt potentiam naturalem non pariendi à corruptentibus. Quæcunque aut mutabilia sunt in deterius & non valentia resistere contrarijs dicunt impotentiam,

tiam, vt molle, & ægrotatiuum, & quoniam incorruptibile est immutabile indeterius, corruptibile autem est opposito modo, ideo incorruptibile dicitur potentiam, corruptibile autem impotentiam, sed potentia & impotentia, vt dictum est in 5. lib. in eod. cap. se habent vt habitus & priuatio, ergo opponuntur priuatiue, sed non pure priuatiue, quoniam impotentia non est tantum negatio, sicut nec iniustitia, ergo ita opponuntur priuatiue, quod opponuntur etiam contrariæ, sicut duæ qualitates contrariæ, ut durities & mollities. patet igitur, quod corruptibile & incorruptibile sunt contraria. Quod autem distinguantur genere, probatur sic. Quæ distinguuntur materia distinguuntur genere, quoniam genus sumitur à materia, sicut differentia à forma, sed corruptibile & incorruptibile distinguuntur materia, quoniam incorruptibile, vel est incorporeum, & sic non habet materiam vt intelligentia vel est corporeum, vt cælum & licet habeat materiam, non tamen generabilem, sed tantum localem, vt declarauimus in lib. 9. in cap. 3. corruptibile autem habet materiam & generabilem, ergo distinguuntur genere.

Præterea, quæ sunt vnius generis physici sunt transmutabilia adinuicem, sed corruptibile non potest fieri incorruptibile, nec econuerso, quoniam vnumquodque est corruptibile, vel incorruptibile secundum substantiam, quod autem est tale per substantiam est necessario & immutabiliter tale, ergo &c. patet igitur quod aliqua contraria differunt genere, & quæ sint illa.

Et aduerte, quod ex prædictis, patet falsitas opinionis quorundam, qui opinabantur quod in eadem specie quædam possunt esse corruptibilia, & quædam incorruptibilia, immo quod idem potest esse pro vno tempore corruptibile, & pro alio incorruptibile, sicut in eadem specie potest esse aliquod indiuiduum album, & aliquod nigrum, & idem indiuiduum pro vno tempore album, & pro alio nigrum, sed quod id falsum sit patet ex dictis, quoniam corruptibile & incorruptibile sunt contraria substantiali, album autem & nigrum sunt contraria accidentaliter. Prædicantur enim corruptibile & incorruptibile per se, & substantialiter de his quorum sunt. Album autem, & nigrum prædicantur accidentaliter, & ideo non

non est eadem ratio, & confirmatur per Cōment. in cōm. 26. vbi inquit. Et est differentia inter contraria essentialia & accidentalia, quoniam accidentalia possunt esse in illo in quo sunt & non esse, essentialia vero necessario sunt, corruptibile & incorruptibile, sunt de rebus necessarijs in rebus quæ disponuntur per illa.

Pater etiam falsitas opinionis Platonice de ideis, dicunt enim Platonici quod species separata ut per se homo & singulare illius speciei, ut Socrates sunt eiusdem naturæ ita quod homo prædicatur uniuoce de per se homine & de Socrate, & tamen secundum eos per se homo est incorruptibilis & Socrates corruptibilis. Quod quidem ex dictis apparet impossibile, nam probatum est corruptibile & incorruptibile distingui genere, ergo & specie, ergo impossibile est hominem corruptibilem & hominem incorruptibilem esse eiusdem speciei loquendo secundum naturam, quod dico

quoniam & si diuina virtute possit præseruari æternum corruptibile, ne corrumpatur, tamen non potest natura corruptibilis

transmutari in naturam incorruptibilem. Quo autem genere, scilicet logico vel

physico, differant corruptibile

& incorruptibile, & quomodo materia est principium distinctionis secundum genus

determinabimus in questionibus nostris. Hæc de quinto capite dicta

sint.

¶


¶

¶

¶

EIVSDEM CHRYSOSTOMI
IAVELLI CANAPITII

E P I T O M E
SVPER LIBRO DVODECIMO
M E T A P H Y S I C A E .



OSTQVAM locuti sumus de ente & partibus, & proprietatibus eius in hoc vltimo lib. considerandum restat de primis & vniuersalibus causis entis, diximus enim in primo tract. primi libri, in cap. 5. quod in quacunque scientia constituitur finis in cognitione causarum sui proprii subiecti. Has autem causas dicimus esse intelligentias, quæ motu cæli causant inferiora, & Deum gloriosum qui est totus entis prima & vniuersalissima causa, & totam intentionem Arist. complectemur in vnico tract. quem distinguemus in octo capita.

Primo, repetendum est, quod dictum est in lib. 7. & 8. q. metaphysicus qui est consideratiuus entis, præcipue habet considerare de substantia.

Secundo, diuidenda est substantia in genera sua, & agendum est de principijs substantiæ sensibilis.

Tertio, scrutandum est, si sunt eadem principia substantiæ & aliorum generum.

Quarto, probandum est, quod vltra substantias sensibiles corruptibiles, & incorruptibiles, necesse est dare aliquam substantiam æternam semper agentem & mouentem, cuius substantia sit actus & sic immaterialis.

Quinto, inuestigandum est, quæ sit perfectio quam habet primum

primum mouens immotum.

Sexto, inquirendum est, si substantia æterna est vna tantum, vel plures.

Septimum, soluenda sunt quædam dubia, quæ accidunt circa primum mouens in quantum est intelligens.

Octauo, inuestigandum est, si primum mouens est bonum, & optimum totius vniuersi.

C A P V T P R I M V M.



IRCA primum caput, aduerte, q̄ in 7. lib. tex. 5. proposuit, & probauit Arist. hanc conclusionem, consideranti de ente vniuersali sufficit considerare de substantia, quoniam ipsa sola est ens simpliciter, & accidentia nō sunt entia nisi in ordine ad substantiam.

Hic autem repetit idem sub hac conclusione prima philosophia quæ est consideratiua entis habet theoriam præcipue circa substantiam cum debeat considerare primas & vniuersales causas substantiarum, tam corruptibilium, quàm incorruptibilium, & hanc conclusionem probat ferè eisdem medijs quibus vsus est in lib. 7. & 1. sic, prima philosophia est præcipue consideratiua de primo ente, primum autem ens est substantia, & quidem quod substantia sit primum ens probauit in lib. 7. ratione & signo, vt videre poteris supra, in lib. 7. cap. 1. hic autem manifestat sic, si vniuersum est quoddam totum sicut animal aut domus, patet quòd sicut in animali datur prima pars, puta cor, & in domo fundamentum, sic in vniuerso datur primum ens, quòd est substantia, & si vniuersum non est, ut totum continuum, sed vt totum, in quo vna pars consequenter se habet ad aliam, vt in exercitu cuius forma est ordo, patet quòd sicut in tali toto est prima pars, puta prima acies sic in vniuerso datur primum ens, quòd est substantia. Et si dicas, quòd accidentia possunt dici primum ens sicut substantia: Contra, ens proprie & simpliciter dicitur q̄ habet esse, sed accidens non est id, quod habet esse, sed quo aliquid habet esse, vt calore aqua habet esse calidum, substantia autem est quæ habet esse, ergo &c.

Si autem dicas quod ad hoc quod aliquid sit ens simpliciter & primum, sufficit ens, quocunque modo prædicari de eo, contra, ergo priuationes erunt simpliciter ens, dicimus enim quod hoc non album, puta linea est ens, & hoc non rectum, puta color est ens. Hoc autem est absurdum, quoniam priuatio, non alio modo dicitur ens, nisi quia relinquitur subiectum, unde potius est entis quam ens, differenter tamen ab accidente, quoniam intrinsece accidens dicit aliquam entitatem, priuatio autem extrinsece, id est ratione subiecti. quod concernit & in hoc distinguitur à simplici negatione, sic igitur manifestum est substantiam esse primum ens.

Præterea, accidentia non possunt separari à substantia, sed bene econuerso, ergo patet, quod est primum & simpliciter ens, ex consequenti spectat ad philosophum primum considerare præcipue de substantia.

Et huic conclusioni testimonium perhibent antiqui qui ut etiam diximus in 7. considerantes de ente, arbitrabantur se satis agere, considerando de substantia. Quærentes enim causas entium quærebant causas solius substantiæ, ut pote arbitantes solam substantiam esse ens. Tamen inquirendis causis substantiæ differenter se habebant, nam moderni, id est Plat. posuerunt vniuersalia, esse causas substantiæ particularis. Antiqui autem ut Thales & Emp. & alij posuerunt substantiam particularem, puta aquam aut ærem &c. esse causam substantiæ particularis, de ijs autem opinionibus satis locuti sumus in primo lib. & in 3. & in 7. & in 10. Hæc de primo capite dicta sint.

CAPUT II.

IN secundo capite diuidenda est substantia in genera sua & de principijs substantiæ sensibilis agendum est.

Tu igitur aduerte, substantiam diuidi in tria genera. Prima, est substantia sensibilis corrupt. quam omnes consentiunt, ut plante, & animalia.

Secunda, est substantia sensibilis incorrupt. mobilis tamē motu locali sphærico, ut cælum, cuius principia motiua inuestigabimus in hoc libro, quærentes qualia & quot sint,

&

& hæc principia sunt prima causa & intelligentiæ.

Tertia est, insensibilis immobilis & hoc, quoniam non est sensui manifesta, diuersimode à diuersis ponitur, nam Plato ponit huiusmodi substantias esse vniuersalia abstracta à singularibus sensibilibus, & vocat species siue ideas, de quibus satis locuti sumus in 1. lib. & in 7. ponit etiam mathem. abstracta à materia sensibili, quæ quoniam videbat in sui ratione non includere materiam sensibilem, opinatus est ea esse separata etiam secundum se. Pythag. autem non posuit ideas, sed sola mathem. separata. Arist. autem, vt patebit infra, neutrum, posuit, sed substantias immateriales intellectuales motrices orbium & secundum se immobiles & in speculatione earum terminabitur consideratio huius scientiæ. Et aduerte, quod istæ tres substantiæ, ita se habent quod duæ primæ ad physicum pertinent, secundum propriam rationem. Sunt enim entia mobilia, tertia autem cum sit immobilis & immaterialis ad hanc scientiam spectat. Quod si prima & secunda considerantur in hac scientia non considerantur secundum propriam rationem, sed vt continentur sub ente quod est subiectum huius scientiæ & commune prædicatum de omni substantia.

Diuisa substantia in tria genera primus consideranda sunt principia primi & secundi generis, vltimo autem principia tertij generis, & quoniam substantia sensibilis est composita, prius agendum est de principiis intrinsecis componentibus, deinde de principio productiuo siue de causa efficiente, principia autem intrinseca componentia sunt materia & forma. Prius igitur agendum est de materia, deinde de forma, de materia, autem quatuor agenda sunt.

Primo, quod in omni substantia sensibili est materia.

Secundo, quod materia est ens in potentia.

Tertio, quod alio modo est materia in substantia sensibili corruptibili, & alio modo in substantia sensibili incorruptibili.

Quarto, soluendum est quoddam dubium.

Quantum ad primū, aduerte, quod Arist. probat propositū eo quod omnis substantia sensibilis mutabilis est, in omni autem mutatione requiritur materia & id iam manifestatū est in lib. 8. cap. 1. & tu vide illic, quoniam in snia idem dicit & id & illic.

Quantum ad secundum, aduerte q̄ Arist. iam declarauit propositum in lib. 8. & nos breuiter declaramus in eodem lib. cap. j. Hic autem Arist. sic manifestat in omni mutatione tam substantiali, quàm accidentali est subiectum, q̄ modo est sub vno termino modo sub opposito, ergo quantum sit ex se neutrum naturaliter habet, si enim naturaliter vnum haberet non esset receptiuum alterius, ergo ex sui natura est in potentia ad vtrunque, sicut igitur corpus in quantum corpus non est album, nec nigrum, sed est in potentia ad vtrunque sic materia, quæ est subiectum in transmutatione substantiali, neque hanc, neque aliam formam habet in quantum materia, sed est in potentia ad omnem, & ad oppositum q̄ est priuatio. Ex quo sequitur q̄ non est necesse concedere aliquid fieri ex puro non ente, nec ex ente in actu, sed ex ente in potentia, & nō ente in actu, vt declaratum est in 1. phys. tex. 73. Et aduerte, q̄ Arist. declarat non solum per rationē adductam, materiam esse ens in potentia, sed etiam positione antiquorum, quia licet imperfecte videntur cognouisse potentialitatem materiæ, vt Anaxag. qui posuit omnia confusa, & in potentia in illo chaos, deinde fieri actu per intellectum separantem, & Emped. posuit omnia confundi per amicitia & distingui per litem, præcipue quo ad omnes partes principales vniuersi, idem somniauit Anaximand. & Democ. quorum positiones iam manifestauimus in 1. lib.

Quantum ad tertium, aduerte, q̄ in 8. lib. in cap. 3. iam manifestauimus propositum, & Aristot. hic nihil noui dicere idem, ergo illic.

Quantum ad quartum, aduerte, q̄ ex prædictis oritur dubium, nam si generatio sit ex non ente cum non ens dicatur tripliciter .s. non ens purum non ens q̄ est priuatio, non ens actu, dubitatur ex quo non ente sit generatio, & ad hoc quidem responderetur, vt respōsum est in primo phys. tex. 75. quod ex non ente puro, nihil naturaliter fit. Ex non ente autem quod est priuatio aliquid fit, sed per accidens, ex non ente autem actu, sed ente in potentia, qualis est materia sit aliquid per se.

Sed dices, si res sit per se ex materia, quæritur si omnia sunt ex eadem materia, vel si diuersorū est diuersa materia.

Ad

Ad hoc iam responsum est in lib. 8. in cap. 3. & tu reuide illic, & sufficit.

De forma autem tria dicenda sunt.

Primo, q̄ forma non est id, quod sit sicut nec materia.

Secundo, quòd formæ naturales non sunt separatæ à materia.

Tertio, quòd positio Platonis de ideis nullam habet necessitatem.

Quantum ad primum, aduerte, id iam probatum fuisse in lib. 7. cap. 6. & idem medium tangit in lib. 7. & hic.

Quantum ad secundum, aduerte, q̄ in lib. 8. in cap. 3. idem propositum probatum est, & quo ad formas artificiales, & quo ad formas naturales, sed hic alio medio probat, & de formis naturalibus, & sic arguit. Inter causam mouentem & formalem, hæc est differentia quod mouens, siue produ- cens est præcedens motum & productum, quoniam produ- cens est principium productionis, productum autem est ter- minus, cum igitur omnis productio naturalis sit cum motu, & omnis motus sit in tempore necesse est mouens, siue pro- ducens præcedere rem productam, forma autem simul est cū eo cuius forma, nam quando Socrates sanatur incipit esse eius sanitas & non præcedit, quoniam, vt inquit Comment. in comm. 16. causæ per quas res sit ens & vnum sunt insimul cum eo per quod sit totum cum talem dispositionē habeant in congregato, sicut partes in toto. Huiusmodi autem causæ sunt forma & materia ex quibus constituitur substantia sen- sibilis loquendo de forma propria & materia propria, ergo non habent esse, ante illud cuius sunt forma & materia, ex consequenti forma non potest esse separata à materia, aliter non solum præcederet id cuius est forma, sed esset æterna ad mentem Arist. probabitur enim in hoc lib. quod omne sepa- ratum & immateriale est æternum.

Sed dices, si forma non potest præcedere id cuius est for- ma, nunquid potest subsequi, ita quod remaneat etiam cor- rupto eo cuius est forma.

Respondet Arist. quod nihil prohibet aliquam subsequi, & erit illa cuius esse non pendet à materia, & cuius opera- tio non exercetur organo corporeo, & talis est anima, non

E P I T O M E L I B. XII.

Vt anima, qm̄ omnis anima posset subsequi, sed vt intellectu-
ua, quasi dicat anima vt vegetabilis & sensitua, & desiderati-
ua, non potest subsequi, quoniam nullam habet vt sic opera-
tionem sine corpore, sola igitur intellectiua est talis, ideo di-
cit philosophus sed intellectus omne nanque impossibile
forsan, & aduerte quod ly forsan non stat dubitatie, sed vt
tur hoc modo loquendi, quoniam vt inquit Cômēt. in côm.
17. demonstratio super hoc non est istius artis, sed libri de
Anima qui & concordat B. Thom. in expositione, vtrum au-
tem ex hoc tex. possit firmiter concludi animam intellectu-
uam esse formam dantem esse homini & esse incorruptibile,
declarabitur in quæst. Metaph.

Quantum ad tertium, aduerte, quòd Plato vt declaravi-
mus in lib. 7. cap. 6. ex pluribus causis opinatur ideas necessa-
rias inter quas hæc fuit tertia causa, vt scilicet posset assigna-
ri causa productiua horum singularium corrupt. cui hæc sin-
gularia essent similia, sed inquit philosophus hoc non est ne-
cesse, quoniam vt dicitur nunc, vnū quodque fit à suo simili
homo. n. hominem generat & hic homo hunc hominē, & in
artibus sanitas ad extra, à sanitate quæ habet esse cognitū in
intellectu medici. Quapropter positio Plat. in hoc vana est.

Postquam considerauius de principijs intrinsecis substā-
tiæ sensibilis, hic considerandum est de principio producti-
uo, quod est extrinsecum. Aduerte igitur, quòd cum substan-
tia sensibilis fit duplex, scilicet corruptibilis & incorruptibi-
lis, vt est cælum non est idem principiū productiuum pro-
prium est agēs sibi simile in specie, ita quòd vnumquodque
fit à suo simili & vniuoco, & id declarat Arist. sicut & in 7. lib.
& nos idem declarauimus diffuse in eodem lib. in cap. 6. nec
Arist. hic aliquid noui addit, Ideo vide tu in 7. lib. cap. 6. de
principio autem productiuo cœli loquemur infra. Hæc de
secundo cap. dicta sint.

C A P V T I I I.

IN 3. cap. inuestigandū est si sunt eadem principia substā-
tiæ & aliorum generum. puta quantitatis qualitatis &
aliorum generū. Pro cuius resolutione, tria agēda sunt.

Primo,

Primo, præponitur dubium.

Secundo, arguitur ad partem negatiuam.

Tertio, determinabitur veritas circa hoc.

Quantum ad primum, aduerte quòd proponitur dubiũ sub tali forma dubitabit aliquis vtrum altera aut eadem sint principia & elementa substantiarum & eorum quæ sunt ad aliquid & cuiuslibet prædicamenti.

Et aduerte, quod de prædicamentis accidentium non nominat nisi ad aliquid, quoniam propter debilitatem sui esse, vt inquit Cõment. in cõm. 19. quidam, putauerunt relationẽ esse de secundis intellectis, id est esse ens rationis, non enim sibi se est ens reale, sed suam realitatem trahit à fundamento, quod est quantitas aut actio & passio, vt dictum est in lib. 5. vtrum autem fundetur immediate in substantia, & in qualitate determinabitur in q. Metaph.

Quantum ad secundum, aduerte, quòd Arist. duplici ratione probat non esse eadem.

Prima est, si eadem sunt principia substantiæ & aliorum generum, aut illa sunt extra substantiam & extra alia gñā, aut sunt in substantia vel in aliquo alio genere, non potest dici primum, quoniam si sunt extra substantiam & extra omnia genera accidentium erunt communiora & priora substantiæ & alijs generibus accidentium, principium enim prius est principiatis, sed nihil est communius & prius substantiæ & accidentibus, quoniam omne quod est, aut est substantia, aut accidens, nec valet, si dicatur quod ens & vnum secundum Plat. sunt principia rerum, & tamen sunt communiora & priora substantiæ, & accidente, id inquam non valet, quoniā positio Plat. in hoc, quæ etiam fuit Pythag. reprobata fuit à nobis, in lib. 3. cap. 7. nec potest dari, secundum, quoniam si sunt in genere substantiæ, erunt substantia, & tunc principia accidentium erunt substantia, & sunt in aliquo genere accidentium erunt accidentia, & accidentia erunt principia substantiæ, vtrumque autem videtur inconueniens, quoniam principium debet esse homogeneum principiato, vnde inquit Comment. in cõm. decimonono omne cuius elementum est substantia & ex consequenti, cuius elementum est accidens, est accidens ex quibus sequitur quod omnia aut erunt substantia

substantia, aut erunt accidens.

Secunda ratio, supponitur quod elementum & principium non sint idem cum eo cuius est elementum & principium, nam sumpto elemento pro principio intrinseco, constat quod elementum est quid simplex, & id cuius est elementum est compositum, constat autem quod compositum & simplex non sunt idem, ut syllaba, ba, non est idem cum A, nec cum B, similiter sumpto principio pro principio productiuo constat quia non est idem cum eo, cuius est principium; nihil enim à seipso producit. Hoc supposito arguitur sic, si sunt eadem elementa & principia substantiæ, & aliorum generum, sequitur ex supposito, quod non sint substantia, nec aliud genus entis, quod est falsum, quoniā omne quod est, aut est substantia, aut accidens.

Sed videtur suppositum non esse vniuersaliter verum, quoniam diceret Plat. ens & vnum esse principium omnium, & tamen esse idem cum his quorum sunt principium, prædicatur enim de omnibus. ergo &c.

Ad hoc dicitur, quod Plat. ponit ens & vnum principium omnium, cogitur concedere, quod non sint idem cum ijs quorum sunt principium nā si sunt principia omnium, sunt principia & simplicium & compositorum, ergo si sunt eadē cum his quorum sunt principia, sequitur quod simplex & compositum sint idem, quod est falsum ut patet, consequentia probatur quæ sunt eadem vni, tertio sunt eadem inter se.

Quantum ad tertium, aduerte, quod huic quæsito non potest responderi vna responsione, quod sint eadem simpliciter nec quod sint diuersa simpliciter, quoniam in vno sensu sunt eadē, in alio sunt diuersa, pro cuius intelligentia, aduerte quod sūm proportionem vniuersaliter sumpta sunt eadē. In specie autem & in genere, non sunt eadem. Item principia prima sunt eadem, proxima autem non sunt eadem.

Et quod sint eadem secundum proportionem declaratur, primo in principijs intrinsecis, secundo in principijs extrinsecis, & intrinsecis simul. Quo ad principia intrinseca declaratur duplici via, primo principia intrinseca sunt forma, & materia, & priuatio. & ista licet propriæ inueniantur in substantia sensibili, tamen per quandam proportionē inueniuntur

tur etiam in genere accidentium, nam sicut in substantia, puta in lapide est forma lapidis, & materia, quæ recipit formam, in qua materia est priuatio alterius formæ, sic in genere accidentium, puta in colore est albedo, vt forma, & nigredo, vt priuatio, & superficies receptiua coloris, vt materia, & in distinctione temporum lumen est, sicut forma tenebra, vt priuatio, aer sicut materia, in qua recipitur lumen, & tenebra. & ex his tribus constat dies, & nox. secunda principia intrinseca communia omnibus sunt actus & potentia. omne enim ens, aut est in potentia, aut in actu, aut compositum ex potentia, & actu, licet autem sint communia omni enti, tamen diuersificantur in diuersis, nam quædā sunt pro aliquo tempore in potentia, & pro aliquo tempore in actu, vt corrup. Quædam sunt semper actu, vt entia incorrup. Item actus, id est forma diuersificantur in diuersis. alia est enim forma lapidis alia hominis, alia equi, simile est de materia proxima, ut patet, & aduerte, quod Arist. reducit hanc secundam viam ad primā, nam sub actu comprehendit formam, & priuationem sub potentia comprehendit materiam.

Quod autem principia intrinseca, & extrinseca sint proportionaliter eadem in omnibus, declarat sic. tria sunt principia intrinseca materia, forma priuatio. Hæc enim tria intrinsece concurrunt in omni factione naturali. principia autem extrinseca sunt efficiens, & finis, quæ etiam concurrunt in omni factione naturali, tam substantiali, quam accidentali. omne enim quod fit, ab aliquo fit, & gratia alicuius fit, nisi fiat à casu, sicut igitur in productione substantiæ inueniuntur materia, & forma, & priuatio, & efficiens, ita inueniuntur proportionaliter in productione accidentium. nam si calefit aqua, materia est aqua, forma est calor, frigiditas priuatio, calefactens ignis.

Et aduerte, quod ideo non facit mentionem de finali causa, quia multoties coincidit cum causā formali, est. n. forma quæ dat esse rei, & quæ est finis generationis. licet autem istæ quatuor causæ inueniantur in omni quod fit, siue ab arte, siue à natura, tam substantialiter, quam accidentaliter, tamen contractæ, & applicatæ sunt diuersæ in diuersis. nam in sanatione, forma est sanitas, priuatio ægrotudo, corpus materia,

materia, efficiens ars medicatina, & in ædificatione, ordinatio partium est forma inordinatio, priuatio lateres materia, ædificator agens.

Tu tamen aduerte, q̄ licet sint quatuor causæ, tamen in factione vniuoca possunt reduci ad tres. nam efficiens, & forma producti sunt eiusdem speciei pro quanto forma efficiētis, quæ est in eo principium agendi, & forma rei productæ sunt eisdem speciei, vt anima hominis generantis, & anima hominis geniti, & sanitas in mente medici, & ea quæ est causata in infirmo sunt eiusdem rationis, licet distinguantur in esse, sicut albedo in pariete, & albedo intèrionalis in medio. Dixi autem in factione vniuoca, quoniam in æquiuoca non est necesse effectum assimilari causæ in eadem specie, vt patet in his quæ generantur ex putrefactione, de quibus locuti sumus in lib. 7. cap. 6.

Quòd vero principia prima sint eadem omnium, quæ sunt, declaratur triplici via.

Primo, omnia quæ producuntur, & mouentur pendent à prima causa, & accipiunt esse per ipsam, vt declaratum est in lib. 2. & manifestabitur infra in tex. 38. vbi dicit Arist. quod à tali principio pendent cœlum, & natura, id est superiora, & inferiora.

Secundo, omnia quæ sunt, aut sunt substantiæ, aut accidentia, quæ ita se habent, quod substantiæ sunt separabiles ab accidentibus, & non econuerso, quoniam substantia est ens per se, accidens autem est ens in alio, vt declaratum est in lib. 7. sed principia substantiæ sunt etiam principia accidentium suorum, vt ab eodem est ignis, & calor, & siccitas, & leuitas.

Tertio, omnia quæ sunt in mundo inferiori procedunt ex corpore cœlesti, & anima eius, quæ est intelligentia mouens per intellectum, & desiderium, vt declarabitur infra, patet igitur, quomodo sunt eadem prima principia omnium ratione primæ, & vniuersalissimæ causæ, à qua sunt omnes gradus entis, & ratione principiorum substantiæ, quæ etiam sunt principia accidentium, & ratione corporis cœlestis, à quibus pendent omnia inferiora. Quod autem principia proxima, tam intrinseca, quàm extrinseca non sint eadem omnium patet, quoniam diuersorum diuersæ sunt formæ, quarū vnæqueque

quæque recipitur in propria, & distincta materia, vt declarauimus in 8. lib. in cap. 3. similiter diuersorum specie, & diuersorum numero diuersa sunt productiua numero. nam sicut est homo ab homine, ita hic homo ab hoc homine, idem dico de leone, & equo &c. constat igitur, quomodo sunt eadem, & quomodo diuersa principia substantiæ, & aliorum generum.

Nunc superest soluere argumenta, quibus probari videtur, quod nullo modo sint eadem.

Ad primum dico, qd principia prima, quæ sunt deus, & intelligentia, & cælum sunt in genere substantiæ. i. in hoc comuni quod est substantia, & cum arguitur. ergo omnia erunt substantia, negatur consequentia. & cum probatur, quoniã principium debet esse homogeneum principiato. hæc propositio non est vera, nisi in principio proximo, & præcipue in principio productiuo productione vniuoca.

Ad secundum negatur consequentia. s. qd non sint substantia, nec aliud genus entis. nam licet principium sit distinctum numero à principiato. nõ tamen est necesse, quod distingatur genere, aut specie. nam Socr. generans, & Plato genitus sunt indistincti specie, & equus generans mulum sunt indistincti genere animalis, & sol generans ranam, sunt indistincti in genere substantiæ, similiter non valet hæc consequentia, si ens, & vnum sunt principia simplicium, & compositorum, & si principium nõ distinguitur ab his, quorum est principium, sequitur qd sint idem simplex, & compositum. Hæc inquam non valet, quia cum identitate generica, siue specifica, stat distinctio numeralis inter principium, & principiaturum. Quod si inter principium, & principiaturum itaret identitas numeralis argumentum concluderet. nam bene sequitur, est idem numero principium simplici, & compositi, & non distinguitur numero ab eis. ergo sunt idem simplex, & compositum. Hæc de tertio capite.

C A P V T I I I I.

IN quarto capite probandum est, quod ultra substantias insensibiles corrupt. necesse est dare aliquam substantiam immo-

immobilem æternam semper agentem, & mouentem, cuius substantia sit actus, & immaterialis. & pro vniuersali resolutione tria agenda sunt.

Primo, probabitur conclusio quo ad singulas partes.

Secundo, mouebitur dubium circa illam particulam conclusionis, cuius substantia sit actus.

Tertio, ex determinatione dubij declarabitur perpetuitas generationis, & perpetuitas motus cœli, & perpetuitas motoris immobilis.

Quantum ad primum, aduerte, quòd conclusio tres partes continet.

Prima, datur aliqua substantia æterna immobilis.

Secunda, quæ semper est agens, & mouens.

Tertia, quæ est actus immaterialis.

Prima pars sic probatur, cum substantiæ sint prima entia, ita quòd destructis illis nullum esset ens, vt declaratum est in lib. 7. si nulla est substantia æterna, nullum erit aliud ens æternum, sed hoc est impossibile. nam probatum est motum localem circularem esse continuum æternum, ex 8. phys. eo quod tempus, quod est idem cum motu, vel saltem propria passio motus, est æternum. nam si tempus incepisset prius fuisset non esse temporis, quam esse eiudem, & si desineret esse, posterius esset non esse temporis, quam tempus, sed nõ datur prius, & posterius sine tempore. ergo ante tempus esset tempus, & post tempus adhuc esset tempus, quod implicat contradictionem, tempus ergo est æternum, ergo & motus, cum sint idem, vel saltem se habent, vt subiectum, & passio, tunc ultra motus est æternus, ergo datur substantia mouens æterna. nam motus de necessitate includit mouens, & non solum mouens, sed & mobile, vt declaratum est in 8. phys. necesse est ergo dare aliquam substantiam æternam immobilem. & quidem quod sit immobilis probabitur infra. Et tu aduerte, quòd licet conclusio sit vera, tamen medium assumptum ab Aristot. non est verum, ideo alio medio, & vera conclusio probanda est, quod medium videbis in quæst. nostris metaphys. & c.

Secunda pars sic probatur, si substantia æterna, à qua est motus æternus incessanter, & continuus non esset semper, &

& continuæ mouens, ac agens motum, sed esset motuum, & effectuum, id est esset habens potentiam ad mouendum non esset necessario motus æternus continuus. non enim est necesse motuum semper mouere, & effectuum semper efficere, sed necesse est motum esse æternum, quia necessario tempus est æternum, ergo &c. Ex qua sequitur corollarie, & cum ratio ponendi substantiam æternam sumatur apud philosophum à motu æterno, vana fuit opin. Plat. & inutiliter posuit species substantias separatas. nam cum sint vniuersalia, & vniuersale non mouet, sed singulare. est enim actio singulare, huiusmodi species nihil proficiunt ad motum, ex consequenti vane ponuntur.

Et tu aduerte, quòd secundum veritatem. hæc secunda pars conclusionis, & medium, cui innititur, sunt falsa. Deus enim agere ad extra incepit in tempore, & si arguitur quod cum actio dei sit substantia sua. sicut substantia sua est æterna, ita actio sua est æterna, ergo & motus, & mundus æternus. huic argumento respondemus in quæst. metaph. & tu quære in quæstione, in qua quæritur, si B. Th. sufficienter soluit rationes philosophi, de æternitate mundi.

Tertia pars sic probatur: & primo, quod eius substantia sit actus. nam illud, in cuius substantia est potentia. s. passiuæ, possibile est, vt non sit ens. dicit enim Cōment. in cōm. 30. determinatum est in naturalibus, qd omne, cuius substantiæ admiscetur potentia, est generabile, & corruptibile. ergo si substantia huius substantiæ æternæ non sit actus poterit non esse, ergo non mouere. ergo poterit motus non esse æternus, quod reputat Aristot. omnino impossibile: secundò probatur, qd sit immaterialis, nā si habet materiam est in potentia passiuæ, & si est in potentia passiuæ, potest non esse ens ex prædictis sic potest non esse ens non æterna, sed per primam partem cōclusionis iam probatum est, qd necesse est ipsam esse æternam. ergo necesse est ipsam esse immaterialē.

Et tu aduerte, quòd licet vtræque pars huius tertiæ partis sit vera, tamen media absumpta ab Arist. non habent necessitatem, nam ex sempiternitate motus probat non esse potentiam passiuam in hac substantia æterna. & tamen hæc sempiternitas motus non est vera. & propterea alio medio probandum

probandum est hanc substantiam, non habere potentiam in substantia sua sic, hæc substantia est incorruptibilis secundum substantiam, ergo non est in potentia secundum substantiam, consequentia patet ex eo quod potentia passiva est potentia contradictionis, ut dictum est in lib. 9. antecedens autem probatur apud Theologum, ut videbis in 1. parte B. Th. in q. 50. art. 5. similiter medium, quo probat Arist. quod est immateriales, quia est æterna non videtur concludere, aliter nullum habens materiam esset æternum, & incorruptibile. & sic cœlum non esset æternum, nec est distinguendum hic de materia subiecta, vel non subiecta priuationi, quoniam Arist. intendit hic negare omnino materiam ab huiusmodi substantia, aliter non posset ipsam saluare esse immobilem. Dixit. n. in 3. lib. tex. 4. quæcunque habent materiam mobilia, & mutabilia sunt. & ideo immaterialitas huius substantiæ melius probatur ex intellectualitate, ut probat B. Th. 1. parte, q. 50. art. 2. utrum autem Arist. probans dari substantiam æternam. prober de omnibus intelligentijs, an tantum de prima causa, & posito quod prober de omnibus indistincte, qua procedendum est ad probandum primam causam esse, hæc videbis resoluta in nostris quæst. metaph.

Quantum ad secundum, aduerte dubium oriri ex eo, quod concludit substantiam æternam esse actum. nam cum substantia æterna sit prior omni alia substantia, aliter si haberet priorem non esset æterna, & sic actus, videtur quod actus sit prior potentia. Quod tamen videtur dubium. & ideo Arist. arguit ad partes. & primo ad partem negatiuam sic. Omne agens actu, potest agere, nam si non haberet potentiam ad agendum, non agere, sed non omne potens agere agit, ut patet, ergo actus non est prior potentia, sed potentia est prior. probatur consequentia, quoniam ab actu ad potentiam, est bona consequentia, & non econuerso, ergo &c.

Pro parte autem affirmatiua sic. Si potentia est simpliciter, & vniuersaliter prior actu, sequitur quod aliquando nullum fuerit ens actu, nec etiam nunc sit, quod est manifeste falsum, consequentia sic declaratur. Quod est in potentia. s. passiva non reducitur ad actum per seipsum, sed per aliquod existens actu, videmus enim in artificiatu, quod materia puta
ferrum

ferrum non sit gladius actu, nisi per artificem, in cuius mente est actu forma gladij, nec mentitruum recipit formam animalis, nisi per semen, in quo est actu virtus generantis. ergo si omnia fuerunt aliquando in potentia. siue in quadam confusione secundum Anaxag. siue in nocte, id est sub quadam informitate, secundum poetas Theologos, sequitur quod nihil fuisset productum in actu. & sic nunc nullum esset ens actu, quod cum sit manifeste falsum, patet quod actus est simpliciter prior potentia.

Pro determinatione huius dubij remittit se Aristot. ad ea, quæ dicta sunt in libro nono, & tu vide ea, quæ diximus in libro 9. in capite quarto, & sufficient pro resoluta determinatione huius dubij, & inuenies quod actus simpliciter est prior potentia, cui attestantur plures antiquorum. nam & Anaxag. posuit intellectum separantem res prius confusas, & Empedocles posuit ultra quatuor elementa duas causas agentes litem, & amicitiam, & Leucippus, & Plato posuerunt semper motum. Motus autem includit mouens, & mobile, sicut & agens necessario est actu. cum igitur sit actus simpliciter prior potentia, bene conclusum est primam substantiam, quæ est substantia æterna, esse actum, & non potentiam passiuam.

Quantum ad tertium, aduerte, quod ex quo actus est prior potentia simpliciter arbitrabatur Arist. rerum generatione esse perpetuam, ut etiam conatus est probare in lib. 2. de generatione, credit enim quod cum vnum quodque generetur à suo simili, fuerit homo ab homine in infinitum, & equus ab equo in infinitum. Quapropter apparet esse falsa opinio antiquorum ponentium omnia præexistisse in quadam confusione, vel sub informitate, quam appellabant noctem, eo quod sicut in nocte non apparet rerum distinctio, & forma, sic, nec in primo rerum statu, apparebant res distincte, & formate, hanc tamen perpetuam generationem, & corruptionem non debemus existimare secundum idem numero, sed secundum speciem, & per quandam circulationem, & non in rectum, ut declaratum est in libro secundo de generatione, in tex. 70. & tu aduerte quod pro rei veritate ex hoc antecedente vero. Actus est simpliciter

prior potentia non sequitur necessario hoc consequens. ergo generatio rerum, & corruptio est perpetua, quoniam secundum fidem tenemus primam rerum originem non fuisse naturalem, sed diuinam ex nihilo à primo principio, quod est purus actus, & sua æternitate omne creatum processit. Rationes autem quibus opinatur Arist. in 2. lib. de generatione propositum suum demonstrare iam soluimus in Epitomi nostra super lib. de generatione.

Et quoniam perpetua generatio circularis requirit causam perpetuam: ideo Arist. procedit ad declarandum huiusmodi causam. Tu igitur, aduerte, quod cum generatio apud Aristotelem sit perpetua, & se habeat aliter, & aliter secundum diuersa tempora, & diuersa climata, necesse est assignare duas causas agentes perpetuas, & sine quiete media, vna quidem est causa continuationis, & perpetuitas generationis, & corruptionis, & hoc est primum cælum quod mouetur solo motu diurno, quem diuidit æquinoctialis in duas media, & æque distat ab utroque polo. Altera autem est causa diuersitatis, & alternationis, quam videmus in generatione, & corruptione, & illi sunt planetæ, & præcipue sol, dum mouentur sub zodiaco, cuius medietas declinat ad arcticum, & illa medietas ad antarcticum, & in hemisphærio nostro, dum sol decurrit signa meridionalia fit corruptio. In alio autem hemisphærio fit opposito modo, & istæ duæ causæ ita habent, quod prima est causa perpetuitatis generationis sua propria virtute, secunda autem est causa diuersitatis sua propria virtute, sed quod causet perpetuam diuersitatem, hoc habet ex virtute primæ causæ. & cum hæc prima causa sit cælum primum motum motu diurno, sequitur ipsum esse dignius, non enim agit virtute planetarum, sed planetæ potius virtute primi cæli. Quare primum cælum dignius, & sempiternum est. & tu aduerte quod in lib. 2. de generatione tex. 56. 57. tradidit, quasi eandem doctrinam, vt videre poteris in Epitomi nostra, & idem perstringit Comment. paucis verbis in hoc lib. 12. cōm. 33. cum dicit, necesse est aliquod æternum esse, quod sit causa actionis æternæ, quia non agit, nisi vnā actionem, & aliquod æternum, quod agat actiones diuersas, vt ab eo sint acta diuersa. & hæc est dispositio

positio primi cœli in suo motu diutno, æternitas enim actionis prouenit ex eo, quod ipse facit vnâ actionem semper. Quæ autem faciunt actiones diuersas, sunt quæ mouentur in orbibus decliuius, & maximus eorum est sol. & motus enim & propinquus facit contraria.

Et quoniam motus perpetuus requirit mouens perpetuum, implicat enim dari motum sine mouente, si generatio est perpetua, & motus cœli perpetuus, necesse est dari mouens perpetuum, quod sit immobile, & existens, & eius substantia sit actus. Dico immobile, quoniam cum in ordine motorum, & mouentium datur aliquod motum, quod non mouet, & aliquod mouens, & motum, necesse est dare mouens non motum, aliter esset processus in infinitum, quod reprobatur in lib. 2. huius scientiæ, & in 8. Phyl. Huiusmodi autem mouens immobile est primum mouens, cuius virtute est cetetera mouentia mouent, & est causa motus primi cœli, qui est motus diutnus. Dico existens, quoniam nihil agit, aut mouet in ratione causæ efficientis, si non est actu, quoniam efficere supponit esse. Dico quod eius substantia sit actus, quoniam si esset potētia, scilicet passiva, vel ei admisceretur passiva potentia ratione talis potētis esset mobile, & transmutabile, dictum est enim in lib. 5. & libro nono potentiam passiuam esse principium transmutandi ab alio, vt ergo seruetur immobilitas primi mouentis, necesse est eius substantiam esse actum non admixtum potentis passivæ, ex consequenti esse purum actum, vtrum autem hæc sit proprietas primi principij determinabitur in questionibus nostris metaphysicalibus. Hæc de quarto cap. dicta sunt.

C A P V T V.

IN quinto cap. declaranda est perfectio primi mouētis immobilis, & aduerte, quod in toto hoc cap. erit sermo de primo, & vniuersali mouente, quem Arist. in tex. 39. appellat deum, ita quod in hoc cap. non habemus scrutari perfectionem substantiæ æternæ in genere, sed applicate considerabimus de diuina perfectione, quam ordinauimus,

per decem conclusiones.

Prima, mouens primum immobile, mouet, vt appetibile, & intelligibile.

Secunda, mouens primum immobile, cuius substantia est simplex, & actus est primum intelligibile.

Tertia, mouens primum immobile est primum appetibile, quod est optimum.

Quarta, primum mouens immobile, mouet suum mobile, quod est primum cælum, vt amatum, mouet autem motu locali, & per primum mobile mouet alia, qui motus est necessarius ex fine.

Quinta, ex primo mouente immobili, pendet cælum, & natura.

Sexta, primo mobili desideranti, & intelligenti primum mouens, inest dispositio delectabilis optima semper, qualis nobis inest paruo tempore.

Septima, speculatio, qua primum mouens intelligit seipsum est sibi delectabilissima, & optima.

Octaua, primum mouens, quod est deus, est sua vita sempiterna.

Nona, primum mouens nullam habet magnitudinem.

Decima, primum mouens est impassibile, & inalterabile.

Pro euidencia primæ conclusionis, aduerte primo, quod primo mouenti in moto, correspondet primum mobile, quod est primum cælum, non sumendo primum cælum tantum pro corpore cæli, sed pro aggregato ex corpore cæli, & intelligentia motricæ, quæ est vt anima cæli, & per quàm dicitur cælum animatum, cælum mouere seipsum, cælum distinguui in partem mouentem, & partem motam, vt declaratum est in 8. Phys.

Aduerte secundo, quod intelligentia primi cæli mouet cælum, quia intelligit, & desiderat aliquod optimum, vt finem, quod non potest consequi, nisi ex motu, sicut quod desiderat sanitatem, quam apprehendit non posse consequi, nec in ea conseruari, nisi per exercitium. Quod quidem optimum, vt eius finis non est aliquod sensibile, quoniam cum primum cælum sit nobilissimum inter omnia sensibilia, & intelligentia sit nobilior quocunque sensibilis, si finis, propter

propter quem mouet, esset aliquod sensibile moueret, vt con-
sequeretur aliquod indignius se, quod est irrationabile,
quoniam finis habet rationem perfectiui, dicendum est er-
go, vt dicit Cōment. in cōm. 36. quod id quod appetit est no-
bilissimum entium, hoc autem nō est nisi mouēs primum in
motum, vt dicemus intelligentiā primi cœli, ideo mouere,
quia intelligit primum mouens in motum continere in se
omnes perfectiones, omnes rerū formas immaterialiter, &
desiderat assimilari ei in hoc, quod per motū explicet in a-
ctū. i. producat in rerum natura formas, quæ virtute sunt in
primo mouēte, & hæc assimilatio est quid optimū in entibus
quoniam facit intelligentiam mouentem esse diuinam, &
deiformem.

Aduerte tertio, q̄ in hoc motu cum sit motus desiderati-
uus, & voluntarius, tria inueniuntur, quæ ponit philosophus
in 3. de Anima tex. 54. loquens de potentia motiua in ani-
mali. Hæc autem sunt appetibile, appetens, organum per
quod. Inter hæc tria, appetibile quod est obiectum, & bonū
est mouens primum, & non motum ab aliquo priori, appe-
tens autem, siue appetitium est mouens, & motum, motum
quidem ab appetibili cognito, & desiderato, mouens autem
organum ad consequendum appetibile, organum autem in
hoc ordine est motum, & non mouens de necessitate. In
proposito appetibile est primum mouens in motum, quod
appetitur ab intelligentia mouente cœlum, appetens est ip-
sa intelligentia mota à primo mouente, vt sine desiderato,
& mouens cœlum, vt proprium instrumentum, quod quidē
in hoc ordine est motum.

Ex his prænotatis patet sensus, & veritas primæ conclusio-
nis. nam cum primum mouens sit mouens in motum, &
motus quo mouetur intelligentia à primo mouente sit mo-
tus desideratiuus, vt declarauimus, sequitur quod sit vt intel-
ligibile, & appetibile.

Et aduerte, quod dicit vt intelligibile, quoniam obiectū
appetibile non mouet, nisi cognitum sit, & quidem si sit ob-
iectum sensibile potest esse cognitum sensu, & intellectu. nā
possum sentire, & intelligere rosam, si autem sit immateriale
solo intellectu cognoscibile est, & dicitur intelligibile, &

quoniam primum mouens immateriale est, & sine omni magnitudine, vt probabitur in conclusione nona, ideo est solum intelligibile. bene ergo dicit philosophus, vt intelligibile, & appetibile.

Aduerte etiam, q̄ dicit appetibile, & non dicit concupiscibile, quoniam appetibile proprie est, quod desideratur desiderio intellectuāli. i. voluntate quæ sequitur intellectum, concupiscibile autem est q̄ desideratur desiderio sensitiuo. i. sensualitate distincta in irascibilem, & concupiscibilem, & quoniam in intelligentia non sunt nisi potentia intellectuales. ideo quod desideratur, non desideratur, nisi voluntate, exponatur ergo ly appetibile pro voluntabili.

Et aduerte, q̄ obiectum concupiscibile differt à voluntabili in hoc, quod potest esse veræ bonum, & apparens bonū, nam concupiscencia sequitur apprehensionem phantasie, & sensus, quæ potest esse vera, & falsa, voluntas autem sequitur iudicium intellectus, prout mouetur ab intelligibili, & ideo voluntabile semper est verum bonum, cum igitur primum mouens in motum sit intelligibile, & non sensibile sit voluntabile, & non concupiscibile, manifestum est quod appetitur, vt vere bonum, vnde in intelligentia non accidit error in appetendo, vt accidit in nobis, qui ex concupiscibili appetimus, quod non est bonum, sed apparens bonum, sequētes apprehensionem phantasie, qua res videtur magis, aut minus, quā sit, & aliter quā sit.

Pro euidētia secundæ conclusionis, aduerte, q̄ sicut in mouentibus, & motis essentialiter ordinatis vnum est causa mouēdi alteri, sicut sol est causa homini generandi hominem, ita in ordine intelligibilium vnum est causa, quod alterum intelligatur, vt diffinitio est causa, quod propria passio intelligatur, sicut igitur ex ordine, qui est inter mouentia, & mota est deuenire ad primum mouens, ita ex ordine intelligibilium est deuenire ad primum intelligibile. Talis autem est ordo inter intelligibilia, quod cum ens diuidatur p substantiam, & accidens, substantia est causa, quod accidens sit intelligibile, sicut enim se habet res ad esse ens, sic ad intelligi, sed declaratum est in 7. lib. q̄ accidens non est ens, nisi in ordine ad substantiam, ergo non est intelligibile, nisi
per

per substantiam, quæ ingreditur diffinitionem eius, substantia autem diuiditur per simplicem, & compositâ, inter quas simplex est prius intelligibilis, quàm composita. nam simplicia sunt de ratione compositorum, substantia simplex diuiditur per actum, & potentiam, & actus est prior cognitione, quàm potentia, dictum est enim in lib. 9. vnumquodque cognosci in quantum est actu, cum igitur primum mouens, vt declaratum est supra, sit substantia simplex, & quæ est actus non admixtus potentia, sequitur quod sit primum intelligibile, ex consequenti maxime, quoniam primum in quolibet genere, vt dictum est in lib. 2. & in 10. est maximum, & metrum aliorum. Et aduerte, qd Arist. hic intendit de ordine intelligibilium ex natura rei, & non ex parte nostra, nam ex parte rei, quod est magis, & perfectius ens est magis intelligibile, ex parte autem nostra est plerumque opposito modo, vt declaratum est in lib. 2. vnde sensibilia materialia licet sint minus entia, quàm abstracta, tamen sunt nobis prius, & magis cognita.

Pro euidencia tertiæ conclusionis, aduerte, qd cum vnumquodque in quantum sit appetibile, in quantum bonum, & bonum est in quantum est actu, & primum mouens sit maxime actu, sequitur quod sicut est primum intelligibile, sit etiam primum appetibile, & sit bonum optimum, & quoniam bonum habet rationem finis, sequitur quod primum mouens sit primum intelligibile, primum appetibile, & optimus finis nec obstat, quod dictum est in 3. lib. non esse bonum, & finem in rebus immobilibus, nam qualiter illud intelligendū sit. Iam declarauimus in 3. lib. in cap. 2. vide illic.

Pro euidencia quartæ conclusionis, aduerte primo quod dicit mouet, vt amatum, ex quo inferitur quod primum mobile amat ipsum, vt intelligatur per primum mobile intelligentia primi cœli, quæ ideo mouet primum cœlum, quoniam amat primum mouens, quod intelligit esse primum intelligibile, & primum appetibile, & intelligit suam perfectionem consistere in assimilatione ad primum mouens, modo quo supra exposuimus, & intelligit suam perfectionem non posse consequi, nec conseruari in ea nisi moueat primū cœlum, & melius dicitur amans, & amatum, quàm desiderans, &

desideratum . nam amamus, quæ habemus, & quæ non habemus, modo adsit spes habendi. Desideramus autem propriæ, quæ non habemus, & quoniam prima intelligentia actu mouens actu consequitur assimilationem primi mouētis, ideo illic est amans, & amatum . verum quia desiderat conseruari perpetuè in hac assimilatione, ideo illic est desiderans, & desideratum .

Aduerte secundo, q̃ intelligentia prima mouet primum cælum tantum motu locali, quoniam cum motus ille sit perpetuus, necesse est primum cælum esse perpetuum, ergo immutabile s̃m substantiam, sed omnis alia mutatio facit mutabile aliter se habere s̃m substantiam, vt declaratum est in 8. phys. præter motum localem, cuius terminus est extrinsecus à mobili .

Aduerte tertio, q̃ cum primus sit causa omnis motus, & metrum, motu primo locali, quo mouet intelligentia primum cælum mouet alia, omnes .n. sphaeræ cœlestes, vt declarabitur infra, mouentur à motu primi cœli .

Aduerte quarto, q̃ motus localis causatus à prima intelligentia est necessarius non necessitate violentiæ, nec necessitate absoluta, sed necessitate finis. nam intelligentia apprehendens perfectionem suam, quæ stat in assimilatione ad primum mouens, modo quo supra exposuimus non posse conseruari sine motu, sicut necessario appetit conseruationem suæ perfectionis, sic necessario mouet cælum, & id quidem dictum sit, prout arbitratur Arist. & Comment. nam secundum Theologum suprema perfectio non inest intelligentiis, ex motu cœli, sed speculatione essentiali, qua speculantur Deum optimum, sed hoc ad negotium metaphysicum non spectat .

Pro euidencia quintæ conclusionis, aduerte, q̃ dependentia potest cadere super substantiam cœli, & super perpetuitatem substantiæ cœli, & super perpetuitatem motus cœli, secundum recte sentientes, qui ponunt primum principium esse causam effectiuam, & non solum finalem omnis entis, tenendum est cælum pendere à primo principio, quo ad tria prædicta, secundum autem phantasiam Comment. qui negat creationem tenendum esset cælum pendere à primo prin

principio, non quo ad productionem inesse, sed quo ad moueri perpetuæ. Quæ autem fuerit mens Arist. in hoc determinauimus in q. nostris metaph. & tu vide quæst. in qua quæritur, si primum est causa effectiua omnium absolute.

Pro euidencia sextæ conclusionis, aduerte, q. primum mobile non sumitur pro corpore cœli, sed pro intelligentia mouente primum cœlum, quæ mouetur à primo mouente in ratione intellectû, & desiderati, & more Arist. dicitur anima primi cœli, hæc igitur anima ex eo quod intelligit, & desiderat, siue amat primum mouens est in optima delectatione, eo quod intellectio, qua intelligit primum mouens, & dilectio qua ipsum diligit est sibi delectabilissima, sicut & nos experimur dum speculamur diuina, nam ut probat Arist. in 10. Ethic. quæcunque felicitas potest à nobis haberi pro hac vita consistit in speculatione entium diuinorum, & præcipue primi entis, felicitas autem duo requirit. s. nobilissimam apprehensionem, & optimam voluntatem, differentia tamen est inter nos, & animam primi cœli, quoniam nos p hac vita multipliciter impediti & distracti, paruo tempore persistimus in illa optima dispositione, anima vero primi cœli, quia non impeditur nec distrahitur, sed continue speculatur primum mouens & speculans mouet cœlum, ideo est semper in eadem dispositione optima, quod pbatu supponendo tria.

Primo, delectatio consistit in actuali & præsentí operatione cuius signum est, quod memorantes præterita, non delectamur nisi pro quanto apprehendimus aliquando fuisse in præsentí, & in futuris non delectamur, nisi quia speramus pro aliquo tempore nos consecuturos. Delectatio igitur secundum se est circa id quod est actu, & comprehensum actu ab operante, unde, ut inquit Comment. in comm. 39. Desiderium præcedens omnem comprehensionem. i. consecutione desiderati magis videtur dolor, quàm voluntas.

Secundo, delectatio est circa operationem naturalem, & propriam vniuscuiusque rei, videmus enim, ut inquit Arist. in decimo Ethic. aliam esse delectationem equi aliam hominis, quoniam vtriusque est diuersa operatio. Hinc est, ut inquit Heraclitus quod scœnû delectabilius est aîno, quàm aurum,

aurum homini autem econuerso.

Tertio, delectatio tanto melior & perfectior est, quanto operatio nobilior, vnde Arist. graduat nobilitatem delectationum & puritatem secundum differentiam nobilitatis & puritatis, quæ est inter sensus, & inter sensus & intellectum, ut patet in 10. Ethic. ubi inter delectationes sensitivas ponit eam quæ est secundum visum perfectiorem & super omnes quæ habentur per sensum eam quæ est secundum operationem intellectus & inter eas quæ sunt secundum operationem intellectus eam quæ est intellectus optime dispositi in comprehensione nobilissimi obiecti. Ex his suppositis sic probatur conclusio, sicut sentire est propria & naturalis operatio naturæ sensitivæ sic intelligere est propria & naturalis operatio naturæ intellectualis, ergo sicut sentire concomitatur delectatio secundum sensum sic intelligere comitatur delectatio secundum intellectum, & sicut ad nobilius sentire sequitur nobilior delectatio sic & intellectu, cum igitur anima cæli intelligens primum mouens habeat nobilissimam operationem sibi propriam & naturalem, quæ est intelligere primum mouens, sequitur, quod maxime delectatur, & per consequens est in optima dispositione, verum autem hæc anima cæli sit veræ animans cælum. ita quod cælum sit veræ & proprie animatum discussum est in q. nostris metaph.

Pro euidencia septimæ conclusionis, aduerte, quod cum primum mouens dignius sit anima cæli intelligente ipsum & amante, necesse est dicere quod perfectiori modo intelligit ipsum in quantum attingit ipsum & vnitur sibi intelligibiliter, sed longe perfectiori modo attingit seipsum & vnitur sibi ipsi, quoniam idem est intelligens & intellectum, ergo perfectiori modo delectatur in seipso quam delectetur anima cæli dum intelligit ipsum Dei igitur speculatio est sibi ipsi absolute delectabilissima & optima, & si nos dum speculamur Deum, sumus in optima dispositione: & tamen non semper, multo magis Deus est mirabilis & sine proportionem, qui semper seipsum speculatur. Et propterea inquit Auic. in lib. 8. cap. 7. suæ metaph. Primus est excellentior apprehensor cum excellentiore apprehensione excellentioris apprehensi, & ideo est excellentior delectator cum excellentiore

tiore delectatione in excellentiore delectato, & hoc est in quo nihil comparatur, & iterum inquit. Tunc necesse est quod est in ultimo perfectionis & pulchritudinis & decoris, eo quod intelligit seipsum in tali ultimo, & cum perfectione intelligendi & cum intelligentia intelligentis & intellecti quod vnum sunt perfectissime, ideo ipse suiipsum est maximus amator, & amatum & magis delectans & delectatum, quoniam delectatio, non est nisi apprehensio conuenientis secundum quod est conueniens hæc Auicen.

Pro euidencia octauæ conclusionis, aduerte, quod sicut sentire est viuere, sic intelligere est viuere, & intellectio quæ est actus intellectus est vita, & sicut intelligere est nobilius ipso sentire, sic vita intellectiua est nobilior sensitiua, vnde homo vt intellectiua nobilior viuit, ceteris animalibus, & intelligentiæ nobilior homine. Et primum mouens nobilissime, quoniam eius intelligentia nobilissima est, vnde inquit Comment. in côm. 39. Et cum intellectus est vnus, & cum actio eius est vita, illud igitur quod intelligens est, quia intelligit se, non quia intelligit aliud, illud est viuum, quod & habet vitam in fine nobilitatis, & ideo vita & scientia proprie dicuntur de eo, est igitur viuens Deus sapiens: hæc Comment.

Sed aduerte, quod cetera quidem viuentia, licet habeant vitam, non tamen sunt sua vita, quoniam non est actio in substantia in eis, immo perficiuntur actione sua, ex consequenti comparantur ad eam, vt perfectibile ad perfectiuum. In primo autem mouente, cui non admiscetur potentia aliqua passiuæ, sed sua substantia est purus actus, necesse est concedere ipsum non solum esse viuum, sed esse suam vitam. alioquin vt inquit Comment. in côm. 39. dubitaretur ne in eo accideret compositio, quod repugnat simplici actui. Præterea in omni composito datur exitus de potentia ad actum, quæ omnia repugnant simplicitati primi mouētis est igitur sua vita. Et quoniam intellectio suiipsum est perfectissima & continua & sempiterna, & hæc est vita sua. Ideo in eo est vita optima, & duratio continua & æterna, & hæc est Deus. Ex prædictis igitur patet optima perfectio primo mouentis, vnde manifeste errabant antiqui vt Pythagorici & Leucippus, qui attribuebant imperfectionem primis rerum
princi

principijs, perfectionem autem & bonitatem rebus productis & principijs. Et dabant signum ex eo, quod semina animalium & plantarum comparantur ad producta ex eis, ut imperfecta ad perfecta. Non enim semen animalis est animal actu, productum autem ex semine est animal actu.

Sed decipiebantur antiqui, quoniam semina non sunt principia sed habent priora ex quibus sunt semina, ut homo generatus est ex homine generante ex quo est sperma. Huiusmodi autem principia sunt eque perfecta cum suis productis in productione uniuoca, & perfectiora in productione equiuoca. Cum igitur ibi sit sermo de primo & vniuersalissimo principio à quo pendet cælum & natura manifestum est, ipsum esse optimum & perfectissimum.

Pro euidencia none conclusionis, aduerte, quòd supra in tex. 30. probauit substantiam mouentem tempore infinito esse immaterialem, quia caret potentia passiuā, quæ est potentia contradictionis, hic autem probat eam sine magnitudine, indiuisibilem & impartibilem, eo medio quo probauit in 8. phys. tex. 39. & stat in hoc. Primum mouens mouet tempore infinito, ergo est virtutis infinitæ, ergo non est in magnitudine, quoniam aut est in magnitudine finita aut infinita, non finita, quia ut probatur in 8. phys. In magnitudine finita non potest esse virtus infinita, alioquin moueret in non tempore, vel in tempore equali mouerent virtus finita & infinita, quorum vtrunque est falsum. Non infinita, quoniam illa non datur, ut probatum est in 3. phys. & in 1. cœli. Ergo primum mouens est sine magnitudine.

Et tu aduerte, quòd apud multos hæc ratio non concludit infinitatem vigoris in primo. Vtrum autem pro rei veritate concludat, determinauimus in quæst. Metaphys.

Pro euidencia decimæ conclusionis, aduerte, quod in 8. phys. tex. 56. probatum est motum localem esse priorem alijs motibus, ita quod potest esse sine alijs, Alij autem necessario supponunt eum. Ex quo sequitur, quod si aliquid est passibile, aut alterabile, aut generabile, Est mutabile primum locum, ergo si non est mutabile primum locum, non est passibile nec alterabile, sed declaratum est supra quod primum mouens, ita mouet quod est immotum, scilicet localiter, ergo non est mobile

mobile secundum passionem & alterationem. Vnde inquit Cōment. in cōm. 41. quoniam primum mouens non mouetur in loco nullum aliorum motuum recipit. Motus enim in loco, omnes alios motus præcedit, & cum non habet nobiliorem, non habet viliorem. Hæc de 5. cap. dicta sunt.

C A P V T VI.

IN sexto capite, inuestigandum est si substantia æterna semper mouens est tantum vna, vel plures. Pro cuius resolutione quatuor agenda sunt.

Primo, quid circa hoc senserunt alij, præcipue Plato.

Secundo, probandum est quod sunt plures.

Tertio, declarandum est quot sunt.

Quarto, comparanda sunt, quæ inuenta sunt à philosopho de substantijs separatis, his quæ inuenta sunt ab antiquis loquentibus fabulose.

Quantum ad primum, aduerte, q̃ Plat. in vno concordat cum Arist. in reliquis autem discordat. Concordat quidem in hoc quod ponebat plures substantias separatas, Nam ut dictum est in lib. 1. & 7. & 10. secundum Plat. quot sunt naturæ specificæ tot sunt ideæ, quas ponebat substantias separatas à sensibilibus & immateriales. Discordat autem, quoniam huiusmodi ideæ non dantur secundum Arist. Et posito quod darentur, essent inutiles præsentī proposito. Querimus enim hic de vnitāte & pluralitate substantiarum separatarum mouentium corpora cœlestia, ideæ autem secundum Plat. non applicantur corporibus cœlestibus, discordat etiā, quoniam non solum querimus si plures sunt, sed etiā quot sunt. Plato autem non determinat ideas quot sint, & posito quod poneret ideas esse numeros, adhuc non potest certificare quod sint. Nam secundum aliquos numeri tendunt in infinitum, eo quod cuilibet numero dato potest addi vnitās, per quam fit noua species, secundum autem alios numeri non progrediuntur nisi vsque ad decem, quoniam vltra decem videtur fieri repetitio præcedentium simul cum decē, & ratio quidem inductiua fm eos est, qm̃ denarius consurgit ex primis numeri principijs cōtinua progressionē, nam

vnitas

vnitas non est numerus, sed numeri principium. Binarius autem numerus non compositus ex numeris, sed duabus vnitatibus. Ternarius est numerus compositus ex vnitatem & binario. Et hæc tria, scilicet vnitas, binarius, & ternarius simul iuncta faciunt sex, quibus si addatur quaternarius constitutus ex duobus binarijs, constituunt decem. Verum hæc ratio non est demonstratiua, sed potius suasiua. Nos autem intendimus determinare & firmiter ostendere, quot sint huiusmodi substantiæ. Relictis igitur huiusmodi opinionibus prosequamur intentum nostrum.

Tu tamen aduerte, q̃ Arist. perfunctoriæ adducit sententiam Plat. de separatis. nam in doctrina sua inuenitur quod primum ens omnino separatum est per se vnum & per se bonum, quod est Deus, sub quo constituit deos secundos, sub quibus dæmones, sub quibus animas humanas. Verum depositione Plat. in huiusmodi separatis alias locuturi sumus.

Quantum ad secundum, aduerte, q̃ Arist. procedens à sensatis, sicut ex motu cœli inuestigauit & conclusit in tex. 29. & 30. dari substantiam æternam incorruptibilem immaterialem, sic ex pluralitate motuum cœlestium inuestigat pluralitatem huiusmodi substantiarum, quilibet enim vnus motus est ab vno motore, ergo si plures sunt motus cœlestes plures sunt huiusmodi substantiæ mouentes. Quod autem sint plures motus cœlestes, principium sumamus ex hoc, cū sphæræ cœlestes sint in numero determinato, necesse est inter eas dari vnum primum mobile, cuius motus localis sphæricus, erit primus, ergo est ab vno primo motore, q̃ est principium primum entium immobile per se & per accidens, ex consequenti æternum immateriale, & sic iam habemus vnā primam substantiam separatam mouentem primum mobile motu diurno & simplici. Verum autem hic primus motor ita moueat primum mobile quòd sit ei applicatum, determinauimus in quæst. nostris metaphys. Sed ultra motum diurnum manifeste deprehendimus plures motus proprios planetarum. Sensu enim videmus planetas moueri ad motum primi mobilis ab oriente ad occidentem. Motu autem proprio vniuscuiusque mouetur ab occidente ad orientem sub zodiaco, & diuersis temporibus perficit motum suum, vt Lu

na in mense, Sol in anno &c. ut patet in sphæra, tunc vltra; cum planetæ sint corpora incorruptibilia & moueantur motu incessabili & æterno, alioquin generatio & corruptio inferiorum non esset perpetua, cuius oppositum probatum est in lib. 2. de generatione, sequitur quod moueantur à motoribus per se immobilibus quæ sint substantiæ sempiternæ & immateriales, alioquin non cauſarent motus sempiternos. Manifestum est igitur quod sunt plures substantiæ sempiternæ per se immobiles & sine magnitudine, quoniam mouentur tempore infinito, & tot sunt motus cœlestes, & ordinantur secundum nobilitatem, sicut ordinantur sua mobilia. Quod est verum ut determinauimus in quæst. metaphys.

Et tu aduerte, quod Arist. post primum motum diurnum non nominat nisi lationes planetarum, quoniam tempore suo credebatur sphæra stellarum fixarum esse primum mobile, postquam non sunt nisi 7. planetæ. Quod an sit verum determinauimus in quæst. nostris in lib. 2. de cœlo.

Quantum ad tertium, aduerte, quod secundum Arist. non datur substantia separata nisi ordinata ad motum alicuius sphære cœlestis. Determinatus ergo numerus substantiarum separatarum, sumendus est ex determinato numero motuum. Numerus autem motuum cœlestium sumendus est ex astrologia, quæ inter scientias mathematicas sola considerat de substantia sensibili mobili æterna, nam geometria & arithmetica versantur circa quantitates, quæ sunt accidentia. Et quidem quod sint plures motus etiam cuiuslibet stellæ erraticæ Astrologus habet pro constanti, & manifestum est cuiuslibet exercitatio in astrologia.

Et aduerte, ut dicit Cômment. in côm. 44. quod motus planetarum assignati ab Astrologo sunt tribus modis. Et enim motus apprehensus à vulgo per visum, puta quod Luna moueatur ab oriente ad occidentem singulis diebus. Est alius qui non comprehenditur nisi instrumentis & considerationibus, & hic subdividitur, quoniam aliquis comprehenditur longo tempore, ut motus Saturni sub zodiaco, aliquis autem breui tempore, ut motus Solis, & adhuc breviori, ut motus Lunæ. Est & tertius motus qui declaratur ratione. Plures enim illorum motuum videntur visu simplices, secundum autem

rationem & naturalia opinandum est illos esse compositos ex pluribus vno, v. g. quia stellæ erraticæ videntur quandoque velociores, quandoque tardiores, & modo directi, modo retrogradi, & hoc non potest esse verum s̄m naturam corporum cœlestium. Declaratum est. n. in naturalibus quod omnes motus cœlestes sunt regulares. & quod impossibilis est eis velocitas, aut tarditas, aut directio, aut retrogradatio, vnde necesse fuit astrologum ponere astrologiam per quam manifestarentur huiusmodi dispositiones sine aliquo impossibili, quod qualiter fiat declarabitur in sequentibus. Vt igitur sciamus quot motus sint planetarum, scrutabimur sententiam astrologiæ, & qm̄ variæ sunt in hoc opin. ideo remoto amore & odio adhærendum est illi, quæ videtur certior.

Tu igitur aduerte, q̄ tempore Plat. & Arist. duo fuerunt celebriores astronomi. s. Eudoxus & Calippus, qui sine positione stellarum eccentricarum & epiciclorum, conati sunt saluare irregularitates, & omnes motus qui apparent in planetis per solas sphæras concentricas. Eudoxus igitur Sol attribuit tres sphæras, & Lunæ tres. Et prima, quidem deferatrum Solis ab oriente ad occidentem motu diurno, credebat. n. q̄ primum mobile quod s̄m ipsum est octaua sphæra, non sufficeret ad causandum hunc motum in planetis per modum raptus. Secunda autem, deferatrum ab occidente ad orientem sub zodiaco secundum longitudinem de signo in signum, & dicitur motus longitudinis. Tertia vero, deferatrum ab occidente in orientem sub zodiaco s̄m latitudinē, prout astrum declinat ab ecliptica, aliquando versus austrum, aliquando versus aquilonem, & tunc dicitur planeta australior, vel borealior, & hic dicitur motus latitudinis, quem Eudoxus, attribuit Soli & Lunæ, sed manifestior est in Luna, s̄m autem Ptol. nullo modo conuenit Soli in zodiaco, qm̄ s̄m ipsum nunquam declinat ab ecliptica. Ita fuit opinio circa sphæras & motus Solis. Consimiliter opinatus est circa numerum sphærarum & motuum lunæ. Differebat tñ in hoc, quod tertia sphæra causans motum latitudinis in sole, mouebatur ab occidente in orientem, sicut & secunda, tardius tamen quam in secunda. In Luna autem mouebatur ab oriente in occidentem, sicut & prima, sed tardius quam prima

ma, & quam secunda: Figuram autem Solis & Lunæ, descripsimus ut infra.



EPITOME LIB. XII.

Cuilibet autem aliorum quinque planetarum attribuit quatuor sphaeras, primam attribuit propter causandum motum diurnum, secundam propter motum longitudinis sub zodiaco, tertiam propter motum latitudinis, prout declinat ab ecliptica, aliquando versus austrum, aliquando versus aquilonem, cuius quidem polos ponebat in ecliptica, quartam autem sphaeram ponebat ne planeta secundum motum latitudinis egrederetur zodiacum, & pertingeret usque ad polos zodiaci, nam sicut zodiacus transit per polos tertiae sphaerae, sic tertia sphaera deferens planetam secundum motum latitudinis transit per polos zodiaci. Ne igitur tertia sphaera deferat planetam extra zodiacum, datur quarta, quae retorquet planetam versus eclipticam, sed ubi essent potius istius, quartae sphaerae Arist. secundum Eudoxum non assignat. Figuram autem quinque planetarum descripsimus, ut infra.



Hæc fuit positio Eudoxi, ex qua patet quod Soli & Lunæ attribuit sex sphaeras, Saturno autem & Ioui & Marti & Veneri & Mercurio attribuit 20. Sunt ergo in summa 26. sphaeræ planetarum, secundum Eudoxum, secundum autem Calippum multo plures sunt, nam quot posuit Eudox. tot posuit & ipse & eundem ordinem seruauit in situ planetarum. Posuit enim Solem immediate super Lunam, sed videbatur sibi non posse seruari & regulari omnia quæ apparerent in planetis, nisi adderet alias sphaeras, præter eas quas posuit Eudox. Aduerte igitur, quod Eudox. ponens in Sole & Luna tantum tres sphaeras pro vnoquoque non videtur reddidisse causam velocitatis & tarditatis quæ apparent in motu eorum. Vt igitur redderetur huiusmodi causa Calippus addidit Soli duas sphaeras, & Lunæ duas, vnde dicit Comment. in comm. 47. & reputo quod addidit hic vt det causas ex eis velocitatis & tarditatis, cum sit impossibile ut motus eiusdem stellæ sit velox & tardus insimul, nisi sit compositus ex moribus, Sol ergo & Luna habent decem sphaeras, ex quibus sex sunt deferentes i. ordinate ad delationem astrî, quatuor autem sunt reuoluentes, scilicet duæ in Sole, & duæ in Luna, quas dixit esse necessarias, quia aduertit quod in quatuor partis æqualibus zodiaci mouetur Sol inæqualiter, ita quod in vna quarta diutius moratur, in alia autem breuius. Causa huius non potest esse sphaera deferens, quoniam in deferente æqualiter mouetur. Attribuit igitur Soli & Lunæ duas sphaeras reuoluentes, quarum vna faciebat Solem moueri velocius in vna quarta, & altera tardius in altera quarta, idem intellige de Luna. Decem igitur sphaeras attribuebat Soli, & Lunæ. Similiter Eudox. attribuens alijs quinque planetis solum quatuor sphaeras non videtur posse saluare & assignare causam, quare videntur aliquando retrogradi, aliquando stationarij, & ideo Calipp. cuilibet eorum addidit quintam sphaeram, quæ esset prædictæ apparentiæ causa, & has omnes appellauit deferentes, & cum sint quinque Planetæ omnes simul habent 25. deferentes. Cuilibet autem deferenti, præter quam vltima, in qua est astrum planetæ complantatum faciebat correspondere suam reuoluentem eadem causa, sicut in Sole, &

EPI TOME LIB. XII.

in Luna, ita quod tot sunt reuoluentes in Ioue quot deferentes vna minus. Idem intellige in Saturno & Venere & Mercurio & Marte, sicut igitur deferentes sunt. 25. sic reuoluentes sunt. 20. quæ simul iunctæ sunt. 45. quibus si addas. 10. Solis & Lunæ erunt. 55. secundum Calippum, si autem non addantur Soli & Lunæ quatuor deferentes, & quatuor reuoluentes erunt in summa 47.

Sed aduerte, q̃ cum Arist. tex. nomet duos primos planetas & quatuor posteriores, & tamen sint 7. sequitur quod prætermiserit vnum, siue Martem, siue Mercurium, siue Lunam. Quare autem prætermiserit non constat, nisi forte ex errore, vel inconsideratione computationis, quod non videtur cedere in honorem Aristot. in tanta re, & maxime quod computatio est modica, cum non transcendat 55. vel fuit propter particularem rationem assignatam à Calippo, quam Arist. non adduxit, & forte est illa, quam adducit D. Alb. in hoc lib. in tract. 2. in cap. 23. & est, quod Calip. non computauit sphaeras, nisi illis planetis, qui manifestius videntur reuoluti. Isti autem sunt Iouis, & Mars, & Venus, & Mercurius, quibus secundum Calippum subsunt Sol & Luna, & quoniam in Saturno iste reuoluentes sphaeræ non sunt ita manifeste, licet in eo sint realiter, ideo prætermisit eum.

Sed aduerte, q̃ ratio Alb. non videtur congruere tex. Certum est enim q̃ Saturnus est primus planetarum, & Aristot. iam numerauerat duos primos, deinde quatuor posteriores.

Vnde melius est dicere quod prætermiserit Martem, & quod ignoramus rationem, quoniam astrologia

Calippi in scriptis ad nos peruenit. Hæc

igitur fuit sententia Calippi de nume-

ro sphaerarum septem planeta-

rum. Et vt facilius pateat

descriptimus figura

infra.

¶

¶

¶

¶

¶

¶

Cum



Cum igitur cuilibet motui æterno sphaerarum cœlestium correspondeat aliqua vna substantia æterna immaterialis immobilis rationabile est tot huiusmodi esse substantias, igitur si credimus Calippo, substantiæ tales applicate motibus planetarum erunt 55. vel 47. vltra primum mouens, cui attribuit motum primi mobilis. Dixit autem rationabile, i. probabile, & non ex necessitate concludi, quoniam necessarium circa hoc est relinquendum fortioribus ad inueniendū quā ipse fuerit, fortiores autem videntur esse illi, quin, vt inquit Alb. propria cœli considerant, vel, vt inquit Cōment. in comm. 48. qui habent sollicitudinem in ista arte. i. in astrologia, ex quibus innuit Arist. q̄ in hoc non secundum propriam sententiam locutus est, sed se refert ad astrologum. De numero igitur substantiarū separatarum hæc dicta sint: Vtrum autem hæc astrologia antiquorum saluet apparētias planetarum, vel sit necesse ponere sphaeras eccentricas & epicyclos, iuxta Ptolomæi astrologiam determinauimus in quæstionibus metaphysic.

Sed aduerte, q̄ hæc conclusio .s. numerus substantiarum separatarum sumendus est secundum numerum motuum.

& sphaerarum coelestium, posset infringi ex tribus.

Primo, quia diceret aliquis non esse inconueniens dari aliquas substantias separatas, non ordinatas ad motum corporum coelestium, sicut dixit Socrates, Omnium deorum partem esse vnum deum sublimem immobilem, & mouentem & causantem omnia, & prima entia causata ab eo sunt duodecim dii incorporei immobiles non mouentes, sed assistentes deo sublimi & tenentes senatum cœli, & sub istis sunt dii corporales qui mouentur, qui sunt planetae & alia sidera, & sub istis sunt dii terreni, qui habent numina sua super ea quæ procedunt ex terra, & isti sunt homines dominantes ceteris animalibus &c.

Sed contra hanc opinionem sic arguit Arist. Si non est alius quis motus in cœlo qui non sit ordinatus astrilationem aliter ille motus esset frustra. Et si omnis substantia impassibilis & immaterialis sortita est optimum finem, ex eo quod mouet, aliter esse ociosa, ex consequenti imperfecta, necesse est sumere numerum harum substantiarum ex numero motuum & mobilium coelestium. omnis enim substantia separata est finis alicuius motus coelestis.

Et tu aduerte, quod Arist. hic loquitur secundum meram investigationem naturalem & a sensatis ascendendo, secundum quam viam non potest deprehendi substantia separata, nisi ex motu, unde secundum principia huius scientiæ non potuit aliter deprehendere numerum harum substantiarum, & quod dicit Socrates reputaretur error in philosophia similiter id, quod dicit Theologus de angelis, nec potest in hoc disputare Theologus cum philosopho, quoniam non communicat in principiis, procedit .n. philosophus via naturali, ille autem via reuelationis. Licet autem non possit disputare via argumentatiua cum philosopho & probatiua. Potest tamen respondere, verum in præsentī proposito diceret non esse necesse omnem substantiam separatam ordinari ad mouendum cœlum, nec est necesse optimam dispositionem suam pendere ex motu, immo considerata nobilitate sua, qua excedunt omnia corporalia, conueniens est dicere quod sunt altioris status quam quod sint proportionate, ut fines cœlestibus motibus, & quod possunt optimæ se habere, etiam quod non moueant,

moueant, puta ex eo quod intelligunt primum principium & intelligunt seipsas.

Secundo, potest infringi, quia posset dicere aliquis dato quod tot sint substantiæ separatæ quot motus cœlestes, tamen non potest determinate sciri, in quo numero sint motus cœlestes. Nam forte sunt alij, præter eos qui inuēti sunt ab Eudoxo & Calippo, qui non deprehenduntur sensu, eo quod non causant in astro aliquam diuersam apparentiam.

Sed contra hoc sic arguit Arist. Cum omnis motus cœlestis sit propter aliquid, necesse est quod sit propter seipsum, vel propter alium motum, vel propter astrum motum. Non potest autem esse propter seipsum, quoniam motus ut motus est alicuius mobilis, cum sit actus eius, nec est propter alium motum, quoniam eadem ratione ille esset propter alium, & ille propter alium, & sic in infinitum, quod est impossibile, quoniam cum sit deuenire ad primum mouens, & primum mobile, ut probatum est in 8. phys. est etiam deuenire ad primum motum, ergo necesse est omnem motum cœlestem ordinatum esse ad delationem alicuius diuini corporis .i. stellæ. Non potest autem esse ordinatus ad lationem alicuius astri, quin appareat aliqua diuersitas, & variatio secundum situm in astro. Quidquid enim localiter mouetur, necesse est, ut sit in alio, & alio loco, sed omnes motus facientes diuersam apparentiam in astris, deprehensi sunt ab astronomo. Ergo rationabiliter conclusum est, tot esse substantias immateriales, quot sunt deprehensi motus corporum diuinorum .i. stellarum, siue deprehenduntur. Quod dico, quoniam si deprehenduntur esse tot, quot posuit Calippus, siue pauciores, ut posuit Eudoxus, siue plures, ut videntur ponere moderni astronomi, qui deprehenderunt super octauum cœlum dari aliud, eo quod comprehensum est octauum cœlum moueri motu diuino, & motu proprio in centum annis gradu vno, rationabiliter concluditur esse tot substantias separatas, quot sunt motus cœlestes.

Tertio, posset debilitari, quoniam diceret aliquis, quod sunt plures cœli, id est plures mundi, & in quolibet sunt tot sphaeræ, quot in isto, ex consequenti sunt plura prima mobilia, & plures Saturni, & plures Ioues &c. ergo ex numero

motuum huius mundi non potest cōcludi numerus substantiarum separatarum.

Sed contra hoc arguit Arist. Si sunt plures cœli .i. mundi sunt eiusdem speciei, & distincti solo numero, alioquin mundum esset nomen æquiucum æquiocatione physica. Si isti mundi sunt eiusdem speciei, cum quilibet mundus debeat habere suum motorem primum, sicut habet primum motum, & primum mobile, dabuntur plures motores primi distincti numero, & eiusdem speciei, sed hoc est impossibile, quoniam quæ sunt eiusdem speciei, & distincti solo numero habent materiam. nam materia est principium distinctionis numeralis, ut dictum est in lib. 5. sed primus motor non habet materiam, quoniam declaratum est supra, eius substantiam esse actum inadmixtum potentiæ passivæ, ergo est tantum vnus primus motor, & vnus primus motus, & vnum primum mobile, ex consequenti est tantum vnum cœlum, id est vnus mundus. Quomodo autem sit verum hoc principium. Quæcunque sunt eiusdem speciei, & distincta numero habent materiam determinatam in quæstionibus metaphysicalibus.

Quantum ad quartum, aduerte, q̃ ab antiquis duo inuenimus dicta.

Primo, q̃ istæ substantiæ sunt dij, & continent naturam diuinam, & vniuersalem. & hoc dictum est verum, & consonat his, quæ supra diximus. nam cum sint illæ substantiæ æternæ immateriales intellectuales, & sua virtute mediante motu cœli causæ sint omnium naturalium, merito dicuntur dij, & habent in se naturam diuinam .i. nobilissimam, & continent naturam vniuersalem, in quantum sunt causæ rerum naturalium.

Et aduerte, quod prædictæ excellentiæ primo, & essentialiter verificantur de primo mouente. secundario autem de alijs intelligentijs. & huius primi dicti, ut dicit Comment. in comm. 50. fuerunt auctores Caldei, in quibus fuit scientia de diuinis perfecta.

Secundo, quod dij sunt cōformes hominibus, quasi quod sint humanæ figuræ, & conformes quibusdam animalibus, vnde & signa cœlestia denominantur nominibus animalium,

vt dicunt astrologi, sed hoc dictū est fabulosum, & vt dicit Comment.in cōm. 50. istæ fabulæ sunt sine veritate aliqua, & non fuerunt scriptæ, nisi vt leges inducerent homines ad virtutes, & reuocarent à vitijs. Si tamen sub istis fabulis intendebant, quæ diximus de substantijs separatis, quod sunt dii, & quod continent naturam vniuersalem, dictum eorum fuit diuinæ dictum, & secundum verisimilitudinem. & quod sic intendebant potest coniecturari ex hoc, quod philosophia, sicut & aliæ artes sæpe fuit inuenta, & sæpe fuit corrupta. & hoc infinities, si mundus est æternus. Accidit enim ex mutatione continua, cui subijcitur genus humanum, vt propter pestes, & bella, & inundationes depereant scientiæ, & artes deinde recuperentur. Sicut igitur ex recuperata philosophia cognouimus supradictas excellentias substantiarum separatarum, sic & patres antiquissimi cognouerunt, sed plures eorum sub velamine, & fabulis tradiderunt suam philosophiam. Vnde tenendum est, quod philosophi sibi per secula succedentes concorditer senserunt, cœlos esse diuina corpora, & motoris eorum esse substantias separatas, & esse principia, & causas generationis in inferioribus. & ideo etiam secundum eos qui fabulosæ philosophiam tradiderunt, sumendus est numerus motorum separatotum secundum numerum motuum cœlestium. Fabula enim aliquid philosophiæ est, & ex miri, quibus inceptum est philosophari, cōtexta est prima philosophia. Hæc de sexto cap. dicta sunt.

CAP V T V I I.

IN septimo capite soluenda sunt quædam dubia, quæ videntur oriri circa primum mouens, in quantum est intelligens. Dictum est enim supra, quod est primum intelligibile, & quod intelligens seipsum est quid diuinissimum, & quod speculatio sua est sibi delectabilissima. Propterea, deus est semper mirabilis, ex consequenti est perfectissimus seipso, & non quocunque alio distinctio à se. Ex his autem insurgunt tria dubia.

Primum est, circa intelligere.

Secundum est, circa obiectum intelligibile.

Tertium

Tertium est, circa modum intelligendi. Sic autem procedemus circa prædicta dubia.

Primo, ponentur dubia cum fundamentis suis.

Secundo, præponentur quædā pro solutione dubiorum.

Tertio, soluentur dubia.

Quantum ad primum dubium, aduerte, quòd cum intellectus dupliciter possit se habere ad suum intelligere, scilicet ut potest intelligere, & ut actu est intelligens. Dubitatur, si diuinus intellectus se habet ad suum intelligere primo, an secundo modo. Si primo modo tunc se habet, ut ille qui habet scientiam, & non utitur ea, & se habet, ut sciens, dormiens, ex consequenti non est ei perfectio nobilissima. nam nobilius est esse sub actu secundo, quam sub actu primo. Qui enim est sub actu primo, medio modo se habet inter potentiam, & actum. Qui autem est sub actu secundo, est simpliciter actu, ex consequenti simpliciter perfectus. Cum igitur primum mouens sit perfectissimum, & nobilissimum omnium entium. patet quod intellectus est in potentia intelligens. Si secundo modo, ergo non est perfectissimum ex seipso. nam intelligere est perfectio intellectus, & comparatur intellectus ad seipsum, ut perfectibile ad suum perfectivum. vnde probatum est in lib. 9. tex. 15. actum esse priorem potentia perfectione, quoniam ordinatur ad actum, ut ad finem. Si igitur diuinus intellectus actu intelligit, perficitur suo intelligere, ex cōsequenti aliquid est nobilius eo, quod est inconueniens. Concessum est enim ab omnibus deum esse adeo nobilem, quod nihil est nobilius eo, nec ut inquit Comment. in cōm. 51. quæstio est in hoc, sed quæstio est quomodo erit hoc quod est in fine perfectionis in se, secundū quod est talis dispositionis. i. secundū intellectum.

Quantum ad secundum dubium, aduerte, quòd cum intelligere sit circa aliquod intelligibile. Dubitatur circa quod intelligibile est diuinū intelligere, aut. n. diuinus intellectus, qui est dei substantia intelligit seipsum, aut aliud, & si aliud, aut idem semper, aut semper aliud, & aliud, sicut & nos intelligimus. Hæc. n. omnia iam sunt opinata à philosophis. & ideo dubitatur quod eorum sit verum. nam sic intelligit se, & non aliud. ergo non intelligit omnia, quod non videtur

tur conueniens nobilitati diuinæ. & si intelligit aliud, ergo perficitur per aliud. Intellectum. n. est perfectio intellectus.

Quantum ad tertium dubium, aduerte, q̄ cum actus intellectus sit triplex. s. simplex apprehensio, compositio, & diuisio, & discursus. Dubitatur qualis sit actus diuini intellectus, an. s. simplex apprehensio, an compositio & c. si simplex apprehensio, quō ergo intelligit composita, & materialia. Si compositio, diuisio, vel discursus, ergo transmutatur de vno intellectu ad aliud. Prius enim intelliguntur extrema propositionis, quā formetur propositio, & in discursu, vt declaratur in primo posteriorum. Propositio maior præcognoscitur tempore ipsa conclusione. Minor autem simul ē pore, sed prius natura, sed omnis transmutatio repugnat diuino intellectui, cum sit ipsa dei substantia, ergo & c.

Anteq̄ soluantur præposita dubia, duo prænotanda sunt.

Primum est, q̄ multum differt intelligere aliquod nobile, vel aliquod vile. nam cum intelligere, & scire, sicut & omnis operatio specificetur ex obiecto, si sit circa nobile obiectum, erit nobile intelligere. Si autem circa vile erit vile, cuius signum est, q̄ dicimus multa esse, quæ melius est non meditari, quā meditari, quia. s. si intellectus occupatur in illis vilescit. Ex opposito, multa sunt, circa quæ speculari optimū est, vt circa diuina entia. vnde in huiusmodi speculatione re posuit Arist. nostram felicitatem in 10. Eth. Cum igitur diuinum intelligere sit nobilissimū, manifestum est quod est circa diuinissimum, & honorabilissimum obiectum.

Secundum est, quod ex quo suum intelligere est nobilissimum, non potest mutari de vno intellectu in aliud intellectum, quoniam illud aliud, aut est dignius, aut indignius. Non dignius, quoniam dignissimo qualis est diuina substantia non datur dignius. Non indignius, quoniam diuinum intelligere non semper esset dignissimum, quale enim est intellectum tale, & intelligere, vt diximus. His prænotatis aperienda est veritas primi dubij.

Aduerte igitur, q̄ diuinus intellectus non est intelligens in potentia, qm̄ se haberet, vt dictum est, sicut sciens, dormiens, ex consequenti non esset perfectissimus, sed est semper intelligens actu, ita tñ quod est suum intelligere. nā in
deo

deo intellectus, intelligere, & intellectum sunt idem, quod sic manifestatur. Cum deus de necessitate debeat continuare suū intelligere, vt semper sit perfectissimus, si intellectus eius distinguitur à suo intelligere, comparatur ad ipsum: vt potentia ad actum. ergo laboriosum erit ei continuare intelllectionem, quod est absurdum in deo. Consequentia quidem sic manifestatur. Quod est in potentia ad aliquid, potest habere illud, & non habere, & maxime quod est in potentia passiuā, vt declaratum est supra in tex. 30. vbi dixit Arist. contingit potentiam habens non agere. Constat autem quod intellectus in quantum est receptiuus ipsius intelligere est potentia passiuā, si ergo distinguitur ab ipso comparatur, vt potentia passiuā ad ipsum, ex consequenti potest habere, & non habere illud, quod autem est tale, videtur laboriosum sibi continuare, vt etiam patet in sensibus, qui quoniam distinguuntur ab actibus suis, fatigantur in continuatione sensationis. Tu tamen aduerte hanc rationem esse tantum probabilem, & non necessariā, aliter intelligentiæ mouentes cælos non possent regulariter, & in perpetuum mouere sine lassitudine. Constat enim, quod mouere cælum distinguitur realiter ab intelligentia, non ergo hoc est vniuersaliter verum, quod, scilicet quando actus distinguitur distinctione reali ab operante, continuatio sit ei laboriosa, nisi in operante materiali, & corruptibili, cuius instrumenta sunt alterabilia, vt patet in animali, dum mouetur localiter, sicut tactum est in lib. 3. phys. Contentatur autem Arist. sic adducere rationem probabilem, quoniam supra, cum proposuit dubium. adduxit rationem necessariā, & fuit hæc. Si intelligere diuinum distinguitur ab intellectu, non est deus se ipso perfectissimus, quā inest ei perfectio ex alio, scilicet ex intelligere. & tunc intellectus comparatur ad intelligere, vt potentia perfectibilis ad suum perfectiū, non ergo sua substantia est perfectissima, & optima. Per intelligere enim inest ei honorabile. Quare cōcludendum est deum esse semper actu intelligentem, & intelligere esse substantiam suam.

Pro euidētia secundi dubij, aduerte, q̄ cum intelligere diuinum sit dei substantia, oportet ipsum esse dignissimum. Dignitas autem operationis, & indignitas pendet ex dignitate,

tate, & indignitate obiecti. Cum igitur videre, & intelligere indigna, ac vilia sit indignum, vitandum est hoc à nobis, ne, scilicet dicamus diuinum intelligere esse indignum.

Vt igitur sit dignissimum, tenendum est quod seipsum intelligit. est. n. ens potentissimum, & excellentissimum. Vtrū autem tantum seipsum intelligat, & si intelligit alia, vilescat diuinus intellectus: determinauimus in quæst. metaphys.

Et aduerte, quòd Arist. ex determinatione primi & secundi dubij ponit duo corollaria.

Primum est, ex quo intelligere diuinum est dei substantia, sicut deus per se intelligit seipsum, ita per se intelligit suum intelligere, cuius ratio est, quoniam in deo intellectus intelligere, & intellectum sunt idem realiter omnibus modis. ergo si intelligit seipsum intelligit suum intelligere. in nobis autem non sic est, nam quia intelligere nostrum, & sentire, & meditari, & scire distinguuntur realiter à potentijs, quarum sunt actus, ideo sunt per se alterius. i. obiecti intelligibilis, vel sensibilis, vel meditabilis, vel scibilis. vnde per accidens est quod intellectus intelligit suū intelligere, & sensus suū sentire. & posito, quod intelligat suū intelligere, hoc erit secundario, & accessorio. Si aut in nobis intellectus intelligere, & obiectū primo intellectum essent idem, sicut per se intelligeret seipsum, sic per se intelligeret suum intelligere.

Secundum est, si intelligere est aliud ab intellectu diuino, intelligi erit aliud ab intellectu, id est ab eo quod dei intellectus intelligit, secundum quid, ergo inerit ei bone. i. non poterit ratio assignari, quò diuinus intellectus sit optimus, an. scilicet ex parte actionis, quæ est intelligere, vel ex parte passionis, quæ est intelligi ponatur vtrunque distinctū, & à diuino intellectu, & à diuino intellectu. Dicendum est ergo, quod sicut in aliquibus rebus scientia est ipsa res scita, vt patet in scientijs practicis. Nam domus sumpta sine materia. i. vt est in mente artificis, & scientia ædificandi sunt idem, & sanitas in mente medici, & scientia medicinæ sunt idem, & de hoc iam locuti sumus in lib. 7. & in scientijs speculatiuis idem patet. nam diffinitio, & diffinitum sunt idem, ex consequenti scientia, & res scita sunt idem. Ex diffinitione. n. quæ est principium demonstrationis causatur scientia rei scibilis, sic in rebus

bus non habentibus materiam, multo magis erunt idem, & maxime in primo mouente, intellectus, & intelligentia, id est actus intelligēdi, & res intellecta. Vtrum autem de quolibet non habente materiā verificetur hæc propositio, quod in eo intellectus intellectio, & intellectum sunt idem, id determinauimus in quæst. metaphys.

Pro euidencia tertij dubij, aduerte, quòd simpliciter tenendum est diuinum intellectum esse simplicem, & non compositum, id est intelligere simplicissima apprehensione, & non componendo, aut diuidendo, & multo minus discurrendo. Quod quidem triplici ratione demonstratur.

Primo sic. Quilibet intellectus componens potest transmutari ex vno intellectu in aliud. nam partes propositionis possunt separatim intelligi, antequam componatur per notam verbalem, sed omnis transmutatio repugnat primo mouenti, qui est deus, ergo &c.

Secundo sic. Omnis intellectus componens accipit scientiam à rebus compositis, & materialibus, sicut humanus intellectus, sed intellectus dei non accipit scientiam ab huiusmodi rebus, immo nec alia substantia non habens materiā. suum enim naturale obiectum est quidditas abstracta, sicut obiectum nostri intellectus est quidditas rei materialis. ergo intellectus dei est penitus simplex, & indiuisibilis in essendo, & in intelligendo.

Tertio, intellectus qui est compositorum, & intelligens per compositionem, non semper habet suam perfectionem, sed in aliquo tempore, id est per tempus acquirit eam. nam sua perfectio non consistit in intellectione huius partis, puta hominis, nec illius, puta animalis, sed huius totius, non est animal, sed prius intelligit partes, deinde compositum, ergo sua perfectio acquiritur in tēpore, & non semper inest sibi, sed intellectus diuinus est semper optimus, & perfectissimus, aliter tenderet de perfecto ad perfectum, quod repugnat simplicissimo actui, qualis est deus. Dicendum est ergo intelligere diuinum esse simplicissimum; quo intelligit ipsum primo, & in seipso alia, non variabiliter, non temporaliter, non componendo. intelligit enim in seipso, materialia immaterialiter, temporalia intemporaliter, composita;

& complexa simpliciter. De intellectu igitur primi, & de dubijs surgentibus circa ipsum quo ad intelligere, & intelligibile, & modum intelligendi, sic determinatum sit ad mentem Arist. Hæc de septimo cap. dicta sint.

CAPVT VIII.

IN octauo cap. inuestigandum est, si primum mouens est bonum, & optimum totius vniuersi. Pro cuius resolutione proponit Arist. si vniuersum habet bonum separatum; aut bonum intrinsecum, quod consistit in ordine.

Pro euidencia igitur istius quæstionis tria agenda sunt.

Primo, quare Arist. quærit si vniuersum habet bonum separatum, aut bonum intrinsecum.

Secundo, resoluendum est quæsitum secundum sententiam Arist.

Tertio, videndum est quid dicerent alij antiqui ad hoc quæsitum, & quot inconuenientia sequuntur ex positionibus eorum, & sic concludendum est, quod primum mouens est in toto vniuerso, sicut vnus princeps, & ordinans & regulans, ex consequenti est totius naturæ bonum optimum.

Quantum ad primum, aduerte, quod ratio quæstionis sumitur ex eo quod dictum est supra, quod primum mouens est bonum omnis boni cum sit primum appetibile, & optimum, ideo mouet omnia, & ab ipso pendet cælum, & natura, & omne quod desiderat ipsum modo suo, vt bonum, & optimum finem, & omnia quæ sunt participant aliquam ex suis bonitatibus, & per illam bonitatem sunt id quod sunt. Et ideo quærendum restat. vtrum hoc bonum; quod omnis natura desiderat, & participat, sit quid separatum, & extrinsecum ab entibus, sicut locus deorsum desideratus à graui est extrinsecus à graui, aut sit consistens in ordine, qui est in naturis rerum, prout vna ordinatur ad alteram, puta vegetabilia ad animalia, & animalia ad hominem, ita quod sit bonum intrinsecum naturis rerum, sicut ordo partium est bonum intrinsecum exercitui, vel sit vtroque modo, sicut in exercitu, in quo bonum extrinsecum est Dux mouens, ordinans, & regulans exercitum. Bonum autem intrinsecum est ordo, prout vna pars ordinatur ad aliam, vt pedites ad equites.

Quan-

Quantum ad secundum, aduerte, q̄ fm̄ sententiam Arist. & fm̄ veritatem, existimandum est de toto vniuerso, sicut de vno dñio, & de vno exercitu, nam sicut in dominio datur dominus, & Princeps, ad quem ordinantur oēs status subditorum, & qui mouet, ac regulat oēs subditos in actionibus suis dans cuilibet legem fm̄ modum officij, & vltra hoc, subditi sic ordinati sunt adinuicē quod vnus confert alteri, & actio vnus est iuuamentum alteri. similiter, sicut in exercitu datur Dux regulans exercitum ad victoria contra hostem, & vltra Ducē datur ordo inter partes exercitus, per quem ordinem quælibet pars exercitus confertur alteri ad victoriā obtinendam, non quidem vno modo, sed diuersimode, vt competit officio suo. Aliter .n. conferunt pedites, aliter equites, aliter sagittarij, aliter personatores tubarum. Dux autē dicitur bonum separatū, siue extrinsecum, non .n. est pars, sed p̄s dens exercitui. Ordo autē est bonum intrinsecum, qm̄ est forma exercitus, & remoto ordine, cessat esse exercitus, & remanet confusa multitudo, sicut remoto ordine, q̄ est inter partes domus, destruitur, domus, & remanet confusa cōgeries lapidum, sic in vniuerso datur bonū separatum, quod est primum mouens, à quo, ad quod, per quod sunt omnia. Et dī bonum separatum, quia non est pars, sed auctor vniuersi, à quo est largitas diuersarum bonitatū in partibus vniuersi. his quidem clarius, & æternaliter, his autem obscurius, & tēporaliter, vt dictum est in lib. de cœlo. Est etiam in vniuerso bonū intrinsecum, qui est ordo partium inter se, & omnium ad primum mouens, vt vniuersalem finem. Nam cum oīum partiū vniuersi sit vnus gñalis finis, necesse est, vt inter se sint ordinatę sicut q̄a finis domus est habitatio, necesse est vt partes domus sint ordinatę, aliter nō esset cōueniēs habitatio.

Sed ex parte boni separati, aduerte, quod est nobilius bonum, quàm ordo in partibus vniuersi, sicut est maius bonum in Duce exercitus, quàm in ordine exercitus. nam exercitus est propter Ducem, & non econuerso.

Item Dux, vt inq̄t Cōment. in cōm. 52. est causa ordinis, sed ordo nō est causa Ducis, sic in vniuerso primū mouēs est melius bonū, quàm ordo partium vniuersi. Tota .n. ordinatio vniuersi pendet à primo mouēte, & non econuerso, & ab ipso

ipso effluunt bonitates partium vniuersi, & non econuerso.

Ex parte autem ordinis partium vniuersi, aduerte, q̄ licet oēs partes sint ordinatæ, non tamen æqualiter, neque similiter. Se habet enim vniuersum, sicut familia, quam regit, & ordinat paterfamilias, imponens vnique legem, s̄m modū naturæ, & conditionis suæ, vnde aliter ordinat filios, aliter seruos, aliter bestias. Licet .n. omnes isti gradus ordinentur ad bonum commune domus, & ad dominum domus, tamen non eodem modo recipiunt legem. nam paterfamilias duplicem legem statuit in familia. s. cōm, & particularem. Cōmunis quidē lex, in qua omnes gradus conueniunt est, quod tam filij, q̄ bestia, & serui habeant distinctas operationes, & oēs sint viles modo suo in iuuamento familiæ, & distinguantur suppositis. Particularia autem lex est, aut filiorū, alia seruorum, alia bestiarū. Filiorum quidem lex est, quod non licentiantur ad faciendū omnia quæ appetunt, sed oēs actiones eorum sunt ad nutū, & voluntatem patris. Et oīa aut plurima eorū, quæ faciūt sunt ordinata ad percipiendū bonū parentis, ideo s̄m legem paternā nō cadit in eis error, nec peccatum. Ex actionibus aut seruorū, & bestiarū pauca sunt ad cōe commodum domus, quod .n. agunt dño domus mouente, & dirigēte illud ad bonū domus spectat. Alia vero, & plura eorū opera, quæ procedūt ex proprio impetu sunt casualia, & s̄m quod evenit ex impetu concupiscentiæ, & irrationalis iræ, non .n. s̄m rectam rōnem, sed s̄m necessitatem actionis respiciunt ad patremfamilias. Seruos .n. vocat Arist. eos qui nati sunt serui. Nascuntur aut serui, qui per seipso ad regimen vitæ non sufficiūt, neque publicæ, neque priuatæ. Liber aut est qui per seipsum regere scit, & potest. Dñs etiam ex natura est q̄ lumine intellectus sibi, & alijs sufficere potest ad regimē vitæ. Bestia vero, quæ in regimen vitæ semper indiget, vt agatur, & regatur ab alio, & qñ sibi relinquitur, operatur impetu concupiscentiæ, & iræ, sic est in partibus. Omnibus .n. lex ista communis est posita, quod distinguantur ab inuicem secūdum substantiā, & distinctas habeāt operationes. Lex aut particularis est, quod vltra distinctionē substantiæ, & operationum quædam sunt, quorum oēs operationes sunt ordinatæ, & regulatæ ad bonum cōe, ita qđ

neque defectus, neque aliqd præter naturam contingat in eis. Ista aut sunt corpora cœlestia, & substantiæ separata, indefectibiles ex propinquitate ad primū mouens, se habent enim in vniuerso, sicut filij in domo. Quædam aut sunt, in quibus multa accidunt præter naturam, & pauce ex actionibus eorū conferūt bono vniuersi, & ista sunt entia inferiora corruptibilia. Propter elongationem enim à primo mouente plurima in eis à casu accidunt, & defectus multi, se habent enim in vniuerso, sicut serui, & bruta in domo patrisfamilias. Patet igitur ex dictis, quō natura vniuersi habet bonū separatum, & bonum intrinsecum. Verum aut deus de omnibus, & quō sollicitudinem habeat, determinatum est à nobis in quæst. metaph. nam super hunc tex. 52. fundata est quæstio de cura, & sollicitudine diuina.

Quantum ad tertium, aduerte, quod Arist. tres antiquorū opiniones recitat, & improbat, eo quod nulla earū seruat talem ordinem in vniuerso, quem supra posuimus. Prima opinio est eorum, qui posuerunt omnia fieri ex contrarijs. Secunda est eorum, qui posuerunt bonum esse principium oīum. Tertia est eorum, qui posuerūt species, siue ideas separatas. Qui ponunt omnia fieri ex contrarijs peccant in tribus. Primo, quia sola contraria sunt impassibilia adinuicem, non. n. albedo fit ex nigredine, sed potius destruitur, nō ergo in actione rei duo cōtraria sufficiunt, sed necesse est dari materiā, quæ nulli contrariatur, & ex qua, vt recipit vnū contrariū, & alterū abijcitur, ipsa res fit, vt declaratū est in 1. Phys. & in principio huius 12. Nec prodest, quod aliqui eorū posuerunt alterum contrariorū esse materiam, ponendo. n. omnia fieri ex æquali, q. inæquali, ex vno & multitudine, vt Platonici, & Pythag. dixerunt inæquale, & multitudinē, esse materiam, hoc inquam non prodest, qm̄ natura materiæ est, vt nulli sit cōtraria, sed sit in potentia receptiua cōtrariorum. Deficiunt secundo, quia nō omnia fiunt ex cōtrarijs, nec in sui substantiā est participatio contrariorum. nam cum prima contraria sint bonum, & malū, etiam in corporibus cœlestibus, & separatis esset malum. s. naturæ, puta corruptio, vel alteratio, quæ est via ad corruptionem, hoc aut est falsum, cum sint immutabilia s. substantiam, vt declaratum est su-

pra. Deficiunt tertio, quoniam dicentes omnia esse ex contrarijs non videntur contrarijs ad saluandum ea, quæ apparēt in rerum naturis, & inter reliqua sunt quatuor. Primo, quare aliqua sint corruptibilia, aliqua incorruptibilia non potest reduci in hoc principium, quod omnia sunt ex contrarijs. nam ex hoc potius sequitur, quod omnia sint corruptibilia, & propterea poetæ antiqui, ut effugerent hoc inconueniens, dixerunt omnia fieri ex non ente. Ex non ente autem aliqua fieri corruptibilia, ut inferiora, in quibus sunt alterabiles qualitates, aliqua autem incorruptibilia, ut corpora cœlestia elongata à contrarijs, & separata à materia. Aliquī autē nescientes reddere causam distinctionis in rebus, dixerunt oīa esse vnum, ut dictum est in j. Phys. sicut Parmenides, & Melissus. Secundo non possunt reddere causam, quare generatio est perpetua, & quæ sit prima, & vniuersalis causa generationis. Constat. n. neutrum contrariorum esse huiusmodi causam, sed aliquod perpetuum agens eleuatum super contraria, ut primum cœlū ex motu diurno, & planetæ, ut mouetur in obliquo circulo. Tertio nō possunt assignare causam, quare aliqua magis participāt de vno contrario, q̄ de alio, puta quare aīalia terrestria magis participant de calido, & sicco, aquatica autē de humido, & frigido. Idem etiam cōtingit his qui ponunt ideas esse causas generationis indiuiduorū, & indiuidua participare naturam idearū, non. n. pnt reddere causam, quare hoc indiuiduum prius participauit speciē, nūc autē non participant. Quarto, si prima principia sunt contraria, cum hæc scientia, quæ sapiētia est, & honoratissima sit de primo principio, sequitur quod hæc scientia habeat contrarium, & primum principiū habeat contrariū, quod tñ est falsum, quia oīa contraria hnt materiam, quæ est in potētia ad contraria, contraria. n. sunt, quæ sunt apta eidē in esse successiue, sed primū principiū non habet materiam, qm̄ ut dictū est supra, eius subltātia est purus actus, ergo &c. Qui autē ponunt bonū esse principium omniū defecerunt gñaliter, quia non dicunt in quo gñe sit principium, potest. n. esse principium, ut finis, ut agens, ut forma. Hæc enim tria sunt bona, materia vero secundū se non est bona, qm̄ bonum & perfectum sunt idem, sed materia, ut materia non est perfecta, sed


perfectibilis, cum sit ens potētiāle. Deficiunt autem in particulari Empedocles, & Anaxag. Empedocles quidem in duobus deficit. Primo, quia dicit amorem esse bonū, & illud esse principium agens, & materiale in his, quæ generātur. Agens quidē in quantum vnit, & congregat componibilia adinuicē materiale vero in quantum ingreditur compositionem. Ponit enim rem generabilem, constare ex lite & amicitia, & quatuor elemētis, vel quia amica facilius conueniūt in mixtura, est autem impossibile idē secundum eandē rationem esse agēs, & materiam, qm̄ est agens actu, & materia est ens in potentia, actus autē & potentia sunt distinctarum rōnum, vt declaratum est in 9. lib. Deficit secundo, qā dicit principium omnium rerū esse bonum, & cū hoc ponit litē, sicut amicitia esse principiū, ergo secundum ipsum lis est quoddā bonū, sicut amor, hoc autē est falsum etiam secundum ipsum, qm̄ dicit litē esse naturā mali, ergo non est qd bonum. Anaxagoras autē in duobus deficit. Primo, qā dicit bonum, quod est intellectus esse principiū, & mouere omnia, & tñ cum intellectus moueat, & agat pp̄ finem, non assignat finem, pp̄ quem mouet, nisi forte dicāt quod mouet pp̄ seipsum, sicut nos dicimus, quod sanitas quæ est in intellectu medici mouet pp̄ sanitatē acquirendam in ægro. Deficit secundo, qm̄ si vult sequi oēm opinionem antiquorum, q̄ ponebant rerum principia esse cōtraria, debuit assignare principiū contrariō intellectui. Qui vero ponūt species, siue ideas separatas, in aliquo bene senserunt, & in aliquibus defecerūt. Bene senserūt in hoc, quod præter entia sensibilia materialia posuerūt aliqua entia separata, aliter nō daretur primū rerum principiū optimum, quod est omnis boni principiū, & non esset talis ordo partiū vniuersi ad vnū bonum primum separatum, vt supra assignauimus, nec esset perpetua gñatio. nam pro causa perpetuæ gñationis assignauimus supra intelligētias causantes res inferiores, mediāte cœlesti motu, nec essent mota cœlestia corpora, eoꝝ. n. motrices assignauimus substantias æternas immateriales sine magnitudine, sed semper esset processus infinitus in principijs, si nō daretur primū principiū, processum autē infinitum in causis, & principijs destruximus in secūdo libro bene ergo in hoc senserūt. Defecerunt autē in hoc,

hoc, quod posuerunt hæc entia separata, non intelligentias mouētes cœlos, sed aliqui naturas vniuersales re& naturalū, vt speciem hoīs, speciem equi, de qbus satis diximus in 7. lib. & hæc opinio ascribitur ab Arist. Platoni. Aliqui autē ponūt mathe. separata, vt numeros, & magnitudines, & hæc opinio attribuitur Pythag. de qua locuti sumus in 3. lib. sed isti multipliciter peccant. primo, q̃a entia separata ponūtur vt primæ causæ productiuæ, & motiuæ, sed hmōi species, & numeri nō possunt esse tales causæ, q̃a vniuersalia nō agūt, & mathematica, quæ sunt quantitates non hñt virtutem actiuam. frustra igitur darentur hmōi entia separata. secundo, quia isti dicunt, magnitudinem causari à numero hoc autem est falsum, q̃a non potest continuū causari ex nō continuo, neque in gñe causæ motiuę, siue efficiētis, neque in gñe causæ formalis. tertio, si species & numeri sunt prima principia, cum in eis nō sit contrarietas, sequitur prima principia nō esse contraria, neque factiua, neque motiua, ex q̃nti non erit generatio re& æterna. Est enim generatio æterna, vt dictum est supra, pp̃ prima principia motiua æterna, non ergo species & numeri sunt prima principia, ex q̃nti vanæ ponuntur esse entia separata. quarto nullus istoz potest dicere, à quo sint isti numeri sensibiles, & à quo vnum sensibile, & à quo anima, vt anima, & à quo corpus, vt corpus, & à quo sunt distinctæ rerū species, nisi dicant, vt nos, quod sunt ab efficiente, sed neque species quæ sunt vniuersalia quædā, neque magnitudines, neque numeri sunt causæ efficiētes, ergo vana est positio eorum. quinto, peccāt in hoc quod auferūt ordinem partium vniuersi inter se, & omnium ad vnā primam naturam, q̃ ponunt numerum mathematicum esse primam naturam, & post numerum magnitudinē, & post magnitudinem hæc sensibilia, dñt aliud esse principiū numeri, aliud magnitudinis, aliud ho& sensibile, & ponūt hæc principia nō subordinari, nec reduci ad vnum primū. Similiter dñt naturas principiatas non ordinari adinuicem, nec vnā alteri cōferre, ex consequenti, per accidens est, quod vna existente alia sit. Ex his autē aufertur totaliter ordo ab vniuerso, ex cōsequenti bona dispositio entiū, quæ se habēt in vniuerso vt partes vnius dominij, in quo si plures sint principes non subordinati.

76
E P I T O M E L I B. XII.
ordinati, ita quod non fiat reductio ad vnū primum, non bene disponitur dominium, si ergo in vniuerso darentur plura principia prima, entia male disponderentur, quod non est ad mittendum. nam si vnumquodque videmus optime dispositum secundum modum naturæ suæ, multo magis dispositio totius vniuersi debet esse optima. Oportet igitur in domino vniuersi deuenire ad vnum primum vniuersalem optimum Principem, à quo sit omnis virtus, omnis bonitas communicata naturis entium, prout unicuique congruit, & hic est Deus gloriosus, ac benedictus in secula. Amen.

F I N I S.

Series literarum



SECUNDA, ET VLTIMA PARS.

a b c d e f g h i k l m n o p q r s t u x y z.
A B C D E F G H I K L M N O P Q
R S T V X Y Z, AA BB CC DD.

Omnes quaterniones, præter DD,
duernio.

V E N E T I I S,
APVD IOANNEM MARIAM
B O N E L L V M.

M▷ D▷ LXIIII▷

F 171E

LABORATORIO

A. Lombardi

Via Valsolda n. 125-127

Tel. 899908

311

